

Holy Bible

Aionian **Edition®**

**Ruáingga Injil Córif
Rohingya Kitabul Mukaddos**

Holy Bible Aionian Edition ®
Ruáingga Injil Córif
Rohingya Kitabul Mukaddos
Language: Rohingya
Myanmar (Rakhine), Bangladesh (Chittagong)

Creative Commons Attribution ShareAlike 4.0 International, 2018-2026

Source text: eBible.org

Source version: 8/8/2026

Source copyright: Creative Commons Attribution ShareAlike 4.0

The Word for the World International, 2024

Formatted by Speedata Publisher 5.9.2 (Pro) on 8/31/2026

100% Free to Copy and Print

TOR Anonymously and <https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language

Translator resources at <https://AionianBible.org/Third-Party-Publisher-Resources>

Volunteer help and comments are welcome and appreciated!

Celebrate Jesus Christ's victory of grace!

Preface

Ruáingga at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

Ruáingga at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
06/21/25 - 468 translations now available in 230 languages.
09/01/25 - 538 translations now available in 291 languages.
08/31/26 - 539 translations in 291 languages with 9,609,899 verses.

Table of Contents

NEW TESTAMENT

Moti	1
Markus	30
Lukás	49
Yohánna	81
Hamól	105
Romiól	137
1 Kórintiól	151
2 Kórintiól	164
Galatiól	173
Íficiól	178
Filíppaiól	183
Kolóciól	186
1 Tisólóniól	189
2 Tisólóniól	192
1 Timóti	194
2 Timóti	198
Titus	201
Filimon	203
Hibraniól	204
Yakub	214
1 Fitor	218
2 Fitor	222
1 Yohánna	225
2 Yohánna	229
3 Yohánna	230
Yohúdah	231
Zahéri	232

APPENDIX

Reader's Guide

Glossary

Maps

Destiny

Illustrations, Doré

NEW TESTAMENT



Isá ye hoór de, “Ó Baf, itará re maf goró; kiyólla-hoilé itará kii gorér de híyan itará no zane.”

Baade itara loṭári mari itarar bútoṛe Íbar hoorsuor ore bák goijjé.

Luke 23:34

Moti

1 Isá Mosih óilde Dawud or nosól or, aar Dawud óilde Ibrahim or nosól or. Isá Mosihr fissán or foriso endilla: **2** Ibrahim or fua Isahák; Isahák or fua Yakub; Yakub or fua Yohúdah edde yóggwar báiyain. **3** Yohúdah fua Fares edde Zera, aar ítarar maa accíl Tamar; Fares or fua Hisron; Hisron or fua Ram. **4** Ram or fua Amminadab; Amminadab or fua Nacon; Nacon or fua Sálmon. **5** Sálmon or fua Boaz, yóggwar maa accíl Rahába; Boaz or fua Obed, yóggwar maa accíl Ruút; Obed or fua Jesi. **6** Jesir fua baáñcca Dawud. Dawud or fua Sóloman, yóggwar maa óilde Borciba, zibá age Uriyar bou accíl. **7** Sóloman or fua Rehobom; Rehobom or fua Abiya; Abiyar fua Asa. **8** Asar fua Jehócafát; Jehócafát or fua Joram; Joram or fua Uziya. **9** Uziyar fua Jotam; Jotam or fua Aház; Aház or fua Hézekiya. **10** Hézekiyar fua Manasé; Manasér fua Amon; Amon or fua Josíya. **11** Josíyar fua Jekoníya edde yóggwar báiyain. Ítarar zormo oñtté óoil zeñtté Isráil koum ore bondi banai Babilon dec ot loizar. **12** Ín óilde ítara re bondi banai Babilon ot loizai baade: Jekoníyar fua Cáltyiel, Cáltyiel or fua Zerubabel. **13** Zerubabel or fua Abihúd; Abihúd or fua Eliyakím; Eliyakím or fua Azor. **14** Azor or fua Sádok; Sádok or fua Akim; Akim or fua Elihúd. **15** Elihúd or fua Eliyazar; Eliyazar or fua Matan; Matan or fua Yakub. **16** Aar Yakub or fua óilde Moriyam or hócom Yusúf. Hé Moriyam ottu Isá zormo óoil, zibá re Mosih bóuli hoó. **17** Héndilla góri Ibrahim ottu lóti Dawud foijjonto soiddó fissán. Dawud ottu lóti Babilon ot bondit loiza foijjonto soiddó fissán; aar bondi banai Babilon ot loiza ttu lóti Mosih foijjonto soiddó fissán. **18** Isá Mosihr zormo endilla gori óiye: Íbar maa Moriyam or zuragatá Yusúf lóí óoil, montor ítara milmilab goríbar age, Pak-Ruhr kudurute híba hámil óiye de faa giyé. **19** Híbar hócom Yusúf forhésagar manúc accíl. Yóggwa ttu zettót Moriyam ore maincór muúntu córom díto mone no hoór, híba ttu zuitégori alok óizaytoi niyot goijjíl. **20** Yóggwa ye híyan báfer de októ, Mabud or ek fírista ye yóggwa re cóppon ot dahá dí hoór de, “Ó Dawud or nosól Yusúf, Moriyam ore biyá goitté no dóoraiyó, kiyólla-hoilé híbar ferot ze Fua óiye Íba Pak-Ruhr kudurute óiye deh. **21** Híba ttu éggwa Morotfua óibo, tuñí Íbar nam Isá

rakíba, kiyólla-hoilé Íba ye Nizor manúc ókkol ore ítarar guná ttu basaibó.” **22** Hín beggún etollá óiye, zeéne Mabude nobir duara hoóil de yían fura ó, **23** “Soó, ek kuwári mayafua hámil óibo, aar híba ttu éggwa Morotfua óibo, ítara Íbar nam rakíbo de Immanuel,” ziyán or torjuma óilde, ‘Alla añárar fúañti.’ **24** Baade Yusúfe gúm ottu urí undilla goijjé zendilla gorí bolla Mabud or fírista ye yóggwa re hókom díyl, yóggwa ye Moriyam ore biyá gorífelaiye, **25** montor híba ttu Fua wa zormo nó óiyo foijjonto híba llóí milmilab nó goré. Baade yóggwa ye Fua war nam Isá raikkíl.

2 Yohúdiya elakar baáñcca Hérud or hale, Betélhem cóor ot Isá zormo ói baade, fuk mikká ttu hoozzon fonít Jerúsalem ot aiccé, **2** aái hoór de, “Yohúdi ókkol or Baáñcca zibá zormo óiye Íba horé? Añára fuk mikká Íbar tara deki Íba re sóida goittó aiccí deh.” **3** Híyan fúni baáñcca Hérud ferecan óigilgoi, héndilla Jerúsalem or manúc beggún óu. **4** Yóggwa ye doónr imam ókkol edde alem ókkol beggún ore ekkán ot dolagorí, ítara ttu Mosih horé zormo óibar asé híyan zasai goijjíl. **5** Ítara yóggwa re hoór de, “Yohúdiya elakar Betélhem ot, kiyólla-hoilé nobi ye endilla leikké: **6** ‘Ó Yohúdiya elakar Betélhem, Yohúdiyar hókomot-goróya ókkol or bútoe tui honó mikká ttu cóñro no; kiyólla-hoilé tor bútotu eén ézzon Hókomot-goróya aibó, zibá ye Añr bonda Isráili re soraibó.’” **7** Hétunot Hérude fonít tún ore aiddone matai zaniloiyé de, tara wa borabor hotúnót dahá gíyl. **8** Baade yóggwa ye ítara re eén hoói Betélhem ot diferáiyé, “Tuáñra zai hé gura Fua wa re cúndorgori tuwogói. Íba re loot faile añré hóbor díyo, zeéne añ yó aái Íba re sóida gorí fari.” **9** Ítara baáñccar hotá fúni bacá lóiyé, aar ítara fuk mikká ze tara deikkíl, yíba Fua wa ziyóñt asé ínyot zai nó tíya foijjonto ítarar age-age zaat accíl. **10** Tara wa deki ítara ódorbaára kúci óiye. **11** Ítara gór gán ot foónsi yore, Fua wa re Íbar maa Moriyam or fúañti deikké; baade ítara merit fori Íba re sóida goijjé. Tarfore ítara nizor baccú gún kúli cúna, luban edde mur añtor ókkol Íba re hádiya diiyé. **12** Aar Hérud or hére waafes no zaito cóppon ot Allar torfóttu úñciyari fai, ítara arek boli nizor mulluk ot fíri giyyégoi. **13** Fonít tún zaigói baade, Mabud or ek fírista ye Yusúf ore cóppon ot dahá dí hoór de, “Uró, Fua edde Íbar maa re looi líjp ot

dáizogoi. Añi zetódin nó hoói hétodin foijjonto hére tákiyo, kiyólla-hoilé Hérude Fua wa re marifélai bolla tuwaibó.” 14 Hétunot Yusúf urí rait tákite Fua edde íbar maa re looi, Ijíp olla bacá lóiyé, 15 aar Hérud nó more foijjonto hére táikkil. Híyan etollá óiyé, zeéne Mabude nobir duara hoóil de yían fura ó, “Añi Añr Fua re Ijíp ottu ðahai ainní.” 16 Hérude zeñtté Fonðit túne yóggwa re bóoñt díye de zainné, yóggwa ttu bicí guccá uitté; aar hé fonðit tún ottu ze októrt hotá zanilóil hé októrt ísaf mozin, Betélhem ot edde híyan or atehañsór zaga ókkol ot ðui bosór edde yár nisor zedún morotfuain asé, ítarar hañse manúc diferái ítara beggún ore marifélaiye. 17 Híyane nobi Yarmíyahr duara hoóil de yían fura óiyé, 18 “Ramá cóor ot eggwá abas fúna gíyeh, hañdanir edde bicí ferecanir. Rahéla ye nizor fuain dor lla hañder, aar tosóllo kobul no gorér, kiyólla-hoilé ítara ar náí.” 19 Zeñtté Hérud morigiyói, Mabud or ek fírista ye Yusúf ore Ijíp ot cóppon ot dahádiye, 20 aar hoór de, “Uró, Fua edde íbar maa re looi Isráil mulluk ot waafes zoogói, kiyólla-hoilé zetará niki Fua wa re zane marifélaito tuwaail ítara morigiyói.” 21 Tói Yusúf urí, Fua edde íbar maa re looi Isráil mulluk ot waafes aáigiyoi. 22 Montor yóggwa ye zettót endilla fúinne, Arkeláyose Yohúdiyat tar baf Hérud or zagat hókumot gorér, tói yóggwa hére zaite ðooraiyé. Baade cóppon ot Allar torfóttu uñciyari fai, Galil elakat giiyégoi, 23 aar zai Nasárat nam or ekkán cóor ot bocót gorát doijje. Héndilla etollá óiyé, zeéne nobi ókkol or duara hoóil de yían fura ó, “Íba re Nasári howá zaybo.”

báptisma loito yóggwar hañse aiyér de deikké, yóggwa ye ítara re hoór de, “Ó háf or fuain ókkol! Aibár gozzob ottu dáizayboi lla tuáñra re hone uñciyari díye? 8 Touwá lói mil há de héndilla gulagala ókkol dóro, 9 aar nizor dil ot endilla kíyal nu ainnó de ki, ‘Añára ttu toh baf ísafe Ibrahím asé.’ Añi tuáñra re hoóir, Alla ye sailé e cíl lun ottu yó Ibrahím olla fuain foida gorí fare. 10 Aar ehón toh gas or gurat kuróil raká gíyeh. Hétolla, ze gas ot gom gula no dóre, yíba re harí ooin ot félaidiya zaybo. 11 Añi de tuáñra touwá goijjó de hétolla éna tuáñra re fanít báptisma díh; montor añi baade zibá aiyér, íbar tokka añr túaro ðoóñr. Añi íbar centár boi bolla úddwa laayek no. Íba ye tuáñra re Pak-Ruh edde ooin loi báptisma díbo. 12 Íbar kula íbar át ot asé; íba ye Nizor hónla re cúndorgori sáf goríbo, aar íbar gíyuñ re gudam ot zoma goríbo, montor suwa gún ore íba ye honódin no nifé de ooin ot furat dífélaiibo.” 13 Hé din ókkol ot, Isá báptisma loito Galil ottu Jordán hál or hañsat Yaháyar hére aiccé. 14 Montor Yaháya ye íba re endilla hoói maná goittó kucic goijjil, “Añr ttu éna Tuáñr hañsóttu báptisma loibar zorur, aar Tuñí añr hañse aiccó dé?” 15 Montor Isá ye zuwabe yóggwa re hoór de, “Ebar yían óito dóh, kiyólla-hoilé endilla gori añára ttu, Alla ye saár de híyan fura gorár zorur.” Tói yóggwa razi óiyé. 16 Isá báptisma loi mottor, faní ttu kul ot uittégai. Hétunot asman kúligiyoi, aar íba ye deké de, Allar Ruh hoitor or ðóilla ói lami aái íbar uore boiyér. 17 Aar héñtte asman ottu éggwa abas aiccé, eén hoór de, “Íbá Añr adorja Fua, íbá re lói Añi bicí kúci.”

3 Ek din báptismadoya Yaháya aái, Yohúdiyar moidan zagat endilla hoói tobolik gorát doijje, 2 “Touwá goró, kiyólla-hoilé asmani raijjo ðáke aáigiyoi.” 3 Yóggwa óilde ubá zibár baabute nobi Yesáyah ye hoóil de, “Moidan zagat ezzone guzori-guzori eén hoór, ‘Mabud or foñt toiyar goró; íbar rasta uzu goró.’” 4 Yaháya ye uñt or keñc loi banaiya hoor fiñdíto, aar yóggwar keeñil ot samarar duali baindá tákito. Yóggwar hána accíl de fíring edde zooñl or modú. 5 Hé októrt Jerúsalem ottu, tamám Yohúdiya ttu, edde Jordán hál or sairókul ttu manúc ókkol yóggwar hañse giiyé, 6 aar nizor-nizor guná ókkol cíkar gorí, ítara Jordán hál ot yóggwa ttu báptisma loiyé. 7 Yóggwa ye zeñtté Féroci ókkol edde Sadukái ókkol boóut zone

4 Yárbaade Pak-Ruh ye Isá re moidan zagat loigiyé, zeéne íba re íbilíce entán goré. 2 Salic din salic rait ruza rakí baade íba ttu búk laiggé. 3 Hé októrt entán-goróya aái íba re hoór de, “Zodi Tuñí Allar Fua de óile, e fattórt gún ore ruñi óizaytoi hókum dóh.” 4 Montor íba ye zuwabe hoór de, “Pak-kalam ot endilla asé, ‘Manúc siríf ruñi loi base de no, bólke Allar muk ottu neele de hárr hotá lói beh base.’” 5 Tói hé íbilíce íba re pak cóor gán ot loizai, baitul-mukaddos or tullit tíyagaraiye, 6 baade íba re hoór de, “Zodi Tuñí Allar Fua de óile, nise záp maro; kiyólla-hoilé pak-kalam ot toh endilla asé, ‘Íba ye Tuáñr baabute Nizor fírista ókkol ore hókum díbo; tói ítara nizor áte Tuáñre dórifelaibo, zeéne Tuáñr ténge honó fattórt ot

duk no faa.” 7 Isá ye ítare hoór de, “Pak-kalam ot toh yán óu asé, “Tuñí tuáñr Mabud Alla re entán no goríba.” 8 Tarfore Íbilíce Íba re eggwá uñsol faár ot loizai, duniyair tamám raijjo ókkol edde híin or fura cáandari daháiyé. 9 Tói íte hoór de, “Zodi Tuñí merít fori añré sóida goró, añí iín beggún Tuáñre diífélaiyum.” 10 Isá ye ítare hoór de, “Cóitan, dur ó! Pak-kalam ot endilla asé, “Tuñí tuáñr Mabud Alla re beh sóida goríba, aar siríf Íbar beh ebaadot goríba.” 11 Hétunot Íbilíce Íba re eri giyyégoi, aar fírsta ókkol aái Íba re hédmot gorát doiije. 12 Zeñtté Isá ye Yaháya re ziyól ot díye de fúinne, Íba Galil ot giyyói; 13 aar Nasárat cóor félai, Zebulun edde Naftalir zagat díir hañsa loi asé de Kaparnahúm cóor ot zai táikkégoi. 14 Híyan etollá óiye, zeéne nobi Yesáyahr duara hoóil de yán fura ó, 15 “Zebulun or elakat edde Naftalir elakat, doiijar rastat, Jordán hál or okule, Beyohúdi ókkol or Galil ot, 16 ze manúc ókkol andár ot accíl, ítara ekkán ðoóñr foór deikké, zetará moot or andárja mulluk ot accíl, ítara hañse foór óiye.” 17 Hé októt lóti Isá ye eén hoói tobolik gorát doiije, “Touwá goró, kiyólla-hoilé asmani raijjo ðáke aáigiyoí.” 18 Isá Galil Díir hañsa báy áñri zaar de októt, Íba ye duwá bá deikké, yáni Sáimon, zibá re Fitor ðaikké edde Íbar bá Enderiyas ore. Héñtte ítara díit zal marer, kiyólla-hoilé ítara zailla accíl. 19 Íba ye ítara re hoór de, “Añr fisáli doro, Añí tuáñra re manúc dóre de zailla banaiyúm.” 20 Ítara éhon or bútoe ítara zal lun eri, Íbar fisáli doiije. 21 Híyan ttu aró hoddúr giyyé rár, Íba ye aró dui bá deikké, yáni Zebedair fua Yakub ore edde yóggwar bá Yohánna re. Héñtte ítara noowr uore ítara baf Zebedair fúañti zal tuner. Íba ye ítara re mataiyé, 22 hétunot ítara éhon or bútoe noow gán edde baf ore eri, Íbar fisáli doiije. 23 Isá ye Galil or agagura zai-zai Yohúdir mujilíc-hána ókkol ot taalim dito edde raijjo kúchóbor tobolik goittó, aar maincór fottí kisím or biyaram edde fottí kisím or ocúk ókkol gom goittó. 24 Íbar hóbor Síriyar agagura fóligilgoi; aar maincé biyaraimma zetará ttu ðoilla-boðoilla biyaram asé edde duk faar, zetará búte-faiya, zetará ttu súañfira asé, zetará añtur, ítara beggún ore Íbar hañse ainné, aar Íba ye ítara re gom goijjé. 25 Galil ottu, Dekapólis ottu, Jerúsalem ottu, Yohúdiya ttu, edde Jordán hál or farkul ottu dol-dol manúc Íbar fisá doiijil.

5 Manúc or dol deki Isá eggwá faár or uore uiñtégói, aar Íba boiccé rár, Íbar cárit tun Íbar hére aiccé. 2 Hétunot Íba ye Nizor muu kúli ítara re endilla taalim diyat doiije: 3 “Mubarek uitará, zetará ruúhanir gorif, kiyólla-hoilé asmani raijjo toh ítara. 4 Mubarek uitará, zetará ferecanit asé, kiyólla-hoilé ítara tosóllo faibo. 5 Mubarek uitará, zetará cída, kiyólla-hoilé ítara toh duniyai miras faibo. 6 Mubarek uitará, zetará Allar moncá mozin goittó búkki edde tiráci, kiyólla-hoilé ítara hé moncá furafuri fura óibo. 7 Mubarek uitará, zetará rahám dil ola, kiyólla-hoilé ítara re rahám gorá zaybo. 8 Mubarek uitará, zetarár dil sáf, kiyólla-hoilé ítara Alla re dekiibo. 9 Mubarek uitará, zetará sólluk goríde, kiyólla-hoilé ítara re Allar fuain howá zaybo. 10 Mubarek uitará, zetará Allar moncá mozin goróne zulúm faa, kiyólla-hoilé asmani raijjo toh ítara.” 11 “Mubarek tuáñra, zeñtté maincé Añr lla bóuli tuáñra re beizzoti goré, zulúm goré, edde na hókkot tuáñrar baabute hárr dóilla bura-ára ókkol hoó. 12 Héñtte tuáñra kúci goijjó edde kúci óiyo, kiyólla-hoilé tuáñra lla asman ot ðoóñr boccíc asé. Tuáñrar age ze nobi ókkol accíl ítara re yó maincé héndilla zulúm goittó. 13 “Tuáñra óilade duniyair nun; montor zodi nun or dok zaagói, híin ore keéngori abar nuncá gorí fara zaybo? Híin toh ar honó ham ot nu aiyé. Híin ore baáre félaidiya zah, aar maincór úñran ot fore. 14 “Tuáñra óilade duniyair nur. Faár or uore bañdá giyeh de cóor toh lukai ráki fara no zah. 15 Honó maincé serak dórai báñir or tole raké de náí, bókke boiñónir uore beh raké, tói híyane gór ot asé de beggún ore foór déh. 16 Héndilla góri, tuáñrar foór maincór muuntu zolouk, zeéne ítara tuáñrar gom ham ókkol deki tuáñrar asmani Baf or mohíma goré. 17 “Tuáñra endilla no táaijjo de ki, Añí Muúsar Córivot yáh nobi ókkol or cíkka baatel goittó aiccí. Añí híin baatel goittó aiccí de no, bókke fura goittó aiccí deh. 18 Añí tuáñra re sóiyi hoóir, zetódin asman zobin ñiki tákibo, Córivot óu ñiki tákibo, héntu honó noktá yáh zer zobor no búzibo zetódin híin beggún fura nó óiyo. 19 Hétolla, zee niki hé hókum ókkol ottu ebbe cóñro ekkán hókum ore baatel goré aar oinno zon ore yó héndilla goittó cíka, ítare asmani raijjo ebbe cóñro howá zaybo; montor zee niki híin amól goré edde cíka, ítare asmani raijjo ðoóñr howá zaybo. 20 “Kiyólla-hoilé Añí tuáñra re hoóir, zodi tuáñrar

forhégari alem ókkol or edde Féroci ókkol or forhégari túaro bicí no, tuánra asmani rajjot bilkul góli no faribá. 21 “Tuánra fuinnila de ki, agor zobanar maincóre endilla howá gýl, ‘Kún no goríba, zee niki kún goré, ítar ttu adalot ot zuwab diya foribó.’ 22 Montor Añí tuánra re hoóir, zee niki nizor báior uore guccá goré, ítar ttu adalot ot zuwab diya foribó. Aar zee niki nizor báí ore, ‘Tui behazor,’ hoó, ítar ttu bor adalot ot zuwab diya foribó. Aar zee niki nizor báí ore, ‘Tui bekuf’ hoó, íte zuzuk or ooin or sáñzar laayek óibo. (Geenna g1067) 23 “Hétolla tuñ kurbani-gáñr uore kurbani peec goríbarcot, zodi tuáñr ttu monet uré de ki, tuáñr báí ottu tuáñr ulđa kessú hoibár asé, 24 hétunot tuáñr kurbani hé kurbani-gáñr muúntu eri zaiyogói. Zai yore age tuáñr báí lói bonizogói, baade aái yore tuáñr kurbani diyogái. 25 “Tuáñr lla bisar goittó zaar de manúc lói foñt ot tákite toratori maamela hól gorifelaiyo, arnóile íte tuáñre joc or át ot gosáidibo, aar joce tuáñre fulic or át ot gosáidibo, baade tuáñre ziyól ot difélaibo. 26 Añí tuáñre sóiyi hoóir, tuñí ahéri foicá nó doo foijjonto héntu hálas ói no faribá. 27 “Tuánra endilla howá gýl de fuinnila, ‘Zená no goríba.’ 28 Montor Añí tuánra re hoóir, zodi honókiye honó mayafua re bura kíyale saá, íte nizor dile-dile híba llói zená gorifelaiye. 29 Zodi tuáñr den dák or suké tuáñre gunár uzu țane, tooile yíba neelai félaido. Kiyólla-hoilé tuáñr guñra gaa zuzuk ot zaar túaro, tuáñr gaar ekkán híssa no tákon tuáñr lla beétor. (Geenna g1067) 30 Zodi tuáñr den áte tuáñre gunár uzu țane, tooile híyan harí félaido. Kiyólla-hoilé tuáñr guñra gaa zuzuk ot zaar túaro, tuáñr gaar ekkán híssa no tákon tuáñr lla beétor. (Geenna g1067) 31 “Endilla yó howá gýl, ‘Zee niki nizor bou ore sárfefe, íte híba re sárhobos douk.’ 32 Lekin Añí tuánra re hoóir, zee niki nizor bou ore zenár hosúr lói bade oinno honó hosúri lói sárfefe, íte híba re zená gorába; aar zee niki sárfelaiya mayafua re biyá goré, íte yó zená goré. 33 “Tuánra aró fuinnila de ki, agor zobanar maincóre endilla howá gýl, ‘Misá hosóm na háiyó, bólke tuñí ziyán olla hosóm háiyó, híyan Mabud or hañse fura goríba.’ 34 Lekin Añí tuánra re hoóir, tuánra bilkul hosóm na háiyó, asman or name yó na háiyó, kiyólla-hoilé híyan toh Allar toktó. 35 Zobin or name yó na háiyó, kiyólla-hoilé híyan toh íbar foo rakíbar banggú. Jerúsalem or name yó na háiyó, kiyólla-hoilé híyan óilde bor Baáñccar cóor. 36

Nizor matá dóri yó hosóm na háiyó, kiyólla-hoilé tuñí toh ekkán sul úddwa dóla yáh hala gorí no faro. 37 Montor tuánra baná eddúr hoiyó, óile ‘ói’ aar no óile ‘no,’ yár baäre ziín aiyé híin óilde íbilíc or torfóttu. 38 “Tuánra endilla howá gýl de fuinnila, ‘Suk or bodol suk, aar dat or bodol dat.’ 39 Montor Añí tuánra re hoóir, honó hóraf manúc lói mukabela no goijjó. Bólke zee niki tuáñre den dák or galsaba sái suwar mare, ítare oh dák óu fíraidiyo. 40 Aar zodi honókiye tuáñr kuruta loifélaito tuáñr lla mooddima goittó saá, ítare tuáñr saddor óu diifélaiyo. 41 Zodi honókiye tuáñre ek mail zaito bolazuri goillé, ítar fúañti dui mail zaiyo. 42 Zee niki tuáñr ttu mage, ítare diiyo; aar zee niki tuáñr ttu udár saá, ítare no fíraiyo. 43 “Tuánra endilla howá gýl de fuinnila, ‘Nizor atehañsór maincóre muhábbot goríba, aar ducon ore nafórot goríba.’ 44 Montor Añí tuánra re hoóir, tuáñrar ducon ókkol ore muhábbot goijjó; aar zetará tuáñrar uore zulúm goré, ítara lla dua goijjó, 45 zeéne tuánra tuáñrar asmani Baf or fuain tóoro; kiyólla-hoilé íba ye toh gom hóraf duní gún or uore íbar beil or foór deh, aar forhégar or uore edde kuham-goróyar uore zór diferá. 46 Zodi tuánra cúdu tuánra re muhábbot goré de ítara re muhábbot goró, tooile súwab kiyólla faiba? Házana-tulóya ókkole úddwa kí héndilla no goré né? 47 Aar zodi tuánra cúdu tuáñrar báiyain dore sólam dóh, tooile tuánra oinno manúc ókkol or túaro bicí kii gorór? Beyohúdi ókkole úddwa kí héndilla no goré né? 48 Hétolla tuáñrar asmani Baf zendilla furafuri sóiyi, héndilla tuánra yó furafuri sóiyi ó.”

6 “Hóboroddar, tuáñrar forhégari ham maincór muúntu ítara re dahái bolla no goijjó; arnóile tuánra tuáñrar asmani Baf ottu honó boccíc no faiba. 2 “Hétolla zeñtté tuñí sótká goró, héñtte cíañ matai elan no goijjó, zendilla munafék ókkole maincór ttu taarif fai bolla mujilíc-hána ókkol ot edde rasta-rasta goré. Añí tuánra re sóiyi hoóir, ítara ítarar boccíc furafuri faifélaiye. 3 Montor zeñtté tuñí sótká goró, héñtte tuáñr den áte kii gorór de híyan tuáñr ban át ore zainto no diyó, 4 zeéne tuáñr sótká gorá aiddone ó. Tói tuáñr Baf, zibá ye aiddon ot deké, íba ye tuáñre boccíc diibo. 5 “Zeñtté tuánra dua goró, munafék ókkol or dóilla no óiyó; kiyólla-hoilé ítara maincóre dahái bolla beh mujilíc-hána ókkol ot edde

rastar kuna-kuna tíyai yore dua gorá fosón goré. Añí tuáñra re sóiyi hoóir, itara itarar boccíc furafuri faifélaiye. **6** Montor zeñtté tuñí dua goró, tuáñr kamárar bútoze góli, duwar bañdfelai tuáñr Baf or hañse dua goríyo, zibá aiddone asé. Tói tuáñr Baf, zibá ye aiddon ot deké, íba ye tuáñre boccíc diibo. **7** Zeñtté tuáñra dua goró, Beyohúdi ókkol or dóilla behazor hotá ókkol no duaráyo, kiyólla-hoilé itara táare de, itarar bicí hotár zoriya itarar dua kobul óibo. **8** Hétolla hoóir, tuáñra itarar dóilla no óiyó; kiyólla-hoilé tuáñrar Bafe toh íba ttu magibár age lóti tuáñrar zorurot zane. **9** Hétolla tuáñra endilla dua goijjó: ‘Ó añárar asmani Baf, Tuáñr nam pak mana zouk. **10** Tuáñr raijjo aiyók. Tuáñr moncá zendilla asman ot fura ó, héndilla duniyait óu fura óuk. **11** Aijjar hána añára re aijja doo. **12** Añárar hosúri maf goró, zendilla zetará añára llói hosúri goijjé, itara re añára yó maf goijjí. **13** Añára re entán ot foitto no diyó, bólke íbilíc ottu basai rakó. Kiyólla-hoilé raijjo, taakot aar mohíma toh hámica Tuáñr.’ **14** Kiyólla-hoilé zodi tuáñra oinno zon or hosúri maf goró, tooile tuáñrar asmani Bafe yó tuáñra re maf gorídibo. **15** Montor zodi tuáñra oinno zon or hosúri maf no goró, tooile tuáñrar Bafe yó tuáñrar hosúri maf no goríbo. **16** “Tuáñra ruza rakó de októt nakmuk hala no goijjó, zendilla munafék ókkole goré, kiyólla-hoilé itara siyára bodole de toh ruza raikké de híyan maincóre dahái bolla. Añí tuáñra re sóiyi hoóir, itara itarar boccíc furafuri faifélaiye. **17** Montor tuñí zeñtté ruza rakó, matát tel diyo, aar muk dúiyó, **18** zeéne tuñí ruza raikkó de híyan maincé no, bólke tuáñr Bafe zane, zibá aiddon ot asé. Tói tuáñr Baf, zibá ye aiddon ot deké, íba ye tuáñre boccíc diibo. **19** “Nizor lla dón-cómbotti duniyait zoma no goijjó, zeřé fuke edde zooñre borbad diféle, aar zeřé sur ókkole berá harí sur gorífele. **20** Bólke nizor lla dón-cómbotti asman ot zoma goró, zeřé no fuke aar no zooñre nac goré, aar zeřé sur ókkole berá harí sur no goré. **21** Kiyólla-hoilé tuáñrar dón-cómbotti zeřé, tuáñrar dil tákibo de yó hére. **22** “Gaar serak óilde suk; hétolla tuáñr suk gom asé de óile, tuáñr guñra gaa foóre furaiya óibo. **23** Montor tuáñr suk hóraf de óile, tuáñr guñra gaa andáre furaiya óibo. Hétolla, tuáñr bútoze ze foór asé híyan zodi andár de óile, tooile hé andár hotó gutguitta óibo fáñllar! **24** “Honókiye dui girós or hédmot gorí no fare;

kiyólla-hoilé ite ezzon ore nafórot goríbo aar ar ezzon ore muhábbot goríbo; yáto ezzon loi tík tákibo aar ar ezzon ore hékarot goríbo. Tuáñra ekku fúañti Allar edde dón-doulot or hédmot gorí no faribá. **25** “Hétolla Añí tuáñra re hoóir, kii háiyum yáh kii fiýum hoi zindigi lla sinta no goijjó; aar kii fiñdíyum hoi gaa lla sinta no goijjó. Zindigi ki hánar túaro kimoti no né, aar gaa ki hoorsuor or túaro kimoti no né? **26** Asman or faik ókkol or baabute báfiso; híne toh no cíñre, no daa, aar no gudam ot zoma goré, tooú tuáñrar asmani Bafe híin ore háaba. Tuáñra kí híin or túaro kimoti no né? **27** Tuáñra hone sinta gorí nizor hóiyat ore ek gónđa barái faribá de asó? **28** “Hoorsuor olla kiyá sinta goró? Báfiso, moidan or fúl ókkol keéngori barí uré; híne toh no meénnot goré aar no fúñta haře. **29** Montor Añí tuáñra re hoóir, bañcca Sólomane úddwa yóggwar tamám dón-doulot lói híin ekgwár dóilla nizoré hánzai faijje de náí. **30** Hétolla, zodi Alla ye moidan or kér ore héndilla góri hánza, zín aijja asé aar haila ooin ot félaidiya zah; tooile ó hom biccác ola ókkol, íba ye tuáñra re aró bicí no hánzaibo né? **31** Hétolla hoóir, ‘Añára kii háiyum? Kii fiýum?’ yáh ‘Kii fiñdíyum?’ hoóí sinta no goijjó. **32** Kiyólla-hoilé Beyohúdi ókkole éna híin beggún or fisé lagi táke. Tuáñrar asmani Bafe toh zane, tuáñra ttu híin beggún lager deh. **33** Age Allar raijjoz edde íbar moncá mozin solibár talac ot táko, tói tuáñra re híin beggún óu diiya zaybo. **34** “Hétolla, haila lla sinta no goijjó; kiyólla-hoilé hailar dine haila lla sinta goríbo. Din or duk din olla kafi.

7 “Hosúri no doijjo, tói tuáñrar hosúri yó dóra no zaybo. **2** Kiyólla-hoilé zendilla gori tuáñra hosúri dóro, héndilla góri tuáñrar hosúri yó dóra zaybo; aar tuáñra ze mafe diiba, tuáñra re yó hé mafe diiya zaybo. **3** “Tuñí tuáñr báí or suk ot asé de hál lan kiyá dekór, montor tuáñr nizor suk ot asé de hodda gán ót no gorór? **4** Nizor suk ot hodda táki baade tuñí keéngori tuáñr báí ore hoór, ‘Aiyó, añí tuáñr suk ottu hál lan neelaifélai’? **5** Ó munafék! Age tuáñr nizor suk ottu hodda gán neelaifélo, baade tuáñr báí or suk ottu hál lan neelaí bolla sáf góri dekíba. **6** “Kuñir ore honó pak jiníc no diiyo, aar cúwor ókkol or muúntu tuáñrar mukta no félaiyo, arnoíle híne híin ore tēnge únran maribó, aar fíri aái yore tuáñra re hán-hán gorífelaibo. **7**

“Mago, tuáñra re diiya zaybo; tuwo, tuáñra faiba; duwar baijjo, tuáñra lla duwar kúla záybo. 8 Kiyólla-hoilé zee niki mage, íte faa; zee niki tuwa, íte tuwai faa; aar zee niki duwar baijja, ítar lla kúla zaybo. 9 “Tuáñrar bútoore endilla manúc hon asé, nizor fua ye ruṭi magilé fattór diibo dé? 10 Yáto mas magilé háf diibo dé? 11 Hé ísafe, zodi tuáñra hóraf ói baade úddwa tuáñrar fuain dore gom-gom jiníc ókkol dii zano, tooile tuáñrar asmani Bafe zetará íba ttu mage ítara re aró hotó gom jiníc ókkol diibo fáñllar! 12 “Hétolla, hárr kessút oinno zon ore uúin goró zín tuáñra soó de ítara tuáñra re gorók, kiyólla-hoilé híyan óilde beh Tourat or edde nobi ókkol or cíkka. 13 “Siyon doroza báy gólo, kiyólla-hoilé borbadir uzu loiza de rasta fárot aar híyan or doroza coṛa; híyan báy góloya bicí asé. 14 Montor zindigir uzu loiza de rasta kutahaiṭṭa aar híyan or doroza siyon, híyan ore fooya hom. 15 “Misá nobi ókkol ottu únṭiyar táikko, zetará tuáñrar hañse bérasóol or sóнна dóri aiyé, montor bútoore ítara búka rangkuñir or dóilla. 16 Tuáñra ítara re ítarar gulagalaye siníba. Maincé kí keñṛabon ottu anggur aar keñṛar záḡḡwa ttu ḡuñir gula fare? 17 Borabor héndilla, gom gas ot gom gula dóre, aar hóraf gas ot hóraf gula dóre. 18 Gom gas ot toh hóraf gula dóri no fare, aar hóraf gas ot gom gula dóri no fare. 19 Ze gas ot gom gula no dóre, yíba re toh haṛi ooin ot félaidiya zah. 20 Hétolla hoóir, tuáñra ítara re ítarar gulagalaye siní faribá. 21 “Zetará Añré, ‘Malik, Malik,’ ḡake, ítara hárr ekzon asmani raijot góli faribó de héen no, montor siríf uite faribó zee niki Añr asmani Baf or moncá mozin goré. 22 Hé ḡin Añré boóut kiyé hoibó de, ‘Malik, ó Malik, añára Tuáñr name Allar kalam boiyan goijjílám de no né? Tuáñr name bútt ókkol dáfailám de no né? Aar Tuáñr name boóut keramot ókkol óu goijjílám de no né?’ 23 Héñtte Añí ítara re sáf-sáf góri hoiyúm de, ‘Añí tuáñra re honó októtt no sinítam; kuham-goróya ókkol, Añr héntu dur ó.’ 24 “Hétolla, zee niki Añr boiyan iín fúni amól goré, íte endilla ezzon buddíman manúc or dóilla óibo, zee niki nizor gór fattór or uore banaiyé. 25 Baade zór aiccé, faníban óiye, aar boiyar baái hé gór gán ot dósadiye; tooú híyan fori nó zagói, kiyólla-hoilé híyan or buniyadi tohfattór ot dála gíyeh. 26 Montor zee niki Añr boiyan iín fúni amól no goré, íte eén ézzon bekuf manúc or dóilla óibo, zee niki nizor gór

balur uore banaiyé. 27 Baade zór aiccé, faníban óiye, aar boiyar baái hé gór gán ot dósadiye; hétunot híyan fori ebbe nac óigiyoi.” 28 Zeñtté Isá ttu hotá híin hoiyá óiye, íbar hé taalim fúni manúc ókkol ammúk óigiyoi, 29 kiyólla-hoilé íba ye ítara re ítarar alem ókkol or dóilla góri no bólke ezzon adíkar olar dóilla góri taalim dito.

8 Zeñtté Isá faár or uottú laimmégai, becábici manúc ókkol íbar fisá doiije. 2 Hé októtt ezzon kurus biyaraimma ye aái íba re sóida góri hoór de, “Ó Malik, Tuñí sailé añré pak-sáf góri faribá.” 3 Isá ye Nizor át barái yóggwa re dóri hoór de, “Añí saái; pak-sáf óizogoi.” Tói éhon or bútoore yóggwa kurus biyaram ottu pak-sáf óigiyoi. 4 Baade Isá ye yóggwa re hoór de, “Saiyó, yían honókiyo re no hoiyó; bólke zoo, nizoré imam or hañse dahógói, aar maincór hañse gobá ó fan, Muúsa ye hókum díye de hé kurbani dogói.” 5 Zeñtté Isá Kaparnahúm cóor ot góille, hétunot ezzon cáap, zibá ek cótt fóous or sóddar, aái íba re fóriyat gorér de, 6 “Malik, añr gulam añtur ói gór ot fori táikke; íte kúb duk faar.” 7 Isá ye yóggwa re hoór de, “Añí aái ítare gom goijjúm.” 8 Montor cáap pwá ye hoór de, “Ó Malik, Tuñí añr gór or sal or nise aibár añí laayek no. Siríf muké hoó, tói añr gulam gom óizayboi. 9 Kiyólla-hoilé añí nize yó ar ezzon or hókumot or tole así, aar fóous ókkol añr nise asé. Añí ezzon ore ‘zaa,’ hoilé, íte zaa, ar ezzon ore ‘ai,’ hoilé, íte aiyé, aar añr gulam ore ‘yían gor,’ hoilé, íte híyan goré.” 10 Híyan fúni Isá taajup óigiyoi, aar zetará íbar fisá dori accíl ítara re hoór de, “Añí tuáñra re sóiyi hoóir, Añí ettór ḡoóñr iman Isráili ókkol or bútoore úddwa honókiyo ttu loot nó fai. 11 Añí tuáñra re hoóir, fuk edde fosím ottu boóut zon aibó, aar ítara Ibrahim, Isahák, edde Yakub or fúañti asmani raijot háito boibó. 12 Montor zetará raijot tákon accíl, ítara re baäre andár ot félaidiya zaybo; hére hañdahari edde date dat kirkirani óibo.” 13 Baade Isá ye cáap pwá re hoór de, “Zoogói; tuñí zeén óibo bóuli biccác goijjó, héen tuáñr lla óuk.” Borabor hétunot yóggwar gulam mwa gom óigiyoi. 14 Yárbaade zeñtté Isá Fitor or gór ot aiccé, íba ye dekére de, Fitor or hóuri gaatzore bisánat fori táikke. 15 íba ye yóggwar át dóijje rárr yóggwa ttu gaatzor giiyégoi; baade yóggwa urí íba re meémadari gorát doiije. 16 Háñz óiye rárr, maincé íbar

hañse búte-faiya boóut zon ore ainníl. Íba ye jin ókkol ore muk zobane dáfaiye, aar zetará biyaraimma accíl ítara beggún ore gom goijjé. 17 Híyan etollá óiye, zeéne nobi Yesáyahr duara hoóil de yían fura ó, “Íba ye añárar komzuri ókkol loifélaiye, aar añárar biyaram ókkol dur gorifélaiye.” 18 Zeñtté Isá ye Íbar sairókul ttu ek dol manúc deikké, Íba ye ummot ókkol ore ñíir oh hañsat zai bolla hókum díye. 19 Hétunot ezzon alem aái Íba re hoór de, “Ustat, Tuñí zeré zaiba añí yó hére Tuáñr fisáli zaiyum.” 20 Isá ye yóggwa re hoór de “Cíyal ókkol ottu gañt asé aar faik ókkol ottu bahá asé, montor Manúc or Fua ttu Nizor matá rakí bolla úddwa honó mikká zaga náí.” 21 Ar ezzon ummote Íba re hoór de, “Malik, age añí zai añr baf ore dohón gorí aiyí.” 22 Montor Isá ye yóggwa re hoór de, “Añr fisáli aiyó, muruda ókkole ítara nizor muruda re dohón goróukgoi.” 23 Baade zeñtté Isá ekkán noow ot uitté, Íbar ummot ókkol óu Íbar fisá doijje. 24 Atíkka ñíit eggwá eén ñoñr tuwán cúru óiye, zeén níki noow gán goir or bútoze gólizargoi. Montor Isá gúm ot accíl. 25 Ummot tune Íbar hañse aái Íba re tulídi hoór de, “Ó Malik, añára re baso! Añára morizayrgói!” 26 Íba ye ítara re hoór de, “Ó hom biccác ola ókkol, tuáñra ñoorór kiyá?” Tói Íba urí boiyar edde goir ore dóoñk díye rá, furafuri támaigiyoi. 27 Manúc ítara taajup ói hoór de, “Íbá hondilla manúc? Boiyare edde faní ye úddwa de Íbár hotá mane!” 28 Baade zeñtté Isá ñíir okule Gadariniól or mulluk ot foónicce, ñui zon búte-faiya manúc hobor ottu neeliatté Íba llói dola óiye. Ítara eén hótara accíl, zeén níki honó manúc hé foñt báy zai no faitto. 29 Atíkka ítara guzori-guzori hoór de, “Ó Allar Fua, Tuáñr ttu añára llói kii ham asé? Októ nó óite Tuñí hóno epe añára re toziya dito aiccó de né?” 30 Hére ítara héntu hoddúr duré ñoñr ek zák cúwor sorer de accíl. 31 Bút tune Íba re fóriyat gorér de, “Zodi Tuñí añára re neelaifélo, tóoile oh cúwor or zák kwar bútoze duñraido.” 32 Íba ye híin ore hoór de, “Zoogói.” Hétunot híin neeli aái cúwor gún or bútoze góillegoi; tói guñra zák kwa faár or haindá báy zure ñíit duñri giyye aar fanít ñufí morigiyói. 33 Soroya gún duñrdiyé, aar cóor ot zai beggún hóbor díye, fúañti-fúañti búte-faiya manúc cún or uore kii óiye de híyan óu hoiyó. 34 Tói tamám cóor or manúc ókkol Isá llói milto neeillé. Ítara

Íba re deikké rá, ítara elaka ttu zaitogói Íba re fóriyat goijjé.

9 Isá noow ot urí, ñíi farái Nizor cóor ot aiccé. 2 Hétunot hodún maincé bisánat neittá ek añtur manúc ore Íbar hañse ainné. Ítarar iman deki Isá ye añtur manúc cwa re hoór de, “Ó fut, hímmot gor; tor guná maf gorídiya gíyeh.” 3 Híyan fúni hoozzon aleme dile-dile hoór de, “E Manúc cwa ye toh kuféri gorér!” 4 Isá ye ítara báfani re zani hoór de, “Tuáñra dile-dile hóraf kiyá báfor? 5 Hoité hon nán aásan, ki ‘Tor guná maf gorídiya gíyeh,’ aar náki ‘Urí áñt?’ 6 Lekin Añr ttu tuáñra re yían zanaidito monehoór, e duniyait guná maf goríbar kémota Manúc or Fua ttu asé.” Tói Íba ye añtur manúc cwa re hoór de, “Uñ, tor bisána tulí looi gó ot zagói.” 7 Hétunot yóggwa urí gó ot giyyégoi. 8 Híyan deki manúc ókkol ñooraiyói, aar Allar taaríf gorát doijje, zibá ye insán ore héndilla kémota diyyé. 9 Isá híyan ttu zaite-zaite deké de, Moti nam or ezzon manúc házana tulé de gó ot boói táikke. Íba ye yóggwa re hoór de, “Añr fisáli doro.” Hétunot yóggwa urí Íbar fisáli doijje. 10 Yárbaade eén óiye, Isá zeñtté Motir gó ot hána háar, boóut zon házana-tulóya edde gunágar ókkol óu aái Isá edde Íbar ummot ókkol or fúañti háito boiccé. 11 Féroci ókkole híyan deki Íbar ummot ókkol ottu fusár gorér de, “Tuáñrar Ustate házana-tulóya ókkol or edde gunágar ókkol or fúañti kiyá hána háa?” 12 Híyan fúni Isá ye hoór de, “Araimma ókkol ottu toh ñaktor no lage, montor biyaraimma ókkol ottu beh lage. 13 Tuáñra zai e hotár maáni kii cikogoi, Añí kurbani saái de no, bólke rahám saái deh. Kiyólla-hoilé Añí dawot dito aiccí de forhésgar ókkol ore no, bólke gunágar ókkol ore.” 14 Hétunot Yaháyar ummot ókkol Isár hañse aái Íba ttu fusár gorér de, “Añára edde Féroci ókkole toh nitti ruza rakí, montor Tuáñr ummot ókkole kiyá ruza no raké?” 15 Isá ye ítara re hoór de, “Dulá fúañti tákite kí boiraitta ókkol ferecan ói fare? Montor eén ñin aibó, zeñtté dulá re ítara hañsóttu loiféla zaybo, héntte ítara ruza rakíbo. 16 “Honókiye toh furan fucák ot noya hoor tali dede ná; kiyólla-hoilé hé fucák ottu tali gán zórizayboi, aar fára híyan aró ñoñr óizayboi. 17 Héndilla, honókiye noya anggur or roc ore furan samarar hoíllat raké de ná; zodi rakíle toh hoílla gún fári roc cún golizayboi, aar hoílla gún óu borbad

zayboi. Hétolla, noya anggur or roc ore noya samarar hoíllat raké deh, tói duní gún héfazot táke.” **18** Isá ye ítara re híin hoór de októ, mujilíc-háñar ézzon sóddar aái íba re sóida gori hoór de, “Añr zérfua wa ehón-ehón morigiyói. Montor Tuñí aái híbar uore át doogái, tói híba zinda óizayboi.” **19** Hétunot Isá urí yóggwar fúañti zaat doijje, fúañti íbar ummot ókkol óu giyyé. **20** Zaité-zaité eggwá baró bosór foijjonto kúnzari zár de mayafua Isár fisór ttu aái íbar hoor or hañra súiye. **21** Kiyólla-hoilé híba ye báippil de, “Zodi añí siríf íbar hoor súi, añí gom óizaiyumboi.” **22** Isá ye fíri híba re deki hoór de, “Ó zí, hímmot gor! Tor imane toré gom goijjé.” Tói éhon or bútoe mayafua wa gom óigiyói. **23** Isá zeñtté sóddar gwar gór ot aái bací-bazoya ókkol ore edde maincór holholani deikké, **24** íba ye hoór de, “Tuáñra neelogói. Zérfua morigiyói de no, bólke gúm zar deh.” Hétunot ítara íba re lói áncat doijje. **25** Montor manúc cún ore baáre neelai difélai baade, íba bútoe góli zérfua war át dóijje, tói híba urígiyói. **26** Hé hóbor híyan hé elakar agagurat fólīgiyói. **27** Isá híyan ttu zaargói de októ, dui zon ańdá manúc íbar fisá doijje. Ítara ðak mari-mari hoór de, “Ó Dawud or Fua, ańárar uore rahám goró!” **28** Zeñtté Isá gór ot góille, ańdá manúc cún íbar hére aiccé. Íba ye ítara ttu fusár gorér de, “Ańí yían gorí faijjum de tuáñra biccác goró ne?” Ítara íba re zuwab der de, “Jii Malik, gorí.” **29** Tói íba ye ítara suk dóri hoór de, “Tuáñrar iman mozin híyan tuáñra lla óuk.” **30** Hétunot ítara suk kúligiyói. Isá ye ítara re eén hoói dorógori maná goijjíl, “Saiyó, yían or baabute honókiye no zane fán.” **31** Montor ítara zai hé elakar agagurat íbar baabute hóbor fólaidiye. **32** Ítara baáre zaargói de októ, kessú maincé Isár hañse ezzon búte-faiya buk manúc ainné. **33** Isá ye búttwa dáfaiye rárr, hé buk manúc cwa mati faijjé. Híyane manúc ókkol taajup óigiyói, aar hoór de, “Endilla toh Isráil or bútoe honódin dahá gíyeh de náí.” **34** Montor Férocí ókkole hoór de, “Íbá ye búttókkol dáfa de búttókkol or sóddar or taakote.” **35** Isá fottí cóore-cóore edde farafara zai Yohúdir mujilíc-hána ókkol ot taalim diyat, asmani raijor kúchóbor tobolik gorát, edde fottí kisím or biyaram edde fottí kisím or ocúk ókkol gom gorát accíl. **36** Manúc or dol deki íba ttu fetfuijil, kiyólla-hoilé ítara soroya sára berasóol or dóilla ocántit edde modot sára accíl. **37** Hétunot íba ye Nizor ummot ókkol ore

hoór de, “Fósol de bicí asé, montor dooiya bicí hom. **38** Hétolla fósol or Malik ore fóriyat goró, íbar fósol daito dooiya ókkol diferái bolla.”

10 Isá ye íbar baró zon cárit ore matai, ítara re hóraf jin ókkol dáfaibar edde fottí kisím or biyaram edde fottí kisím or ocúk gom goríbar kémota diiyé. **2** Hé baró zon sáhábir nam óilde iín: foóila wa, Sáimon, zibá re Fitor ðake, aar yóggwar báí Enderiyas; Zebedair fua Yakub edde yóggwar báí Yohánna; **3** Filíp, Bartólomiyo, Tómas, házana-tulóya Moti, Alfáiyas or fua Yakub, Táadiyas, **4** Sáimon zibá óilde Zélot, edde Yohúdah Iskáriyet, zee niki Isá re dóridil. **5** Isá ye hé baró zon nún ore endilla nosíyot gorí diferáiyé: “Beyohúdi ókkol or híkka no zaiyo, aar Samári ókkol or honó cóor ot no góillo. **6** Bólke Isráil koun ańzigiyói de berasóol lun or hañse zaiyo. **7** Zaité-zaité endilla tobolik goríyo, ‘Asmani raijjo ðake aáigiyói.’ **8** Biyaraimma re gom goríyo, muruda re zinda goríyo, kurus biyaraimma re pak-sáf goríyo, aar búttókkol dáfaiyo. Tuáñra maana faiyó, maana diyo. **9** “Keeñil or zalit gori cúna, rufa, yáh tamar foicá no loizaiyó, **10** sofór olla honó hóilla, battí hoor, centár edde larí no loizaiyó; kiyólla-hoilé zee niki ham goré íte toh hána faibar laayek. **11** Tuáñra ze cóor ot yáh farat góliba, hére zaga diibar laayek hon asé talac goríyo, aar cóor híyan ottu nó neelo foijjonto yóggwar gór ot tákiyo. **12** Gór ot gólibarcot sólam diyo. **13** Zodi gór híyan laayek de óile, tuáñrar cánti híyan ot tákouk. Montor laayek no de óile, tuáñrar cánti tuáñrar hañse fíri aiyóuk. **14** Zodi honókiye tuáñra re kobul no goré yáto tuáñrar hotá no fúne, tóoile hé gór ottu yáh cóor ottu zaibarcóttu tuáñrar tégng or tollar dúil zárifelaiyo. **15** Ańí tuáñra re sóiyi hoóir, kiyamot or din hé cóor híyan ottu Sódóm edde Gomórahrr túaro bicí bordac gorá foribó. **16** “Fúno, Ańí tuáñra re berasóol or dóilla góri rangkuñir ókkol or mazé diferáir deh. Hétolla háf or dóilla salák ó aar hoitor or dóilla maasun bono. **17** Maincór ttu únciyar táikko; kiyólla-hoilé ítara tuáñra re adalat ot tulídibo, aar tuáñra re ítara mujilíc-hána ókkol ot bet maribó. **18** Añr lla bóuli tuáñra re hákim ókkol or edde baáñcca ókkol or muuntu úddwa aná zaybo, zeéne ítara edde Beyohúdi ókkol or hañse Añr gobá dí faro. **19** Lekin zeñtté ítara tuáñra re dóridibo, héñtte kii hoibá yáh keéngori hoibá sinta no goijjó,

kiyólla-hoilé tuáñra ttu zín howá foribó, híin tuáñra re hétunot diiya zaybo. **20** Kiyólla-hoilé hoóiya toh tuáñra no, bólke tuáñrar Baf or Ruh éna, zibá ye tuáñrar duara hotá hoó. **21** “Bái ye bái ore aar bafe fua re marifélai bolla dóridibo. Fuain de nizor bafmaar hélaf týai ítara re mariféla báibo. **22** Añr nam olla bóuli tuáñra re beggúne nafórot goríbo; montor zee niki ahéri foijjonto bordac goríbo, yóggwa ye beh nejat faibo. **23** Zeñtté ítara tuáñra re ekkán cóor ot zulúm goré, arekkán ot dáí zaiyogói. Kiyólla-hoilé Añí tuáñra re sóiyi hoóir, tuáñra Isráil or fottí cóor ot zaiya nó óite Manúc or Fua aázayboi. **24** “Cárit nizor ustat or túaro ðoóñr no, aar goóur nizor girós or túaro ðoóñr no. **25** Cárit nizor ustat or ðóilla óile aar goóur nizor girós or ðóilla óile kafi. Ítara zodi gór or girós ore Belzebulhoiyé de óile, hé gór or maincóre aró hotó ðoilla hoibó fáñllar! **26** “Hétolla ítara re no ðooraiyó, kiyólla-hoilé zahér no óibo de héndilla honó jiníc guíjja náí, aar zana no zaybo de héndilla honó jiníc lukaiya náí. **27** Añí tuáñra re zín andár ot hoóir, híin foór ot hoiyó; aar zín tuáñrar han ot fúfcucai howá gíyeh, híin gór or sád or uottú elan goijjó. **28** Uitará re no ðooraiyó zetará haiya re kotól goré montor ruh re kotól gorí no fare; bólke Ubá re ðooro zibá ye ruh edde jisím duníyan ore zuzuk ot dónco gorífelai fare. (Geenna g1067) **29** Duwá fíañjja ki bicí hom tíañ loi no bese né? Toóu tuáñrar Baf or ezin sára héntu eggwá yó merít fore de náí. **30** Becóí, tuáñrar matár sul úddwa beggún íba ttu gona asé. **31** Hétolla, no ðooraiyó, tuáñrar kimot boóut fíañjja ókkol or túaro bicí. **32** “Zee kiyé Añré maincór muúntu cíkar goré, Añí yó yóggwa re Añr asmani Baf or muúntu cíkar goríyum. **33** Montor zee niki Añré maincór muúntu inkar goré, Añí yó yóggwa re Añr asmani Baf or muúntu inkar goríyum. **34** “Añí duniyait cánti diito aiccí bóuli no tãariyo. Añí cánti diito aiccí de no, bólke toluwar solaitó aiccí deh. **35** Kiyólla-hoilé Añí aiccí de, fua re baf or ulða gorídi bolla, zérfua re maar ulða gorídi bolla, aar bou wóre hóurir ulða gorídi bolla. **36** Manúc or duccon óibo de nizor gór or manúc. **37** “Zee niki Añré goré de yár túaro nizor baf ore yáh maa re muhábbot goré, yóggwa Añr laayek no; aar zee niki Añré goré de yár túaro nizor fua re yáh zérfua re muhábbot goré, yóggwa Añr laayek no. **38** Zee niki nizor kúruc no boói Añr fisáli dore, yóggwa Añr laayek no. **39** Zee

niki nizor zan basaitó saá, yóggwa ye híyan háraifeilaibo; montor zee niki Añr wasté nizor zan háraifele, yóggwa ye híyan faibo. **40** “Zee niki tuáñra re kobul goré, yóggwa ye Añré kobul goré deh; aar zee niki Añré kobul goré, yóggwa ye Añré diferáiyé de íba re kobul goré deh. **41** Zee niki honó nobi re nobir name kobul goré, yóggwa ye nobir boccíc faibo; aar zee niki honó forhésгар ore forhésгар or name kobul goré, yóggwa ye forhésгар or boccíc faibo. **42** Honókiye ítarár bútotu ebbe níróc ézzon ore Añr ummot de hétolla ek fiyala tãnda faní diilé úddwa, Añí tuáñra re sóiyi hoóir, yóggwa ye hámaha nizor boccíc fai zaybo.”

11 Zeñtté Isá ttu íbar baró zon cárit tun ore nosíyot goijjá óiye, íba ítarar cóor ókkol ot taalim dito edde tobolik goittó héntu bacá lóiyé. **2** Zeñtté Yaháya ye ziyól ot táí Mosihr ham ókkol or baabute fúinne, yóggwa ye nizor ummot ókkol ore Isár hañse diferáiyé, **3** yíán fusár goittó, “Tuñí aibár hotá asé de íba né, aar náki ańára ar ezzon olla entezar goittám?” **4** Isá ye ítara re zuwabe hoór de, “Zoó, tuáñra zín fúnor edde dekor híin Yaháya re zanogói, **5** ki hoilé, ańda ye deké, lenge ańřer, kurus biyaraimma pak-sáf ór, náfange fúnor, muruda zinda ór, edde gorif ókkol or hañse kúchóbor tobolik gorá zar. **6** Mubarek ubá, zee niki Añr baabute andacá no goré.” **7** Zeñtté Yaháyar ummot tun zaargói, Isá ye manúc ókkol ore Yaháyar baabute howát doijje de, “Tuáñra moidan zagat kii saító gífla dé? Boiyare lore de hóir né? **8** Arnóile tuáñra kii saító gífla dé? Barík hoor findá manúc né? Zetará barík hoor fińde ítara toh razmohól ot éna. **9** Tóoile tuáñra kii saító gífla dé? Honó nobi né? Ói, Añí tuáñra re hoóir, nobir túaro ðoóñr ézzon ore. **10** Yóggwa óilde ubá, zibár baabute pak-kalam ot endilla asé, ‘Soó, Añí Añr hóborgwa re Tuáñr age diferáir, zibá ye Tuáñr age Tuáñr fońt toiyar goríbo.’ **11** “Añí tuáñra re sóiyi hoóir, mayafuain dor ttu zormo óiye de ítarar bútoe bápťismadoya Yaháyar túaro ðoóñr honókiye náí; montor toóu úddwa asmani raijot zee niki ebbe cóńřo, íte yóggwar túaro ðoóñr. **12** Bápťismadoya Yaháyar din ókkol ottu lóti yala foijjonto asmani raijjo ye zulúm faat asé, aar zulúmkur ókkole híyan ore bolazuri kobza goittó kucíc gorér. **13** Kiyólla-hoilé tamám nobi ókkol or kitabe edde Tourate Yaháya foijjonto agun hotá hoiyé. **14** Tuáñra ttu yíán

kobul goittó monehoilé goró, ze Eliyas aibár hotá accíl Yaháya óilde íba. **15** Zar ttu fúnibar han asé, yóggwa ye fúno. **16** “Añí e zobanar maincóre kii loi fúwan goittám? Ítara undilla fuain dor dóilla, zetará bazar ot boói oinno fuain dore matai hoó de, **17** “Tuáñra lla añára bací bazaiyí, montor tuáñra nó naso; tuáñra lla añára bilak or zari gaiyí, montor tuáñra nó hañdo.” **18** Yaháya aái zettót háafiya nó goré, maincé hoó de, ‘Íba re bíte faiyé.’ **19** Aar Manúc or Fua aái zettót háafiya gorér, maincé hoó de, ‘Soó, ezzon fitác edde córabkur, házana-tulóya edde gunágar ókkol or dustó.’ Montor giyan sóiyi de híyan, híyan or hame sábut ó.” **20** Isá ye ze cóor gún ot beebák keramoti ham goijjíl, híine touwá nó goré de hétolla Íba ye híin ore jéjjerai hoór de, **21** “Ó Korazin, tor uore afsús! Ó Betsáida, tor uore afsús! Kiyólla-hoilé ze keramoti ham ókkol tuáñrar bútoze gorá gýl híin zodi Tayár edde Sídon ot gorá zayto, ítara sálarcoṭ fiñdí edde sái or uore boói boóut age lóti touwá gorfelaito. **22** Montor Añí tuáñra re hoóir, kiyamot or din, hé Tayár edde Sídon or maincór ttu tuáñrar túaro hom bordac gorá foribó. **23** Aar tui, ó Kaparnahúm, toré kí asman ot bazé fán uore tulá zaybo? Toré nise fatalfur ot éna félaidiya zaybo; kiyólla-hoilé ze keramoti ham ókkol tor bútoze gorá gýl híin zodi Sódóm ot gorá zayto, híyan aij foijjonto tiki tákito. (Hadēs 986) **24** Montor Añí tuáñra re hoóir, kiyamot or din, Sódóm cóor or maincór ttu tor maincór túaro hom bordac gorá foribó.” **25** Hétunot Isá ye hoór de, “Ó Baf, asman zobin or Malik, Añí Tuáñre cúkuriya gorír, kiyólla-hoilé Tuñí iín ore giyani edde buddíman ókkol ottu lukai rakí gura fuain dor dóilla maincór hañse zahér goijjó. **26** Ói, ó Baf, kiyólla-hoilé Tuáñr ttu híyan bicí fosón laiggé. **27** “Añr Bafe Añré hárr kessú diifélaiye. Fua re Bafe bade ar honókiye no zane, aar Baf ore yó Fua edde Fua ye zaré zahér goittó saá, yóggwa ye bade ar honókiye no zane. **28** “Tuáñra zetará óran óiyo edde bór fuñzá lói asó, beggún Añr hañse aiyó, Añí tuáñra re aram diiyum. **29** Añr zuañl tuáñrar uore loo aar Añr ttu cíko, kiyólla-hoilé Añí norom edde cída dil ola, tói tuáñrar forane aram faibo. **30** Kiyólla-hoilé Añr zuañl boité aásan, aar Añr fuñzá fatol.”

12 Hé októ ebaadot-or-din Isá giyuñr kuñrá báy zaar; aar íbar ummot ókkol ottu búk

laiggé rár, ítara giyuñr túr ókkol tulí-tulí háat doijje. **2** Féroci ókkole híyan deki íba re hoór de, “Soó, ebaadot-or-din ziyán goríbar maná, híyan Tuáñr ummot ókkole gorér.” **3** Montor íba ye ítara re hoór de, “Tuáñra kí yían nó foró, zeñtté Dawud edde íbar sáañti ókkol ottu búk laiggil, héñtte íba ye kii goijjíl dé?” **4** Íba ye toh Allar gór ot góillegoi, aar íba ye edde íbar sáañti ókkole, Allar hañse peec goijjá ruṭi háail, ziín háibar ezazot no íba ttu accíl aar no íbar sáañti ókkol ottu accíl, bókke siríf imam ókkol ottu beh accíl. **5** Yáto tuáñra kí Tourat ot yían nó foró, ebaadot-or-din baitul-mukaddos ot imam ókkole ebaadot-or-din or niyom báñgile yo ítara behosúr dé? **6** Añí tuáñra re hoóir, baitul-mukaddos or túaro ḏoóñr Ekzon iñyót asé. **7** Lekin zodi tuáñra e hotár maáni gán zainta, ‘Añí kurbani saái de no, bókke rahám saái deh,’tóoile behosúr ore hosúr no dita. **8** Kiyólla-hoilé Manúc or Fua óilde ebaadot-or-din or Malik.” **9** Isá héntu zaigói ítarar mujilíc-hánat giyyé. **10** Hére ezzon endilla manúc accíl, zar át fúaigiyoi. Ítara Isár uore elzam lagai fare fán íba re súwal gorér de, “Ebaadot-or-din biyaram gom goríbar zayes asé né?” **11** Íba ye ítara re hoór de, “Tuáñrar bútoze endilla hon asé, zar ttu eggwá berasóol asé, aar yíba ebaadot-or-din gañrát forilé yíba re dóri tulí no loibo dé? **12** Insán or kimot toh berasóol or túaro boóut bicí! Hétolla, ebaadot-or-din gom ham goríbar zayes asé.” **13** Baade íba ye manúc cwa re hoór de, “Tuáñr át tan baró.” Tói yóggwa ye híyan baráíye, hétunot híyan gom ói oinno gán or dóilla óigiyoi. **14** Yárbaade Féroci ítara baáre zai sólla goijjé de, ítara íba re kii bote marifélai faribó. **15** Montor Isá ye híyan zani fari héntu giyyégoi. Boóut manúc ókkol íbar fisá doijjil, aar zetará biyaraimma accíl ítara beggún ore íba ye gom goijjíl. **16** Íba ye ítara re nicót goijjé de, íbar baabute honókiyo re no hoitó. **17** Híyan etollá óiye, zeéne nobi Yesáyahr duara howá gýl de yían fura ó: **18** “Soó! Añr Háadem ore, zibá re Añí basíloiyi, Añr Adorja, zibá re lói Añr Ruh kúci. Añí Añr Ruh Ibár uore dálidiyum, aar Ibá ye Beyohúdi ókkol or hañse insáf elan goríbo. **19** Ibá ye no hoijja dibo, no sillaibó, aar no rasta ókkol ot Ibár abas honókiye fúnibo. **20** Ibá ye insáf ore fóta nó goré foijjonto, élaíya hóir ore no báñgibo, aar dúañr de batti no nifáibo. **21** Ibár name beyohúdi ókkole acá rakíbo.” **22** Yárbaade ezzon búte-faiya manúc

ore Isár hañse aná gíyeh, yóggwa ańdá edde buk accíl. Isá ye yóggwa re gom goijjé rár, hé ańdá edde buk manúc cwa ye mati yó fajjé edde deki yó fajjé. **23** Manúc beggúne taajup ói hoór de, “Íbá Dawud or Fua ói né?” **24** Híyan fúni Férocí ókkole hoór de, “Íbá ye bít ókkol dáfa de siríf bít ókkol or sóddar Belzebul or taakote.” **25** Montor Isá ye ítarar báfani re zani ítara re hoór de, “Ze raijot faáta-faáti foida ó, híyan toh fána óizagoi; aar ze cóor ot yáh gór ot faáta-faáti foida ó, híyan óu toh tíki no tákibo. **26** Héndilla, zodi Cóítane Cóitan dáfa, tooile toh íte nizor ulða nize bák óigiyoi; héen óile ítar raijjo keéngori tíki tákibo? **27** Aar zodi Ańí bít dáfa de Belzebul or taakote de óile, tooile tuáńrar fuain de har taakote dáfa dé? Hétolla tuáńrar bisarhar óibo de ítara. **28** Montor zodi Ańí bít dáfa de Allar Ruhr taakote de óile, tooile toh Allar raijjo tuáńrar hére aáigiyoi. **29** “Honókiye boluwar manúc or gór ot góli yóggwar cómbotti luṭ gorí keéngori faribó, zodi age boluwar manúc yóggwa re bańdí no ere? Bańdí erilé éna yóggwar gór luṭ gorí faribó. **30** “Zee niki Ańr híkka no, yóggwa Ańr ulða; aar zee niki Ańr fúańti dola no goré, yóggwa ye cíńracińttá goré. **31** “Hétolla Ańí tuáńra re hoóir, insán or hárr guná edde kuféri maf gorídiya zaybo, montor Pak-Ruhr ulða kuféri maf gorídiya no zaybo. **32** Honókiye Manúc or Fuar hélaf honó hotá hoilé, yóggwa re toh maf gorídiya zaybo; montor honókiye Pak-Ruhr hélaf hotá hoilé, yóggwa re maf gorídiya no zaybo, e zobatan óu no zaybo, aar aiyér de zobatan óu no zaybo. (aĩn g165) **33** “Gas gom de óile yíbar gula yó gom óibo, aar zodi gas hóraf de óile yíbar gula yó hóraf óibo; kiyólla-hoilé gas toh gulaye éna siná zah. **34** Ó háf or fuain ókkol! Tuáńra hóraf ói keéngori gom hotá hoói faribá? Kiyólla-hoilé dil ziíne furaiya, muké híin beh hoó. **35** Gom manúce gom zomaiya ttu gom mún neela; aar hóraf manúce hóraf zomaiya ttu hóraf fun neela. **36** Montor Ańí tuáńra re hoóir, manúce no báfi hoó de fottí hotár hísaf ítara ttu kiyamot or din diya foribó. **37** Kiyólla-hoilé tuáńra behosúr tóoriba de yó tuáńrar hotáye, aar hosúrbon tóoriba de yó tuáńrar hotáye.” **38** Yárbaade hoozzon alem edde Férocí ókkole Isá re hoór de, “Úzur, ańára Tuáńr ttu ekkán nicán saitó saái.” **39** Íba ye ítara re zuwabe hoór de, “E zobanar hóraf edde zenákur maincé nicán dabi goré, montor ítara re nobi Yunus

or nicán bade ar honó nicán diya no zaybo. **40** Kiyólla-hoilé Yunus zendilla tin din tin rait doóńr mas or ferot accíl, héndilla Manúc or Fua yó meřir tole tin din tin rait tákibo. **41** Kiyamot or din Ninivi cóor or manúc ókkol e zobanar manúc iín or fúańti tíyabo, aar itará re hosúr díbo; kiyólla-hoilé ítara toh Yunus or elan fúni touwá goijjíl, aar soó, Yunus or túaro doóńr Ekzon ińyót asé. **42** Kiyamot or din Cibá mulluk or rani e zobanar manúc iín or fúańti uríbo, aar itará re hosúr díbo; kiyólla-hoilé híba ye toh Sóloman or buddír hotá fúni bolla duniyair céc matá ttu aiccíl, aar soó, Sóloman or túaro doóńr Ekzon ińyót asé. **43** “Zeńtté honó manúc ottu hóraf jin neele, héńtte hé jin nwá fúana zaga ókkol ot zai aram goittó zaga tuwa. Montor no faile, **44** nizoré nize hoó de ‘Ańí ańr gór ot waafes zaiyumbói, zentú ańí neeliaicci,’ Yíba zeńtté waafes aiyé, hé zaga gán háli, sáf goijjá edde tík goijjá lootfa. **45** Baade yíba zai aró háńt twa nizor túaro hóraf jin ané, aar híin góli hére táke; tói hé manúc cwar fisór hálot agor hálot or túaro bici hóraf óizagoi. E zobanar hóraf maincór hálot óu héndilla beh óibo.” **46** Isá ye manúc or dol ore híin hoór de októť, Íbar maa edde báiyain Íba llói hotá hoitó baáre tíyai táikke. **47** Ezzone Íba re hoór de, “Soó, Tuáńr maa edde báiyain de Tuáńr llói hotá hoitó baáre tíyai táikke.” **48** Zee niki Íba re zanaiyé, yóggwa re Isá ye hoór de, “Ańr maa hon? Aar Ańr báiyain honará?” **49** Baade Íba ye ummot ókkol or uzu át barái hoór de, “Ótiya, Ańr maa edde Ańr báiyain. **50** Kiyólla-hoilé zee niki Ańr asmani Baf or moncá mozin sole, yóggwa óilde Ańr báí, bóin aar maa.”

13 Hé din Isá gór or baáre neeli díir hańsat zai boiccégoi. **2** Aar Íbar hañse becábici manúc ókkol zoma óiye dé hétolla, Íba ekkán noow ot urí boiccé, aar manúc cún beggún kul or uore tíyai táikke. **3** Tarfore Íba ye meésal ókkol dí ítara re boót kessú hoiyé, ki hoilé, “Fúno, ezzon bis cíńřoya bis cíńřto neeillé. **4** Yóggwa ye cíńřer de októť, hodún bis rastarhańsat foijjíl, aar faik ókkole aái híin háifelaiye. **5** Hodún bis cíł zobin ot foijjíl, zeře bici meři náí. Mur meři nu accíl ísafe híin ot hára ges aiccé. **6** Montor beil uińtté rár híin furigiyói, aar cíńyor nó gasá ísafe híin fúaigiyoi. **7** Hodún bis keńřabon ot foijjíl, keńřabon barí urí híin ore sibi raikké. **8** Lekin ar hodún bis gom zobin ot foijjíl, aar híin

ot fósol dóijje: kessút ek cót gun, kessút háiṭ gun, ar kessút tiríc gun. 9 Zar ttu fúnibar han asé, yóggwa ye fúno.” 10 Baade cárit tun aái Isá re hoór de, “Tuńí maincóre meésal dí kiyá hotá hoó?” 11 Íba ye ítara re zuwabe hoór de, “Asmani raijior gufoni re zainto tuáńra re beh diya giyéh, montor ítara re híyan diya nó zah. 12 Kiyólla-hoilé zar ttu niki asé, yóggwa re aró diiya zaybo, aar yóggwa ttu ódorbaára tákibo; montor zar ttu niki náí, yóggwa ttu asé de híin úddwa loiféla zaybo. 13 Ańí ítara re meésal dí etollá beh hoói, kiyólla-hoilé ítara sailé yo no deké, fúnile yo no fúne, aar no yó buzé. 14 Ítarar híyane nobi Yesáyahr agun hotá yían fura óiye, ‘Tuáńra hane fúnat tákiba montor no buzíba, tuáńra suké saát tákiba montor no siníba. 15 Kiyólla-hoilé manúc ítarar dil toh doró óigiyoí, ítarar han bór óigiyoí, aar ítara nizor suk bon gorífelaiye. Arnóile ítara nizor suké dekıto, hane fúnito, nizor dile buzí Ańr hańse fıri aító, aar Ańí ítara re gom goittám.’ 16 Lekin mubarek tuáńrar suk, híine deké de hétolla; mubarek tuáńrar han, híine fúne de hétolla. 17 Kiyólla-hoilé Ańí tuáńra re sóiyoí hoóir, boóut nobi edde forhésghar manúc ókkole tuáńra zín dekor híin dekı bolla azzu goijjıl, montor nó deké; tuáńra zín fúnor híin fúni bolla yó azzu goijjıl, montor nó fúne. 18 “Yala bis cínřoyar meésal lan or maáni kii fúno. 19 Zeńtté honókiye raijior kalam fúne montor no buzé, Íbilíce aái yóggwar dil ot zín cínřa giyeh híin harí loizagói. Manúc yóggwa óilde rastar hańsat foijjé de bis. 20 Cıl zobin ot foijjé de bis óilde ubá, zee niki kalam fúne aar éhon híin ore kúcir sáańte kobul goré; 21 montor nizor bútoze mozbut cínřor nó gasá de hétolla híin hooddin beh táke. Zeńtté hé kalam or zoriya mosibot yáh zulúm aiyé, yóggwa éhon fissá mare. 22 Keńřabon ot foijjé de bis óilde ubá, zee niki kalam fúne, montor duniyair sintabáfaniye edde dón-doulot or adore hé kalam ore sibi raké, hétolla híin ot gula no dóre. (aiōn g165) 23 Lekin gom zobin ot foijjé de bis óilde ubá, zee niki kalam fúne edde buzé, aar gula dóra: kessú ye ek cót gun, kessú ye háiṭ gun, aar kessú ye tiríc gun.” 24 Isá ye ítara re arekkán meésal dí hoór de, “Asmani raijio óilde undilla manúc or dóilla, zee niki nizor zobin ot gom bis ókkol cínṭṭe. 25 Montor yóggwar manúc ókkol gúm giyeh rár, yóggwar ducon aái giyuńt mazé kérkuńřar bis ókkol cínřidi giyégói. 26 Zeńtté giyuńr sara barí

urí fósol dóijje, héńtte kérkuńřa yó dahá giyeh. 27 “Tói gór or goóur ókkole girós or hańse aái hoór de, ‘Jonab, tuńí tuáńr zobin ot gom bis cínṭṭila de nó né? Tói kérkuńřa hontú aiccé?’ 28 “Yóggwa ye ítara re hoór de, ‘Ezzon duccone híyan goijjé deh.’ Goóur gúne yóggwa re hoór de, ‘Tóoile ańára zai híin háńri félaitamboi né?’ 29 “Montor yóggwa ye hoór de, ‘No, no, tuáńra kérkuńřa háńribarcot giyuń yó háńrifelaiba. 30 Daibar ainda nú aiyé foijjonto duní gún ore fúańti baríto doh; one daibar ainda ailé ańí dooíya ókkol ore hoíyúm de, furat dífélai bolla age kérkuńřa gún zoma gorífelai tara bańdifélo; baade giyuń gún ańr gudam ot zoma goró.” 31 Isá ye ítara re aró ekkán meésal dí hoór de, “Asmani raijio óilde eggwá hóroir danar dóilla, zibá re ezzon manúce looi nizor kėtít lagayégói; 32 yíba oinno bis beggún or túaro cóńřo de óile yo, barí uríle yíba kėtir tamám sara ókkol or túaro dońńr ói endilla eggwá gas bone, zeén níki faik ókkole aái yíbar déeila ókkol ot bahá bańdé.” 33 Isá ye ítara re aró ekkán meésal díye de ki hoilé, “Asmani raijio óilde cúṭar or dóilla, zín ore eggwá mayafua ye looi tokoriban ekkuri tin cér aṭat miyáíye, baade guńřa hańi or dola fúli uıṭṭé.” 34 Isá ye maincóre híin beggún meésal dí beh hoíyé; meésal sára íba ye ítara re honó kessú no hoitó. 35 Zeéne nobir duara howá giyl de yían fura ó: “Ańí meésal ókkol dí Ańr muu kúliyum; Ańí uúin boíyan goríyum zín duniyair foidayecir héńtte lóti lukaiya asé.” 36 Baade Isá manúc ókkol ore erí gór or bútoze giyíe. Aar íbar cárit tune íbar hańse aái hoór de, “Ańára re zobin or kérkuńřar meésal lan buzáido.” 37 Íba ye ítara re hoór de, “Zibá ye niki gom bis cínṭṭe, íba óilde Manúc or Fua. 38 Zobin nán óilde duniyai, gom bis sún óilde raijior fuain, aar kérkuńřa gún óilde Íbilíc or fuain, 39 ze duccone híin cínṭṭe íte óilde Íbilíc, daibar ainda óilde duniyair ahérot, aar dooíya gún óilde fırista ókkol. (aiōn g165) 40 “Zendilla, kérkuńřa gún ore zoma gorífelai ooin ot furat díféle, e duniyair ahérot ot óu héndilla beh óibo. (aiōn g165) 41 Manúc or Fua ye Nizor fırista ókkol ore difeřáibo, aar híine íbar raijior bútotu zetará oinno zon ore gunát foraba edde zetará kuham goré, ítara beggún ore ekkán ot zoma goríbo, 42 aar ítara re zoler de ooin or foin ot félaídibo; héře hańdaharı edde date dat kirkirani óibo. 43 Héńtte forhésghar ókkol nizor Baf or raijio mazé

beil or dóilla somkibó. Zar ttu fúnibar han asé, yóggwa ye fúno. **44** “Asmani raijjo óilde zobin ot lukai raikká dón or dóilla, zín ezzon manúce fai abar lukai raikké; aar hé kúciye zai nizor ttu asé de hárr kessú besi hé zobin nán kinnégoi. **45** “Abar, asmani raijjo óilde undilla códor or dóilla, zee niki háti mukta ókkol or talac ot asé; **46** zeñtté yóggwa ye eggwá bicí dami mukta faiyé, hétunot zai nizor ttu asé de hárr kessú besi yíba kinnégoi. **47** “Abar, asmani raijjo óilde undilla țana-zal or dóilla, ziyán fanít buwái hárr kisím or mas dóijje, **48** aar híyan bórigiyoi rár zaila ókkole țani sor ot ainné. Tarfore íțara boói gom mún gom mún ɗulat bóijje, montor hóraf fun hóraf fun félaidiye. **49** Duniyair ahérot ot borabor héndilla beh óibo. Fírasta ókkol aibó, aái forhésgar ókkol ottu nafórman ókkol ore alok gorífelaibo, (aiŋn g165) **50** baade íțara re zoler de ooin or fooin ot félaidibo; hépe hañdahari edde date dat kirkirani óibo.” **51** Isá ye íțara re hoór de, “Tuáñra iín beggún buijjó né?” Íțara hoór de, “Buijji ze.” **52** Íba ye íțara re hoór de, “Hétolla fottí alem zetará asmani raijjo carit bonigiyói, íțara beggún endilla ezzon gór or girós or dóilla zee niki nizor gudam ottu noya edde furan jiníc ókkol neela.” **53** Zeñtté Isá ttu meésal híin hoiyá óiye, Íba héntu giyégoi. **54** Íba Nizor wotón ot aái manúc ókkol ore íțarar mujilíc-hánat eén taalim diyat doiije, zeén níki íțara ammúke hoór de, “E Manúc cwa ye e giyan edde keramoti ham iín goríbar kémota hontú faiyé? **55** Ibá kí mistírir fua no? Ibár maa Moriyam hoó de híba no né, aar Ibár báiyain Yakub, Yúsúf, Sáimon edde Yohúdah no né? **56** Ibár bóinain beggún añárar fúañti asé de no né? Tói Ibá ye iín beggún hontú faiyé?” **57** Héndilla hoói íțara Íba re inkar goijjé. Montor Isá ye íțara re hoór de, “Ze honó nobir izzot nizor wotón ot edde nizor gór ot bade beggúlla asé.” **58** Aar íțarar nabiccác or zoriya Íba ye hépe bicí keramot nó goré.

14 Hé októt Galil elakar hókumot-goróya Hérude Isár baabute hóbor fúinne, 2 tói yóggwa ye nizor uzir-nazir ókkol ore hoór de, “Íba óilde báptismadoya Yaháya, íba mora ttu zinda óiye deh; hétolla toh íba ye keramoti ham híin gorí farer.” **3** Kiyólla-hoilé Hérude nizor báí Filíp or bou Hérudias or wasté hé Yaháya re gereftar gorí bañdfelai ziyól ot díyl. **4** Yaháya ye yóggwa re endilla hoitó de hétolla, “Tuáñr

ttu híba re biyá goríbar zayes náí.” **5** Yóggwa ttu íba re marifélaito monehoitó, montor awam ókkol ore ɗooraitó, kiyólla-hoilé íțara Yaháya re nobi manitó. **6** Lekin zeñtté Hérud or zormo-din aiccé, Hérudias or zíi ye maáfil ot nasi Hérud ore kúci goijjé. **7** Hétolla yóggwa ye hosóm hái waada goijjé de, híba ye zín mage híin diibo hoói. **8** Nizor maa ye cíkaidiye de héndilla híba ye hoór de, “Báptismadoya Yaháyar holla wa re ekkán tálit góri eré añré doo.” **9** Híyan fúni baáñcca ttu bicí afsús laiggé, montor toóu nizor hosóm edde meéman ókkol or zoriya yóggwa ye hókum díye de, híbar aros sán fura gorá záy bolla. **10** Tarfore yóggwa ye manúc diferái, ziyól ot Yaháyar holla hariféla baye. **11** Baade íbar holla wa ekkán tálit góri aní zérfua wa re diiya giyé, aar zérfua wa ye nizor maar hañse ainné. **12** Yárbaade Yaháyar ummot ókkole aái yore íbar lac cwa loizai dohón gorífelaie; baade zai Isá re híyan zanaiyé. **13** Isá ye Yaháyar baabute fúinne rár, héntu síra ói noow ot gori ekkán bocóti-sára zagat giyói. Aar manúc ókkole híyan fúni, cóor ókkol ottu neeli añri-ñri íbar fisá doiije. **14** Zeñtté Isá noow ttu laimmé, íba ye ɗoóñr ek dol manúc deikké; aar íțara lla fețfuri íțarar biyaram ókkol gom goijjé. **15** Zeñtté hañz óiye, íbar carit tune íbar hañse aái hoór de, “Yián toh ekkán bocóti-sára zaga, aar beil óu giyói. Hétolla manúc cún ore duñraido, zeéne tará fara ókkol ot zai nizor lla hána kinigói fare.” **16** Montor Isá ye íțara re hoór de, “Tará ttu zaagói no foribó; hái bolla kessú tará re tuáñra doo.” **17** Íțara Íba re hoór de, “Añára ttu eré fañs swá ruți edde duwá mas bade ar kessú náí.” **18** Íba ye hoór de, “Híin eré Añr hañse anógoi.” **19** Baade íba ye manúc cún ore kér or uore boitó hókum díye, aar hé fañs swá ruți edde duwá mas sún looi asman or uzu saái cúkuriya goijjé. Tarfore ruți gún bañgi-bañgi carit tun ore diiyé, aar carit tune manúc cún ore bařidiyé. **20** Tará beggúne feț bóri háie. Baade ze tukuřa ókkol basigiyói, carit tune híin feñrai looi fura baró bañir bóijje. **21** Háie de íțara beřiyáin edde fuain bad di tokoriban fañs ázar beřaáin. **22** Baade éhon or bútoře Isá ye Nizor carit tun ore mojbur goijjé de, íba ye manúc cún ore bidai gorí dite-dite íțara zeéne noow ot urí íbar age ɗiír okule zaagói. **23** Manúc cún ore bidai gorídi baade, íba ekéla faár or uore dua goittó uițtói. Aar hañz óiye de héntte, íba hépe hálga, **24** montor noow gán kul ottu boót duré,

aar boiyar uzan baát accíl ísafe híyan léinge éñskar. **25** Fuáñitta, Isá fanír uottú áñri-áñri ítarar hére aiccé. **26** Íba fanír uottú áñrer de híyan cárit tune deki bicí ðooraiyóí, aar hoór de, “Íbá bú!” Héndilla hoói, ítara ðoore guzoran maijíl. **27** Montor Isá ye éhon-éhon ítara re hoór de, “Hímmot goró! Íbá Añ; no ðoraiyó.” **28** Zuwabe Fitore Íba re hoór de, “Malik, zodi Tuñí de óile, añré fanír uottú Tuáñr hére aító hókum dóh.” **29** Íba ye hoór de, “Ai.” Hétunot Fitor noow ttu lami, fanír uottú áñri-áñri Isár híkka zaat doiije. **30** Montor zeñtté tez boiyar deikké íba ðooraiyóí, aar ðufízargoi rár guzori hoór de, “Malik, añré baso!” **31** Isá ye toratori Nizor át barái íba re dórifelai hoór de, “Ó hom biccác ola, cóok kiyá goijjós?” **32** Baade zeñtté ítara noow ot uittégai, boiyar támaigyoi. **33** Aar zetará noowr uore accíl ítara Íba re eén hoói sóida goijjé, “Becók, Tuñí óilade Allar Fua.” **34** Ítara ðíí farái, Genesáret elakat foónicce. **35** Aar hé zagar maincé Isá re sinné rár, ítara sairó ðak or elakar agagurat hóbor foónisai, biyaraimma ókkol beggún ore Íbar hañse ainné; **36** baade ítara Íba re fóriyat gorát doiije de, biyaraimma gún ore siríf Íbar fucák or hañra óile súito dí bolla; aar zetó zone súiye ítara beggún gom óigiyoi.

15 Yárbaade Jerúsalem ottu hoozzon alem edde Féroci, Isár hañse aái hoór de, **2** “Tuáñr ummot ókkole agor zobanar buzurgó ókkol or rosóm kiyá bāñge? Ítara hána háibar agor ttu át no dúwe.” **3** Isá ye ítara re zuwabe hoór de, “Tuáñra nize yó kiyá tuáñrar rosóm or zoriya Allar hókum bāñgo? **4** Alla ye toh endilla hoiyé, ‘Bafmaa re izzot goríba’ aar ‘Zee niki baf or yáh maar bodnam goré, ítare mariféla zaybo.’ **5** Montor tuáñra hoó de, ‘Zodi honókiye baf ore yáh maa re eén hoó, “Ze siz loi tuáñra añr ttu laf feita híyan Alla re ðiiféla gíyeh,” **6** tooile ítar ttu baf ore yáh maa re izzot gorár zorur náí.’ Héen gorí, tuáñra tuáñrar rosóm or zoriya Allar kalam ore baatel gorifelaiyo. **7** Ó munafék ókkol, tuáñrar baabute nobi Yesáyah ye sóiyi hotá hoiyé, ki hoilé, **8** ‘Montor ííne Añré nizor muké beh izzot goré, montor tarár dil Añr ttu duré. **9** Tará Añr ebaadot goréde behar; kiyólla-hoilé tará taalim ísafe cíka de óilde insán or niyom-kaanun ókkol.” **10** Isá ye manúc ókkol ore Nizor hañse matai, ítara re hoór de, “Fúno aar buzó. **11** Gal ot ziín góle

manúc ore híine nafak goré de no, bóлке gal ottu ziín neeliaiyé manúc ore híine beh nafak goré.” **12** Hétunot cárit tune aái Íba re hoór de, “Tuñí hoi faro né, Féroci ókkole yáín fúni bezar óiye dé?” **13** Íba ye zuwabe hoór de, “Ze sara Añr asmani Bafe lagaiyé de no, híyan háñrifela zaybo. **14** Ítarar hotá félai ero. Ítara óilde ańdá ókkol or ańdá foñt dahóya; zodi ek ańdá ye arek ańdá re foñt dahá, duní zon toh gañt ot forizaybói.” **15** Fitore Íba re hoór de, “Ańára re meésal híyan buzáido.” **16** Isá ye hoór de, “Tuáñra yó aijjó obuz táigiyogoi dé? **17** Tuáñra kí no buzó, ziín gal or bútoe góle híin zaa de óilde ferot, aar feikána ttu neelizagói dé? **18** Montor ziín gal ottu neeliaiyé híin aiyé de óilde dil ottu, aar manúc ore híine beh nafak goré. **19** Kiyólla-hoilé dil ottu éna kukíyal, kotólakotóli, ðoilla-boðoilla zenákari, suri, misá gobá, edde gifot aiyé. **20** Manúc ore híine beh nafak goré; montor adúiya áte hána háile manúc ore nafak goré de no.” **21** Baade Isá hé zaga félai, Tayár edde Sídon cóor or elakat giíyégói. **22** Hé elakar eggwá Kánani mayafua neeli aái yore guzori-guzori Íba re hoór de, “Ó Malik, Dawud or Fua, añr uore rahám goró! Añr zérfua wa búte fai bicí duk far.” **23** Montor Isá ye híba re honó zuwab nó deh. Hétunot Íbar cárit tune aái yore Íba re aros gorér de, “Íbáh re duñrai dífélo, kiyólla-hoilé íbáh toh ańárar fisé-fisé guzorat asé.” **24** Isá ye zuwabe hoór de, “Añré siríf Isráil koum or áñzigiyoi de bérasóol ókkol or hañse beh ðiferá gíyeh.” **25** Montor mayafua wa aái yore Íbar muńtu sóida fori hoór de, “Ó Malik, añré modot goró!” **26** Isá ye zuwabe hoór de, “Fuain dor hána looi kuñir or muńtu félai dón gom no.” **27** Híba ye hoór de, “Ói, Malik, montor toóu de girós or mes ottu forizagói de tukura híin kuñire háa.” **28** Hétunot Isá ye híba re hoór de, “Ó mayafua, tuáñr iman bicí ðoóñr! Tuñí ziyán soór tuáñr lla híyan gorá záybo.” Tói éhon or bútoe híbar zérfua wa gom óigiyoi. **29** Baade Isá héntu bacá lói, Galil Díí báy zai eggwá faár or uore urí boiccégói. **30** Hétunot Íbar hañse becábicí manúc ókkol aiccé, zetará fúańti leng, ańdá, mazur, buk, edde aró boóut kisím or biyaraimma ókkol aní Íbar téng or gurat eijjé; aar Íba ye ítara re gom goijjé. **31** Zeñtté manúc ítara buk ókkole hotá hoór de, mazur gom óiye de, lenge áñrer de, ańdá ye deké de híin deikké, ítara taajup óigiyoi, aar ítara Boni Isráil or Allar taarif goijjé. **32** Isá

ye Nizor cárit tun ore matai hoór de, “Añr ttu manúc itará lla feṭfurer, kiyólla-hoilé itará Añr fúañti asé de tin din óiye aar itará ttu háito kessú náí. Añr ttu itará re waacca duñraidito mone no hoór, zeéne itará foñt ot matá gúrai fori no zagói.” **33** Cárit tune lla re hoór de, “Manúc or ettór ḑoóñr dol ore feṭ bóri hábai bolla añaara e bocóti-sára elakat hédun ruṭi hoṛé faiyum?” **34** Isá ye itara re hoór de, “Tuáñra ttu ruṭi houwá asé?” Itara hoór de, “Háñt twa, aar houggwá gura mas.” **35** lla ye manúc cún ore meṛit boító hoiyé; **36** baade hé háñt twa ruṭi edde mas sún looi Alla re cúkuriya goijjé, aar híñ bāñgi cárit tun ore diiyé, aar cárit tune manúc cún ore diiyé. **37** Beggúne feṭ bóri háiyé, baade ze tukuṛa ókkol basi accíl híñ bóijje rar lai loi háñt lai óiye. **38** Zetará háiyé itara óilde sair ázar beṛaáin, beṛiyáin edde fuain bad dih. **39** Isá ye manúc or dol lwá re bidai gorídi baade, noow ot urí Magádan elakat giyyégoi.

16 Ek din Féroci ókkole edde Sadukái ókkole aái Isá re entán gorí bolla lla re hoiyé de, itara re ekkán asmani nicán daháito. **2** lla ye itara re zuwabe hoiyé de, “Háñz óile tuáñra hoó de, ‘Moósum gom óibo, kiyólla-hoilé asman lal óiye.’ **3** Aar bíñna hoó de, ‘Aijja tuwán óibo, kiyólla-hoilé asman lal óiye edde gubbar óiye.’ Tuáñra toh asman or súrot saái moósum forók gorí zano, montor zobanar alamot ore forók gorí no faroór dé? **4** E zobanar hóraf edde zenákur maincé nicán tuwa, montor itara re nobi Yunus or nicán bade ar honó nicán diya no zaybo.” Tói lla itara re eri, giyyégoi. **5** Aar Cárit tun ḑiír okule zaibarcót, fúañti ruṭi loizaitó foóraigilgoi. **6** Isá ye itara re hoór de, “Hóboroddar, Féroci ókkol or edde Sadukái ókkol or cúṭar ottu uñciyar táikko.” **7** Hétunot itara afós ot howáhoi gorér de, “lla ye híyan hoór de añaara ruṭi nú aní de hétolla.” **8** Montor Isá ye híyan zani fari, itara ttu fusár gorér de, “Ó hom biccác ola ókkol! Tuáñra ttu ruṭi náí de híyan kiyá afós ot howáhoi gorór? **9** Tuáñra aijjó nó buzó níki? Tuáñra ttu monot náí né, fañs ázar maincóre fañs swá ruṭi loi hábai baade aró ho bāñir bóri loóila? **10** Héndilla, sair ázar maincóre háñt twa ruṭi loi hábai baade aró ho lai bóri loóila? **11** Añí tuáñra re ruṭir baabute hoóir de no de híyan no kiyá buzór? Féroci ókkol or edde Sadukái ókkol or cúṭar ottu uñciyar táikko.” **12** Hétunot itara buzí faijjé de, lla ye

itara re ruṭir cúṭar ottu uñciyar tákito hoiyé de no, bólke Féroci ókkol or edde Sadukái ókkol or taalim ottu. **13** Baade Isá zeñtté Kaisáriya Filíppi elakat aiccé, lla ye lla cárit tun ottu fusár gorér de, “Maincé Manúc or Fua re hon bouli hoó?” **14** Itara zuwab der de, “Hodúne hoó de Tuñí bóle báptismadoya Yaháya; ar hodúne hoó de, nobi Eliyas; ar hodúne hoó de, Yarmíyah yáh oinno nobi ókkol ottu honó eggwá.” **15** Tói lla ye itara re hoór de, “Montor tuáñra kii hoó, Añí hon?” **16** Sáimon Fitore zuwabe hoór de, “Tuñí óilade hé Mosih, zinda Allar Fua.” **17** Isá ye lla re hoór de, “Yunus or fua Sáimon, tui mubarek, kiyólla-hoilé toré yáñ honó insáne zahér goijjé de no, bólke Añr asmani Bafe goijjé deh. **18** Añí yó toré hoóir, tui óilide Fitor, aar Añí e fattór or uore Añr zomát banaiyúm; híyan ore moote úddwa no zitibó. (Hadiēs g86) **19** Añí toré asmani raijor sabí diiyum; tui e duniyait ziñ bañdñbi híñ asman ot óu bañdá zaybo, aar e duniyait ziñ ezazot dibi híñ asman ot óu ezazot diya zaybo.” **20** Baade lla ye lla cárit tun ore horagori nicót goijjé de, lla Mosih de híyan honókiyo re no hoiót. **21** Hé októt lóti Isá ye Nizor cárit tun ore zanaidiat doiije de, lla ttu háamaha Jerúsalem ot zaa foribó; aar murubbi, ḑoóñr imam, edde alem ókkol or át ot boóut ḑóilla duk faa foribó; lla re mariféla zaybo, montor tin din ot din zinda gorá zaybo. **22** Hétunot Fitore lla re ekkinare loizai buzár de, “Ó Malik, híyan dur óuk. Tuáñr uore héndilla honódin no óuk.” **23** Isá ye fíri Fitor ore hoór de, “Cóitan, Añr muúntu dur ó! Tui óilide Añr lla oñsá; kiyólla-hoilé tor díyan toh Allar gún or uzu no, bólke insán or gún or uzu.” **24** Isá ye tarfore lla cárit tun ore hoór de, “Zodi honókiyo ttu Añr fisáli aitó monehoó, yóggwa ttu nizoré inkar gorífela foribó, aar nizor kúruc boói Añr fisáli dora foribó. **25** Kiyólla-hoilé zee níki nizor zan basaitó saá, yóggwa ye híyan háraifeleibo; montor zee níki Añr wasté nizor zan háraifele, yóggwa ye híyan faibo. **26** Kii laf, zodi honókiye tamám duniyai faa, montor nizor zan nán háraifele? Insáne nizor zan or bodol kii dii faribó de asé? **27** Kiyólla-hoilé Manúc or Fua toh Nizor Baf or mohímaye Nizor fírista ókkol ore fúañti looi aibó, tarfore fottí zon ore nizor-nizor ham mozin bodola diibo. **28** “Añí tuáñra re sóiyi hoóir, eṛé endilla hodún manúc tíyaiya asé, zetará Manúc or Fua re lla raijor hókumot goittó aiyér de nó dekíte no moribó.”

17 Sów din baade Isá ye siríf Fitor ore, Yakub ore, edde yóggwar báí Yohánna re looi, ílara re eggwá uñsol faár or uore loigiyé. **2** Hére ítarar muúntu íbar súrot bodoligiyói. Íbar siyára beil or ñóilla zolat doiije, aar íbar hoor nur or ñóilla dúf óigiyoi. **3** Hétunot ílara deikké de, Muúsa edde Eliyas íba llói hotá hoór. **4** Fitore zuwabe Isá re hoór de, “Malik, gom óiye añára eré así. Zodi Tuñí soó, añí eré tin nán ñambu ñakiyúm: ekkán Tuáñr lla, ar ekkán Muúsa lla, edde ar ekkán Eliyas olla.” **5** Fitore hotá hoór de októ, ekkán nurani miyúla ye ílara re saífelaiye, aar hé miyúla ttu eggwá abas aiccé de, “Íbá óilde Añr adorja Fua, zibá re lói Añí bicí kúci. Ibár hotá fúno!” **6** Cárit tune híyan fúinne rár, merit uúñtoi foijjé, aar bicí ñooraiyói. **7** Montor Isá aái ílara re súi hoór de, “Uřó, no ñooraiyó.” **8** Hétunot ílara suk tulí saiyé rár, siríf Isá re bade ar honókiyo re nó deké. **9** Ílara faár ottu lami aiyér de októ, Isá ye ílara re hókum gorér de, “Tuáñra ziyán deikkó, híyan Manúc or Fua re mora ttu zinda gorá nó zah foijjonto honókiyo re no hoiyó.” **10** Íbar cárit ílara íba ttu fusár gorér de, “Tóoile alem ókkole kiyá endilla hoó, age nobi Eliyas aár zorur?” **11** Isá ye zuwabe hoór de, “Becók, age Eliyas aibó aar hárr kessú zendilla ówa foitto héndilla goridibo. **12** Montor Añí tuáñra re hoór, Eliyas aáigiyoi. Lekin manúc ókkole íba re nó siné, bólke íba re ílara ttu zeén monehoiyé héen goijjé. Borabor héndilla, Manúc or Fua yó ítarar át ot duk faibar asé.” **13** Hétunot cárit ílara buijjé de, íba ye ílara re bápťismadoya Yaháyar baabute hoór deh. **14** Baade ílara zeñtté manúc or dol or hére aiccé, ezzon manúce Isár hañse aái añrú félai hoór de, **15** “Ó Malik, añr fua war uore rahám goró, ítar ttu súañfira asé, aar bicí duk faar; íte egazá ooin ot edde fanít fore. **16** Añí ítare Tuáñr cárit tun or hañse ainnílam, montor tará ítare gom gorí nó fare.” **17** Hétunot Isá ye zuwabe hoór de, “Ó iman sára edde baañra nosól, Añí tuáñrar fúañti-fúañti aró hotókkal tákitam? Hotódin Añí tuáñra re bordac goittám? Ítare eré Añr hañse anó.” **18** Isá ye búttwa re dómkidiye rár, yíba fua war búttottu neeligiyói, aar íte éhon-éhon gom óigiyoi. **19** Tarfore cárit tune Isár hañse aiddone aái hoór de, “Yíba re añára kiyá neelai nó fari?” **20** Isá ye ílara re hoór de, “Tuáñrar iman or homir zoriya. Kiyólla-hoilé Añí tuáñra re sóiyi hoór, zodi tuáñra ttu hóroir danar héttirin iman táke, tuáñra e faár gwá re eén hoói faribá, ‘Entú lori uré zaagói,’ tói yíba lorizaybói. Tuáñra gorí no faribá de kessú no tákibo. **21** Lekin dua edde ruza sára endilla gún neelai no fare.” **22** Zeñtté cárit tun Galil ot zoma óiye, Isá ye ílara re hoór de, “Manúc or Fua re manúc ókkol or át ot gosáidiya zaybo; **23** aar ílara íba re marifélaibo, montor íba re tin din ot din zinda gorá zaybo.” Híyan fúni ílara ttu bicí ferecan laiggíl. **24** Isá edde íbar cárit tun Kaparnahúm ot foónsi baade, baitul-mukaddos or házana-tulóya ókkol Fitor or hañse aái hoór de, “Tuáñrar ustate baitul-mukaddos or házana no dee níki?” **25** Fitore hoór de, “Becók, dee.” Zeñtté Fitor gó or búttore aiccé, íba ye hoibár agor ttu Isá ye íba re hoór de, “Sáimon, tui kii báfos? Duniyair baáñcca ókkole hásil yáh házana har ttu tulé, nizor maincór ttu né náki baár or maincór ttu?” **26** Fitore hoór de, “Baár or maincór ttu.” Isá ye íba re hoór de, “Tóoile toh nizor manúc ókkol basigiyói. **27** Montor añára ílara re bezar no gorí fán, ñíft zai borkí baágoi. Ze mas age foribó yíba re loibi; aar yíbar gal kúlile ekkán rufar foicá faibi ziyán káfí óibo. Híyan looi Añr lla edde tor lla híyan ílara re házana dic.”

18 Hé októ cárit tune Isár hañse aái hoór de, “Tóoile asmani raijot ebbe ñoóñr honnwá?” **2** Tói íba ye eggwá gura fua re íbar hañse matai ítarar mazé tiyagaraiye, **3** aar hoór de, “Añí tuáñra re sóiyi hoór, zodi tuáñra bodoli gura fuain dor ñóilla no bono, tóoile asmani raijot bilkul góli no faribá. **4** Hétolla zee niki nizoré e gura fua war ñóilla cónño bana, yóggwa óilde asmani raijot ebbe ñoóñr. **5** Aar zee niki endilla honó gura fua re Añr name kobul goré, íte Añré kobul goré deh.” **6** “Zee niki Añr uore iman ainné de e cónño ókkol ottu honókiyo re guná gorába, ítar lla beétor óilde, ítar golat eggwá bór cíl or sakkí bañdí mur doiijjat ñufáidiya zah. **7** Duniyair uore siz uúin or zoriya afsús, zífne gunát foraba. Kiyólla-hoilé híin toh aibár zorur, montor uitar uore afsús, zar duara niki híin aiyé.” **8** Zodi tuáñr áte yáh ténge tuáñre gunár uzu ñane, tóoile híyan harí tuáñr héntu félaido. Dui át yáh dui ténge táki ofúrani ooin ot félaidiya zar túaro, túnñra yáh leng ói zindigit góla tuáñr lla beétor. (aiōnios g166) **9** Aar zodi tuáñr suké tuáñre gunár uzu ñane, tóoile yíba tuáñr héntu neelai félaido. Dui suk

táki zuzuk or ooin ot félaidiya zar túaro, eggwá suk loi zindigit góla tuáñr lla beétor. (Geenna g1067) 10 Saiyó, e cóñro ókkol ottu ezzon ore yó hékarot no goijjó; kiyólla-hoilé Añi tuáñra re hoóir, tarár firista ókkole asman ot mazé hámica Añr asmani Baf or siyára deké. 11 Manúc or Fua aiccé de áñzigiyoi de ítara re nejat di bolla. 12 Tuáñra kii báfo? Zodi honó manúc ottu ek cót bérasóol táke aar héntu eggwá ór óizagoi, íte nobboi-now wa re faár or uore eri, ór óigiyoi de yíba re tuwaitó no zaibo né? 13 Añi tuáñra re sóiyi hoóir, íte yíba re tuwai faile, ór nó de nobboi-now wa bérasóol lun ore lói túaro íte yíba re lói bici kúci goríbo. 14 Héndilla, tuáñrar asmani Baf or moncá yáñ no de ki, e gura itará ttu ezzon úddwa dónco óizon. 15 “Zodi tuáñr báí ye tuáñr ulða hosúri goré, tooile zai aiddone ítara hosúr daháidiyo. Zodi íte tuáñr hotá dóre, tooile tuñi tuáñr báí ore firai faiyó. 16 Montor zodi íte tuáñr hotá no dóre, tooile tuáñr fúañti aró ezzon yáh dui zon manúc loizaiyó, zeéne ‘ze honó maamela dui zon yáh tin zon gobár zobane sóiyi bouli sábut óizagoi.’ 17 Aar zodi íte ítara hotá yó no dóre, tooile híyan zomát ore hoiyó. Aar zodi zomát or hotá yó no dóre, tooile íte tuáñra lla ézzon gairimandár yáh házana-tulóyar dóilla óuk. 18 “Añi tuáñra re sóiyi hoóir, tuáñra duniyait zín bañdíba, híin asman ot óu bañdá zaybo; aar duniyait zín ezazot diba, híin asman ot óu ezazot diya zaybo. 19 “Añi tuáñra re yáñ óu hoóir, zodi duniyait tuáñrar bútotu dui zone ektofák ói dua goríle, Añr asmani Baf or torfóttu ítara lla híyan gorá zaybo. 20 Kiyólla-hoilé zeré dui zon yáh tin zon Añr name zoma ó, hére Añi ítara mazé así.” 21 Hétunot Fitore aái Isá re hoór de, “Malik, zodi añr báí ye añr ulða hosúri gorát táke, añi ítare ho bar maf goittám? Háñt bar né?” 22 Isá ye íba re hoór de, “Añi toré háñt bar bóuli no hoóir, bólke hóittor gun háñt bar. 23 “Kiyólla-hoilé asmani raijjo óilde endilla baáñccar dóilla, zibá ye nizer goóur ókkol ottu ísaf loito saiye. 24 Zeñtté yóggwa ye ísaf lowa cúru goijjé, hétunot yóggwar hañse endilla ezzon ore aná gíyeh, zar ttu yóggwa ye lak-lak ñiañ footi faar. 25 Íte zettót híin fúñzi no farer, ítara giróse hókum díye de, híin fúñzi bolla ítare, ítara bou fuain dore edde ítara ttu zín asé híin beggún besiféla zay bolla. 26 “Hétolla goóur gwá ye yóggwar muúntu uúñtoi fori hoór de, ‘Ó malik, hooddin ánik sobór goró, añi tuáñre beggún fúñzifelaiyum.’ 27 Hétunot

goóur gwar girós ottu ítara lla fetfuijje, aar footi gún maf di ítare eridiye. 28 “Montor hé goóur gwá baárkule zai, nizer sáañti goóur ottu ezzon ore loot faiyé, zibá ye ítara ttu ek cót dinártiañ udár loóil. Íte íba re dóri gola sibi hoór de, ‘Añr footi diiféla.’ 29 “Hétunot ítara sáañti goóur gwá ye ítara téng ot uúñtoi fori fóriyat gorér de, ‘Hooddin ánik sobór goró, añi tuáñre beggún fúñzifelaiyum.’ 30 “Montor íte nó mane, bólke zai ítare otókkal olla ziyól ot diyégoi, zetókkal foijjonto footi híin nó fúñze. 31 Zeñtté ítara oinno sáañti goóur ókkole híyan deikké, ítara ttu bici ferecan laiggé, aar aái ítara girós ore zín díye híin beggún zanaiyé. 32 “Tói giróse ítare matai hoór de, ‘Tui toh hóraf goóur! Tui añré fóriyat goijjós de hétolla, añi toh tor footi beggún maf diyí. 33 Tor ttu yó tor sáañti goóur or uore rahám gorón nu accíl né, zendilla añi tor uore rahám goijjé?’ 34 Girós ottu guccá urí, ítare otókkal foijjonto sánza dí bolla ziyól or zimmadar ore gosáidiye, zetókkal ítara footi beggún fúñzi nó fele. 35 “Añr asmani Bafe yó tuáñra re héndilla beh goríbo, zodi tuáñra fottfikiye nizer báí ore dil ottu maf no doh.”

19 Zeñtté Isá ttu hotá híin hoiyá díye, íba Galil ottu bacá lói Jordán hál or farkul or Yohúdiya elakat giyyé. 2 Becábici manúc ókkol íbar fisá doijjil, aar hére íba ye ítara biyaram gom goijjil. 3 Isár hañse hodún Féroci yó aiccé; ítara íba re entán gorí bolla súwal gorér de, “Morotfua ye nizer bou wóre ze honó wajáye sárifelaiyar zayes asé né?” 4 Íba ye zuwabe hoór de, “Tuáñra kí nó foró, zibá ye ítara re foida goijjé íba ye cúrut lóti ítara re morot aar maya banaiyé deh, 5 aar hoiyé de, ‘Híyan olla toh morotfua ye nizer bafmaa ttu zuda ói nizer bou wór fúañti tákibo, aar ítara duní zon ek jisím óizayboi?’ 6 Hé ísafe, ítara ar dui no, bólke ek jisím. Hétolla Alla ye zetará re zur goijjé, ítara re honó manúce síra no goróuk.” 7 Ítara íba re hoór de, “Tooile Muúsa ye endilla kiyá hókum díye, híba re sárhabos dii duñrai diyo?” 8 Isá ye ítara re zuwab der de, “Tuáñrar dil doró de hétolla Muúsa ye tuáñra re tuáñrar bouwáin sárifelar ezazot diyé deh, montor cúrut lóti héndilla nu accíl. 9 Añi tuáñra re hoóir, zee kiyé nizer bou wóre zenár hosúri lla bade ar honó wajáye sárifele aar ar eggwá re biyá goré, íte zená gorér deh.” 10 Cárit tune íba re hoór de, “Zodi zamai bou wór hálót héndilla ó, tooile

biyá no gorón éna beétor.” 11 Isá ye ítara re hoór de, “Hotá híyan beggúne kobul gorí no fare, montor siríf uitará beh fare zetará re híyan or toófufik diiya giyéh. 12 Kiyólla-hoilé ízara ókkol or bútoore hodún óilde maar ferot lóti ízara, aar hodún ore ízara banaiyé de óilde maincé; endilla yó hodún ízara asé zetará asmani raijior wasté biyá no goré. Zee niki híyan kobul gorí fare, íte kobul goróuk.” 13 Ek din maincé gura fuain dore Isár hañse anát doiije, zeéne íba ye ítara uore át dé edde ítara lla dua goré; montor cárit tune manúc cún ore bóþboráye. 14 Lekin Isá ye hoór de, “Fuain dore Añr hañse aitódo; ítara re no oónillo, kiyólla-hoilé asmani raijio toh ítara dóilla maincé éna hásil goré.” 15 Ítarar uore át dí baade íba héntu giyégoi. 16 Fore ezzon manúc Isár hañse aái hoór de, “Ustat, ofúrani zindigi faite añr ttu kii gom ham gorá foribó?” (aiñios g166) 17 Íba ye yóggwa re hoór de, “Gom orbaabute tuñí Añr ttu kiyá fusár gorór? Gom toh siríf Ekzon éna asé. Montor tuáñr ttu zindigit góilto monehoilé, hókum ókkol amól goró.” 18 Yóggwa ye íba re hoór de, “Hon nún?” Isá ye hoór de, “Kún no goríba; zená no goríba; suri no goríba; misá gobá no diba; 19 bafmaa re izzot goríba, edde ‘nizor atehañsór maincóre nizor dóilla muhábbot goríba.” 20 Juwan manúc cwa ye íba re hoór de, “Añí híin beggún amól gorí-gorí aiyr. Añr ttu ar kii baki asé?” 21 Isá ye yóggwa re hoór de, “Zodi tuáñr ttu furafuri háti óito monehoó, tooile zoo, tuáñr cómbotti ókkol besi gorif ore diifélogoi, tói tuñí asman ot dón faiba; baade aái Añr fisáli óiyogai.” 22 Montor juwan manúc cwa ye híyan fúinne rár, ferecanir sáañte giyégoi; kiyólla-hoilé yóggwa ttu becábicé dón-cómbotti asé. 23 Hétunot Isá ye íbar cárit tun ore hoór de, “Añí tuáñra re sóiyi hoóir, tuangor manúc ottu asmani raijio gólite bicí mockil. 24 Añí tuáñra re abar hoóir, tuangor manúc Allar raijio gólar túaro, eggwá uñt fúñc or faái ttu goli zaa aró aásan.” 25 Cárit tune híyan fúinne rár bicí taajup óigiyoi, aar hoór de, “Tooile hone nejat fai faribó?” 26 Isá ye ítara uzu saái hoór de, “Híyan insáne gorí no fare, montor Alla ye hárr kessú gorí fare.” 27 Hétunot Fitore íba re hoór de, “Soó, añára de hárr kessú eridi Tuáñr fisáli óigiyigoi. Tooile añára kii faiyum?” 28 Isá ye ítara re hoór de, “Añí tuáñra re sóiyi hoóir, tuáñra zetará Añr fisáli óiyo, noya foidayecir októ zeñtté Manúc or Fua íbar mohímar toktót

boibó, héñtte tuáñra yó baró wan toktót boói Isráil or baró háandan or bisar goríba, 29 aar zee niki Añr wasté nizor gór, báí, bóin, baf, maa, bou, fuain, yáh zagazobin eridiyé, yóggwa ye ek cót gun bicí faibo, aar ofúrani zindigi miras faibo. (aiñios g166) 30 Lekin boóut zon, zetará yala age asé, ítara fisé óizayboi; aar zetará yala fisé asé, ítara age óizayboi.”

20 “Kiyólla-hoilé asmani raijio toh endilla zomidar or dóilla, zibá ye ek din bífnna sóore yóggwar anggur-bariza lla mozur dóitto giyíe. 2 Yóggwa ye ítara re dine ek dináror dóre dii bolla razi ói, ítara re yóggwar anggur-barizat diferáidiye. 3 “Yóggwa now wa báze góri baárkule giyíe rár, aró hodún manúc ham sára, bazar ot tíyai táikke de deikké. 4 Yóggwa ye ítara re hoór de, ‘Tuáñra yó zai añr anggur-barizat ham gorógoi, añí tuáñra re hók motafe góri dam diiyum.’ Baade ítara giyíe. 5 “Yóggwa abar baró wa báze edde tin nwá báze góri baárkule zai, ekí dóilla goijjé. 6 Fañs swá báze góri yóggwa baárkule giyíe rár, hére aró manúc ókkol tíyai táikke de deikké. Yóggwa ye ítara re hoór de, ‘Tuáñra eré dinbór ham sára kiyá tíyai táikko?’ 7 “Ítara yóggwa re hoór de, ‘Añára re honókiye ham ot nó loo de hétolla.’ “Yóggwa ye ítara re hoór de, ‘Tuáñra yó zai añr anggur-barizat ham gorógoi.’ 8 “Háñzinna óiye rár, anggur-barizar giróse mazí re hoór de, ‘Mozur gún ore mata, aar fisór ttu aiccé de ítare lóti cúru gorí age aiccé de ítare foijjonto dam diiféla.’ 9 “Zetará re fañs swá báze ham ot laga giyéh, ítara fottíkiye aái ek dinár or dóre faiyé. 10 Hétolla zetará re age ham ot laga giyéh ítara aái, bicí faibo bouli táaijje. Montor ítara fottí zone yó faiyé de ek dinár or dóre. 11 Ítara faiyé rár, zomidar gwar ulda monmonat doiije. 12 Eén hoói, ‘Fisór manúc itará siríf ek gónða beh ham goijjé, montor añára de dinbór roid or gorom ot ham goijjé, toóu tuñí itará re añára llói fúwan goijjé.’ 13 “Hétunot yóggwa ye ítara ezzon ore zuwabe hoór de, ‘Bái, añí toré honó nainsáfí nó gorí. Tui ek dinár lói ham gorí bolla añr llói razi óilde no né? 14 Tor dam looi yore zaagói. Fisé aiccé de manúc ítare yó añr ttu tor fúwan dam diito monehoór. 15 Añr nizor jiníc lói añr ttu zeén monehoó héen gorí bolla añr ttu hók náí niki? Aar náki añí gom de hétolla tor ttu ric lager dé?’ 16 “Hétolla hoóir, zetará yala age asé, ítara fisé óizayboi; aar zetará yala fisé asé, ítara age

óizayboi.” 17 Isá uore Jerúsalem ot zaar de óktót, íba ye baró zon cárit tun ore ekkinare loizai foñt or uore ítara re hoór de, 18 “Soó, añára uore Jerúsalem ot zairgói, hére Manúc or Fua re doónr imam ókkol or edde alem ókkol or hañse dóridiya zaybo; ítara íba re moot or fótua díbo, 19 edde Beyohúdi ókkol or hañse gosáidibo, íba re ínca gorí bolla, coónk mari bolla, edde kúruc ot dífelai bolla. Lekin tin din ot din íba re zinda gorá zaybo.” 20 Yárbaade Zebedair fuain dor maa ye híbar fuain looi Isár hañse aiccé, aar sóida fori íba re ekkán aros goijjé. 21 Isá ye híba re hoór de, “Tuñí kii soór dé?” Híba ye Isá re hoór de, “Añré waada doo de, Tuñí añr e fua duní wa re Tuáñr raijot buágaraiba, ezzon ore Tuáñr den dák ottu, ar ezzon ore Tuáñr ban dák ottu.” 22 Montor Isá ye zuwabe hoór de, “Tuáñra kii magor híyan tuáñra no zano. Añí fiíyüm de fiyala yíba tuáñra fií faribá né?” Ítara íba re hoór de, “Fariyúm.” 23 Isá ye ítara re hoór de, “Becók tuáñra Añr fiyala fiíba, montor Añr den dák ottu yáh ban dák ottu honókiyo re buágaron Añr ham no. Zaga híin óilde uitará lla zetará lla niki Añr Bafe toiyar gorí raikké.” 24 Baki doc zon cárit tune híyan fúni, ítara duní báí lói guccá óigiyoi. 25 Montor Isá ye ítara beggún ore Nizor hañse matai hoór de, “Tuáñra toh zano, Beyohúdi ókkol or hókumot-goróya ókkole tarár uore raastri goré; aar tarár doónr sóddar ókkole ítara uore adíkar sola. 26 Montor tuáñrar bútoe héndilla ón ɸík no, bólke tuáñra ttu zee niki doónr óito saá, ítar ttu tuáñrar háadem bonar zorur; 27 aar tuáñra ttu zee niki age óito saá, ítar ttu tuáñrar gulam bonar zorur; 28 zendilla Manúc or Fua yó hédmot feito aiccé de no, bólke aiccé de hédmot goittó, edde boóut zon or bodol Nizor zan dito.” 29 Zeñtté ítara Jerikó cóor ottu neeler, doónr ek dol manúc Isár fisá doijje. 30 Dui zon añdá manúc rastar hañsat boirá accíl; ítara Isá hé rasta báý zaar de fúinne rár, guzori-guzori hoór de, “Ó Malik, Dawud or Fua, añárar uore rahám goró!” 31 Manúc cúne ítara re jéjjerai nizám óito hoiyé, montor ítara aró doónr góri guzori hoór de, “Ó Malik, Dawud or Fua, añárar uore rahám goró!” 32 Hétunot Isá tíyaigiyoi, aar ítara re matai hoór de, “Tuáñra kii soó, Añí tuáñra lla kii goittám?” 33 Ítara íba re hoór de, “Malik, añára saái, añárar suk kún kúlizoggoi.” 34 Isá ttu ítara uore rahám lagi ítara suk kún súiye;

ítara suk éhon-éhon gom óigiyoi, aar ítara íbar fisá doijje.

21 Zeñtté ítara Jerúsalem or dáce Zaitun Faár ot asé de Betfégi edde Betániya farat foónicce, hétunot Isá ye dui zon cárit ore diferáiyé, 2 ítara re endilla hoói, “Tuáñra muúm or fara gán ot zoo, hére zai mottor eggwá gadá baidá loot faiba, yíbar fúañti eggwá sóo yó faiba. Híin ore kúli Añr hére anógoi. 3 Zodi honókiye tuáñra re kessú hoó, tuáñra hoibá de, ‘Malik ottu iín ore lager.’ Tói yóggwa ye híin ore éhon diferáidibo.” 4 Híyan etollá óiye, zeéne nobir duara howá gíyl de yían fura ó: 5 “Síyon or zérfua re hoibá de, ‘Soó, tuáñr Baáñcca tuáñr hañse aiyér. Íba cída, íba gadár uore gori, gadár sóor uore gori aiyér.” 6 Hé cárit ítara zai, Isá ye ítara re zendilla cíkaidiye héndilla goijjé. 7 Ítara gadá edde gadár sóo wa re ainné, aar híin or uore nizor hoor ókkol bicáidiye, aar Isá híin or uore boiccé. 8 Beec bák maincé nizor hoor ókkol rastar uore bicáidiye; argúne gas or ɸaggwa ókkol hari rastat bicáidiye. 9 Zedún manúc Isár age-age edde fisé-fisé zaat accíl, ítara guzori-guzori hoór de, “Dawud or Fua re Hósana! Mubarek Ubá zibá Mabud or name aiyér. Ebbe uore asman ot Allar taarif óuk!” 10 Zeñtté Isá Jerúsalem ot góille, guñra cóor úrussul ot forigiyói; ítara hoór de, “Íbá hon?” 11 Manúc cúne hoór de, “Íbá óilde Isá nobi, Galil or Nasarat cóor or.” 12 Fore Isá baitul-mukaddos ot góille, aar zetará hére besa kina gorér ítara re loraidiyat doijje; aar baɸta báñgoyar ɸebíl edde hoitor besoyar boiróni ókkol natɸiyagarai diye. 13 Íba ye ítara re hoór de, “Pak-kalam ot endilla asé, ‘Añr gór ore munazat or gór howá zaybo,’ montor tuáñra toh híyan ore ɸahañit or aɸɸa-hána banaifélaiyo.” 14 Tarfore añdá ókkol edde leng ókkol baitul-mukaddos ot Isár hañse aiccé, aar íba ye ítara re gom goijjé. 15 Lekin doónr imam ókkole edde alem ókkole zeñtté Isá ye goijjé de taajuippa ham ókkol deikké, edde baitul-mukaddos or bútoe fuain de guzori-guzori, “Dawud or Fua re Hósana!” hoór de fúinne, ítara ttu bicí guccá urígiyoi. 16 Ítara íba re hoór de, “Tuñí fúnor né fuain iíne kii hoór?” Isá ye ítara re hoór de, “Fúnir, tuáñra kí yían honódin nó foró, ‘Gura fuain dor edde dud or fuain dor muk ottu Tuñí Tuáñr taarif óibar entezam goijjé?” 17 Baade íba ye ítara re eri cóor or baáre Betániya farat giyyégoi, aar hére

rait haraáil. 18 Bíinna sóore, Isá cóor ot waafes zaibarcót, íba ttu búk laiggé. 19 Íba ye foñt ot eggwá ñuñir-gas deki, yíbar ínyot giyyé, montor yíbat fata bade ar kessú loot nó faa. Hétunot íba ye gas swá re hoór de, “Ar honódin tor ttu gula no dórouk.” Tóí éhon or bútoore ñuñir-gas swá fúaiyai. (aïñ g165) 20 Híyan deki cárit tun taajup óigiyoi, aar hoór de, “Ñuñir-gas swá eén toratori keén fúaiyai?” 21 Isá ye ítara re zuwabe hoór de, “Añí tuáñra re sóiyi hoóir, zodi tuáñra ttu iman táke aar cók no goró, tóoile tuáñra siríf ñuñir-gas swár uore ziyán óiye híyan gorí farihá de no, bólke zodi e faár gwá re yó hoó, ‘Urí doijjat forgói,’ híyan óibo. 22 Tuáñra duat mazé iman or sáañte zíín magibá híin beggún faiba.” 23 Isá ye baitul-mukaddos or urán ot góli baade taalim der de októ, Yohúdir ñoóñr imam ókkol edde murubbi ókkol íbar hañse aiccé, aar hoór de, “Tuñí ham iín kii adíkare gorór? Tuáñre e adíkar hone diiyé?” 24 Isá ye ítara re zuwabe hoór de, “Añí yó tuáñra ttu ekkán súwal fusár goríyum. Tuáñra Añré híyan or zuwab dilé Añí yó tuáñra re hoiyúm Añí iín kii adíkare gorír deh. 25 Yaháya ye bápñisma díbar adíkar hontú faáil? Asman ottu né náki insán ottu?” Ítara afós ot biyasana gorér de, “Zodi añára hoói ‘asman ottu,’ íba ye añára re hoibó de, ‘Tóoile tuáñra íba re biccác kiyá nó goró?’ 26 Montor zodi hoói, ‘insán ottu,’ tóoile añára de maincóre ñoorai, kiyólla-hoilé beggúne toh Yaháya re nobi mane.” 27 Hétolla ítara Isá re zuwabe hoór de, “Añára no zani.” Íba ye yó ítara re hoór de, “Tóoile Añí yó tuáñra re no hoiyúm Añí iín kii adíkare gorír.” 28 “Tuáñrar buzá kii? Dóro, ezzon manúc ottu duwá fua asé, yóggwa ye fua ñoóñr gwar hañse zai hoór de, ‘Ó fut, aijja anggur-barizat zai ham gorgói.’ 29 Fua ye zuwab diyé de, ‘Añí no zaiyum,’ montor íte fisór ttu mon firai yore giyyé. 30 Yóggwa ye fua cóñro war hañse yó zai ekí dóilla hoiyé. Íte zuwab diyé de, ‘Jii, zaiyum,’ montor íte nó zaa. 31 Fua duní wa ttu hone baf or moncá fura goijjé?” Ítara íba re hoór de, “Ñoóñr gwá ye.” Isá ye ítara re hoór de, “Añí tuáñra re sóiyi hoóir, házana-tulóya ókkol edde magi mayafuain ókkolAllar raijot tuáñrar age góler. 32 Kiyólla-hoilé Yaháya toh forhéggarir torika dahái bolla tuáñrar hañse aiccíl, aar tuáñra íba re ekin nó goró; montor házana-tulóya ókkole edde magi mayafuain ókkole íba re ekin goijjé; tuáñra híyan deki baade yo mon nó fíro aar íba re ekin nó goró.”

33 “Arekkán meésal fúno: Ekgwá zomidar accíl, zibá ye ekkán anggur-bariza lagaiyé. Yóggwa ye híyan or sairó ñák ottu gíra díye, anggur or roc neelai bolla hére bútoore eggwá gañrá kuijyé, aar ekkán ñongki baindé. Baade bariza gán cacá ókkol ore téka dí yóggwa oinno mulluk ot giyyói. 34 Zeñtté anggur or ainda aiccé, yóggwar gula yóggwa ye fai bolla nizor goóur ókkol ore cacá gún or hañse diferáiyé. 35 Montor cacá gúne yóggwar goóur híin ore dóri, eggwá re mara-dóra goijjé, ar eggwá re zane marifélaiye, ar eggwá re fattór maijjé. 36 Abar yóggwa ye agor gún or túaro beecgori goóur ókkol diferáiyé; cacá gúne ítara re yó ekí dóilla goijjé. 37 Ebbe ahérit, yóggwa ye eén báfi nizorfua re ítarar hére diferáiyé, ‘Ítara añr fua re izzot goríbo.’ 38 Montor cacá gúne fua wa re deki afós ot hoór de, ‘Íte toh mirasdár; aiyó itaré marifélai itar miras loifélai.’ 39 Tóí ítara íba re dóri barizar baäre loizai marifélaiye.” 40 “Hé ísafe, barizar girós ailé, hé cacá gún ore kii goríbo fáñllar?” 41 Ítara íba re hoór de, “Yóggwa ye hóraf manúc híin ore saabgori hótom gorífelaibo, aar bariza gán undilla cacá ókkol ore téka dífelaibo zetará ainda ailé yóggwa re gular bák diibo.” 42 Isá ye ítara re hoór de, “Tuáñra pak-kalam ot yíán bikkúl nó foró níki, ‘Ze fattór mistíri ye inkar gorífelaiye, yíba fattór beggún or túaro bicí zoruri wa óigiyoi. Híyan Mabud or torfóttu óiaicce, aar híyan añárar suk ot taajuippa?” 43 “Hétolla Añí tuáñra re hoóir, Allar raijjo tuáñra ttu loifélai undilla eggwá kóum ore diífela zaybo, zibá ye níki híyan orgulagala dóraibo. 44 Zee níki hé fattór or uore foribó, íte báñgi hán-hán óizayboi; montor zar uore níki hé fattór foribó, íte ficí záyboi.” 45 Ñoóñr imam ókkole edde Férocí ókkole íbar meésal lun fúni buzígíyoi de ki íba ye ítarar baabute hoór deh. 46 Ítara íba re dórifelai bolla kucíc goijjíl, montor ítara awam ókkol ore ñooraitó, kiyólla-hoilé ítara íba re nobi mainto.

22 Isá ye ítara re aró ekbar meésal dí hoór de: 2 “Asmani raijjo óilde undilla baáñccar dóilla, zibá ye nizor fuar boirat or hána goijjé. 3 Zetará re boiraitta hánar dawot diya giyéh, ítara re matai bolla yóggwa ye nizor goóur ókkol diferáiyé, montor ítara aitó nó saá. 4 “Yóggwa ye abar ar hodún goóur ore endilla hoói diferáiyé, ‘Zetará re dawot diya giyéh ítara re hoibá de, yala añr ttu hána nal goijjá óiye;

añr doónra goru edde boli goru zooráiyi, yala beggún nal. Tuáñra boirat or hánat aiyó.’ 5 foida gorá foribó.’ 25 Dóro, añárar bútoore hánt zon báí accíl. Foóla wa ye biyá gorí fuain sára morigiyoí, hétolla íte nizor bou wóre báí olla rakígiyoí. 26 Héndilla hálot dusára, tisára ebbe hánto báí foijjonto óiye. 27 Ahérit, mayafua wa yó morigiyoí. 28 Hé ísafe, háñcor or hale híba ítara hánto zon ottu har bou óibo? Kiyólla-hoilé híba re toh ítara beggúne biyá goijjíl.” 29 Isá ye ítara re zuwabe hoiyé de, “Tuáñra gollot ot asó, kiyólla-hoilé tuáñra toh no pak-kalam zano, aar no Allar kudurut zano. 30 Kiyólla-hoilé háñcor or hále manúc ókkole no biyá goríbo aar no ítara re biyá díya zaybo, bólke ítara asman ot fíristar dóilla beh óibo. 31 Mora ókkol zinda ówar baabute hoitó sailé, tuáñra kí Alla ye tuáñra re hoiyé de yían nó foró, 32 ‘Añí óilam de Ibrahím or Alla, Isahák or Alla edde Yakub or Alla?’ Alla toh mora ókkol or Alla no, bólke zinda ókkol or éna.” 33 Manúc cúne híyan fúinne rár, íbar hé taalime taajup óigiyoí. 34 Zeñtté Férocí ókkole fúinne de, Isá ye Sadukái ókkol ore nizám márai raikké, ítara ekkán ot zoma óiye. 35 Ítara ttu Córíyot or ézzon aleme entán gorí bolla íba re súwal gorér de, 36 “Ustat, Tourat Córif ot hókum hon nán ebbe doóñr?” 37 Isá ye yóggwa re hoór de, “Mabud tuáñrar Alla re nizor fura dile, fura zane, edde fura demake muhábbot goríba.” 38 Híyan óilde ebbe doóñr edde ebbe zoruri hókum. 39 Ebbe zoruri hókum dui nombór or gán óilde, ‘Nizor atehańsór maincóre nizor dóilla muhábbot goríba.’ 40 Hé hókum duníyan ot fura Córíyot edde nobi ókkol or hotá loṭkaiya.” 41 Férocí gún ekkán ot zoma asé de októṭ, Isá ye ítara re ekkán súwal gorér de, 42 “Mosíhr baabute tuáñrar buzá kii? íba har Fua?” Ítara íba re hoór de, “Dawud or Fua.” 43 íba ye ítara re hoór de, “Tóoile Dawude kéengori íba re Ruhr hédaiyote ‘Malik’ ḍaikké? íba ye toh endilla hoiyé, 44 ‘Mabude añr Malik ore hoór de, ‘Añr den ḍák ottu boiyó, zetókkal foijjonto Añí Tuáñr duccon ókkol ore Tuáñr foor tole gorí nó felai.” 45 Tóí Dawude íba re ‘Malik’ ḍaikké de óile, íba kéengori Dawud or fua dé?” 46 íba re honókiye ehoór óu zuwab di nó fare, aar hé din lóti íba re ar súwal gorí bolla honókiye hímmot no goittó.

23 Baade Isá ye manúc or dol ore edde Nizor ummot ókkol ore hoór de, 2 “Córíyot buzáidi bolla alem ókkol edde Férocí ókkol óilde

Muúsar zagat. 3 Hétolla, ítara tuáñra re ziín goittó hoó, híin beggún goijjó edde mainno, montor ítara goré de híin no goijjó; kiyólla-hoilé ítara ziín hoó híin toh nize no goré. 4 Ítara bór-bór fuñzá ókkol bañdí maincór hañd or uore tulí déh, montor híin lari bolla ítara nize eggwá ooñl úddwa dito no saá. 5 “Ítara ziín goré híin maincóre dahái bolla beh goré; ítara toh pak-kalam or ayat leikká tabis ore ñoóñr góri bana, edde nizor fucák or hañrar doói lamba goré. 6 Ítara mela-cóbat barík zaga edde mujilíc-hána ókkol ot uñsol tokkar hadírat boító fosón goré, 7 ítara aró, bazare-bazare sólam faito, edde maincé ítara re ‘Rabbí, Rabbí’ hoói ñakilé fosón goré. 8 “Montor tuáñra re ‘Rabbí’ ñaha no baiyó; kiyólla-hoilé tuáñrar Ustat toh eggwá éna, aar tuáñra beggún óilade báí báí. 9 Duniyait honókiyo re baf no ñakiyó; kiyólla-hoilé tuáñrar Baf toh ekgwá éna, zibá níki asman ot asé. 10 Tuáñra re ‘Sóddar’ dahá no baiyó, kiyólla-hoilé tuáñrar Sóddar toh ekgwá éna, íba óilde Mosih. 11 Lekin tuáñra ttu zee niki ebbe ñoóñr, íte tuáñrar háadem bonouk. 12 Zee niki nizoré nize ñoóñr kúwala, ítare cónño gorá zaybo; aar zee niki nizoré nize cónño kúwala, ítare ñoóñr gorá zaybo. 13 “Ó munafék alem ókkol edde Férocí ókkol, tuáñrar uore afsús! Kiyólla-hoilé tuáñra toh maincór ttu asmani raijjo bon gorífelo; tuáñra nize yó no gólo aar zetará bútoe goíito sár ítara re yó goíito no doh. 14 Ó munafék alem ókkol edde Férocí ókkol, tuáñrar uore afsús! Kiyólla-hoilé ek mikká ttu tuáñra toh rari ókkol or gór ókkol luñ gorífelo, arek mikká ttu maincóre dahái bolla lamba-lamba dua goró. Hétolla tuáñra sáñza bicí ñoóñr faiba. 15 “Ó munafék alem ókkol edde Férocí ókkol, tuáñrar uore afsús! Kiyólla-hoilé tuáñra toh ezzon manúc ore tuáñrar dórmot aní bolla doijsa-doijsa edde zaga-zaga lamba sofór goró; aar zeñtté ezzon aní faro, héñtte tuáñra ítare nizor túaro ñui gun zuzuki bano. (Geenna g1067) 16 “Ó ańdá foñt dahóya ókkol, tuáñrar uore afsús! Tuáñra hoó de, ‘Honókiye baitul-mukaddos or hosóm háile, kessú no; montor honókiye baitul-mukaddos or cúnar hosóm háile, híyan hámaha adai gorá foribó.’ 17 Ó bekuf edde ańdá ókkol! Hon nán bicí ñoóñr, cúna né náki cúna re pak-sáf goré de baitul-mukaddos? 18 Tuáñra yíán óu hoó de ki, ‘Honókiye kurbani-ğáñr hosóm háile, kessú no; montor honókiye híyan or uore asé de kurbanir hosóm háile, híyan hámaha

adai gorá foribó.’ 19 Ó ańdá ókkol! Hon nán bicí ñoóñr, kurbani ne náki kurbani re pak-sáf goré de kurbani-ğáñ? 20 Hétolla zee niki kurbani-ğáñr hosóm há, íte kurbani-ğáñr edde híyan or uore asé de híin beggún or beh hosóm há. 21 Aar zee niki baitul-mukaddos or hosóm há, íte baitul-mukaddos or edde híyan or bútoe táke de íbar beh hosóm há. 22 Zee niki asman or hosóm há, íte Allar toktór edde híyan or uore zibá boiyé íbar beh hosóm há. 23 “Ó munafék alem ókkol edde Férocí ókkol, tuáñrar uore afsús! Kiyólla-hoilé tuáñra toh fudinar, masswá bahór or, edde zirar doc bák or ek bák doo, lekin Córiyot orbicí dami hotá re, yáni insáf, rahám edde imandari re tuáñra bad difélo. Tuáñra ttu íin óu gorón accíl aar uúin óu bad no don accíl. 24 Tuáñra óilade ańdá ókkol, zetará oinno zon ore foñt dahó, zetará eggwá masí re úddwa sái yore félaído, montor uññ gilífelo. 25 “Ó munafék alem ókkol edde Férocí ókkol, tuáñrar uore afsús! Kiyólla-hoilé tuáñra toh fíyalar edde tálbason or baárdák sáf goró, montor híin or bútoe de tuáñra zulúm edde lalsí gorí faiyó de híine furaiya. 26 Ó ańdá Férocí! Age fíyalar edde tálbason or bútor or ñák sáf gorífelo, tói baárdák óu sáf óizayboi. 27 “Ó munafék alem ókkol edde Férocí ókkol, tuáñrar uore afsús! Kiyólla-hoilé tuáñra toh endilla hobor or dóilla, ziín ore dóla gorá gíyeh. Híin baár ttu saité de cúndor, montor bútoe mora maincór ańññi ókkol lói edde hárr dóilla hoñsara loi furaiya. 28 Héndilla tuáñra re yó, maincé baár ttu saité forhésgar deké, montor tuáñrar bútoe munaféki edde kuhame furaiya. 29 “Ó munafék alem ókkol edde Férocí ókkol, tuáñrar uore afsús! Kiyólla-hoilé tuáñra toh nobi ókkol or hobor ore banaituló, aar forhésgar manúc ókkol or hobor ore háñzo. 30 Aar tuáñra hoó de, ‘Zodi ańára ańárar bafdáda ókkol or októť tákitam, nobi ókkol ore kún gorí bolla ańára ítarar fúañti córik no óitam.’ 31 Héengori tuáñra nize nizor baabute gobá dó de, tuáñra óilade nobi ókkol ore kún goijjíl de ítarar fuain. 32 Yala zoo, tuáñrar bafdáda ókkole ziín cúru goijjíl, tuáñra híin furussat gorífelologi. 33 “Ó háf or fuain háf ókkol! Tuáñra zuzuk or hókum ottu keéngori háriba? (Geenna g1067) 34 Hétolla, fúno, Ańi tuáñrar hañse nobi, giyani manúc, edde alem ókkol difeñáir; tuáñra héntu hodún ore kún goríba edde kúruc ot díba, aar hodún ore tuáñrar mujilíc-hána ókkol ot coóñk maribá edde cóore-cóore loraibá. 35 Hétolla

duniyait zedún behosúr manúc ore kún gorá gíyeh, ítara beggún or zimmadar óiba de tuáñra, behosúr Abel or lou wóttu lóti Berekaayos or fua Zakaríayhr lou foijjonto, zibá re tuáñra kurbani-gáñr edde baitul-mukaddos or mazémaijja kún goijjila. **36** Añí tuáñra re sóiyi hoóir, híin beggún or zimmadar óibo de e nosól. **37** “Jerúsalem, ó Jerúsalem, tui zee niki nobi ókkol ore kotól gorós edde zetará re tor hére diferá gíyeh ítara re cíl or dola maros. Kuúñri-kurá ye zendilla nizor sóo ókkol ore yibar fak or búture zoma gorí raké, héndilla tor fuain dore zoma gorí rakí bolla Añí hotó bar saiyí de asé, montor tuáñra híyan nó soó. **38** Fúno, tuáñrar gór tuáñrar suk or muúntu sáragor óizayboi. **39** Kiyólla-hoilé Añí tuáñra re hoóir, tuáñra Añré otókkal ar no dekába zetókkal tuáñra nó hoó de, ‘Mubarek Ubá zibá Mabud or name aiyér.’”

24 Isá baitul-mukaddos ottu neeli zaargói, héntte íbar cárit tun íbar hañse aiccé, íba re baitul-mukaddos or billíng ókkol dahái bolla. **2** Íba ye ítara re zuwabe hoór de, “Tuáñra iín beggún dekor né? Añí tuáñra re sóiyi hoóir, eéré eggwá fattór or uore ar eggwá fattór no tákibo, híin fottí ekgwá re félaidiya zaybo.” **3** Isá Zaitun Faár or uore boirá accíl de októ, cárit tune íbar hañse aiddone aái hoór de, “Añára re hoóna, híin hoñtté óibo dé? Tuñí aibár edde duniyai ahéri óibar alamot kii óibo?” (aiñ g165) **4** Isá ye ítara re zuwabe hoór de, “Saiyó, honókiye zen tuáñra re gollot ot no loiza. **5** Kiyólla-hoilé boóut zone Añr name aái hoibó de, ‘Añí óilam de Mosih,’ ítara boóut zon ore gollot ot loizaybói. **6** Tuáñra laráir abas edde laráir hóbora-hóbori ókkol fúniba; hóboroddar, no ñooraiabá, kiyólla-hoilé híin ówar zorur, montor híyala yó ahérot óibo de no. **7** Ek koume arek koum or ulða edde ek raijjo ye arek raijor ulða tíyaibo, aar zaga-zaga rañ ókkol edde búsal ókkol óibo. **8** Lekin híin beggún óilde siríf, fua hálas óibar cúrur duk ókkol or dóilla. **9** “Héntte maincé tuáñra re tokolíf di bolla dóridibo, aar tuáñra re marifélaibo; Añr lla bouli tuáñra re tamám koum ókkole nafórot goríbo. **10** Héntte boóut zon iman ottu fissá maribó; ítara ezzon ore ezzone dóridibo, edde ezzon ore ezzone nafórot goríbo. **11** Aar boóut misá nobi ókkol urí, boóut zon ore gollot ot loizaybói. **12** Bedini ókkol barízayboi de hétolla, beec maincór muhábbot homi zayboi. **13** Montor

zee niki ahéri foijjonto bordac gorí tákibo, íte beh nejat faibo. **14** Aar tamám koum ókkol or hañse gobá ó fán asmani raijor kúchóbor fura duniyait tobolik gorá zaybo, tói baade beh ahérot aibó. **15** “Dániyel nobir duara hoóil de hé bicí hótara jiníc ziyáne nafak goré, híyan ore zeñtté tuáñra pak zagat tíyaiya dekába—foróya ye buzó— **16** héntte zetará Yohúdiyat tákiba, ítara ttu faár ot dáizagoi foribó. **17** Zee niki gór or sád or uore asé, ítara ttu nizor gór or bútotu kessú looi bolla amat no lama foribó. **18** Aar zee niki kétit asé, ítara ttu nizor saddor looi bolla waafes nu aá foribó. **19** Montor hé din ókkol ot hámil mayafuain dor lla edde dud or maa ókkol olla bicí afsús or hálot óibo. **20** Dua goró, zeéne tuáñra ttu cítkhale yáh ebaadot-or-din dáizagoi no fore. **21** Kiyólla-hoilé héntte ettór ñoóñr mosibot óibo, zendilla duniyair foidayecir héntte lóti aijjó óiye de náí, aar abar no yó óibo. **22** “Zodi hé din híin homaidiya no zayto, tóoile honókiye no basitó; montor Allar basíloiya bonda ókkol olla bóuli din híin homaidiya zaybo. **23** Héntte zodi honókiye tuáñra re eén hoó, ‘Soó, Mosih eéré asé!’ yáto ‘Uré asé!’ híyan ekin no goijjó. **24** Kiyólla-hoilé misá Mosih ókkol edde misá nobi ókkol uríbo, aar ítara ñoóñr-ñoóñr illayi-nicán ókkol edde taajuippa harhána ókkol daháibo, maincóre gollot ot loizai bolla, farilé Allar basíloiya bonda re úddwa. **25** Saiyó, Añí tuáñra re age lóti hoóidiyi. **26** “Hétolla zodi maincé tuáñra re eén hoó, ‘Soó, íba moidan zagat asé!’ tuáñra baáre no neeillo, aar zodi eén hoó, ‘Soó, íba bútor or kamárat asé!’ híyan ekin no goijjó. **27** Kiyólla-hoilé zendilla fuk ottu bijili somkilé fosím foijjonto foór óizagoi, Manúc or Fuar aá yó héndilla beh óibo. **28** Mora lac zeéré, hére toh hóun ókkol zoma óibo. **29** “Montor hé din ókkol or mosibot fúrai mottor beil andár óizayboi, aar sane foór no dibo; asman ottu tara ókkol forizaybói, aar asmani jiníc ókkol tóttoraibo. **30** “Héntte asman ot Manúc or Fuar nicán dahá zaybo, hé októti duniyair tamám háandan ókkole ferecani zahér goríbo, aar ítara dekába de, Manúc or Fua kudurut edde ñoóñr mohímar sáañte asman or miyúlar uottú aiyér. **31** Aar íba ye eggwá ñoóñr cíañr abas diyabai Nizor fírasta ókkol diferáibo, aar ítara duniyair ek matá ttu arek matá foijjonto zai sairómikka ttu íbar basíloiya bonda ókkol ore ekkán ot zoma goríbo. **32** “Ñuññr-gas ottu meésal loo:

zeñtté ñuñir-gas or ñeila hórot ói fata neele, tuáñra zanizogó de, hóran ñáke. **33** Héndilla tuáñra yó, zeñtté iñ beggún deñíba, héñtte buzíba de, Manúc or Fua ñáke, ebbe dorozat. **34** Añí tuáñra re sóiyi hoóir, iñ beggún fura nó óiyi foijjonto e nosól bilkúl no fúraibo. **35** Asman zobin toh zari no tákibo, montor Añr hotá hámica zari tákibo. **36** “Lekin hé din edde októ aibár baabute honókiye no zane, asman or fírsta ókkole yó no zane, aar Fua ye yó no zane, siríf Bafe beh zane. **37** Manúc or Fua aibár októ undilla óibo zendilla nobi Nuhr din ókkol ot óoil. **38** Zendilla hé din ókkol ot tuwán óibar age, zetódin Nuh kicñit nó uré hétodin foijjonto manúc ókkole háafiya gorát, biyá gorát edde, biyá diyat accíl, **39** aar tuwán aái ítara beggún ore bácai nó loiza foijjonto ítara kessú hoi nó fare, Manúc or Fua aibó de híyala yó héndilla beh óibo. **40** Héñtte dui zon manúc bil ot óibo de tákibo; ítara ttu ezzon ore loiza zaybo, ar ezzon ore bad diya zaybo. **41** Duwá mayafua ye ekkú fúañti sakki gúraibo de tákibo; ítara ttu ezzon ore loiza zaybo, ar ezzon ore bad diya zaybo.” **42** Hétolla seton táko, kiyólla-hoilé tuáñra toh no zano tuáñrar Malik hon din aibó. **43** Lekin yíán zanilo de ki, zodi gór or giróse sur raitta hotúnót aibó de zanitó, tóoile yóggwa seton tákito aar nizor gór ore báñgito no dito. **44** Hétolla tuáñra yó toiyar táko, kiyólla-hoilé Manúc or Fua tuáñra no ñáaro de októ beh aibó. **45** “Tóoile eén biccácdar edde buddíman goóur hon asé, zaré ítár giróse nizor gór or oinno goóur ókkol or uore zimmadar banaiyé, ítara re ñaim or uore hána dii bolla? **46** Mubarek goóur ubá zaré nizor giróse waafes ailé ham híin gorér de lootfa. **47** Añí tuáñra re sóiyi hoóir, yóggwa ye nizor tamám cómbottir uore ítare zimmadar banaibó. **48** Lekin zodi hé goóur gwá hóraf ó, aar nizor dile-dile endilla hoó, ‘Añr girós aité boóut deri asé,’ **49** aar íte sáañti goóur ókkol ore marat dore edde nicákur ókkol or fúañti háafiya goré, **50** tóoile hé goóur gwar girós eén din ot aibó, ze din íte yóggwa aibó de no ñáare, edde eén októ aibó, ze októ íte hoi no fare. **51** Tói yóggwa ye ítare hañi hán-hán gorífelaibo edde munafék ókkol or hére cámil goríbo; hére hañdahari edde date dat kirkirani óibo.

25 “Hé októ asmani raijjo undilla doc zon abiyáta mayafuain dor dóilla óibo, zetará

nizor-nizor serak looi dulá llói milto neeillé. **2** Ítarar bútoe fañs zon accíl bekuf, aar fañs zon accíl salák. **3** Bekuf fúne ítarar serak loigiyé, lekin fúañti battí tel nó loiza; **4** montor salák kúne ítarar serak or fúañti foñot gori battí tel loigiyé. **5** Dulá aité zettót deri ór, ítara beggún zúri-zúri gúm ot forigiyói. **6** “Adá raitta hére eggwá uzor fúna gíyeh de, ‘Soó, dulá aiyér; íba llói milto neelo.’ **7** “Hétunot abiyáta mayafuain ítara beggún urí nizor-nizor serak nal gorát doijje. **8** Bekuf fúne salák kún ore hoór de, ‘Tuáñra ttu aáñra re kessú tel doóna, kiyólla-hoilé aáñrar serak nifzargoi.’ **9** “Salák kúne zuwab der de, ‘Tel asé de híin lói aáñra lla edde tuáñra lla no kulaitó fare. Yárbodol zai besoya ókkol ottu tuáñra lla kini anógói.’ **10** “Baade zeñtté ítara tel kinto giyyégói, dulá foóñiccegai; tói zetará nal ói accíl, ítara íbar fúañti boirat or melat góilloi; aar duwar gán bañdífela gíyeh. **11** “Hotukkún baade abiyáta mayafuain uitará yó aiccé, aar hoór de, ‘Malik, ó Malik, aáñra lla duwar gán kúlona.’ **12** “Montor íba ye zuwabe hoór de, ‘Añí tuáñra re sóiyi hoóir, aái tuáñra re no siní.’ **13** “Hétolla seton táko, kiyólla-hoilé tuáñra toh hé din yáh októ no zano. **14** “Kiyólla-hoilé asmani raijjo toh ezzon sofór ot zaar de manúc or dóilla, zibá ye nizor goóur ókkol ore matai nizor cómbotti beggún ítara re gosáidiye. **15** Yóggwa ye ítarar kabiliyot mozin, ítara ezzon ore fañs ázar ñiañ diiyé, ar ezzon ore dui ázar ñiañ diiyé, edde ar ezzon ore ek ázar ñiañ diiyé. Baade yóggwa nizor sofór ot giyyégói. **16** Zee niki fañs ázar ñiañ faiyé, íte toratori zai híin lói códori gorí aró fañs ázar hamaiyé. **17** Héndilla zee niki dui ázar faiyé, íte yó híin lói aró dui ázar hamaiyé. **18** Montor zee niki ek ázar faiyé, íte zai yore merit gañt kurí ítár malik or hé ñiañ lukai eijjé. **19** “Boóut din baade goóur gún or malik aái yore ítara ttu ísaf lowat doijje. **20** Zee niki fañs ázar ñiañ faáil, íte aró fañs ázar aní hoór de, ‘Malik, tuñí añré fañs ázar diíla. Soó, aái aró fañs ázar ñiañ hamaiyí.’ **21** “Tói malike ítare hoór de, ‘Cabác, gom edde biccácdar goóur! Tui hom jiníc ot imandari daháiyos, hétolla aái toré bicí siz or uore zimmadar banaiyúm. Ai, tor malik or kúcit cámil ógai.’ **22** “Héndilla zee niki dui ázar ñiañ faáil, íte yó aái hoór de, ‘Malik, tuñí añré dui ázar ñiañ diíla. Soó, aái aró dui ázar ñiañ hamaiyí.’ **23** “Tói malike ítare hoór de, ‘Cabác, tui gom edde biccácdar goóur! Tui hom jiníc ot imandari daháiyos, hétolla aái

toré bicí siz or uore zimmadar banaiyúm. Ai, tor malik or kúcit cámil ógai.’ 24 “Tarfore zee niki ek ázar tiañ faáil, íte aái hoór de, ‘Malik, aái zani de tuñi hora manúc; tuñi toh zeṛé nó lago héntu haṛo, aar zeṛé bis nó cíñṛo héntu dola goró. 25 Hétolla aái ḍoore zai yore tuáñr tiañ iín meṛir bútoṛe lukai eijjílám. Soó, ótiya tuáñr tiañ.’ 26 “Ítar malike ítare zuwabe hoór de, ‘Tui hóraf edde alcíya goóur! Tui toh zainti, aái zeṛé nó lagi héntu haṛi deh, aar zeṛé bis nó cíñṛi héntu dola gorí deh. 27 Tóoile tor ttu añr tiañ gún benggót óile rakón accíl, tói aái aái yore añr tiañ gún cúṭ or fúañti waafes faitam.’ 28 “Tuáñra ítar ttu tiañ gún loifélai, zar ttu niki doc ázar tiañ asé ítare diifélo. 29 Kiyólla-hoilé zar ttu asé, yóggwa re aró diiya zaybo, aar yóggwa ttu ódorbaára tákibo; montor zar ttu náí, yóggwa ttu asé de híin úddwa loiféla zaybo. 30 Yala e behazor goóur ítaré baáre andár ot félai dogói; héṛe hañdaháṛi edde date dat kirkirani óibo. 31 “Zeñtté Manúc or Fua íbar mohímaye aibo aar fírista beggún íbar fúañti óibo, héñtte íba Nizor mohímar toktót boibó. 32 Tamám koum ókkol ore íbar muúntu zoma gorá zaybo; aar íba ye manúc beggún ore dui dol goríbo, zendilla sóol soroya ye sóol ottu bérasóol ore alok gorífele. 33 Íba ye bérasóol lun ore íbar den dáikka goríbo, montor sóol lun ore ban dáikka. 34 “Baade Baáñcca ye íbar den dák or gún ore hoibó de, ‘Aiyó, Añr Baf or rahámot faiya manúc ókkol, tuáñra raijjo miras loogái, ziyán duniyair foidayecir héñtte lóti tuáñra lla toiyar raká gíyeh. 35 Kiyólla-hoilé Añi búka accílám, tuáñra Añré hána dífla; Añi tiráci accílám, tuáñra Añré faní dífla; Añi forbáci accílám, tuáñra Añré zaga dífla; 36 Añi biyossor accílám, tuáñra Añré hoor dífla; Añi biyaraimma accílám, tuáñra Añré kermos goijjila; Añi ziyól ot accílám, tuáñra añré saitó aiccíla.’ 37 “Hétunot hé forhéggar gúne íba re zuwabe hoibó de, ‘Malik, aáñra hoñtté Tuáñre búka deki hána diiyí deh, yáto tiráci deki faní diiyí dé? 38 Aáñra hoñtté tuáñre forbáci deki zaga diiyí deh, yáto biyossor deki hoor diiyí dé? 39 Aáñra hoñtté Tuáñre biyaraimma deki kermos goijjil deh, yáto ziyól ot deki saitó giiyí dé?’ 40 “Hétunot Baáñcca ye ítara re zuwabe hoibó de, ‘Añi tuáñra re sóiyi hoóir, tuáñra Añr e báiboináin dor bútotu ebbe niróc ezzon ore úddwa ziyán goijjila, híyan Añré beh goijjó.’ 41 “Baade íba ye íbar ban dák or gún ore

hoibó de, ‘Ó láánoitta manúc ókkol, tuáñra Añr héntu dur ói ofúrani ooin ot zoogói, ziín íbilíc edde ítar fírista ókkol olla toiyar gorá gíyeh; (aiōnios g166) 42 Kiyólla-hoilé Añi búka accílám, montor tuáñra toh Añré hána nó doo; Añi tiráci accílám, montor tuáñra Añré faní nó doo; 43 Añi forbáci accílám, montor tuáñra Añré zaga nó doo; biyossor accílám, montor tuáñra Añré hoor nó doo; biyaraimma accílám edde ziyól ot accílám, montor tuáñra Añré saásita nó goró.’ 44 “Hétunot ítara yó íba re zuwabe hoibó de, ‘Malik, aáñra hoñtté Tuáñre búka, tiráci, forbáci, biyossor, biyaraimma yáh ziyól ot deki hédmot nó gorí dé?’ 45 “Íba ye ítara re zuwabe hoibó de, ‘Añi tuáñra re sóiyi hoóir, tuáñra Añr e báiboináin dor bútotu ebbe niróc cwa re úddwa ziyán nó goró, híyan Añré beh nó goró.’ 46 “Ítara ofúrani sáñza fai bolla zaibo, montor forhéggar gún ofúrani zindigit gólíbo.” (aiōnios g166)

26 Zeñtté Isá ttu hotá híin beggún hoiyá óiye, íba ye Nizor cárit tun ore hoór de, 2 “Tuáñra toh zano, dui din baade Azadir-id óibo, aar Manúc or Fua re kúruc ot dí bolla dóridiya zaybo.” 3 Hé októṭ ḍoóñr imam ókkol edde manúc or murubbi ókkol, Káiyafas hoó de boro imam or mohól ot zoma óiye; 4 aar mili sólla goijjé de, Isá re zuitégari dórifelai zane marifélai bolla. 5 Montor ítara hoór de, “Id or októṭ no, manúc or bútoṛe úrussul óitofare.” 6 Isá zeñtté Betániyat máze kurus biyaraimma Sáimon or góṛ ot accíl, 7 héṛe eggwá mayafua ye fúañti fattóṛ or háñrit góri bicí moóngga añtoṛ looi íbar hañse aiccé, aar Isá hána háito boiccé de októṭ híba ye añtoṛ gún Isár matát dálidiye. 8 Cárit tun ottu híyan deki gom nó lage, aar hoór de, “Ílín borbád kiyá díféler? 9 E añtoṛ gún de boóut tiañ di besi gorif ókkol ore diifélai faitto.” 10 Montor Isá ye híyan zani fari ítara re hoór de, “Tuáñra mayafua wa re ferecan kiyá goróṛ? Ibáh ye Añr bálai éna goijjé. 11 Gorib ókkol toh tuáñrar fúañti nitti asé, montor Añré tuáñra nitti nó faiba. 12 Ibáh ye Añr gaat añtoṛ dálidiye de híyan óilde ibáh ye Añré dohón olla toiyar gorí bolla goijjé deh. 13 Hétolla Añi tuáñra re sóiyi hoóir, fura duniyait zeṛé-zeṛé e kúchóbor tobolik gorá zaybo, e mayafua wa ye ziyán goijjé híyan ore yó ibáñr yadgari ísafe héṛe-héṛe howá zaybo.” 14 Hétunot baró zon cárit tun ottu ezzon, zar nam niki Yohúdah

Iskariyet, íte ðoóñr imam ókkol or hére giyyé, hoóir, aijja raitta ratakurá bak dibar age, tui 15 aar hoór de, “Zodi Isá re tuáñrar át ot dóridi, Añré tin bar inkar goríbi.” 35 Fitore íba re hoór tuáñra añré kii diiba?” Baade ítara ítare tiríc de, “Zodi añr ttu Tuáñr fúañti mora fore yó, ańí Tuáñre inkar no goijjúm.” Héndilla cárit cwa rufar ðiañ goni diiyé. 16 Hé októť lóti íte Isá re dóridi bolla moukar talac ot accíl. 17 Cúťar-sára Ruťir-id or foóila din, cárit tune Isár hañse aái fusár gorér de, “Tuáñr ttu hondilla monehoór, Tuńí hái faro fán añára Tuáñr lla Azadir-id or hánar toiyari hořé goittám?” 18 íba ye hoór de, “Tuáñra cóor ot fólonar hére zoo,” yóggwa re hoibá de, “Ustate hoór de, ‘Añr októ đáke; Ańí Añr cárit tun or fúañti tuáñr góř ot Azadir-id goríyum.’” 19 Tói cárit tune Isá ye ítara re hókum díye de mozin gorí, Azadir-id or hánar toiyari goijjé. 20 Baade zeńtté hańz óiye, Isá baró zon cárit tun or fúañti hána háito boiccé. 21 Ítara háar de októť íba ye hoór de, “Ańí tuáñra re sóiye hoóir, tuáñra ttu ezzone Añré dóridibo.” 22 Hétunot ítara bicí ferecan ói zonfoti íba ttu fusár gorér de, “Malik, íte bilkúl ańí no de no né?” 23 íba ye ítara re zuwabe hoór de, “Zee Añr fúañti hoddát át đáler, íte óilde zee niki Añré dóridibo. 24 Manúc or Fua toh íbar baabute zendilla leikká asé héndilla éna zaar; montor afsús manúc uitar uore zar duara Manúc or Fua dóra háibo, Manúc íte toh zormo no óito bóuli ítar lla gom accíl.” 25 Hétunot Yohúdah, zee niki íba re dóridibo íte hoór de, “Rabbí, íte honó ańí né?” Isá ye ítare hoór de, “Tui nize híyan hoóifelayos.” 26 Ítara háar de októť, Isá ye ruťi looi Alla re cúkuriya goijjíl, aar bańgi cárit tun ore díi hoór de, “Looi hoo; yáń Añr gaa.” 27 Tarfore íba ye fiyala looi Alla re cúkuriya goijjíl, aar ítara re díi hoór de, “Tuáñra beggúne entú hoo; 28 kiyólla-hoilé iín óilde noya razinama lla Añr lou, zifń ore boóut kiyé guná maf fai bolla đáldiyum. 29 Ańí tuáñra re hoóir, ehón ottu lóti e anggur or roc iín Ańí ar na háiyum, otódin zetódin foijjonto tuáñrar fúañti Añr Baf or raijot noya gori ná hái.” 30 Yárbaade ítara eggwá seér gaái, neeli Zaitun Faár ot giyyói. 31 Tarfore Isá ye ítara re hoór de, “Aijja raitta Añr zoriya tuáñra beggún or dil ot cóok aibó aar dáibagoi; kiyólla-hoilé pak-kalam ot toh endilla asé, ‘Ańí sóol soroya re marifélayum, tói zák or sóol beggún cínřacińttá óizayboi.’ 32 Lekin Añré zinda gorá zay baade, Ańí tuáñrar age Galil ot zaiyum.” 33 Fitore íba re zuwabe hoór de, “Tuáñr zoriya beggúne iman ottu zailé yo, ańí honódin no zaiyum.” 34 Isá ye íba re hoór de, “Ańí toré sóiye

ítara beggún toluware beh moribó. **53** Tui ki no zanos, zodi Añí Añr Baf ore aros gorí Ìba ye Añré éhon-éhon ázar-ázar fírista ókkol fóous or dóilla góri difeřáibo dé? **54** Lekin héen óile, endilla ówa foribó hoiyé de pak-kalam or hé hotá keéngori fura óibo?” **55** Hé októót Isá ye manúc or dol lwá re hoór de, “Tuáñra đahañit dóitto aiccó fángori toluwar edde larí-cúra lói Añré gereftar goittó neeilló dé? Añí toh fottí din baitul-mukaddos ot boói taalim ditam, aar héñtte de Añré gereftar nó goró. **56** Lekin iñ beggún etollá óiye, zeéne nobi ókkole leikké de pak-kalam or hotá híin fura óizagoi.” Hétunot cárit beggúne Ìba re eri dái giyyégoi. **57** Zetará Isá re gereftar goijjé ítara Ìba re boro imam Káiyafas or hañse loigiyói, zeré alem ókkol edde murubbi ókkol zoma óiye. **58** Fitor duré-duré táí Ìbar fisé-fisé boro imam or urán or héddur foijjonto giyyé, aar kii-kii ó sai bolla bútoře góli faáradar ókkol or fúañti boói táikke. **59** Đoóñr imam ókkole edde fótuyai-mujilíc tıya ye Isár ulđa misá gobá tuwat accíl, zeéne ítara Ìba re zane marifélai fare. **60** Boóut zone misá gobá dıto muúmmikka ailé yo, toóu häre de héndilla honó gobá nó faa. Lekin fore dui zon manúc muúmmikka aiccé, **61** aar hoór de, “E manúc cwa ye hoiyé de, Añí Allar baitul-mukaddos bāñgifelai, híyan tin din or bútoře abar banaidi faijjum.” **62** Hétunot boro imame tıyai Isá re hoór de, “Tuñí honó zuwab no diba? Manúc itará Tuáñr ulđa iñ kii gobá dér?” **63** Montor Isá nızám mári táikkil. Boro imame Ìba re hoór de, “Tuñí añára re zinda Allar hosóm hái hoó sái, Tuñí Allar Fua Mosih de ói ne?” **64** Isá ye yóggwa re hoór de, “Tuñí nize toh híyan hoóifelaiyo. Toóu Añí tuáñra re hoóir, yarbaade tuáñra dekıba, Manúc or Fua Alla Tálar den đák ottu boırá asé edde asman or miyúlar uore góri aiyér.” **65** Hétunot boro imame nizor gair or hoor fári hoór de, “Íbá ye kuféri goijjé! Añára ttu ar kii gobá lager dé? Tuáñra toh ehón Íbár kuféri fúinno; **66** tuáñrar rai kii?” Ítara zuwabe hoór de, “Íbá moot or laayek!” **67** Baade ítara Íbar muk ot sép maijjé edde Ìba re gúca maijjé; ar hodúne Ìba re suwar mari **68** hoór de, “Héy Mosih, añára re antas gorí hoósai, Toré hone maijjé?” **69** Héñtte Fitor baáre urán ot boırá accíl, aar eggwá bañdi mayafua aái Ìba re hoór de, “Tuñí yó toh Galil or Isár fúañti accíla!” **70** Montor Ìba ye ítara beggún or muúntu endilla hoói inkar gorídiye, “Tuñí kiyór baabute hoór

añí no zani.” **71** Zeñtté Ìba baáre baanđat giyyé, ar eggwá bañdi mayafua ye Ìba re dekı, héře asé de ítara re hoór de, “E manúc cwa Isá Nasárir fúañti accíl.” **72** Montor Ìba ye hosóm hái endilla hoói abar inkar gorídiye, “Añí manúc Ìba re no siní.” **73** Hotún baade đake tıyai asé de manúc cúne aái Fitor ore hoór de, “Sóiyi tuñí yó tarár bútotu ekzon; kiyólla-hoilé tuáñr zobane úddwa tuáñre dóra dér.” **74** Hétunot Fitore hosóm hái hoór de, “Añr uore laánót óuk zodi añí misá hotá hoóir de óile; añí manúc Ìba re no siní!” Baade éhon-éhon ratakurá bak diyé. **75** Hétunot Fitor ottu Isá ye hoóil de hotá monot uitté, ki hoilé, “Ratakurá bak dibar age tui Añré tin bar inkar goríbi.” Baade Ìba baáre neeligói kúb hañdat doijje.

27 Zeñtté biinna óiye, đoóñr imam ókkol edde manúc or murubbi beggúne mili sólla goijjé de, Isá re zane marifélai bolla. **2** Baade ítara Ìba re bañdí loizai hákim Filat ore gosáidiye. **3** Zeñtté Yohúđah, zee niki Isá re dórídiye, íte deikké de Ìba lla moot or hókum óiye, hétunot íte bicí afsús hái tiric cwa rufar foicá gún đoóñr imam ókkol ore edde murubbi ókkol ore fíraidi **4** hoór de, “Añí behosúr manúc cwa re marifélai bolla dórídi guná goijjé.” Montor ítara hoór de, “Tóoile añárar kii óiye? Hıyan tui buzós.” **5** Hétunot íte rufar foicá gún baitul-mukaddos or bútoře melámari giyyégoi, aar zai nizoré nize fáñci háifelaiye. **6** Đoóñr imam ókkole rufar foicá gún looi hoór de, “Ín baitul-mukaddos or baccút rakón zayes no, kiyólla-hoilé iñ lou wór dam.” **7** Baade ítara biyasana gorí, bidecóitta ókkol olla hoborostán banai bolla hé rufar foicá gún lói Kuáñijjar Zobin nán kinné. **8** Hétolla hé zaga gán ore aij foijjonto Lou wor Zaga hoói đake. **9** Hıyane, nobi Yarmıyahr duara howá gıyl de yían fura óiye, “Ítara hé tiric cwa rufar foicá gún loiyé, híin óilde Ubár dam, zibár dor Boni Isráil ókkole tık goijjıl; **10** aar ítara híin ore Kuáñijjar Zobin nán kinat estemal goijjé, zendilla Mabude añré hókum diyé.” **11** Isá hákim Filat or muúntu tıyai accíl, hákime Ìba ttu fusár gorér de, “Tuñí Yohúdi ókkol or Baáñcca nıki?” Isá ye yóggwa re hoór de, “Ói, tuñí hoór de héndilla.” **12** Montor đoóñr imam múne edde murubbi gúne Ìba re elzam lagat accíl de októót, Ìba ye honó zuwab nó déh. **13** Hétunot Filate Ìba re hoór de, “Tuñí no fúnor nıki itará Tuáñr ulđa hodún gobá dér?” **14** Montor Ìba ye yóggwa re

ekkán elzam or úddwa zuwab nó de, hétolla hákim ebbe taajup óigiyoi. 15 Hákim or niyom óilde, fottí Azadir-id or októť maincé ze hodi re hálas gorídito hoó hé hodi re hálas gorídon. 16 Hé októť ítara ttu ézzon nam hóraf mocúr hodi accíl, zar nam Bárabba. 17 Hétolla, zeñtté manúc ókkol zoma óiye, Filate ítara ttu fusár gorér de, “Tuáñra ttu añré haré tuáñrar hañse hálas gorídiya baitó monehoór, Bárabba re né, náki Isá re, zibá re Mosih hoó?” 18 Kiyólla-hoilé Filate zainito de, Yohúdir neta ókkole Isá re yóggwar hañse hálorot góri gosáidiye deh. 19 Filat bisar or toktór uore boói accíl de októť, yóggwar bou wé yóggwar hañse hóbor foóñsaiye de, “Hé behosúr Manúc cwa re kessú no goríyo, kiyólla-hoilé gel de raitta añí cóppon ot Íbar zoriya bicí duk faiyí.” 20 Lekin doóñr imam ókkole edde murubbi ókkole manúc or dol ore uskaidiyé de, Bárabba re magi bolla aar Isá re marifélaito hoi bolla. 21 Hákime abar ítara re hoór de, “E duní zon ottu tuáñra ttu añré haré hálas gorídiya baitó monehoór?” Ítara hoór de, “Bárabba re.” 22 Filate ítara re hoór de, “Tóoile Isá, zibá re Mosih hoó, Íba re añí kii goittám?” Ítara beggúne hoór de, “Íba re kúruc ot dífelo!” 23 Montor yóggwa ye hoór de, “Kiyá, Íba ye kii bura goijjé dé?” Toóu ítara aró guzori-guzori endilla howát accíl, “Íba re kúruc ot dífelo!” 24 Baade Filate dekér de, yóggwa ye kessú góri no farer, bókke úrussul cúru óizargoi, hétunot yóggwa ye faní looi manúc ókkol or muúntu nizor át dúfelaí hoór de, “E Manúc cwar lou wór zimma añí no; híyan or zuwab tuáñra beh diba.” 25 Hétunot manúc beggúne zuwabe hoór de, “Íbar lou wór zimma añára edde añárar fuain óiyum!” 26 Tói yóggwa ye ítarar hañse Bárabba re hálas gorídiye; montor Isá re coóñk marabai baade, kúruc ot dí bolla gosái dífelaiye. 27 Baade hákim or fóous ókkole Isá re yóggwar mohól or bútoře loigiyé, aar teérang tíya re Íbar sairókul ttu zoma goijjé. 28 Ítara Íbar gair or hoor kúlifelai Íba re eggwá lal rong or zubba fiñdáidiye. 29 Ítara keñrar eggwá tas banai baade Íbar matát diyaidiyé, aar den át ot eggwá larí dóradiye. Ítara Íbar muúntu añrúr tók dí Íba re řáťťai góri hoór de, “Héy Yohúdi ókkol or Baáñcca, Toré sólami!” 30 Baade ítara Íba re sép maijjé edde larí wa looi Íbar matá saí bari maijjé. 31 Ítara Íba re řáťťai góri baade, Íba ttu lal rong or zubba wa kúlifelai Íbar hoor Íba re fiñdáidiye; baade kúruc ot dí bolla loigiyégoi.

32 Ítara cóor ottu baáre neeler de októť, Kureni cóor or ezzon manúc loot faiyé zibár nam Sáimon; ítara yóggwa re Isár kúruc can boói loizai bolla mojbur goijjé. 33 Baade ítara zeñtté Golgota nam or ekkán zagat, yáni Matár Malar Zagat foóñicce, 34 ítara Íba re tita jiníc miyáiya anggur or roc háito diiyé; montor Íba ye híin hái saái ná haa. 35 Ítara Íba re kúruc ot dífelai baade, loťári mari ítarar bútoře Íbar hoorsuor ore bák goijjé. 36 Aar héře boói táki ítara Íba re sooñi gorát doijje. 37 Íbar matár uottú ítara Íbar e hosúri gán sáainbút maridiye, ziyán óilde, “Íba óilde Isá, Yohúdi ókkol or baáñcca.” 38 Hé októť Íbar fúañti dui zon řahañit ore yó kúruc ot díyl, ezzon ore Íbar den řák ottu edde ar ezzon ore Íbar ban řák ottu. 39 Aar zetará hé foñt báý zaar, ítara matá lari-lari Íba re técerai 40 hoór de, “Tui toh baitul-mukaddos bāñgi tin din or bútoře abar banaidoya, yala Tui Nizoré Nize basa saí! Zodi Tui Allar Fua de óile, kúruc ottu lami ai.” 41 Héndilla góri doóñr imam, alem edde murubbi ókkole yó řáťťai góri hoór de, 42 “Íba ye toh oinno zon ore basaitó; montor Nizoré Nize de basai no farer! Íba Isráil or Baáñcca no né, yala Íba kúruc ottu lami aiyóuk, baade añára Íbár uore iman aníyum. 43 Íba ye Allar uore bóraca raké; zodi Alla ttu monehoó, tooile ehón Alla ye Íba re basouk, kiyólla-hoilé Íba ye hoitó de, Añí óilam de Allar Fua.” 44 Ze řahañit tun ore Íbar fúañti kúruc ot díyl, ítara yó héndilla-héndilla hotá hoói Íba re beizzoti goijjé. 45 Hé din duúñijjar baró wa báze lóti tin nwá báze fán guñra mulluk andár ói accíl. 46 Tin nwá ánik baijjé de októť, Isá ye eggwá doóñr abase guzori hoór de, “Elí, Elí, lámá sabakhtáni?” yáni, “Ó Añr Alla, ó Añr Alla, Tuñí Añré kiyólla sáridiyo?” 47 Héře tíyai accíl de ítara hođúne híyan fúni hoór de, “E Manúc cwa ye nobi Eliyas ore řaker.” 48 Ítara ttu ezzone ekkú duñre zai ekkán esfónj looi sírkat buraiyé, aar ekkán súañr matát bazáidi Isá re hái bolla diiyé. 49 Montor argúne hoór de, “Tíyo, Íba re Eliyase basaitó aiyé né saái.” 50 Isá ye abar eggwá doóñr abase guzori Íbar foran dífelaiye. 51 Hétunot baitul-mukaddos or foroda gán uottú lóti nise foijjonto fári dui bák óigiyoi; aar zobin ot búsal baiyé, doóñr-doóñr cíl ókkol fárigiyoi, 52 hobor ókkol kúlīgiyoi, edde Allar pak bonda ókkol zetará moot or gúm ot accíl ítara boóut zon ore zinda gorá gíyeh. 53 Isá mora ttu zinda ói baade, ítara hobor ottu neeli

aáigiyoí aar pak cóor ot zai boóut maincóre dahádiye. **54** Romi cáap edde yóggwar fúañti zetará Isá re faára díyat accíl, ítara zettót búsal edde aró kii-kii ór de híin deikké, ítara bicí ñooraiyóí aar hoór de, “Sóiyi Ibá Allar Fua accíl!” **55** Boóut beriyáin zetará Galil ottu lóti Isár fisá dori Íba re hédmot gorí-gorí aiccíl, ítara dur ottu góri híin saái táikkil. **56** Ítarar bútoe Moriyam Makdálíni accíl, Yakub edde Yusúf or maa Moriyam accíl, edde Zebedair fuain dor maa accíl. **57** Háñzinna óiye rár, hére Aramátíya cóor ottu Yusúf nam or ezzon tuangor manúc aiccé, zibá nize yó Isár éggwa ummot ógilgoi. **58** Yóggwa ye Filat or hañse zai Isár lac cwa maiggé. Hétunot Filate hókum díye de, lac cwa yóggwa re diiféla zay bolla. **59** Yusúfe lac cwa looi, ekkán sáf hohón or hoor ot beráíye, **60** aar nizor noya hobor ot raikkégoi, zibá re yóggwa ye cíl kúndi banaáil. Baade hobor or muk ot ekkán ñoóñr cíl ouzaydi, giyyégoi. **61** Héñtte Moriyam Makdálíni edde arek Moriyam hére hobor or muúntu boirá accíl. **62** Tarfor din, zibá ebaadot-or-din accíl, ñoóñr imam ókkol edde Féroci ókkol Filat or hañse zoma óiye, **63** baade ítara hoór de, “Jonáb, añára ttu monot asé, hé dúkabaz Íba zinda tákite hoóil de, ‘Tin din baade Añí abar zinda óiyum.’ **64** Hétolla tin din foijjonto hobor gwá re horagori faára díya zay bolla hókum dóh; arnoíle íbar ummot ókkole aái íbar lac cwa sur gorí loizai maincóre hoibó de, ‘Íba mora ttu zinda óigiyoí,’ tóí fisór dúka agor dúkar túaro hóraf óibo.” **65** Filate ítara re hoór de, “Faáradar ókkol loizo, zai zeddúr horagori faro héddur gorí hobor gwá re faára dógoi.” **66** Baade ítara zai cíl lan ot moór lagai edde faáradar ókkol hére rakí, hobor gwá re horagori faáradiye.

28 Ebaadot-or-din baade, háftar foóila din fózor októť, Moriyam Makdálíni ye edde arek Moriyame hobor gwá saitó giyyé. **2** Asimbit hére eggwá ñoóñr búsal óiye, kiyólla-hoilé Mabud or ek fírísta asman ottu laimmé, aar hobor gwat aái yíbar muk ot accíl de cíl lan larifélaí híyan or uore boiccé. **3** Íbar súrot accíl bijilir dóilla, aar íbar hoor accíl borók or dóilla dóla. **4** Faáradar gúne íba re ñoorai hafi uiññíl aar mora manúc or dóilla ógilgoi. **5** Fírísta wa ye beriyáin nún ore hoór de, “No ñooraiyó, kiyólla-hoilé añí zani tuáñra Isá re tuwoór deh, zibá re kúruc ot dí mariféla gíyl. **6**

Íba eré náí; Íba zinda óigiyoí, zendilla Íba ye hoóil. Aiyó, Íba re raikkíl de zaga gán soógai. **7** “Yala toratori zoo, Íbar cárit tun ore hoibá de, ‘Íba mora ttu zinda óigiyoí, aar Íba tuáñrar age Galil ot zaar. Hére tuáñra Íba re dekába!’ Soó, añí tuáñra re hoóidiyi.” **8** Tóí beriyáin ítara toratori hobor ottu giyyégoi; ítara ñooraaíl, toóu bicí kúci óoil, aar Isár cárit tun ore hóbor dí bolla duñri-duñri giyyé. **9** Atíkka Isá ítara llóí millé. Íba ye hoór de, “Sólami!” Hétunot ítara íbar hañse giyyé aar íbar foot dóri Íba re sóida goijjé. **10** Isá ye ítara re hoór de, “No ñooraiyó, zoo, Añr báiyain ókkol ore Galil ot zaito hoógoi; ítara hére Añré dekábo.” **11** Beriyáin ítara foñt ot tákite, hodún faáradare cóor ot aái, zífn-zífn óiye híin beggún ñoóñr imam ókkol ore zanaiyé. **12** Aar ñoóñr imam ókkole murubbineta ókkol lóí dola ói ekkán sólla-mocuwara gorí, fóous sun ore boóut ñiañ diiyé, **13** aar hoiyé de, “Tuáñra hoibá de, ‘Añára raitta gúm ot accílam de októť, íbar ummot ókkol aái Íba re sur gorí loigiyyégoi.’ **14** Zodi hotá yíán hákim or han ot foóñse, one añára yóggwa re buzái tuáñra re hótara ttu basaiyúm.” **15** Tóí hé fóous suné ñiañ gún looi, ítara re cíkaidiye de héndilla goijjé. E kaháni yíán Yohúdi ókkol or bútoe aij foijjonto bicígori fólaiya. **16** Tarfore egaro zon cárit tun Galil or oh faár gwat giyyé, zibát zaito Isá ye ítara re hoóil. **17** Ítara Íba re deká sóida goijjíl; montor hodún ottu cóok laiggíl. **18** Hétunot Isá ye ítarar hañse aái hoór de, “Asman or edde zobin or tamám kémota Añré diiféla giyéh. **19** Hétolla zoo, tamám kum ókkol ore Añr ummot banogoi; ítara re Baf or, Fuar edde Pak-Ruhr name báptisma díyo, **20** aar Añí tuáñra re zedún hókum díyi, híin beggún amól gorí bolla ítara re taalim diyo. Aar soó, duniyair ahéri foijjonto Añí hámica tuáñrar fúañti-fúañti así.” Aamin. (aíñ g165)

Markus

1 Yían óilde Allar Fua Isá Mosihr baabute kúchóbor, **2** zendilla nobi Yesáyahr kitab ot leikká asé: “Soó, Añí Añr hóborgwa re Tuáñr age dife’ráir, zibá ye Tuáñr foñt toiyar goríbo.” **3** “Moidan zagat ezzone guzori-guzori eén hoór, ‘Mabud or foñt toiyar goró; íbar rasta uzu goró.’” **4** Báp̄tismadoya Yaháya aái moidan zagat tobolik goittó de, gunár maf fai bolla touwá gorí báp̄tisma loito. **5** Fura Yohúdiya elakar manúc beggún edde Jerúsalem or tamám bácinde ókkol neeli yóggwar hañse giiyé, aar nizor-nizor guná ókkol cíkar gorí Jordán hál ot yóggwa ttu báp̄tisma loiyé. **6** Yaháya ye uñt or keñc loi banaiya hoor fiñdíto, aar yóggwar keeñil ot samaras duali bairdá tákito. Yóggwa ye háito de óilde firing edde zoonl or modú. **7** Yóggwa ye endilla tobolik goittó, “Añí baade eén Ekzon aiyér, zibár tokka añr túaro doónr. Añí niyúri íbar cenjár or fíta kúli bolla úddwa laayek no. **8** Añí de tuáñra re fanít éna báp̄tisma dírbó.” **9** Hé din ókkol ot eén óiye, Isá Galil or fara Nasárat ottu aái yore Jordán hál ot Yaháya ttu báp̄tisma loiyé. **10** Isá faní ttu kul ot uñtégai mottor, íba ye deké de, asman kúlizargoi aar Pak-Ruh hoitor or dóilla ói íbar uore lamer. **11** Aar héñtte asman ottu eggwá abas aiccé de, “Tuñí Añr adorja Fua, Tuáñre lói Añí bicí kúci.” **12** Éhon or bútoore Pak-Ruh ye íba re moidan zagat dife’ráidiye. **13** Aar hére moidan zagat íba re Cóitane salic din foijjonto entán gorát accíl. Íba jonggoli januwar ókkol or fúañti tákito, aar fírista ókkole íba re hédmot goittó. **14** Yaháya re ziyól ot dí baade, Isá Galil ot aái Allar kúchóbor tobolik gorát doiije, **15** endilla hoói, “Októ óiye, Allar raijjo dake aáigiyoi. Touwá goró edde kúchóbor ore ekin goró.” **16** Isá Galil Dífir hañsa báy zaar de októto, íba ye Sáimon ore edde íbar báí Enderiyas ore deikké. Héñtte ítara díft zal marer, kiyólla-hoilé ítara zailla accíl. **17** Isá ye ítara re hoór de, “Añr fisáli doro, Añí tuáñra re manúc dóre de zailla banaiyúm.” **18** Ítara éhon or bútoore ítarar zal lun eri, íbar fisáli doiije. **19** Híyan ttu ekkágori giiyé rá, íba ye Zebedair fua Yakub ore edde yóggwar báí Yohánna re deikké, zetará noowr uore zal tñner. **20** Íba ye ítara re éhon mataiyé, tói hétunot ítara nizor baf Zebedaire noow ot muzur ókkol or

fúañti eri, íbar fisáli doiije. **21** Tarfore ítara Kaparnahúm ot giiyé, aar ebaadot-or-din aiccé rá, Isá toratori mujilíc-hánat zai taalim diyat doiije. **22** Manúc ókkol íbar taalime ammúk óizaytoi, kiyólla-hoilé íba ye ítara re taalim dito de ezzon adíkar olar dóilla góri, alem ókkol or dóilla góri no. **23** Hére ítarar mujilíc-hánat ezzon hóraf jine-faiya manúc accíl. Yóggwa ye guzori hoór de, **24** “Ó Isá Nasári, añára llói Tuáñr kii ham asé? Tuñí añára re dónco goittó aiccó de né? Añí zani Tuñí hon, Tuñí óilade Allar Pakzon nwá.” **25** Montor Isá ye jin nwá re jéjjerai hoór de, “Nízám ó, yoggwár bútotu neelizagói.” **26** Tói hé hóraf jine yóggwa re musori eggwá doónr guzoran mari yóggwar bútotu neeligiyói. **27** Híyane manúc beggún eén taajup óigiyoi, ítara ezzon ore ezzone hoór de, “Yían kii? Yían toh ekkán noya taalim! Íba ye adíkare hóraf jin ókkol ore úddwa hókum déh aar híine íbar hotá manel!” **28** Éhon or bútoore íbar hóbor Galil or sairó dák or elaka beggún ot fólígiyoi. **29** Yárbaade ítara mujilíc-hána ttu neeli mottor, Yakub edde Yohánnar fúañti Sáimon edde Enderiyas or gór ot giiyé. **30** Héñtte Sáimon or hóuri gaatzore bisánat fori accíl. Ítara éhon Isá re yóggwar baabute zanaiyé. **31** Íba yóggwar dake aái yóggwa re át ot dóri tuillíl, tói yóggwa ttu gaatzor giiyégoi, baade yóggwa ye ítara re meémandari gorát doiije. **32** Hāñzinna beil góli baade, maincé íbar hañse biyaraimma beggún ore edde búte-faiya manúc ókkol ore ainníl. **33** Aar guñra cóor or manúc duwar or gurat zoma óoil. **34** Isá ye boóut biyaraimma ókkol gom goijjé zetará dóilla-bo dóilla biyarame duk faat accíl, edde boóut bú ókkol dáfaiye; montor íba ye bú ókkol ore matitó no dito, kiyólla-hoilé híine íba hon de sinító. **35** Baade biñna kúb sóore andár tákite, Isá urí gór ottu neeli ekkán bocóti-sára zagat giiyé, aar hére dua goijjé. **36** Sáimon edde yóggwar sáañti ókkole íba re tuwaitó neeillé. **37** Ítara íba re tuwai fai hoór de, “Beggúne Tuáñr talac gorér.” **38** Íba ye ítara re hoór de, “Aiyó, añára atehañsór honó ekkán farat zai, zeéne hére yó Añí tobolik gorí fari, kiyólla-hoilé Añí hétolla beh neeillí.” **39** Tói íba Galil or agagura zai-zai ítarar mujilíc-hána ókkol ot tobolik gorát accíl edde bú ókkol dáfat accíl. **40** Ezzon kurus biyaraimma Isá hañse aái sóida gorí íba re fóriyat gorér de, “Tuñí sailé añre pak-sáf gorí faribá.” **41** Isá ttu feṭfuri Nizor át

barái yóggwa re dóijje, aar hoór de, “Añí saái; pak-sáf óizogoi.” 42 Tói éhon or bútoe yóggwa ttu kurus biyaram giyégoi, aar yóggwa pak-sáf óigiyoi. 43 Baade Isá ye yóggwa re dorógori nicót gorí éhon-éhon duñraidiyé, 44 yóggwa re hoiyé de, “Saiyó, honókiyo re kessú no zanaíyó; bólke zoo, nizoré imam or hañse dahógoi, aar tuñí pak-sáf óiyo de híyan maincór hañse gobá ó fan, Muúsa ye hókum díye de hé kurbani dogói.” 45 Lekin yóggwa baäre zaigói kúlamela góri zanai-zanai agagura hé hóbor fólat doijje, eddúr zeén níki Isá honó cóor or bútoe ar kúlamela góri góli nó fare, bólke ekkán bocótisára zagat zai táka foijjé. Toóu agagura ttu manúc ókkol íbar hére aitó.

2 Hooddin baade zeñtté Isá Kaparnahúm ot waafes aiccé, fúna gýeh de, íba gór ot asé. 2 Baade hére edún manúc zoma óigiyoi, gór gán guñra bóri duwar or dake úddwa ar zaga nu accíl. Aar Isá ítarar hañse kalam tobolik gorát accíl. 3 Hé októt hére hodún manúc aiccé, fúañti ítara ek añtur manúc ore sair zon or áta boói íbar hañse ainné. 4 Aar zeñtté ítara manúc or zam olla bóuli íbar ínyot zai no farer, hétunot ítara íbar uzu-uzu uottú sád or tali larifélaiye, aar hana gorífelai baade, añtur manúc cwa neit̃ta asé de bisána wa lamaidiyé. 5 Isá ye ítarar iman deki añtur manúc cwa re hoór de, “O fut, tor guná maf gorídiya gýeh.” 6 Hére hoozzon alem boirá accíl, ítara dile-dile báfer de, 7 “E Manúc cwa ye endilla hotá kiyá hoór? Ibá ye toh kuféri gorér! Siríf Alla bade guná maf gorífaroya hon asé?” 8 Éhon or bútoe Isá ye Nizor ruht zani fajjé de, ítara dile-dile héndilla báfer. Hétolla íba ye ítara re hoór de, “Tuáñra dile-dile híin kiyá báfor?” 9 E añtur manúc cwa re hoité hon nán aasan, ki “Tor guná maf gorídiya gýeh,” aar náki, “Uṭ, tor bisána tulí looi áñt?” 10 Lekin Añr ttu tuáñra re yíán zanaidito monehoór, e duniyait guná maf goríbar kémota Manúc or Fua ttu asé.” Tói íba ye añtur manúc cwa re hoór de, 11 “Añí toré hoóir, uṭ, tor bisána tulí looi gór ot zaagói.” 12 Hétunot yóggwa uiṭt̃é, aar toratori bisána wa tulí looi ítara beggún or muúntu baárkule giyégoi. Híyane ítara beggún taajup ói Allar taarif gorát doijje, eén hoói, “Añára endilla harbar honódin nó deki!” 13 Isá abar baäre neeli ḡír hañsat giyé; aar manúc beggún íbar hañse aiccé rár, íba ye ítara re taalim diyat doijje. 14 Íba zaite-zaite

dekér de, Alfáiyas or fua Leévi házana tulé de gór ot boói táikke. Íba ye yóggwa re hoór de, “Añr fisáli doro.” Hétunot yóggwa urí íbar fisáli doijje. 15 Yárbaade eén óiye, Isá zeñtté Leévir gór ot hána háar, boóut zon házana-tulóya edde gunágar ókkol óu Isá edde íbar ummot ókkol or fúañti háito boiccé, kiyólla-hoilé íbar fisá dori accíl de boóut zon accíl. 16 Férocir alem ókkole íba re házana-tulóya edde gunágar or fúañti hána háar de deki, íbar ummot ókkol ore hoór de, “Íbá ye házana-tulóya edde gunágar ókkol or fúañti kiyá hána háa?” 17 Híyan fúni Isá ye ítara re hoór de, “Araimma ókkol ottu toh ḡakt̃or no lage, montor biyaraimma ókkol ottu beh lage. Añí dawot dito aiccé de forhésgar ókkol ore no, bólke gunágar ókkol ore.” 18 Ekbar, Yaháyar cárít ókkole edde Férocí ókkole ruza raikké, ítara aái Isá re hoór de, “Yaháyar ummot ókkole edde Férocir cárít ókkole toh ruza raké, montor Tuáñr ummot ókkole kiyá ruza no raké?” 19 Isá ye ítara re hoór de, “Dulá fúañti tákite kí boiraitta ókkole ruza rakí fare? Zetó din dulá ítarar fúañti táke, hétodin toh ítara ruza rakí no fare. 20 Montor eén din aibó, zeñtté dulá re ítarar hañsottu loiféla zaybo, one héñtte ítara ruza rakíbo. 21 “Honókiye toh furan fucák ot noya hoor tali dede náí, zodi dilé toh héntu noya gán zórizayboi, aar fára híyan aró ḡoṡnr óizayboi. 22 Héndilla, honókiye noya anggur or roc ore furan samarar hóillat raké de náí; zodi rakíle toh noya roc cúne hóilla gún fárifelaibo, tói roc óu borbad zayboi aar hóilla gún óu borbad zayboi. Hétolla, noya anggur or roc ore noya samarar hóillat raká fore.” 23 Ekbar eén óiye, ebaadot-or-din Isá giyuñr kuñrá báy zaar, zaite-zaite íbar ummot ókkole giyuñr túr ókkol tulát doijje. 24 Férocí ókkole íba re hoór de, “Soó, ebaadot-or-din ziyán goríbar maná, itará híyan kiyá gorér?” 25 Montor íba ye ítara re hoór de, “Tuáñra kí yíán honódin nó foró, zeñtté Dawud edde íbar sáañti ókkol ottu zorurot óiye edde búk laigḡl, héñtte íba ye kii goijjíl de?” 26 Íba ye toh boro imam Abiyótar októt Allar gór ot góillegoi, aar Allar hañse peec goijjá ruṭi háail, zín siríf imam ókkole bade ar honókiye háibar ezazot náí. Íba ye híin nizor sáañti ókkol ore yó diíl.” 27 Tarfore Isá ye ítara re hoór de, “Ebaadot-or-din banaíyé de óilde manúc olla, manúc ore ebaadot-or-din olla banaíyé de no. 28 Hé ísafe Manúc or Fua ebaadot-or-din or óu Malik.”

3 Isá aró ekbar mujilíc-hánat góille; aar hére ézzon endilla manúc accíl, zar át fúaigiyoi. **2** Ítara íba ye ebaadot-or-din yóggwa re gom goré né háas nozor di saái táikke, zeéne ítara íba re hosúr dí fare. **3** Íba ye át fúana manúc cwa re hoór de, “Urí eré muúntu aiyó.” **4** Baade Íba ye ítara re hoór de, “Ebaadot-or-din gom ham goríbar zayes asé né náki hóríf goríbar? Foran basaibár né náki marifélaibar?” Montor ítara nizám mári táikkil. **5** Íba ye sairómikka ítarar uzu guccár saánte saái, ítarar dí dorór zoriya bicí duk lagi manúc cwa re hoór de, “Tuáñr át tan baró.” Tói yóggwa ye híyan baráíye, hétunot yóggwar át tan agor dóilla gom óigiyoi. **6** Hétunot Féroci ítara baáre zai Hérudiól lói sólla gorát doijjegoi de, ítara íba re kii bote marifélaí faribó. **7** Montor Isá ye Nizor cárít tun ore fúañti looi díir hañsat giiyégoi. Doónr ek dol manúc íbar fisá doijjil; ítara aiccé de óilde Galil ottu, Yohúdiya ttu, **8** Jerúsalem ottu, Idumaya ttu, Jordán hál or farkul ottu, Tayár edde Sídon cóor or sairó dák or elaka ttu. Ítara Isá ye goittó de hárr kessú fúni beh íbar hére aiccé. **9** Manúc or dol lwár zoriya íba ye Nizor cárít tun ore hoiyé de, íba lla ekkán gura noow zuu gorí rakító, zeéne maincé íba re sibasippa no goré. **10** Kiyólla-hoilé íba ye boóut maincóre gom goijjíl de hétolla, biyaraimma ókkol beggúne íba re súi bolla ṭeḷaṭeli goittó. **11** Aar hóríf Jin ókkole zeñtté íba re dekító, íbar muúntu merít fori guzori hoító de, “Tuñí óilade Allar Fua.” **12** Montor íba hon de híyan honókiyo re zahér no gorí bolla íba ye ítara re horagori nicót goittó. **13** Yárbaade Isá faár or uore uiттégoi, baade Nizor ttu zaré-zaré monehoiyé taré-taré mataiyé, aar ítara íbar hére aiccé. **14** Íba ye baró zon ore basíloiyé, zeéne ítara íbar fúañti-fúañti táke, aar zeéne ítara re tobolik goittó difeṛái fare, **15** edde ítara ttu búť dáfaiibar kémota táke. **16** Hé baró zon ítara óilde: Sáimon zaré íba ye Fitor nam diyé; **17** Zebedair fua Yakub, aar yóggwar báí Yohánna. Íba ye ítarar nam diyé de Bowanergis, maáni óilde, “Ṭaral or Fuain”; **18** Enderiyas, Filíp, Bartólomiyo, Moti, Tómas, Alfáiyas or fua Yakub, Táadiyas, Sáimon, zibá óilde Zélot, **19** edde Yohúdah Iskáriyet, zee niki Isá re dóridil. **20** Baade Isá ek gór ot góille, aar ebar óu edún manúc zoma óiye, zeén níki íba edde íbar cárít tune hána úddwa hái nó fare. **21** Zeñtté íbar gór or maincé híyan fúinne, ítara íba re dóri loianí bolla neeillé; kiyólla-hoilé ítara hoór de, “Íbar matá hóríf óigiyoi.” **22** Ze alem ókkol Jerúsalem ottu nise aiccé, ítara hoór de, “Íbá re Belzebule faiyé. Íbá ye búť dáfá de búť ókkol or sóddar or taakote.” **23** Hétolla Isá ye ítara re matai ekkán meésal dí hoór de, “Cóítane keéngori Cóítan dáfai fare? **24** Zodi honó raijjet faáťa-faáťi foida ó, híyan toh ṭiki ṭáki nó fare. **25** Aar zodi honó gór ot faáťa-faáťi foida ó, híyan óu ṭiki ṭáki nó fare. **26** Héndilla, zodi Cóítane nizor ulđa nize ói faáť-faáť óizagoi, íte toh ṭiki ṭáki faribár náí, bólke íte hótom óigiyoi. **27** Honókiye boluwar manúc or gór ot góli yóggwar cómbotti luť gorí nó fare, zodi age boluwar manúc yóggwa re bañdí no ere. Bañdí erilé éna yóggwar gór luť gorí faribó. **28** “Añí tuáñra re sóiyi hoóir, adomzat or tamám guná edde ítara goré de kuféri ókkol maf gorídiya zaybo, **29** montor zee niki Pak-Ruhr ulđa kuféri goré, íte bilkúl maf nó faibo, bólke abadulabadi gunár hosúrbon ṭooribo.” (aíōn g165, aīōnios g166) **30** Isá ye hotá híin kiyólla hoiyé hoilé, alem ókkole hoiyé de, “Íba re hóríf jine faiyé.” **31** Yárbaade hére Isár maa edde báiyain aiccé, aar baáre tíyai ṭáki íba re mataitó difeṛáiyé. **32** Íbar sairókul ttu ek dol manúc boirá accíl; ítara íba re hoór de, “Soó, Tuáñr maa edde báiyain baáre Tuáñr talac gorér.” **33** Íba ye zuwabe ítara re hoór de, “Añr maa hon? Aar Añr báiyain hontará?” **34** Baade íba ye zetará íbar sairókul ttu boirá asé, ítarar uzu saái hoór de, “Ótiya, Añr maa edde Añr báiyain. **35** Kiyólla-hoilé zee niki Allar moncá mozin sole, yóggwa óilde Añr báí, bóin, aar maa.”

4 Isá abar díir hañsat taalim diyat doijje. Íbar hére manúc or ettór dol zoma óiye, zeén níki íba díft asé de ekkán noow ot urí boiccé; aar manúc cún beggún díir kul or uore. **2** Íba ye ítara re meésal ókkol dí boóut kessú cíkat doijje. Íba ye taalim ot ítara re hoór de, **3** “Fúno, ezzon bis cín̄roya bis cín̄ṭto neeillé. **4** Yóggwa ye cín̄r̄er de óktót, hodún bis rastarhañsat foijjíl, aar faik ókkole aái híin haífelaíye. **5** Hodún bis cíl zobin ot foijjíl, zeṛé bicí meri náí. Mur meri nu accíl ísafe híin ot hára ges aiccé. **6** Montor beil uiттé rár híin furigiyói, aar cín̄yor nó gasá ísafe híin fúaigiyoi. **7** Hodún bis keñṛabon ot foijjíl, keñṛabon barí urí híin ore sibi raikké ísafe híin ot fósol nó dóre. **8** Lekin ar hodún bis gom zobin ot foijjíl, híin barí urí doónr ói fósol dóijjil: kessút tiríc gun, kessút

haít gun, ar kessút ek cót gun.” 9 Tarfore Isá ye ítara re hoór de, “Zar ttu fúnibar han asé, yóggwa ye fúno.” 10 Zeñtté Isá gaaga ógiyoi, íbar sairókul or manúc cúne edde baró zon cárit tune íba ttu meésal lun or baabute fusár goijjé. 11 Íba ye ítara re hoór de, “Allar raijjo gufoni re zainto tuáñra re beh diya giyé; montor baárgwa maincóre meésal dí etollá howá zah, 12 zeéne, ítara saité saibó montor no dekábo, fúinte fúnibo montor no buzíbo, arnóile toh ítara fíri aító aar maf faito.” 13 Tarfore Isá ye ítara ttu fusár gorér de, “Tuáñra e meésal lan or maáni nó buzó níki? Tóoile oinno meésal lun or maáni keéngori buzíba? 14 Cínroya ye cínŋŋe de híin óilde Allar kalam. 15 Hodún manúc rastar hañsat foijjé de bis híin or dóilla; ítara kalam fúnile Cóitan toratori aái ítara bútoze cínŋra gyéh de kalam loizagói. 16 Hodún manúc cíl zobin ot foijjé de bis híin or dóilla, zetará kalam fúnile mottor kúcir sáañte kobul goré, 17 montor híin ot mozbut cínŋyor nó gasá de hétolla hooddin beh ŋiki táke. Zeñtté hé kalam or zoriya mosibot yáh zulúm aiyé, ítara éhon fissá mare. 18 Ar hodún manúc keñrabon ot foijjé de bis híin or dóilla; ítara kalam fúne, 19 montor duniyair sintabáfaniye, dón-doulot or adore, edde oinno jiníc ókkol or lalóse hé kalam ore sibi raké, hétolla híin ot gula no dóre. (aiñ g165) 20 Ar hodún manúc gom zobin ot foijjé de bis híin or dóilla; ítara kalam fúne edde kobul goré, aar gula dóra: kessú ye tiríc gun, kessú ye haít gun, ar kessú ye ek cót gun.” 21 Isá ye ítara re hoór de, “Serak ki bañir yáh falong or tole rakí bolla ané de né? Serak boirónir uore rakí bolla no né? 22 Kiyólla-hoilé endilla luki asé de kessú náí zín zahér no óibo, aar endilla lukai eijja honó kessú náí zín kúlaha no óibo. 23 Zodi honókiyo ttu fúnibar han táke, yóggwa ye fúno.” 24 Íba ye ítara re yían óu hoiyé, “Tuáñra zín fúnor híin or uzu díyan dóh. Tuáñra ze mafe diiba, tuáñra re yó hé mafe diiya zaybo, tuáñra re óile aró diiya zaybo. 25 Kiyólla-hoilé zar ttu asé yóggwa re aró diiya zaybo, montor zar ttu náí yóggwa ttu asé de híin úddwa loiféla zaybo.” 26 Isá ye aró hoór de, “Allar raijjo óilde endilla manúc or dóilla zee niki zobin ot bis cínŋŋe, 27 yóggwa raitta gúm zah aar din ot seton táke, hé bis ottu ges aái keéngori doóñr ógiyoi de yóggwa nize hoi no fare. 28 Zobine toh nizorgá nize fósol dóra: age sara, baade aga, aar agat foona fósol. 29 Zeñtté fósol fagigiyoí,

yóggwa ye híin toratori hañsi loi harat doijje, kiyólla-hoilé fósol haribár ainda aáigiyoí.” 30 Isá ye aró hoór de, “Añára Allar raijjo kiyór dóilla bóuli hoitám? Yáh kiyór meésal dí buzáitam? 31 Híyan óilde eggwá hóroir danar dóilla; zibá re zobin ot lagaibárcot saité zobin or tamám bis or bútoze ebbe cónro, 32 toóu yíba re lagailé, yíba barí kétir gas beggún or túaro doóñr ói endilla doóñr-doóñr déeila ókkol fára, zeén níki faik ókkole yíbar sábar nise bahá bañdí fare.” 33 Héndilla boóut meésal ókkol dí Isá ye ítara buzí fare de héddur mozin Allar kalam hoitó. 34 Íba ye meésal sára ítara re hotá no hoitó; montor Nizor cárit tun ore aiddone hárr kessú buzáidito. 35 Hé din hañz óiye rár, Isá ye cárit tun ore hoór de, “Aiyó, añára oh hañsat zai.” 36 Manúc or dol lwá re eri, ítara Isá ze noow ot accíl híyan ot góri íba re fúañti loigiyé. Íbar fúañti aró noow ókkol óu gífl. 37 Asimbit hére eggwá doóñr tuwán cúru óiye, aar eén doóñr-doóñr goir ókkol marat doijje, zeén níki noow gán faní lói bórizargoi. 38 Montor Isá noow or fasíl ot eggwá balúc cítan ot dí gúm ot accíl. Ítara íba re tulídi hoór de, “Ó Ustat, añára morizayrgói de híyan ot kí Tuáñr honó díyan náí?” 39 Tói íba urí boiyar ore dóoñk díye, aar faní re hoór de, “Nizám ó, táma.” Hétunot boiyar bon ógiyoi, aar furafuri támaigiyoí. 40 Íba ye ítara re hoór de “Tuáñra dooóor kiyá? Tuáñra ttu kí aijjó iman náí?” 41 Ítara bicí dooraigiyoí aar ezzon ore ezzone hoór de, “Íbá hon? Boiyare edde faní ye úddwa de íbar hotá mane!”

5 Yárbaade ítara díir okule Geraséni ókkol or mulluk ot foónicce. 2 Zeñtté Isá noow ttu laimmé, éhon-éhon ezzon hóraf jine-faiya manúc hobor ottu neeli aái íba llói dola óiye. 3 Yóggwa tákito de óilde hobor ókkol ot; honókiye yóggwa re bañdí rakí no faitto, síyol lói úddwa no faitto. 4 Yóggwa re boóut bar berí edde síyol lói bañdí raká gíyl, montor yóggwa ye síyol ókkol sírifelaito, aar berí ókkol hán-hán gorífelaito. Honókiye yóggwa re sóoñli rakí no faitto. 5 Yóggwa hámica raite dine hobore-hobore edde faäre-faäre guzorat tákito, aar nizoré nize fattór lói haritó. 6 Zeñtté yóggwa ye Isá re dur ottu lóti deikké, duñri zai íba re sóida goijjé. 7 Yóggwa ye eggwá doóñr abase guzori hoór de, “Ó Isá, Alla Tálar Fua, Tuáñr ttu añr llói kii ham asé? Allar wasté añré toziya no

diyó.” **8** Kiyólla-hoilé Isá ye yóggwa re hoiyé de, “Héy hóraf jin, manúc cwa ttu neeliai.” **9** Isá ye yóggwa ttu fusár gorér de, “Tor nam kii?” Yóggwa ye hoór de, “Añr nam Zák; kiyólla-hoilé añára boóut twa así.” **10** Tarfore yóggwa ye Íba re becábicí fóriyat goijjé de, híin ore hé elaka ttu duñrai no di bolla. **11** Hére faár or hañsat ñóónr ek zák cúwor sorer de accíl. **12** Bút tune Íba re fóriyat gorér de, “Añára re oh cúwor gún or búture duñraido, zeéne añára híin or búture góli fari.” **13** Isá ye ezazot diyé rár, hóraf jin nún neeli cúwor gún or búture góillegoi; tói zák kwa faár or haindá báy zure ñíit duñrdiyé, aar hére ñufí morigiyói. Hé zák kwat tokoriban dui ázar cúwor accíl. **14** Cúwor soroya gún duñrdiyé, aar cóor ot edde gang zagat híyan hóbor díye. Baade manúc ókkole kii óiye de saitó neeillé. **15** Ítara Isár hére aiccé, aar deké de, búte-faáil de, yáni jin or zák accíl de manúc cwa Íbar ñáke boirá, hoor findá aar sóiyi úñice asé; hétunot ítara ñooraiyói. **16** Zetará hé maamela gán deikké ítara búte-faáil de manúc cwar uore kii óiye de híyan manúc ítara re zanaiyé, héndilla cúwor gún or baabute yó zanaiyé. **17** Baade manúc ókkole Isá re ítarar elaka ttu zaitogói bicí aros gorát doijje. **18** Íba noow ot urérgoi de októ, búte-faáil de manúc cwa ye Íbar fúañti zai bolla fóriyat goijjíl. **19** Lekin Isá ye yóggwa re ezazot nó deh, bólke hoiyé de, “Tuñí tuáñr gór ot zoogói aar maincóre zanogói de, Mabude tuáñr lla hottór ñóónr ham goijjé, aar tuáñr uore hotó rahám goijjé.” **20** Baade yóggwa giyíyegoi, aar Isá ye yóggwa lla ze ñóónr ham goijjé híin Dekapólis elakat boiyan gorát doijje; híin fúnile beggúne taajup óito. **21** Zeñtté Isá abar noow ot gori ñíir oh hañsat faráiyé, ñóónr ek dol manúc Íba re gíri zoma óiye, aar Íba ñíir hañsat accíl. **22** Hétunot mujilíc-hánar sóddar ézzon hére aiccé, zibár nam Záiras. Yóggwa ye Isá re deki Íbar foot foijjé, **23** aar fóriyat gorér de, “Añr gura zérfua wa moron-moron óiye; meér bani góri aái Tuáñr át tan híbar uore doogái, zeéne híba gom óizagói aar basi táke.” **24** Hétunot Isá yóggwar fúañti rowana loiyé. ñóónr ek dol manúc Íbar fisá doijje aar sairókul ttu Íba re tēlāṭeli gorér. **25** Hére eggwá mayafua accíl, zibá ttu kúnzari zár de baró bosór óiye. **26** Híba ye boóut ñáktor ókkol or hañsottu bicí tokolif bordac goijjíl, aar nizor ttu accíl de beggún hósá gorifelai baade yo honó fáida nó óiyo, bólke biyaram aró barígilgoi. **27** Zeñtté híba ye

Isár baabute fúinne, manúc or dol lwár búture góli Isár fisór ttu aái Íbar hoor súiye, **28** kiyólla-hoilé híba ye báippil de, “Añí siríf Íbar hoor súi faille gom óizaiyumboi.” **29** Tói éhon or búture híbar kúnzari bon óigiyoi, aar híba biyaram ottu gom óigiyoi de híyan nizor jisím ot maásus gorí faijjé. **30** Aar éhon-éhon Isá ye zani faijjé de, Íba ttu kudurut neeillé. Íba ye manúc or dol or búture sairómikka saái hoór de, “Añr hoor hone súiye?” **31** Íbar cárit tune hoór de, “Tuñí toh deké, manúc ókkole Tuáñre tēlāṭeli gorér de, aar Tuñí keéngori hoór de, ‘Añré hone súiye?’” **32** Lekin hé ham goijjé de híba re sai bolla Isá sairómikka saát accíl. **33** Montor mayafua wa ye nizor hálot kii óiye de zani, ñóore hafi-hafi aái Isár muúntu uúñntoi foijjé, aar Íba re fura hákikot zanaáil. **34** Isá ye híba re hoór de, “O zí, tor imane toré gom goijjé. Cántir sáañte zaagói, tor ttu e biyaram ar no óuk.” **35** Íba hotá howát accíl de októ, mujilíc-hánar sóddar gwar gór ottu hoozzon manúc aái hoór de, “Tuáñr zí zuraigiyói; Ustat ore ar kiyá ferecan gorór?” **36** Montor Isá ye ítarar hotár uzu díyan no di mujilíc-hánar sóddar gwá re hoór de, “No ñooraiyó; siríf biccác goró.” **37** Tarfore Íba ye Fitor, Yakub, edde Yakub or báí Yohánna re bade ar honókiyo re Íbar fúañti zaito nó deh. **38** Ítara zeñtté mujilíc-hánar sóddar gwar gór ot foónicce, Íba ye deké de, hére holholar, aar manúc ókkole ñóónr-ñóónr góri hañdahari edde bilak gorér. **39** Íba ye búture zar Ítara re hoór de, “Tuáñra uzor edde hañdahari kiyá gorór? E fua wa moijjé de no, bólke gúm zar deh.” **40** Hétunot ítara Íba re lói áñcat doijje, lekin Íba ye beggún ore neelaidi mayafuar bafmaa re edde Íbar fúañti accíl de cárit tun ore lói, fua wa asé de kamárat góille. **41** Aar zérfua war át dóri híba re hoór de, “Talita kum,” ziyán or torjuma óilde, “Gura futúni, Añí toré hoór, ut.” **42** Éhon zérfua wa urí aññat doijje, kiyólla-hoilé híbar boc accíl baró bosór. Híyane ítara ebbe taajup óigiyoi. **43** Íba ye ítara re horagori hókum díye de, híyan or baabute honókiyo re no zanai bolla, aar hoiyé de, háito híba re kessú dii bolla.

6 Isá héntu neeli nizor wotón ot aiccé, fúañti Íbar cárit tun óu gífl. **2** Aar ebaadot-or-din aiccé rár, Íba ye mujilíc-hánat taalim diyat doijje. Íbar boiyan fúni boóut zone ammúk ói hoór de, “E Manúc cwa ye íín hontú cíkke? Ibá re diiya giyéh de híin hondilla giyan? Ibá ye

gorér de híin kii keramot? 3 Íbá kí mistíri no, Hérude nizer zormo-din or din córkari doónr zibá Moriyam or fua aar Yakub or, Yusúf or, Yohúdahr, edde Sáimon or báí? Íbár bóinain eré añárar fúañti nó ne?” Héndilla hoói ítara 22 Hérudias or zíi nizorgá nize hére bútoe aái, Íba re inkar goijjé. 4 Hétunot Isá ye ítara re nasi yore Hérud edde yóggwar meéman ókkol hoór de, “Ze honó nobir izzot nizer wotón ot, ore kúci goijjé rár, baáñcca ye zérfua wa re hoór egana-guccít, edde nizer gór ot bade beggúlla de, “Tor ttu ziyán monehoó híyan añr ttu mag, asé.” 5 Íba ye hére ar honó keramot gorí nó ańi toré híyan diiyum.” 23 Yóggwa ye híba re fare, siríf hoozzon biyaraimma re ítara uore át hosóm hái hoiyé de, “Tui añr ttu ziyán magos, át dí gom gorí fajijíl deh. 6 Aar ítara nabiccácit ańi toré híyan diiyum, añr raijjo ekdók óile Íba bicí taajup óigilgoi. Yárbaade Isá fara-fara úddwa diifélaikum.” 24 Baade híba neeli zai maa zai taalim diyat accíl. 7 Íba ye baró zon cárit tun re hoór de, “Ańi kii magitám?” Maa ye hoór ore matai, dui zon dui zon gorí diferát doijje. de, “Báptismadoya Yaháyar holla wa.” 25 Éhon Íba ye ítara re hóraf jin ókkol neelaibár kémota híba toratori bútoe baáñccar hańse aái hoór diíl. de, “Ańi tuáńr ttu báptismadoya Yaháyar holla 8 Íba ye ítara re nosíyot gorér de, “Fońt olla wa ekkán tálit góri ehón saái.” 26 Híyan fúni lańi bade ar kessú no loizaiyó: no ruńi, no hóilla, baáñcca ttu bicí afsús laiggé, montor toóu nizer no zalit gori tiań. 9 Cenńar fińdıyo, montor battí hosóm edde meéman nún or zoriya yóggwa ye hoor no loizaiyó.” 10 Íba ye ítara re aró hoór híba re inkar goittó nó saá. 27 Baáñcca ye éhon de, “Tuáńra ze gór ot góliba hé gór ot cóor éhon ezzon zollat ore Yaháyar holla wa aintó híyan ottu neeli nó zoogói foijjonto tákiyo. 11 Ze zagat tuáńra re kobul no goré yáto tuáńrar hókum dí diferáye. Manúc cwa ye zai, ziyól or boiyan no fúne, híyan ottu zaibarcót tuáńrar bútoe íbar holla wa harífelaiye, 28 aar holla wa téng or tollar dúil zárífelaiyo, zeéne híine ítara re ekkán tálit góri aní zérfua wa re diiyé; baade ulđa gobá deh.” 12 Baade ítara rowana loi zérfua wa ye híbar maa re diiyégoi. 29 Zeńtté endilla tobolik gorát doijje, touwá goró. 13 Íbar ummot ókkole híyan fúinne, ítara aái íbar ítara boóut bútt ókkol neelaiye, aar boóut zon lac cwa loizai hobor ot dohón gorífelaiye. 30 biyaraimma re ítara uore tel di gom goijjé. Sáhabi gún aái Isár hańse zoma óiye, aar ítara 14 Aar baáñcca Hérude Isár baabute fúinne, kii-kii goijjíl edde kii-kii cíkail híin beggún Íba kiyólla-hoilé íbar nam agagura mocúr óigilgoi. re zanaiyé. 31 Héńtte boóut manúc ókkol aá Hodúne hoór de, “Báptismadoya Yaháya mora zaat accíl isafe ítara hána háito úddwa ńaim nó ttu zinda óiye deh, hétolla toh íba ye keramoti faa de hétolla, íba ye ítara re hoór de, “Tuáńra ham híin gorí farer.” 15 Kiyé-kiyé hoór de, “Íba ekkán nizám zagat aái essát zirogái.” 32 Tarfore Eliyas.” Ar kiyé-kiyé hoór de, “Íba eggwá nobi, ítara noow ot gori ekkán bocóti-sára zagat agor zobanar nobi ókkol or dóilla.” 16 Montor giyyé. 33 Manúc ókkole ítara zaar de deikké, Hérude híyan fúni hoór de, “Yaháya zibár holla tará boóut zone ítara re siní fari tamám cóor ańi harífela báilam, íba mora ttu zinda óiye ókkol ottu duńri-duńri hére giyyé, zai ítara age deh.” 17 Kiyólla-hoilé Hérud nize manúc diferái, hére fońnicce. 34 Zeńtté Isá noow ttu laimmé, nizer báí Filíp or bou Hérudias or wasté hé íba ye doónr ek dol manúc deikké, aar íba ttu Yaháya re gereftar gorí ziyól ot bańdí raikkíl, ítara lla fetfuijje, kiyólla-hoilé ítara soroya sára kiyólla-hoilé Hérude híba re biyá gorífelail. 18 bérásóol or dóilla ói accíl. Tói íba ye ítara re Yaháya ye Hérud ore endilla hoitó de hétolla, boóut kessú taalim diyat doijje. 35 Zeńtté bicí “Tuáńr ttu nizer báí or bou wóre biyá goríbar háńz óigiyoi, íbar cárit tune íbar hańse aái hoór zayes náí.” 19 Hétolla Hérudias Yaháya llói de, “Yían toh ekkán bocóti-sára zaga aar bicí rak táigilgoi, híba ttu íba re zane marífélaito háńz óigiyoi; 36 tará re duńraido, zeéne tará monehoitó, montor nó fare, 20 kiyólla-hoilé atehańsór gang zaga ókkol ot edde fara ókkol Hérude Yaháya re dooraitó, yóggwa ye zainto ot zai nize hái bolla kessú kini fare.” 37 Montor de, íba ézzon forhésgar edde pak manúc, aar hé Isá ye ítara re hoór de, “Hái bolla kessú tará ísafa yóggwa ye íba re héfazot rakító. Yóggwa re tuáńra doo.” Ítara Íba re hoór de, “Tóoile ye Yaháyar hotá fúnilé bicí oulzóul ot forizaytó; añára zai dui cót dinár or ruńi kini aní tará re toóu yóggwa ttu íbar hotá fúinte gom lagító. hábaitam né?” 38 Montor íba ye ítara re hoór 21 Ahérit Hérudiase ekkán mouka faáil, zeńtté de, “Tuáńra ttu ruńi houwá asé? Zai soógoi.”

Ítara saái baade íba re hoór de, “Fañs swá, aar duwá mas óu asé.” 39 Baade íba ye ítara re, manúc cún beggún ore áil kér or uore ðaái-ðáái góri buágaraito hókum díye. 40 Tói tará ek cót zoinna edde fonzaic zoinna ðaái góri-góri boiccé. 41 Tarfore íba ye hé fañs swá ruṭi edde duwá mas sún looi asman or uzu saái cúkuriya goijjé, aar manúc cún ore dii bolla ruṭi gún báñgi-báñgi cárit tun ore diiyé; héndilla gorí íba ye mas duní wa yó tará beggún ore baṛidiyé. 42 Aar tará beggúne feṭ bóri háíye. 43 Baade ruṭir edde mas or ze tukura ókkol basigiyói, cárit tune híin feñrai looi fura baró báñir bóijje. 44 Zetará ruṭi háíye ítara óilde fañs ázar beṛaáin. 45 Éhon or bútoṛe Isá ye Nizor cárit tun ore mojburi goijjé de, íba ye manúc cún ore bidai gorí dite-dite ítara zeéne noow ot urí íbar age okule Betsáidat zaagói. 46 Manúc cún ore bidai gorídi baade, íba faár or uore dua goittó giyyé. 47 Aar hañz óiye de héñtte, noow gán ḏiir mazé accíl, aar Isá háliga kul or uore. 48 Íba ye dekéṛ de, cárit tune mockil or sáañte dar baár, kiyólla-hoilé boiyar ítarar uzan baát accíl. Fuáñitta, íba fanír uottú áñri-áñri ítarar hére aiccé, aar ítara re bárai zaito saáil. 49 Lekin íba fanír uottú áñṛer de híyan cárit tune deki, bú bóuli ṭaari guzori uiṭṭíl, 50 kiyólla-hoilé íba re deki ítara beggúne ḏooraáil. Montor íba ye éhon-éhon ítara llói hotá hoiyé; ítara re hoiyé de, “Hímmot goró! Ibá Añi; no ḏooraiyó.” 51 Tarfore íba ítara asé de noow ot uiṭṭégoi, aar hétunot boiyar támaigiyoi. Híyane ítara ebbe taajup óigiyoi, 52 kiyólla-hoilé ítara ruṭir keramot tán nó buzé, bólke ítarar dil doró óigilgoi. 53 Ítara ḏií farái, Genesáret elakat foónsi noow gán bíraiye. 54 Aar noow ttu laimmé mottor, maincé Isá re siní, 55 hé elakar agagurat duñri zai biyaraimma ókkol ore bisánat góri, íba zeṛé-zeṛé asé bóuli hóbor faiyé hére-hére anát doiije. 56 Íba zeṛé-zeṛé zaito, farat óuk, cóor ot óuk, yáh gang zagat óuk, hére maincé biyaraimma ókkol ore bazar ot aní íba re aros goittó de, ítara re siríf íbar fucák or hañra óile súito dí bolla; aar zetó zone súito, ítara beggún gom óizayto.

7 Ek din Féroci ókkol edde hoozzon alem Isár hañse zoma óiye, ítara aiccé de óilde Jerúsalem ottu. 2 Ítara deikké de, Isár hodún ummote nafak áte yáni adúiya áte hána háar. 3 Asóle Féroci ókkole edde tamám Yohúdi ókkole cúndorgori át no dúí hána na háa, héndilla gorí

ítara agor zobanar buzurgó ókkol or rosóm dóri táke. 4 Aar bazar ottu ailé nizoré no dúí honó kessú na háa. Ítara ttu aró boóut ḏoilla rosóm ókkol asé ziín ítara amól gorí bolla bouli hé buzurgó ókkol ottu faiyé, zendilla niki, fiyala dúwa, zok dúwa, edde ketúri dúwa. 5 Hé Féroci edde alem múne Isá ttu fusár gorér de, “Tuáñṛ ummot ókkole agor zobanar buzurgó ókkol or rosóm mozin no kiyá sole, bólke nafak áte hána háa?” 6 Íba ye ítara re zuwabe hoór de, “Nobi Yesáyah ye tuáñra munafék ókkol or baabute sóiyi hotá hoiyé, zendilla leikká asé, ‘Manúc íine Añré nizor muké beh izzot goré, montor tarár dil Añṛ ttu duré. 7 Tará Añṛ ebaadot goréde behar, kiyólla-hoilé tará taalim ísafe cika de óilde insán or niyom-kaanun ókkol.’ 8 Tuáñra toh Allar hókum ore bad di, insán or rosóm ore dóri táko.” 9 Isá ye ítara re aró hoór de, “Tuáñra toh tuáñrar rosóm amól gorí bolla Allar hókum ore bad diyat bicí salák. 10 Muúsa ye hoóil de, ‘Nizor bafmaa re izzot goró,’ aar ‘Zee niki baf or yáh maar bodnam goré, ítare mariféla zaybo.’ 11 Lekin tuáñra hoó de, ‘Zodi honókiye baf ore yáh maa re eén hoó, ze siz loi tuáñra añṛ ttu laf feita híyan Korban,’ yáni, Alla re diiféla gíyeh, 12 tuáñra ítare nizor baf olla yáh maa lla ar honó kessú goittó no doh. 13 Héen gorí, tuáñra zari goijjó de rosóme Allar kalam ore baatel gorífelo; héndilla aró boóut kessú goró de asé.” 14 Isá ye abar manúc ókkol ore Nizor hañse matai ítara re hoór de, “Beggúne Añṛ hotá fúno, aar buzó: 15 baár ttu manúc or bútoṛe góli ítare nafak gorí fare de honó kessú náí; bólke manúc or bútottu ziín neeliaiyé, ítare híine beh nafak goré. 16 Zar ttu fúnibar han asé, yóggwa ye fúno.” 17 Baade zeñtté Isá manúc or dol eri ek góṛ ot góille, íbar cárit tune íba ttu meésal lan or maáni fusár goijjé. 18 Hétolla íba ye ítara re hoór de, “Tuáñra yó héndilla obuz táigiyogoi dé? Tuáñra kí no buzó, baár ttu ziín manúc or bútoṛe góle, híine ítare nafak gorí no fare dé? 19 Kiyólla-hoilé híin zaa de toh ítar dil or bútoṛe no, bólke feṛor bútoṛe, aar híin feikána báy neelizagói.” Héndilla hoói Isá ye hárr hána hálal bóuli hoiyé. 20 Íba ye aró hoór de, “Ziín manúc or bútottu neeliaiyé, manúc ore híine beh nafak goré. 21 Kiyólla-hoilé manúc or bútottu, yáni dil ottu éna kukiyal, zenákari, suri, kotólakotóli, 22 oinno zon or bou loi zenákari, lalsí, burai, dúkabazi, bodmaci, ric, gifot, borái, edde bekufai aiyé. 23 E burai

iin beggún bítottu neeli aái manúc ore nafak goré.” 24 Isá urí hé zaga ttu ʔayár cóor or elakat giíyē. Íba ek gór ot góillegoi, aar híyan honókiyo re zainto dito mon nu accíl; montor Íba luki táki nó fare. 25 Hére ek mayafua ttu hóraf jine-faiya eggwá gura zérfula accíl; híba ye Isár baabute fúni mottor aái Íbar foot foijjé. 26 Mayafua wa accíl ezzon Beyohúdi, híba zormo óiye de óilde Síriya mulluk or Penicýar elakat. Híba ye Isá re aros gorát accíl de, zérfula ttu hé bít twa neelaifélai bolla. 27 Montor Isá ye híba re hoór de, “Age fuain dore feʔ bóri háito doh, kiyólla-hoilé fuain dor hána looi kuñir or muúntu félai dón gom no.” 28 Híba ye zuwabe hoór de, “Ói Malik, montor toóu de mes or toler kuñire fuain dor hánar tukuʔa ókkol háa.” 29 Isá ye híba re hoór de, “E zuwab or zoriya tuñi zaigói faribá; tuáñr zérfula ttu bít neeligiyói.” 30 Híba gór ot waafes zai loot faiyé de, zérfula wa bisánat neittá, aar bít neeligiyói. 31 Tarfore Isá ʔayár edde Sídon or elaka ttu neeli Dekapólis elakar mazór ttu Galil ʔiit aiccé. 32 Hére maincé ezzon náfang edde túta re Íbar hañse ainné, aar Íba re fóriyat goijjé de, yóggwar uore Íbar át dito. 33 Isá ye yóggwa re manúc or dol ottu ek dáikka loizai Íbar ooñl yóggwar duní han ot gólaidiye, aar Íbar ooñl ot sép dí yóggwar zir súiye. 34 Baade Íba ye asman or uzu saái ʔoóñr niyác félaiye, aar yóggwa re hoór de, “Effata” yáni, “Kúlizagoi.” 35 Tói éhon yóggwar han nún kúligiyoi, edde zir eridiya óigiyoi, aar yóggwa sáf-sáf góri hotá howát doijje. 36 Híyan or baabute honókiyo re no hoitó Isá ye manúc cún ore maná goijjé; montor Íba ye zetó maná goittó, ílara héto fólat tákito. 37 Ílara ebbe taajup ói hoór de, “Íbá ye ziín goijjé híin beggún gom ham goijjé. Íbá ye toh náfang ore fúnibar aar buk ore matibár toóufik dee.”

8 Hé din ókkol ot, zeñtté abar ʔoóñr ek dol manúc zoma óiye aar ílara ttu háito kessú nu accíl, Isá ye Íbar cárit tun ore matai hoór de, 2 “Añr ttu manúc itará lla feʔfurer, kiyólla-hoilé itará Añr fúañti asé de tin din óiye aar itará ttu háito kessú náí. 3 Zodi Añí itará re gór ot waacca duñraidi, itará foñt ot matá gúrai forizaybói, kiyólla-hoilé itará ttu hodún bicí dur ottu aiccé de asé.” 4 Íbar cárit tune zuwabe hoór de, “Montor manúc itará re feʔ bóri hábai bolla e bocóti-sára elakat hédun ruʔi hoʔé faibo?” 5 Isá ye ílara ttu fusár gorér de,

“Tuáñra ttu ruʔi houwá asé?” Ílara hoór de, “Háñt twa.” 6 Íba ye manúc cún ore meʔit boitó hoíyē; baade háñt twa ruʔi gún looi Alla re cúkuriya goijjé, aar manúc cún ore dii bolla híin báñgi Nizor cárit tun ore diiyé, aar ílara manúc cún ore baʔidiyé. 7 Ílara ttu houggwá gura mas óu accíl. Isá ye híin olla yó cúkuriya gorí yore, híin baʔidito cárit tun ore hoíyē. 8 Manúc cúne feʔ bóri háíye, baade ze tukuʔa ókkol basi accíl híin bóijje ráʔ ʔoóñr lai loi háñt lai óiye. 9 Hére sair ázar foijjonto beʔaain accíl. Yárbaade Íba ye ílara re bidai goridiye, 10 aar éhon or bútoʔe Nizor cárit tun or fúañti noow ot urí Dalmanuta nam or ekkán elakat giíyēgoi. 11 Fore Féroci ókkol neeli aái Isá llói torkatorki diyat doijje. Ílara Íba re entán goríbar niyote, Íba ttu ekkán asmani nicán dabi goijjé. 12 Íba ye ʔoóñr góri niyác félai hoór de, “E zobanar maincé nicán dabi kiyá goré? Añí tuáñra re sóiyi hoóir, e zobanar maincóre honó nicán dahá no zaybo.” 13 Tói Íba ílara re eri, abar noow ot urí ʔiir okule giíyói. 14 Aar cárit tun ottu ruʔi loizaité foóraigilgoi; noow ot mazé ílara ttu ekgwár túaro bicí ruʔi nu accíl. 15 Isá ye ílara re nicót gorér de, “Hóboroddar, Féroci ókkol or cútar ottu edde Héruð or cútar ottu uñciyar táikko.” 16 Hétunot ílara afós ot howáhoi gorér de, “Íba ye híyan hoór de añára ttu ruʔi náí de hétolla.” 17 Montor Isá ye híyan zani fari, ílara ttu fusár gorér de, “Tuáñra ttu ruʔi náí de híyan kiyá howáhoi gorór? Tuáñra kí aijjó ót nó foh yáh nó buzó? Tuáñrar dil aijjó doró dé? 18 Tuáñra suk tái no dekoró dé? Aar han tái no fúnor dé? Tuáñra ttu monot náí ne, 19 zeñtté Añí fañs ázar maincóʔr lla fañs swá ruʔi báinggilám héñtte ruʔir tukuʔa ókkol ho báñir bóri loóila?” Ílara Íba re hoór de, “Baró báñir.” 20 “Aró, zeñtté Añí sair ázar maincóʔr lla háñt twa ruʔi báinggilám héñtte ruʔir tukuʔa ókkol ho lai bóri loóila?” Ílara Íba re hoór de, “Háñt lai.” 21 Baade Isá ye ílara re hoór de, “Tói tuáñra aijjó nó buzó dé?” 22 Tarfore ílara Betsáida farat aiccé. Aar maincé ek añdá manúc ore Isár hañse ainné, aní Íba re fóriyat goijjé de, yóggwa re súito. 23 Íba ye añdá manúc cwa re át ot dóri farar baáre loigiyé, aar yóggwar suk ot sép dí baade Íbar duní át yóggwar uore dí fusár gorér de, “Tuñi kessú dekoró né?” 24 Yóggwa ye uormikká saái hoór de, “Añí manúc ókkol dekir, ílara re saité gas aññer fán lager.” 25 Isá ye abar Nizor át yóggwar suk ot diyé,

hétunot yóggwa ek díyane saái táikke. Yóggwa agor dǒilla gom óigiyoi, aar hárr kessú sáf-sáf góri deká faijjé. **26** Baade íba ye yóggwa re eén hoói gór ot duñraidiyé, “Farat úddwa no góillo.” **27** Isá ye Nizor cárit tun ore fúañti looi, Kaisáriya Filíppi elakar fara ókkol ot zaargói; foñt ot íba ye cárit tun ottu fusár gorér de, “Maincé Añí hon bouli hoó?” **28** Ítara zuwab der de, “Tuñí bóle báp̄tismadoya Yaháya; ar hodúne hoó de, nobi Eliyas; ar hodúne hoó de, nobi ókkol ottu honó eggwá.” **29** Tói íba ye ítara ttu fusár gorér de, “Lekin tuáñra kii hoó, Añí hon?” Fitore zuwabe hoór de, “Tuñí óilade hé Mosih.” **30** Hétunot íba ye ítara re nicót goijjé de, íbar baabute honókiyo re no hoitó. **31** Yárbaade Isá ye ítara re endilla taalim diyat doijsje, Manúc or Fua ttu hámaha boót dǒilla duk faa foribó; aar murubbi, dǒoñr imam edde alem ókkol ottu inkar háibo; íba re mariféla zaybo, montor tin din baade abar zinda óizayboi. **32** Íba ye hotá híyan sáf-sáf góri hoiyé. Hétolla Fitore íba re ekkinare loizai buzát doijsje. **33** Montor Isá firi Nizor cárit tun or uzu saái Fitor ore jéjjerai hoór de, “Cóitan, Añr muúntu dur ó; kiyólla-hoilé tor díyan toh Allar gún or uzu no, bólke insán or gún or uzu.” **34** Hétunot íba ye Nizor cárit tun ore cóo manúc or dol ore matai hoór de, “Zodi honókiyo ttu Añr fisáli aitó monehoó, yóggwa ttu nizoré inkar gorífela foribó, aar nizor kúruc boói Añr fisáli dora foribó. **35** Kiyólla-hoilé zee niki nizor zan basaitó saá, yóggwa ye híyan háraifelaibo; montor zee niki Añr edde kúchóbor or wasté nizor zan háraifele, yóggwa ye híyan basaifelaibo. **36** Kii laf óibo, zodi honókiye tamám duniyai faa, montor nizor zan nán háraifele? **37** Insáne nizor zan or bodol kii dii faribó de asé? **38** Zee kiyé e zenákur edde gunágar manúc or bútoe Añré lói edde Añr hotá re lói córma, yóggwa re lói Manúc or Fua yó córmaibo zeñtté íba Nizor Baf or mohímaye pak firista ókkol ore fúañti looi aibó.”

9 Isá ye ítara re aró hoór de, “Añí tuáñra re sóiyi hoóir, eřé endilla hodún manúc tíyaiya asé, zetará Allar raijjo taakote aáigiyoi de nó dekíte no moribó.” **2** Sów din baade Isá ye siríf Fitor ore, Yakub ore, edde Yohánna re looi, ítara re eggwá uñsol faár or uore loigiyé. Héře ítarar muúntu íbar súrot bodoligiyói. **3** Íbar hoor sossohat doijsje edde fúut dǒla óigiyoi, eén zeén níki duniyair honó hoor dúwoya ye

héndilla dǒla gorí no fare. **4** Hétunot ítarar hañse Eliyas edde Muúsa dahádiye, aar Isá llói hotá howát doijsje. **5** Fitore zuwabe Isá re hoór de, “Rabbí, gom óiye añára eřé así. Añára eřé tin nán řambu řaki: ekkán Tuáñr lla, ekkán Muúsa lla, edde ar ekkán Eliyas olla.” **6** Ítara bicí dǒoraigiyói isafe, íba nize kii hoór nize no zane. **7** Hétunot ekkán miyúla aái ítara re saífelaiye, aar hé miyúla ttu eggwá abas aiccé de, “Íbá óilde Añr adorja Fua, íbár hotá fúno!” **8** Éhon ítara sairómikka saiyé rár, Isá re bade ar honókiyo re ítarar fúañti nó deké. **9** Ítara faár or uottú lamer de októt Isá ye ítara re hókum goijjé de, ítara ziín deikké híin Manúc or Fua mora ttu zinda nó óiyo foijjonto honókiyo re no hoitó. **10** Ítara íbar hókum híyan yaad raikké. Montor mora ttu zinda ówa hoiyé de híyan or maáni kii afós ot toskara gorát doijsje. **11** Baade ítara íba ttu fusár gorér de, “Alem ókkole kiyá endilla hoó, age nobi Eliyas aár zorur?” **12** Isá ye ítara re zuwabe hoór de, “Becók, age Eliyas aibó aar hárr kessú zendilla ówa foitto héndilla gorídibo. Aar toóu kiyá pak-kalam ot Manúc or Fuar baabute endilla asé, íba ttu bicí duk faa foribó edde íba re hékarot gorá zaybo? **13** Lekin Añí tuáñra re hoóir, Eliyas aáigiyoi, aar íba re ítara ttu zeén monehoiyé héen goijjé, zendilla íbar baabute leikká asé.” **14** Aar zeñtté ítara baki cárit tun or héře aiccé, ítara dekér de, tarár sairó dák ottu dǒoñr ek dol manúc asé, aar hodún aleme tará llói barábari dér. **15** Dol řiya ye Isá re deikké mottor bicí taajup óigiyoi, aar íba re sólam gorí bolla duñri-duñri zaat doijsje. **16** Íba ye ítara ttu fusár gorér de, “Tuáñra ítara llói kii barábari dór dé?” **17** Dol ottu ezzone íba re zuwab der de, “Ustat, añr fua wa re Tuáñr hañse ainní, ítare buk gorífele de jine faiyé. **18** Zeñtté ítare hé jine dóre, héñtte ítare meřit ańsár mare. Tói ítar gal ottu féna aiyé aar íte date dat kirkira edde doró óizagoi. Añí Tuáñr cárit tun ore hé jin nwá neelaifélaito hoóilam, montor ítara nó fare.” **19** Hétunot Isá ye zuwabe hoór de, “Ó iman sára nosól, Añí tuáñrar fúañti-fúañti aró hotókkal tákitam? Hotódin tuáñra re bordac goittám? Fua wa re Añr hañse anó.” **20** Tói ítara fua wa re íbar hañse ainné. Jin nwá ye íba re deká, fua wa re toratori dórforabat doijsje. Tói fua wa meřit fori ikká-uikká goijjat doijsje, aar gal ottu féna neelat accíl. **21** Isá ye fua war baf ottu fusár gorér de, “Íte hoñtté lóti endilla óiye?” Yóggwa ye hoór

de, “Gura hale lóti. **22** Hóraf jin nwá ye itaré zane marifélai bolla egazá ooin ot edde fanít féla. Montor zodi Tuñi kessú gorí faille, fetfuri añára re modot goró.” **23** Isá ye yóggwa re hoór de, “‘Zodi gorí faille,’ hoó de híyan kii hotá? Zee niki biccác goré yóggwa lla hárr kessú ói fare.” **24** Éhon fua war bafe guzori hoór de, “Añi biccác gorí, añi biccác or komzuri tík gorído.” **25** Isá ye bicí manúc ókkol duñri-duñri aái zoma ór de deki, hóraf jin nwá re dóoñk dí hoór de, “Héy náfang edde buk jin, Añi toré hókum gorí, itar ttu neeli aáizagoi, itar bútoe abar no gólic!” **26** Hétunot jin nwá guzoran mari, fua wa re bicí dórforabai neeli aáigiyo. Fua wa murudar dóilla óigiyo de deki boóut zone hoór de, “Ite morigiyoí.” **27** Montor Isá ye itare át ot dóri tuillé, tói íte urí tíyayiye. **28** Zeñtté Isá górot aiccé, íbar cárit tune íba ttu aiddone fusár gorér de, “Yíba re añára kiyá neelai nó fari?” **29** Íba ye zuwab der de, “Dua sára ar honó kessú lói endilla gún neelai no fare.” **30** Baade ítara héntu rowana loi Galil báy zaar. Isá ttu híyan or baabute honókiyo re zainto dito mon nu accíl. **31** Kiyólla-hoilé íba ye cárit tun ore taalim dito de edde hoitó de, “Manúc or Fua re manúc ókkol or át ot gosáidiya zaybo; aar ítara íba re marifélaibo, montor íba tin din baade zinda óizayboi.” **32** Lekin ítara hotá híyan nó buzító, aar íba ttu fusár goitté yó dlooraitó. **33** Tarfore ítara Kaparnahúm ot aiccé. Isá górot oiye rár, cárit tun ottu fusár gorér de, “Tuáñra foñt ot kiyór baabute barábari díla dé?” **34** Montor ítara nizám mári táikkil, kiyólla-hoilé ítara foñt ot barábari díyl de, añárar bútoe ebbe dloor honnwá hoói. **35** Boói baade, Isá ye hé baró zon cárit tun ore matai hoór de, “Zar ttu age óito monehoó, yóggwa ttu beggún or fisé ówa foribó edde beggún or háadem bona foribó.” **36** Tarfore íba ye eggwá gura fua looi ítara maze tíyagaraiye, aar fua wa re hañdót félai looi ítara re hoór de, **37** “Zee kiyé endilla eggwá gura fua re Añr name kobul goré, yóggwa ye Añré kobul goré deh; aar zee kiyé Añré kobul goré, yóggwa ye Añré kobul goré de no, bólke Añré diferáiyede íba re kobul goré deh.” **38** Yohánna ye íba re hoór de, “Ustat, añára deikké de, eggwá maincé Tuáñr name bú neelar; yóggwa añárar daái or manúc no de hétolla, añára yóggwa re maná goijjí.” **39** Lekin Isá ye hoór de, “Yóggwa re maná no goijjó, kiyólla-hoilé Añr name keramot dahái baade éhon Añr baabute hóraf hoói fare

de honókiye náí. **40** Kiyólla-hoilé zee niki añárar ulda no, yóggwa toh añárar híkka. **41** Tuáñra Mosihr ummot de hétolla zee kiyé tuáñra re ek fiyala faní dee, Añi tuáñra re sóiyi hoóir, yóggwa ye hámaha nizer boccíc fai zaybo. **42** “Zee niki Añr uore iman ainné de e cónro ókkol ottu honókiyo re guná gorába, ítar lla beétor óilde, ítar golat eggwá bór cíl or sakki bañdí doijjat félaidiya zah. **43** Zodi tuáñr áte tuáñre gunár uzu țane, tóoile híyan harifélo. Dui át táki zuzuk ot, yáni honódin no nifé de ooin ot zaar túaro, túñra ói zindigít góla tuáñr lla beétor, (Geenna g1067) **44** hé zuzuk ot, manúc háa de log no more aar ooin no nifé. **45** Zodi tuáñr țenge tuáñre gunár uzu țane, tóoile híyan harifélo. Dui țeng táki zuzuk ot félaidiya zar túaro, leng ói zindigít góla tuáñr lla beétor, (Geenna g1067) **46** hé zuzuk ot, manúc háa de log no more aar ooin no nifé. **47** Aar zodi tuáñr suké tuáñre gunár uzu țane, tóoile yíba neelaifélo. Dui suk táki zuzuk ot félaidiya zar túaro, eggwá suk loi Allar raijot góla tuáñr lla beétor, (Geenna g1067) **48** hé zuzuk ot, ‘manúc háa de log no more aar ooin no nifé.’ **49** Fottí ekzon ore ooin loi pak-sáf gorá zaybo zendilla kurbani re nun loi pak-sáf gorá zah. **50** “Nun toh gom jiníc, montor zodi nun or dok zaagói, tóoile híin ore keéngori abar nuncá gorá zaybo? Tuáñrar bútoe nun raikkó, aar ezzon loi ezzone cántit táikko.”

10 Baade Isá híyan ttu urí, Yohúdiya elaka félai Jordán hál or farkule giyyé. Manúc or dol íbar hañse abar zoma óiye, aar íba ye Nizer niyom mozin ítara re abar taalim diyat doijje. **2** Hodún Férocí aái íba re entán gorí bolla súwal gorér de, “Morotfua ye nizer bou wóre sárfelaibar zayes asé né?” **3** Íba ye zuwabe ítara re hoór de, “Muúsa ye tuáñra re kii hókum díye?” **4** Ítara hoór de, “Muúsa ye de ekkán sárhabos lekí dí duñraidi bolla ezazot díye.” **5** Montor Isá ye ítara re hoór de, “Tuáñrar dí doró de hétolla íba ye tuáñrar hañse héndilla hókum leikké deh. **6** Lekin foidayecir héñtte lóti Alla ye ítara re morot aar maya banaiyé. **7** ‘Híyan olla toh morotfua ye nizer bafmaa ttu zuda ói nizer bou wór fúañti tákibo, **8** aar ítara duní zon ek jisím óizayboi.’ Hé ísafe, ítara ar dui no, bólke ek jisím. **9** Hétolla Alla ye zetará re zur goijjé, ítara re honó manúce síra no goróuk.” **10** Yárbaade ítara górot oiye rár, cárit tune híyan or baabute íba ttu abar fusár goijjé. **11** Íba

ye ítara re hoór de, “Zee kiyé nizer bou wóre sárfelai ar eggwá re biyá goré, íte nizer bou wór ulða zená gorér deh. 12 Aar ze mayafua ye nizer zamai re sárfelai ar ezzon biyá goré, híba ye zená gorér deh.” 13 Ek din manúc ókkole gura fuain dore Isár hañse anát doiije, zeéne íba ye ítara re súwe; montor cárit tune manúc cún ore jéjjeraiye. 14 Montor Isá ye híyan deki bicí naras óiye, aar ítara re hoór de, “Fuain dore Añr hañse aitódo; ítara re no oóñillo, kiyólla-hoilé Allar raijjo toh ítatar dóilla maincé éna hásil goré. 15 Añí tuáñra re sóiyi hoóir, zee kiyé Allar raijjo re eggwá gura fuar dóilla góri kobul no goré, yóggwa híyan ot bilkúl góli no faribó.” 16 Baade íba ye ítara re hañd ot félai loiyé, aar íbar át ítatar uore di ítara re borhot diyé. 17 Isá sofór ot zaito neillé de októ, ezzon manúc duñri aái íbar muuntu añrú tók dí fusár gorér de, “Gom Ustat, ofúrani zindigi miras faite añr ttu kii gorá foribó?” (aĩnios g166) 18 Isá ye yóggwa re hoór de, “Tuñí Añré gom kiyá ðakoór? Alla bade toh ar kiyé gom ná. 19 Tuñí de hókum ókkol zano, zendilla niki, ‘Kún no goríba, zená no goríba, suri no goríba, misá gobá no diba, férokbazi no goríba, bafmaa re izzot goríba.” 20 Manúc cwa ye íba re hoór de, “Ustat, gurahale lóti añí híin beggún amól gorí-gorí aiyír.” 21 Isá ye yóggwar uzu saái, yóggwa re ador lagi hoór de, “Tuáñr ttu ekkán ham baki asé. Zoo, tuáñr ttu asé de híin beggún besi gorif ókkol ore diifélogoi, tói tuñí asman ot dón faiba; baade aái Añr fisáli óiyogai.” 22 Híyan fúni yóggwa bezar óigiyoi, edde ferecanir sáante giyégói, kiyólla-hoilé yóggwa ttu becábicí dón-cómbotti accíl. 23 Hétunot Isá ye sairómikka saái Nizer cárit tun ore hoór de, “Dón-doulot ola ókkol ottu Allar raijjet gólite hotó mockill!” 24 Cárit tun íbar hotáye ammúk óigiyoi. Montor Isá ye ítara re abar hoór de, “Ó fuain, Allar raijjet gólite hotó mockill! 25 Tuangor manúc Allar raijjet gólar túaro, eggwá uñt fúnc or faái ttu goli zaa aró aásan.” 26 Cárit tun aró bicí ammúk óigiyoi, aar ezzon ore ezzone hoór de, “Tóoile hone nejat fai faribó?” 27 Isá ye ítatar uzu saái hoór de, “Híyan insáne gorí no fare, montor Alla ye fare; kiyólla-hoilé Alla ye toh hárr kessú gorí fare.” 28 Hétunot Fitore íba re hoór de, “Soó, añára de hárr kessú eridi Tuáñr fisáli óiyi.” 29 Isá ye hoór de, “Añí tuáñra re sóiyi hoóir, zee niki Añr wasté edde Allar kúchóbor or wasté gó, báiboináin, bafmaa, fuain, yáh

zaga-zobin eridiyé, 30 yóggwa ye e zobanat ek cót gun bicí gó, báiboináin, maa, fuain edde zaga-zobin faibo, aar fúañti-fúañti zulúm óu faibo; aar aiyér de zobanat ofúrani zindigi faibo. (aĩn g165, aĩnios g166) 31 Lekin boóut zon, zetará yala age asé, ítara fisé óizayboi; aar zetará yala fisé asé, ítara age óizayboi.” 32 Héñtte ítara uore Jerúsalem ot zaar de foñt ot accíl, aar Isá ítatar age-age zaat accíl. Cárit tun ammúk óigiyoi, aar zetará íbar fisé-fisé zaat accíl ítara dooraigiyói. íba ye baró zon cárit tun ore abar ekkinare loizai, íbar uore kii-kii óibo de híin ítara re howát doiije, 33 ki hoilé, “Soó, añára uore Jerúsalem ot zair, hére Manúc or Fua re ðoóñr imam ókkol or edde alem ókkol or hañse dóridiya zaybo; ítara íba re moot or fótua díbo edde Beyohúdi ókkol or hañse gosáidibo. 34 Ítara íba re ínca goríbo, sép maribó, coóñk maribó, edde zane marifélaibo. Lekin tin din baade íba zinda óizayboi.” 35 Yárbaade Zebedair fuain Yakub edde Yohánna Isár hañse aái hoór de, “Ustat, añára saái de añára Tuáñr ttu ziyán aros gorí, híyan Tuñí añára lla goró.” 36 íba ye ítara ttu fusár gorér de, “Tuáñra kii soór de, Añí tuáñra lla kii goittám?” 37 Ítara íba re hoór de, “Tuñí Tuáñr mohímat máze añára ezzon ore Tuáñr den ðák ottu edde ar ezzon ore ban ðák ottu buágaraiyo.” 38 Montor Isá ye ítara re hoór de, “Tuáñra kii magor híyan tuáñra no zano. Añí fiíyum de fiyala tuáñra fií faribá né? Yáto Añí loiyum de báptisma tuáñra loi faribá né?” 39 Ítara hoór de, “Añára fariyúm.” Isá ye ítara re hoór de, “Becók, ze fiyala Añí fiíyum, yíba tuáñra fiíba; aar ze báptisma Añí loiyum, yíba tuáñra loiba. 40 Montor Añr den ðák ottu yáh ban ðák ottu honókiyo re buágaron Añr ham no. Zaga híin óilde uitará lla zetará lla toiyar gorí raká gíyeh.” 41 Baki doc zon cárit tune híyan fúni, Yakub edde Yohánna llói guccá óigiyoi. 42 Montor Isá ye ítara re Nizer hañse matai hoór de, “Tuáñra toh zano, zetará re Beyohúdi ókkol or hókumot-goróya ísafe zana zah, ítara tarár uore raastri goré; aar tarár ðoóñr sóddar ókkole tarár uore adíkar sola. 43 Montor tuáñrar bútoe héndilla ón tík no, bólke tuáñra ttu zee niki ðoóñr óito saá, ítar ttu tuáñrar háadem bonar zorur; 44 aar tuáñra ttu zee niki age óito saá, ítar ttu beggún or gulam bonar zorur. 45 Kiyólla-hoilé Manúc or Fua yó toh hédmot faito aiccé de no, bólke aiccé de hédmot goittó, edde boóut zon or bodol

Nizor zan dito.” 46 Yárbaade ítara Jerikó cóor ot aiccé. Zeñtté Isá Nizor cárit tun lói edde ðoóñr ek dol manúc lói Jerikó ttu neeler, hé októ Timáiyus or fua Bartimai nam or ezzon ańdá manúc rastar hańsat boói hórat mager de accíl. 47 Yóggwa ye Íba Isá Nasári de híyan fúinne rár, endilla guzorat doijje, “Ó Dawud or Fua Isá, ańr uore rahám goró!” 48 Boóut zone yóggwa re jéjjerai nizám óito hoiyé, montor yóggwa ye aró ðoóñr góri guzori hoór de, “Ó Dawud or Fua, ańr uore rahám goró!” 49 Hétunot Isá tíyaigiyoi aar hoór de, “Yóggwa re eře aító hoó.” Tói ítara ańdá manúc cwa re ðahai hoór de, “Hímmot goró, uró. Íba ye tuáńre matar.” 50 Hétunot yóggwa ye nizor gaar saddor ekkinare félai, fál dí urí Isár hańse aiccé. 51 Aar Isá ye yóggwa ttu fusár gorér de, “Tuńí kii soó, Ańi tuáńr lla kii goittám?” Ańdá manúc cwa ye Íba re hoór de, “Ó Rabbí, ańar ttu abar deki faitto monehoór.” 52 Isá ye yóggwa re hoór de, “Zoo, tuáńr imane tuáńre gom goijjé.” Yóggwa éhon deki fajjíl, aar rasta ttu Isár fisáli doijje.

11 Zeñtté ítara Jerúsalem or ðáke Zaitun Faár ot asé de Betfégi edde Betániya farat foónicce, Isá ye Nizor dui zon cárit ore diferáiyé, 2 ítara re endilla hoói, “Tuáńra muúm or fara gán ot zoo, hére góli mottor eggwá gadár sóo baindá loot faiba, zibár uore aijjó honókiye nó soré. Yíba re kúli eře anógoi. 3 Zodi honókiye tuáńra re eén hoó, ‘Tuáńra yían kiyólla gorór?’ Hoibá de, ‘Malik ottu yibá re lager.’ Tói yóggwa ye yíba re éhon eře diferáidibo.” 4 Ítara rowana loiyé, aar gadár sóo wa re baárkule rastar uore gór or dorozat baindá loot faiyé; ítara yíba re kúlifelaiye. 5 Montor hére tíyai accíl de tará ttu hodúne ítara re hoiyé de, “Tuáńra kii gorór deh, gadár sóo wa re kúlör de níki?” 6 Isá ye ítara re zendilla hoító hoóil, ítara tará re héndilla hoiyé, tói tará ítara re ezazot diyé. 7 Ítara gadár sóo wa re Isár hańse ainné, aar yíbar uore nizor hoor ókkol bicáidiye, aar Isá yíbar uore boiccé. 8 Bicí maincé nizor hoor ókkol rastar uore bicáidiye, argúne bariza ttu fatar ðaggwa ókkol harí bicáidiye. 9 Zetará age-age edde fisé-fisé zaat accíl, ítara guzori-guzori hoór de, “Hósana! ‘Mubarek Ubá zibá Mabud or name aiyér. 10 ‘Mubarek ańárar baf Dawud or raijjo ziyán aiyér. ‘Ebbe uore asman ot Allar taarif óuk!’ 11 Isá Jerúsalem ot góli baade, baitul-mukaddos or urán ot giyyé; aar sairómikka beggún saái yore,

háńzinna óigiyoi de ísáfe baró zon cárit tun ore fúańti looi Betániyat giyyégoi. 12 Tarfor din, zeñtté ítara Betániya ttu bacá loíye, Isá ttu búk laiggé. 13 Íba ye dur ottu tái fata furaiya eggwá ðuńir-gas deki, yíbat gula asé né saitó giyyé; montor Íba gas swár íńyot aiccé rár, fata bade ar kessú loot nó faa, kiyólla-hoilé héńtte ðuńir gula dóribar moósum no. 14 Hétunot Íba ye gas swá re hoór de, “Ar honódin tor ttu honókiye gula hái no farouk.” Íbar cárit tune hotá híyan fúinnil. (aĩon g165) 15 Baade ítara Jerúsalem ot foónicce. Isá baitul-mukaddos or urán ot góli, zetará hére besa kina gorér ítara re loraidiyat doijje, aar baţta báńgoyar ţebíl edde hoitor besoyar boiróni ókkol natđiyagarai diyé. 16 Íba ye Baitul-mukaddos or urán báy honókiye re malsáman loizaitó nó deh. 17 Íba ye taalim ot ítara re hoór de, “Pak-kalam ot ki yían ná, ‘Ańr gór ore tamám koum ókkol olla munazat or gór howá zaybo?’ Montor tuáńra toh híyan ore ðahańit or ađđa-hána banaifelaiyo.” 18 Doóñr imam ókkole edde alem ókkole híyan fúni Íba re marifélaibar mouka tuwat accíl. Ítara Íba re ðooraitó, kiyólla-hoilé manúc beggún Íbar taalime ammúk óizaytoi. 19 Aar zeñtté háńzinna óiye, Isá edde Íbar cárit tun cóor or baáre giyyégoi. 20 Bifńna ítara héntu zaar de októ, ðuńir-gas swá cíńyor ottu lóti fúaigiyoi de deikké. 21 Fitor ottu monot urí Íba re hoór de, “Rabbí, soó, Tuńí boddua dífla de ðuńir-gas swá fúaigiyoi.” 22 Isá ye ítara re zuwabe hoór de, “Allar uore iman rakó. 23 Ańi tuáńra re sóiyi hoóir, zee kiyé e faár gwá re eén hoó, ‘Urí doijjat forgói,’ aar nizor dil ot honó cók no raké bólke ziyán hoiyé híyan óibo de biccác goré, tooile yóggwa lla híyan óibo. 24 Hétolla, Ańi tuáńra re hoóir, tuáńra duat mazé zín mago, híin faifelaiyo bóuli biccác goijjó, tói tuáńra re híin diiya zaybo. 25 Zeñtté tuáńra tíyai dua goró, héńtte honókiyor ulđa kessú tákile yóggwa re maf gorídiyo, zeéne tuáńrar asmani Bafe yó tuáńra re tuáńrar hosúri maf gorí deh. 26 Montor zodi maf no goró, tooile tuáńrar asmani Bafe yó tuáńrar hosúri maf no goríbo.” 27 Ítara abar Jerúsalem ot aiccé. Isá baitul-mukaddos ot gúrafıra gorér de októ, ðoóñr imam ókkol, alem ókkol, edde murubbi ókkol Íbar hańse aiccé, 28 aar Íba re hoór de, “Tuńí ham iín kii adíkare gorór? Íin gorí bolla Tuáńre e adíkar hone diiyé?” 29 Isá ye ítara re zuwabe hoór de, “Ańi yó tuáńra ttu ekkán súwal fusár goríyum,

Añré zuwab diyo, baade Añí tuáñra re hoiyúm Añí iín kii adíkaré gorír deh. **30** Añré zuwab do sái, Yaháya ye báp̄tisma díbar adíkar faáil de asman ottu né náki insán ottu?” **31** Baade ítara afós ot biyasana gorér de, “Zodi añára hoói, ‘asman ottu,’ íba ye hoibó de, “Tóoile tuáñra íba re biccác kiyá nó goró?” **32** Montor zodi hoói, ‘insán ottu’ tóoile?” Ítara maincóre ðooraitó, kiyólla-hoilé beggúne Yaháya nobi de mainto. **33** Hétolla ítara Isá re zuwabe hoór de, “Añára no zani.” Isá ye ítara re hoór de, “Tóoile Añí yó tuáñra re no hoiyúm Añí iín kii adíkaré gorír.”

12 Isá ye ítara re meésal ókkol dí hotá howát doijje, “Ezzon maincé ekkán anggur-bariza lagaiyé. Yóggwa ye híyan or sairó dák ottu gíra díye, anggur or roc neelai bolla eggwá gañrá kuijjé, edde ekkán ðongki bairé. Baade bariza gán cacá ókkol ore tēka dí oinno mulluk ot giyói. **2** Aar anggur or ainda aiccé rár, yóggwa ye eggwá goóur ore cacá gún or hañse diferáye, cacá ítara ttu barizar gular bák fai bolla. **3** Lekin ítara taré dóri, mara-dóra gorí háli áte duñraidiyé. **4** Yóggwa ye abar ítarar hañse ar eggwá goóur diferáye, ítara taré matá sái mari bicí beizzoti goijjé. **5** Yóggwa ye aró éggwa diferáye; ítara taré zane marifélaie. Héndilla, ítara aró boóut twa re goijjé, hodún ore mara-dóra goijjé, hodún ore zane marifélaie. **6** “Yala yóggwa ttu siríf ar ezzon diferáibar asé deh, íba óilde yóggwar adorja fua. Ahérit yóggwa ye nizorgá nize eén hoói fua wa re diferáye, ‘ítara añr fua re izzot goríbo.’ **7** “Lekin cacá gúne afós ot hoór de, ‘Ite toh mirasdár; aiyó itaré mariféla, baade miras añárar óizayboi.’ **8** Tóí ítara íba re dóri marifélaie, aar barizar baáre félaidiye. **9** “Barizar giróse ítara re kii goríbo fáñllar? Yóggwa ye aái hé cacá gún ore marifélaibo, aar bariza gán oinno kiyó re diifélaibo. **10** Tuáñra pak-kalam ot yíán úddwa nó foró níki, ‘Ze fattór mistíri ye inkar gorifélaie, yíba cíl beggún or túaro bicí zoruri wa ógiyoi. **11** Híyan Mabud or torfóttu óiaicce, aar híyan añárar suk ot taajuippa?” **12** Hétunot ítara íba re dórifelai bolla kucíc goijjíl, kiyólla-hoilé ítara buzígyoi de ki Isá ye hé meésal lan ítarar hélaf hoiyé deh. Montor ítara maincór ðoore íba re eri gílgoi. **13** Fore ítara hodún Féroci edde Hérudiól ore Isár hañse diferáye, zeéne tará íba re íbar hotá loi hol ot félaí fare. **14** Tará aái íba re hoór de, “Ustat, añára zani de,

Tuñí sóiyi hoó. Tuñí maincé kii hoór forba no goró, kiyólla-hoilé Tuñí toh honókiyo re forók goró de náí, bólke sóiyigori Allar rastar taalim doh. Añára re hoósai, Romi baáñcca re házana doon zayes asé ne náí? **15** Añára diitam ne náki no diitam?” Montor íba ye tarár munaféki re zani hoór de, “Tuáñra Añré entán gorór kiyá? Sai bolla Añr hañse ekkán dinár anó.” **16** Tóí tará ainné. Íba ye tará re hoór de, “Yíán har sóbi edde har nam?” Tará íba re hoór de, “Romi baáñccar.” **17** Tóí Isá ye tará re hoór de, “Ziín baáñccar híin baáñcca re diiyo, aar zifín Allar híin Alla re diiyo.” Híyane tará ebbe taajup ógiyoi. **18** Baade Sadukái ókkol Isár hañse aiccé, Sadukái ókkole háñcor náí hoó, ítara aái íba re ekkán súwal goijjé de, **19** “Ustat, Muúsa ye añára lla leikké de, zodi honókiyor báí fuain sára morizagói aar ítar bou táizagoi, tóoile ítar hé báí ottu bou híba re biyá gorifelai nizor báí olla nosól foida gorá foribó. **20** Dóro, háñt zon báí accíl. Foóila wa ye bou looi, fuain sára morigiyói. **21** Baade híba re dúsára wa ye biyá goijjé, aar íte yó fuain sára morigiyói; tisára war hálót óu héndilla óiye. **22** Héndilla, háñto báí ye híba re biyá gorí fuain sára morigiyói. Ahérit, mayafua wa yó morigiyói. **23** Hé ísafe, háñcor or hale híba har bou óibo? Kiyólla-hoilé híba re toh háñto zone nizor bou banaáil.” **24** Isá ye ítara re hoór de, “Tuáñra etollá éna gollot ot asó deh! Tuáñra toh no Allar pak-kalam zano, aar no Allar kudurut zano. **25** Kiyólla-hoilé zeñtté ítara mora ttu zinda óibo, héñtte ítara no biyá goríbo aar no ítara re biyá diya zaybo, bólke ítara asman or fíristar dóilla beh óibo. **26** Mora ókkol zinda ówar baabute hoitó sailé, tuáñra kí Muúsar kitab ot zezé niki zoler de záddwar zikír asé hére nó foró, Alla ye Muúsa re endilla hoiyé de, ‘Añí óilam de Ibrahim or Alla, Isahák or Alla, edde Yakub or Alla?’ **27** Alla toh mora ókkol or Alla no, bólke zinda ókkol or éna. Tuáñra ttu dōóñr gollot óiye.” **28** Ekzon alem aái ítara barábari dér de fúinne, aar Isá ye ítara re tík zuwab diyé de zani íba re súwal gorér de, “Beggún or túaro hókum hon nán dōóñr?” **29** Isá ye zuwab der de, “Ebbe dōóñr gán óilde, ‘Fúno, ó Isráil! Mabud añárar Alla óilde ekgwá Mabud. **30** Mabud tuáñrar Alla re nizor fura dile, fura zane, fura demake, edde fura bole muhábbot goríba.’ **31** Dui nombór or gán óilde, ‘Nizor atehańsór maincóre nizor dōilla muhábbot goríba.’ Hé duníyan or túaro ar dōóñr hókum

nái.” **32** Alem mwa ye ĩba re hoór de, “Cabác, Ustat! Tuńí sóiyi hoiyó, Alla ekgwá beh asé, ĩba bade ar honókiye náí. **33** ĩba re fura dile, fura buddiye, fura bole muhábbot goittó, aar nizor atehańsór maincóre nizor dóilla muhábbot goittó. Hókum hé duníyan, fura kurbani edde oinno kurbani beggún or túaro zoruri.” **34** Isá ye zettót yóggwa ye buddír sáante zuwab diyé de deikké, ĩba ye yóggwa re hoór de, “Tuńí Allar raijjo ttu duré no.” Héńtte lóti honókiyo ttu ĩba re ar súwal goittó hímmote nó deh. **35** Isá ye baitul-mukaddos ot taalim der de októť hoór de, “Alem ókkole keéngori hoó de Mosih Dawud or Fua? **36** Kiyólla-hoilé Dawud nize toh Pak-Ruhr hédaiyote endilla hoiyé, ‘Mabude añr Malik ore hoór de, “Añr den ďák ottu boiyó, zetókkal foijjonto Ańí Tuáńr duccon ókkol ore Tuáńr foor tole gorí nó felai.”’ **37** Dawud nize toh ĩba re ‘Malik’ ďaikké, tóoile ĩba hon bote Dawud or fua de?” Becábicí maincé kúcir sáante ĩbar boiyan fúnat accíl. **38** Isá ye Nizor taalim ot hoór de, “Alem ókkol ottu úńciyar táikko, zetará lamba-lamba kuruta fińdí gúrafira goittó saá, aar bazare-bazare sólam faito, **39** mujilíc-hána ókkol ot uńsol tokkar hadírat boitó edde mela-cóba ókkol ot barík zagat boitó fosón goré. **40** Ek mikká ttu ĩtara rari ókkol or gór ókkol luť gorífele, arek mikká ttu maincóre dahái bolla lamba-lamba dua goré. Manúc híne sáńza bicí ďoóńr faibo.” **41** Baade Isá baitul-mukaddos or dan-baccút muúntu boicé, aar dan-baccút maincé ĩań-foicá hondilla deer saái táikke. Boóut tuangor ókkole bicí-bicí diiyat accíl. **42** Eggwá gorif rari aái duiyán cóńro foicá diiyé, yáni hoek fiyá. **43** Hétunot ĩba ye Nizor cárít tun ore matai hoór de, “Ańí tuáńra re sóiyi hoóir, zedúne dan-baccút sótká diiyé ĩtara beggún or túaro e gorif rari wa ye bicí diiyé; **44** kiyólla-hoilé oinno beggúne ĩtarar aťalikka dón ottu diiyé deh, montor ibáh ye toh nizor gorif hálót ot basi táki bolla ziń accíl híń beggún diifélaiye.”

13 Isá baitul-mukaddos ottu baáre zaargói de októť, ĩbar ézzon cáríte hoór de, “Ustat, soó, keén cúndor-cúndor fattór edde keén cúndor-cúndor billíńg!” **2** Isá ye ĩba re hoór de, “Tui e ďoóńr-ďoóńr billíńg iń dekor de né? Eré eggwá fattór or uore ar eggwá fattór no tákibo, híń fottí ekgwá re félaidiya zaybo.” **3** Aar Isá baitul-mukaddos or muúm or Zaitun Faár ot

boirá accíl de októť, Fitor, Yakub, Yohánna edde Enderiyase aiddone ĩba ttu fusár gorér de, **4** “Ańára re hoóna, híń hońtté óibo dé? Híń beggún fura óibar októ aiccé de híyan or alamot kii óibo?” **5** Isá ye ĩtara re zuwabe howát doijje de, “Saiyó, honókiye zen tuáńra re gollot ot no loiza. **6** Boóut zone Ańr name aái hoibó de, ‘Ańí ĩba,’ ĩtara boóut zon ore gollot ot loizaybói. **7** Zeńtté tuáńra laráir abas edde laráir hóborahóbori ókkol fúniba, no ďooraiyó; kiyólla-hoilé híń ówar zorur, montor híyala yó ahérot óibo de no. **8** Ek koume arek koum or ulďa edde ek raijjo ye arek raijor ulďa tíyaibo; zaga-zaga búsal ókkol edde rať ókkol óibo. Montor híń óilde siríf, fua hálas óibar cúrur duk ókkol or dóilla. **9** “Lekin tuáńra úńciyar táikko; kiyólla-hoilé maincé tuáńra re adalot ot gosáidibo, aar tuáńra re mujilíc-hánat bet mara zaybo. Ańr ĩla bóuli tuáńra re hákim edde baáńcca ókkol or muúntu házir gorá zaybo, zeéne tuáńra ĩtarar hańse Ańr gobá dí faro. **10** Age tamám koum ókkol or hańse Allar kúchóbor tobolik gorá zar zorur. **11** Zeńtté maincé tuáńra re dóri bisar ot tulíbo, héńtte kii hoibá age lóti sinta no goijjó, bólke hé októť tuáńra re ziń diiya zaybo híń hoiyó; kiyólla-hoilé hoóiya toh tuáńra no, bólke Pak-Ruh éna. **12** “Bái ye báí ore aar bafe fua re marifélai bolla dóridibo. Fuain de nizor bafmaar hélaf tíyai ĩtara re mariféla báibo. **13** Ańr nam olla bóuli tuáńra re beggúne nafórot goribo; montor zee niki ahéri foijjonto bordac goribo, yóggwa ye nejat faibo. **14** “Tuáńra hé bicí hótará jiníc ziyáne nafak goréhiyan ore no tákon accíl de zagat zeńtté tíyaiya dekába—foróya ye buzó—héńtte zetará Yohúdiyat tákiba ĩtara ttu faár ot dáizagoi foribó. **15** Zee niki gór or sád or uore asé, ĩtar ttu amat no lama foribó, nizor gór ttu kessú looi bolla bútoe no zaa foribó. **16** Zee niki kítit asé, ĩtar ttu nizor saddor looi bolla waafes nu aá foribó. **17** Montor hé din ókkol ot hámil mayafuain dor ĩla edde dud or maa ókkol olla bicí afsús or hálót óibo. **18** Dua goró, zeéne híń cítkhale no. **19** Kiyólla-hoilé din híń eén mosibot or din óibo, zendilla Alla ye duniyai foida goijje de héńtte lóti aijjó óiye de náí, aar abar no yó óibo. **20** “Zodi Mabude hé din ókkol homai no dito, tóoile honókiye no basitó; montor ĩbar basíloiya bonda ókkol olla bouli ĩba ye din híń homaidiyé. **21** Héńtte zodi honókiye tuáńra re eén hoó, ‘Soó, Mosih eré asé!’ yáto ‘Soó, ĩba uré asé!’ híyan ekin no goijjó.

22 Kiyólla-hoilé misá Mosih ókkol edde misá nobi ókkol ur̄fbo, aar ítara keramot ókkol edde taajuippa harhána ókkol daháibo, maincóre gollot ot loizai bolla, farilé Allar basfloiya bonda re úddwa. 23 Lekin tuáñra uñciyar táikko; Añi toh tuáñra re hárr kessú age lóti hoóidiyi. 24 “Montor din híin ot, hé mosibot baade, beil andár óizayboi, aar sane foór no dibo; 25 asman ottu tara ókkol forizaybói, aar asmani jiníc ókkol tóttoraibo. 26 “Héñtte ítara dekiibo de, Manúc or Fua doónr kudurut edde mohímar sáañte miyúlár bútoze góri aiyér. 27 Aar íba ye fírista ókkol ore duniyair ek matá ttu arek matá fíjjjonto diferái, sairómikka ttu Nizor basfloiya bonda ókkol ore ekkán ot zoma goríbo. 28 “Duñir-gas ottu meésal loo: zeñtté duñir-gas or déeila hórot ói fata neele, tuáñra zanizogói de, hóran dáke. 29 Héndilla tuáñra yó, zeñtté iín ór de dekiiba, héñtte buzíba de, Manúc or Fua dáke, ebbe dorozat. 30 Añi tuáñra re sóiyi hoóir, iín beggún fura nó óiyo fíjjjonto e nosól bilkúl no fúraibo. 31 Asman zobin toh zari no tákibo, montor Añr hotá hámica zari tákibo. 32 “Lekin hé din yáto októ aibár baabute honókiye no zane, asman or fírista ókkole yó no zane, aar Fua ye yó no zane, siríf Bafe beh zane. 33 Hóboroddar, seton táko edde dua goró; kiyólla-hoilé tuáñra toh no zano hé októ hoñtté aibó. 34 Hé októ yíba ezzon duré sofór ot zaar de manúc or dóilla, zee niki nizor gór eri zaite goóur ókkol or át ot zimma ókkol dii giyyé, yáni zar-zar ham taré-taré diyyé, aar duwar soonidar ore yó seton tákito hókum díye. 35 “Hétolla hoóir, seton táko, kiyólla-hoilé tuáñra toh no zano, gór or girós hotúnót aibó—ki háñzinna, ki adá raitta, ki fuáñitta, aar náki biínna. 36 Arnóile yóggwa asimbit ailé tuáñra re gúm ot loot faibo. 37 Añi tuáñra re ziyán hoóir, híyan beggún ore hoóir de, ‘Seton táko!’”

14 Azadir-id edde Cútar-sára Ruñir-id aité dui din asé. Aar doónr imam ókkole edde alem ókkole Isá re kii bote zuitégóri dórifelai marifélai faribó de híyan or talac ot accíl. 2 Montor ítara hoór de, “Id or októ no, manúc or bútoze úrussul óitofare.” 3 Isá Betániyat kurus biyaraimma Sáimon or gór ot tákite, íba ye hána háar de héñtte, hére eggwá mayafua ye fúañti fattór or háñrit góri háti narđ-gas or bicí moóngga añtor looi aiccé. Baade híba ye háñri wa báñgi añtor gún Isár matát dálidiye. 4

Montor hodún ottu gom no lagi afós ot howáhoi gorér de, “E añtor gún kiyá borbada difélaiye? 5 E añtor gún de tin cót dinár or túaro bicí dí besi tiañ gún goríf ókkol ore diífélai faitto.” Héndilla hoói ítara híba re bóťboráiyé. 6 Montor Isá ye hoór de, “Íbáh re goittó doh; tuáñra íbáh re ferecan kiyá gorór? Íbáh ye Añr bálai éna goijjé. 7 Gorib ókkol toh tuáñrar fúañti nitti asé, tuáñra ttu zetúnót monehoó hétunót ítarar bálai gorí faribá; montor Añré tuáñra nitti no faiba. 8 Íbáh ye ziyán faijjé híyan éna goijjé. Íbáh ye Añr dohón olla Añr gaat age lóti añtor dálidiye deh. 9 Hétolla Añi tuáñra re sóiyi hoóir, fura duniyair zeré-zeré kúchóbor tobolik gorá zaybo, e mayafua wa ye ziyán goijjé híyan ore yó íbáhr yadgari ísafe hére-hére howá zaybo.” 10 Baade Yohúdah Iskáriyet, zee accíl baró zon cárit tun ottu ezzon, íte doónr imam ókkol or hañse giyyé, Isá re ítarar át ot dórídi fare fán. 11 Híyan fúni ítara kúci óiye, aar ítare tiañ diibo bouli waada diyé. Tarfore íte Isá re dórídi bolla moukar talac ot accíl. 12 Cútar-sára Ruñir-id or foóila din ot, ze din Azadir-id or hána lla bérasóol or sóo kurbani goré, Isár cárit tune íba ttu fusár gorér de, “Tuáñr ttu hondilla monehoór, Tuñí hái faro fán añára horé zai Tuáñr lla Azadir-id or hánar toiyari goittám?” 13 Íba ye Nizor dui zon cárit ore endilla hoói diferáiyé, “Tuáñra cóor ot zoo; zok ot gori faní loizar de ézzon manúce tuáñra llói milibó; íbar fisé-fisé zaiyo. 14 Íba ze gór ot góle hé gór gan or girós ore hoibá de, ‘Ustate hoór de, “Añr meéman-hána horé, ziyán ot Añi Añr cárit tun or fúañti Azadir-id or hána hái faijjum?” 15 Hétunót yóggwa ye tuáñra re háñzaiya edde toiyar goijjé ekkán uoror țalar doónr kamára daháibo. Hére añára lla toiyar goijjó.” 16 Tói cárit tun zai cóor ot goille, aar Isá ye ítara re zendilla hoiyé héndilla faiyé; baade ítara Azadir-id or hána toiyar goijjé. 17 Zeñtté háñz óiye, Isá baró zon cárit tun ore fúañti looi hére aiccé. 18 Ítara boói hána háar de októ, Isá ye hoór de, “Añi tuáñra re sóiyi hoóir, tuáñra ttu ezzone Añré dórídibo; íte Añr fúañti hána háar.” 19 Hétunót ítara ferecan ói zonfoti íba ttu fusár gorér de, “Íte añi no de no né?” 20 Íba ye ítara re zuwabe hoór de, “Íte baró zon nun ottu ezzon, íte Añr fúañti hoddát ruñi burar. 21 Manúc or Fua toh Íbar baabute zendilla leikká asé héndilla éna zaar; montor afsús manúc uitar uore, zar duara Manúc or Fua dóra háibo. Manúc íte toh zormo no óito

bóuli ítar ulla gom accíl.” 22 Ítara háar de októ, Isá ye ruṭi looi Alla re cúkuriya goijjíl, aar báñgi cárit tun ore dii hoór de, “Loo, yían Añr gaa.” 23 Tarfore Íba ye fiyala looi Alla re cúkuriya gorí ítara re diiyé, baade ítara beggúne héntu háíye. 24 Íba ye ítara re hoór de, “Ín óilde noya razinama ulla Añr lou, zín ore boóut kiyór ulla dálidiyum. 25 Añi tuáñra re sóiyi hoóir, Añi e anggur or roc ín abar na háiyum, otódin zetódin foijjonto tuáñrar fúañti Allar raijot noya gori ná hái.” 26 Yárbaade ítara eggwá seér gaái, Zaitun Faár ot giyyé. 27 Tarfore Isá ye ítara re hoór de, “Tuáñra beggún or dil ot cóok aibó aar dáibagoi, kiyólla-hoile pak-kalam ot toh endilla asé, ‘Añi sóol soroya re marifélayum, tói sóol ókkol cínraciñttá óizayboi.’ 28 Montor Añré zinda gorá zay baade, Añi tuáñrar age Galil ot zaiyum.” 29 Fitore Íba re hoór de, “Beggúne iman ottu zailé yo, añi no zaiyum.” 30 Isá ye íba re hoór de, “Añi toré sóiyi hoóir, aijja raitta ratakurá duibar bak dibar age, tui nize Añré tin bar inkar gorfbi.” 31 Lekin Fitore aró zure hoór de, “Zodi añr ttu Tuáñr fúañti mora fore yó, añi Tuáñre inkar no goijjúm.” Héndilla ítara beggúne hoíyé. 32 Yárbaade ítara ekkán zagat aiccé, ziyán ore Getsámani hoó. Isá ye Nizor cárit tun ore hoór de, “Añi zetún dua goijjúm hétun inñyót boói táko.” 33 Íba ye fúañti Fitor ore, Yakub ore edde Yohánna re loigiyé, aar hépe íba ttu ocánti edde bicí ferecani lagat doijje. 34 Íba ye ítara re hoór de, “Bicí ocántiye Añr foran neelizaytói sár. Tuáñra inñyót táki seton táko.” 35 Baade Íba héntu ekkágori muúmmikka zai, meřit fori dua gorát doijje de, zodi farilé hé dukkór októ re íba ttu dur gorífelaito. 36 Íba ye hoór de, “Ó Abba, ó Baf, Tuñí hárr kessú gorí faro. E duk-mosibot or fiyala yibá Añr ttu dur gorífelo; montor toóu Añr moncá mozin no, bólke Tuáñr moncá mozin óuk.” 37 Baade Íba aái ítara re gúm ot loot faiyé, aar Fitor ore hoór de, “Sáimon, tui gúm ot níki? Tui ek gónḁa úddwa seton táki no faróór dé? 38 Seton táko aar dua goró, zeéne entán ot no foro; Bécok ruh ttu monehoór, montor jisím komzur deh.” 39 Íba abar zai ekí dóilla hotá hoói dua goijjé. 40 Íba waafes aái, ítara re abar gúm ot loot faiyé, kiyólla-hoile ítarar suk gúme bór óigilgoi; aar ítara íba re kii zuwab dibo hoi no fare. 41 Íba tisárabar aái yore ítara re hoór de, “Tuáñra aijjó úddwa gúm ot edde aram gorát asó de? Óiye, októ foóniccegai. Soó, Manúc or Fua re gunágar ókkol or át ot dóridiya zaybo. 42 Uró, zaigói. Soó, Añré dóridoya dáke foóniccegai.” 43 Íba ye híin hoór de októ, éhon Yohúdah foóniccegai, zee niki baró zon nún ottu ezzon. Ítar fúañti ek dol manúc toluwar edde larí-cúra looi aiccé, zetará re diferáíye de óilde doóñr imam ókkole, alem ókkole, edde murubbi ókkole. 44 Zee niki íba re dórider, íte tará re endilla hoói ekkán nicán díil, “Añi zibá re appá diyum, manúc íba. Íba re gereftar gorífelaiyo aar soikkal di loizaiyogói.” 45 Yohúdah aái mottor íbar inñyot giyyé, aar “Rabbí!” hoói íba re appá díye. 46 Baade éhon tará íba re dóri gereftar gorífelaiye. 47 Montor dáke tíyai accíl de ítara ttu ezzone nizor toluwar neelaiye, aar híyan solai boro imam or gulam or han harífelaiye. 48 Isá ye tará re hoór de, “Tuáñra ḁahañit dóitto aiccó fángori toluwar edde larí-cúra lói Añré dóitto aiccó de? 49 Añi toh fottí din baitul-mukaddos ot tuáñrar fúañti táki taalim ditam, aar héntte de Añré gereftar nó goró. Montor ín etollá óiye, zeéne pak-kalam or hotá fura óizagoi.” 50 Hétunot cárit beggúne íba re eri dáigiyoi. 51 Ezzon juwan manúc íbar fisé-fisé zaat accíl, yóggwa ye nizor biyossor gaat kessú nó fiñdé, ekkán saddor beraiyé deh. Tará yóggwa re dóitto saiye, 52 montor yóggwa ye saddor gán félai biyossor duñrdiyé. 53 Tarfore tará Isá re boro imam or hañse loigiyói, aar tamám ḁoóñr imam, murubbi edde alem ókkol zoma óiye. 54 Fitor duré-duré táí íbar fisé-fisé boro imam or uráñ or búture foijjonto giyyé, aar faáradar ókkol or fúañti boói ooin fuwát accíl. 55 Doóñr imam ókkole edde fótuayi-mujilíc tíya ye Isár ulḁa gobár talac ot accíl, íba re marifélai fare fán; montor honó gobá nó faa. 56 Becók boóut zone íbar ulḁa misá gobá díyl, montor ítarar gobá mil ná há. 57 Fore hodúne urí íbar baabute endilla misá gobá díye, 58 “Añara íbá ye eén hoíyé de fúinni, ‘Añi át or banaíya baitul-mukaddos yían báñgífelai, tin din or búture ar ekkán banaidiyum, ziyán át or banaíya no oibo.’” 59 Lekin ebar óu ítarar gobá mil ná há. 60 Hétunot boro imame urí muúntu tíyai Isá ttu fusár gorér de, “Tuñí honó zuwab no diba? Manúc itará Tuáñr ulḁa ín kii gobá der?” 61 Montor íba nizám mári táikkil, aar honó zuwab nó deh. Boro imame abar fusár gorér de, “Tuñí kí Taarifdár Allar Fua Mosih?” 62 Isá ye hoór de, “Ói Añi. Tuáñra deklba, Manúc or Fua Alla Tálar den ḁák ottu boirá asé edde asman or miyúlat

góri aiyér.” 63 Boro imame nizar gair or hoor fári hoór de, “Añára ttu ar kii gobá lager dé? 64 Tuáñra toh íbár kuféri fúinno; tuáñrar rai kii?” Ítara beggúne íba moot or laayek bouli fótua díye. 65 Tarfore hodúne íba re sép marat doiije, aar íba re suk bandi gúca mari hoór de, “Hone maijjé antas gor sái!” Baade faáradar ókkole íba re loizai suwar maijjíl. 66 Fitor nise urán ot accíl de októ, boro imam or bañdi mayafuain ókkol ottu ezzon hére aiccé. 67 Aar Fitor ooin fuwár de deki, íbar uzu saái hoór de, “Tuñí yó toh Nasári Isár fúañti accíla.” 68 Montor íba ye endilla hoói inkar gorídiye, “Tuñí kiyór baabute hoór añi no zani aar no yó buzír.” Baade íba baáre baanđat giiyégoi. Hétunot ratakurá bak diyé. 69 Bañdi mayafua wa ye íba re abar deikké rár, ďake tíyai asé de ítara re hoór de, “Íbá tarár bútotu ekzon!” 70 Montor íba ye abar inkar gorídiye. Hotún baade ďake tíyai asé de ítara Fitor ore abar hoór de, “Sóiyi tuñí tarár bútotu ekzon, kiyólla-hoilé tuñí yó Galil or manúc.” 71 Montor íba ye hosóm hái hoór de, “Añr uore laánot óuk zodi añi misá hotá hoóir de óile. Tuáñra ze manúc cwar hotá hoór añi íba re no siní.” 72 Baade éhon-éhon ratakurá dusárabar bak diyé. Hétunot Fitor ottu hotá waán monot uitté ziyán Isá ye íba re hoóil, ki hoilé, “Ratakurá duibar bak dibar age tui Añré tin bar inkar goríbi.” Baade íba ye híyan monot gorí hañdat doiije.

15 Biínna kúb sóore, ďoóñr imam ókkole murubbi ókkol, alem ókkol edde fótuayi-mujilíc tíya lói sólla-mocuwara goijjé; baade ítara Isá re bañdi loizai Filat ore gosáidiye. 2 Filate Isá ttu fusár gorér de, “Tuñí Yohúdi ókkol or Baáñcca níki?” Íba ye yóggwa re zuwabe hoór de, “Ói, tuñí hoór de héndilla.” 3 Ğoóñr imam múne íbar uore boóut dóilla elzam ókkol lagat accíl. 4 Filate íba ttu abar fusár gorér de, “Tuñí honó zuwab nó diba? Soó, itará Tuáñr uore hodún elzam lagar.” 5 Montor Isá ye toóu ar honó zuwab nó deh, híyane Filat taajup ógiyoi. 6 Azadir-id or októ manúc ókkole ze hodi re hálas gorídito aros goré, Filate hé hodi re hálas gorídito. 7 Hé októ Bábabba nam or ezzon manúc ítar sáañti bagi ókkol or fúañti ziyól ot accíl, zetará bagiayi gorér de októ manúc kún goijjíl. 8 Manúc or dol aái Filat ore aros gorát doiije de, nizar niyom mozin ítara lla goittó. 9 Filate ítara re zuwabe hoór de, “Tuáñra ttu

yián monehoór ne, añi tuáñrar hañse Yohúdir Baáñcca wa re hálas gorídi de híyan?” 10 Kiyólla-hoilé yóggwa ye zainto de, ďoóñr imam ókkole Isá re yóggwar hañse hásorot góri gosáidiye deh. 11 Montor ďoóñr imam ókkole manúc or dol ore uskaidiyé, zeéne Filate Isár bodol Bábabba re hálas goríde. 12 Filate abar ítara re zuwabe hoór de, “Tóoile, zibá re tuáñra Yohúdir Baáñcca hoó íba re añi kii goittám?” 13 Ítara abar guzori hoór de, “Íba re kúruc ot dífelo!” 14 Montor Filate ítara re hoór de, “Kiyá, íba ye kii bura goijjé dé?” Toóu ítara aro guzori-guzori hoór de, “Íba re kúruc ot dífelo!” 15 Filate manúc or dol ore kúci gorár eradaye Bábabba re ítarar hañse hálas gorídiye; aar Isá re coóñk marabai baade, kúruc ot dí bolla gosái dífelaiye. 16 Baade fóous ókkole Isá re Praitoriyum hoó de razmohól or bútoire loigiyé, aar teérang tíya re ďaki zoma goijjé. 17 Ítara íba re bayoinna rong or eggwá zubba fiñdáidiye, aar keñrar eggwá tas banai íbar matát diyaidiyé. 18 Baade ítara íba re endilla sólám gorát doiije, “Héy Yohúdi ókkol or Baáñcca, Toré sólám!” 19 Ítara eggwá larí lói íbar matá sai marat accíl edde íba re sép maijjíl, aar añrú félai íba re sóida goijjíl. 20 Ítara íba re técerai baade, íba ttu bayoinna rong or zubba wa kúlifelai íbar hoor íba re fiñdáidiye; tarfore íba re kúruc ot dí bolla baáre loigiyói. 21 Kureni cóor or Sáimon nam or ezzon manúc gang zaga ttu aiyér de októ éde foñt báy zaar. Yóggwa accíl Alexzendar edde Rufus or baf. Isár kúruc can boói loizai bolla fóous suné yóggwa re mojbur goijjé. 22 Fore ítara íba re Golgota zagat ainné, ziyán or torjuma óilde Matár Malar Zaga. 23 Hépe ítara íba re mur hoó de híin miyáiya anggur or roc diyé, montor íba ye híin ná háa. 24 Baade ítara íba re kúruc ot dífelaiye, aar íbar hoorsuor ítarar bútoire bák goijjé; har bák ot kii fore sai bolla ítara loťári maijjíl. 25 Héñtte biínna now wa beh baijjíl, zeñtté ítara íba re kúruc ot díyl. 26 Íbar ze hosúri sáainbút maridiye híyan óilde, “Yohúdi ókkol or baáñcca.” 27 Íbar fúañti ítara dui zon ďahañit ore yó kúruc ot díyl, ezzon ore íbar den ďák ottu edde ar ezzon ore íbar ban ďák ottu. 28 Híyane pak-kalam or yián fura óiye, “Íba re hosúrbon ókkol or fúañti gona giyéh.” 29 Zetará hé foñt báy zaar, ítara matá lari-lari íba re técerai hoór de, “Há! Tui toh baitul-mukaddos bāñgi tin đin or bútoire abar banaidoya, 30 yala Tui kúruc ottu lami Nizoré Nize basa sái!” 31

Héndilla góri ðoóñr imam ókkole edde alem ókkole yó táttai gori hoór de, “Íbá ye toh oinno zon ore basaitó, montor Nizoré Nize de basai no farer! 32 E Mosih, Isráil or Baáñicca yala kúruc ottu lami aiyóuk, zeéne añára deki iman aní fari.” Zetará re íbar fúañti kúruc ot díya gíyeh, ítara yó íba re beizzoti goijjé. 33 Baade zeñtté duúñijja baró wa baijje, héñtte lóti tin nwá báze fán guñra mulluk andár ói accíl. 34 Tin nwá baijje de óktót Isá ye eggwá ðoóñr abase guzori hoór de, “Elói, Elói, lámá sabakhṭáni?” ziyán or torjuma ðilde, “Ó Añr Alla, ó Añr Alla, Tuñí Añré kiyólla sáridiyo?” 35 Ðáke tíyai accíl de ítara hodúne híyan fúni hoór de, “Soó, Íbá ye Eliyas ore ðaker!” 36 Hétunot ekzone duñri zai sírkat ekkán esfónj buraiye, baade ekkán súañr matát bazáidi Isá re hái bolla diiyé, aar hoór de, “Tíyo, Íbá re Eliyase basaitó aiyé né saái.” 37 Baade Isá ye eggwá ðoóñr guzoran mari entehal óigiyoi. 38 Hétunot baitul-mukaddos or foroda gán uottú lóti nise foijjonto fári dui bák óigiyoi. 39 Ze Romi cáap Isár muúntu tíyai accíl, yóggwa ye Isá hondilla gori entehal óigiyoi de deki hoór de, “Sóiyi e Manúc cwa Allar Fua accíl!” 40 Hére hodún beriyáin óu dur ottu góri saái táikke de accíl. Ítarar bútoze Moriyam Makdálíni, cóñro Yakub or edde Yosés or maa Moriyam, edde Salómi yó accíl; 41 zetará yó Isá Galil ot táite íbar fisá dori íba re hédmot goijjíl. Hére aró boót beriyáin óu accíl zetará íbar fúañti uore Jerúsalem ot aiccé. 42 Hé din accíl entezam-or-din, yáni ebaadot-or-din or agor din. Hé din hánzinna óiye rár, 43 Aramátíya cóor or Yusúf, zibá fótuayi-mujilíc or ézzon namdár manúc aar Allar raijjo lla entezar gorí accíl, yóggwa ye hímmot góri Filat or hañse zai Isár lac cwa maiggé. 44 Isá morigiyói de híyane Filat taajup óigiyoi. Yóggwa ye cáap pwá re matai Isá morigiyói de ói né fusár goijjíl. 45 Yóggwa ye cáap pwá ttu fakkagori baade, Yusúf ore lac cwa diifélaiye. 46 Yusúfe ekkán hohón or hoor kinné, aar lac cwa lamai hoor gán berái yore, cíl kúñdi banaiyé de eggwá hobor or bútoze raikké. Baade hobor gwar muk ot ekkán cíl ouzaydiyé. 47 Isár lac cwa horé rakér de híyan Moriyam Makdálíni ye edde Yosés or maa Moriyame saái táikkil.

16 Ebaadot-or-din fúraigiyoi rár, Moriyam Makdálíni ye, Yakub or maa Moriyame, edde Salómi ye kúcbo mosólla ókkol kinné,

zeéne ítara aái Isár lac ot dii fare. 2 Ítara háftar foóila din biínna kúb sóore beil urér de óktót, hobor ot aiccé. 3 Ítara ezzon ore ezzone hoór de, “Añára lla hobor or muk ottu cíl lan hone laribó?” 4 Montor ítara uormikká saiyé rár dekér de, cíl lan larifelaiya. Híyan bicí ðoóñr accíl. 5 Ítara hobor or bútoze góille rár, dóla hoor findá ek juwan manúc den ðák ottu boirá deikké, híyane ítara bicí ðooraiigiyói. 6 Montor yóggwa ye ítara re hoór de, “No ðooraiyó; tuáñra Isá Nasári re tuwoór deh, zibá re kúruc ot dí mariféla gíyl. Íba zinda óigiyoi; íba eré náí. Íba re raikkíl de zaga gán soó. 7 Yala zoo, íbar cárit tun ore edde Fitor ore hoógoi de, ‘Íba tuáñrar age Galil ot zaar. Tuáñra íba re hére deki íba, zendilla íba ye tuáñra re hoóil.’” 8 Ítara hafi-hafi edde ammuke hobor ottu neeli duñrdiyé. Ítara honókiyo re kessú nó hoó, kiyólla-hoile ítara ttu kúb ðoor láigge. 9 (note: The most reliable and earliest manuscripts do not include Mark 16:9-20.) Háftar foóila din biínna sóore Isá mora ttu zinda óizaygoi baade, age Moriyam Makdálíni re dahádiye, zibár bútotu íba ye háñt twa bút neeláil. 10 Híba ye zai, Isár fúañti accíl de ítara re hóbor díye, héñtte ítara ferecani zahér gorát edde hañdahari gorát accíl. 11 Isá zinda de edde Moriyame íba re deikké de fúni ítara biccác nó goré. 12 Yárbaade Isá ye arek ðoilla súrote ítara ttu dui zon ore dahádiye, zeñtté tará áñri-áñri farar híkka zaat accíl. 13 Tará zai badbaki gún ore hóbor díye, montor ítara tará re yó biccác nó goré. 14 Fore Isá ye egaro zon cárit tun ore dahádiye, héñtte ítara hána háat accíl. Íba ye ítara re ítarar nabiccác edde dil dorór zoriya jéjjeraiye, kiyólla-hoile íba zinda óizaygoi baade zetará íba re deikkíl tará re ítara biccác nó goré. 15 Íba ye ítara re hoór de, “Tuáñra fura duniyait zoo, zai manúc beggún or hañse kúchóbor tobolik gorógoi. 16 Zee niki iman aní bápṭisma loh, yóggwa ye nejat faibo; montor zee niki iman nu ané, yóggwa hosúrbon tóoribo. 17 Zetará iman ainné, ítara re e keramot iín goríbar toóufik diiya zaybo: Añr name ítara bút ókkol dáfaibo; gabi zubane hotá hoibó; 18 ítara nizor áte háf ókkol tulí dóribo; zodi ítara moot goré de kessú háifele, ítarar honó háni no óibo; aar ítara biyaraimmar gaat át dilé, tará gom óizayboi.” 19 Malik Isá ttu ítara re híin beggún hoiyá ói baade, íba re asman ot tulífela gíyeh, aar Allar den ðák ottu boói táikke. 20 Baade ítara neeli zai hárr zagat

tobolik goijjé. Malike ítara re lói ham gorí íbar
kalam sóiyi de híyan ítara re diiya giyéh de
keramot or duara sábut gorát accíl.

Lukás

1 Zettót boóut zone ziín-ziín añárar dormiyan ot óiye híin or baabute lekí bolla meénnot gorát doiije, **2** zendilla uitará añára re zanaiyé zetará foóila cúru ttu lóti nizor suké deikké edde kalam or háadem accíl. **3** Hétolla, ó izzotdár Tiyofílas, añi yó híin beggún ore cúru ttu lóti cúndorgori tahákit gorí baade tuáñr hañse híin ekkán-ekkán góri lekón gom óibo de báippi, **4** zeéne tuñi ze hotá gún or taalim faiyó, híin furafuri sóiyi de zano. **5** Yohúdiya elakar baáñcca Hérud or hale, Abíya dol or imam ókkol or bútoze Zakaríyah nam or ézzon imam accíl. Yóggwar bou óilde Aron or nosól or mayafua, híbar nam Elízabet. **6** Ítara duní zon Allar nozor ot forhésgar accíl, zetará Mabud or tamám hókum ókkol edde niyom ókkol mozin behosúr góri soilto. **7** Lekin ítara ttu fuain nu accíl, kiyólla-hoilé Elízabet báz accíl, aar ítara duní zon bicí burá óigilgoi. **8** Ek din zeñtté Zakaríyah ye nizor dol or háin mozin Allar muúntu imami ham goittó aiccé, **9** imami ham or niyom mozin lojárí mari yóggwa re basílowa gíyeh, Mabud or baitul-mukaddos ot góli agórbatti zolai bolla. **10** Héñtte agórbatti zolaibár októ baáre bicí manúc ókkol dua gorát accíl. **11** Hétunot Mabud or ek fírista agórbattir-gáñr den dák ottu tíyai yóggwa re dahádiye. **12** Íba re deki Zakaríyah songki uittífl, edde bicí ñooraiyó. **13** Montor fírista wa ye yóggwa re hoór de, “Ó Zakaríyah, no ñooraiyó; Alla ye tuáñr dua fuínne. Tuáñr bou Elízabet ottu eggwá morotfua óibo, aar tuñi íbar nam Yaháya rakíba. **14** Tuáñr ttu kúcir uore kúci tákibo, aar íbar zormoye boóut manúc ókkol kúci óibo. **15** Kiyólla-hoilé íba Mabud or nozor ot muhán óibo; íba ye no anggur or roc or córab háibo aar no nicá háibo, íba maar ferot tákite lóti Pak-Ruh lói furaiya óibo. **16** Aar íba ye boóut Boni Isráil ókkol ore Mabud ítarar Allar hañse fírai aníbo. **17** Íba ye Eliyas or ruh edde taakote Malik or age-age zaibo; zai baf ókkol or dil fuain dor híkka aar nafórman ókkol ore forhésgar or demak or híkka fíraibo; héndilla gorí Mabud olla nal goijjá eggwá koun toiyar goríbo.” **18** Zakaríyah ye fírista wa re hoór de, “Añi híyan kéngori ekin goittám? Añi de ézzon burá manúc, aar añr bou ottu yó bicí boc óigiyoi.” **19** Fírista wa ye yóggwa re zuwabe hoór de, “Añi óilam de Jibrail, zibá Allar muúntu

tíyai táki; añre tuáñr llói hotá hoói bolla edde tuáñr hañse e kúcir hóbor gán foóñsai bolla diferá gíyeh deh. **20** Aar soó, zetódin foijjonto iín fura nó óiyo, hétodin tuñi buk tákiba, aar mati no faribá, kiyólla-hoilé tuñi toh añr hotá gún ekin nó goró, ziín tík októ ailé fura óibo.” **21** Héñtte manúc ókkole Zakaríyah lla entezar gorí táikkil, aar yóggwa baitul-mukaddos ottu aité deri ór bóuli ítara báfat forigiyói. **22** Zeñtté yóggwa baáre aiccé, yóggwa ye ítara llói mati nó fare. Hétunot ítara zani faijjé de, yóggwa ye baitul-mukaddos ot dorcón deikké. Yóggwa ye ítara llói icára gorí-gorí hotá howát accíl, aar buk táigilgoi. **23** Zeñtté yóggwar imami ham or din fúraigiyoi, yóggwa nizor gór ot waafes giiyégoi. **24** Fore yóggwar bou Elízabet hámil óiye, aar híba ye nizoré fañs mac foijjonto aiddone raikké, endilla hoói, **25** “Ze din ókkol ot Mabude añr córom ore maincór ttu dur gorífelai bolla añr uzu nozor diyé, héñtte íba ye añr lla yían goijjé.” **26** Sów mac soler de októ, Alla ye Jibrail fírista re Galil or Nasárat nam or ekkán cóor ot **27** eggwá kuwári mayafuar hañse diferáiyé, zibár zuragatá Dawud or nosól or Yusúf nam or ézzon manúc lói óoil. Hé kuwári mayafuar nam Moriyam. **28** Fírista wa híbar hañse aái hoór de, “Tuáñre sólám, tuñi zibár uore ñoññ rahámot óiye. Mabud tuáñr fúañti asé.” **29** Montor híyan fúni híba ebbe alabúlat forigiyói, aar yibá hondilla sólám hoi báfat doiije. **30** Fírista wa ye híba re hoór de, “Ó Moriyam, no ñooraiyó, kiyólla-hoilé tuáñr uore Allar rahámot óiye. **31** Fúno, tuñi hámil óiba, aar tuáñr ttu eggwá Morotfua óibo, tuñi íbar nam Isá rakíba. **32** Íba muhán óibo, aar íba re Alla Tálar Fua howá zaybo. Mabud Alla ye íba re íbar baf Dawud or toktó diibo. **33** Íba ye Yakub or nosól or uore abadulabad hókumot goríbo, aar íbar raijjo honódin hótóm no óibo.” (aĩñ g165) **34** Moriyame fírista wa re hoór de, “Híyan kéene óibo? Añi de aijjó kuwári.” **35** Fírista wa ye híba re zuwabe hoór de, “Pak-Ruh tuáñr uore aibó, aar Alla Tálar kudurut or sába tuáñr uore foribó, hétolla tuáñr ttu óibo de hé pak Fua re Allar Fua howá zaybo. **36** Soó, tuáñr egana Elízabet ottu yó híbar burá bocót fua ferot óiye, híba zibá re niki báz howá zayto híba ttu yala sów mac soler. **37** Kiyólla-hoilé Alla ye no fare de toh kessú náí.” **38** Tói Moriyame hoór de, “Soó, añi Mabud or bañdi; añr uore tuñi zeén hoiyó héen óuk.” Baade fírista wa híbar héntu

giyyégoi. **39** Yárbaade Moriyam nal ói toratori faári elakat Yohúdahr ekkán cóor ot giyyé, **40** aar Zakaríyahr gór ot góli Elízabet ore sólam díye. **41** Zeñtté Elizabete Moriyam or sólam fúinne, híbar feřot fua wa fálđi uitté, aar Elízabet Pak-Ruh lói furaiya óiye. **42** Tarfore híba ye ðoóñr-ðoóñr góri hoór de, “Mayafuain dor bútoře tuñi beh mubarek, aar tuñi feřor fua wa yó mubarek! **43** Aar añr uore eén rahámot kiyá óiye, zeén níki añr Malik or maa añr héře aiccé? **44** Kiyólla-hoilé fúno, añr hane tuñi sólam fúinne mottor, añr feřot fua wa kúciye fálđi uitté. **45** Ubá hotó mubarek, zee niki biccác goré de, Mabude híba re zín hoiyé hífin fura óibol!” **46** Moriyame hoór de: “Añr kollófe Mabud or taarif gorér, **47** aar Alla añr Nejatdoya re lói añr ruh kúci óiye. **48** Kiyólla-hoilé íba ye toh íbar bañdir niróc tokkar uzu nozor diyé, hétolla, soó, yala lóti añre mubarek hoibó nosól beggúne. **49** Kiyólla-hoilé zibá Taakotwala íba ye goijjé añr lla ðoóñr-ðoóñr ham, pak íbar nam. **50** Ðoora zetará íba re, íbar rahámot zari táke ítarar nosóle-nosóle. **51** Nizor ðuwañ lói íba ye ðoóñr-ðoóñr ham goijjé, aar dile-dile zetará nizoré ðoóñr báfe ítara re cñraciñttá gorífelaiye. **52** íba ye toktó ttu lamaidiyé hókumot-goróya ókkol ore, montor uoror tokkat goijjé niróc cún ore. **53** Búka ókkol ore íba ye gom jiníc lói bóraidiye; montor tuangor ókkol ore háli áte ðuñraidiyé. **54** íba ye Nizor gulam Isráil ore modot goijjé, íbar oh rahámot monot rakí yore, **55** ziyán tákibo abadulabad Ibrahim edde íbar nosól ókkol or uore, zendilla hoóil íba ye añárar bafđada ókkol ore.” (aiñ g165) **56** Moriyam tin mac hañsáhañsi Elízabet or fúañti táki baade nizor gór ot waafes aáigiyoi. **57** Zeñtté Elízabet ottu fua zormo dibar októ aiccé, híba ttu eggwá fua óiye. **58** Mabude híbar uore ðoóñr rahámot goijjé de híyan híbar atehañsór maincé edde egana-guiccí ye fúni, ítara híbar fúañti kúci goijjé. **59** Baade eén óiye, ítara añçto ðin ot ðin fua wa re ázomi goráito aiccé, aar ítara fua war nam baf or nam or ðóilla Zakaríyah rakító saáil. **60** Montor íbar maa ye hoór de, “No, itar nam raká zaybo de Yaháya.” **61** Ítara híba re hoór de, “Tuñi egana-guiccír bútoře de hé nam honókiyo ttu náí.” **62** Tarfore ítara baf ore icára gorí, fua war nam kii rakító monehoór de saáil. **63** Yóggwa ye ekkán lekíbar siz magari yore híyan ot leikké de, “Tar nam Yaháya.” Híyane ítara beggún taajup óigiyoi. **64** Aar éhon or bútoře

yóggwar muu kúligiyoi edde zir eridiya óigiyoi, baade yóggwa ye mati faijjé aar Allar taarif gorát doijsje. **65** Ítarar atehañsór manúc beggún ðooraigiyói, aar Yohúdiyar faári elakar agagurat maincé hífin or baabute howáhoi gorát doijsje. **66** Zetará hé hotá gún fúinne ítara hífin dile-dile rakí báfer de, “Tóoile e fua wa hondilla óibo?” Kiyólla-hoilé Mabud or át íbar uore accíl. **67** Baade íbar baf Zakaríyah ye Pak-Ruh lói furaiya ói agun hotá hoór de: **68** “Taarif óuk Isráil or Mabud Allar, kiyólla-hoilé íba aái azad goijjé ze bonda íbar. **69** íba ye Nizor gulam Dawud or nosól ottu añára lla taakotwala Nejatdoya tuillé, **70** zendilla íba ye boóut age lóti hoóil Nizor pak nobi ókkol or muké; (aiñ g165) **71** ki hoilé, añára re basa zaybo añárar duccon ókkol ottu edde añára re nafórot-goróya beggún or át ottu; **72** añárar bafđada ókkol or uore rahám gorí bolla edde Nizor pak razinama re yaad rakí bolla, **73** yáni sóon waán ore ziyán íba ye goijjil añárar baf Ibrahim lói, **74** añára re añárar duccon ókkol or át ottu basai honó ðoor sára íbar ebaadot gorá baitó, **75** íbar muúntu paki edde forhésgarir sáañte añárar zindigibór. **76** “Ó añr fua, toré ðaha zaybo de Alla Tálar nobi, kiyólla-hoilé tui Malik or rasta toiyar gorí bolla íbar age-age zaibi, **77** zai tui íbar bonda ókkol ore guná maf fai yore nejat faibar zankari dibi, **78** añárar Allar meérbani edde raháme uottú Beil or Foór aibó añárar hañse, **79** foór dí bolla uitará re zetará andár ot edde moot or sábat asé, edde cántir rastat loizai bolla añárar téng or fata re.” **80** Baade fua wa ðoóñr óiye edde ruht mazé mozbut óiye, aar Boni Isráil ókkol or hañse kúlamela góri dahá nó dé foijjonto íba moidan elakat táikkil.

2 Hé ðin ókkol ot eén óiye, Rom or baáñcca Agástas or torfóttu hókum zari óiye de, yóggwar fura raijor manúc beggún or seráng gorá foribó. **2** Yíba óilde foóilabar or seráng, zibá Kurinias Siíriya mulluk or hákim accíl de héñtte gorá gýl. **3** Tói manúc beggúne nam lekái bolla zar-zar cóor ot tee-tee zaat doijsil. **4** Héñdilla, Yúsuf óu Galil or cóor Nasárat ottu neeli, uore Yohúdiya elakat Dawud or cóor Betélhem hoó de híyan ot giyyé, kiyólla-hoilé Yúsuf óilde Dawud or háandan ottu edde nosól ottu. **5** Héře giyyé de, yóggwar zuijja bou Moriyam or fúañti nam lekái bolla; héñtte híba hámil accíl. **6** Ítara héře tákite, híba ttu fua

hálás óibar din furafuri aáigiyoi. 7 Tói híba ye híbar foóila-fua morotfua zormo diyé. Híba ye Fua wa re hoor berái hándail ot neṛai raikkíl, kiyólla-hoilé hére ítara lla musáfer-hánat honó zaga nu accíl. 8 Hé elakat hodún sóol-soroya accíl, zetará raitta kílat táki ítarar sóol or zák soóni gorí accíl. 9 Asimbit Mabud or ek fírista ítarar muúntu tíyaye, aar Mabud or tozollí ítarar sairókul ttu soimké. Ítara bicí hoilé bicí ḡooraiḡyói, 10 montor fírista ye ítara re hoór de, “No ḡooraiyó, kiyólla-hoilé soó, añí tuáñrar hañse kúcir hóbor ainmí, ziyáne tamám manúc ókkol ore bicí kúci goríbo. 11 Aijja Dawud or cóor ot tuáñra lla eggwá Nejatdoya zormo óiye; Íba óilde Mosih hé Malik. 12 Tuáñra Íba re e nicáne siní faribá: eggwá dud or Fua re hoor beráiya, urar hándail ot neṛaiya loot faiba.” 13 Hétunot hé fírista war fúañti asimbit ek zák asmani fóous dahádiye, zíine Allar taarif gorí-gorí hoór de, 14 “Ebbe uore asman ot Allar taarif óuk, aar zobin ot ze manúc ókkol lói Íba kúci, ítarar bútoṛe cánti óuk.” 15 Fírista gún ítarar héntu asman ot ḡiiyói rár, sóol-soroya gúne ezzon ore ezzone hoór de, “Aiyó, añára Betélhem ot zai, aar ziyán óiye bóuli Mabude añára re zanaidiyé híyan saáigoi.” 16 Baade ítara toratori aái Moriyam edde Yusúf ore deikkíl, aar Fua wa re hándail ot neṛaiya loot faiyé. 17 Zeñtté ítara Fua wa re deikké, ítara re Fua war baabute zín howá ḡýl híin agagura zanaidiyé. 18 Aar sóol-soroya gúne hoiyé de híin zedúne fúinne ítara beggún ammúk óigilgoi. 19 Montor Moriyame hotá híin beggún dil ot gañtí rakí híin báfi-báfi accíl. 20 Sóol-soroya gúne ítara re howá ḡýl de mutafek beggún fúni edde deká Allar mohíma edde taarif gorí-gorí waafes ḡiiyégoi. 21 Añçto din furaiyé rár, Fua wa re ázomi goráibar októṛ, Íbar nam Isá raká ḡíyeh, ze nam mán fírista ye Íba feṛot óibar age lóti dyíl. 22 Baade zeñtté Muúsar Córiyot mozin Yusúf edde Moriyam pak-sáf óibar din aáigiyoi, ítara Isá re Mabud or hañse peec gorí bolla uore Jerúsalem ot ainné. 23 Zendilla Mabud or Córiyot ot leikká asé de ki, “Foóila fua zodi morotfua óile, Íba re Mabud olla pak gorífela foribó.” 24 Edde kurbani di bolla oh mozin zendilla Mabud or Córiyot ot hoiyé, ki hoilé, “Ek zur hoónl yáh duwá hoitor or basa.” 25 Hé októṛ hére Jerúsalem ot Símiyon nam or ézzon manúc accíl, forhésḡar edde dindár, zibá Boni Isráil ókkol or tosóllir októṛ entezar ot accíl; aar yóggwar uore Pak-Ruh accíl. 26 Yóggwa re Pak-Ruh ye zahér ḡoiḡḡíl de, Mabud or Mosih re dekábar age yóggwar moot no óibo. 27 Pak-Ruhr hédaiyote yóggwa baitul-mukaddos ot aiccé, aar zeñtté bafmaa ye gura Fua Isá re Córiyot or niyom mozin zín gorá fore híin ḡoiṛttó bútoṛe ainné, 28 Símiyone Isá re fatáijja kul ot looi eén hoói Allar taarif ḡoiḡḡé: 29 “Ó Malik, Tuñí Tuáñr hotá mutafek Tuáñr ḡulam ore yala cántir sáañte zaito dor, 30 Kiyólla-hoilé añr suké Tuáñr nejat dekáfelaiye, 31 ziyán Tuñí tamám manúc ókkol or cáikkat toiyar ḡoiḡḡó. 32 Híyan toh Beyohúdi ókkol or hañse Tuáñr moncá zahér goríbar ekkán nur, aar híyan óilde Tuáñr koum Boni Isráil or izzot.” 33 Isár baabute zín howá ḡíyeh, híin fúni Íbar bafmaa taajup óigiyoi. 34 Baade Símiyone ítara re dua diyé, aar Íbar maa Moriyam ore hoór de, “Soó, e Fua wa re basílowa ḡíyeh de, Boni Isráil or boóut zon ore félai bolla edde tulí bolla, edde endilla ekkán nicán ói bolla ziyán or muhálef gorá zaybo, 35 zeéne boóut dil or kolfona ókkol zahér óizagoi. Héñtte tuáñrar kollóf óu ekkán súri lói gañtá zaybo.” 36 Hére Acer or háandan or Anna nam or eggwá ambiya accíl, zibá Fanuel or zérfua. Híba ttu bicí boc óigilgoi, híba biyá gorí hócom or fúañti háñt bosór beh táikkil, 37 baade lóti rarir zindigi haráité-haráité híbar boc ací-sair bosór óiye. Híba baitul-mukaddos ottu honó mikká no zaito, bóke ruza rakí edde dua gorí-gorí raite dine ebaadot gorát tákito. 38 Hétunot híba aái Allar cúkur gorát doijje, aar uitará beggún ore Fua war baabute howát doijje zetará Jerúsalem or azadir entezar ot accíl. 39 Baade zeñtté Yusúf edde Moriyame Mabud or Córiyot mutafek hárr kessú gorífelaiye, ítara Galil ot nizer cóor Nasárat ot waafes aáigiyoi. 40 Baade Fua wa ḡiyan or sáañte ḡoónr ówat edde mozbut ówat accíl; aar Allar rahámot Íbar uore accíl. 41 Isár bafmaa fottí bosór Azadir-id olla Jerúsalem ot zaito. 42 Zeñtté Íba baró bosór óiye, ítara hé niyom mozin hére id ot ḡiiyé. 43 Id fúrai baade ítara waafes aázargoi de októṛ, Fua Isá Jerúsalem ot táigiyoi; montor Íbar bafmaa ye hoi no fare. 44 Bólke Isá manúc or dol or bútoṛe asé bóuli táari ítara ek din or foñt ot ḡiiyégoi, baade ítara nizer egana-guiccí edde sinforiso maincór bútoṛe Íba re tuwat doijje. 45 Zeñtté ítara Íba re tuwai nó faa, Íba re tuwai-tuwai Jerúsalem ot waafes ḡiiyé. 46 Tin din baade ítara Íba re baitul-mukaddos ot alem

ókkol or mazé boói ítarar hotá fúner de edde ítara re súwala-súwali gorér de loot faiyé. **47** Aar zetará íbar hotá fúinne, ítara beggún íbar buzáye edde zuwabe taajup óiye. **48** Zeñtté íbar bafmaa ye íba re deikké, ítara ammúk óigiyoi. Maa ye íba re hoór de, “O Fut, Tuñí añára llói héndilla kiyá goijjó? Soósai, Tuáñr baf loi añí loi sinta gorí-gorí Tuáñre tuwat así.” **49** Isá ye ítara re hoór de, “Tuáñra Añré tuwoór kiyá? Tuáñra no zano né, Añr ttu Añr Baf or gó ot tákar zorur dé?” **50** Montor íba ye ítara re ziyán hoiyé híyan ítara nó buzé. **51** Baade íba ítarar fúañti bacá lói nise Nasárat ot waafes aiccé, aar ítarar hotá mani soillí. Aar íbar maa ye hotá híin beggún nizor dil ot gañtí raikkíl. **52** Isá giyane edde gaafiré, Allar edde manúc or muhábbote barí urát accíl.

3 Tibiriyus Káisar or hókumot fundóro bosór soler de októ, zeñtté Pontiyus Filat accíl de Yohúdiyar hákim, aar Hérud accíl de Galil or hókumot-goróya, yóggwar báí Filíp accíl de Itúriyar edde Trakonitis elakar hókumot-goróya, Laiséniyas accíl de Abilenir hókumot-goróya, **2** Boro imam accíl de Hánan edde Káiyafas, héntte Allar kalam moidan elakat Zakariyahr fua Yaháyar hañse nazil óiye. **3** Tói yóggwa Jordán hál or sairókul or elaka beggún ot zai tobolik gorér de, gunár maf fai bolla touwá gorí báp̄tisma loito. **4** Zendilla nobi Yesáyahr kitab ot leikká asé: “Moidan zagat ezzone guzori-guzori eén hoór, ‘Mabud or foñt toiyar goró, íbar rasta uzu goró. **5** Fottí gúna bóra zaybo, fottí faár edde murá fúwan gorá zaybo. Behańsúra foñt ókkol uzu gorá zaybo, **6** teélameila rasta ókkol fúwan gorá zaybo, **6** aar fura insán zati ye Allar nejat dekkó.”” **7** Hétunot yóggwa ye zetará yóggwa ttu báp̄tisma loito aiccé ítara re hoór de, “Ó háf or fuain ókkol! Aibár gozzob ottu dáizayboi lla tuáñra re hone únciyari díye? **8** Touwá lói mil há de héndilla gulagala ókkol dóro, aar nizor dil ot endilla howát no doijjo de ki, ‘Añára ttu toh baf ísafe Ibrahim asé.’ Añí tuáñra re hoóir, Alla ye sailé e cíl lun ottu yó Ibrahim olla fuain foida gorí fare. **9** Aar ehón toh gas or gurat kuróil raká gyéh. Hétolla, ze gas ot gom gula no dóre, yíba re harí ooin ot félaidiya zaybo.” **10** Manúc cúne yóggwa ttu fusár gorér de, “Tóoile añára ttu kii gorár zorur?” **11** Yóggwa ye ítara re zuwabe hoór de, “Zar ttu duwá kuruta asé,

íte náí de ítare eggwá doo, aar zar ttu hána asé, íte yó héndilla goró.” **12** Házana-tulóya ókkol óu báp̄tisma loito aiccé; ítara yóggwa re hoór de, “Úzur, añára ttu kii gorár zorur?” **13** Yóggwa ye ítara re hoór de, “Ain ot asé de yár túaro barái no loiyoi.” **14** Héndilla, fóous ókkole yó yóggwa ttu fusár gorér de, “Añára ká, añára ttu kii gorár zorur?” Yóggwa ye ítara re hoór de, “Kiyó ttu dómki dí kessú no loiyoi, honókiyor uore misá elzam no lagaiyó, nizor muzuri loi kúci táikko.” **15** Zeñtté manúc cún acár hálot ot accíl, aar ítara beggúne nizor dile-dile Yaháyar baabute báfat accíl de, yóggwa Mosih ói né no, **16** hétunot Yaháya ye zuwabe ítara beggún ore hoór de, “Añí toh tuáñra re fanít éna báp̄tisma díh; montor zibár tokka añr túaro doónr íba aiyér; añí íbar cenťar or fíta kúli bolla úddwa laayek no. íba ye tuáñra re Pak-Ruh edde ooin loi báp̄tisma díbo. **17** íba ttu Nizor kula Nizor át ot asé, Nizor hónla re cúndorgori sáf gorí bolla edde giyuñ ókkol ore dolagorí gudam ot rakí bolla; montor íba ye suwa gún ore honódin no nifé de ooin ot furat difélaibo.” **18** Héndilla aró boóut nosíyot ókkol lói Yaháya ye maincór hañse kúchóbor tobolik goijjíl. **19** Lekin hókumot-goróya Hérude nizor báí or bou Hérudias ore biyá goijjíl de hétolla edde yóggwa ye ze bura ham ókkol goijjíl híin beggún olla zeñtté Yaháya ye yóggwa re bót̄boráiyé, **20** tói yóggwa ye hé bura ham beggún ot aró ekkán baráiyé, híyan óilde, yóggwa ye Yaháya re ziyól ot bon gorí raikké. **21** Zeñtté manúc beggúne báp̄tisma loiyé, Isá ye yó báp̄tisma loiyé. íba dua gorér de októ asman kúligiyoi, **22** aar Pak-Ruh hoitor or dóilla jisím or súde íbar uore lami aiccé. Aar asman ottu eggwá abas aiccé de, “Tuñí Añr adorja Fua, Añí Tuáñre lói bicí kúci.” **23** Zeñtté Isá ye Allar ham gorá cúru goijjé, héntte íbar boc tokoriban tiríc bosór; maincé t̄aaitto de, íba Yusúf or fua. Yusúf óilde Hélir fua. **24** Héli Mattát or fua, Mattát Leévir fua, Leévi Melkir fua, Melki Jannair fua, Jannai Yusúf or fua, **25** Yusúf Mattatíyas or fua, Mattatíyas Ámos or fua, Ámos Nahum or fua, Nahum Esálir fua, Esáli Naggair fua, **26** Naggai Maát or fua, Maát Mattatíyas or fua, Mattatíyas Sémiyi fua, Sémiyi Josék or fua, Josék Jodar fua, **27** Joda Joannar fua, Joanna Resár fua, Resá Zerubabel or fua, Zerubabel Cáltyiel or fua, Cáltyiel Nerir fua, **28** Neri Melkir fua, Melki Addir fua, Addi Kosám or fua, Kosám Elmadom or fua, Elmadom

Er or fua, **29** Er Yehócuar fua, Yehócu Eliyazar or fua, Eliyazar Jorim or fua, Jorim Mattát or fua, Mattát Leévir fua, **30** Leévi Símiyon or fua, Símiyon Yohúdahr fua, Yohúdah Yusúf or fua, Yusúf Jonam or fua, Jonam Eliyakím or fua, **31** Eliyakím Maleyar fua, Maleya Minnar Fua, Minna Mattátar fua, Mattáta Natan or fua, Natan Dawud or fua, **32** Dawud Jesir fua, Jesi Obed or Fua, Obed Boaz or fua, Boaz Sálmon or fua, Sálmon Nacon or fua, **33** Nacon Amminadab or fua, Amminadab Admin or fua, Admin Arnir fua, Arni Hison or fua, Hison Fares or fua, Fares Yohúdahr fua, **34** Yohúdah Yakub or fua, Yakub Isahák or fua, Isahák Ibrahim or fua, Ibrahim Térar fua, Téra Nahor or fua, **35** Nahor Sérug or fua, Sérug Rau or fua, Rau Falek or fua, Falek Eber or fua, Eber Cílahr fua, **36** Cílah Kéinan or fua, Kéinan Arfakcád or fua, Arfakcád Ceém or fua, Ceém Nuhr fua, Nuh Lamak or fua, **37** Lamak Matúcilahr fua, Matúcilah Idiris or fua, Idiris Jared or fua, Jared Mahálalel or fua, Mahálalel Kéinan or fua, **38** Kéinan Enoc or fua, Enoc Sét or fua, Sét Adom or fua, Adom Allar fua.

4 Isá, Pak-Ruh lói furaiya ói Jordán hál ottu waafes aiccé, aar hé Ruhr hédaiyote moidan zagat gúrat accíl. **2** Hére Íba re salic din foijjonto Íbilíce entán goijjé. Hé din ókkol ot Íba ye honó kessú ná háa; híin fúrai baade Íba ttu búk laiggé. **3** Íbilíce Íba re hoór de, “Tuñí zodi Allar Fua de óile, e cíl lwá re ruṭi óizaytoi hókum dóh.” **4** Isá ye ítare zuwab der de, “Pak-kalam ot endilla asé, ‘Manúc siríf ruṭi loi base de no.’” **5** Tarfore Íbilíce Íba re ekkán uñsol zagat loigiyé, aar éhon or bútoire Íba re duniyair tamám raijjo ókkol daháiyé. **6** Tarfore Íbilíce Íba re hoór de, “Añí Tuáñre yíán or fura adíkar edde cáan diifélayum, kiyólla-hoilé yíán añré diiféla gíyeh, aar añí añr ttu zaré diito monehoó taré díi fari. **7** Hétolla zodi Tuñí añré sóida goró, iín beggún Tuáñr óizayboi.” **8** Isá ye ítare zuwab der de, “Pak-kalam ot endilla asé, ‘Tuñí tuáñr Mabud Alla re beh sóida goríba, aar siríf Íbar beh ebaadot goríba.’” **9** Baade Íbilíce Íba re Jerúsalem ot loigiyé, aar baitul-mukaddos or tullit tíyagarai Íba re hoór de, “Tuñí zodi Allar Fua de óile, entú nise záp maro, **10** kiyólla-hoilé pak-kalam ot toh endilla asé, ‘Íba ye Tuáñr baabute Nizor fírista ókkol ore hókum díbo, Tuáñre héfazot gorí bolla. **11** Ítara nizor áte

Tuáñre dórifelaibo, zeéne Tuáñr ṭenge honó cíl ot duk no faa.’” **12** Isá ye ítare zuwabe hoór de, “Pak-kalam ot endilla asé, ‘Tuñí tuáñr Mabud Alla re entán no goríba.’” **13** Zeñtté Íbilíce ottu hárr dóilla entán goijjá óiye, arek mouka nó faa foijjonto Íbar héntu giiyégoi. **14** Baade Isá Pak-Ruhr kudurute furaiya ói Galil ot waafes aiccé, aar Íbar hóbor hériyar sairó dák or elakar agagura fóligiyoi. **15** Íba ye ítara mujilíc-hána ókkol ot taalim diyat doiije, aar beggúne Íbar taarif goijjíl. **16** Baade Íba Nasarat ot aiccé, zeṛé Íba ḏoóñr óoil, aar Nizor niyom mutafek ebaadot-or-din mujilíc-hánat giiyé, aar telawot goittó tíyaiye. **17** Íba re nobi Yesáyahr kitab diiya gíyéh; aar hé boiṭṭa kitab pwá melí, e zaga gán tuwai loiyé zeṛé leikká asé de, **18** “Mabud or Ruh Añr uore asé, kiyólla-hoilé Íba ye Añré gorif ókkol or hañse kúchóbor boiyan gorí bolla basloiye. Íba ye Añré difeṛáiyé de, bondi ókkol ore súribar hotá, edde añdá ókkol ore dekábar hotá elan goittó; aró, zetará zulúm faar ítara re azad goittó, **19** edde Mabud or meérbanir bosór or elan goittó.” **20** Tarfore Íba ye kitab pwá bañdí háadem mwa re waafes diiféla baade boiccé. Aar mujilíc-hánat asé de manúc beggúne Íbar uzu suk lagaidi saái táikke, **21** zeñtté Íba ye ítara re hoiyé, “Aijja e pak-kalam tuáñra fúnar fúañti-fúañti fura óiye.” **22** Manúc beggúne Íbar nam gorát doiije, aar ze rahámoti hotá Íbar muk ottu neeillé híine ítara taajup óigiyoi. Ítara hoór de, “Íbá Yusúf or fua no níki?” **23** Íba ye ítara re hoór de, “Tuáñra Añré e meésal lan hámaha hoibá de ki, ‘Ḑakṭor, age nizoré gom goró. Tuñí ze ham mún Kaparnahúm ot goijjó de añára fúinni, híin eṛé Nizor farat óu gorí dahó.”” **24** Íba ye tarfore hoór de, “Añí tuáñra re sóiyi hoóir, honó nobi re nizor wotón ot gosé de náí. **25** Yíán sóiyi de ki, nobi Eliyas or zobanat zeñtté cáro tin bosór fán zór nó deh, edde guñra mulluk ot eggwá ḏoóñr raṭ óoil, héñtte Boni Isráil or bútoire boóut rari ókkol accíl; **26** toóu úddwa Eliyas ore ítara honókiyor hére difeṛá nó zah, bólke siríf Sídon elakar Zárefat ot asé de eggwá rari mayafuar hére beh difeṛá gíyl. **27** Héndilla, nobi Eliyasár zobanat Boni Isráil or bútoire boóut kurus biyaraimma ókkol accíl, montor ítara honókiyo re pak-sáf gorá nó zah, bólke siríf Síriya mulluk or Naman ore beh gom gorá gíyl.”” **28** Híin fúni, mujilíc-hánat accíl de manúc beggún guccáye bórigiyoi. **29** Ítara uṛí Íba re cóor or baárkule neelaiye,

aar haindá ttu félaidi bolla íba re faár or tullit loigiyé, zeřé uore ítarar cóor banaiyé. **30** Montor íba ítarar mazór ttu neeli héntu giyégoi. **31** Tarfore íba nise Kaparnahúm ot giyé, ziyán ekkán Galil or cóor, aar ebaadot-or-din manúc ókkol ore taalim diyat accíl. **32** Manúc ókkol íbar taalime ammúk óizaytoi, kiyólla-hoilé íba ye hotá hoitó de adíkar or sáañte. **33** Héře mujilíc-hánat endilla ezzon manúc accíl, zibá nafak bít or jine faiya. Yóggwa ye eggwá doónr abase guzori hoór de, **34** “Ó Isá Nasári, añára llói Tuáñr kii ham asé? Tuñí añára re dónco goittó aiccó de né? Añí zani Tuñí hon, Tuñí óilade Allar Pakzon nwá.” **35** Montor Isá ye jin nwá re jéjjerai hoór de, “Nizám ó, yoggwár búttottu neelizagói.” Hétunot hé jine yóggwa re beggún or mazé añsár mári edde honó zohóm no gorí yóggwar búttottu neeligiyói. **36** Híyane manúc beggún taajup óigiyoi, aar ezzon ore ezzone hoór de, “Íín hondilla hotá? Kiyólla-hoilé íba ye adíkar edde taakote hóraf jin ókkol ore hókum déh aar híin neelizagói!” **37** Tói íbar hóbor hé elakar sairó ďák or fottí zagat fólīgiyoi. **38** Baade Isá mujilíc-hána ttu neeli, Sáimon or gór ot giyé. Héñtte Sáimon or hóuri ttu bicí gaatzor uiťté. Yóggwa re gom gorí bolla ítara Isá re aros goijjíl. **39** Íba yóggwar ďake tíyai yore gaatzor zaibói lla hókum díye rár, yóggwa ttu gaatzor giyégoi. Baade yóggwa éhon or búttore urí ítara re meémandari gorát doiije. **40** Zeñtté beil gólizargoi, zetará ttu doilla-bođoilla biyaram ola biyaraimma asé, ítara beggúne tará re Isár hañse ainné, aar íba ye tará re fottí ekzon or uore át dídi gom goijjé. **41** Boóut zon ottu búttó ókkol óu eén hoói guzori neeillé de asé, “Tuñí óilade Allar Fua!” Montor híine íba Mosih de siné de hétolla, íba ye híin ore dómki dí matitó no dito. **42** Baade din óiye rár, Isá neeli ekkán bocóti-sára zagat giyé; aar manúc ókkole íba re tuwai-tuwai dójjegai. Ítara íba re ítarar héntu zaitogói no dito saáil; **43** montor íba ye ítara re hoiyé de, “Añr ttu ar cóor ókkol ot óu Allar raijor baabute tobolik gorár zorur, kiyólla-hoilé Añré hétolla beh difeřá gíyeh.” **44** Yárbaade íba Yohúdiyar mujilíc-hána ókkol ot tobolik gorát accíl.

5 Ek din zeñtté Isá Genesáret Đír kul ot tíyai accíl, manúc ókkole íbar sairó ďak ottu țélațeli gorí-gorí Allar kalam fúnat accíl. **2** Íba ye đír hañsa loi duiyán noow deikké, zín ottu

zailla ókkole lami ítarar zal dúifelat accíl. **3** Íba héntu ekkán noow ot uiťtégoi, ziyán óilde Sáimon or, baade íba re noow gán kul ottu ekkágori duré loizaitó hoiyé. Tarfore íba boói noow ttu táí manúc ókkol ore taalim diyat doiije. **4** Zeñtté íba ttu taalim diya óiye, íba ye Sáimon ore hoór de, “Noow gán mur fanít loizai ekkúf mas sai bolla zal félo.” **5** Sáimone zuwabe hoór de, “Úzur, añára raitbór meénnot gorí kessú nó fai. Toóu Tuñí zettót hoór, añí zal félaiyum.” **6** Ítara zal félaiye rár, edún mas fóiije zeén níki ítarar zal fári zargoi. **7** Hétunot ítara ítarar ze sáañti ókkol oinno noow ot asé ítara re icára gorí mataiyé, zeéne aái ítara re modot goré. Tói tará aái duní noow eddúr bójiije, zeén níki híin đufóm-đufóm óiye. **8** Híyan dekí Sáimon Fitore Isár foot fori hoór de, “Malik, añr héntu zoogói; añí toh gunágar manúc.” **9** Kiyólla-hoilé ítara hédun mas faiyé de hétolla íba edde íbar fúañti zetará accíl ítara beggún kúb taajup óigilgoi. **10** Héñdilla, Zebedair fuain Yakub edde Yohánna yó, zetará accíl Sáimon or sáañti. Isá ye Sáimon ore hoór de, “No đoorac, ehón ottu lóti tui manúc dóribi.” **11** Tarfore ítara ítarar noow gún kul ot ainné, aar hárr kessú eri íbar fisáli doiije. **12** Ekbar Isá ekkán cóor ot accíl, héře kuruse furaiya ezzon manúc accíl. Yóggwa ye Isá re deikké rár, uuiñtoi fori íba re fóriyat gorér de, “Ó Malik, Tuñí sailé añré pak-sáf gorí faribá.” **13** Isá ye Nizor át barái yóggwa re dóri hoór de, “Añí saái; pak-sáf óizogoi.” Tói éhon or búttore yóggwa ttu kurus biyaram giyégoi. **14** Baade Isá ye yóggwa re nicót goijjé de, “Yían honókiyo re no hoiyó, bólke zai nizoré imam or hañse dahógoi, aar tuñí pak-sáf óiyo de híyan maincór hañse gobá ó fan, Muúsa ye hókum díye de hé kurbani dogói.” **15** Lekin Isár hóbor aró bicígori fólīgiyoi, aar becábici manúc ókkol íbar hotá ókkol fúni bolla edde nizor biyaram ókkol ottu gom ói bolla aát tákito. **16** Montor íba Nize egazá-egazá bocóti-sára zagat zai dua goittó. **17** Ek din zeñtté Isá ye taalim der, héře hoozzon Férocí edde Córíyot or alem ókkol boirá accíl, zetará aiccé de óilde Galil or fottí fara ttu, Yohúdiya ttu, edde Jerúsalem ottu. Aar biyaraimma ókkol ore gom gorí bolla Mabud or kudurut Isár fúañti accíl. **18** Hé óktót hodún maincé ek añtur manúc ore bisánat góri boói ainné; ítara kucíc goijjíl de, yóggwa re gór or búttore gólai Isár muuntu eri bolla. **19** Montor zeñtté ítara manúc or zam olla bóuli yóggwa re

bútore loizabár rasta nó faa, hétunot ítara góror sád or uore uittégoi, aar sáni bay yóggwa re bisána cóo manúc ókkol or mazéhale Isár muuntu lamaidiyé. 20 Ítarar iman deki Isá ye hoór de “Dustó, tor guná maf gorídiya gíyeh.” 21 Híyane alem ókkole edde Férocí ókkole báfat doiije de, “E Manúc cwa hon, zibá ye kuféri gorér? Siríf Alla bade guná maf gorífaroya hon asé?” 22 Isá ye ítarar báfani re zani, ítara re zuwabe hoór de, “Tuáñra dile-dile héndilla kiyá báfor? 23 Hoité hon nán aásan, kí ‘Tor guná maf gorídiya gíyeh,’ aar náki, ‘Urí áñt’? 24 Lekin Áñr ttu tuáñra re yían zanaidito monehoór, e duniyait guná maf goríbar kémota Manúc or Fua ttu asé.” Tói íba ye añtur manúc cwa re hoór de, “Añí toré hoóir, ut, tor bisána tulí looi góror ot zaagói.” 25 Yóggwa éhon or búture ítarar muuntu uitté, aar nize neři accíl de bisána wa tulí looi Allar taarif gorí-gorí góror ot giyégoi. 26 Híyane ítara beggún taajup ógiyoi, aar Allar taarif gorát doiije. Ítara kúb ðoorazai hoór de, “Aijja añára harhána deikkí!” 27 Yárbaade Isá baárkule zai dekéror de, Leévi nam or ézzon házana-tulóya házana tulé de góror ot boói táikke. Íba ye yóggwa re hoór de, “Añr fisáli doro.” 28 Hétunot yóggwa hárr kessú eri urí íbar fisáli doiije. 29 Baade Leévi ye nizor góror ot Isá lla eggwá ðoóñr hána goijjé; aar ítarar fúañti háito boiccé de hére házana-tulóya ókkol edde oinno manúc ókkol ðoóñr ek dol accíl. 30 Férocí ókkole edde ítarar alem ókkole íbar ummot ókkol or hañse endilla cékayot gorát doiije, “Tuáñra házana-tulóyar edde gunágar ókkol or fúañti kiyá hána-fina hóo?” 31 Isá ye ítara re zuwabe hoór de, “Araimma ókkol ottu toh ðaktor no lage, montor biyaraimma ókkol ottu beh lage. 32 Añí touwár dawot dito aiccí de forhésar ókkol ore no, bólke gunágar ókkol ore.” 33 Ítara Isá re hoór de, “Yaháyar ummot ókkole toh egazá-egazá ruza raké edde dua goré, héndilla Férocir gúne yó goré, montor Tuáñr gúne toh hána-fina bad dede náí.” 34 Isá ye ítara re hoór de, “Dulá fúañti tákite kí tuáñra boiraitta re ruza rakái faribá? 35 Montor eén din aibó, zeñtté dulá re ítarar hañsottu loiféla zaybo, héñtte ítara din híin ot ruza rakíbo.” 36 Íba ye ítara re e meésal lan óu hoiyé, “Honókiye toh noya fucák ottu ekkágori fári looi furan ekgwát tali dede náí; zodi díle toh noya wa yó fári zayboi, aar noya wa ttu loiyé de tali gán óu furan nwát no háribo. 37 Héndilla, honókiye noya anggur or

roc ore furan samarar hóillat raké de náí; zodi rakíle toh noya roc cúne hóilla gún fárifelai golizayboi, aar hóilla gún óu borbad zayboi. 38 Hétolla, noya anggur or roc ore noya samarar hóillat raká fore. 39 Honókiye toh furan anggur or roc hái baade noya anggur or roc háito azzu goré de náí, kiyólla-hoilé tee hoó de, ‘furan nún beh beétor.’”

6 Ekbar eén óiye, ebaadot-or-din Isá giyuñr kuñrá báy zaar, aar íbar ummot ókkole giyuñr túr ókkol tulí áte ðoli-ðoli háat doiije. 2 Montor hodún Férocí ye hoór de, “Ebaadot-or-din ziyán goríbar maná, tuáñra híyan kiyá gorór?” 3 Isá ye ítara re zuwabe hoór de, “Tuáñra kí yían úddwa nó foró, zeñtté Dawud edde íbar sáañti ókkol ottu búk laiggíl, héñtte íba ye kii goijjíl dé? 4 Íba ye toh Allar góror ot góillegoi, aar Allar hañse peec goijjá ruți looi háail, zín siríf imam ókkole bade ar honókiye háibar ezazot náí. Íba ye híin nizor sáañti ókkol ore yó dííl.” 5 Tarfore Isá ye ítara re hoór de, “Manúc or Fua óilde ebaadot-or-din or Malik.” 6 Aró éggwa ebaadot-or-din Isá mujílíc-hánat góli taalim diyat doiije; hére ézzon endilla manúc accíl, zar den át tan fúaigiyoi. 7 Alem ókkole edde Férocí ókkole íba ye ebaadot-or-din gom goré né háas nozor di saái táikke, zeéne ítara íbar uore elzam lagaibár mouka faa. 8 Montor íba ye ítarar báfani re zani, át fúana manúc cwa re hoór de, “Uró, eré mazé tíyogai.” Tói yóggwa urí tíyaye. 9 Tarfore Isá ye ítara re hoór de, “Añí tuáñra re ekkán súwal gorí, ebaadot-or-din gom ham goríbar zayes asé né náki hóraf goríbar? Foran basaibár né náki hálak goríbar?” 10 Íba ye sairómikka ítara beggún or uzu saái, manúc cwa re hoór de, “Tuáñr át tan baró.” Tói yóggwa ye héndilla goijjé, hétunot yóggwar át tan agor ðóilla gom ógiyoi. 11 Montor ítara ttu bicí guccá urígiyoi, aar ezzon loi ezzone biyasana gorát doiijgeoi de, ítara ttu Isá re kii gorá foribó. 12 Hé din ókkol ot ek din, Isá dua gorí bolla eggwá faár or uore uittégoi, aar fura rait Allar hañse dua gorát haraiyé. 13 Zeñtté din óiye, íba ye Nizor ummot ókkol ore matai ítara ttu baró zon basíloiyé, zetará re íba ye sáhabi hoi lokób diyé. 14 Ítara óilde: Sáimon zaré íba ye Fitor nam diyé, edde íbar báí Enderiyas; aar Yakub, Yohánna, Filíp, Bartólomiyo, 15 Moti, Tómas, Alfáiyas or fua Yakub, Sáimon zibá re Zélot hoó, 16 Yakub or fua Yohúdah, edde Yohúdah

Iskáriyet zibá dóridoya óoil. 17 Isá ítarar fúañti lami aái ekkán fúainna zagat tíyaiye; hére íbar ðoóñr ek dol ummot accíl, fúañti aró becábici manúc ókkol óu accíl zetará óilde Yohúdiyar, Jerúsalem or, Tayár or, edde Sídon or doiĵjar hañsar, 18 zetará íbar boiyan fúni bolla edde ítarar biyaram ottu gom ói bolla beh aiccé. Aar zetará re hóraf jine duk der, ítara re gom gorá gíyeh. 19 Manúc beggúne íba re súibar kucíc goiĵjíl, kiyólla-hoilé íba ttu taakot neeli zai beggún ore gom gorát doiĵje. 20 Isá ye Nizor ummot ókkol or uzu saái hoór de: “Mubarek tuáñra zetará gorif, kiyólla-hoilé Allar raiĵjo toh tuáñrar. 21 Mubarek tuáñra zetará ehón búka, kiyólla-hoilé tuáñra re bóraidíya zaybo. Mubarek tuáñra zetará ehón hañdoór, kiyólla-hoilé tuáñra áñciba. 22 Mubarek tuáñra zeñtté maincé tuáñra re Manúc or Fuar zoriya nafórot goré, maárum goré, ínca goré, edde bodnam goré. 23 “Hé ðin kúci goiĵjó, edde kúciye fál maiĵjo, kiyólla-hoilé fúno, asman ot tuáñra lla ðoóñr boccíc asé. Héndilla toh ítarar bafðada ókkole nobi ókkol ore yó goittó. 24 Montor afsús tuáñrar uore zetará tuangor, kiyólla-hoilé tuáñra toh tuáñrar cúk beggún eře faifelaiyo. 25 Afsús tuáñrar uore zetará yala feṭ bórai faroór, kiyólla-hoilé tuáñra búka óiba. Afsús tuáñrar uore zetará yala áñcor, kiyólla-hoilé tuáñra ferecan óiba edde hañdahaři goríba. 26 Afsús tuáñrar uore zeñtté manúc beggúne tuáñrar nam goré, kiyólla-hoilé héndilla toh ítarar bafðada ókkole misá nobi ókkol ore yó goittó. 27 “Lekin tuáñra zetará fúnor, Añí tuáñra re hoóir: nizor duccon ore muhábbot goiĵjó; zetará tuáñra re nafórot goré, ítara re bálai goiĵjó; 28 zetará tuáñrar uore gozzob deh, ítara re borhot diyo; zetará tuáñra re bodsólluk goré, ítara lla dua goiĵjó. 29 Zee niki tuáñre ek galsaba saí suwar mare, ítare oh ðák óu fíraidiyo; zee niki tuáñr saddor loizagói, ítare tuáñr kuruta yó loizaitó maná no goiĵjó. 30 Zee niki tuáñr ttu mage, ítare diiyo; aar zee niki tuáñr jiníc loizagói, ítar ttu fírai no magiyó. 31 Maincóre undilla goró zendilla tuáñra soó de, ítara tuáñre goróuk. 32 “Zodi tuáñra cúdu tuáñra re muhábbot goré de ítara re muhábbot goró, tooile súwab kiyólla faiba? Kiyólla-hoilé gunágar ókkole úddwa toh nizoré muhábbot goré de ítara re muhábbot goré. 33 Aar zodi tuáñra cúdu tuáñra re bálai goré de ítara re bálai goró, tooile súwab kiyólla faiba? Kiyólla-

hoilé gunágar ókkole úddwa toh héndilla goré. 34 Zodi tuáñra fírai faibar acá goró de hé manúc ítara re beh udár dóh, tooile súwab kiyólla faiba? Kiyólla-hoilé gunágar ókkole úddwa toh gunágar ókkol ore udár déh, zeéne beggún fírai faa. 35 Montor tuáñra nizor duccon ore muhábbot goró, ítarar bálai goró, aar kessú fírai faibar acá no gorí udár dóh; tói tuáñra lla boccíc ðoóñr tákibo, aar tuáñra Alla Tálar fuain tóoriba, kiyólla-hoilé íba Nize yó toh nacúkur edde hóraf manúc ókkol or uore rahám goré. 36 Rahám dil ola ó, zendilla tuáñrar Baf óu rahám dil ola. 37 “Ar ezzon or hosúri no doiĵjo, tói tuáñrar hosúri yó dóra no zaybo. Ar ezzon ore hosúrbon no tóoraiyo, tói tuáñra re yo hosúrbon tóora no zaybo. Maf gorídiyo, tói tuáñra re yó maf gorídiya zaybo. 38 Diiyo, tói tuáñra re yó diiya zaybo. Sibi-sibi edde lari-lari baái fore fángori gom mafe tuáñrar kussát ðálidiya zaybo. Kiyólla-hoilé tuáñra ze mafe doo, tuáñra re yó hé mafe beh diiya zaybo.” 39 Isá ye ítara re e meésal lan óu diyé, “Ek ańdá ye kí arek ańdá re foñt dahái fare? Tará duní zon kí gañt ot no foribó né? 40 Cárit toh nizor ustat or túaro ðoóñr no, lekin zar ttu niki furafuri cíkka óizagoi, íte nizor ustat or ðóilla beh óibo. 41 “Tuñí tuáñr báí or suk ot asé de hál lan kiyá dekór, montor tuáñr nizor suk ot asé de hodda gán toh ót no gorór? 42 Tuñí zettót tuáñr suk ot asé de hodda gán no dekór, tói tuñí tuáñr báí ore keéngori hoór de, “Bái, ańí tuáñr suk ottu hál lan neelaifélaí?” Ó munafék! Age tuáñr nizor suk ottu hodda gán neelaifélo, baade tuáñr báí or suk ot asé de hál lan neelai bolla sáf góri dekíba. 43 “Kiyólla-hoilé gom gas ot toh hóraf gula dóre de náí, aar hóraf gas ot gom gula dóre de náí. 44 Ze honó gas ore yíbar gulaye beh siná zah. Kiyólla-hoilé maincé toh keñrabon ottu ðuñir gula no fare, yáh keñrar záli ttu anggur no fare. 45 Gom manúce nizor dil or gom zomaiya ttu gom mún neela; aar hóraf manúce nizor dil or hóraf zomaiya ttu hóraf fun neela. Kiyólla-hoilé zar dil ziíne furaiya, nizor muké híin beh hoó. 46 “Tuáñra zettót Ańí ziín hoói híin amól no goró, tói Ańré kiyólla, ‘Malik, Malik,’ ðako? 47 Zee niki Ańr hañse aiyé aar Ańr boiyan fúni amól goré, íte har ðóilla de Ańí tuáñra re daháir: 48 Íte óilde endilla ezzon manúc or ðóilla, zee niki gór banaibárcot mur gori meři kurí cíl ot mazé buniyadi ðáille. Zeñtté faníban aái hé gór gán ot dósadiye híyan

ore lari nó fare, kiyólla-hoilé híyan toh mozbut gori bana giyé. **49** Lekin zee niki fúni amól no goré, íte óilde endilla ezzon manúc or dóilla, zee niki honó buniyadi no dáli meřir uore ekkán gór banaiyé. Tói zeñtté fanıban aái hé gór gán ot dósadiye, híyan éhon or búture fori ebbe nac óigiyoi.”

7 Zeñtté Isá ttu manúc cún ore híin beggún boiyan goijjá óiye, íba Kaparnahúm cóor ot giyé. **2** Hére ézzon ek cót fóous or cáap or biciı adorda gulam biyarama moron-moron óiye. **3** Hé cáap pwá ye Isár baabute fúinne rár, Yohúdir hoozzon murubbi re íbar hañse diferái íba re aros goijjé de, aái yóggwar gulam mwa re gom goittó. **4** Ítara Isár hañse aái íba re becábici fıriyat goijjé, eén hoói, “Hé manúc cwa Tuáñr e modot tán or laayek; **5** kiyólla-hoilé yóggwa ye añárar koum ore muhábbot goré, aar añárar mujilíc-hána gán yóggwa ye beh banaidiyé.” **6** Hétunot Isá ítarar fúañti zaat doiije, lekin íba zeñtté gór or hañsáhañsi foónicce, cáap pwá ye hoozzon dustó diferái íba re hoór de, “Malik, Nizoré ar duk no diyó, kiyólla-hoilé Tuñí añr gór or sal or nise aibár añ laayek no; **7** hétolla añ nizoré Tuáñr hañse aibár laayek bouli nó báfi. Siríf muké hoó, tói añr gulam gom óizayboi. **8** Kiyólla-hoilé añ nize yó ar ezzon or hókumot or tole así, aar fóous ókkol añ nise asé. Añ ezzon ore, ‘Zaa,’ hoilé, íte zaa, ar ezzon ore, ‘Ai,’ hoilé, íte aiyé, aar añr gulam ore, ‘Yían gor,’ hoilé, íte híyan goré.” **9** Híyan fúni Isá taajup óigiyoi, aar zetará íbar fisá dori accíl ítarar híkka fıri hoór de, “Añí tuáñra re hoóir, Añí ettór dıoñr iman Isráili ókkol or búture úddwa loot nó fai.” **10** Zetará re diferá giyl ítara gór ot waafes aái, gulam mwa re gom óiya loot faiyé. **11** Baade eén óiye, yárbaade Isá Nain nam or ekkán farat giyé, fúañti íbar ummot ókkol edde dıoñr ek dol manúc óu giıl. **12** Íba cóor or geit or dıke foónicce de óktót, maincé eggwá muruda baäre loizar, íte óilde ítar maar lehár ek fua, aar maa wa accıl rari. Cóor ottu dıoñr ek dol manúc híbar fúañti accıl. **13** Malik ottu híba re dekí, híba lla feřfuiije, baade íba ye híba re hoór de, “No hañdiyó.” **14** Baade íba dıke aái tabut twa súiye, aar muruda boói loizar de ítara tíyaiyoi. Íba ye hoór de “Ó nojuan, Añí toré hoóir, uř!” **15** Hétunot muruda wa urı boicce aar hotá howát doiije. Baade Isá ye ítare ítar maar hañse waafes diifélaiye. **16**

Híyane manúc beggún or búture dıoor góligiyoi, aar ítara Allar taaríf gorát doiije, eén hoói, “Añárar búture eggwá dıoñr nobi uitté. Alla ye Nizor bonda ókkol ore modot goittó aicce.” **17** Íbar hé hóbor híyan Yohúdiya agagurat edde sairó dák or elaka beggún ot fıligiyoi. **18** Yaháyar ummot ókkole yóggwa re híin beggún or baabute zanaiyé. **19** Tói Yaháya ye nizor duwá ummot ore matai, ítara re Malik or hañse yían fusár goittó diferáiye, “Tuñí aibár hotá asé de íba né, aar náki añára ar ezzon olla entezar goittám?” **20** Zeñtté manúc ítara íbar hañse foónicce, ítara hoór de, “Añára re bápřismadoya Yaháya ye diferáiye deh, Tuáñr ttu yían fusár goittó, ‘Tuñí aibár hotá asé de íba né, aar náki añára ar ezzon olla entezar goittám?’” **21** Hé óktót íba ye boóut zon ore biyaram, afot, edde hóraf jin ottu basaiyé; íba ye boóut zon añdá re yó dekíbar toóufik diiyé. **22** Íba ye ítara re zuwabe hoór de, “Zoo, tuáñra zıın deikkó edde fúinno híin Yaháya re zanogói, ki hoilé, añdá ye dekér, lenge añřer, kurus biyaraimma pak-sáf ór, náfange fúner, muruda zinda ór, edde gorif ókkol or hañse kúchóbor tobolik gorá zar. **23** Mubarek ubá, zee niki Añr baabute andacá no goré.” **24** Zeñtté Yaháyar hóborgwa gún bacá lóiyé, íba ye manúc cún ore Yaháyar baabute howát doiije de, “Tuáñra moidan zagat kii saitó giıla dé? Boiyare lore de hóir né? **25** Arnóile tuáñra kii saitó giıla dé? Barík hoor findá manúc né? Zetará dami-dami hoor fiñdı rongzuıngga gorı sole, ítara toh razmohól ot éna. **26** Tóoile tuáñra kii saitó giıla dé? Honó nobi né? Ói, Añí tuáñra re hoóir, nobir túaro dıoñr ézzon ore. **27** Yóggwa óilde ubá, zibár baabute pak-kalam ot endilla asé, ‘Soó, Añí Añr hóborgwa re Tuáñr age diferáir, zibá ye Tuáñr age Tuáñr foñt toiyar gorıbo.’ **28** Añí tuáñra re hoóir, mayafuain dor ttu zormo óiye de ítarar búture bápřismadoya Yaháyar túaro dıoñr honókiye náı; montor toóu úddwa Allar raijıot zee niki ebbe cóñro, íte yóggwar túaro dıoñr.” **29** Zeñtté tamám manúc ókkole edde házana-tulóya ókkole híyan fúinne, ítara Yaháyar hañsóttu bápřisma loi, Alla insáfwa de maniloiyé. **30** Montor Féroci ókkole edde Córiyot or alem ókkole Yaháyar hañsóttu bápřisma no loi, Alla ttu ítara lla accıl de moksót ore inkar gorıdiye. **31** Isá ye aró hoór de, “Añí e zobanar maincóre kii loi fúwan goittám? Ítara kiyór dıoilla? **32** Ítara undilla fuain dor dıoilla, zetará bazar ot boói ezzon

ore ezzone matai hoó de, “Tuáñra lla añára bací bazaiyí, montor tuáñra nó naso; tuáñra lla añára bilak or zari gaiyí, montor tuáñra nó hañdo.” **33** Kiyólla-hoilé báp̄tismadoya Yaháya aái zettót honó ruṭi edde anggur or roc ná háa, tuáñra hoó de, ‘Íba re búte faiyé.’ **34** Aar Manúc or Fua aái zettót háafiya gorér, tuáñra hoór de, ‘Soó, ezzon fitác edde córabkur, házana-tulóya edde gunágar ókkol or dustó.’ **35** Lekin giyan sóiyi de híyan giyane soloya beggúne sábut goijjé.” **36** Féroci ókkol ottu ezzone Isá re nizor fúañti hána háito dawot diyé, tói Íba hé Féroci war gór ot zai háito boiccé. **37** Hé cóor gán ot eggwá hóraf mayafua accíl; Isá Féroci war gór ot hána háar de híyan híba ye zani faijé rár, híba ye fúañti fattór or háñrit góri añtor ainné, **38** aar Íbar fis ottu téng or dake tíyai, hañdi-hañdi Íbar téng ore nizor suk or faní lói bízat doijje, baade nizor matár sul loi híin fuñsídiye edde Íbar téng ot appá dí añtor gún dálidiye. **39** Íba re dawot diyé de Féroci wa ye híyan deikké rár, yóggwa ye nizoré nize hoór de, “Zodi e Manúc cwa nobi óito, tóoile toh Íba ye zainto, Nizoré hone edde hondilla mayafua ye dórer deh; mayafua wa toh hóraf.” **40** Hétunot Isá ye yóggwa re zuwabe hoór de, “Sáimon, Añr ttu tuáñre kessú hoibár asé.” Sáimone hoór de, “Ustat, hoói faribá.” **41** “Ezzon hozzo-dooya ttu dui zon hazzodár asé: ekzone loiyé fañs cót dinár, ar ekzone loiyé fonzaic dinár. **42** Ítara zettót híin fuñzi no farer, yóggwa ye ítara duní zon or hozzo maf gorídiye. Tóoile ítara ttu yóggwa re hone bici muhábbot goríbo?” **43** Sáimone zuwabe hoór de, “Añr kíyal mozin, zar niki bici hozzo maf gorídiya gíyeh íte.” Íba ye yóggwa re hoór de “Tuñí sóiyi kíyal goijjó.” **44** Baade mayafua war híkka fíri Íba ye Sáimon ore hoór de, “Tuñí e mayafua wa re dekor né? Añi toh tuáñr gór ot ailám; tuñí Añré foo dúi bolla faní nó doo, montor ibáh ye nizor suk or faní lói Añr foo bízai nizor sul loi fuñsídiye. **45** Tuñí toh Añré appá nó doh, montor Añi bútoze goílli lóti ibáh ye Añr foot appá díya bon nó goré. **46** Tuñí Añr matát tel nó doh, montor ibáh ye Añr foot añtor dálidiye. **47** Hétolla Añi tuáñre hoóir, ibáh ttu bici guná tákile yo, ibáhr hé guná híin maf gorídiya gíyeh, kiyólla-hoilé ibáh ye bici muhábbot goijjé. Montor zaré hom maf gorídiya gíyeh, yóggwa ye hom muhábbot goré.” **48** Baade Isá ye híba re hoór de, “Tuáñr guná maf gorídiya gíyeh.” **49** Hétunot zetará Íbar fúañti

hána háito boiccíl, ítara afós ot howáhoi gorér de, “Íbá hon, zibá ye guná úddwa maf goré?” **50** Lekin Íba ye mayafua wa re hoór de, “Tuáñr imane tuáñre basaiyé; cántir sáañte zoogói.”

8 Yárbaade, Isá cóore-cóore edde fara-fara zai Allar raijor baabute kúchóbor boiyan gorát edde tobolik gorát doijje. Baró zon nún Íbar fúañti accíl, **2** hodún beṛiyáin óu accíl zetará re hóraf jin ókkol ottu edde ocúk ókkol ottu gom gorá gíyl; tará óilde: Moriyam, zibá re Makdálini dake, zibár bútotu háñt twa bút neeillíl; **3** Joanna, zibá Hérud or uzir Kuzar or bou; Sosánna edde aró boóut beṛiyáin ókkol. Tará nizor cómbotti lói ítara hédmot goittó. **4** Ek din zeñtté fottí cóor ottu doñir ek dol manúc Isár hañse aái zoma óiye, Íba ye ítara re e meésal lan hoiyé: **5** “Ezzon bis cínroya bis cínṭto neeillé. Yóggwa ye cínṛer de októ, hodún bis rastarhañsat foijjíl; híin or uore únṛan foijjíl, aar faik ókkole híin háifelaiye. **6** Hodún bis cíl or uore foijjíl, híine tocá nó faa ísafe barí urár fúañti-fúañti fúaigiyoi. **7** Hodún bis keñraban ot foijjíl, fúañti keñraban barí urí híin ore sibi raikké. **8** Lekin ar hodún bis gom zobin ot foijjíl; híin barí uiṭṭé, aar ek cót gun fósol dóijje.” Isá ye híin hoói baade guzori hoór de, “Zar ttu fúnibar han asé, yóggwa ye fúno.” **9** Isár ummot ókkole Íba ttu fusár gorér de, “E meésal lan or maáni kii?” **10** Íba ye hoór de, “Allar raijor gufoni re zainto tuáñra re beh diya gíyeh, montor oinno kiyó re meésal dí etollá howá zah, zeéne ‘ítara sailé yo no deké, aar fúnile yo no buzé.’ **11** “Meésal lan or maáni óilde yíán: bis óilde Allar kalam. **12** Rastar hañsat foijjé de híin óilde uitará zetará fúne, montor íbilíce aái ítara dí ottu kalam loizagói, zeéne ítara iman nu ané aar nejat no faa. **13** Cíl zobin ot foijjé de híin óilde uitará, zetará kalam fúnile kúcir sáañte kobul goré; aar mozbut cínṛor nó gasá de hétolla kessú októ lla beh iman raké, montor entán ot fore de októ físsá mare. **14** Ze bis keñraban ot foijjé híin óilde uitará, zetará kalam fúne, montor zindigi haṛaité-haṛaité sintabáfaniye, dón-doulote, edde e zindigir ayaci-kúciye ítara re sibi raké, hétolla ítara gula fagi no tooñre. **15** Lekin ze bis gom zobin ot foijjé híin óilde uitará, zetará cúndorgori edde gom dile kalam fúne, híin ore mozbut gori dóri raké, edde sobór or sáañte gula dóra. **16** “Honókiye toh serak dórai tára lói záfai no raké, yáh falong or tole

yó no raké, bókke boirónir uore éna raké, zeéne bútoe aiyé de itara foór deké. 17 Kiyólla-hoilé endilla surha kessú náí zín zahér no óibo, aar endilla lukaiya yó kessú náí zín zana no zaybo aar kúlaha no óibo. 18 Hétolla tuáña hondilla gori fúnor úñciyar, kiyólla-hoilé zar ttu niki asé, yóggwa re aró diiya zaybo; montor zar ttu niki náí, yóggwa ye nizer ttu zín asé bóuli báfe híin úddwa loiféla zaybo.” 19 Yárbaade Isár maa edde báiyain íbar hére aiccé, montor maincór zam olla bóuli itara íbar íñyot foónsi no farer. 20 Ezzone íba re hóbor díye de, “Tuáñr maa edde báiyain baáre tíyai táikke, itara Tuáñr llóí milto sar.” 21 Montor íba ye itara re zuwab diyé de, “Añr maa edde báiyain óilde itará, zetará Allar kalam fúne edde híin amól goré.” 22 Ek din Isá edde íbar cárít tun ekkán noow ot uitté, tarfore íba ye itara re hoór de, “Aiyó, añára díir oh hañsat farái.” Baade itara bacá lóíye. 23 Zaité-zaité Isá gúm ot forigiyói. Aar díft eggwá doónr tuwán aiccé, hétolla noow gán faní lóí bórizargoi, aar itara hótorat fíjjíl. 24 Ítara íbar hañse aái íba re tulídi hoór de, “Ustat, ó Ustat, añára morizayrgói!” Tóí íba urí boiyar edde fanír goir ore dóónk diyé, baade híin bon ói támaigiyói. 25 Íba ye itara re hoór de, “Tuáñrar iman hořé?” Ítara dooraigiyói aar taajup ói ezzon ore ezzone hoór de, “Íbá hon? Íbá ye de boiyar edde faní re úddwa hókum díle híine íbár hotá mane!” 26 Yárbaade itara Geraséníol or mulluk ot foónicce, ziyán Galil Díir muúntu. 27 Zeñtté Isá kul or uore laimmé, hé cóor or ezzon búte-faiya manúc íba llóí dola óíye. Yóggwa ye hoorsuor no fiñdér de bicí deri lóti, aar yóggwa góor ot no táki hobor ókkol ot tákito. 28 Zeñtté yóggwa ye Isá re deikké, guzori íbar muúntu uúñtoí forigiyói, aar eggwá doónr abase hoór de, “Ó Isá, Alla Tálar Fua, Tuáñr ttu añr llóí kii ham asé? Añí Tuáñre bicí fóriyat gorír, añré toziya no diyó.” 29 Kiyólla-hoilé Isá ye hé hóraf jin nwá re yóggwar bútotu neeliai bolla hókum dífelaiye. Hé jine yóggwa re bicí faito; aar yóggwa re síyol edde berí lóí bañdí faára dí raká zayto, montor híin sírifelaito, aar búte yóggwa re moidan zagat loizaitói. 30 Isá ye yóggwa ttu fusár gorér de, “Tor nam kii?” Yóggwa ye hoór de, “Zák” kiyólla-hoilé yóggwar bútoe boút twa bút góli táikke. 31 Híine Isá re fóriyat gorát doiije de, híin ore otái gañt ot zaito hókum no di bolla. (Abyssos g12) 32 Hére faár or uore doónr ek zák cúwor sorer de accíl. Bút

tune íba re fóriyat gorér de, híin ore hé cúwor gún or bútoe góiltoi ezazot di bolla. Tóí íba ye híin ore ezazot diyé. 33 Hétunot hé búttun manúc cwa ttu neeli aái cúwor gún or bútoe góillegoi, tóí cúwor or zák kwa faár or haindá báy zure díft duñrdiyé aar dufí morigiyói. 34 Cúwor soroya gúne zeñtté kii óíye de deikké, itara duñrdiyé aar cóor ot edde gang zagat híyan hóbor díye. 35 Baade kii óíye de sai bolla manúc ókkol neeillé. Manúc itara Isár hére aái loot faiyé de, ze manúc cwa ttu búttun neeillé yóggwa hoor findí edde sóiyi úñice Isár téng or dake boirá asé; hétunot itara dooraigiyói. 36 Zetará hé maamela gán deikké itara búte-faail de manúc cwa kéngori gom óigiyoi de híyan hé manúc itara re zanaiyé. 37 Hétolla Geraséníol or sairó dák or manúc beggúne Isá re ítarar héntu zaitogói hoíye, kiyólla-hoilé itara ttu bicí door laiggé; hétunot íba noow ot urí waafes aáigiyoi. 38 Ze manúc cwa ttu búttun neeillíl, yóggwa ye íbar fúañti zai bolla íba re fóriyat goijjíl, lekin Isá ye yóggwa re eén hoói duñraidiyé, 39 “Tuñí tuáñr góor ot waafes zoogói, aar Alla ye tuáñr lla ze doónr ham goijjé híin boiyar gorógói.” Baade yóggwa giyégoi, aar Isá ye yóggwa lla ze doónr ham goijjé híin cóor or agapura howát doiije. 40 Zeñtté Isá waafes aiccé, manúc ókkole íba re estekbal goijjé, kiyólla-hoilé itara beggúne íba lla sooni táikkil. 41 Hétunot Záiras nam or ezzon manúc hére aiccé, zibá mujilic-hánan ézzon sóddar; yóggwa ye Isár foot fori íba re fóriyat gorér de, yóggwar góor ot ai bolla; 42 kiyólla-hoilé yóggwa ttu siríf eggwá baró bosórja zérfua accíl deh, aar híba morizargoi. Íba zaar de októtt, manúc ókkole íba re tšelaťeli gorát accíl. 43 Hére eggwá mayafua accíl, zibá ttu kúnzari zár de baró bosór óíye, zibá ye nizer ttu accíl de beggún daktór ókkol or hañse hóssa gorífelai baade yo honókiyor át ot gom ói nó fare; 44 híba Isár fisór ttu aái íbar hoor or hañra súíye, tóí éhon or bútoe híbar kúnzari bon óigiyoi. 45 Hétunot Isá ye hoór de, “Añré hone súíye?” Beggúne inkar gori baade Fítore hoór de, “Úzur, manúc ókkole de zam gorí Tuáñre sairó dák ottu tšelaťeli gorér.” 46 Montor Isá ye hoór de, “Honnwággwa ye Añré súíye, kiyólla-hoilé Añr ttu kudurut neeli giyé de Añí hoi faijjí.” 47 Hé mayafua wa ye zettót híba hári nó fare de deikké, híba hafí-hafí aái íbar muúntu uúñtoí fíjjé, aar híba ye kiyólla íba re súíye, edde híba kéngori éhon

or bútoŕe gom óigiyoi, híin manúc beggún or muúntu boiyan goijjé. **48** Isá ye híba re hoór de, “O zíi, tor imane toré gom goijjé; cántir sáañite zaagói.” **49** Íba hotá howát accíl de októ, mujilíc-háñar sóddar gwar gór ottu ezzone aái hoór de, “Tuáñr zíi zuraigiyói; Ustat ore ar ferecan no goijjó.” **50** Montor Isá ye híyan fúni yóggwa re hoór de, “No ðooraiyó, siríf biccác goró, híba gom óizayboi.” **51** Íba gór ot foónsi, Fitor, Yohánna, Yakub, edde mayafuar bafmaa re bade ar honókiyo re íbar fúañti bútoŕe góilto nó deh. **52** Manúc beggúne híba lla hañdahari gorát edde buk kilat accíl, montor Isá ye hoór de, “No hañdiyó, ibáh moijjé de no, bólke gúm zar deh.” **53** Hétunot ítara íba re lói áñcat doiije, kiyólla-hoilé ítara hoi fare de ki híba morigiyói. **54** Montor íba ye híbar át dóri ðak mari hoór de, “O zíi, uť.” **55** Hétunot híbar foran waafes aiccé, aar híba éhon urí tíyaiye. Baade háito híba re kessú dii bolla Isá ye ítara re hókum díye. **56** Híbar bafmaa taajup óigilgoi; montor ziyán óiye híyan honókiyo re no hoi bolla Isá ye ítara re nicót goijjé.

9 Yárbaade Isá ye baró zon cárit tun ore fúañti matai, fottí ðoilla búť ókkol neelai bolla edde biyaram ókkol gom gorí bolla ítara re taakot edde kémota diiyé. **2** Tarfore ítara re Allar raijor baabute tobolik gorí bolla edde biyaraimma ókkol ore gom gorí bolla diferáiyé. **3** Íba ye ítara re hoiyé de, “Foñť olla kessú no loizaiyó: no larí, no hóilla, no hána, no tiañ, no battí hoor. **4** Tuáñra ze gór ot góliba hé gór ot cóor híyan ottu neeli nó zoogói foijjonto tákiyo. **5** Ze cóor or maincé tuáñra re kobul no goré, hé cóor ottu neeli zaibarcót tuáñrar țéng or tollar dúil zárifelaiyo, zeéne híne ítarar ulđa gobá deh.” **6** Baade ítara rowana loi fara-fara zai, kúchóbor tobolik gorát edde fottí zagat biyaraimma ókkol ore gom gorát doiije. **7** Galil or hókumot-goróya Hérude, ziín ór híin beggún fúinne. Yóggwa bicí oulzóul ot forigiyói, kiyólla-hoilé hodúne hoór de, Yaháya mora ttu zinda óiye deh, **8** hodúne hoór de, Eliyas zahér óiye deh, ar hodúne hoór de, agor zobanar nobi ókkol ottu nobi eggwá zinda óiye deh. **9** Montor Hérude hoór de, “Yaháyar holla de ańi nize hariféla báilam, montor ibá hon zar baabute ańi endilla hotá ókkol fúnir?” Híya lóti yóggwa ye Isá re sai bolla kucíc gorát accíl. **10** Sáhabi gún waafes aái, ítara ziín-ziín goijjíl híin Isá re zanaiyé.

Tarfore íba ye ítara re fúañti looi, Betsáida hoó de fara híyan ot zuitégori giyyégoi. **11** Montor manúc ókkole híyan hoi fari íbar fisá doiijil. Íba ye ítara re kúcir sáañite kobul goijjé, aar ítara re Allar raijor baabute taalim díyē edde biyaraimma zetará ttu gom óibar zoruroť accíl ítara re gom goijjé. **12** Zeñťťē beil gólibar októ óiye, hé baró sáhabi gúne aái Isá re hoór de, “Manúc cún ore duñraido, zeéne tará atehañsór fara ókkol ot edde gang zaga ókkol ot zai kessú háibar edde tákibar zaga tuwai fare, kiyólla-hoilé ańára así de yíañ toh ekkán bocóti-sára zaga.” **13** Montor íba ye ítara re hoór de, “Hái bolla kessú tará re tuáñra doo.” Ítara hoór de, “Ańára ttu de fañs swá ruťi edde duwá mas bade ar kessú nái, hétolla ańára zai tará beggún olla hána kini aintámboi né?” **14** Kiyólla-hoilé héře fañs ázar foijjonto beřaáin accíl. Montor Isá ye Nizor cárit tun ore hoór de, “Tará re ek ðaái ot fonzaic zon fonzaic zon gorí buágaro.” **15** Ítara héndilla gorí beggún ore buágaraíye. **16** Íba ye hé fañs swá ruťi edde duwá mas sún looi asman or uzu saái híin ore borhot díyē, aar íba ye híin ore bāñgi-bāñgi cárit tun ore diiyé, manúc ókkol ore bařidi bolla. **17** Tará beggúne feť bóri háíye. Baade ze tukuřa ókkol basigiyói, cárit tune híin feñřai looi fura baró bāñir bóijje. **18** Ekbar zeñťťē Isá hálīga dua gorér, aar cárit tun íbar fúañti accíl, íba ye ítara ttu fusár gorér de, “Maincé Ańi hon bouli hoó?” **19** Ítara zuwabe hoór de, “Tuñi bóle bápťismadoya Yaháya; ar hodúne hoó de, nobi Eliyas; ar hodúne hoó de, agor zobanar nobi ókkol ottu nobi eggwá zinda óiye deh.” **20** Tói íba ye ítara re hoór de, “Lekin tuáñra kii hoó, Ańi hon?” Fitore zuwabe hoór de, “Allar Mosih.” **21** Isá ye ítara re horagori uńciyari díye, aar híyan honókiyo re no hoitó maná goijjé. **22** Íba ye hoór de, “Manúc or Fua ttu hámaha boóť ðoilla duk faa foribó; aar murubbi, ðoóñr imam edde alem ottu inkar háibo; íba re mariféla zaybo, montor tin din ot din zinda gorá zaybo.” **23** Baade íba ye ítara beggún ore hoór de, “Zodi honókiyo ttu Ańr fisáli aitó monehoó, yóggwa ttu nizoré inkar gorífela foribó, aar fottí din nizor kúruc boói Ańr fisáli dora foribó. **24** Kiyólla-hoilé zee niki nizor zan basaitó saá, yóggwa ye híyan háraifelaibo; montor zee niki Ańr wasté nizor zan háraifele, yóggwa ye híyan basaifélaibo. **25** Kii laf, zodi honókiye tamám duniyai faa, montor nizoré háraifele yáto lussán gorífele?

26 Zee kiyé Añré lói edde Añr hotá re lói córma, yóggwa re lói Manúc or Fua ye yó córmaibo zeñtté İba Nizor, Baf or, edde pak fírsta ókkol or mohímaye aibó. 27 “Lekin Añí tuáñra re sóiyi hoóir, eřé endilla hodún manúc tíyayi asé, zetará Allar raijjo nó dekte no moribó.” 28 Híin hoói añçto din ánik baade, Isá ye Fitor ore, Yohánna re, edde Yakub ore looi faár or uore dua goittó uittégoi. 29 Zeñtté İba dua gorát accíl, İbar siyáar súrot bodoligiyói, aar İbar hoor dóla ói sossohat doijje. 30 Asimbit dui zon manúc İba llói hotá hoór, İtara óilde Muúsa edde Eliyas. 31 Tará mohímar sáañte dahá dí İbar entehal or baabute hoóil, ziyán İba ye Jerúsalem ot fura gorİbar asé. 32 Fitor edde İbar sáañti ókkol mur gúm ot accíl; lekin İtara támfaiye rár, Isár mohíma edde İbar fúañti tíyai táikke de manúc duní zon ore deikké. 33 Baade hé manúc duní zon İbar héntu zaargói de októť, Fitore Isá re hoór de, “Úzur, gom óiye añára eřé así. Añára eřé tin nán řambu řaki: ekkán Tuáñr İla, ekkán Muúsa İla, edde ar ekkán Eliyas İlla.” Háleke İba nize kii hoór nize no zane. 34 Fitore híyan hoór de októť, ekkán miyúla aái İtara re saífelaiye. İtara miyúla lói saízargoi de októť, řooraaíl. 35 Aar hé miyúla ttu eggwá abas aiccé, ki hoilé, “İba óilde Añr Fua zibá re Añí basİloiyi; İbár hotá fúno!” 36 Abas swá aiccá ói baade, İtara Isá re gaaga loot faiyé. İtara híyan aiddone raikkíl, aar ziiñ deikké híin hé din ókkol ot honókiyo re nó zana. 37 Tarřor din zeñtté İtara faár ottu lami aiccé, řoóñr ek dol manúc İba llói dola óiye. 38 Dol ottu ezzone guzori hoór de, “Ustat, añí Tuáñre řoriyat gorİr, añr fua wa re ekká soó, İte añr lehár ek fua. 39 İtare eggwá jine dóre, aar İte éhon guzoran mare; yİba ye İtare dórřorabai gal ottu féna ané. Yİba ye İtare bicí duk di mockil or sáañte beh eride. 40 Añí Tuáñr cárít tun ore hé jin nwá neelaifélaito řoriyat goijjİlam, lekin İtara nó fare.” 41 Héťunot Isá ye zuwabe hoór de, “Ó iman sára edde báañra nosól, Añí tuáñrar fúañti-fúañti aró hotókkal tákitam? Hotódin tuáñra re bordac goittám? Tuáñr fua wa re eřé anó.” 42 Fua wa aiyér de októť, İtare búť twa ye merit ańsári dórřorabat doijje. Montor Isá ye hé hóraf jin nwá re dóoñk dí, fua wa re gom gorİfelaiye, baade İtare baf or hańse waafes diifélaiye. 43 Aar manúc beggúne Allar řoóñr kudurut deki taajup óigiyo. Ze októť İtara fottíkiye Isá ye goittó de híin beggúne

taajup óiye, İba ye Nizor cárít tun ore hoór de, 44 “Tuáñra Añr e hotá iín han ot gólai loo, ki hoilé, Manúc or Fua re manúc ókkol or át ot gosáidiya zaybo.” 45 Lekin İtara hotá híyan no buzító. İtara ttu híyan lukaiféla gíyeh, zeéne İtara buzí no fare; aar İtara İba ttu hé hotár baabute fusár goitté yó řooraitó. 46 Yárbaade İtarar búťore ekkán barábari cúru óiye, ańárar búťore ebbe řoóñr honnwá hoói. 47 Lekin Isá ye İtarar dil or báfani re zani, eggwá gura fua looi İbar řáke góri tíyagaraiye, 48 baade İtara re hoór de, “Zee kiyé e fua wa re Añr name kobul goré, yóggwa ye Añré kobul goré deh; aar zee kiyé Añré kobul goré, yóggwa ye Añré diferáiyi de İba re kobul goré deh; kiyólla-hoilé tuáñra beggún or búťore zee niki ebbe cóñřo, yóggwa óilde ebbe řoóñr.” 49 Yohánna ye zuwabe hoór de, “Úzur, ańára deikkí de, eggwá maincé Tuáñr name búť neelar; yóggwa ańárar fúañti Tuáñr fisáli nó dóre de hétolla, ańára yóggwa re maná goijjÍ.” 50 Lekin Isá ye hoór de, “Yóggwa re maná no goijjó, kiyólla-hoilé zee niki tuáñrar ulřa no, yóggwa toh tuáñrar híkka.” 51 Isá asman ot urİ zaibar din zettót řáke aiyér, İba ye Jerúsalem ot zai bolla fáisela loiyé. 52 İba ye Nizor age hóborgwa ókkol diferáiyi; İtara zai Samári ókkol or ekkán farat góille, zeéne İba İla beggún entezam góri fare. 53 Lekin heřiyar manúc ókkole İba re kobul nó goré, kiyólla-hoilé İbar sofór accíl de Jerúsalem or uzu. 54 İbar cárít Yakub edde Yohánna ye híyan deki hoór de, “Malik, ańára hókum dí asman ottu ooin nazil góri İtara re fúraifelaitam né?” 55 Montor İba řiri İtara re jejjeřai hoór de, “Tuáñra hondilla ruhr de tuáñra no zano; 56 kiyólla-hoilé Manúc or Fua manúc ókkol or zan dónco gorİfelaito aiccé de no, bóľke basaitó aiccé deh.” Baade İtara ar ekkán farat giyyói. 57 Zeñtté İtara rasta báý zaar, manúc ézzone Isá re hoór de, “Tuñí zeřé zaiba, añí yó heře Tuáñr fisáli zaiyum.” 58 Isá ye yóggwa re hoór de, “Cíyal ókkol ottu gañť asé aar faik ókkol ottu bahá asé, montor Manúc or Fua ttu Nizor matá rakí bolla úddwa honó mikká zaga náí.” 59 Baade İba ye ar ezzon ore hoór de, “Añr fisáli aiyó.” Montor yóggwa ye hoór de, “Malik, age añí zai añr baf ore dohón góri aiyí.” 60 Isá ye yóggwa re hoór de, “Muruda ókkole İtarar nizor muruda re dohón goróukgoi, montor tuñí zai Allar raijor baabute tobolik gorógoi.” 61 Ar ekzone yó hoór de, “Malik, añí Tuáñr fisáli aiccúm, lekin age

añí añr gór or manúc ottu bidai loi aiyí.” 62 Montor Isá ye yóggwa re hoór de, “Zee niki nizor át nahol ot rakí fissá saái táke, yóggwa Allar raijior laayek no.”

10 Yárbaade, Malike oinno hóittor-dui zon ore yó basloiye, baade ítara re dui zon dui zon gorí Nizor age oh cóor edde zaga fottí ekkán ot diferáiyé, zeré-zeré íba Nize zaibo. 2 Íba ye ítara re hoiyé de, “Fósol de bicí asé, montor dooiya bicí hom; hétolla fósol or Malik ore fóriyat goró, Íbar fósol daito dooiya ókkol diferái bolla. 3 Zoo; fúno, Añí tuáñra re bérasóol-or-sóor dóilla góri rangkuñir or mazé diferáir deh. 4 Honó òiañr zali, hóilla, yáh centár no loizaiyó; aar foñt ot honókiyo re sólam no diyó. 5 “Tuáñra ze gór ot góliba, age hoibá de, ‘E gór ot cánti óuk.’ 6 Zodi hére cántir laayek honó manúc táke, tuáñrar cánti yóggwar uore tákibo; montor zodi no táke, tuáñrar hére fíri aázayboi. 7 Hé gór ot tákiyo, aar ítara zín dee híin háiyó edde fiíyo, kiyólla-hoilé muzur toh nizor muzuri faibar laayek. Góre-góre no gúriyo. 8 “Tuáñra ze cóor ot góliba, zodi hériyar maincé tuáñra re kobul goré, tooile tuáñra re zín dee híin háiyó. 9 Hériyar biyaraimma ókkol ore gom goijjó, aar ítara re hoibá de, ‘Allar raijio tuáñrar dáke aáigiyo.’ 10 Lekin tuáñra ze cóor ot góliba, ítara zodi tuáñra re kobul no goré, tooile híyan or goldi-goldi zai hoibá de, 11 “Tuáñrar cóor or dúil zín añárar téng or tollat bazí táikke, añára híin úddwa tuáñrar ulða zárifelair; montor monot raikkó de ki, Allar raijio dáke aáigiyo.’ 12 Añí tuáñra re hoóir, oh dínSódom cóor or túaro hé cóor híyan ottu bicí bordac gorá foribó. 13 “Ó Korazin, tor uore afsús! Ó Betsáida, tor uore afsús! Kiyólla-hoilé ze keramoti ham ókkol tuáñrar bútoze gorá gíyl híin zodi Tayár edde Sídon ot gorá zayto, ítara sálarcoṭ fiñdí edde saí or uore boói boóut age lóti touwá gorífelaito. 14 Montor kiyamot or din Tayár edde Sídon or maincór ttu tuáñrar túaro hom bordac gorá foribó. 15 Aar tui, ó Kaparnahúm, toré kí asman ot bazé fán uore tulá zaybo? Toré toh nise fatalfur ot éna félaidiya zaybo.” (Hadēs 986) 16 Isá ye Nizor cárit tun ore hoór de, “Zee niki tuáñrar hotá fúne, yóggwa ye Añr hotá fúne deh; zee niki tuáñra re inkar goré, yóggwa ye Añré inkar goré deh; zee niki Añré inkar goré, yóggwa ye Añré diferáiyé de Íba re inkar goré deh.” 17

Baade hóittor-dui zon nún kúcir sáañte waafes aiccé, aar hoór de, “Malik, Tuáñr name toh bútt ókkole úddwa añárar hotá manel!” 18 Isá ye ítara re hoór de, “Cóitan bijili somke fángori asman ottu forer de Añí deikkí. 19 Soó, Añí tuáñra re háf edde bissúr uottú añribar edde duccon or hárr taakot or uore kémota diiyí; honó kessú ye tuáñra re hótí gorí no faribó. 20 Lekin bútt-ferot ókkole tuáñrar hotá mane de híyane kúci no óiyo, bókke etollá kúci ó, kiyólla-hoilé tuáñrar nam asman ot leikká asé.” 21 Hétunot Isá ye Pak-Ruhr kúciye furaiya ói hoór de, “Ó Baf, asman zobin or Malik, Añí Tuáñre cúkuriya gorír, kiyólla-hoilé Tuñí iín giyani edde buddíman ókkol ottu lukai rakí gura fuain dor dóilla maincór hañse zahér goijjó. Ói, ó Baf, kiyólla-hoilé Tuáñr ttu híyan bicí fosón laiggé. 22 “Añr Bafe Añré hárr kessú diifélaíye. Fua hon de híyan Bafe bade ar honókiye no zane, aar Baf hon de híyan Fua edde Fua ye zaré zahér goittó saá, yóggwa ye bade ar honókiye no zane.” 23 Baade íba ye cárit tun or uzu fíri, zuitégori hoór de, “Mubarek suk uíin zíine tuáñra deké de híin deké. 24 Kiyólla-hoilé Añí tuáñra re hoóir, boóut nobi edde baáñcca ókkole tuáñra zín deké; tuáñra zín fúnor híin fúni bolla yó azzu goijjíl, montor nó fúne.” 25 Ekbar, Córíyot or ézzon aleme tíyai Isá re entán gorí bolla hoór de, “Ustat, ofúrani zindigi miras faite añr ttu kii gorá foribó?” (aiōnios 9166) 26 Íba ye yóggwa re hoór de, “Córíyot ot kii leikká asé? Tuñí hére kii foijjó?” 27 Yóggwa ye zuwabe hoór de, “Mabud tuáñrar Alla re nizor fura dile, fura zane, fura bole, edde fura demake muhábbot goríba, aar nizor atehañsór maincóre nizor dóilla muhábbot goríba.” 28 Isá ye yóggwa re hoór de, “Tuñí sóiyi zuwab diyó; héndilla gorógoi, tói tuñí basibá.” 29 Montor nizoré sóiyi sábut goríbar kíyale, yóggwa ye Isá ttu fusár gorér de, “Añr atehañsór manúc hon?” 30 Isá ye zuwabe hoór de, “Ekbar, ezzon manúc Jerúsalem ottu nise Jerikót zaar, aar hére dahanit or át ot foijjé. Ítara yóggwar hoorsuor kúlifelai maradóza gorí, adá mora félai giyyégoi. 31 Baade eén óiye, ezzon imam hé foñt báyy zaar, íba ye manúc cwa re deki fachaṛi giyyói. 32 Héndilla, ezzon Leévi yó hé zagat aái manúc cwa re deki, fachaṛi giyyói. 33 Lekin ezzon Samári sofór goitté-goitté manúc cwar íñyot foónicce; aar íba ttu manúc cwa re deki fetfuijje. 34 Tói íba manúc cwar

hañse aái, yóggwar zohóm ókkol ot tel edde anggur or roc dǎlidi faṭṭi bañdídiye; baade yóggwa re nizor gadár uore tulí looi, ekkán musáfer-hánat loizai kérmos goijjé. **35** Tarfor din íba ye dui dinárṭiañ neelai musáfer-hánar girós ore dii hoór de, ‘Yóggwá re kérmos goró; zodi iín or túaro bicí hóssa ó, ańí ailé tuáñre fúnzifelaiyum.’ **36** “Hé ísafe, hé tiní zon ottu, ḡahañit or át ot foijjé de manúc cwar atehañsór manúc honnwá bóuli ṭáaro?” **37** Alem mwa ye zuwab der de, “Yóggwar uore rahám goijjé de íba.” Isá ye yóggwa re hoór de, “Zoo, tuńí yó héndilla gorógoi.” **38** Isá edde íbar cárít tun zaitte-zaitte ekkán farat góille; aar hére Morota nam or eggwá mayafua ye íba re nizor gór ot estekbal goijjé. **39** Híba ttu Moriyam nam or eggwá bóin accíl, zibá ye Malik or téng or gurat boói íbar hotá fúnat accíl. **40** Lekin Morota meéman ókkol olla waán-yián nal goitté-goitté ferecan óigiyoi; híba ye Isár hañse aái hoór de, “Malik, Tuńí no dekór né, ańr bóine hédmot or ham beggún ańí ezzon ore lagaidi táikke dé? Híba re ańré modot goittó hoóna.” **41** Malike híba re zuwabe hoór de, “Morota, Morota, tui boóut kessú lói sintabáfanat edde ferecanit asós, **42** lekin ekkán siz beh zoruri; Moriyame hé gom híssa gán basíloiye deh, aar híyan híba ttu loiféla no zaybo.”

11 Ekbar eén óiye, Isá ye ekkán zagat dua gorér; íba ttu dua goijjá óiye rár, Nizor cárít tun ottu ezzone íba re hoór de, “Malik, ańára re dua gorá ciko, zendilla Yaháya ye yó nizor ummot ókkol ore cíkaiye.” **2** Íba ye ítara re hoór de, “Zeńtté tuáñra dua goró, hoibá de: ‘Ó Baf, Tuáñr nam pak mana zouk. Tuáñr raijjo aiyóuk. **3** Ańára re ańárar din or hána dine doo. **4** Ańárar guná ókkol maf goró, kiyólla-hoilé ańára nize yó de zetará ańára llói hosúri goré ítara re maf gorí. Ańára re entán ot foitto no diyó.’” **5** Baade Isá ye ítara re hoór de, “Dóro, tuáñra honó ezzon ottu eggwá dustó asé, yóggwa ye dustór hañse raitnicít zai hoór de, ‘Dustó, ańré tin nwá ruṭi udár dóh; **6** kiyólla-hoilé ańr ek dustó íbar sofór ot zaitte-zaitte ańr hére aiccé, aar íba re hábai bolla ańr ttu kessú náí.’ **7** Hétunot bútotu táí dustó ye hoór de, ‘Ańré ferecan no goijjó, ehón duwar bańdá, aar ańr fuain edde ańí bisánat. Ańí urí tuáñre kessú dii no faijjum.’ **8** Ańí tuáñra re hoóir, zodi íte nizor dustó de hétolla urí kessú no

diilé yo, toóu yóggwar warawori magar zoriya íte urí yóggwa ttu zedún lager hédun diibo. **9** “Hétolla Ańí tuáñra re hoóir, mago, tuáñra re diiia zaybo; tuwo, tuáñra faiba; duwar baijjo, tuáñra lla duwar kúla zaybo. **10** Kiyólla-hoilé zee niki mage, íte faa; zee niki tuwa, íte tuwai faa; aar zee niki duwar baijja, ítar lla kúla zaybo. **11** “Tuáñrar bútoe endilla baf hon asé, nizor fua ye mas magilé, mas or bodol háf diibo dé? **12** Yáto anda magilé, bissú diibo dé? **13** Hé ísafe, zodi tuáñra hóraf ói baade úddwa tuáñrar fuain dore gom-gom jiníc ókkol dii zano, tóoile tuáñrar asmani Bafe kiyá zetará íba ttu mage ítara re Pak-Ruh no diito?” **14** Ek din Isá ye eggwá buk bút dáfar; bút twa neeligiyói rár, buk accíl de manúc cwa mati faijje, aar híyane manúc ókkol taajup óigiyoi. **15** Lekin ítara hodúne hoór de, “Íbá ye bút ókkol dáfa de bút ókkol or sóddar Belzebul or taakote.” **16** Ar hodúne íba re entán gorár niyote, íba ttu ekkán asmani nicán dabi goijjé. **17** Montor íba ye ítarar báfani re zani ítara re hoór de, “Ze raijjet faáṭa-faáṭi foida ó, híyan toh fána óizagoi; aar ze gór ot faáṭa-faáṭi foida ó, híyan óu toh borbád óizagoi. **18** Héndilla, zodi Cóitan nizor ulḡa nize ó, ítar raijjo kéngori ṭikibó? Kiyólla-hoilé tuáñra hoór de, Ańí bút dáfai de Belzebul or taakote. **19** Toóu zodi Ańí bút dáfai de Belzebul or taakote de óile, tóoile tuáñrar fuain de har taakote dáfa dé? Hétolla tuáñrar bisarhar óibo de ítara. **20** Lekin zodi Ańí bút dáfai de Allar taakote de óile, tóoile toh Allar raijjo tuáñrar hére aáigiyoi. **21** “Zeńtté honó boluwar manúce átiyar findí nizor gór ore faáradi táke, héńtte yóggwar sáman ókkol héfazot táke. **22** Montor zeńtté yóggwar túaro boluwar ezzon aái yóggwa re hámla gorí háraifele, héńtte manúc íba ye yóggwar hé átiyar loizagói ziín or uore yóggwa ye bóraca goittó, aar ziti ziín luṭ goijjé híin baṛidiféle. **23** “Zee niki Ańr híkka no, yóggwa Ańr ulḡa; aar zee niki Ańr fúańti dola no goré, yóggwa ye cínracińṭṭá goré. **24** “Zeńtté honó manúc ottu hóraf jin neele, héńtte hé jin nwá fúana zaga ókkol ot zai aram goittó zaga tuwa. Montor no faile, nizoré nize hoó de, ‘Ańí ańr gór ot waafes zaiyumbói, zentú ańí neeliaiccí.’ **25** Yíba zeńtté waafes aiyé, hé zaga gán sáf goijjá edde ṭík goijjá lootfa. **26** Baade yíba zai aró háńt twa nizor túaro hóraf jin ané, aar híin góli hére táke. Tói hé manúc cwar fisór hálot agor hálot or túaro bicí hóraf óizagoi.” **27** Isá ye

híin hoór de októtt, manúc or dol ottu eggwá mayafua ye guzori íba re hoór de, “Mubarek oh feţ zibát Tuńí accíla, edde oh dud zín Tuńí háaíla.” **28** Hétunot Isá ye hoór de, “Montor uitará aró bicí mubarek, zetará Allar kalam fúne edde amól goré.” **29** Zettót bicí manúc zoma ór, Isá ye howát cúru doiije de, “E zobanar manúc ókkol hóraf; itará nicán dabi goré, montor itará re nobi Yunus or nicán bade ar honó nicán diya no zaybo. **30** Kiyólla-hoilé Yunus zendilla Ninivi cóor or maincór lla nicán óoil, héndilla Manúc or Fua yó e zobanar maincór lla nicán óibo. **31** Kiyamot or din Cibá mulluk or rani e zobanar manúc iín or fúańti uríbo, edde itará re hosúr díbo; kiyólla-hoilé híba ye toh Sóloman or buddír hotá fúni bolla duniyair céc matá ttu aiccíl, aar soó, Sóloman or túaro ɖoóńr Ekzon ińyót asé. **32** Kiyamot or din Ninivi cóor or manúc ókkol e zobanar manúc iín or fúańti tíyaibo, aar itará re hosúr díbo; kiyólla-hoilé ítara toh Yunus or elan fúni touwá goijjíl, aar soó, Yunus or túaro ɖoóńr Ekzon ińyót asé. **33** “Honókiye toh serak dórai lukai yáh bánír or tole raké de náí, bólke boiřónir uore beh raké, zeéne zetará bútoe aiyé ítara foór deké. **34** Tuáńr gaar serak óilde tuáńr suk; hétolla tuáńr suk gom asé de óile, tuáńr guńra gaa foóre furaiya óibo; montor hóraf óile, tuáńr gaa yó andáre furaiya óibo. **35** Hétolla úńciyar, tuáńr bútoe ze foór asé híyan zeéne andár no. **36** Zodi tuáńr guńra gaa foóre furaiya táke aar honó ekkán híssa andár ot nó táke, tóoile toh híyan endilla furafuri foór ot óibo, zendilla serak dóraile tuáńre foór deh.” **37** Isá ye híin boiyan gorér de októtt, ezzon Féroci ye íba re nizor fúańti hána háito dawot diyé; tói íba bútoe zai háito boiccé. **38** Íba ye hána háibar age át nó dúwe de deké, Féroci wa ammúk óigiyoi. **39** Malike yóggwa re hoór de, “Tuáńra Féroci ókkole fiyalar edde tál-basón or baárdák beh sáf goró, montor tuáńrar bútoe toh lalóse edde hórafíye furaiya. **40** Ó fool ókkol, baárdák banaiyé de Alla ye ki bútor or ɖák óu nó bana né? **41** Tuáńra ttu zín asé híin sótka gorífelo, tói tuáńra lla hárr kessú pak-sáf óizayboi. **42** “Ó Féroci ókkol, tuáńrar uore afsús! Kiyólla-hoilé tuáńra toh fudinar, tesfatar edde kétir hárr kisím or hák or doc bák or ek bák doo, lekin Allar insáf edde muhábbot ore bad difélo. Tuáńra ttu iín óu gorón accíl aar uúin óu bad no don accíl. **43** “Ó Féroci ókkol, tuáńrar uore

afsús! Kiyólla-hoilé tuáńra toh mujilíc-hána ókkol ot uńsol tokkar hadírat boitó fosón goró, edde bazare-bazare sólám faito soó. **44** “Tuáńrar uore afsús! Kiyólla-hoilé tuáńra toh ót no faa de hobor or ɖóilla, zín or uottú maincé hoi no fari áńre.” **45** Hétunot Córíyot or alem ókkol ottu ezzone Isá re hoór de, “Ustat, Tuńí de híin hoói añára re yó beizzoti gorór.” **46** Íba ye hoór de, “Ó alem ókkol, tuáńrar uore yó afsús! Kiyólla-hoilé tuáńra toh maincór uore endilla fuńzá tulído, zín boité duk, montor tuáńra nize toh fuńza híin ot eggwá oońl úddwa no lago. **47** “Tuáńrar uore afsús! Kiyólla-hoilé tuáńra toh nobi ókkol or hobor ore banaituló, aar ítara re marifélail de tuáńrar bafɖada ókkole. **48** Héengori tuáńra gobá dó de ki, tuáńra tuáńrar bafɖada ókkole goijjíl de ham ot razi asó; kiyólla-hoilé nobi ókkol ore marifélaiye de toh ítara, aar ítarar hobor ore banaituló de tuáńra. **49** Hétolla toh Alla ye Nizor giyane endilla hoiyé, ‘Ańí ítarar hańse nobi edde rosúl ókkol diferáiyum, ítara héntu hodún ore marifélaibo edde hodún ore zulúm goríbo. **50** Hétolla duniyair foidayecir héńtte lóti zedún nobi ókkol or lou báca gíyeh, híin beggún or zimmadar óibo de e zobanar manúc ókkol, **51** Abel or lou wóttu lóti oh Zakaríyahr lou foiijjonto, zibá re kurbani-gáńr edde pak zagar mazémaijja kún gorá gíyeh. Ói, Ańí tuáńra re hoóir, híin or zimmadar óibo de e zobanar manúc ókkol.’ **52** “Ó Córíyot or alem ókkol, tuáńrar uore afsús! Kiyólla-hoilé tuáńra toh buddír sabí loifélaio; tuáńra nize yó nó gólo, aar góler de ítara re yó oońsi raikkó.” **53** Isá héntu neeli zaargói de októtt, alem edde Féroci ókkole rak gorí íba re ɖoilla-boɖoilla súwal ókkol gorát doiije, **54** aar héengori ítara íba re íbar hotá lói hol ot félaio soońi gorí accíl.

12 Hé októtt, zeńtte edún ázar-ázar manúc zoma óiye zeén níki ítara ezzon or uore ezzon forer, Isá ye ebbe age Nizor cárit tun ore howá cúru goijjé de ki, “Féroci ókkol or cútar ottu úńciyar táikko, yáni ítarar munaféki ttu. **2** Kiyólla-hoilé zahér no óibo de héndilla honó jiníc gúijja náí, aar zana no zaybo de héndilla honó jiníc lukaiya náí. **3** Hé ísafe, tuáńra zín andár ot hoiyó, híin foór ot fúna zaybo; aar zín bútor or kamára ókkol ot fúcucaiyoi, híin gór or sád or uottú elan gorá zaybo. **4** “Ó añr dustó ókkol, Ańí tuáńra re hoóir, uitará re no

dooraiyó zetará haiya re kotól goré montor yárbaade ar kessú gorí faribár no táke. **5** Lekin Añí daháidi tuáñra ttu haré ñooro foribó: Ubá re ñooro zibá ttu tuáñr haiya re marifélai baade zuzuk ot félaidibar kémota asé. Ói, Añí tuáñra re hoóir, íba re beh ñooro. (Geenna g1067) **6** Fañs swá fíañjja ki hom ñiañ loi no bese né? Toóu híin or bútotu Alla ye eggwá re yó no foóra. **7** Becók tuáñrar matár sul úddwa beggún íba ttu gona asé. No ñooraiyó, tuáñrar kimot boóut fíañjja ókkol or túaro bicí. **8** “Añí tuáñra re hoóir, zee niki Añré maincór muúntu cíkar goré, yóggwa re Manúc or Fua ye yó Allar fírista ókkol or muúntu cíkar goribó. **9** Montor zee niki Añré maincór muúntu inkar goré, yóggwa re Allar fírista ókkol or muúntu inkar gorá zaybo. **10** Honókiye Manúc or Fuar hélaf honó hotá hoilé, yóggwa re toh maf gorídiya zaybo; montor zee niki Pak-Ruhr kuféri goré, yóggwa re maf gorídiya no zaybo. **11** “Zeñtté maincé tuáñra re mujilfc-hána ókkol ot, edde hákim edde adikari ókkol or hañse loiza, héñtte hondilla yáh kii zuwab diba yáto kii hoibá de sinta no goijjío; **12** kiyólla-hoilé tuáñra ttu zín howá foribó, híin tuáñra re Pak-Ruh ye hétunot cíkaidibo.” **13** Manúc or dol lwá ttu ezzone Isá re hoór de, “Ustat, añr báí ore añár lói miras bák gorífelaito hoó.” **14** Montor íba ye yóggwa re hoór de, “O miyañ, Añré tuáñrar bisarhar yáh bák goridoya hone banaiyé?” **15** Tarfore íba ye ítara re hoór de, “Hóboroddar, hárr kisím or lalsí ttu basi táikko; kiyólla-hoilé insán or zindigi nizor ñal-ñal dón-cómbottir uore no.” **16** Íba ye ítara re ekkán meésal hoiyé, ki hoilé, “Ezzon dónir zobin ot bicí fósol dóijje. **17** Yóggwa ye nizorgá nize báfer de, ‘Añí kii goittám, añr ttu de fósol zoma rakíbar zaga náí?’ **18** “Yóggwa ye hoór de, ‘Añí endilla goijjím: añr gudam ókkol bāñgifelai ñoóñr-ñoóñr góri banaiyúm, aar añr fósol edde mal-sámana beggún hére rakíyum. **19** Baade añí añr ruh re hoiyúm de, ó ruh, tor ttu boóut bosór olla bicí kúraf asé. Yala cúk gór, háafiya gór edde kúci ták.’ **20** “Montor Alla ye yóggwa re hoór de, ‘Ó fool, aijja raitta de tor zan loiféla zaybo; tói tui zín zoma goijjíos híin har óibo?’ **21** “Héndilla óilde manúc ubá, zee niki nizor lla dón zoma goré, montor Allar nozor ot tuangor no.” **22** Yárbaade Isá ye íbar ummot ókkol ore hoór de, “Hétolla Añí tuáñra re hoóir, kii háiyum hoóí zindigi lla sinta no goijjío, aar kii fíndíyum hoóí gaa lla sinta no goijjío. **23** Kiyólla-

hoilé zindigi toh hánar túaro kimoti, aar gaa toh hoorsuor or túaro kimoti. **24** Hawa ókkol or baabute báfiso; híine toh no cíñre, no daa, aar no híin ottu gudam yáh hañjja asé; toóu Alla ye híin ore háaba. Tuáñra toh faik ókkol or túaro bicí kimoti. **25** Tuáñra hone sinta gorí nizor hoíyat ore ek gónða barái faribá de asó? **26** Tuáñra héttirin ham mán úddwa gorí no faille, oinno siz olla kiyá sinta goró? **27** “Fúl ókkol or baabute báfiso, híin keéngori barí uré deh; híine toh no meénnot goré, aar no fúñta hare; montor Añí tuáñra re hoóir, baáñcca Sólomane úddwa yóggwar tamám dón-doulot loi híin ekgwár dóilla nizoré hāñzai fíijjé de náí. **28** Hétolla, zodi Alla ye moidan or kér ore héndilla góri hāñza, zín aijja asé aar hailla ooin ot félaidiya zah; tóoile ó hom biccác ola ókkol, íba ye tuáñra re aró hotó hāñzaibo fāñllar? **29** Kii háiba yáh kii fííba híin or talac ot fori no táikko; híin or baabute sinta no goijjío. **30** Kiyólla-hoilé duniyair bedini ókkole éna híin beggún or fisé lagi táke, montor tuáñra ttu híin lager de híyan tuáñrar Bafe zane. **31** Yárbodol Allar raijor talac ot táko, tói tuáñra re híin beggún óu diiya zaybo. **32** “Ó bérasóol or gura zák, no ñooraiyó, kiyólla-hoilé tuáñrar Baf ottu tuáñra re raijjo diiya fosón laiggé. **33** Tuáñrar jiníc ókkol besi sotka gorífelo, aar nizor lla endilla ñiañr zali toiyar goró zibá furan ói no zagói, yáni asman ot endilla dón-cómbotti zoma goró, zín honódin no fúra, zere sur ñáke nu aiyé aar fuke nac no goré. **34** Kiyólla-hoilé tuáñrar dón-cómbotti zere, tuáñrar dil tákibo de yó hére. **35** “Tuáñra guñ doh edde serak dórai rakó. **36** Tuáñra yó undilla manúc or dóilla ó zetará nizor girós boirat ottu hoñtté waafes aibó de híyan or entezar ot táke, zeéne yóggwa aái duwar baijjaile mottor yóggwa re duwar kúlidi fare. **37** Mubarek goóur uitará zetará re girós ailé sooñi táikka lootfa. Añí tuáñra re sóiyi hoóir, yóggwa ye keeñil bañdí hé goóur ókkol ore hána háito buágaraiibo, aar ñáke aái ítara re hána hábaibo. **38** Zodi yóggwa ye adá raitta yáh yárbaade ailé yo ítara re toiyar táikka lootfa, tóoile hé goóur ókkol toh mubarek. **39** “Lekin yíán zani rakó de ki, zodi gór or giróse sur hoñtté aibó de zainto, yóggwa ye nizor gór ore bāñgito no dito. **40** Tuáñra yó toiyar táko, kiyólla-hoilé Manúc or Fua tuáñra no ñáaro de októót beh aibó.” **41** Hétunot Fitore hoór de, “Malik, Tuñí e meésal lan añára re hoór de né

náki beggún ore?” 42 Malike hoór de, “Tóoile eén biccácdaredde buddíman mazi hon asé, zaré ítar giróse nizor oinno goóur ókkol or uore zimmadar banaibó, ítara re ɽaim or uore hána baɽidi bolla?” 43 Mubarek goóur ubá zaré nizor giróse waafes ailé ham híin gorér de lootfa. 44 Añí tuáñra re sóiyi hoóir, yóggwa ye nizor tamám cómbottir uore ítare zimmadar banaibó. 45 Lekin zodi hé goóure nizor dile-dile endilla hoó, ‘Añr girós aité boút deri asé,’ aar íte oinno goóur edde bañdi ókkol ore marat dore edde háafiya gorí tuúl óizagoi; 46 tóoile hé goóur or girós eén din ot aibó, ze din íte yóggwa aibó de no ɽáare, edde eén októót aibó, ze októót íte hoi no fare. Tói yóggwa ye ítare haɽi hán-hán gorífelaibo edde nafórman ókkol or hére cámil goríbo. 47 “Ze goóure girós or moncá re zane montor toiyar nó yáto yóggwar moncá mozin nó goré, íte bicí fiɽa háibo; 48 montor zee niki no zani, fiɽa há de héndilla ham goré, íte bicí hom fiɽa háibo. Kiyólla-hoilé zaré bicí diiya giyé, ítar ttu bicí dabi gorá zaybo; aar zaré bicí gosáidiya giyé, ítar ttu aro bicí maga zaybo. 49 “Añí duniyait ooin zolaidito aiccí deh, zodi age lóti zolaiya óito, Añí keén kúci óitam! 50 Lekin Añr ttu eggwá báptisma loibar asé, yíba nó loi foijjonto Añí keén ferecanit así! 51 Añí duniyait cánti diito aiccí bóuli ɽáaro níki? Añí tuáñra re hoóir, no, bólke faáɽa-faáɽi foida goittó aiccí deh; 52 kiyólla-hoilé ehón ottu lóti ek góor or fañs zon manúc alok-alok óizayboi: tin zon dui zon or ulɽa, aar dui zon tin zon or ulɽa. 53 Ítara endilla alok óizayboi: fuar ulɽa baf, baf or ulɽa fua, zérfuar ulɽa maa, maar ulɽa zérfua, bou wór ulɽa hóuri, aar hóurir ulɽa bou.” 54 Íba ye manúc ókkol ore yó hoór de, “Fosím ottu miyúla urér de dekilé tuáñra toratori hoó de, ‘Zór aibó,’ aar borabor héndilla ó. 55 Aar doóinali boiyar bailé hoó de, ‘Gorom foribó,’ aar héndilla ó. 56 Ó munafék ókkol! Tuáñra toh zobin or edde asman or súrot saái moósum forók gorí zano, montor ehón or zobana re kiyá forók gorí no zano? 57 “Tuáñra nize kiyá ziyán sóiyi híyan or fáisela no goró? 58 Zeñtté tuñí tuáñr duccon or fúañti bisarhar or hañse zoo, héñtte foñt ot tákite ítar lói maamela hól gorífelaibar kucic goijjó, arnoíle íte tuáñre bisarhar or át ot gosáidibo, aar bisarhare tuáñre fulic or át ot gosáidibo, baade fulice tuáñre ziyól maribó. 59 Añí tuáñre hoóir, tuñí ahéri foicá nó doo foijjonto héntu hálás ói no faribá.”

13 Hé októót hére endilla hodún manúc házir accíl, zetará Isá re Galil or manúc uitarár baabute hóbor díyl zetará re baitul-mukaddos ot kurbani dibarcót Filate kotól goijjíl. 2 Isá ye ítara re zuwabe hoór de, “Galil or manúc ítarar uore hé docá gán óiye de híyan olla tuáñrar kíyal ot kí ítara Galil or oinno manúc beggún or túaro bicí gunágar accíl? 3 Añí tuáñra re hoóir, no, bólke touwá no goríle, tuáñra beggún óu héndilla hálak óizaybagoi. 4 Yáh ze añraro zon manúc Sílom or minár fori morigiyoí, tuáñrar kíyal ot kí ítara Jerúsalem ot táke de oinno manúc beggún or túaro bicí gunágar accíl? 5 Añí tuáñra re hoóir, no, bólke touwá no goríle, tuáñra beggún óu héndilla hálak óizaybagoi.” 6 Tarfore Isá ye e meésal lan hoiyé: “Ezzon maincé nizor bagan ot eggwá ñuñir-gas lagaáil. Yóggwa ye gas swát gula tuwaitó aiccíl, montor eggwá yó nó faa. 7 Hétolla yóggwa ye bagan sóoñloya re hoór de, ‘Saá, añí tin bosór foijjonto e ñuñir-gas swát gula tuwaitó aiyír, montor eggwá yó nó fai. Yibá re harífela, yibá ye hánnak meɽi kiyá esternal goittó?” 8 “Sóoñloya ye yóggwa re zuwabe hoór de, ‘Ó malik, yibá re e bosór óu tákito dóh, añí yibár sairókul ttu kurí fáñic díyum. 9 Baade zodi aiyér de bosór gula dóre, tóoile ɽík asé; montor zodi no dóre, harífelaiyo.” 10 Ek ebaadot-or-din Isá ekkán mujilíc-hánat taalim der. 11 Hére endilla eggwá mayafua accíl zibá re eggwá hóraf jine biyaraimma banai raikké de añraro bosór óiye. Yóggwa guza accíl, aar bílkúl uzu ói no faitto. 12 Isá ye yóggwa re deki, ñáke matai hoór de, “O hála, tuñí tuáñr biyaram ottu azad óiyo.” 13 Tarfore íba ye yóggwar uore át díye, tói ehon-ehon yóggwa uzu óigiyoi aar Allar taaríf gorát doiije. 14 Lekin mujilíc-hánar sóddare, Isá ye ebaadot-or-din biyaraimma gom goijjé de hétolla guccá góri manúc ókkol ore hoór de, “Ham goittó sów din asé; hétolla din híin ot aái gom óiyogai, ebaadot-or-din no.” 15 Montor Malike yóggwa re zuwabe hoór de, “Ó munafék ókkol, tuáñra fottíkíye kí ebaadot-or-din nizor doónra goru re yáh gadá re ura ttu kúli faní hábaito no loizo né? 16 Tói e mayafua, zibá íbrahim or zérfua, zibá re Cóitane añraro bosór fán bañdí raikkíl, yoggwá re kí ebaadot-or-din hé bañdá ttu azad gorídiya no zah né?” 17 Íba ye híyan hoiyé rár, íbar muhálef-goróya beggúne córom faiyé; aar íba ye ze taajuippa ham goittó híne awam ókkol beggún kúci óiye.

18 Tóí Isá ye hoór de, “Allar raijjo kiyór ðóilla? Híyan ore Añí kii loi borabor goittám? 19 Híyan óilde eggwá hóroir danar ðóilla, zibá re ézzon manúce looi nizor kétit lagayégoi; yíba barí urí eggwá gas boinné, aar faik ókkole yíbar déeila ókkol ot bahá baindé.” 20 Íba ye abar hoór de, “Añí Allar raijjo re kii loi borabor goittám? 21 Híyan óilde cútár or ðóilla, zifn ore eggwá mayafua ye looi tokoriban ekkuri tin cér aţat miyáíye, baade guńra hańi or dola fúli uitté.” 22 Isá cóore-cóore edde fara-fara taalim di-di, Jerúsalem or uzu zaat doiije. 23 Ezzone íba re hoór de, “Malik, nejat foya hom níki?” Íba ye ítara re hoór de, 24 “Siyon doroza báy góli bolla zan-forane kucíc goró, kiyólla-hoilé Añí tuáńra re hoór, boóut zon góilto kucíc goríbo montor no faribó. 25 Zeńtté gór or giróse urí duwar bańdífelaibo, tuáńra baáre tíyai duwar bajjai-bajjai endilla howát doriba, ‘Ó Malik, ańára lla duwar gán kúlo.’ “Montor íba ye tuáńra re zuwabe hoibó de, ‘Añí no zani tuáńra horíyar.’ 26 “Hétunot tuáńra howát doriba de, ‘Ańára toh Tuáńr fúańti háafiya goijjílám, aar Tuńí ańárar rasta-rasta taalim dita.’ 27 “Montor íba ye hoibó de, ‘Añí tuáńra re hoór, Añí no zani tuáńra horíyar. Kuham-goróya ókkol, tuáńra beggún Ańr héntu dur ó.’ 28 “Héře tuáńra hańdahari goríba edde date dat kirkiraibá zeńtté tuáńra dekíba de, Ibrahím, Isahák, Yakub edde tamám nobi ókkol Allar raijjo bítore, montor tuáńra re baáre félaidiya gíyeh. 29 Aar manúc ókkol fuk, fosím, utton, edde doóin ottu aái Allar raijjo háito boibó. 30 Becók, zetará ehón fisé asé, ítara age óizayboi; aar zetará ehón age asé, ítara fisé óizayboi.” 31 Hé októť hoozzon Féroci ye aái Isá re hoór de, “Tuńí e zaga ttu honó mikká zoogói, kiyólla-hoilé Héřud ottu Tuáńre marifeilto monehoór.” 32 Íba ye ítara re hoór de, “Zoo, hé cíyal ore hoibá de, ‘Añí aijja edde hailla búť dáfaikum edde biyaraimma ókkol ore gom goríyum, aar tin đin ot đin Ańr moksót fura óibo.’ 33 Zeén óibo óuk, Ańr ttu aijja, hailla edde foórur uzu sofór gorá foribó; kiyólla-hoilé honó nobir moot toh Jerúsalem or baáre ói no fare. 34 “Jerúsalem, ó Jerúsalem, tui zee niki nobi ókkol ore kotól gorós edde zetará re tor héře diferá gíyeh ítara re cíl or dola maros. Kuńńri-kurá ye zendilla nizor sóo ókkol ore yíbar fak or bítore zoma gorí raké, héndilla tor fuain dore zoma gorí rakí bolla Añí hotó bar saiyí de asé, montor tuáńra híyan nó soó.

35 Fúno, tuáńrar gór tuáńrar suk or muńtu sáragor óizayboi. Añí tuáńra re hoór, tuáńra Ańre etókkal no dekíba zetókkal tuáńra nó hoó de, ‘Mubarek Ubá zibá Mabud or name aiyér.’”

14 Ekbar eén óiye, ek ebaadot-or-din zeńtté Isá Féroci ókkol or ezzon sóddar or gór ot hána háito giiyé, manúc ókkole íbar uore háas nozor raikkíl. 2 Héře íbar muńtu endilla ezzon manúc accíl zibá ttu fúla biyaram asé. 3 Isá ye alem edde Féroci ókkol ottu fusár gorér de, “Ebaadot-or-din biyaram gom goríbar zayes asé né náí?” 4 Montor ítara nizám mári táikkil. Íba ye manúc cwa re áte dóri gom goijjé, baade duńraidiyé. 5 Tarfore íba ye ítara re hoór de, “Tuáńrar bítore endilla hon asó, zee niki nizor fua yáh doóńra-goru ebaadot-or-din kuwat forilé, yíba re éhon-éhon tulí no loiba de?” 6 Montor ítara híyan or honó zuwab di nó fare. 7 Isá ye zeńtté dawot faiyé de meéman ókkole hondilla gori izzoitta zaga basíloor de deikké, íba ye ítara re ekkán meésal diyé: 8 “Honókiye tuáńre boiraitta hánat dawot díle, zai yore izzoitta zagat no boiccógói, kiyólla-hoilé óitofare yóggwa ye tuáńr túaro izzotdár ézzon ore dawot diyé. 9 Zodi boiyó, zee niki tuáńre edde íba re dawot diyé, yóggwa ye aái tuáńre hoibó de, ‘Tuáńr zaga gán e manúc cwa re doo.’ Hétunot tuáńr ttu córom fai, nisor zagat zai buá foribó. 10 Yárbodol, dawot faile, zai yore nisor zagat boiccógói, zeéne zee niki tuáńre dawot diyé, yóggwa ye aái hoó de, ‘Dustó, uoror zagat zai boiyógói.’ Hétunot tuńí tuáńr fúańti hána háar de ítara beggún or muńtu izzot faiba. 11 Kiyólla-hoilé zee niki nizoré nize doóńr kúwala, ítare cóńro gorá zaybo; aar zee niki nizoré nize cóńro kúwala, ítare doóńr gorá zaybo.” 12 Baade Isá ye zee niki íba re dawot diyé yóggwa re hoór de, “Tuńí duńńijjar yáh biyal or hána goríle, tuáńr dustó ókkol ore, báiyain dore, eganaguiccí re, yáh atehańsór tuangor ókkol ore dawot no diyó; zodi doh, ítara yó waafes tuáńre dawot di fúńzaydibo. 13 Yár túaro, tuńí hána goríle, lulá, leng, edde ańdá manúc ókkol ore dawot diyo, 14 tóí tuńí borhot faiba, kiyólla-hoilé ítara toh tuáńre fúńzaidi no faribó; aar forhésgar ókkol háńcor-or-din zinda ói uríbo de híyala tuńí bodola faiba.” 15 Isár fúańti hána háito boiccé de ítara ttu ezzone híyan fúni hoór de, “Mubarek ubá zibá ye Allar raijjo hána háibo.” 16 Íba ye yóggwa re hoór

de, “Ezzon maincé eggwá ðoóñr hána goijjé, aar boóut kiyó re dawot diyé. 17 Hánar októ óiye rár, ítara re endilla hoói matai bolla yóggwa ye nizor goóur difeṛáíye, ‘Aiyó, yala beggún toiyar óiye.’ 18 “Montor ítara zon-zon beggúne bahána diyat doijje. Foóilar íte hoór de, ‘Añí ekkán zaga kinní, añr ttu híyan saitó zaa foribó; meérbani góri añré maf goró.’ 19 “Ar ezzone hoór de, ‘Añí fañs zura doóñra-goru kinní, añí híin háribo né saitó zair; meérbani góri añré maf goró.’ 20 “Aró ézzone hoór de, ‘Añí noya-noya biyá goijjé deh; añí aái no faijjum.’ 21 “Tói goóur gwá aái tar girós ore híin zanaíye. Baade gó or giróse guccá góri nizor goóur ore hoór de, ‘Toratori cóor or rasta-rasta edde goldi-goldi zai gorif, mazur, ańdá edde leng ókkol ore angói.’ 22 “Tarfore goóur gwá ye hoór de, ‘Malik, tuńi zeén hókum goijjé héen goijjé óiye, lekin aijjé zaga háli asé.’ 23 “Giróse goóur gwá re hoór de, ‘Baáre rasta-rasta edde fońté-fońté zaa, zai manúc ókkol ore eṛé ai bolla mojbur gorif, zeéne añr gór bórizagoi. 24 Kiyólla-hoilé añí tuáñra re hoóir, zetará re dawot diya giyé, ítara honókiye añr hána háli no faribó.’” 25 Ekbar zeńtté becábici manúc Isár fúańti zaat accíl, íba ye fíri ítara re hoór de, 26 “Zee niki Añr hére aiyé yóggwa ye nizor baf, maa, bou, fuain, báiyain edde bóinain ore, bólke nizor zan ore úddwa Añré goré de yár túaro hom muhábbot no goillé, yóggwa Añr ummot ói no fare. 27 Zee niki nizor kúruc no boói Añr fisáli dore, yóggwa Añr ummot ói no fare. 28 “Kiyólla-hoilé tuáñrar bútere endilla hon asé, ekkán minár banaitó sailé age boói nizor ttu híyan furafuri banai bolla kula de hédun tiań-foicá asé né náí kiyas no goríbo dé? 29 Arnóile toh zeńtté yóggwa ye guijja gán tulí baade guñra tulí no fare, zetará dekišo ítara beggúne yóggwa re téceraibo, 30 eén hoói, ‘E manúc cwa ye bana cúru goijjé, montor guñra tulí nó fare.’ 31 “Yáto, endilla baáńcca hon asé, arek baáńcca llói larái goittó zaibar tákile age boói nizor doc ázar fóous lói, nizor hélaf aibó de kuri ázar fóous or mukabela gorí faribó né no faribó kiyas no goríbo dé? 32 No faribó de óile, yóggwa ye duré tákite nomainda difeṛái, bonizaybói lla corót or aros goríbo. 33 Borabor héndilla, tuáñra ttu zee niki nizor hárr kessú eri no deh, yóggwa Añr ummot ói no fare. 34 “Nun toh gom jiníc, montor zodi nun or dok zaagói, tóoile híin ore keńgori abar nuncá gorá zaybo? 35 Híin toh no zobin olla ham aiyé aar no fáńic

ísafe ham aiyé; maincé híin ore baáre félaide. “Zar ttu fúniabar han asé, yóggwa ye fúno.”

15 Tamám házana-tulóya edde gunágar ókkol Isár hotá fúni bolla íbar hańse aitó. 2 Montor Féroci ókkole edde alem ókkole endilla hoói cékayot gorát doijje, “E Manúc cwa ye gunágar ókkol lói miyáń, aar ítara fúańti hána háa.” 3 Hétunot íba ye ítara re e meésal lan hoíyé: 4 “Dóro tuáñra honó ezzon ottu ek cót bérasóol asé, zodi héntu eggwá áńzizagoi, tóoile íte kí nobboi-now wa re kílat eri, áńzigiyoi de yíba re tuwai nó faa foiijjonto no tuwaibó né? 5 Íte tuwai faile toh kúciye yíba re hańd ot loibo, 6 aar gór ot aái ítara fúańijja edde atehańsór manúc ókkol ore matai hoibó de, ‘Añr fúańti kúci gorógai, kiyólla-hoilé añí añr áńzigiyoi de bérasóol lwá tuwai faiyí.’ 7 Añí tuáñra re hoóir, ńík héndilla, touwá gorá no fore de nobboi-now zon forhésar or túaro ezzon gunágar touwá goillé asman ot aró bicí kúci óibo.” 8 “Yáh, dóro eggwá mayafua ttu doc cán rufar foicá asé, zodi héntu ekkán foicá áńzizagoi, tóoile híba ye kí serak dórai gór kuuńsai híyan ore tuwai nó faa foiijjonto cúndorgori no tuwaibó né? 9 Híba ye tuwai faile toh nizor fúańijjani edde atehańsór manúc ókkol ore matai endilla hoibó, ‘Añr fúańti kúci gorógai, kiyólla-hoilé añí añr áńzigiyoi de foicá gán tuwai faiyí.’ 10 Añí tuáñra re hoóir, ńík héndilla, ezzon gunágar touwá goillé Allar fírista ókkol or muńtu kúci ó.” 11 Isá ye aró hoór de, “Eggwá maincór ttu duwá fua accíl. 12 Ítara ttu cóńro wa ye baf ore hoór de, ‘Abá, añr borat ot fore de cómbotti añré diifélo.’ Tói bafe nizor cómbotti ítara re borat gorídiye. 13 “Hooddin baade, fua cóńro wa ye nizor hárr kessú dola gorí looi ekkán durór mulluk ot giyégoi, aar hére íte monzakká soli nizor cómbotti sáhar gorifelaye. 14 Zeńtté ítara ttu hárr kessú hóros gorifelaya óiye, hé mulluk ot eggwá ðoóñr raṛ óiye, aar íte muńtac ot forat doijje. 15 Tói íte zai hé mulluk or ezzon bácinnda ttu ham saiyégoi, aar yóggwa ye ítara cúwor sorai bolla nizor kílat difeṛáíye. 16 Cúwor gúne ze gas or sóńi ókkol háito, ítara ttu híin háli feṭ bóraitó monehoitó, montor honókiye ítara no diito. 17 “Fore íte buzón ot aái hoór de, ‘Añr baf or edún muzur ókkole háito becábici hána faar, aar añí toh eṛé búkke morir! 18 Añí urí añr baf or hére zaiyumbói, zai íba re hoíyúm de: Abá, añí Allar edde tuáñr ulḁa hosúri goijjé. 19

Añré ar tuáñr fua hoibár laayek no; añré tuáñr eggwá muzur or dóilla góri rakó.’ 20 Tóí íte urí baf or hére giyyé. “Íte duré táite itare deki baf ottu fetfuijje, aar duñri zai itare añza mari appá díye. 21 “Fua ye baf ore hoór de, ‘Abá, añí Allar edde tuáñr ulða hosúri goijjí, añré ar tuáñr fua hoibár laayek no.’ 22 “Montor bafe nizer goóur ókkol ore hoór de, ‘Toratori ebbe barík zubba aní itaré fiñdáido; itar át ot oónri diyaído aar téng ot cenjár fiñdáido. 23 Goru boli wa aní zooró. Añára hái kúci-áci gorí. 24 Kiyólla-hoilé añr e fua wa mora accíl, montor abar zinda óiye; ite áñzigilgoi, montor yala faa giyyéh.’ Tarfore itara beggúne kúci gorát doijje. 25 “Héñtte yóggwar fua doóñr gwá kítit accíl; íte gór or dake foónicce rá, talbazanar edde nas or abas fúinne. 26 Hétunot íte eggwá goóur ore matai, eřé kii ór de fusár goijjé. 27 Tee itare hoór de, ‘Tuáñr báí waafes aiccé, aar tuáñr bafe goru boli wa zooráye, kiyólla-hoilé yóggwa ye itare sóiyi-sólámote firai faiyé.’ 28 “Híyan fúni íte guccá óigiyoi aar bútoře góilto no sar. Montor baf baáre aái, itare manat doijje. 29 Lekin íte baf ore zuwabe hoór de, ‘Soó, etó bosór fán añí tuáñr gulami gorí-gorí aiyír, aar añí tuáñr hókum honódin no mani nó táki; toóu tuñí añré añr dustó ókkol or fúañti kúci-áci gorí bolla eggwá sóol or sóo úddwa honódin diiyó de náí. 30 Montor tuáñr fua ite zeñtté aiccé, zee niki tuáñr cómbotti magi ókkol lói fúrafelaiye, tuñí ítar lla goru boli wa zooráyo. 31 “Hétunot bafe itare hoór de, ‘O fut, tui toh añr fúañti hámica asós, aar añr ttu zúin asé híin beggún de tor. 32 Montor añára ttu yala kúci-áci edde mela gorár zorur, kiyólla-hoilé tor báí ibá mora accíl, aar abar zinda óiye; áñzigilgoi, yala faa giyyéh.”

16 Isá ye cárit tun ore yó hoór de, “Ezzon tuangor manúc ottu eggwá zimmadar accíl, hé zimmadar gwá ye yóggwar dón-cómbotti sárhar gorífeler hoói yóggwar hañse hóbor foónicce. 2 Tóí yóggwa ye itare matai fusár gorér de, ‘Añí tor baabute iín kii fúnir? Tor zimmadari ham or ísaf déh, kiyólla-hoilé tui ar zimmadar táki no faribí.’ 3 “Hétunot zimmadar gwá ye nizoré nize hoór de, ‘Yaa añí kii goittám? Añr giróse de añr ttu zimmadari ham loifeler. Añr ttu de meři harító bol náí, aar hórat magité yó córom lage. 4 Añí kii goijjúm de zani fajjí, zeéne zeñtté añr ttu zimmadari ham loiféle, maincé añré ítarar gór ot zaga dee.’ 5 “Tóí íte zon-

zon gori girós or footidár ókkol ore mataiyé, matai foóila wa re hoór de, ‘Añr giróse tuáñr ttu footi hodún faar?’ 6 “Tee hoór de, ‘Now cót gelómzaitun tel.’ “Íte hoór de, ‘Tuáñr bil lán loo, toratori boói sair-có fonzaic gelóm lekído.’ 7 “Tarfore íte ar ezzon ore hoór de, ‘Tuáñr ttu hodún faar?’ “Tee hoór de, ‘Fonzaic mongiyuñ.’ “Íte taré hoór de, ‘Tuáñr bil lán loo, looi salic mon lekído.’ 8 “Giróse hé beiman zimmadar or saláki ham deki taarif goijjé; kiyólla-hoilé e duniyair manúc ókkol nizor dóilla manúc lói solafira gorát, nur or manúc or túaro bicí salák. (aiñ g165) 9 Añí tuáñra re hoór, duniyaibi dón-doulot lói nizor lla dustó bano; zeéne zeñtté híin fúraizagoi, itara tuáñra re abadulabadi zagat kobul goré. (aiñios g166) 10 “Zee niki hom ot imandari táke, yóggwa ye bicít óu imandari táke; aar zee niki hom ot beimani goré, yóggwa ye bicít óu beimani goré. 11 Hé ísafe, zodi tuáñra duniyaibi dón-doulot ot imandari no táko, tóoile tuáñra re bóraca gorí asól dón hone diibo? 12 Aar zodi tuáñra ar ezzon or gún ot imandari no táko, tóoile tuáñrar gún tuáñra re hone diibo? 13 “Honó gulame dui girós or hédmot gorí no fare; kiyólla-hoilé íte ezzon ore nafórot goríbo aar ar ezzon ore muhábbot goríbo; yáto ezzon loi tík tákibo aar ar ezzon ore hékarot goríbo. Tuáñra ekkú fúañti Allar edde dón-doulot or hédmot gorí no faribá.” 14 Féroci ókkole híin beggún fúni Isá re técerat doijje, kiyólla-hoilé itara tñar lalósbon accíl. 15 Íba ye itara re hoór de, “Tuáñra óilade uitará zetará maincór muuntu nizoré nize forhéggar kúwalo, montor Alla ye tuáñrar dil zane. Ziyán maincór nozor ot bicí kimoti híyan Allar nozor ot honó kimot náí. 16 “Tourat edde nobi ókkol or kitab, Yaháya foijjonto soillíl; yárbaade lóti Allar raijor kúchóbor tobolik gorá zar, aar fottikiye zuresúre híyan ot gólat asé. 17 Lekin Tourat Córif or ekgwá noktá búzi zar túaro, asman zobin ofát ówa aro aásan. 18 “Zee kiyé nizor bou wóre sárifelai ar eggwá re biyá goré, íte zená gorér deh; aar zee kiyé zamair sárifelaiya mayafua re biyá goré, íte yó zená gorér deh. 19 “Ezzon endilla tuangor manúc accíl, zibá ye bayoinna rong or edde dami-dami hoor fiñdíto, aar fottí din ayaci-kúci gorí tákito. 20 Ítar geit ot Lasár nam or ézzon hórat-magoya re raká záyto, yóggwa gáaye furaiya accíl. 21 Yóggwa ttu tuangor manúc cwar mes ottu forizaytói de hána lói fet bóraitó monehoitó. Aar kuñir ókkole

aái yóggwar gáa ókkol lekíto. **22** “Fore eén óiye, hé gorif manúc cwa morigiyói aar fírista ókkole yóggwa re Ibrahím or hére loigiyói. Ek din tuangor manúc cwa yó morigiyói aar dohón gorá gíyeh. **23** Íte zuzuk ot azab faar de héntu uormikká saiyé rár, duré Ibrahím ore edde íbar dák ottu Lasár ore deikké. (Hadēs 986) **24** Hétunot íte guzori hoór de, ‘Ó baf Ibrahím, añr uore rahám gorí Lasár ore añr hére difeřó, zeéne yóggwa ye fanít mazé nizor ooñl or matá burai añr zir tándá goré, kiyólla-hoilé añi e ooin ot bicí toziya fair.’ **25** “Montor Ibrahíme hoór de, ‘O fut, táar gorí saá, tui tor zindigit gom-gom jiníc ókkol lói hotó cúk goijjili, aar Lasáre hotó duk faail; montor yala yóggwa eřé cánti faar, aar tui toziya foór. **26** Lín beggún baade, tor edde añárar dormiyan ot dooñr dumburu asé, zeéne entú tor hére zaito monehoó de ítara zai no fare aar héntu añárar hére aitó monehoó de ítara aái no fare.’ **27** “Hétunot íte hoór de, ‘Ó baf, héen óile añi tuáñre fōriyat gorír, Lasár ore añr baf or gór ot difeřó; **28** kiyólla-hoilé añr ttu fañs swá báí asé. Yóggwa ye ítara re úñciyari douk, arnoile ítara yó e azab or zagat foónsibai.’ **29** “Montor Ibrahíme hoór de, ‘Ítarar hére Muúsar edde nobi ókkol or kitab asé. Ítara híin or hotá fúnouk.’ **30** “Íte hoór de, ‘No, no, ó baf Ibrahím, zodi mora ókkol ottu kiyé ítarar hére zaa, ítara touwá goríbo.’ **31** “Montor Ibrahíme ítare hoór de, ‘Zodi ítara Muúsar edde nobi ókkol or hotá no fúne, tooile mora ttu honókiye zinda ói zailé yo ítara no manibó.”

17 Isá ye Nizor ummot ókkol ore hoór de, “Gunár uzu țane de híin toh nu aái no tákibo; montor uitar uore afsús, zar duara niki híin aiyé. **2** Ítar lla beétor óilde, ítar golat eggwá cıl or sakki bañdí doijjat félaidiya zah, zodi íte e cóñřo ókkol ottu honókiyo re guná gorába. **3** Nizoré nize úñciyar. Zodi tuáñr báí ye hosúri goré, yóggwa re bótboráiyoy; zodi yóggwa ye touwá goré, yóggwa re maf gorídiyo. **4** “Zodi yóggwa ye tuáñr ulđa ek dine háñt bar hosúri goré, aar háñt óu bar tuáñr hañse aái hoó, ‘Añi touwá goijji,’ tooile yóggwa re maf gorídiyo.” **5** Sáhabi gúne Malik ore hoór de, “Añárar iman baráido.” **6** Malike hoór de, “Zodi tuáñra ttu hóroir danar héttirin iman táke, tuáñra e tut-gas swá re eén hoói faribá, ‘Háñri zai doijjat fútgoi,’ gas swá ye tuáñrar hotá manibó. **7** “Dóro tuáñra honókiyo ttu ál soibó lla yáh sóol sorai

bolla eggwá goóur asé. Yóggwa ye kí goóur gwá bil ottu aile ítare endilla hoibó, ‘Hára aái, háito bogái?” **8** Bólke yóggwa ye kí ítare endilla no hoibó né, ‘Añr lla hána toiyar gor, aar nizor keeñil bañdí añr ttu hána-fina háiya nó óiyo foijjonto añré hédmot gór, baade tui hána-fina hái faribí?” **9** Yóggwa ye kí goóur gwá re cúkuriya goríbo, ítare ziyán hókum goijjé híyan goijjé de hétolla? Bilkúl no goríbo. **10** Héndilla tuáñra yó, zeñtté tuáñra ttu tuáñra re hókum gorá gíyeh de híin beggún goijjá ó, hoibá de, ‘Añára behazor goóur ókkol; añára baná añárar fóros adai goijji deh.” **11** Baade eén óiye, Isá Jerúsalem ot zaita Samáriar edde Galil or maz ottu zaar. **12** Íba ekkán farat gólibarcot, doc zon kurus biyaraimma íba llói dola óiye. Ítara duré tíyaiya accıl, **13** aar guzoran mari hoór de, “Isá, ó Ustat, añárar uore rahám goró!” **14** Íba ye ítara re deki hoór de, “Zoo, nizoré imam ókkol or hañse dahógoi.” Aar eén óiye, ítara zaita-zaita pak-sáf óigiyoi. **15** Ítara ttu ezzone zeñtté nize gom óigiyoi de deikké, yóggwa dooñr abase Allar taarif gorí-gorí firi aiccé, **16** aar Isár foot uúñtoi fori íba re cúkuriya goijjé. Yóggwa óilde ézzon Samári. **17** Hétunot Isá ye fusár gorér de, “Doc zon beggún pak-sáf óiye de no né? Ar now zon hořé? **18** Allar taarif gorí bolla e bidecóitta wa bade ar honókiye firi nú aiyé de níki?” **19** Baade íba ye yóggwa re hoór de, “Uřó, zoogói; tuáñr imane tuáñre gom goijjé.” **20** Ekbar, Féroci ókkole Isá ttu fusár goijjé de, Allar raijjo hoñtté aibó? Íba ye ítara re zuwabe hoiyé de, “Allar raijjo aité dahá zah fángori nu aibó, **21** aar maincé yó no hoibó de ki, ‘Soó, híyan eřé asé,’ yáto, ‘Uřé asé,’ kiyólla-hoilé Allar raijjo toh tuáñrar mazé asé.” **22** Tarfore íba ye Nizor ummot ókkol ore hoór de, “Eén din aibó zeñtté tuáñra Manúc or Fuar din ókkol ottu ek din óile sai bolla azzu goríba, montor no dekiíba. **23** Maincé tuáñra re hoibó de, ‘Eřé soó,’ yáto ‘Uřé soó.’ Montor no zaiyo, ítarar fisá no dóijjo. **24** Kiyólla-hoilé zendilla asman or ek dák ottu bijili somkilé arek dák ot óu foor zaa, Manúc or Fua aibó de híyala yó héndilla beh óibo. **25** Lekin age íba ttu boóut kessú duk faa foribó, aar e zobanar manúc ottu inkar há foribó. **26** “Nobi Nuhr din ókkol ot zendilla óoil, héndilla Manúc or Fuar din ókkol ot óu óibo. **27** Zetó din Nuh kicřit nó uřé aar tuwán aái manúc beggún ore hálak nó goré, hétodin foijjonto manúc ókkole háafiya gorát, biyá gorát, edde

biyá diyat accíl. **28** “Luút or din ókkol ot óu héndilla óoil; manúc ókkol háafiyat, besa kinat, kėti gorát, edde gór banat accíl; **29** montor ze din Luút Sódóm ottu neeli aáigiyo, asman ottu ooin edde gónðokzór fore fán fori ítara beggún ore hálak gorífelaiye. **30** “Manúc or Fua zahér óibo de hé din óu héndilla beh óibo. **31** Hé din zee niki gór or sád or uore de óibo aar nizor mal-sáman gór or bútoe óibo de tákibo, ítara ttu híin looi bolla amat no lama foribó; héndilla zee niki kėti óibo, ítara ttu waafes nu aá foribó. **32** Luút or bou wór hálot yaad raikkó. **33** Zee niki nizor zan basaitó saá, íte híyan háraifelaibo; aar zee niki nizor zan háraifele, íte híyan basai rakíbo. **34** Añí tuáñra re hoóir, hé raitta dui zon manúc ek bisánat óibo de tákibo; ítara ttu ezzon ore loiza zaybo, ar ezzon ore bad diya zaybo. **35** Duwá mayafua ye ekkú fúañti sakki gúraibo de tákibo; ítara ttu ezzon ore loiza zaybo, ar ekkon ore bad diya zaybo. **36** Dui zon manúc bil ot óibo de tákibo; ítara ttu ezzon ore loiza zaybo, ar ezzon ore bad diya zaybo.” **37** Ítara íba ttu fusár gorér de, “Malik, iín hoře óibo dé?” íba ye ítara re hoór de, “Mora lac zeře, hére toh hóun ókkol óu zoma óibo.”

18 Baade Isá ye ítara re ekkán meésal hoiyé, ítara ttu hárr októtt dua gorá foribó de aar hímmot no hára foribó de híyan cíkai bolla. **2** Ki hoilé, “Ekkán cóor ot eggwá bisarhar accíl, zibá ye no Alla re ðooraitó aar no honó manúc ore forba goittó. **3** Aar hé cóor ot eggwá rari accíl; híba ye yóggwar hañse aái-aái hoitó de, ‘Añr duccon ókkol ottu añre insáf loido.’ **4** “Yóggwa ye hooddin inkar goijjíl, montor fore nizoré nize hoór de, ‘Añí de no Alla re ðoorai aar no honó manúc ore forba gorí, **5** montor toóu e rari wa ye zettót añre ferecan gorát asé, añí íbáh re insáf loidiyum, arnóile íbáh ye barbár aái-aái añre óran gorífelaibo.” **6** Yárbaade Malike hoór de, “Fúno, nainsáfi bisarhar gwá ye kii hoiyé. **7** Héndilla, Alla ye ki íbar basíloiya bonda ókkol ore insáf loi no dibo né, zetará dine raite íbar hañse hañde? íba ye kí ítara lla híyan goitté deri goríbo? **8** Añí tuáñra re hoóir, íba ye ítara re toratori insáf loidibo. Lekin Manúc or Fua zeñtté aibó, íba ye kí duniyait iman faibo?” **9** Hodún manúc zetará nizoré forhéggar táare aar oinno zon ore hékarot goré, Isá ye ítara re e meésal lan hoiyé, **10** “Dui zon manúc baitul-mukaddos ot dua goittó giyyé; ezzon

óilde Féroci, ar ezzon óilde házana-tulóya. **11** Féroci wa ye tíyai nizor baabute endilla dua gorát doijje, ‘Ya Alla, añí Tuáñre cúkuriya gorír, kiyólla-hoilé añí oinno manúc or ðóilla ðahañit, nainsáfi, aar zenákur no; e házana-tulóya war ðóilla úddwa no. **12** Añí háftat duibar ruza rakí; aar añr tamám amodoni ttu doc bák or ek bák Tuáñre diífélai.’ **13** “Lekin házana-tulóya wa ekkágori duré tíyai accíl; yóggwa ye asman or uzu sai bolla úddwa moncá no gorér, bóлке buk kilai-kilai hoór de, ‘Ya Alla, añí gunágur or uore rahám goró.’ **14** “Añí tuáñra re hoóir, e manúc cwa beh forhéggar tóori gór ot giyyé, Féroci wa nó tóore; kiyólla-hoilé zee niki nizoré nize ðoóñr kúwala ítare cóñro gorá zaybo; aar zee niki nizoré nize cóñro kúwala ítare ðoóñr gorá zaybo.” **15** Ek din maincé ítara gura fuain dore yó Isár hañse anát doijje, zeéne íba ye ítara re súwe; montor cárit tune deikké rár, manúc cún ore bóþboráíye. **16** Montor Isá ye fuain dore íbar hañse matai hoór de, “Fuain dore Añr hañse aítódo; ítara re no oóñillo, kiyólla-hoilé Allar raijjo toh ítara ðóilla maincé éna hásil goré. **17** Añí tuáñra re sóiyi hoóir, zee kiyé Allar raijjo re eggwá gura fuar ðóilla góri kobul no goré, yóggwa híyan ot bikkúl góli no foribó.” **18** Fore ezzon sóddare Isá ttu fusár gorér de, “Gom Ustat, ofúrani zindigi miras faite añr ttu kii gorá foribó?” (aiðnios q166) **19** Isá ye yóggwa re hoór de, “Tuñí Añré gom kiyá ðakoór? Alla bade toh ar kiyé gom náí. **20** Tuñí de hókum ókkol zano, zendilla niki, ‘Zená no goríba; kún no goríba; suri no goríba; misá gobá no diba; bafmaa re izzot goríba.” **21** Yóggwa ye hoór de, “Añí híin beggún gurahale lóti amól gorí-gorí aiyr.” **22** Híyan fúni Isá ye yóggwa re hoór de, “Tuáñr ttu aijjó ekkán ham baki asé. Tuáñr ttu zín asé híin beggún besi gorif ore bařidogói, tói tuñí asman ot dón faiba; baade aái Añr fisáli óiyogai.” **23** Híyan fúni yóggwa kúb bezar óigiyo, kiyólla-hoilé yóggwa ðoóñr dóni accíl. **24** Isá ye yóggwar uzu saái hoór de, “Dón-doulot ola ókkol ottu Allar raijjo gólite hotó mockil! **25** Kiyólla-hoilé tuangor manúc Allar raijjo gólar túaro, eggwá uñt fúñc or faái ttu goli zaa aró aasan.” **26** Híin fúinne de ítara hoór de, “Tóoile hone nejat fai faribó?” **27** íba ye hoór de, “Zín insáne gorí no fare, híin Alla ye fare.” **28** Fitore hoór de, “Soó, añára de górbari eridi Tuáñr fisáli óigiyo.” **29** íba ye ítara re hoór de, “Añí tuáñra re sóiyi hoóir, zee niki Allar raijjo wasté

gór, bou, báiyain, bafmaa yáh fuain eridiyé, **30** yóggwa ye e zobatan híin boótun gun bicí faibo, aar aibó de zobatan ofúrani zindigi faibo.” (aĩon g165, aĩonios g166) **31** Yárbaade Isá ye baró zon cárit tun ore ekinare loizai ítara re hoór de, “Soó, añára uore Jerúsalem ot zair, Manúc or Fuar baabute nobi ókkole zín-zín leikké híin beggún hére fura óibo. **32** Íba re Beyohúdi ókkol or hañse gosáidiya zaybo; ítara íba re ínca goríbo, beizzoti goríbo, edde sép maribó; **33** ítara íba re coónk mari baade zane marifélaibo. Lekin tin din ot din íba zinda óizayboi.” **34** Cárit tune hotá híin ekkán óu nó buzé; hé hotár maáni ítara ttu lukaiféla gíyeh, hétolla zín hoiyé híin ítara buzí nó fare deh. **35** Isá zeĩtté Jerikó cóor or dake foónicce, ezzon añdá manúc rastar hañsat boói hórat mager de accíl. **36** Yóggwa ye ek dol manúc dák ottu zaar de abas fúni, eřé kii ór de fusár goijjé. **37** Maincé yóggwa re hoór de, “Isá Nasári e boli zaar deh.” **38** Hétunot yóggwa ye guzori-guzori hoór de, “Ó Dawud or Fua Isá, añr uore rahám goró!” **39** Zetará age-age zaar de accíl, ítara yóggwa re jéjjerai nizám óito hoiyé; montor yóggwa ye aró guzori-guzori hoór de, “Ó Dawud or Fua, añr uore rahám goró!” **40** Hétunot Isá tíyaiyoi aar hókum díye de, yóggwa re íbar hañse aná zay bolla. Yóggwa dake aiccé rár, Isá ye yóggwa ttu fusár gorér de, **41** “Tuńi kii soó, Ańi tuńr lla kii goittám?” Yóggwa ye hoór de, “Malik, añr ttu dekı faribár toóufik faito monehoór.” **42** Isá ye yóggwa re hoór de, “Dekı faribár toóufik loo; tuńr imane tuńre gom goijjé.” **43** Éhon yóggwa ye dekı faribár toóufik faiyé aar Allar taarif gorı-gorı Isár fisalı doijje. Manúc beggúne híyan dekı Allar taarif goijjıl.

19 Isá Jerikó cóor ot góli bútotu zaat accíl. **2** Hére Zakéyos nam or ézzon manúc accíl; yóggwa accíl házana-tulóya ókkol or sóddar edde tuangor manúc. **3** Yóggwa ye Isá hon de híyan saitó kúcic goijjıl, montor manúc or dol or zoriya saái nó fare, kiyólla-hoilé yóggwa gaafiré barı accíl. **4** Hétolla yóggwa ye Isá re sai bolla muúmmikka duńri zai eggwá duńir-gas ot uıttégoi, kiyólla-hoilé íba hé fońt báy zaibo. **5** Zeĩtté Isá hé zagat foónicce, íba ye uormikká saái yóggwa re hoór de, “Zakéyos, toratori lamogái, kiyólla-hoilé aijja Ańr ttu tuńr góor ot tákar zorur.” **6** Hétunot yóggwa toratori laimmégai, aar íba re kúcir saánte

estekbal goijjé. **7** Híyan dekı manúc beggúne endilla cékayot gorát doijje, “Íba ezzon gunágar or gorba óito giyyé.” **8** Zakéyose tíyai Malik ore hoór de, “Soó Malik, añr cómbotti ttu ekdók ańi gorif ókkol ore diifélair, aar zodi ańi honókiyo ttu na hókkot kessú loiyı de óile, ítare ańi sair gun waafes fıraidiyum.” **9** Isá ye yóggwa re hoór de, “Aijja e góor ot nejat aiccé, kiyólla-hoilé yóggwá yó toh İbrahim or fua. **10** Manúc or Fua aiccé de toh ańzigiyoi de ítara re tuwai bolla edde nejat di bolla.” **11** Ítara híin beggún fúner de októť, Isá ye ítara re ekkán meesal hoiyé, kiyólla-hoilé íba Jerúsalem or dake accıl aar ítara táaijıl de Allar raijjo bicı hára zahér óibo. **12** Íba ye hoór de, “Ezzon bóddoro manúc ekkán durór mulluk ot giyyé, baáńcca boni waafes ai bolla. **13** Zaibar age yóggwa ye nizor goóur ókkol ottu doc zon ore matai ítara re doc cán cúnar foicádiyyé, dii ítara re hoór de, ‘Ańı nú aiyı foijjonto iń lói códori gorógói.’ **14** “Lekin yóggwa re nizor decóıtta ókkole nafórot goıttó, hétolla ítara yóggwar fisé nomainda difeřái hoiyé de, ‘Ańára e manúc cwa ye ańarar uore hókumot goré de híyan no saái.’ **15** “Zeĩtté yóggwa baáńcca boni waafes aiccé, yóggwa ye nizor tiań dıyl de goóur gún ore mata baiyé, zeéne ítara códori gorı hodún hamaiyé de zani fare. **16** “Cúrrur íte aái hoór de, ‘Malik, tuńr foicá lói ańı aró doc cán foicá baráiyı.’ **17** “Yóggwa ye ítare hoór de, ‘Cabác, gom goóur! Tui zettót bicı hom ot imandari táıkkos, yala tui doc cán cóor or uore hókumot góor.’ **18** “Dusára wa ye aái hoór de, ‘Malik, tuńr foicá lói ańı aró fańs sán foicá baráiyı.’ **19** “Yóggwa ye ítare yó hoór de, ‘Tui yó fańs sán cóor or uore hókumot góor.’ **20** “Baade ar ezzone aái hoór de, ‘Malik, ótiya tuńr foicá, ańı yıan ore ekkán fakıt berái lukai raıkkılam; **21** kiyólla-hoilé ańı tuńre dooraiyı, tuńı ézzon hora manúc; tuńı toh nize zıń nó rakó híin loıfélo, aar zıń nó lago híin harı.’ **22** “Yóggwa ye ítare hoór de, ‘Ó behar goóur! Tor muk or hotá loi ańı tor bisar goijjım. Tui de zaintı ańı ézzon hora manúc deh, ańı zıń nó rakı híin loıfélai, aar zıń nó lagai híin harı. **23** Tói tui ańr tiań gán benggót óile kiyá nó rakós? Héndilla goıttı bóuli ańı ailé híyan or fúańti kessú cút faitam.’ **24** “Tarfore yóggwa ye ińyot házir accıl de ítara re hoór de, ‘İtar ttu foicá gán loıfélai, zar ttu doc cán foicá asé ítare diifélo.’ **25** “İtara yóggwa re hoór de, ‘Malik, İtar ttu de age lóti doc cán foicá asé.’

26 “Añí tuáñra re hoóir, zar ttu asé, yóggwa re aró diiya zaybo; montor zar ttu náí, yóggwa ttu asé de híin úddwa loiféla zaybo. 27 Montor añr duccon zetará niki añí ítarar uore hókumot gorí de no saitó, ítara re íñyót aní añr cáikkat zane marifélo.” 28 Isá ye híin hoói baade, ítarar age-age Jerúsalem or uzu zaat doijje. 29 Zeñtté íba Zaitun Faár ot asé de Betfégi edde Betániya farar hañsáhañsi foónicce, íba ye Nizor dui zon cárit ore diferáiyé, 30 endilla hoói, “Tuáñra muúm or fara gán ot zoo, hére góli mottor eggwá gadár sóo bairdá loot faiba, zibár uore aijjó honókiye nó soré. Yíba re kúli eré anógoi. 31 Zodi honókiye tuáñra ttu fusár goré, ‘Tuáñra yíba re kiyólla kúlor?’ Yóggwa re hoibá de, ‘Malik ottu yibá re lager.’” 32 Tóí zetará re diferáiyé ítara rowana loiyé, aar íba ye zeén hoiyé héen loot faiyé. 33 Ítara gadár sóo wa re kúler rár, yíbar giróse ítara re hoór de, “Tuáñra gadár sóo wa re kiyólla kúlor?” 34 Ítara hoór de, “Malik ottu yibá re lager.” 35 Baade ítara yíba re Isár hére ainné, aar yíbar uore ítarar hoor ókkol bicáidi Isá re uore buágaraiye. 36 Íba zaar de októót, manúc ókkole nizor hoor ókkol rastat bicáidiyat accíl. 37 Zaité-zaité íba Zaitun Faár or lamonir hañsáhañsi foónicce rár, ummot ókkol or dol týya ye ítara ze keramot ókkol deikkíl híin beggún olla guzori-guzori kúcir sáañte Allar taarif gorát doijje, 38 hoór de, “Mubarek Baáñca Ubá zibá Mabud or name aiyér. Ebbe uore asman ot cánti óuk, aar hére mohíma óuk!” 39 Dol ottu hoozzon Féroci ye íba re hoór de, “Ustat, Tuáñr ummot ókkol ore éggwa bóthoro.” 40 Íba ye zuwabe hoór de, “Añí tuáñra re hoóir, zodi itará nizám ói táke, fattór ókkol guzori uríbo!” 41 Zeñtté íba Jerúsalem or hañsáhañsi foónicce, cóor gán deki híyan olla hainde, 42 hoór de, “Áh, tui yó aijja zodi cánti kiyé ané de zaintiya! Montor yala de híyan tor suk or argwal ógiyoi. 43 Kiyólla-hoilé tor uore eén din aibó, tor duccon ókkole tor ulða ðeбал tulí toré gridoribo, aar toré hárr mikká ttu gérgwal goríbo, 44 toré edde tor bútor or fuain dore merit ańsáribó, aar tor bútoore eggwá fattór or uore ar eggwá fattór no rakíbo, kiyólla-hoilé tui toh Alla ye toré basaitó aiccé de októ nó sínós.” 45 Fore Isá baitul-mukaddos or urán ot góli, zetará hére besa kina gorér ítara re loraidiyat doijje; 46 ítara re hoór de, “Pak-kalam ot endilla asé, ‘Añr gór munazat or gór óibo,’ montor tuáñra toh híyan

ore ðahañit or ađða-hána banaifélaio.” 47 Íba ye baitul-mukaddos ot fottí din taalim dito. Montor ðoóñr imam ókkole, alem ókkole, edde manúc or ðaiðoóñr ókkole íba re marifélaibar kucíc ot accíl. 48 Lekin híyan gorí bolla ítara honó mouka nó faa, kiyólla-hoilé tamám manúc ókkole íbar hotá oónlgori fúinito.

20 Ek din zeñtté Isá ye baitul-mukaddos ot manúc ókkol ore taalim der edde kúchóbor tobolik gorér, ðoóñr imam ókkole edde alem ókkole murubbi ókkol ore fúañti looi íbar hañse aiccé, 2 aar íba re hoór de, “Añára re hoósai, Tuñí ham iín kii adíkare gorór? Tuáñre e adíkar diiyé de íba hon?” 3 Íba ye ítara re zuwabe hoór de, “Añí yó tuáñra ttu ekkán súwal fusár goríyum. Añré hoósai, 4 Yaháya ye bápťisma díbar adíkar faail de asman ottu né náki insán ottu?” 5 Ítara afós ot biyasana gorér de, “Zodi ańára hoói ‘asman ottu,’ íba ye hoibó de, ‘Tóoile tuáñra íba re biccác kiyá nó goró?’ 6 Montor zodi hoói, ‘insán ottu,’ tóoile manúc beggúne ańára re cíl or dola maribó, kiyólla-hoilé ítara toh Yaháya eggwá nobi de biccác goré.” 7 Hétolla ítara zuwab der de, “Ańára no zani híyan hontú.” 8 Tóí Isá ye ítara re hoór de, “Tóoile Añí yó tuáñra re no hoiyúm Añí iín kii adíkare gorír.” 9 Tarfore Isá ye manúc ókkol ore e meésal lan howá cúru goijjé, “Ezzon maincé ekkán anggur-bariza lagaiyé, yóggwa ye híyan cacá ókkol ore ðeka dí lamba ðaim olla oinno mulluk ot giyyói. 10 Aar anggur or ainda aiccé rár, yóggwa ye eggwá goóur ore cacá gún or hañse diferáiyé, zeéne ítara yóggwa re barizar gular bák dee; montor cacá gúne taré mara-dóra gorí háli áte duńraidiyé. 11 Yóggwa ye abar ar eggwá goóur diferáiyé; ítara taré yó mari edde bicí beizzoti gorí háli áte duńraidiyé. 12 Baade yóggwa ye tisára goóur diferáiyé; ítara taré yó zohóm gorí baáre félaidiye. 13 “Tarfore barizar giróse hoór de, ‘Yala añí kii goittám? Añí añr adorja fua re diferáiyum; ítara íba re izzot goittó fare.’ 14 “Montor cacá gúne hé fua re deki afós ot biyasana gorér de, ‘Ite toh mirasdár; aiyó itaré marifélaí, zeéne miras ańárar óizagoi.’ 15 Tóí ítara íba re barizar baáre loizai marifélaíye. “Hé ísafe, barizar giróse ítara re kii goríbo fáñllar? 16 Yóggwa ye aái hé cacá gún ore marifélaibo, aar bariza gán oinno kiyó re diifélaibo.” Ítara híyan fúni hoór de, “Alla ye héndilla no goróuk.” 17 Montor Isá ye ítarar

híkka saái hoór de, “Tóoile pak-kalam ot asé de e hotár maáni kii, ‘Ze fattór mistfíri ye inkar gorífelaíye, yíba cíl beggún or túaro bicí zoruri wa óigiyoi?’ **18** Ze kiyé hé cíl or uore foribó íte báñgi hán-hán óizayboi, montor zar uore niki hé cíl yíba foribó, íte ficí zayboi.” **19** Hétunot qóoñr imam ókkole edde alem ókkole íba re dórifelai bolla kucíc goijjíl, kiyólla-hoilé ítara buzígíyoi de ki meésal híyan ítara helaf hoíyé deh; montor ítara awam ókkol ore qóoraitó. **20** Ítara Isár uore háas nozor raikké, hétolla gom manúc or bét dórai gurinda ókkol diferáíye, zeéne ítara íba re Nizor hotár fán ot félai fare edde íba re hákim or hókumot ot edde adíkar ot gosáidi fare. **21** Gurinda gúne íba re súwal gorér de, “Ustat, añára zani Tuáñr hotá edde taalim sóiyi, aar Tuñí honókiyo re forók goró de náí, bólke sóiyigori Allar rastar taalim doh. **22** Romi baáñcca re házana doon añára lla zayes asé né náki náí?” **23** Montor íba re tarár sail ore zani fari tará re hoór de, **24** “Añré ekkán dinár dahó. Yíán har sóbi edde har nam?” Tará zuwab der de, “Romi baáñccar.” **25** Tói íba re tará re hoór de, “Tóoile zín baáñccar híin baáñcca re diíyo, aar zín Allar híin Alla re diíyo.” **26** Tará manúc or muúntu íba re Nizor hotár fán ot félai nó fare, bólke íbar zuwabe ammúk ói nizám óigiyoi. **27** Baade hodún Sadukái Isár hañse aiccé, Sadukái ókkole háñcor náí hoi biccác goré, ítara aái íba re ekkán súwal goijjé, **28** ki hoilé, “Ustat, Muúsa ye añára lla leikké de, zodi honókiyor biyáta báí fuain sára morizagói, tóoile ítar hé báí ottu bou híba re biyá gorífelai nizor báí olla nosól foida gorá foribó. **29** Dóro, háñt zon báí accíl. Foóila wa ye bou looi, fuain sára morigiyói. **30** Baade híba re dusára wa ye biyá goijjé, aar íte yó fuain sára morigiyói; **31** tarfore híba re tisára wa ye biyá goijjé. Héndilla, ítara háñto báí ye híba re biyá gorí fuain sára morigiyói. **32** Ahérit, mayafua wa yó morigiyói. **33** Hé ísafe, háñcor or hale híba har bou óibo? Kiyólla-hoilé híba re toh háñto zone nizor bou banaáil.” **34** Isá ye ítara re zuwab diyé de, “E zobanat maincé biyá-cádi goré edde biyá-cádi deh. (aiñ g165) **35** Montor zetará re aibó de zobanar bági óibar edde háñcor-or-din mora ttu zinda óibar laayek bouli gona zah, ítara no biyá goríbo aar no ítara re biyá díya zaybo; (aiñ g165) **36** ítara ar mori yó no faribó, kiyólla-hoilé ítara fíristar dóilla óizayboi; aar ítara háñcor or bági ói Allar fuain óizayboi. **37** Mora ókkol zinda ó de híyan

toh Muúsa ye úddwa zoler de zádðwar zikír gorá gíyeh de hére zahér goijjé, hére íba ye Mabud ore Ibrahim or Alla, Isahák or Alla, edde Yakub or Alla ðaikké. **38** Kiyólla-hoilé Alla toh mora ókkol or Alla no, bólke zinda ókkol or éna, kiyólla-hoilé íbar hañse beggún zinda.” **39** Hétunot hodún aleme íba re zuwabe hoór de, “Ustat, Tuñí gom hoíyo.” **40** Yárbaade ítara ttu íba re ar honó súwal goittó hímmote nó deh. **41** Isá ye ítara re hoór de, “Mosih re Dawud or fua keéngori hoó? **42** Kiyólla-hoilé Dawud nize toh Zobur Córif ot endilla hoíyé, ‘Mabude añr Malik ore hoór de, ‘Añr den ðák ottu boiyó, **43** zetókkal foijjonto Añí Tuáñr duccon ókkol ore Tuáñr foor tole gorí nó felai.” **44** Dawude toh íba re ‘Malik’ ðaikké, tóoile keéngori íba Dawud or fua dé?” **45** Manúc beggúne Isár boiyan fúnat asé de októót íba ye Nizor ummot ókkol ore hoór de, **46** “Alem ókkol ottu uñciyar táikko, zetará lamba-lamba kuruta fíndí gúrafíra goittó saá, aar bazare-bazare sólam faito, mujilíc-hána ókkol ot uñsol tokkar hadírat boitó edde mela-cóbat barík zagat boitó fosón goré. **47** Ek mikká ttu ítara rari ókkol or gór ókkol luþ gorífele, arek mikká ttu maincóre dahái bolla lamba-lamba dua goré. Manúc híne sáña bicí qóoñr faibo.”

21 Baade Isá ye suk tulí saiyé rár dekéer de, tuangor ókkole ítara sótká ókkol baitul-mukaddos or dan-baccút deer. **2** Íba ye eggwá gorif rari ye yó hére duiyán cóñro foicá deer de deikké. **3** Hétunot íba ye hoór de, “Añí tuáñra re sóiyi hoóir, e gorif rari wa ye beggún or túaro bicí diiyé; **4** kiyólla-hoilé oinno beggúne ítara aþalikka dón ottu diiyé deh, montor ibáh ye toh nizor gorif hálot ot basi táki bolla zín accíl híin beggún diifélaíye.” **5** Zeñtté hodúne baitul-mukaddos or baabute endilla howáhoi gorér, híyan ore keen cúndor-cúndor fattór lói edde Alla re diiya hádiya ókkol lói háñza gíyeh, Isá ye hoór de, **6** “Tuáñra eré zín dekor híin olla eén din aibó, eré eggwá fattór or uore ar eggwá fattór no tákibo, híin fottí ekgwá re félaidiya zaybo.” **7** Ítara íba ttu fusár gorér de, “Ustat, híin hoñtté óibo dé? Híin beggún fura óibar októ aiccé de híyan or alamot kii óibo?” **8** Íba ye zuwab der de, “Saiyó, honókiye zen tuáñra re gollot ot no loiza, kiyólla-hoilé boóut zone Añr name aái hoibó de, ‘Añí íba,’ edde ‘Októ ðáke.’ Montor ítara fisáli no dóijjo. **9** Zeñtté

tuáñra larái edde úrussul or abas ókkol fúñiba, no ðooraiyó; kiyólla-hoilé age híñ ówar zorur. Montor híyala yó toratori ahérot óibo de no.”

10 Íba ye ítara re aró hoór de, “Ek koume arek koum or ulða edde ek raijjo ye arek raijjo ulða tíyaibo. **11** Ðoóñr-ðoóñr búsal óibo, aar zaga-zaga rať ókkol edde ababiyaram ókkol óibo; aró, asman ottu hótara jiníc edde ðoóñr nicán ókkol dahá zaybo. **12** “Lekin híñ beggún óibar age, maincé Añr nam or wasté tuáñra re dórifelaibo edde zulúm goríbo. Ítara tuáñra re mujilíc-hánat gosáidibo edde ziyól ot díbo. Añr nam or wasté tuáñra re baáñcca edde hákim ókkol or muúntu házir gorá zaybo. **13** Montor híyan tuáñra gobá díbar mouka óibo. **14** Hétolla dil ot gañtí rakó de ki, kii zuwab diba age lóti sinta gorár zorur náí; **15** kiyólla-hoilé Añí tuáñra re eén zohan edde giyan diiyum, ziín ore tuáñrar honó duccone mukabela yáh inkar gorí no faribó. **16** Tuáñra re nizor bafmaa ye, báiboináin de, egana-guicci ye edde dustó ókkole úddwa dórídibo; tuáñra hodún ore marifélaibo yó. **17** Aar Añr lla bouli tuáñra re beggúne nafórot goríbo. **18** Lekin tuáñrar matár ekkán sul úddwa borbad no zaybo. **19** Tuáñrar sobóre tuáñra nizor zan basai rakíba. **20** “Tuáñra zeñtté fóous ókkole Jerúsalem ore sairókul ttu berái dóijje de dekíba, héñtte t̃aariyo de, híyan bocóti sára óibar októ ðáke. **21** Héñtte zetará Yohúdiyat tákiba ítara ttu faár ot ðaízagoi foribó, zetará cóor or búture tákiba ítara ttu baäre neelizagói foribó, aar zetará farat tákiba ítara ttu cóor ot no góla foribó. **22** Kiyólla-hoilé din híñ óilde bodola loibar din, zeéne pak-kalam ot asé de híñ beggún fura ó. **23** Montor hé din ókkol ot hámil mayafuain dor lla edde dud or maa ókkol olla bicí afsús or hálot óibo! Kiyólla-hoilé mulluk ot ðoóñr mosibot óibo edde manúc ítara uore gozzob aibó. **24** Ítara re toluwar loi kotól gorífela zaybo, aar bañdí fottí koum or hañse loiza zaybo. Jerúsalem ore otókkal foijjonto Beyohúdi ókkole t̃enge únrat tákibo, zetókkal Beyohúdi ítara októ fura nó óiyo. **25** “Aar san, beil edde tara ókkol ot taajuippa nicán ókkol dahá zaybo; duniyait koum ókkol ferecanit forizaybói, kiyólla-hoilé ítara doriyar abase edde goire súharaiya óizayboi, **26** manúce duniyait óibo de híñ or ðoore edde báfaniye beúñic óizayboi, kiyólla-hoilé asmani jiníc ókkol tóttoraibo. **27** Héñtte ítara dekíbo de, Manúc or Fua kudurut edde ðoóñr mohímar sáañte

ekkán miyúlat góri aiyér. **28** Montor zeñtté híñ fura ówat dore, tuáñra uzu gori tíyai tuáñrar matá uormikká goríyo, kiyólla-hoilé tuáñrar rehái ðáke.”

29 Tarfore Isá ye ítara re ekkán meésal hoiyé, ki hoilé, “Ðuñir-gas edde oinno gasgusala beggún ore soó. **30** Zeñtté híñ ot fata aiyé, tuáñra híñ saái nizorgá nize zanizogói de, hórán ðáke. **31** Héñdilla tuáñra yó, zeñtté iín ór de dekíba, héñtte yíán buzíba de, Allar raijjo ðáke. **32** “Añí tuáñra re sóiyi hoóir, iín beggún fura nó óiyo foijjonto e nosól bilkúl no fúraibo. **33** Asman zobin toh zari no tákibo, montor Añr hotá hámica zari tákibo. **34** “Hétolla úñciyar táikko, zeéne tuáñrar dil ayaciye, nicábaziye, edde zindigir sintabáfaniye bóri no zagói, arnóile din yíba tuáñrar uore fán or ðóilla bánggori aázayboi; **35** kiyólla-hoilé din yíba fura duniyait asé de tamám manúc ókkol or uore héñdilla góri aázayboi. **36** Hétolla tuáñra hárr októ úñciyar táikko, aar dua goríyo de, tuáñra ttu zen muúntu fura óibar asé de híñ ottu basi zayboi lla bol táke aar Manúc or Fuar muúntu tíyai faro.”

37 Din ot Isá baitul-mukaddos ot taalim dito, montor háñzinna neeli Zaitun Faár hoó de yíbat zai rait haraitó; **38** aar bíñna sóore manúc beggúne íbar boiyan fúni bolla baitul-mukaddos ot aitó.

22 Héñtte Yohúdi ókkol or Cútar-sára Ruťir-id or din ðáke aiccé, ze id ore Azadir-id bouli hoó. **2** Aar ðoóñr imam ókkole edde alem ókkole Isá re kii bote marifélaí faribó híyan or talac ot accíl, kiyólla-hoilé ítara maincóre ðooraitó. **3** Héñtte Yohúdah zaré Iskáriyet ðake, ítar búture Cóitan góille, zee accíl baró zon carít tun ottu ezzon. **4** Íte zai ðoóñr imam ókkol lói, alem ókkol lói, edde faáradar ókkol lói sólla goijjégoi de, íte kii bote Isá re tarár át ot dórídi faribó. **5** Híyan ot ítara kúci óiye, aar ítare t̃iañ díibo bouli hoiyé. **6** Íte razi óiye, aar manúc or dol no táke de októ Isá re dórídi bolla moukar talac ot accíl. **7** Tarfore Cútar-sára Ruťir-id or din aiccé, ze din ot Azadir-id or hána lla bérasóol or sóo kurbani gorá fóros. **8** Isá ye Fitor edde Yohánna re diferái hoór de, “Zoo, ańára hái fari fán Azadir-id or hánar toiyari gorógói.” **9** Ítara íba re hoór de, “Tuáñr ttu hondilla monehoór, ańára hořé toiyar goittám?” **10** Íba ye ítara re hoór de, “Tuáñra cóor ot góilige mottor, zok ot gori faní loizar de ézzon manúc tuáñra llói milibó; íba ze gór ot gólibo hé gór ot íbar fisé-

fisé zaiyo, 11 aar gór gan or girós ore hoibá de, maiggé. 32 Montor tor iman komzur no fán 'Ustate tuáñr re hoór de, "Meéman-hána hoře, Añí tor lla dua goijjí, aar zeñtté tui Añr hére ziyán ot Añí Añr cárit tun or fúañti Azadir-id waafes aibí, tor báiyain dore mozbut goríc." 33 or hána hái faijjum?" 12 Hétunot yóggwa ye Fitore hoór de, "Malik, añí Tuáñr fúañti ziyól ot tuáñra re hánzaiya ekkán uoror țalar ɖoóñr zaito edde moitto toiyar así." 34 Isá ye hoór de, kamára daháibo; hére toiyar goijjó." 13 Tói ítara "Fitor, Añí toré hoóir, aijja ratakurá bak dibar zai, Isá ye ítara re zendilla hoiyé héndilla faiyé; age tui Añré no sinós hoóí tin bar inkar goríbi." baade Azadir-id or hánar toiyari goijjé. 14 Zeñtté 35 Tarfore Isá ye ítara re hoór de, "Zeñtté Añí októ aáigiyoí, Isá hána háito boiccé, íbar fúañti tuáñra re țiañr zali, cențár edde hóilla sára sáhabi gún óu boiccé. 15 Íba ye ítara re hoór de, diferáilam, héñtte tuáñra ttu kessúr homi aiccíl "Añí duk faibar age tuáñrar fúañti e Azadir-id né?" ítara hoór de, "Kessúr homi nu accíl." 36 or hána háito bicí azzu goijjí; 16 kiyólla-hoilé Íba ye hoór de, "Ehón zar ttu țiañr zali asé tee Añí tuáñra re hoóir, zetódin foijjonto yán Allar fúañti loo, héndilla hóilla yó loo, aar zar ttu raijot fura no, hétodin iín Añí abar na háiyum." súri náí, tee nizor saddor besi ekkán kinilo. 37 17 Baade Íba ye fiyala looi Alla re cúkuriya gorí Pak-kalam ot toh endilla asé, 'Íba re gunágar hoór de, "Yibá looi tuáñrar búture borat goró. orfúañti gona giyéh, Añí tuáñra re hoóir, hé hotá Añr búture fura ówa zorur, kiyólla-hoilé 18 Kiyólla-hoilé Añí tuáñra re hoóir, ehón ottu Añr baabute zín leikké híin fura ór." 38 ítara lóti Allar raijjo nú aiyé foijjonto Añí anggur Íba re hoór de, "Malik, soó, eré duiyán súri asé." or roc na háiyum." 19 Tarfore Íba ye ruți looi Íba ye hoór de, "Íin óile káfi." 39 Isá neeli Nizor Alla re cúkuriya goijjíl, aar bángi ítara re dii niyom mozin Zaitun Faár ot giyyé; cárit tun óu hoór de, "Yián Añr gaa, ziyán tuáñra lla diiya íbar fisé-fisé giyyé. 40 Hé zagat foóñsi Íba ye zaybo; Añré monot gorí bolla endilla goijjó." 40 Íta re hoór de, "Dua goró, zeéne entán ot no Héndilla ruți hái baade fiyala wa looi hoór de, ítara re hoór de, "Dua goró, zeéne entán ot no "Añr lou loi óibo de noya razinamar nicán óilde melá máille zeddúr zaa, héddur ánik duré zai e fiyala, ze lou tuáñra lla ɖálidiyum. 21 "Montor ańrúr tókdi dua gorér de, 42 "Ó Baf, zodi Tuńí soó, zee Añré dóridibo íte ehón Añr fúañti mes ot hána háar. 22 Becók, Alla ye fáisela goijjé soó, e duk-mosibot or fiyala yibá Añr ttu dur de mozin Manúc or Fua moribó, montor afsús gorífelo, montor toóu Añr moncá mozin no, uitar uore, zee Íba re dóride." 23 Híyan fúni, bólke Tuáñr moncá mozin óuk." 43 Hétunot tarár bútotu hé ham mán hone goríbo hoóí asman ottu eggwá fírista dahá dí Íba re bol ezzon ottu ezzone fusár goijjíl. 24 Ítarar bútotu diiyé. 44 Íba ócánti ói dilmón dí aró bicí dua haré beggún or túaro ɖoóñr mana zaybo hoóí gorát accíl, aar Íbar gám lou wór fúur ɖóilla ói meřit foijjíl. 45 Íba zeñtté dua ttu urí cárit tun or hére aiccé, héñtte ítara ferecane óran ói gúm giye de loot faiyé. 46 Íba ye tará re hoór de, "Tuáñra gúm zoór kiyá? Uřó aar dua goró, zeéne entán ot no foro." 47 Íba ye híin hoór de októ, ek dol manúc aiccé, aar baró zon cárit tun ottu Yohúdah hoó de íte tarár age-age accíl. Íte Isá re appá dí bolla Íbar ɖáke giyyé. 48 Montor Isá ye ítare hoór de, "Yohúdah, tui Manúc or Fua re appá dí dóri dór dé?" 49 Zeñtté Íbar sáañti ókkole kii óibo de ót faiyé, ítara hoór de, "Malik, ańára toluwar solaiyúm né?" 50 ítara ttu ezzone toluwar solai boro imam or gulam or den ɖák or han harífelaiye. 51 Montor Isá ye hoór de, "Bon gor, endilla aar no goríc." Baade Íba ye tar han dóri gom gorídiye. 52 Tarfore Isá ye ɖoóñr imam ókkol, baitul-mukaddos or sóddar ókkol, edde murubbi ókkol, zetará Íba re sóddar ókkol, edde dóitto aiccé, tará re hoór de, "Tuáñra ɖahañit

dóitto aiccó fángori toluwar edde larí-cúra loi aiccó dé? **53** Añí tuáñrar fúañti fottí din baitul-mukaddos ot tákite toh tuáñra Añr uore át nó lago; lekin ehón tuáñrar októ, ze októót ańdare hókumot gorér.” **54** Tarfore tará ĩba re gereftar gorífelai boro imam or gór ot loigiyói. Fitor duré-duré táí fisé-fisé zaat accíl. **55** Tará zeñtté urán or mazé ooin zali fúañti gul gorí boicccé, Fitor óu tarár fúañti boicccé. **56** Ekgwá bańdi mayafua ye Fitor ore ooin or řal ot boirá dekí, gúañrai saái hoór de, “E manúc cwa yó Isár fúañti accíl.” **57** Montor ĩba ye endilla hoói inkar gorídiye, “Héy mayafua, añí ĩba re no siní.” **58** Hotún baade ĩba re ar ezzone dekí hoór de, “Tuñí yó ĩtarar bútototu ekzon.” Montor Fitore hoór de, “No báí, añí no.” **59** Arek gónđa ánik baade ar ezzon manúce yó ekin or sáañte hoór de, “Sóiyi, e manúc cwa yó ĩbar fúañti accíl, kiyólla-hoilé ĩbá yó Galil or manúc.” **60** Montor Fitore hoór de, “Ó báí, tuñí iín kiyór baabute hoór añí no zani.” ĩba ye híyan hoór de októót, éhon-éhon ratakurá bak diyé. **61** Hétunot Malike fíri Fitor or uzu saiyé. Aar Fitor ottu Malik or hotá waán monot uitté, ki hoilé, “Aijja ratakurá bak dibar age tui Añré tin bar inkar goríbi.” **62** Baade ĩba baäre neeligói kúb hańdat doijje. **63** Zetará Isá re faáradi accíl, tará ĩba re ínca gorát edde marat doijje. **64** Tará ĩbar suk bańdí fusár gorér de, “Toré hone maijé antas gor saí?” **65** Héndilla tará ĩbar hélaf bicí hotá ókkol hoói ĩba re beizzoti goijjíl. **66** Bíinna foór fáitté rár, doóñr imam ókkol or edde alem ókkol or, yáni Yohúdir murubbi ókkol or mujilíc óiye; ĩtara Isá re fótuayi-mujilíc ot aní hoór de, **67** “Tuñí zodi Mosih de óile, ańára re hoó.” ĩba ye ĩtara re hoór de, “Zodi Ańí tuáñra re hoói, tuáñra ekin no goríba, **68** aar zodi Ańí tuáñra ttu ekkán súwal fusár gorí, tuáñra zuwab no dibá. **69** Lekin yala lóti Manúc or Fua Alla Tálar den ďák ottu boói tákibo.” **70** Hétunot ĩtara beggúne fusár gorér de, “Tóoile Tuñí Allar Fua níki?” ĩba ye ĩtara re hoór de, “Tuáñra sóiyi hoór, ói Ańí.” **71** Híyane ĩtara hoór de, “Ańára ttu ar kii gobá lager dé? Kiyólla-hoilé ańára toh híyan ĩbár nizor muk ottu fúinni.”

23 Tarfore mujilíc říya urí Isá re Filat or hańse loigiyé. **2** Aar ĩtara ĩbar uore endilla elzam ókkol lagat doijje, “Ańára loot faiyí de, e Manúc cwa ye ańárar koum ore gumrá gorífeler. ĩbá ye Romi baáńcca re házana no diito maná goré,

edde dabi goré de ki ĩba Nize Mosih, Baáńcca.” **3** Filate Isá ttu fusár gorér de, “Tuñí Yohúdi ókkol or Baáńcca níki?” ĩba ye yóggwa re zuwabe hoór de, “Ói, tuñí hoór de héndilla.” **4** Tói Filate doóñr imam mún ore edde manúc or dol ore hoór de, “Ańí toh e Manúc cwa ttu honó hosúri no fair.” **5** Montor ĩtara zit gorát accíl, ĩtara hoór de, “ĩbá ye fura Yohúdiyat taalim di manúc ókkol ore uskai der. ĩbá ye héndilla Galil ottu lóti cúru gorí e zagat foijjonto aiccé deh.” **6** Filate híyan fúinne rár, Manúc ĩbá Galil or níki fusár goijjé. **7** Yóggwa ye Isá zettót Hérud or elakar Manúc de zani faijé, yóggwa ye ĩba re Hérud or hére diferáidiye, kiyólla-hoilé hé októót Hérud óu Jerúsalem ot accíl. **8** Hérude Isá re dekí bicí kúci óiye, kiyólla-hoilé yóggwa ye bicí deri lóti ĩba re dekí bolla azzu gorí accíl. Yóggwa ye ĩbar baabute fúinnil de híyala lóti ĩba ttu kessú keramot sai bolla acá goijjíl. **9** Yóggwa ye Isá re boóut súwala-súwali goijjíl, montor ĩba ye yóggwa re honó zuwab nó deh. **10** Doóñr imam múne edde alem múne hére říyai zuresúre ĩbar uore elzam lagat accíl. **11** Tarfore Hérude edde yóggwar fóous ókkole Isá re beizzoti edde řáttai goijjíl. ĩtara ĩba re sosoikka eggwá zubba fińdái Filat or hańse waafes diferáidiye. **12** Hé din Filat edde Hérud dustó óigiyoi, age ĩtara ezzon loi ezzon duccon accíl. **13** Filate doóñr imam ókkol ore, sóddar ókkol ore edde awam ókkol ore matai zoma goijjé, **14** tói ĩtara re hoór de, “Tuáñra e Manúc cwa re ańr hańse ainnó de, ĩbá ye maincóre bagi boni bolla uskai der hoói. Montor soó, añí ĩbá re tuáñrar cáikkat zerá goijjí, tuáñra e Manúc cwar uore zín elzam lagoór, híin or baabute añí ĩbá ttu honó hosúri no fair. **15** Hérude yó nó faa, hétolla yóggwa ye ĩbá re ańárar hańse waafes diferáidiye deh; tuáñra dekor, moot or laayek ĩbá ye honó kessú nó goré. **16** Hétolla añí ĩbá re sáńza dí hálás gorídiyum.” **17** Yóggwa ttu fottí Azadir-id or din honó ek hodi re ĩtarar hańse hálás gorídiya foitto. **18** Montor ĩtara beggúne ekkú fúañti guzori hoór de, “ĩba re marifélo, Bárabba re ańárar hańse hálás gorído.” **19** Bárabba re ziyól ot říya gyíl de, íte cóor ot bagiyai goijjíl de hétolla edde kún goijjíl de hétolla. **20** Filate Isá re hálás gorídibar niyote, ĩtara re ekí doílla hotá abar hoóil. **21** Lekin ĩtara guzori-guzori endilla howát accíl, “Kúruc ot dífelo, ĩba re kúruc ot dífelo!” **22** Filate tisárabar ĩtara re hoór de, “Kiyá, e Manúc cwa ye kii bura goijjé

dé? Añí toh íbá ttu mora fore de héndilla honó hosúri nó fai; hétolla añí íbá re sánza dí hálás gorídiyum.” 23 Montor ítara zit gorí guzori-guzori dabi gorát accíl de kí, íba re kúruc ot dí mariféla záy bolla. Aar ahérit ítarar guzora kaamiyab óiye. 24 Tói Filate ítarar dabi mozin gorá záy bolla hókum díye. 25 Yóggwa ye ítara maiggíl de manúc cwa re hálás gorídiye, zibá re ziyól ot díya gyíl de, bagiyai edde kún goijjíl de hétolla; montor Isá re ítarar moncá mozin gorá záy bolla gosái dífelaiye. 26 Fóous ókkole Isá re loizargói de októ, ítara Kureni cóor or Sáimon nam or ézzon manúc ore gang zaga ttu aiyér de hére dórifelaiye, dóri yóggwar uore kúruc can tulídiye, híyan Isár fisé-fisé boói loizai bolla. 27 Doónr ek dol manúc Isár fisé-fisé zaat accíl, ítarar bútoe boóut beiyáin óu accíl zetará íba lla buk kilai-kilai hañdat accíl. 28 Isá ye ítarar híkka fíri hoór de, “Ó Jerúsalem or mayafuain, Añr lla no hañdiyó, bólke tuáñra nizor lla edde nizor fuain dor lla hañdo. 29 Kiyólla-hoilé soó, eén din aiyér, ze din maincé hoibó de, ‘Mubarek báz mayafuain ókkol, zetará ttu honódin fuain nó óiyo, zetará honódin buk or dud nó háaba.’ 30 Héñtte maincé murá ókkol ore hoibó de, ‘Añárar uore for,’ aar faár ókkol ore hoibó de, ‘Añára re záfaifel.’ 31 Kiyólla-hoilé manúce dargwá keeñsa tákite zodi endilla goré, fúaile kii no goríbo de asé?” 32 Ítara oinno dui zon acámi re yó íbar fúañti marifélai bolla loizar. 33 Ítara zeñtte Matár Mala hoó de zaga híyan ot foónicce, hére ítara íba re edde hé acámi gún ore kúruc ot díye, ézzon ore íbar den dák ottu edde ar ézzon ore íbar ban dák ottu. 34 Isá ye hoór de, “Ó Baf, itará re maf goró; kiyólla-hoilé itará kii gorér de híyan itará no zane.” Baade ítara lojári mari ítarar bútoe íbar hoorsuor ore bák goijjé. 35 Manúc ókkole tíyai saái táikkil. Yohúdir neta ókkole yó íba re táttai gorí hoór de, “Íbá ye toh oinno zon ore basaitó; zodi íbá Allar Baicá Mosih wa de óile, yala Nizoré Nize basouk saí.” 36 Fóous ókkole yó dáké aái íba re táttai gorát accíl. Ítara íba re hái bolla sírka dii 37 hoór de, “Zodi Tui Yohúdir Baáñcca de óile, yala Nizoré Nize basa saí!” 38 Íbar matár uottú ekkán sáainbút óu maridiíl, ziyán ot lekké de, “Íbá óilde Yohúdi ókkol or Baáñcca.” 39 Kúruc ot díya giyéh de acámi ttu ezzone íba re beizzoti gorí hoór de, “Tui kí Mosih no? Nizoré edde añára re basa sená.” 40 Montor oinno acámi wa ye ítare jéjjerai zuwab

der de, “Tui kí Alla re úddwa no dooros? Tui yó de ekí dóilla sánza foór. 41 Becók añárar sánza hókkot, kiyólla-hoilé añára nizor ham olla ziyán laayek híyan fair deh, lekin e Manúc cwa ye toh honó hosúri nó goré.” 42 Tarfore yóggwa ye hoór de, “Ó Isá, Tuñí Nizor raijot aibá de októ añré yaad raikkó.” 43 Isá ye yóggwa re hoór de, “Añí tuáñre sóiyi hoóir, aijja tuñí Añr fúañti jonnotul-férodus ot óiba.” 44 Héñtte duúñijjar baró wa ánik baijjé, héñtte lóti tin nwá báze fán guñra mulluk andár ói accíl, 45 kiyólla-hoilé beile foór díya bon gorífelaiye; aar baitul-mukaddos or foroda gán fári dui bák óigiyoi. 46 Hétunot Isá ye eggwá doónr abase guzori hoór de, “Ó Baf, Tuáñr át ot Añr ruh gosáidiyi.” Híyan hoói baade íba entehal óigiyoi. 47 Ziyán óiye híyan deki Romi cáape Allar taarif gorí hoór de, “Sóiyi e Manúc cwa behosúr accíl!” 48 Aar manúc zetará hé tooñcá saitó zoma óiye, ítara beggúne zín óiye híin deki buk kilai-kilai waafes giyyégoi. 49 Montor íbar sinforiso manúc edde beiyáin zetará Galil ottu lóti íbar fisáli doijjil, ítara beggúne duré góri tíyai híin saái táikkil. 50 Yusúf nam or ézzon gom edde forhésgar manúc accíl. Yóggwa fótuayi-mujilíc or membór accíl, 51 montor yóggwa ítarar sóllat edde ham ot razi nu accíl. Yóggwa Yohúdir cóor Aramátíyat tákito, aar Allar raijjo lla entezar gorí accíl. 52 Yóggwa ye Filat or hañse zai Isár lac cwa maiggé, 53 baade lac cwa lamai ekkán hohón or hoor ot beráiyé, aar cíl kúndi banaiyé de eggwá hobor or bútoe raikkégoi, zibát honódin honókiyo re dohón goráil de náí. 54 Hé din accíl entezam-or-din, aar ebaadot-or-din cúru óibar októ óiye. 55 Galil ottu ze beiyáin nún Isár fúañti aiccíl ítara fisá dori, hobor gwá edde Isár lac cwa re keéngori raikké de deikkíl. 56 Tarfore ítara waafes zaigói, kúcho mosólla ókkol edde añtor ókkol toiyar goijjíl. Aar ebaadot-or-din Córíyot or hókum mozin ziraáil.

24 Háftar foóila din bíinna kúb sóore, beiyáin núne kúcho mosólla uúin looi hobor gwat aiccé zín ítara toiyar goijjíl. 2 Ítara hobor or muk ottu cíl lan larifelaiya loot faáil, 3 montor bútoe goílle rár, Malik Isár lac loot nó faa. 4 Ítara oulzóul ot forigiyói de októ, asimbit sosoikka hoor findá duwá manúc ítarar dák ottu tíyaiye. 5 Beiyáin ítara doore matá hémmikka gorífelaiye, montor manúc cúne ítara re hoór

de, “Tuáñra Zindawa re mora ókkol ot máze kiyá tuwoór? 6 Íba eré náí, Íba zinda óigiyoi. Monot goró, Íba ye Galil ot tákite tuáñra re kii hoóil. 7 Hoóil de, Manúc or Fua re gunágar ókkol or át ot gosáidiya foribó, kúruc ot dí mariféla foribó, aar tin din ot din Íba ttu abar zinda óizagoi foribó.” 8 Hétunot ítara ttu Íbar hotá monot uittíl. 9 Baade ítara hobor ottu waafes giyyégoi, aar híin beggún egaro zon nún ore edde baki manúc beggún ore zanaiyé. 10 Zetará sáhabi gún ore híin zanaiyé, ítara óilde Moriyam Makdálini, Joanna, edde Yakub or maa Moriyam; ítara fúañti aro beriyáin ókkol accíl. 11 Montor ítara ttu híin altufáltu hotár dóil laiggíl, hétolla ítara beriyáin nún ore biccác nó goré. 12 Lekin Fitor urí hobor ot duñrdiyé, aar niyúri saiyé rár dekér de, siríf hohón or hoor gún beh asé. Íba ye hé hálot dekí taajup ói, gór ot giyyégoi. 13 Soó, hé din ítara ttu dui zon manúc ekkán Émayus nam or farat zaar, ziyán Jerúsalem ottu hánt mail duré. 14 Aar ítara ezzon loi ezzone, ziín óiye híin beggún or baabute gofat accíl. 15 Ítara gofer de edde toskara gorér de októ, Isá Nize dáke aái ítara fúañti áñrat doijje. 16 Lekin ítara suk ore Íba re siní no fare fán gorífela gíyeh. 17 Íba ye ítara re hoór de, “Tuáñra áñri-áñri ezzon loi ezzone iín kiyór baabute gofór dé?” Hétunot ítara nakmuk hala gorí tíyagiyoi. 18 Ítara ttu zar nam niki Jeréópas, yóggwa ye Isá re zuwabe hoór de, “Jerúsalem or forbáci siríf Tuñ ezzone niki e hooddin or bútoe óiye de híin no zano dé?” 19 Isá ye ítara re hoór de, “Kii óiye dé?” Ítara Íba re hoór de, “Isá Nasárir uore óiye de híin. Íba Allar edde tamám manúc or nozor ot hame edde hotáhattaraye eggwá taakotwala nobi accíl. 20 Doóñr imam ókkole edde añárar sóddar ókkole Íba re moot or sánza lla gosáidiye, aar Íba re kúruc ot dífela gíyeh. 21 Lekin añára ttu acá accíl de, Boni Isráil ore Íba ye beh azad goríbo. Aro hoiyúm hoilé, iín óiye de aijja tin din óigiyoi. 22 Montor añárar bútotu hoozzon beriyáin de añára re ammúk gorídiye. Ítara bífnna kúb sóore hobor gwat gyíl, 23 montor Íbar lac loot nó faa. Ítara aái hoiyégai de, ítara re fírista ye dahádiye aar híine ítara re hoiyé de, Íba zinda asé. 24 Hétunot añárar fúañti accíl de ítara ttu hoozzone hobor gwat giyyé rár, beriyáin núne hoiyé de mozin loot faiyé, montor ítara Isá re nó deké.” 25 Hétunot Isá ye ítara re hoór de, “Ó bekuf ókkol,

tuáñrar dil toh nobi ókkole hoóigiye de hotá beggún biccác goitté bicí asté! 26 Mosih ttu Íbar mohímat góilte duk híin faar ki zorur nu accíl?” 27 Baade Íba ye Muúsa edde tamám nobi ókkol ottu cúru gorí, fura pak-kalam ot Íbar baabute ziín asé híin ítara re buzáidiye. 28 Zaitze ítara zaar de farar hañsáhañsi foónicce rár; Íba ye aro duré zaar fán goijjíl. 29 Montor ítara Íba re becábici aros gorí hoór de, “Añárar fúañti táizogoi, kiyólla-hoilé háñz óizargoi, aar din fúraiyegei.” Tói Íba ítara fúañti táki bolla bútoe giyyé. 30 Aar eén óiye, zeñtté Íba ítara fúañti hána háito boiccé, Íba ye ruñi looi Alla re cúkuriya goijjíl, aar báñgi ítara re diyyé. 31 Hétunot ítara suk kúligiyoi, aar ítara Íba re sinné; montor Íba ítara nozor ottu gaib óigiyoi. 32 Ítara ezzon ore ezzone hoór de, “Foñt ot zeñtté Íba ye añára llói hotá hoór aar añára re pak-kalam buzái der, héñtte añárar bútoe añárar dil zolat accíl de no né?” 33 Ítara éhon-éhon urí Jerúsalem ot waafes aáigiyoi, aar hére egaro zon nún ore edde ítara sáañti ókkol ore ekkán ot zoma loot faiyé, 34 aar hoór de, “Malik sóiyi zinda óiye; Íba ye Sáimon ore dahádiye.” 35 Tarfore ítara duní zone foñt ot kii óiye de zanaiyé, edde Isá ye ruñi báñgibar októ Íba re ítara keéngori sinníl de híyan óu zanaiyé. 36 Ítara híin hoór de októ, Isá Nize ítara mazé aái tíyaiye, aar hoór de, “Assalamu alaikum.” 37 Montor ítara doore toddó óigiyoi, ítara táaijje de bút dekér bóuli. 38 Íba ye ítara re hoór de, “Tuáñra doóror kiyá? Tuáñrar dil ot cóok kiyá aiyér? 39 Añr át téng soó, Ibá Añí. Añré dóri soó, kiyólla-hoilé bú otto toh gusso edde áñđđi náí, zendilla Añr ttu asé de dekór.” 40 Híyan hoói Íba ye ítara re Nizor át téng daháiyé. 41 Ítara zettót kúciye edde taajupe biccác gorí no farer, Íba ye ítara re hoór de, “Hái bolla eré tuáñra ttu kessú asé né?” 42 Tói ítara Íba re ek háñda sfañt díya mas diyyé. 43 Aar Íba ye híyan looi ítara cáikkat háiyé. 44 Tarfore Íba ye ítara re hoór de, “Ín óilde Añr hotá ziín tuáñra re Añí tuáñrar fúañti tákite hoóilam, ki hoilé, Añr baabute ziín Muúsar Córíyot ot, nobi ókkol or kitab ot, edde Zobur Córíf ot leikká asé, híin beggún fura ówar zorur.” 45 Baade Íba ye ítara demak kúliidiye, zeéne ítara pak-kalam buzí fare. 46 Íba ye ítara re hoór de, “Pak-kalam ot endilla asé, Mosih ye duk faibo aar tin din ot din mora ttu zinda óizayboi, 47 baade Jerúsalem ottu lóti cúru gorí tamám kouw ókkol or hañse

Íbar name guná maf faibar touwár tobolik gorá zaybo. **48** Tuáñra óilade iín beggún or gobá. **49** Soó, Añr Baf or waada goijjá wa re Añí tuáñrar hañse diferáidiyum; lekin asman ottu taakote bóri nó zogoi foijjonto e cóor ot táikko.” **50** Fore Isá ye ítara re baárkule Betániyar héddur foijjonto loigiyé, aar Íbar át tulí ítara re borhot diyé. **51** Íba ye ítara re borhot diyat accíl de októ, íba ítara ttu alok óigiyoi, aar íba re asman ot tulífela gíyeh. **52** Ítara íba re sóida gorí baade, bicí kúcir sáañte Jerúsalem ot waafes aáigiyoi, **53** aar baitul-mukaddos ot házir táki lagatar Allar taarif gorát accíl.

Yohánna

1 Foóila cúrut Kalam accíl, Kalam Allar fúañti accíl, edde Kalam nize Alla accíl. **2** Íba foóila cúrut Allar fúañti accíl. **3** Hárr kessú íbar duara foida gorá gíyeh, aar zedún foida gorá gíyeh híin or bútoire ekkán óu íba re sára foida gorá nó zah. **4** Íbar hañse zindigi accíl, aar hé zindigi accíl insán or Nur. **5** Hé Nure andár ot foór deh, montor andáre hé Nur ore ziti no fare. **6** Alla ye Yaháya nam or ézzon manúc ore duniyait diferáil. **7** Yóggwa re hé Nur or ek gobá ísafe diferá gíyl, zeéne beggúne yóggwar gobá fúni iman ané. **8** Yóggwa nize hóno hé Nur accíl de no, bólke yóggwa hé Nur or baabute gobá díto aiccíl deh. **9** Sóiyi Nur óilde Ubá zibá ye fottí maincóre foór deh, íba duniyait aibár accíl. **10** Íba duniyait accíl, aar duniyai íbar duara foida gorá gíyeh, toóu duniyair maincé íba re nó siné. **11** Íba Nizor maincór hére aiccíl, montor nizor maincé íba re kobul nó goré. **12** Lekin zetó zone íba re kobul gorí iman ainné, ítara fottí zon ore íba ye Allar fuain óibar hók diiyé. **13** Ítarar hé zormo no lou wóttu óiye, no jisím or moncáye óiye, aar no manúc or moncáye óiye, bólke Alla ttu óiye deh. **14** Hé Kalam insán boinné, aar añárar fúañti táikke. Baf or lehár ek Fua ísafe íbar ze mohíma asé hé mohíma re añára deikkí. Íba rahámote edde sóiyiye furaiya. **15** Yaháya ye íbar baabute gobá díyl. Yóggwa ye guzori hoóil de, “Íbá óilde Ubá zibár baabute añí endilla hoóilam, ‘Añí baade zibá aiyér íba añr túaro doónr, kiyólla-hoilé íba añr age lóti asé.’” **16** Añára beggúne toh íbar furaiya ttu rahámot or uore rahámot faiyí. **17** Kiyólla-hoilé Córiyot diiya gíyl de Muúsar duara, montor rahámot edde sóiyi aiccé de Isá Mosihr duara. **18** Alla re toh honókiye honódin deikké de náí, lekin Baf or buk ot accíl de lehár ek Fua ye beh íba re zahér goijjé. **19** Yaháyar gobá accíl de yían, zeñtíte Yohúdir neta ókkole Jerúsalem cóor ottu hoozzon imam ore edde Leéviyo re yóggwar hére yían fusár goittó diferáiyé, “Tuñí hon?” **20** Yóggwa ye inkar nó goré, bólke cíkar gorí hoiyé de, “Añí Mosih no.” **21** Ítara yóggwa ttu fusár goijjé de, “Tóoile tuñí hon? Tuñí hóno nobi Eliyas né?” Yóggwa ye hoiyé de, “No, añí no.” Tói ítara fusár goijjé de, “Tuñí kí aibár hotá asé de hé Nobí?” Yóggwa ye zuwab diyé de, “No.” **22** Tarfore ítara yóggwa re hoiyé de, “Tóoile tuñí

hon añára re zuwab doh, zeéne zetará añára re diferáiyé ítara re zuwab di fari. Tuñí nizor baabute kii hoó?” **23** Yaháya ye nobi Yesáyahr hotá lói zuwab diyé de, “Añí óilam de ubá zibá ye moidan zagat guzori-guzori eén hoór, ‘Mabud or rasta uzu goró.’” **24** Hé manúc ítara re diferá gíyeh de óilde Féroci fírkar torfóttu. **25** Ítara Yaháya ttu fusár goijjé de, “Zodi tuñí Mosih no, Eliyas no, edde hé Nobí wa yó no, tóoile tuñí báp̄tisma kiyá doh?” **26** Yaháya ye ítara re zuwabe hoiyé de, “Añí toh fanít éna báp̄tisma dí, montor tuáñrar bútoire eén Ekzon tíyai asé zibá re tuáñra no sinó. **27** Íba óilde Ubá zibá añí baade aiyér; añí íbar centár or fíta kúli bolla úddwa laayek no.” **28** Ín Jordán hál or farkule Betániyat óiye deh, zeré Yaháya ye báp̄tisma díto. **29** Tarfor din Yaháya ye Isá yóggwar uzu aiyér de dekkí, hoór de, “Soó, Ubá óilde Allar Bérásóol-or-Sóo, zibá ye duniyair maincór guná loizagói. **30** Íba óilde Ubá zibár baabute añí endilla hoóilam, ‘Añí baade eén Ekzon aiyér, zibár tokka añr túaro doónr, kiyólla-hoilé íba añr age lóti asé.’” **31** Añí íba re no sinítam, montor íba Isráili ókkol or hañse zahér ó fán, añí fanír báp̄tisma díto aiccí deh.” **32** Tarfore Yaháya ye yían gobá díye, “Añí deikkí de, Pak-Ruh hoitor or dóilla ói asman ottu lami aái íbar uore boiccé. **33** Añí íba re no sinítam, montor zibá ye añré fanír báp̄tisma díto diferáiyé, íba ye añré hoiyé de, ‘Zibár uore Pak-Ruh lami aái boibó de dekkí, íba óilde Ubá zibá ye Pak-Ruh lói báp̄tisma díbo.’” **34** Añí héndilla deikkí edde gobá díre de ki, íba óilde Allar Fua.” **35** Tarfor din abar Yaháya edde yóggwar dui zon ummot hére tíyai accíl. **36** Aar Isá híyan ttu añri zaar de dekkí, yóggwa ye hoór de, “Soó, Ubá óilde Allar bérásóol-or-Sóo!” **37** Yóggwar hotá fúni, hé duní ummot Isár fisáli doijje. **38** Isá ye físsá fíri dekére de, ítara fisé-fisé aiyér; hétunot ítara re hoór de, “Tuáñra kii talac gorór dé?” Ítara zuwab der de, “Rabbí” (ziyán or maáni óilde, ustat), “Tuñí horé táko dé?” **39** Íba ye ítara re hoór de, “Aiyó soógai.” Tói ítara zai, Isá táke de zaga gán saiye, aar hé din Isár fúañti táikkil. Héñtíte háñzinna sair gwá baijíl. **40** Yaháyar hotá fúni ze dui zon Isár fisáli doijjil, ítara ttu ezzon accíl Sáimon Fitor or báí Enderiyas. **41** Yóggwa ye age nizor báí Sáimon ore tuwai loi íba re hoór de, “Añára Mesáiya re loot faiyí” (Mesáiya maáni, Mosih). **42** Yóggwa ye Sáimon ore Isár hañse ainné. Isá ye Sáimon or híkka saái hoór de, “Tui

toh Yohánnar fua Sáimon, montor toré Kéfas ðaha zaybo” (hé nam or maáni óilde, Fitor). 43 Tarfor din Isá ye Galil elakat zaitogói niyot goijjé. Íba ye Filíp ore loot fai hoór de, “Añr fisáli dor.” 44 Filíp accíl de Enderiyas edde Fitor tarár cóor Betsáidar manúc. 45 Filípe Natanel ore loot fai hoór de, “Añára Ubá re loot faiyi zibár baabute Muúsa ye Tourat Córif ot leikké, aar nobi ókkole yó leikké; íba óilde Yúsuf or fua Isá, Nasárat cóor or.” 46 Natanele íba re hoór de, “Nasárat ottu kí kessú gom aái fare?” Filípe hoór de, “Aiyó, soógai.” 47 Isá ye Natanel Nizor uzu aiyér de deki yóggwar baabute hoór de, “Soó, ezzon sóiyi Isráili, zibár bútoe honó dúkabazi náí.” 48 Natanele Isá ttu fusár gorér de, “Tuñí añré keéngori sinó?” Isá ye yóggwa re zuwabe hoór de, “Tuáñre Filípe ðahaibár age zeñtté tuñí ðuñir-gas tala accíla, héñtte Añí tuáñre deikkí.” 49 Hétunot Natanele íba re hoór de, “Rabbí, Tuñí óilade Allar Fua, Tuñí Boni Isráil or Baáñcca.” 50 Isá ye yóggwa re zuwabe hoór de, “Añí tuáñre ðuñir-gas tala deikkí hoiyi de híyan olla kí tuñí iman ainnó? Tuñí iín or túaro ðoóñr-ðoóñr ham ókkol dekíba.” 51 Íba ye aró hoór de, “Añí tuáñra re sóiyi-sóiyi hoóir, tuáñra endilla dekíba, asman kúla aar Allar fírista ókkol Manúc or Fuar uore uřálama gorér.”

2 Tin din ot din Galil or Kána farat ekkán boirat óiye. Isár maa hére accíl. 2 Hé boirat ot Isá edde Íbar cárít tun ore yó dawot diyé. 3 Zeñtté hére anggur or roc fúraigiyoi, Isár maa ye Isá re hoór de, “Ítará ttu ar anggur or roc náí.” 4 Isá ye maa re hoór de, “Maá, híyan or baabute tuñí lói Añí lói kii bazá asé? Añr októ de aijjó nú aiyé.” 5 Isár maa ye háadem ókkol ore hoór de, “Íbá ye tuáñra re ziín goittó hoó, híin goijjó.” 6 Yohúdir Córiyot mozin uzu banai bolla hére fattór or sów wa siyú báugaraiya accíl, híin ekgwát máze kuri ttu tirić gelóm foijjonto faní añritó. 7 Isá ye háadem ókkol ore hoór de, “E siyú gún ot faní bóro.” Tói ítara híin ot Ƨip-Ƨip faní bóijje. 8 Baade Isá ye ítara re hoór de, “Yala entú hodún looi boiraitta hánar zimmadar ore doogói.” Tói ítara loigiyé. 9 Ze faní gún anggur or roc bonigiyói, híin hé zimmadar gwá ye háisai baade dulá re mataiyé. Yóggwa ye hé anggur or roc cún hontú aiccé hoi no fare, montor goóur zetará faní ainné ítara hoi fare. 10 Yóggwa ye dulá re hoór de, “Fottí

maincé de age gom anggur or roc cún hábaifela, aar meéman ókkol or mon mozin háiya óile baade yár túaro hóraf fin háaba. Montor tuñí aijjó gom anggur or roc cún rakídiyo.” 11 Galil or Kána farat illayi-nicán ísafe e foóila cúrur keramot tán gorí Isá ye Nizor mohíma zahér goijjé. Híyan deki Íbar cárít tune Íbar uore iman ainné. 12 Yárbaade Isá, Isár maa, báiyain, edde cárít tun nise Kaparnahúm cóor ot giyyé; ítara hére hooddin táikkil. 13 Yohúdi ókkol or Azadir-id zeñtté ðáke aiccé, Isá uore Jerúsalem ot giyyé. 14 Aar baitul-mukaddos or uřán ot mazé íba ye dekére de, maincé goru, bérasóol, edde hoitor ókkol beser, aar hodúne boói baƧa báñger. 15 Hétunot íba ye rosí lói ekkán coóñk banai ítara re baitul-mukaddos or uřán ottu bérasóol edde goru ókkol lói looraidiye. Íba ye baƧa báñgoya ókkol or Ƨebíl natđiyagaraidi ítarar Ƨiañ-foicá cínřaciñttá gorídiye. 16 Zetará hoitor beser, ítara re íba ye hoór de, “Entú iín loizogói! Añr Baf or gór ore bazar no banaiyó!” 17 Hétunot Íbar cárít tun ottu pak-kalam or e hotá monot uiƧtté, “Tuáñr gór or muhábbote añré háifelaibo.” 18 Yohúdi ókkole Isá ttu fusár gorér de, “Tuáñr ttu iín goríbar adíkar asé de híyan, Tuñí añára re kii keramot dahái sábut gorí faribá?” 19 Isá ye ítara re zuwab der de, “E baitul-mukaddos yíán báñgifelo, Añí tin din or bútoe banaidiyum.” 20 Yohúdi ítara hoór de, “E baitul-mukaddos yíán banaité salic-sów bosór laiggé, aar Tuñí tin din or bútoe banai diba dé?” 21 Montor Isá ye baitul-mukaddos or bazá dí Íbar Nizor gaar baabute hoiyé deh. 22 Hétolla zeñtté Isá re mora ttu zinda gorá gíyeh, Íbar cárít tun ottu íba ye hoiyé de hotá monot uiƧtté. Tarfore ítara pak-kalam edde Isár hé hotár uore iman ainné. 23 Azadir-id or októ, Isá ye Jerúsalem ot tákite ze keramot goijjíl, híin deki bíć maincé Íbar uore iman ainné. 24 Lekin Isá ye ítara re bóraca nó goré, kiyólla-hoilé íba ye manúc beggún ore bálagori siné, 25 aar íba ttu maincór baabute honó gobá no lage, kiyólla-hoilé maincór dil ot kii asé de híyan íba ye zane.

3 Féroci ókkol or bútoe Nikódemas nam or ézzon Yohúdi ókkol or neta accíl. 2 Ek din raitta yóggwa Isár hére aái hoór de, “Rabbí, añára zani, Tuñí ézzon ustat ísafe Allar torfóttu aiccó; kiyólla-hoilé Tuñí ze keramot ókkol goró, Alla fúañti no tákile honókiye híin gorí no

fare.” 3 Isá ye yóggwa re zuwabe hoór de, “Añí tuáñre sóiyi-sóiyi hoóir, noya gori zormo no óile, honókiye Allar raijjo deki no fare.” 4 Nikódemase Isá ttu fusár gorér de, “Zeñtté manúc ézzon burá óizagoi, íte keéngori abar zormo loibo? Dusárabar kí íte maar feřot góli abar zormo ói faribó?” 5 Isá ye yóggwa re zuwab der de, “Añí tuáñre sóiyi-sóiyi hoóir, faní edde Ruh ttu zormo no óile, honókiye Allar raijjot góli no fare.” 6 Insán ottu ziín zormo ó híin insán, aar Ruh ttu ziín zormo ó híin ruh. 7 Añí ziyán tuáñre hoiyí, tuáñra ttu noya gori zormo ówa foribó, híyan lói ammúk no óiyo. 8 Boiyar toh zikká monehoó híkka baá, aar tuñí hé boiyar or abas fúno, montor hontú aiyér aar hoikká zaar híyan toh no zano. Zetará Ruh ttu zormo óiye ítara yó héndilla.” 9 Nikódemase Isá ttu fusár gorér de, “Íin keéngori ói fare?” 10 Isá ye yóggwa re zuwabe hoór de, “Tuñí de ézzon Boni Isráil or ustat, toóu tuñí íin no buzó dé?” 11 Añí tuáñre sóiyi-sóiyi hoóir, añára ziín zani híin hoói, aar ziín deikkí híin or baabute gobá díh, montor tuáñra añárar gobá re kobul no goró. 12 Añí tuáñra re duniyaibi jiníc or hotá hoilé zettót biccác no goró, tói asmani jiníc or hotá hoilé keéngori biccác goríba? 13 Zibá asman ot táke aar asman ottu lami aiccé, hé Manúc or Fua sára ar honókiye asman ot nó uré. 14 Muúsa ye zendilla moidan elakat háf ore uore tuillí, héndilla Manúc or Fua re yó uore tulá zaybo, 15 zeéne zee niki Íbar uore iman ané íte ofúrani zindigi faa. (aiōnios g166) 16 “Kiyólla-hoilé Alla ye duniyair maincóre etó muhábbot goijjé, Íba ye Nizor lehár ek Fua dan gorífelaiye; zeéne zee kiyé hé Fuar uore iman ané yóggwa nac no, bólke ofúrani zindigi faa. (aiōnios g166) 17 Alla ye toh duniyair maincór hosúri dóitto Nizor Fua re duniyair diferáye de no, bólke etollá diferáye, zeéne duniyair maincé hé Fuar duara nejat fa. 18 “Zee niki hé Fuar uore iman ané, ítar hosúr dóra no zah; montor zee niki iman nu ané, ítar hosúr age lóti dóra gíyeh, kiyólla-hoilé íte de Allar siríf ek Fuar uore iman nú ané. 19 Ítar hosúr etollá bóuli dóra gíyeh, kiyólla-hoilé duniyair Nur aiccí, montor manúc ókkol or ham hóraf de hétolla, ítara Nur or túaro andár ore bicí fosón goijjé. 20 Zee niki hóraf ham goré, íte Nur ore nafórot goré aar íte Nur ot nu aiyé, kiyólla-hoilé zodi ailé ítar hórafí dahá zaybo bouli đoorá. 21 Montor zee niki sóiyi gán gorí zindigi hara, íte Nur ot aiyé, zeéne ítar ham

ókkol Allar moncá mozin gorá gíyeh de híyan sáf-sáf góri dahá zah.” 22 Yárbaade Isá edde Íbar cárit tun Yohúdiya elakat giyyé. Héře Íba cárit tun or fúañti hooddin táikkil, aar manúc ókkol ore báptisma díyl. 23 Héñtte Sálím zagar đáke Ainon nam or ek farat Yaháya yó báptisma díyat accíl, kiyólla-hoilé hé zagat bicí faní accíl, aar manúc ókkol aái Íba ttu báptisma lowat accíl. 24 Yaháya re hé októť ziyól ot díya nó zah. 25 Ek din Yaháyar hoozzon ummote Yohúdi ókkol lói uzu banar baabute torkatorki diyé. 26 Ítara Yaháyar hañse aái hoór de, “Rabbí, Zibá Jordán hál or farkule tuáñr fúañti accíl, Zibár baabute tuñí gobá díyla, soó, Íba ye báptisma der, aar manúc beggún Íbar héře aiyér.” 27 Yaháya ye zuwab der de, “Asman ottu diiya no gilé honókiye kessú fai no fare. 28 Tuáñra nize toh añr e hotár gobá asó, ki hoilé, ‘Añí Mosih no, montor añré Íbar age diferá gíyeh.’ 29 Zar át ot dulí re tulídiya gíyeh íte óilde dulá. Dulár dustó ye toh tíyái dulár hotá fúne, aar dulár abas fúni bicí kúci ó. Borabor héndilla, yala añr kúci yó fura óiye. 30 Becók Íba ttu đoóñr ówa foribó, aar añr ttu cóñro ówa foribó. 31 “Zibá uottú aiccé, Íba beggún or uore; zibá duniyai ttu, Íba duniyair, aar duniyaibi hotá hoó. Montor zibá asman ottu aiccé, Íba beggún or uore. 32 Íba ye ziín deikké edde fúinne híin or gobá déh, toóu honókiye Íbar gobá kobul no goré. 33 Montor zee niki kobul goijjé, íte e hotár moór lagaifélaie de ki, Alla óilde sóiyi. 34 Zibá re Alla ye diferáye, Íba ye Allar hotá hoó, kiyólla-hoilé Alla ye toh mafi-mafi Ruh no dee. 35 Bafe Fua re muhábbot goré, aar hárr kessú Íbar át ot gosáidiye. 36 Zee niki hé Fuar uore iman ané, ítar ttu ofúrani zindigi asé; montor zee niki hé Fuar uore iman nu ané, íte hé zindigi no dekišo, bólke ítar uore Allar gozzob asé.” (aiōnios g166)

4 Zeñtté Malike zani faijé de ki, Íba ye Yaháyar túaro bicí ummot banaiyé de aar báptisma díye de híin Férocí ókkole fúinne, 2 háleke Isá Nize báptisma no dito, bólke Íbar ummot ókkole dito deh, 3 tói Íba Yohúdiya elaka ttu neeli abar Galil elakat zaargói. 4 Zaité Íba ttu Samária elaka báy zaa forer. 5 Zaité-zaité Íba Samáriar Súkor nam or ekkán farat foóñicce, ziyán Yakube nizor fua Yusúf ore díl de zobin or đáke. 6 Héře Yakub or fať-kuwa accíl. Isá aññitte-aññitte óran ói hé fať-kuwa war hañsat boiccé. Héñtte beil țík óiye. 7 Ekgwá Samáriar

mayafua hére faní tuiltó aiccé. Isá ye híba re hoór de, “Añré ek tirác faní háaba.” 8 Kiyólla-hoilé íbar cárit tun cóor ot hána kinto giyyói. 9 Hétolla hé Samári mayafua ye Isá re hoór de, “Añí de ézzon Samári mayafua, Tuñí Yohúdi ói yore keéngori añr ttu faní magor?” Híba ye e hotá etollá hoiyé, kiyólla-hoilé Yohúdi ókkol lói Samári ókkol lói honó taalukat náí. 10 Isá ye híba re zuwab der de, “Tui zodi Allar hádiya re edde tor ttu hone faní maiggé hoi faitti, tóoile tui íba ttu faní magití, aar íba ye toré zindigi dee de faní diito.” 11 Mayafua ye hoór de, “Ustat, Tuñír ttu de faní tulí bolla honó tára náí, aar faṭ-kuwa toh mur. Tói Tuñí hé zindigir faní hoṛé faiyó? 12 Tuñí añárar baf Yakub or túaro ḑoóñr níki, zibá ye añára re e faṭ-kuwa wa diiyé, aar íba nize, íbar fuain ókkole, edde íbar gorusól ókkole yibár faní háíye?” 13 Isá ye híba re zuwabe hoór de, “Zee niki e faní háa, ítar ttu abar tirác lagibó, 14 montor zee niki Añí dii de faní háa ítar ttu ar honódin tirác no lagibó, bólke Añí diyum de hé faní ítar dil ot zónna ttu uré fángori uríbo, aar híine ítare ofúrani zindigi diibo.” (aiñon g165, aiñonios g166) 15 Mayafua ye Isá re hoór de, “Ustat, tóoile añré hé faní doo, zeéne añr ttu ar tirác no lage, aar eṛé faní lla yó aá no fore.” 16 Isá ye híba re hoór de, “Tóoile zaa, tor hócom ore eṛé matai angói.” 17 Mayafua ye Isá re zuwabe hoór de, “Añr ttu de honó hócom náí.” Isá ye híba re hoór de, “Tui sóiyi hoiyós, tor ttu honó hócom náí. 18 Kiyólla-hoilé tor ttu yaar age fañs swá hócom ógiyoi, aar ehón zee niki tor fúañti asé, íte yó tor hócom no. Tui sóiyi hoiyós.” 19 Mayafua ye hoór de, “Ustat, añí ehón zani faijji, Tuñí ézzon nobi. 20 Zeén óibo óuk, añárar bafḑada ókkole e faár gwar uore ebaadot goittó, montor tuáñra Yohúdi ókkole hoó de, manúc ókkol ottu Jerúsalem ot ebaadot gorár fóros.” 21 Isá ye hoór de, “Mayafua, Añr hotá biccác gór, eén októ aiyér, tuáñra Baf or ebaadot no e faár or uore goríba, aar no Jerúsalem ot goríba. 22 Tuáñra zibá re no sinó íbar ebaadot goró deh; montor añára zibár ebaadot gorí íba re siní, kiyólla-hoilé nejat or mouka Yohúdir bútotu éna aiccé. 23 Lekin eén októ aiyér, ehón óilde hé októ, zeñtté sóiyi ebaadotgár ókkole ruh edde sóiyi lói Baf or ebaadot goríbo, kiyólla-hoilé Bafe yó héndilla ebaadotgár or talac gorér. 24 Alla óilde Ruh, hétolla zetará íbar ebaadot goré ítara ttu íbar ebaadot ruh edde sóiyi lói gorár zorur.” 25

Mayafua ye hoór de, “Añí zani Mesáiya aiyér, yáni Mosih. Íba zeñtté aibó, añára re hárr kessú zanaidibo.” 26 Isá ye híba re hoór de, “Añí óilam de íba, zibá ye tor loi hotá hoóir.” 27 Hétunot íbar cárit tun aiccé, aar Isá ye eggwá mayafua lloi hotá hoór de dekí ítara ammúk ógiyoi; montor toóu ítara honókiye fusár nó goré de ki, “Tuñí kii tuwoór?” yáh, “Tuñí kiyólla híba llói hotá hoór?” 28 Baade mayafua wa ye nizor fanír góra wa eri, farat zai manúc ókkol ore hoór de, 29 “Aiyó, tuáñra eggwá Manúc ore soógai, zibá ye añí añr zindigit ziñ-ziñ goijji híin beggún añré hoiyé. Tóoile íba hónó hé Mosih né?” 30 Tói manúc ókkol fara ttu neeli íbar hére aát doijje. 31 Héñtte íbar cárit tune íba re aros gorí hoór de, “Rabbí, kessú hóona.” 32 Lekin íba ye ítara re hoór de, “Añr ttu eén háibar hána asé, ziín or baabute tuáñra no zano.” 33 Hétunot íbar cárit tune afós ot hoór de, “Honókiye hónó íba re hána anídiye né?” 34 Isá ye ítara re hoór de, “Zibá ye Añré diferáíye íbar moncá edde ham fura gorón óilde Añr hána. 35 Tuáñra kí endilla no hoó né, ki hoilé, ‘Aró sair mac asé, baade fósol haṛibár ainda aibó?’ Montor Añí tuáñra re hoóir, suk tulí bil or uzu soó, fósol ókkol haṛi bolla fagigiyói. 36 Fósol haṛoya ókkole ehón óu muzuri faar, aar ofúrani zindigi lla fósol ókkol zoma gorí rakér, zeéne lagoya edde haṛoya duní zone mili kúci ó. (aiñonios g166) 37 E hotá sóiyi de ki, ‘Ezzone laga, ar ezzone haṛe.’ 38 Añí tuáñra re fósol uúin haṛitó diferáílam ziín olla tuáñra meénnot nó goró; oinno maincé meénnot goijje, aar tuáñra ítarar hé meénnot or fósol haitṭó.” 39 Hé mayafuar e hotá fúni fara híyan or bicí Samári ókkole Isár uore iman ainné, ki hoilé, “Añí añr zindigit ziín-ziín goijji híin beggún íba ye añré hoiyé.” 40 Zeñtté hé Samári ókkol Isár hañse aiccé, ítara íba re ítarar fúañti tákito aros goijji, tói íba hére dui din táikkil. 41 Íbar hotá fúni aró bicí maincé iman ainní. 42 Ítara mayafua wa re hoiyé de, “Ehón de añára tor hotár zoriya iman ainní de no, bólke añára nize íbar hotá fúni zani faijji de ki, íba óilde Ubá zibá duniyair manúc or sóiyi Nejatdoya.” 43 Dui din baade Isá héntu rowana loi Galil ot giyyé. 44 Isá Nize age hoóil de, “Ze honó nobir izzot nizor wotón ot náí.” 45 Hétolla íba zeñtté Galil ot aiccé, Galil or maincé íba re kobul goijje, kiyólla-hoilé Isá ye Jerúsalem ot Azadir-id ot ze ham ókkol goijji híin beggún ítara deikkíl, kiyólla-hoilé ítara yó

hé id ot giñl. **46** Baade íba abar Galil or Kána farat giyyé, zeré íba ye faní re anggur or roc banaáil. Hére Kaparnahúm cóor ot ek cáap or fua ttu ocúk óiye. **47** Zeñtté yóggwa ye fúinne de ki, Isá Yohúdiya ttu Galil ot aáigiyoí, hétunot yóggwa Isár hañse zai aros gorér de, yóggwar fua wa re gom goittó aító, kiyólla-hoilé fua wa moron-moron óoil. **48** Isá ye yóggwa re hoór de, “Tuáñra toh illayi-nicán edde keramot ókkol no dekilé bilkúl iman nu aníba.” **49** Baáñccar cáape hoór de, “Ó Malik, añr fua wa moribár age aiyó!” **50** Isá ye yóggwa re hoór de, “Zoogóí; tuáñr fua basibó.” Baade manúc cwa ye Isár hotá ekin gorí giyyégoí. **51** Yóggwa foñt ot táite, nizor hodún gulame aái hoór de, “Tuáñr fua gom óigiyoí!” **52** Tói yóggwa ye fua hoñtté gom óiye de híyan ítara ttu hóbor lóíye. Ítara yóggwa re hoór de, “Gel de hailla din or eggwá báze ítar zor giyyói.” **53** Hétunot bafe zani faijjé de, sóiyi onñté fua wa gom óiye zeñtté Isá ye hoiyé de, “Tuáñr fua basibó.” Baade yóggwa edde yóggwar gór ífya ye Isár uore iman ainné. **54** Yíán óilde Isár dui nombór or keramot, ziyán íba ye Yohúdiya ttu neeli abar Galil ot aái goijjé.

5 Yárbaade, Yohúdir ekkán id óiye, aar Isá uore Jerúsalem ot giyyé. **2** Jerúsalem or Bérasóol Geit hoó de híyan or dake eggwá foóir asé, zibá re Hibrí zuban ot Betésda hoó, hé foóir gwat fañs sán baanda asé. **3** Baanda híin ot bicí biyaraimma ókkol fori tákito, zendilla niki, ańdá, leng, mazur. Ítara beggúne fanír lorasora re sooñi gorí tákito. **4** Kiyólla-hoilé Allar ek fírista taime-taime hé foóir gwat lami aái faní laritó, aar faní lari baade zee niki age lami fare ítar ze honó biyaram gom óizaytoi. **5** Hére ézzon manúc accíl, zibá tiríc-añcto bosórja biyaraimma. **6** Isá ye zeñtté yóggwa re hére fori táikke de deikké, aar yóggwa bicí deri lóti hé hálot ot asé de zani faijjé, íba ye yóggwa ttu fusár gorér de, “Tuáñr ttu gom óito monehoór ne?” **7** Biyaraimma wa ye íba re zuwab der de, “Ustat, faní lare de októť añré dóri foóir ot lamaidi bolla añr ttu honókiye náí. Hétolla añí foóñsite-foóñsite añr agor ttu ar ezzon lamizagói.” **8** Isá ye yóggwa re hoór de, “Uró, tuáñr bisána tulí looi añro.” **9** Baade éhon or bútoe manúc cwa gom óigiyoí, aar nizor bisána tulí looi añrat doijje. Hé din accíl Yohúdir ebaadot-or-din. **10** Híyan olla ze manúc cwa re gom gorá gíyeh, yóggwa re Yohúdi ókkole hoór

de, “Aijja toh ebaadot-or-din; aijja bisána tulí loizon Córiyot or maná.” **11** Montor yóggwa ye ítara re hoór de, “Zibá ye añré gom goijjé íba ye añré hoiyé de, “Tuáñr bisána tulí looi añro.”” **12** Ítara yóggwa ttu fusár gorér de, “Zee niki toré tor bisána tulí looi añrito hoiyé Manúc íba hon?” **13** Lekin ze manúc cwa re gom gorá gíyeh, yóggwa ye íba hon hoi no fare, kiyólla-hoilé hé zagat bicí manúc accíl, aar Isá híyan ttu gaif óigilgoí. **14** Yárbaade, Isá ye yóggwa re baitul-mukaddos ot loot fai hoór de, “Soó, tuñí gom óigiyoí. Ar guná no goijjó, zeéne tuáñr hálot agor túaro hóraf no ó.” **15** Baade manúc cwa zai Yohúdi ókkol ore hoiyé de, yóggwa re gom goijjé de íba óilde Isá. **16** Hétolla bóuli Yohúdi ókkole Isá re zalat doijje, kiyólla-hoilé íba ye ebaadot-or-din héndilla ham ókkol goittó. **17** Lekin Isá ye ítara re hoór de, “Añr Baf aijjó foijjonto ham gorát asé, aar Añí Nize yó gorír.” **18** Isár hé hotá lla bóuli Yohúdi ókkole íba re marifélaito aró bicí kucíc gorát accíl, kiyólla-hoilé íba ye siríf ebaadot-or-din or niyom bañgito de no, bólke Alla íbar Baf hoói Nizoré Alla lloi fúainna yó goittó. **19** Tarfore Isá ye ítara re hoór de, “Añí tuáñra re sóiyi-sóiyi hoóir, Fua Nizorgá Nize kessú gorí no fare. íba ye siríf uúin goré zín Bafe goré de deké; kiyólla-hoilé Bafe zín goré, Fua ye yó híin éna goré. **20** Bafe Nizor Fua re muhábbot goré, aar Nize zín goré híin beggún Fua re dahá. íba ye híin or túaro doóñr-doóñr ham ókkol Fua re daháibo, zeéne híin deki tuáñra taajup ó. **21** Bafe zendilla mora ókkol ore zinda goré, héndilla Fua ye yó zaré monehoó taré zinda goré. **22** Aró hoitó sailé, Bafe honókiyor bisar no goré, bólke bisar or hárr zimma Fuar át ot gosáidiye, **23** zeéne zendilla Baf ore beggúne izzot goré, héndilla Fua re yó izzot goré. Zee niki Fua re izzot no goré, íte Fua re diferáíye de hé Baf ore yó izzot no goré. **24** “Añí tuáñra re sóiyi-sóiyi hoóir, zee niki Añr hotá fúne aar Añré diferáíye de íbar uore iman ané, ítar ttu ofúrani zindigi asé. Ítar uore honó sáñzar hókum no óibo, bólke íte mora ttu zindigit faráigiyoí. (aiōnios g166) **25** Añí tuáñra re sóiyi-sóiyi hoóir, eén októ aiyér, bólke ehón aáigiyoí, zeñtté mora ókkole Allar Fuar abas fúnibo; aar zetará fúnibo ítara zinda óibo. **26** Kiyólla-hoilé zendilla Baf Nize zindigir Malik, héndilla íba ye Fua re yó zindigir Malik banaiyé. **27** íba ye Fua re bisar or adíkar diiyé, kiyólla-hoilé íba óilde Manúc or Fua. **28**

“Híin fúni taajup no óiyo, kiyólla-hoilé eén októ aiyér, zetará hobor or bútores asé, ítara beggúne zeñtté íbar abas fúinbo, 29 héñtte neeliaibó; zetará gom ham goijjé, ítara zindigi fai bolla uríbo; aar zetará hóraf ham goijjé, ítara sáñza fai bolla uríbo. 30 “Añí Nizorgá Nize kessú gorí no fari. Añí zendilla fúni héndilla beh bisar gorí; aar Añr bisar sóiyi, kiyólla-hoilé Añí Nizor moncá mozin goittó no saái, bókke Ubár moncá mozin goittó saái zibá ye Añré diferáiyé. 31 “Añí zodi Nizor baabute Nize gobá díh, tóoile Añr gobá sóiyi no. 32 Montor ar ezzon asé, zibá ye Añr baabute gobá déh, aar Añí zani, íba ye Añr baabute dede gobá sóiyi. 33 “Tuáñra toh Yaháya ttu fusár goittó diferáila, aar yóggwa ye sóiyi gán gobá díye. 34 Becók, Añí honó manúc or gobár uore bóraca no gorí, lekin Añí iín etollá hoóir, zeéne tuáñra nejat fo. 35 Yaháya accíl serak waán, ziyáne zoli foór deh; aar tuáñra hooddin olla yóggwar foór ot kúci goittó razi óila. 36 “Lekin Yaháyar gobár túaro ðoóñr gobá Añr ttu asé; kiyólla-hoilé Añí toh ham uúin gorír zíin fura gorí bolla Bafe Añré diiyé, aar Añí gorí de ham híine Añr baabute gobá dé de ki, Añré Bafe diferáiyé. 37 Hé Baf zibá ye Añré diferáiyé, íba Nize Añr baabute gobá díye. Tuáñra honódin no íbar abas fúinno, aar no íbar siyára-súrot deikkó. 38 Tuáñrar dil ot íbar kalam no táke, kiyólla-hoilé tuáñra de íba ye zibá re diferáiyé íbar uore iman nu anó. 39 Tuáñra toh pak-kalam or duara ofúrani zindigi faiba bouli táari dílmon dí pak-kalam tahákit goró, montor hé pak-kalame Añr baabute éna gobá déh. (aiónios g166) 40 Toóu tuáñra zindigi fai bolla Añr hañse aitó no soó. 41 “Añí insán ottu izzot faito no saái. 42 Lekin Añí tuáñra re siní, ki hoilé, tuáñrar dil ot Alla lla muhábbot náí. 43 Añí Añr Baf or name aiccí, toóu tuáñra Añré kobul no goró; montor oinno kiyé zodi nizor name ailé, tuáñra ítare kobul goríba. 44 Tuáñra zetará ezzone ar ezzon or hañsóttu izzot faito soó, montor ze izzot Allar hañsóttu faa zah híyan faito kucic no goró, tuáñra keéngori iman aníba? 45 “Tuáñra no táaijjo de ki, Añí Baf or muuntu tuáñra re hosúr díyum. Tuáñra re zibá ye hosúr díbo íba óilde Muúsa, zibár uore tuáñrar bóraca raikkó. 46 Tuáñra zodi Muúsa re biccác goittá, tuáñra Añré yó biccác goittá, kiyólla-hoilé íba ye Añr baabute éna leikké. 47 Lekin tuáñra zettót íbar leká re biccác no goró, tói tuáñra Añr hotá keéngori biccác goríba?”

6 Yárbaade, Isá Galil Díir okule giiyégoi, ze díí re Tibiriyas Díí yó hoó. 2 Doóñr ek dol manúc íbar fisá doijjil, kiyólla-hoilé íba ye biyaraimma ókkol or uore goittó de keramot ókkol ítara deikkíl. 3 Baade Isá eggwá faár or uore urí, hére Nizor cárit tun or fúañti boiccé. 4 Héñtte Yohúdi ókkol or Azadir-id dáke aiccé. 5 Isá ye suk tulí saiyé rár dekér de, ðoóñr ek dol manúc íbar hére aiyér, hétunot íba ye Filíp ore hoór de “E manúc ítará hái bolla añára ruṭi hontú kiniyúm?” 6 Filíp ore entán gorí bolla íba ye híyan hoiyé deh, lekin Nize kii goríbo de híyan íba ye age lóti zane. 7 Filípe íba re zuwab diyé de, “Ítará beggún ore hom-hom gorí diilé yo, toóu dui cót dinár or ruṭi loi no kulaibó.” 8 Íbar cárit tun ottu ezzone, yáni Sáimon Fitor or báí Enderiyase íba re hoór de, 9 “Eṛé eggwá fua ttu fañs swá barlír ruṭi edde duwá mas asé, montor edún maincóre iíne kii óibo?” 10 Isá ye hoór de, “Manúc cún ore buágaro.” Hé zagat bicí kér accíl. Tói beṛaáin ítara boiccé, ítara tokoriban fañs ázar. 11 Tarfore Isá ye ruṭi gún looi Alla re cúkuriya goijjé, aar zetará boói accíl ítara re baṛidiyé; héndilla góri íba ye mas óu diiyé. Ítara ttu zedún monehoiyé hédun hái faijje. 12 Ítara beggúne feṭ bóri hái baade, íba ye Nizor cárit tun ore hoór de, “Ze tukura ókkol basigiyói híin dola gorífelo, zeéne kessú borbad no zah.” 13 Tói maincé hái baade, barlír ruṭi fañsó wa ttu zedún basigiyói, híin dola gorí baró bañir bóijje. 14 Manúc cúne Isá ye goijjé de keramot tán deki hoór de, “Sóiyi íba óilde Nobí Ubá zibá duniyait aibár hotá asé.” 15 Tói Isá ye zani faijje de, manúc cúne íba re bolazuri baáñcca banai bolla dóitto aitó sár, hétolla íba ítara ttu alok ói gaaga abar faár or uore uiṭṭégoi. 16 Baade zeñtté háñz óiye, íbar cárit tun díit giiyé, 17 aar noow ot urí, Kaparnahúm ot zai bolla díí farát doijje. Héñtte andár óigiyoi, aar híyala úddwa Isá ítarar hére nú aiyé. 18 Ekgwá tez boiyar or zoriya, díit goir ókkol cúru óiye. 19 Ítara noow baái-baái tin sair mail ánik zai baade dekér de, Isá fanír uottú áñri-áñri noowr uzu aiyér; híyan deki ítara ttu ðoor laiggé. 20 Montor íba ye ítara re hoór de, “Íbá Añí; no ðooraiyó.” 21 Tói ítara íba re noow ot tulító razi óiye, aar ítara zeṛé zaar noow gán éhon hé zagat foóñiccegoi. 22 Díir okule ze manúc ókkol táikkil, ítara tarfor din ót faiyé de, hére ekkán noow bade ar honó noow náí, aar Isá Nizor cárit tun or fúañti hé noow ot nó uré, bókke siríf íbar cárit tun giiyé

deh. **23** Montor kessú noow ókkol Tibiriyas cóor ottu zaga waán or dáké aiccé, ziyán ot Malik Isá ye cúkuriya gorí manúc ókkole ruṭi háail. **24** Zeñtté manúc ókkole Isá edde íbar cárit tun hé zagat náí de deikké, ítara noow ókkol lói Isá re tuwai-tuwai Kaparnahúm ot foónicce. **25** Aar zeñtté ítara íba re ḡír okule loot faiyé, ítara íba ttu fusár gorér de, “Rabbí, Tuńi eṛe hoñtté aiccó?” **26** Isá ye ítara re zuwab der de, “Ańi tuáńra re sóiyi-sóiyi hoóir, tuáńra Ańr keramot ókkol dekı Ańré tuwoór de no, bólke feṭ bóri ruṭi hái faijó de hétolla tuwoór deh. **27** Borbad zagói de hána lla meénnot no goijjó, bólke ze hána ofúrani zindigi foijjonto ṭiki táke híin olla meénnot goró, zín tuáńra re Manúc or Fua ye diibo; kiyólla-hoilé íbar uore toh Alla Bafe Nizor moór lagaidiye.” (aiōnios g166) **28** Tói ítara íba ttu fusár gorér de, “Allar ham gorí bolla añára ttu kii gorá foribó?” **29** Isá ye ítara re zuwabe hoór de, “Alla ye Zibá re diferáiyé, íbar uore iman aná óilde Allar ham.” **30** Baade ítara íba ttu fusár gorér de, “Tóoile Tuńi kii illayinacán daháiba, zeéne añára dekı yore Tuáńr uore iman aní fari? Tuńi kii ham goríba? **31** Ańárar bafdada ókkole de moidan zagat manná háiyé. Pak-kalam ot endilla asé, ‘ítara hái bolla Alla ye asman ottu ruṭi diiyé.’” **32** Isá ye ítara re hoór de, “Ańi tuáńra re sóiyi-sóiyi hoóir, tuáńra re asman ottu ruṭi Muśa ye diiyé de no, bólke Ańr Bafe diiyé deh. íba ye tuáńra re asman ottu sóiyi ruṭi dee. **33** Kiyólla-hoilé Allar ruṭi óilde toh Ubá zibá ye asman ottu nise aái duniyair maincóre zindigi dee.” **34** Tói ítara íba re hoór de, “Malik, hé ruṭi añára re hámica doo.” **35** Isá ye ítara re hoór de, “Hé zindigir ruṭi óilam de Ańi. Zee niki Ańr hańse aiyé, ítar ttu honódin búk no lagibó, aar zee niki Ańr uore iman ané, ítar ttu honódin tirác no lagibó. **36** Lekin Ańi toh tuáńra re hoóifelaiyi, ki hoilé, tuáńra Ańré deikkó, montor toóu iman nu anó. **37** Zedún ore Bafe Ańr át ot dee, híin beggún Ańr hańse aibó, aar zee niki Ańr hańse aibó, Ańi ítare honódin duńrai no diyum. **38** Kiyólla-hoilé Ańi toh asman ottu nise aiccé de Nizor moncá mozin gorí bolla no, bólke Ubár moncá mozin gorí bolla, zibá ye Ańré diferáiyé. **39** Ańré diferáiyé de íbar moncá óilde, zedún ore íba ye Ańr át ot diiyé, Ańi zen héntu honókiyo re na hárai, bólke háńcor or din ítara re zinda gorí. **40** Kiyólla-hoilé Ańr Baf or moncá óilde, zee niki Fua re dekı íbar uore iman ané, íte

zen ofúrani zindigi faa. Aar Ańi ítare háńcor or din zinda goríyum.” (aiōnios g166) **41** Híyan fúni Yohúdi ókkole íbar baabute furafuri gorát doijje, kiyólla-hoilé íba ye hoiyé de, “Ze ruṭi asman ottu nise aiccé, yíba óilam de Ańi.” **42** Ítara hoór de, “Íbá Yusúf or fua Isá no níki, zibár bafmaa re añára siní? Íbá ye keéngori hoór de, Ańi asman ottu nise aiccé?” **43** Isá ye ítara re zuwabe hoór de, “Afós ot furafuri no goijjó. **44** Ańr Baf zibá ye Ańré diferáiyé, íba ye ṭani nu aníle honókiye Ańr hańse aái no fare. Aar Ańi ítare háńcor or din zinda goríyum. **45** Nobi ókkol or kitab ot endilla leikká asé, ‘ítara beggúne Alla ttu taalim faibo.’Hétolla zee niki Baf ottu fúni taalim faiyé, íte Ańr hańse aiyé. **46** Hé Baf ore toh Allar hańsóttu aiccé de íba ye bade ar honókiye nó deké. Siríf íba ye deikké deh. **47** Ańi tuáńra re sóiyi-sóiyi hoóir, zee niki Ańr uore iman ané, yóggwa ttu ofúrani zindigi asé. (aiōnios g166) **48** “Zindigir ruṭi óilam de Ańi. **49** Tuáńrar bafdada ókkole de moidan elakat manná háiyé, toóu ítara morigiyói. **50** Montor yibá óilde asman ottu nise aiccé de hé ruṭi, zeéne honókiye hái no more. **51** Ańi óilam de asman ottu nise aiccé de zindigir ruṭi yíba. Zodi honókiye e ruṭi háa, íte hámica lla basi tákibo. Duniyair manúce zindigi fai bolla Ańi diyum de hé ruṭi óilde Ańr gusso.” (aiōn g165) **52** Híin fúni Yohúdi ókkole afós ot matamati di hoór de, “E Manúc cwa ye añára re keéngori Nizor gusso hái bolla diibo?” **53** Isá ye ítara re hoór de, “Ańi tuáńra re sóiyi-sóiyi hoóir, zetún foijjonto tuáńra Manúc or Fuar gusso edde lou nó hóo, hétun foijjonto tuáńra ttu zindigi náí. **54** Zee niki Ańr gusso edde lou háa, ítar ttu ofúrani zindigi asé, aar Ańi ítare háńcor or din zinda goríyum. (aiōnios g166) **55** Kiyólla-hoilé Ańr gusso óilde sóiyi hána, aar Ańr lou óilde sóiyi fiṭbar jiníc. **56** Zee niki Ańr gusso edde lou háa, íte Ańr bútoze zari táke, aar Ańi ítar bútoze zari táki. **57** Zinda Bafe zendilla Ańré diferáiyé aar Ańi íbar zoriya zinda así, héndilla zee niki Ańré háibo íte yó Ańr zoriya zinda tákibo. **58** Yíba óilde asman ottu nise aiccé de hé ruṭi. Tuáńrar bafdada ókkole hái morigiyói de héndilla ruṭi no. Zee niki e ruṭi háibo, íte hámica lla basi tákibo.” (aiōn g165) **59** Isá ye hotá híin Kaparnahúm or mujilíc-hánat taalim dibarcót hoiyé. **60** Hé taalim fúni Isár ummot ókkol ottu boóut zone íba re hoór de, “Yián toh ekkán bicí hora taalim, hone gosí faribó?” **61** Nizor ummot ókkole furafuri gorér

de híyan zani fari Isá ye ítara re hoór de, “E taalime ki tuáñra re bezar goijjé? 62 Manúc or Fua foóila zeré accíl, íba zodi hére urérgoi de dekó, tooile tuáñra kii báfiba? 63 Ruh ye éna zindigi dee; jisíme toh honó fáida no dee. Añi tuáñra re ze hotá gún hoiyi, híin óilde ruh edde zindigi. 64 Montor aijjó foijjonto tuáñra hodúne iman nú anó.” Isá ye foóila cúru ttu lóti zane, hontará iman nú ané aar hone íba re dóridibo. 65 Isá ye aró hoór de, “Hétolla toh Añi tuáñra re endilla hoóilam, honókiye Añr hañse aái no faribó, zetún foijjonto Añr Bafe ítare tooúfik no dee.” 66 Hé októti lóti íbar boóut ummot ókkol fírigiyoi, aar íbar fúañti solafíra gorá bon gorífelaiye. 67 Hétolla Isá ye baró zon cárit tun ottu fusár gorér de, “Tuáñra ttu yó kí zaitogói monehoór né?” 68 Sáimon Fitore íba re zuwab der de, “Ó Malik, añára har hañse zaitam? Ofúrani zindigir hotá Tuáñr ttu éna asé. (aiónios g166) 69 Añára iman ainní aar sóiyigori zani faijji de, Tuñi óilade Allar Pakzon.” 70 Isá ye ítara re hoór de, “Añi kí tuáñra baró zon ore basí nó looi né? Tooú tuáñrar bútoore ezzon íbilic asé.” 71 Híyan Isá ye Sáimon or fua Yohúdah Iskáriyet or baabute hoiyé deh. Kiyólla-hoilé íte baró zon cárit tun ottu óile yo, íte Isá re dóridibo.

7 Yárbaade, Isá Galil ot solafíra gorér; kiyólla-hoilé Yohúdi ókkole íba re marifélaibar kucíc ot accíl de hétolla íba ttu Yohúdiyat solafíra goittó mone no hoór. 2 Héñtte Yohúdi ókkol or Bañcár-id or októ dake aiccé. 3 Hétolla Isár báiyain de íba re hoór de, “Tuñi entú Yohúdiyat zoogói, zeéne Tuñi goró de ham ókkol Tuáñr ummot ókkole yó deké. 4 Kiyólla-hoilé zee niki mocúr óito saá, íte toh lukai honó kessú no goré. Tuñi zettót e ham iín gorór, tói Nizoré duniyair hañse zahér goró.” 5 Asóle íbar báiyain de úddwa íbar uore iman nú ané. 6 Tói Isá ye ítara re hoór de, “Añi zaibar októ aijjó nú aiyé, montor tuáñra ze honó októti zai faribá. 7 Duniyair maincé tuáñra re nafórot gorí no fare, lekin Añré nafórot goré, kiyólla-hoilé Añi toh ítara ham ókkol hóraf bóuli gobá díh. 8 Tuáñra hé id ot zoo. Añi id híyan ot ehón no zaiyum, kiyólla-hoilé Añr októ aijjó furafuri nú aiyé.” 9 Ítara re híin hoói baade, íba Galil ot táigiyoi. 10 Lekin íbar báiyain ókkol id ot zaigói baade, íba Nize yó giyyé; kúlamela góri nó, bóлке lukai ore giyyé. 11 Id ot Yohúdi ókkole íbar talac gorí-gorí fusár gorér de, “Íba hoře?” 12 Manúc or dái or

bútore íbar baabute suppe-suppe bici furafuri óiye. Hodúne hoór de, “Íba gom manúc.” Ar hodúne hoór de, “No, no, íba ye maincóre gollot ot loizargói.” 13 Montor tooú Yohúdi ókkol or doore honókiye íbar baabute kúlamela góri nó hoó. 14 Id ekdók ánik óiye rár, Isá uore baitul-mukaddos or urán ot zai taalim diyat doijje. 15 Aar Yohúdi ókkole taajup ói hoór de, “E Manúc cwa ye honó mikká ttu taalim hásil no gorí iín keéngori zane?” 16 Isá ye ítara re zuwab der de, “Añi zíin taalim di híin Añr Nizor no, bóлке Zibá ye Añré diferáiyé íbar. 17 Zar ttu Allar moncá mozin goittó monehoó, íte zanibó, e taalim iín kí Allar aar náki Añrgá Añi hoóir deh. 18 Zee niki nizor torfóttu hoó, íte nizor izzot tuwa. Lekin Zibá ye Diferóiyar izzot tuwa, íba óilde sóiyi, aar íbar bútoore honó dúkabazi náí. 19 Muúsa ye tuáñra re Córiyot diiyé de no né? Montor tooú de tuáñra honókiye hé Córiyot amól no goró. Tuáñra Añré kiyólla marifélaí bolla soór?” 20 Manúc ókkole zuwab der de, “Tuáñre búte faiyé. Tuáñre hone marifélaíto sár dé?” 21 Isá ye ítara re zuwab der de, “Añi ekkán ham goijji, aar tuáñra beggún taajup óigiyogoi. 22 Muúsa ye tuáñra re ázomi gorí bolla hókum díye de hétolla, tuáñra toh ebaadot-or-din úddwa manúc ore ázomi goró. Háleke héndilla gorá Muúsa lóti cúru óiye de no, bóлке bafadada gún ottu lóti. 23 Muúsar Córiyot no báñgi bolla zodi ebaadot-or-din manúc eggwá re ázomi gorá zah, tooile ebaadot-or-din Añi eggwá manúc ore furafuri gom goijji de hétolla kiyá tuáñra Añr lói guccá óiyo? 24 Uortú saái bisar no goijjó, insáf bisar goijjó.” 25 Hétunot Jerúsalem or kessú maincé hoór de, “Íbá kí Ubá no zibá re Yohúdi ókkole marifélaíto sár? 26 Lekin soó, Íbá ye toh kúlamela góri hotá hoór, tooú úddwa ítara Íbá re kessú no hoór. Hókumot-goróya ókkole hóno Íbá Mosih de híyan sóiyigori zani faijje né? 27 Zeén óibo óuk, añára toh zani, Íbá hontú aiccé, montor zeñtté Mosih aibó, íba hontú aiccé honókiye no zanibó.” 28 Isá baitul-mukaddos ot taalim dibarcót guzori hoór de, “Ói, tuáñra Añré sinó, aar Añi hontú aiccí yó zano. Montor Añi Nizorgá Nize aiccí de no, Zibá ye Añré diferáiyé íba sóiyi. Tuáñra toh íba re no sinó. 29 Lekin Añi íba re siní, kiyólla-hoilé Añi íbar torfóttu aiccí, Añré íba ye diferáiyé deh.” 30 Híin fúni ítara íba re gereftar gorí bolla saiyé, montor íbar októ nú aiyé de hétolla honókiye íbar uore át nó laga. 31 Tooú manúc or dol ottu

boóut zone Íbar uore iman ainné. Ítara hoór de, “Mosih zeñtté aibó, Íba ye kí e manúc cwa ye goijjé de yár túaro bicí keramat ókkol daháibo?” 32 Manúc or ðaái ye Isár baabute fúcfucar de híyan Férocí ókkole fúinne. Hétolla ðoóñr imam ókkole edde Férocí ókkole Íba re dóri aintó hodún faáradar diferaíye. 33 Isá ye hoór de, “Añí tuáñrar fúañti ar bicí din náí, baade Añré diferaíye de Íbar hañse zaiyumbói. 34 Tuáñra Añr talac goríba, montor Añré loot no faiba, aar zere Añí tákiyum, hére tuáñra aái no faribá.” 35 Tói Yohúdi ókkole afós ot hoór de, “Íbá re añara tuwai no fai fán Íbá horé zaito niyot gorér dé? Ze Beyohúdi ókkol or bútoze añárar Yohúdi ókkol cínřaciñttá óigiyoi, Íbá ye hóno hére zai hé Beyohúdi ókkol ore taalim dibo de né? 36 Íbá ye e hotá lói kii hoitó sár deh, ‘Tuáñra Añr talac goríba, montor Añré loot no faiba,’ aar ‘Zere Añí tákiyum, hére tuáñra aái no faribá?’” 37 Baade id or ahéri din or din, yáni id or ebbe ðoóñr din ot, Isá tíyai yore guzori hoór de, “Zee niki tiráci asó, íte Añr hañse aái faní hógai. 38 Zee niki Añr uore iman ané, pak-kalam mozin, ‘Ítar bútotu zindigi dee de faní urát tákibo.’” 39 Isá ye híyan Pak-Ruhr baabute hoiyé de, zibá re zetará Isár uore iman ainné Ítara fai zaybo. Pak-Ruh hétun foijjonto diiya nó zah, kiyólla-hoilé Isár mohíma hétun foijjonto zahér gorá nó zah. 40 Híin fúni baade kessú maincé hoór de, “Becók, Íbá óilde hé Nobí.” 41 Ar hodúne hoór de, “Íbá óilde Mosih.” Aró hodúne hoór de, “Mosih kí Galil ottu aibó né? 42 Pak-kalam ot ki endilla náí, Mosih Dawud or nosól ottu edde Dawud táke de Betélhem fara ttu aibó bóuli?” 43 Héndilla, Isár zoriya manúc ókkol or bútoze faáta-faáti foida óigiyoi. 44 Ítarar bútotu hodúne Íba re dóri bolla saiyé, montor honókiye Íbar uore át nó laga. 45 Tarfore faáradar gún ðoóñr imam edde Férocí ókkol or hañse waafes aiccé. Tará Ítara ttu fusár gorér de, “Tuáñra Íba re nó kiyá anó?” 46 Faáradar gúne zuwab der de, “Hé Manúc cwar ðóilla góri honókiye honó októót hotá hoiyé de náí.” 47 Férocí gúne hoór de, “Tuáñra re yó hóno gollot ot loigiyói né? 48 Honó sóddare yáh Férocí ye Íbar uore iman ainné de asé né? 49 Montor hé awam ókkole toh Córíyot no zane. Ítarar uore laánot asé.” 50 Hé Férocí gún or bútoze Nikódemas óu asé, zibá yár age Isár hañse gífl. Yóggwa ye Ítara ttu fusár gorér de, 51 “Honó manúc or muk ottu nó fúinte aar íte kii goijjé de híyan nó zainte,

Ítar hosúr dóri bolla kí añárar Córíyot ot asé?” 52 Ítara yóggwa re zuwabe hoór de, “Tuñí yó kí Galil or manúc? Pak-kalam tahákít gorí soó, Galil ottu honó nobi nú aiyé.” 53 Baade fottí zon zar-zar gór ot tee-tee giyiói.

8 Montor Isá Zaitun Faár ot giyyé. 2 Tarfor din biñna sóore Isá baitul-mukaddos ot abar aiccé, aar manúc beggún Íbar hañse zoma óiye. Baade Íba boói Ítara re taalim diyat doijje. 3 Héñtte alem ókkole edde Férocí ókkole ek mayafua re Isár hañse ainné, zibá zená gorát dóra háíye. Baade híba re manúc ókkol or mazé tíyagaraiye. 4 Tói Ítara Isá re hoór de, “Úzur, e mayafua wa zená gorát dóra háíye. 5 Córíyot ot Muísa ye añara re hókum díye de, endilla mayafuain dore cíl or dola mari marifélaito, montor Tuñí kii hoó?” 6 Ítara Íba re hé súwal lan entán gorí bolla goijjé deh, zeéne Ítara Íba re elzam dibar mouka faa. Montor Isá uñri boói ooñle merít lekát accíl. 7 Ítara zettót Íba ttu warawori fusár gorát asé, Íba urí Ítara re hoór de, “Tuáñrar bútoze zee niki guná sára asó, mayafua wa re cíl or dola íte age maro.” 8 Baade Isá abar uñri boói merít lekát accíl. 9 Hé hotá fúni, Ítara burá ttu lóti cúru gorí zon-zon neeligiyói, montor Isá ezzon táigiyoi, mayafua wa yó mazé tíyai accíl. 10 Isá urí zeñtté mayafua wa bade ar honókiyo re nó deké, Isá ye híba re hoór de, “Mayafua, uitará horé? Honókiye tor hosúri nó dóre níki?” 11 Híba ye hoór de, “Malik, honókiye nó dóre.” Isá ye hoór de, “Añí yó tor hosúri no dóri. Zaa, guná no goríc.” 12 Isá ye Ítara re abar hoór de, “Añí óilam de duniyair Nur, zee niki Añr fisá dore, íte andár ot nu añříbo, bólke zindigir Nur faibo.” 13 Hétolla Férocí ókkole Íba re hoór de, “Tuñí toh Nizor gobá Nize éna dor; Tuáñr gobá sóiyi no.” 14 Isá ye Ítara re zuwabe hoór de, “Añí Nizor gobá Nize dilé yo, Añr gobá sóiyi, kiyólla-hoilé Añí hontú aiccé edde horé zairgói Añí zani. Montor Añí hontú aiccé aar horé zairgói híyan tuáñra no zano. 15 Tuáñra toh insán or niyom mozin bisar goró, montor Añí honókiyor bisar no gorí. 16 Añí zodi bisar gorí yo, Añr bisar hók, kiyólla-hoilé Añí ekéla no, Añré diferaíye de hé Baf Añr fúañti asé. 17 Tuáñrar Córíyot ot óu leikká asé de ki, dui zone ek ðoilla gobá dé de óile hé gobá sóiyi. 18 Añr baabute Añí Nize yó gobá díh, aar Añr baabute Añré diferaíye de hé Bafe yó gobá déh.” 19 Hétunot Ítara Íba ttu fusár gorér de,

“Tuáñr Baf hoaré?” Isá ye ítara re zuwab der de, “Tuáñra no Añré sinó, aar no Añr Baf ore sinó. Tuáñra zodi Añré siníta, tooile Añr Baf ore yó siníta.” 20 Isá ye hotá híin baitul-mukaddos or urán ot dan-baccúr dake taalim dibarcót beh hoiyé. Toóu honókiye íba re gereftar nó goré, kiyólla-hoilé íbar októ aijjó nú aiyé. 21 Isá ye ítara re abar hoór de, “Añí toh zairgói; tuáñra Añr talac goríba, aar nizor gunát nize moribá. Añí zeré zairgói hére tuáñra aái no faribá.” 22 Hétolla Yohúdi ókkole hoór de, “Íba ye hóno nizoré marifélaibo né? Kiyólla-hoilé íba ye hoiyé de, ‘Añí zeré zairgói hére tuáñra aái no faribá.’” 23 Isá ye aro hoór de, “Tuáñra nisor ttu, aar Añí uottú. Tuáñra e duniyair; Añí toh e duniyair no. 24 Hétolla Añí tuáñra re hoiyé de, tuáñra nizor gunát nize moribá. Tuáñra zodi Añí íba de biccác no goró, tooile nizor gunát nize moribá.” 25 Tói ítara íba ttu fusár gorér de, “Tuñí hon?” Isá ye ítara re zuwab der de, “Añí óilam de Ubá zibár baabute Añí foóila cúrut lóti tuáñra re hoóí-hoóí aiyír. 26 Tuáñrar baabute hoibár edde bisar goríbar Añr ttu boóut kessú asé, lekin Zibá ye Añré diferáiyé íba sóiyi. Añí duniyai re siríf uúin hoóí zín íbar torfóttu fúinni.” 27 Isá ye ítara re Baf or baabute hoór de híyan ítara nó buzé. 28 Hétolla Isá ye ítara re hoór de, “Tuáñra Manúc or Fua re zeñtté uore tulíba, héñtte zanibá de, Añí óilam de íba, aar Añí Nizorgá Nize kessú no gorí, bólke Añí uúin beh hoóí zín Bafe Añré cikaiye. 29 Zibá ye Añré diferáiyé íba Añr fúañti asé. Íba ye Añré ekéla nó ere, kiyólla-hoilé Añí toh hámica ham uúin gorí zín lói íba kúci ó.” 30 Isár hotá híin fúni boóut zone íbar uore iman ainné. 31 Ze Yohúdi ókkole Isár uore iman ainné, ítara re íba ye hoór de, “Zodi tuáñra Añr hotát lagi táko, tooile sóiyi tuáñra Añr ummot, 32 baade tuáñra sóiyi re zanibá, aar hé sóiyi ye tuáñra re azad goríbo.” 33 Ítara íba re hoór de, “Añára óilam de Ibrahím or nosól, añára honódin honókiyor gulam óiyi de náí. Tói Tuñí kéngori hoór de, ‘Tuáñra azad faiba?’” 34 Isá ye ítara re zuwab der de, “Añí tuáñra re sóiyi-sóiyi hoóir, zetará guná gorát táke ítara gunár gulam. 35 Gulam toh gór ot abadulabad nó táke, bólke fua beh abadulabad táke. (aiñ g165) 36 Hétolla Fua ye zodi tuáñra re azad goré, tuáñra hámaha azad óiba. 37 Añí zani, tuáñra Ibrahím or nosól, toóu tuáñra Añré marifélaito soór, kiyólla-hoilé tuáñrar dil ot toh Añr hotá lla honó zaga náí. 38

Añí uúin hoóí zín Añí Añr Baf or hañse deikkí, aar tuáñra uúin goró zín tuáñra tuáñrar baf ottu fúinno.” 39 Ítara íba re zuwabe hoór de, “Añárar baf óilde Ibrahím.” Isá ye ítara re hoór de, “Tuáñra Ibrahím or fuain óíta bóuli, tuáñra Ibrahím or dóilla ham goittá. 40 Añí toh Alla ttu ze sóiyi gán fúinni, híyan éna tuáñra re hoiyí, aar toóu tuáñra Añré marifélaito soór. Ibrahíme de héndilla nó goré. 41 Tuáñra tuáñrar baf or gún gorór deh.” Ítara íba re hoór de, “Añára toh zoura fuain no; añára ttu Baf ekgwá asé deh, íba óilde Alla.” 42 Isá ye ítara re hoór de, “Sóiyi zodi Alla tuáñrar Baf óito, tuáñra Añré muhábbot goittá, kiyólla-hoilé Añí toh eré Allar torfóttu éna aiccí. Añí Nizorgá Nize aiccí de no, bólke Añré íba ye beh diferáiyé. 43 Tuáñra Añr hotá kiyá no buzór? Híyan etollá, kiyólla-hoilé tuáñra Añr hotá re bordac gorí no faroór. 44 Tuáñra tuáñrar baf íbilíc or, hétolla tuáñra ítar moncá ókkol fura goittó soó. Íte toh foóila cúru ttu lóti kúni, aar honódin sóiyit nó táke, kiyólla-hoilé ítar bútoore honó sóiyi náí. Íte zeñtté misá hotá hoó, nizor bútotu hoó, kiyólla-hoilé íte óilde misákur aar misár baf. 45 Lekin Añí toh hók hotá hoóí, hétolla tuáñra Añré biccác no goró. 46 Tuáñra ttu hone Añí gunágar bóuli sábut gorí faribá? Zodi Añí sóiyi hotá hoóir de óile, tuáñra Añré biccác kiyá no goró? 47 Ze manúc Allar, íte Allar hotá fúne. Tuáñra híin etollá no fúno, kiyólla-hoilé tuáñra Allar no.” 48 Yohúdi ókkole íba re zuwabe hoór de, “Añára kí sóiyi nó hoóí né, Tuñí ézzon Samári, aar Tuáñre búte faiyé?” 49 Isá ye zuwab der de, “Añré búte nó faa. Añí Añr Baf ore izzot gorí, montor tuáñra Añré beizzotti goró. 50 Añí Añr izzot tuwair de no. Lekin Ekzon asé zibá ye Añr izzot or kíyal raké aar íba óilde bisarhar. 51 Añí tuáñra re sóiyi-sóiyi hoóir, zee niki Añr hotá amól goré, íte honódin no moribó.” (aiñ g165) 52 Yohúdi ókkole íba re hoór de, “Ehón añára fakkagori zani fajjíf, Tuáñre búte faiyé. Ibrahím edde nobi ókkol toh morigiyói, toóu Tuñí hoór de, ‘Zee niki Añr hotá amól goré, íte honódin no moribó.’ (aiñ g165) 53 Tuñí kí añárar baf Ibrahím or túaro dloónr? Íba toh morigiyói, aar nobi ókkol óu morigiyói. Tuñí Nizoré Nize kii bouli táaro?” 54 Isá ye ítara re zuwab der de, “Zodi Añí Nizor taarif Nize gorí, tooile Añr taarif or honó dam náí. Añré izzot Añr Bafe éna goré, Zibá re tuáñra tuáñrar Alla bouli dabi goró. 55 Tuáñra íba re no sinó, lekin Añí íba re

siní. Zodi Añí hoói, 'Añí ðba re no siní,' tóoile Añí yó toh tuáñrar ðóilla misákur tóoriyum, lekin Añí ðba re siní, aar ðbar hotá amól gorí. 56 Tuáñrar baf Ibrahíme Añr din dekiðbar acáye kúci goijjíl. ðba ye deikkíl aar kúci óoil." 57 Tói Yohúdi ókkole ðba re hoór de, "Tuáñr boc toh aijjó fonzaic bosór úddwa nó óiyo, aar Tuñí Ibrahím ore deikkó dé?" 58 Isá ye ítara re hoór de, "Añí tuáñra re sóiyi-sóiyi hoóir, Ibrahím zormo ðbar age lóti Añí así." 59 Hé hotá fúni ítara ðba re mari bolla cíl or dola feñrai loiyé, montor Isá Nizoré argwal gorí baitul-mukaddos ottu neeligiyói.

9 Isá rasta báy zaite-zaite, ðba ye eggwá manúc deikké, zibá zormo ttu lóti ańdá. 2 ðbar cárit tune ðba ttu fusár gorér de, "Rabbí, har gunár zoriya e manúc cwa zormo ttu lóti ańdá óiye dé? Ki nizor aar náki yóggwar bafmaar?" 3 Isá ye zuwab der de, "Héndilla no e manúc cwar gunár zoriya óiye, aar no yoggwár bafmaar gunár zoriya óiye, bólke etollá óiye, zeéne yoggwár zindigít Allar ham zahér ó. 4 Din tákite ańára ttu Ubár ham gorífela foribó zibá ye Ańré diferaíye. Rait aiyér zeńtté honókiye ham gorí no faribó. 5 Zetó din Añí duniyait así, Añí óilam de duniyair Nur." 6 Hfín hoói baade, ðba ye meřit sép félai yore fúńt banaiyé, aar hé fúńt looi ańdá manúc cwar suk ot bóraidíye. 7 Baade yóggwa re hoór de, "Zoo, zai Sílom foóir gwá ttu dúifelogoi" (Sílom or torjuma óilde, "Diferaíye"). Tói yóggwa zai dúifelaiye, baade suké deki waafes firi aiccé. 8 Hétolla yóggwar atehańsór manúc ókkole edde age zetará yóggwa re hórat magitó de deikkíl ítara hoór de, "Manúc ibá ubá no né zibá ye boói-boói hórat magitó?" 9 Hodúne hoór de, "Ói, e manúc cwa yóggwa." Ar hodúne hoór de, "No, montor ite yóggwar ðóilla deh." Lekin yóggwa ye, "Añí ðba," bóuli howát accíl. 10 Ítara yóggwa ttu fusár gorér de, "Tóoile tuáñr suk keéngori kúligiyói?" 11 Yóggwa ye zuwab der de, "Isá hoó de Manúc cwa ye meři re fúńt banai ańr suk ot bóraidíye, aar ańré hoíyé de, 'Zai Sílom foóir gwá ttu dúifelogoi.' Añí zai dúifelaiyi rár suké deki farir." 12 Ítara yóggwa ttu fusár gorér de, "Hé Manúc cwa hoře?" Yóggwa ye zuwab der de, "Añí hoi no fari." 13 Baade ítara ańdá accíl de manúc cwa re Férocí ókkol or hańse loigiyé. 14 Ze din Isá ye meři re fúńt banai yóggwar suk kúillil, hé din accíl ebaadot-or-

din. 15 Hétolla bóuli yóggwar suk keéngori gom óiye de híyan Férocí ókkole yóggwa ttu abar fusár goijjé. Yóggwa ye ítara re hoór de, "ðba ye ańr suk ot fúńt bóraidíye, baade ańí dúiyi rár deki fajjí." 16 Hétolla hodún Férocí ye hoór de, "Hé Manúc cwa Allar torfóttu no, kiyólla-hoilé ðba ye ebaadot-or-din no mane." Montor ar hodúne hoór de, "Ezzon gunágar manúce keéngori endilla keramot gorí fare?" Héndilla ítara búture faáta-faáti foida óigiyói. 17 Hétunot ítara ańdá accíl de manúc cwa re abar hoór de, "ðba ye tor suk kúille de híyan olla tui ðbar baabute kii hoós?" Yóggwa ye zuwab der de, "ðba eggwá nobi." 18 Lekin yóggwa age ańdá accíl aar ehón deki farer de híyan yóggwar bafmaa re matai fusár nó loh foijjonto Yohúdi ítara biccác nó goré. 19 Ítara yóggwar bafmaa ttu fusár gorér de, "Íbá tuáñrar fua ubá né, zibá re tuáñra zormo ttu lóti ańdá hoóila? Héen óile yala ite keéngori deki farer?" 20 Yóggwar bafmaa ye ítara re zuwabe hoór de, "Ańára zani íbá ańárar fua, aar ite ańdá zormo óoil; 21 Montor yala ite keéngori deki farer ańára no zani; itar suk hone kúille yó ańára no zani. Itar ttu boc óiye, tuáñra itar ttu fusár goró. Ite nizor baabute tuáñra re hoibó." 22 Yóggwar bafmaa ye héndilla hoóil de Yohúdi ókkol or ðoore, kiyólla-hoilé Yohúdi ókkole age lóti fáisela goijjíl de, zee niki Isá re Mosih bóuli cíkar goré, ítare ítara mujilíc-hána ttu neelaidiya zaybo. 23 Híyan olla bóuli yóggwar bafmaa ye hoóil de, "Ítar ttu boc óiye; tuáñra itar ttu fusár goró." 24 Hétolla ítara age ańdá accíl de manúc cwa re abar matai hoór de, "Hók hotá hoói Allar taarif gor. Ańára zani hé Manúc cwa ézzon gunágar." 25 Yóggwa ye zuwab der de, "ðba gunágar ói ne no ańí no zani. Lekin ańí yían ekkán zani, ańí age ańdá accíl aar yala suké dekir." 26 Ítara yóggwa ttu fusár gorér de, "ðba ye toré kii goijjé? ðba ye tor suk keéngori kúlidíye?" 27 Yóggwa ye zuwab der de, "Añí tuáñra re hoóifelaiyi, montor tuáñra toh nó fúno. Tuáñra ttu híyan abar kiyá fúinto monehoór? Tuáñra ttu yó hómo ðbar ummot óito monehoór?" 28 Baade ítara gail di yóggwa re hoór de, "Tui Manúc ðbar ummot, lekin ańára de Muúsar ummot. 29 Ańára zani Alla ye Muúsa llói hotá hoíyé, montor hé Manúc cwa hontú aiccé híyan toh ańára no zani." 30 Hétunot manúc cwa ye ítara re zuwabe hoór de, "Ki taajuippa hotá! Tuáñra ðba hontú aiccé

no zano, aar tooú ūba ye añr suk kúliidiye. **31** Añára zani Alla ye gunágar ókkol or hotá no fúne, montor ūba ye ubár hotá fúne zee niki ūbar ebaadotgár edde ūbar moncá mozin goré. **32** Honókiye ezzon zormo ttu lóti ańdá óiye de manúc or suk kúliidiye de toh duniyai cúru óiye lóti honódin fúna nó zah. (aĩon g165) **33** Zodi hé Manúc cwa Allar torfóttu no de óito, ūba ye toh kessú gorí no faitto.” **34** Ítara yóggwa re zuwab der de, “Tui toh furafuri gunát zormo óiyos, aar tui añára re cíkka dor dé?” Héndilla hoói ítara yóggwa re mujilíc-hána ttu neelaidiye. **35** Ítara yóggwa re neelaidiye de híyan Isá ye fúinne. ūba ye yóggwa re loot fai hoór de, “Tuńí Manúc or Fuar uore iman ainnó né?” **36** Yóggwa ye zuwab der de, “Ustat, ūba hon añré hoó, zeéne añí ūbar uore iman aní fari.” **37** Isá ye yóggwa re hoór de, “Tuńí ūba re deikkó; tuáńr llóí hotá hoór de Yóggwa óilde ūba.” **38** Baade yóggwa ye hoór de, “Malik, añí iman ainní.” Héndilla hoói yóggwa ye ūba re sóida goijjé. **39** Isá ye hoór de, “Ańí e duniyait bisar gorí bolla aiccí deh, zeéne zetará no deké ítara dekı fare, aar zetará deké ítara ańdá óizagoi.” **40** Isár fúańti accíl de hodún Férocı ye híin fúni ūba re hoór de, “Tóoile añára yó ańdá niki?” **41** Isá ye ítara re hoór de, “Zodi tuáńra ańdá óita, tuáńra ttu honó guná no tákito; montor tuáńra zettót hoór, ‘Añára dekı,’ hétolla tuáńrar guná táizagoi.”

10 “Ańí tuáńra re sóiyi-sóiyi hoóir, zee niki bérasóol or añrail ot duwar báy no góle, montor oinno boli farái góle, íte sur edde ɗahańit. **2** Lekin zee niki duwar báy góle, yóggwa óilde bérasóol soroya. **3** Yóggwa re duwar soońidare duwar kúlide, aar bérasóol ókkole yóggwar abas fúne. Yóggwa ye nizor bérasóol ókkol ore nam dori-dori matai baáre ané. **4** Zeńtté yóggwa ttu nizor bérasóol beggún ore baáre ainná ó, yóggwa híin or age-age zaa, aar bérasóol híin yóggwar fisé-fisé aiyé, kiyólla-hoilé yóggwar abas híine siné. **5** Montor híin osin manúc or fisé-fisé bilkúl no zaibo, bólke ítar ttu dáizayboi, kiyólla-hoilé híine osin manúc or abas no siné.” **6** Isá ye ítara re e meésal lan hoiyé, montor ūba ye ítara re kii hoitó sár de híyan ítara nó buzé. **7** Hétolla Isá ye ítara re abar hoór de, “Ańí tuáńra re sóiyi-sóiyi hoóir, bérasóol lun or duwar óilam de Ańí. **8** Ańr age zetará aiccíl ítara beggún sur edde ɗahańit, montor bérasóol lune ítarar hotá nó

fúne. **9** Ańí óilam de duwar. Zee niki Ańr dí bútoe góle, íte nejat faibo. Íte bútoe aibó edde baáre zaibo, aar soribár zaga faibo. **10** Sur toh siríf suri, kún edde dóńco gorí bolla éna aiyé. Lekin Ańí aiccí de, zeéne ítara zindigi faa aar hé zindigi zen ítara ttu furafuri gori táke.” **11** Gom bérasóol soroya óilam de Ańí. Gom soroya ye toh bérasóol ókkol olla Nizor zan deh. **12** Montor zee niki muzur, íte asól soroya no, íte bérasóol or girós óu no. Íte rangkuńir aiyér de dekıle bérasóol félai dáizagoi, tói rangkuńir aái bérasóol lun ore dóri cńracińńtá gorifele. **13** Íte etollá dáizagoi, kiyólla-hoilé íte óilde muzur, aar ítar ttu bérasóol or baabute honó sintabáfana náı. **14** Gom bérasóol soroya óilam de Ańí. Ańí Ańr bérasóol ókkol ore siní, aar híine yó Ańré siné, **15** zendilla Bafe Ańré siné aar Ańí Baf ore siní. Ańí Ańr bérasóol ókkol olla Nizor zan dih. **16** Ańr ttu aró hodún bérasóol asé, zıin e zák ot náı. Ańr ttu híin ore yó loianá foribó, aar híine yó Ańr abas fúnıbo. Tói eggwá zák óıbo edde eggwá soroya óıbo. **17** “Bafe Ańré etollá muhábbot goré, kiyólla-hoilé Ańí Ańr zan dih, zeéne híyan abar loifélaı fari. **18** Honókiye híyan Ańr ttu loiféla de no, bólke Ańí Nize híyan di deh. Ańr ttu híyan dibar óu kémota asé, aar Ańr ttu híyan abar waafes loıbar óu kémota asé. Héndilla gorıbar hókum híyan Ańí faiyí de óilde Ańr Baf or torfóttu.” **19** Hotá híin or zoriya Yohúdi ókkol or bútoe abar faáta-faáti foida óigiyoi. **20** Ítara boóut zone hoór de, “Íbá re búte faiyé, Íbá fool. Tuáńra Íbár hotá kiyá fúnor?” **21** Ar hodúne hoór de, “Montor e hotá gún toh eggwá búte-faiya manúc or hotár ɗóılla no. Búte ańdár suk kúliidi fare niki?” **22** Yárbaade Jerúsalem ot Hanúka-id óiye. Héńtte cítkhal accíl, **23** aar Isá baitul-mukaddos or bútoe Sóloman or baandat ɗoólat accíl. **24** Yohúdi ókkole ūba re sairó ɗák ottu gıridori hoór de, “Tuńí añára re ar hotódin andacát rakıba? Tuńí zodi Mosih de óile, añára re sáf-sáf góri hoó.” **25** Isá ye ítara re zuwab der de, “Ańí tuáńra re hoıyí, montor tuáńra toh biccác no goró. Ze ham ókkol Ańí Ańr Baf or name gorí, híine Ańr gobá déh. **26** Lekin tuáńra etollá biccác no goró, kiyólla-hoilé tuáńra Ańr bérasóol lun ottu no. **27** Ańr bérasóol ókkole Ańr abas fúne, Ańí híin ore siní, aar híin Ańr fisé-fisé aiyé. **28** Ańí híin ore ofúrani zindigi dii; híin honódin dóńco no óıbo; aró Ańr át ottu híin ore honókiye harıloifelaı no faribó. (aĩon g165, aĩonios g166) **29** Kiyólla-hoilé

Añr Baf, zibá ye híin ore Añré diiyé, ĩba beggún or túaro ðoóñr. Honókiye Añr Baf or át ottu híin ore harġloifelai no fare. **30** Añí edde Baf ek.” **31** Híyan fúni Yohúdi ókkole ĩba re maitto abar cġl or dola feñrai loiyé. **32** Montor Isá ye ĩtara re hoór de, “Añí de Baf or torfóttu tuáñra re boóut gom-gom ham ókkol daháiyi. Híin ottu hon nán olla bóuli tuáñra Añré cġl or dola maitto soór dé?” **33** Yohúdi ókkole zuwab der de, “Gom ham olla bóuli añára Tuáñre cġl or dola marir de no, bóľke kuféri goijjó de hétolla. Tuñí manúc ói Nizoré Nize Alla dabi gorór.” **34** Isá ye ĩtara re hoór de, “Tuáñrar Córivot ot leikká asé de no né, Alla ye endilla hoiyé de, ‘Tuáñra óilade kúda?’ **35** Zetarár hañse Allar torfóttu kalam aiccé, ĩtara re toh kúda bóuli howá gýyeh. Pak-kalam or hotá toh bad di no fare. **36** Baf Nize éna Añré basġloiyé edde duniyait difereáiyé. Añí zettót hoiyí, ‘Añí Allar Fua,’ tóí tuáñra keéngori hoór de, ‘Tuñí Allar kuféri goijjó?’ **37** Zodi Añí Añr Baf or ham ókkol no gorí, tóoile Añré biccác no goijjó; **38** lekin zodi híin gorí, tuáñra Añré biccác no goillé yo, ham híin ore biccác goró, zeéne tuáñra zano edde buzó de, Baf Añr bútoore asé aar Añí Baf or bútoore así.” **39** Hétunot Yohúdi ókkole abar Isá re gereftar goittó kucíc goijjġl, montor ĩba ĩtarar át ottu hárigilgoi. **40** Tarfore Isá abar Jordán hál or farkule zai táikkgoi, zere age Yaháya ye báptisma díto. **41** Boóut manúc ókkol ĩbar hañse aiccġl; ĩtara hoitó de, “Yaháya ye honó keramot nó goré, montor toóu Yaháya ye e Manúc cwar baabute zġn-zġn hoóil híin beggún sóiyi.” **42** Hére boóut zone Isár uore iman ainné.

11 Lasár nam or ézzon manúc ocúk accġl. Yóggwa óilde Betáníya farar, ziyán ot yóggwar bóin Moriyam edde Morota yó tákito. **2** Hé Moriyam óilde ubá zibá ye Malik or țeng ot añtor đalıdi nizor sul loi fuñsıdıl. Ze Lasár ocúk accġl, yóggwa óilde híbar báı. **3** Hétolla yóggwar bóinain de Isár hañse hotá foónsaiye de, “Malik, Tuñí zaré ador goró, yóggwa ttu ocúk óiye.” **4** Híyan fúinne rár Isá ye hoór de, “Hé ocúk yóggwar moot olla óiye de no, bóľke Allar mohıma lla óiye de, zeéne híyan or zoriya Allar Fuar mohıma zahér ó.” **5** Isá ye Morota re, híbar bóin ore, edde Lasár ore ador goittó. **6** Toóu ĩba ye yóggwa ocúk de fúni, ĩba ze zagat accġl hére aró dui din táikkil. **7** Baade ĩba ye cárit tun ore hoór de, “Aiyó, añára

abar Yohúdiyat zai.” **8** Cárit tune ĩba re hoór de, “Rabbí, yaar hooddin age toh Yohúdi ókkole Tuáñre cġl or dola maitto saáil, toóu Tuñí hére abar zaito soór dé?” **9** Isá ye zuwab der de, “Din ot ki baró gónđa náı ne? Honókiye zodi din ot añre, ĩte uját na há, kiyólla-hoile ĩte toh duniyair foór deké. **10** Montor honókiye zodi rait ot añre, ĩte uját há, kiyólla-hoile ĩtar bútoore foór náı.” **11** Híin hoói baade, ĩba ye ĩtara re hoór de, “Añárar dustó Lasár gúm ot foijjé, montor Añí yóggwa re tulıdıtı zair.” **12** Tóı cárit tune ĩba re hoór de, “Malik, yóggwa gúm ot foijjé de óile, yóggwa țık óizayboi.” **13** Háľke Isá ye hoiyé de óilde yóggwar moot or baabute, montor ĩtara țaiıjıl de endilla gúm or hotá hoiyé bóuli. **14** Hétolla Isá ye ĩtara re sáf-sáf góri eén hoóifelaiye, “Lasár morigiyói. **15** Añí hére nu accġlam de híyan olla tuáñrar zoriya kúci, zeéne tuáñra ekin gorı faro. Aiyó, añára yóggwar hére zai.” **16** Hétunot Tómas, zibá re Zooñikka hoói đake, yóggwa ye nizor saáñti cárit tun ore hoór de, “Añro, añára yó zai, zeéne añára ĩbar fúañti mori fari.” **17** Baade Isá zeñtté hére foónıce, ĩba ye zani faijjé de, Lasár ore hobor ot diyé de sair din óigiyoi. **18** Betáníya gán Jerúsaľem or đake accġl, sirřf dui mail ánik duré deh. **19** Bicı Yohúdi ókkol Morota edde Moriyam or hére aiccġl, ĩtara re ĩtarar báı or baabute tosólli dí bolla. **20** Zeñtté Morota ye Isá aiyér de fúinne, híba ye Isá llói mılto giyyé, montor Moriyam góř ot táıgilgoi. **21** Morota ye Isá re hoór de, “Ó Malik, Tuñí zodi ere óita, añr báı no moritó. **22** Montor añı yıán zani, Tuñí ehón óu Alla ttu zġn magıbá, Alla ye híin Tuáñre diibo.” **23** Isá ye híba re hoór de, “Tor báı abar zinda ói urřbo.” **24** Morota ye ĩba re hoór de, “Añı zani háñcor or din yóggwa abar zinda ói urřbo.” **25** Isá ye híba re hoór de, “Háñcor edde zındigi óılam de Añı. Zee niki Añr uore iman ané, yóggwa morılé yo zinda tákibo, **26** aar zee niki zinda asé aar Añr uore iman ané, yóggwa bılkül no morıbó. Tui híyan ekin gorós né?” (aión g165) **27** Hıba ye zuwab der de, “Óı, Malik, añı iman ainnı de, Tuñı óilade Allar Fua Mosih, zibá duniyait aıbár hotá accġl.” **28** Híyan hoói baade, híba zai nizor bóin Moriyam ore matai zuitégori hoór de, “Ustat ere asé, ĩba ye tuáñre đaker.” **29** Híyan fúni híba toratori urř Isár hañse giyyé. **30** Héñtte Isá farat nó foónse, bóľke aıjı uré zere Morota ye ĩba llói dola óoil. **31** Ze Yohúdi ókkole Moriyam

or fúañti gór ot tái híba re tosólli díyat accíl, ítara Moriyam toratori urí baárkule zaargói de deki híbar fisá doijje. Ítara táiaijje de, Moriyam hobor ot hañditó zaar. 32 Zeñtté Moriyam uré foónicce zeré Isá asé, híba ye íba re deki íbar téng ot fori hoór de, “Ó Malik, Tuñí zodi eré óita, añr báí no moritó.” 33 Isá ye híbar edde híbar fúañti aiccé de Yohúdi ókkol or hañdani deikké rár, Nizor dil ot bicí ferecan laigíl, edde fetfuri uittíl. 34 Íba ye fusár gorér de, “Yóggwa re hoře raikkó?” Ítara íba re hoór de, “Malik, aiyó, sođgai.” 35 Isá hañdat doijje. 36 Hétolla Yohúdi ókkole hoór de, “Soó, íbá ye yóggwa re hondilla ador goittó!” 37 Lekin ítara kiyé-kiyé hoór de, “E Manúc zibá ye añdár suk kúli díyl, íbá ye saitó bóuli kí hé manúc cwa re no more fán gorí no faitto né?” 38 Hétolla Isá ttu Nizor bútoe abar bicí ferecan lagi, hobor or hére giyyé. Hobor gwá óilde eggwá kúnda, aar yíbar muk ot ekkán cíl ouzaiya accíl. 39 Isá ye hoór de, “Cíl lan larifélo.” Morigiyói de yóggwar bóin Morota ye íba re hoór de, “Malik, yala héntu bac uríbo, kiyólla-hoilé yóggwa morigiyói de sair din óiye.” 40 Isá ye híba re hoór de, “Añí toré hoiyí de no né, zodi ekin gorós, Allar mohíma dekíbi bóuli?” 41 Tói ítara cíl lan larifélayiye. Aar Isá ye uormikká suk tulí hoór de, “Ó Baf, Tuñí Añr hotá fúinno de hétolla Añí Tuáñre cúkuriya zanair. 42 Añí zani Tuñí hámica Añr hotá fúno, montor Añr sairókul ttu ze manúc cún tiyai asé, ítarar wasté Añí yían hoóir, zeéne ítara ekin goré de, Añré Tuñí beh dífériyo.” 43 Híin hoói yore Isá ye doónr abase ñak mari hoór de, “Lasár, neelial!” 44 Tói morigiyói de yóggwa neeli aágiiyoi, yóggwar át edde téng gun hohón or hoor loi baindá, aar yóggwar muk kán ekkán hoor loi beráiya. Isá ye ítara re hoór de, “Yoggwá re kúlifelo, aar zaito doh.” 45 Yohúdi ókkol zetará Moriyam or hére aiccíl, ítara Isá ye ziyán goijjé híyan deki boóut zone íbar uore iman ainné. 46 Montor ítarar bútotu hodúne zai, Isá ye ziín goijjé híin Féroci ókkol ore zanaiyégoi. 47 Tói doónr imam ókkole edde Féroci ókkole fótuayi-mujilíc ore míting matai hoór de, “Añára ehón kii goittám? Hé Manúc cwa ye toh boóut keramot ókkol gorér. 48 Zodi añára íba re endilla eridi rakí, tooile beggúne íbar uore iman anifelaibo, aar Romi ókkole aái añárar pak zaga edde añárar koum ore kobza gorífelaibo.” 49 Montor ítarar bútoe Káiyafas nam or zibá hé bosór boro imam accíl, yóggwa

ye ítara re hoór de, “Tuáñra toh bikkúl kessú no zano, 50 aar tuáñra yían óu báfi no soór de ki, tuáñra lla beétor óilde fura koum dóncó óizar túaro manúc beggún olla ekzon manúc moron.” 51 Yóggwa ye híyan nizor bole hoiyé de no, bólke yóggwa hé bosór boro imam accíl ísafe, yóggwa ye agun hotá hoiyé de ki, Yohúdi koum olla Isá moribó; 52 siríf hé koum olla no, bólke Allar fuain ókkol zetará ikká-uikká dorbodor ógiyoi ítara re ekkán ot zoma gorí bolla yó. 53 Hé din lóti ítara Isá re marifélaito sólla gorát doijje. 54 Hétolla Isá ye Yohúdi ókkol or bútoe kúlamela góri ar aa-zaa no gorér, bólke héntu moidan elakar ñáke asé de Eferaim nam or ekkán cóor ot giyyégoi, aar Nizor cárit tun ore looi hére tákat doijje. 55 Héñtte Yohúdi ókkol or Azadir-id ñáke aiccé, aar id or age nizoré pak-sáf gorí bolla boóut manúc fara ttu uore Jerúsalem ot giyyé. 56 Ítara Isá re talac gorát accíl, aar baitul-mukaddos or urán ot tiyai ezzon ottu ezzone fusár gorér de, “Tuáñra kii táaro? Íba id ot ebbe nu aibó niki?” 57 Doónr imam ókkole edde Féroci ókkole hókum zari goijjé de, zodi honókiye Isá hoře asé de zane de óile íte ítara re hóbor dito, zeéne ítara íba re gereftar gorí fare.

12 Azadir-id or sów din age, Isá Betáníyat aiccé, zeré oh Lasár tákito, zibá re íba ye mora ttu zinda goijjíl. 2 Hére ítara íba lla biyal or hána goijjé. Morota ye hédmot goijjíl, aar zetará íbar fúañti háito boiccíl ítarar bútoe Lasár óu accíl. 3 Hétunot Moriyame háti narđ-gas or bicí moóngga azzér añtor looi aiccé, aar híin Isár foot dálidi nizor sul loi íbar foo fuñsídiye. Hé añtor or kúcboye gór gán bórigilgoi. 4 Montor íbar cárit tun ottu ezzon zee niki íba re dóridibo de asé, hé Yohúdah Iskáriyete hoór de, 5 “E añtor gún kiyá tin cót dinár dí besi tiañ gún gorif ókkol ore dii nó fele?” 6 Íte hotá híyan gorif ókkol olla sintabáfana táki hoiyé de no, bólke kiyólla-hoilé íte sur accíl; tiañr feři ítar hére tákito ísafe, yíbat ziín era zayto héntu íte sur gorifelaito. 7 Montor Isá ye hoór de, “Híba re goittó doh; híba ye iín Añr dohón or din olla beh raikké. 8 Gorib ókkol toh tuáñrar fúañti nitti asé, montor Añré tuáñra nitti no faiba.” 9 Isá Betáníyat aiccé de zani fari becábici Yohúdi ókkol hére aiccé. Ítara siríf Isá lla aiccé de no, bólke Lasár ore sai bolla yó, zibá re íba ye mora ttu zinda goijjíl. 10 Lekin doónr imam

ókkole Lasár ore yó marifélaibar sólla goijjé, 11 kiyólla-hoilé yóggwar zoriya boóut Yohúdi ókkole ítarar héntu zaigói Isár uore iman anér. 12 Tarfor din, ze becábíci manúc ókkol id ot aiccé, ítara fúinne de, Isá Jerúsalem ot aiyér, 13 tói ítara házu-gas or ðaggwa ókkol looi íba llói dola óito neeillé, aar guzori-guzori hoór de, “Hósana! Mubarek Ubá zibá Mabud or name aiyér, Becók, íba óilde Isráili ókkol or Baáñcca!” 14 Isá ye eggwá gadár sóo fai yíbar uore boiccíl; zendilla pak-kalam ot asé, 15 “Ó Síyon or zéríua, no ðooraiyó; soó, tuáñr Baáñcca gadár sóor uore boói aiyér.” 16 Isár cárit tune híin age buzí nó fare; montor zeñtte Isár mohíma zahér óiye, tói ítara ttu monot uitté de, híin íbar baabute beh leká gíyeh, aar manúc ókkole íba re héen-héen goijjé. 17 Isá ye Lasár ore hobor ottu ðaki mora ttu zinda goijjíl de héñtte ze manúc ókkol íbar fúañti accíl, ítara híyan or baabute gobá díyat accíl. 18 Hétolla bóuli yó hé manúc ítara Isá llói dola óito gíil deh, kiyólla-hoilé ítara fúinnil de, hé keramot tán íba ye beh goijjé. 19 Féroci ókkole híyan olla afós ot hoór de, “Tuáñra toh dekór, añárar honó fáida no ór. Soó, fura duniyai íbar fisáli óigiyoi.” 20 Hé id ot zetará ebaadot goittó aiccé, ítarar bútoze hodún Girík manúc óu accíl. 21 Ítara Filíp or hañse aái hoór de, “Jonáb, añára ttu Isá re saitó monehoór.” Filíp óilde Galil or Betsáida farar manúc. 22 Filípe zai híyan Enderiyas ore hoiyé, baade Enderiyase edde Filípe zai Isá re hoiyégoi. 23 Montor Isá ye ítara re hoór de, “Manúc or Fuar mohíma zahér gorá zaybar októ aiccé. 24 Añí tuáñra re sóiyi-sóiyi hoóir, giyuñr bis zetún meřit fori nó more, hétun gaaga táke; montor zodi more, yíbat boóut fósol ókkol dóre. 25 Zee niki nizor zan ore muhábbot goré, yóggwa ye híyan háraifelaibo; aar zee niki e duniyait nizor zan ore deéi no fare, yóggwa ye híyan ofúrani zindigi lla basai rakíbo. (aiónios g166) 26 Honókiye Añr hédmot goittó sailé, ítar ttu Añr fisáli dora foribó; kiyólla-hoilé Añí zeré, Añr háadem óu hére beh óibo. Zee niki Añr hédmot goré, ítare Añr Bafe izzot goríbo. 27 “Yala añr ruh ferecan óigiyoi. Añí kí endilla hoitám né, ‘Ó Baf, Añré e októ ttu basai rakó’? No, Añí e októ foijjonto hétolla éna aiccí. 28 Ó Baf, Tuáñr nam or mohíma zahér goró.” Hétunot asman ottu eggwá abas fúna gíyeh de, “Añí híyan zahér goijjí yó, aar abar zahér goijjím óu.” 29 Ze manúc ókkol hére tíyai accíl, ítara hé abas swá

fúni ðeba maítté de bóuli hoiyé. Ar hodúne hoór de, “Íba llói honó ffrista ye hotá hoiyé deh.” 30 Isá ye zuwab der de, “Hé abas swá Añr wasté aiccé de no, bóлке tuáñrar wasté. 31 Yala e duniyair maincór bisar goríbar októ aáigiyoi, aar yala e duniyair sóddar ore neelaidiya zaybo. 32 Añré zeñtte zobin ottu uore tulífela zaybo, héñtte tamám manúc ókkol ore Añr hañse ðani tulífelaiyum.” 33 Hotá híin lói íba ye icára díye de ki, íba hon moote moribó. 34 Manúc cúne íba re hoór de, “Añára Córíyot ottu fúinni de, Mosih abadulabad tákíbo, tói Tuñí keéngori hoór de, ‘Manúc or Fua re hámaha uore tulífela zaybo?’ Hé Manúc or Fua íba hon?” (aión g165) 35 Isá ye ítara re hoór de, “Nur tuáñrar dormiyan ot ar kessú októ foijjonto beh asé. Tuáñrar fúañti Nur tákite añrát táko, arnóile andáre tuáñra re báraizayboi. Zee niki andár ot añre, íte toh hoikká zaar hoi no fare. 36 Tuáñrar fúañti Nur tákite Nur or uore iman anó, zeéne tuáñra Nur or fuain bonizogói.” Isá ye hotá híin hoói baade ítarar héntu zaigói Nizoré ítara ttu lukai raikkíl. 37 Íba ye edún bicí keramot ítarar muuntu goríle yo, toóu ítara íbar uore iman nú ané. 38 Héndilla etollá óiye, zeéne Yesáyah nobi ye hoóil de hotá yíán fura ó, “Ó Mabud, añárar poigam hone ekin goijjé? Aar Mabud or ðuwáñr bol har hañse zahér óiye?” 39 Ítara etollá beh iman aní nó fare, zendilla hé Yesáyah ye aró hoiyé, ki hoilé, 40 “Alla ye ítarar suk añdá gorídiye, aar ítarar dil doró gorídiye, zeéne ítara suké no deké, dile no buzé, aar íba ye ítara re gom gorídi bolla íbar hañse fíri nu aiyé.” 41 Yesáyah ye hotá híin Isár mohíma deki íbar baabute hoibárcot hoiyé deh. 42 Toóu neta ókkol ottu cóo boóut zone íbar uore iman ainné, montor Féroci ókkole ítara re mujilíc-hána ttu neelaidibo de híyan or ðoore ítara híyan cíkar no goittó; 43 kiyólla-hoilé ítara Alla ttu izzot faar túaro manúc ottu izzot faa bicí fosón goittó. 44 Baade Isá ye guzori-guzori hoór de, “Zee niki Añr uore iman ané, yóggwa siríf Añr uore iman ané de no, bóлке Ubár uore yó ané zibá ye Añré diferáiyé. 45 Zee niki Añré deké, yóggwa ye Añré diferáiyé de íba re beh deké. 46 Añí e duniyait Nur ísafe aiccí, zeéne zee kiyé Añr uore iman ané, yóggwa andár ot no táke. 47 “Zodi honókiye Añr hotá fúne montor híin amól no goré, yóggwar bisar Añí no gorí, kiyólla-hoilé Añí toh duniyair maincór bisar goittó aiccí de no, bóлке duniyair maincóre basaitó aiccí deh. 48 Zee niki Añré inkar goré

aar Añr hotá kobul no goré, yóggwar bisarhar asé. Ze hotá Añi hoiyí, kiyamot or din híne beh yóggwar bisar goríbo. **49** Kiyólla-hoilé Añi toh Nizor torfóttu kessú hoiyí de náí, montor Añré diferáye de hé Baf Nize Añré hókum goijjé de, Añr ttu kii-kii howá foribó aar kii-kii boiyan gorá foribó. **50** Añi zani Íbar hókume ofúrani zindigit loiza; hétolla Añi zín hoóí híin beggún Bafe Añré zendilla hoiyé héndilla beh hoói.” (aiñnios q166)

13 Azadir-id or ekkágori agor hotá. Isá ye zainto de, Íba e duniyai ttu Baf or hére zaibar októ aáigiyoi. Duniyait mazé zetará Íbar Nizor manúc accíl Ítara re Íba ye muhábbot goittó aar Ítara re ahéri foijjonto muhábbot goijjíl. **2** Héntte biyal or hánar októ accíl. Íba re dóridi bolla Íbilíce Sáimon or fua Yohúdah Iskáriyet or dil ot age lóti niyot gólaidiye. **3** Isá ye zainto de, Bafe Íbar át ot hárr kessú diífelaiye aar Íba Allar torfóttu aiccé edde Allar hére beh fíri zaar; **4** hétolla Íba ye hána eri uittíl, aar Nizor gaar uoror hoor kúli emmikká ejijé, baade ekkán gansá looi keeníl ot baíndé. **5** Tarfore Íba ye gaalat faní dáli cárit tun or téng dúwai díyat doijje, aar Íbar keeníl ot baíndíl de gansá gán lói híin fuñsí díyat doijje. **6** Baade Íba Sáimon Fitor or íñyot foóníce. Fitore Íba re hoór de, “Malik, Tuñí añr téng dúwai díba dé?” **7** Isá ye Íba re zuwabe hoór de, “Añí kii gorír tui ehón no buzíbi, montor fore buzíbi.” **8** Fitore Íba re hoór de, “Tuñí bilkul añr téng no dúiyi.” Isá ye Íba re zuwab der de, “Añí zodi tor téng no dúí, tooile tor lloi Añr lloi honó hátíl náí.” (aiñnios q165) **9** Hétunot Sáimon Fitore Íba re hoór de, “Malik, tooile siríf añr téng no, bólke añr át tun edde matá yó dúwaido.” **10** Isá ye Íba re hoór de, “Zee niki gaa dúifelaiye, Ítar ttu siríf téng dúwa fore deh, kiyólla-hoilé Íte toh furafuri sáfsutara. Tuáñra sáf, montor beggún no.” **11** Isá ye zane Íba re hone dóridibo deh; hétolla Íba ye hoiyé de, “Tuáñra beggún sáf no.” **12** Tói zeñtté Íba ttu Ítarar téng dúiya óiye, Íba ye Nizor hoor fiñdí abar boiccé. Íba ye Ítara re hoór de, “Añí tuáñra re kii goijjé de buijjó né?” **13** Tuáñra toh Añré Ustat edde Malik dako, aar tuáñra híyan sóiyi hoó, kiyólla-hoilé Añi toh héndilla ói. **14** Tói Añi zettót tuáñrar Malik edde Ustat ói tuáñrar téng dúwai díyi, tuáñra ttu yó ezzone ar ezzon or téng dúwai díyar zorur. **15** Añi gorí tuáñra re ekkán nomuna daháiyi de,

zeéne Añi tuáñra re goijjé de héndilla tuáñra yó goró. **16** Añi tuáñra re sóiyi-sóiyi hoóir, gulam nizor girós or túaro doóñr no, aar zibá re diferá gíyeh Íba yó diferóyar túaro doóñr no. **17** Yala tuáñra toh iín zano, zodi amól goró tooile tuáñra mubarek. **18** “Añí tuáñra beggún or hotá hoóir de no; Añi zani Añi hontará re basíloiyi. Montor héndilla etollá ór zeéne pak-kalam or hotá yían fura ó, ‘Zee niki Añr fúañti ruñi háa, Íte Añr ulða latí tuillé.’” **19** “Híyan óibar age Añi yala lóti tuáñra re zanaidir, zeéne híyan óile tuáñra ekin goró de, Añi óilam de Íba. **20** Añi tuáñra re sóiyi-sóiyi hoóir, zee niki Añi diferáide yóggwa re kobul goré, Íte Añré kobul goré deh; aar zee niki Añré kobul goré, Íte Añré diferáye de Íba re kobul goré deh.” **21** Isá ttu híin hoiyá ói baade, dil ot ferecan laiggé, aar hoóifelaiye de ki, “Añí tuáñra re sóiyi-sóiyi hoóir, tuáñra ezzone Añré dóri diba.” **22** Cárit tune Isá ye har hotá hoór de buzí no fari ezzon or uzu ezzone saát doijje. **23** Ítara ttu ze cárit twa re Isá ye muhábbot goittó, yóggwa Isár gaat élan dí boirá accíl. **24** Sáimon Fitore hé cárit twa re icára gorí hoór de, “Íba ye har hotá hoór de fusár goró.” **25** Tói hé cárit twa Isár gaat élan dí fusár gorér de, “Malik, Íte hon?” **26** Isá ye zuwab der de, “Ruñir ñukura yían burai Añi zaré diiyum, tee óilde manúc Íte.” Baade Íba ye ruñir ñukura gán burai Sáimon Iskáriyet or fua Yohúdah re diiyé. **27** Ruñir ñukura gán looi baade Cóitan Ítar búture góligiyoi. Hétolla Isá ye Ítare hoór de, “Tui ziyán goríbi híyan toratori gor.” **28** Montor hána háito boiccé de Ítara honókiye nó buzé de, Íba ye Ítare hotá híyan kiyólla hoiyé. **29** Hodúne táaijil de, Yohúdah ttu zettót tiañr feñi accíl hétolla Isá ye Ítare endilla hoiyé de, “Íd olla zín zorur híin kini angói,” arnóile gorif ókkol ore kessú deegói. **30** Íte ruñir ñukura gán looi toratori baárkule neeligiyói. Híyala rait. **31** Íte baáre zaigói baade, Isá ye hoór de, “Yala Manúc or Fuar mohíma zahér óibar októ aiccé, aar Allar mohíma Íbar duara zahér óibo. **32** Zeñtté Íbar duara Allar mohíma zahér óibo, héntte Alla ye yó Nizor duara hé Manúc or Fuar mohíma zahér goríbo, aar Íba ye Nizor mohíma bicí toratori zahér goríbo. **33** “Ó Fuain ókkol, Añi tuáñrar fúañti ar kessú októ foijjonto así deh. Tuáñra Añr talac goríba, montor Añi Yohúdi ókkol ore zendilla hoóilam, héndilla yala Añi tuáñra re yó hoóir, ‘Añi zeñé zairgói hére tuáñra aái no faribá.’” **34**

“Añí tuáñra re ekkán noya hókum dír, ki hoilé, tuáñra ezzon ore ezzone muhábbot goró. Añí zendilla tuáñra re muhábbot goijjí, héndilla tuáñra yó ezzon ore ezzone muhábbot goró. 35 Zodi tuáñra ezzon ore ezzone muhábbot goró, híyane beggúne zaniíbó de, tuáñra óilade Añr ummot.” 36 Sáimon Fitore Isá re hoór de, “Malik, Tuñí hořé zoörgoi dé?” Isá ye zuwab der de, “Añí zeré zairgói, héře tui Añr fúañti yala aái no faribí, lekin fore aái faribí.” 37 Fitore İba ttu fusár gorér de, “Malik, añí Tuáñr fúañti yala kiyá aái no faittam? Añí toh Tuáñr İla bóuli nizor zan úddwa difélaikum.” 38 Isá ye zuwab der de, “Tui Añr İla tor zan difélaibi dé? Añí toré sóiyi-sóiyi hoóir, ratakurá bak dibar age tui Añré tin bar inkar gorİbi.

14 “Tuáñrar dil ot ferecan nu ainnó. Allar uore iman rakó, Añr uore yó iman rakó. 2 Añr Baf or gór ot tákibar zaga bicí asé, zodi no tákito, Añí tuáñra re hoói dítam, kiyólla-hoilé Añí toh tuáñra İla zaga toiyar goittó zair. 3 Añí zai tuáñra İla zaga toiyar gorí waafes aiccúm, aar Añr héře tuáñra re loizaiyúmboi, zeéne Añí zeré, tuáñra yó héře ó. 4 Tuáñra toh Añí hořé zair de híyan or rasta zano.” 5 Tómasé İba re hoór de, “Malik, añára no zani Tuñí hořé zoór, tooile rasta keéngori zaniyúm?” 6 Isá ye yóggwa re hoór de, “Añí óilam de rasta, sóiyi, edde zindigi; Añr duara no zailé honókiye Baf or héře zai no fare. 7 “Zodi tuáñra Añré sinnó de óile, tooile toh Añr Baf ore yó sinnó. Yala lóti tuáñra İba re sinó edde dekfelaiko.” 8 Filípe İba re hoór de, “Malik, Baf ore añára re dahó, híyan añára İla kafí.” 9 Isá ye yóggwa re hoór de, “Filíp, Añí toh tuáñrar fúañti etókkal así, toóu tui Añré no sinós dé? Zee niki Añré deikké İte Baf ore deikké. Tui keéngori hoór de, ‘Baf ore añára re dahó?’ 10 Tui ki biccác no gorós, Añí Baf or bútoře así aar Baf Añr bútoře asé dé? Hotá zín Añí tuáñra re hoói, híin Añí Nizor torfóttu hoói de no, bólke Baf zibá Añr bútoře asé İba ye Nizor ham gorér deh. 11 Añré biccác goró de, Añí Baf or bútoře así aar Baf Añr bútoře asé; arnóile ham mún or wasté óile Añré biccác goró. 12 “Añí tuáñra re sóiyi-sóiyi hoóir, zee niki Añr uore iman raké, ze ham ókkol Añí gorí híin İte yó gorİbo; İte híin or túaro doónr-doónr ham ókkol gorİbo, kiyólla-hoilé Añí toh Baf or héře zairgói. 13 Aar tuáñra Añr name zín saibá híin Añí goríyım, zeéne Baf or mohıma

Fuar duara zahér ó. 14 Tuáñra Añr name Añr ttu honó kessú sailé, Añí híyan goríyım. 15 “Zodi tuáñra Añré muhábbot goró, tooile Añr hókum ókkol amól gorİba. 16 Añí Baf ottu magiyúm, aar İba ye tuáñra re ar ezzon Modotgár diibo, zeéne İba tuáñrar fúañti abadulabad táke. (aİön g165) 17 Hé Modotgár óilde sóiyir Ruh; duniyai ye İba re no yo deké aar no yo zane. Montor tuáñra toh İba re zano, kiyólla-hoilé İba tuáñrar fúañti-fúañti táke edde tuáñrar bútoře tákİbo. 18 “Añí tuáñra re etim rakí no zaiyım; Añí tuáñrar héře waafes aiccúm. 19 Hotún ánik baade duniyai ye Añré ar no dekbıbo, montor tuáñra Añré dekbıba, kiyólla-hoilé Añí zinda así İsafe tuáñra yó zinda tákİba. 20 Hé din ailé tuáñra zani faribá de, Añí Añr Baf or bútoře así, tuáñra Añr bútoře asó, aar Añí tuáñrar bútoře así. 21 Zee niki Añr hókum ókkol kobul goré edde amól goré, yóggwa óilde zee niki Añré muhábbot goré. Zee niki Añré muhábbot goré, yóggwa re Añr Bafe muhábbot gorİbo; Añí yó yóggwa re muhábbot goríyım aar Nizoré yóggwar hañse zahér goijjım.” 22 Hétunot Iskáriyet no de hé Yohúdah ye İba re hoór de, “Malik, kiyólla Tuñí duniyair hañse no gorí siríf añárar hañse Nizoré zahér gorİba dé?” 23 Isá ye yóggwa re zuwabe hoór de, “Zodi kiyé Añré muhábbot goré, yóggwa Añr hotáye solibó. Añr Bafe yóggwa re muhábbot gorİbo, aar Añára yóggwar hañse aiccúm edde yóggwar fúañti tákiyım. 24 Zee niki Añré muhábbot no goré, yóggwa Añr hotáye no sole. Ze hotá tuáñra fúnor híin Añr no, bólke Añré diferáıye de hé Baf or. 25 “E hotá iın Añí tuáñra re tuáñrar fúañti tákite hoiyí. 26 Lekin Modotgár yáni Pak-Ruh, zibá re Bafe Añr name diferáıbo, İba ye tuáñra re hárr kessú cíkaıbo, aar Añí zín tuáñra re hoiyí híin beggún yaad goráıdİbo. 27 Añí tuáñra İla cánti rakí zair; Añr cánti Añí tuáñra re diir. Duniyai ye dee de héndilla gorí Añí no dii. Tuáñrar dil ot ferecan nu ainnó, edde no dooriayó. 28 “Añí tuáñra re yán hoiyí de toh fúınno, ‘Añí zairgói, aar tuáñrar héře waafes aiccúm.’ Zodi tuáñra Añré muhábbot goittá, tooile tuáñra Añí Baf or héře zairgói de hétolla kúci óita, kiyólla-hoilé Añr Baf toh Añr túaro doónr. 29 Híin óıbar age lóti Añí tuáñra re hoóıdiyi, zeéne híin óile tuáñra biccác goró. 30 Añí tuáñra llóı ar bicí hotá no hoiyım, kiyólla-hoilé duniyair sóddar toh aázargoi, aar İtar ttu Añr uore honó kémota náı. 31 Montor Añí

Baf ore muhábbot gorí de híyan duniyai ye zane fán, Bafe Añré zendilla hókum goijjé Añí héndilla beh gorí. “Uró, Añára yíán ttu zaigói.

15 “Añí óilam dé sóiyi anggur-gas, aar Añr Baf óilde barizar cacá. 2 Añr ze déeilat gula no dóre, yíba re íba ye haríféle; montor ze déeilat gula dóre, yíba re íba ye cári sáf raké, zeéne yíbat aró gula dóre. 3 Añí tuáñra re ze hotá ókkol hoiyí híin lói toh tuáñra age lóti pak-sáf óigiyogoi. 4 Añr llói laigga táko, aar Añí yó tuáñra llói laigga táikkum. Zendilla déeila anggur-gas ot laigga no tákile nizorgá nize gula dórai no fare, héndilla tuáñra yó no faribá zodi Añr llói laigga no táko. 5 “Añí óilam de anggur-gas, aar tuáñra óilade déeila ókkol. Zee niki Añr llói laigga táke aar Añí ítar llói laigga táki, íte bicí gula dórai fare, kiyólla-hoilé Añí sára toh tuáñra kessú gorí no faribá. 6 Zee niki Añr llói laigga no táke, ítare déeilar dóilla baáre félaidiya zah, aar fúaizagoi; tói maincé híin ore dolagorí ooin ot félai déh, aar híin furizagói. 7 Zodi tuáñra Añr llói laigga táko, aar Añr hotá tuáñra llói laigga táke, tóoile tuáñra ttu monehoó de híyan magiyó, tuáñra re híyan diiya zaybo. 8 Tuáñra bicí gula dórai Añr ummot de sábut goríle, Añr Baf or mohíma zahér ó. 9 “Bafe Añré zendilla muhábbot goijjé, Añí yó tuáñra re héndilla muhábbot goijjé. Añr muhábbot ot laigga táko. 10 Zodi tuáñra Añr hókum ókkol amól goró, tóoile Añr muhábbot or bútoe tákiba, zendilla Añí Añr Baf or hókum ókkol amól gorí yore íbar muhábbot or bútoe táki. 11 Hotá iín Añí tuáñra re etollá hoiyí, zeéne Añr kúci tuáñrar bútoe táke, aar tuáñrar kúci zen fura óizagoi. 12 Añr hókum óilde yíán, Añí tuáñra re zendilla muhábbot goijjé, tuáñra yó ezzon ore ezzone héndilla muhábbot goró. 13 Ezzone nizer dustó ókkol olla nizer zan diféle de híyan or túaro toh ar doónr muhábbot náí. 14 Tuáñra Añr dustó ókkol, zodi Añí tuáñra re zín hókum díyi híin amól goró. 15 Añí tuáñra re gulam bouli ar no hoóir, kiyólla-hoilé gulame toh nizer giróse kii gorér no zane. Montor Añí tuáñra re dustó hoiyí, kiyólla-hoilé Añí toh Añr Baf ottu zín fúinni híin beggún tuáñra re zanaidiyí. 16 Tuáñra Añré basíloiyi de no, bólke Añí éna tuáñra re basíloiyi edde ham ot lagaiyí, zeéne tuáñrar zindigit gulagala dóre aar hé gulagala țiki táke, zeéne tuáñra Baf ottu Añr name zín magibá híin íba ye tuáñra re dee.

17 Añí tuáñra re hókum díre de ki, tuáñra ezzon ore ezzone muhábbot goró. 18 “Zodi duniyai ye tuáñra re nafórot goré, monot raikkó de, ítara tuáñra re goríbar age Añré nafórot goijjé. 19 Zodi tuáñra duniyair óita, duniyai ye tuáñra re nizer ísafe muhábbot goittó; montor tuáñra zettót duniyair no aar Añí tuáñra re duniyai ttu basíloifélaiyi, hétolla beh duniyai ye tuáñra re nafórot goré. 20 Añí tuáñra re hoiyí de hotá gán monot raikkó de ki, ‘Gulam nizer girós or túaro doónr no.’ Hétolla ítara zodi Añré zulúm goijjé de óile, tuáñra re yó zulúm goribo; zodi ítara Añr hotá amól goijjé de óile, tuáñrar hotá yó amól goríbo. 21 Lekin ítara híin beggún tuáñra re Añr nam or zoriya beh goríbo, kiyólla-hoilé ítara Añré diferáiyi de íba re no siné. 22 Zodi Añí nu aítam aar ítara re hotá ókkol no hoitám, tóoile ítara gunágar no țóorito; montor yala de ítara ttu nizer guná 11a honó bahána náí. 23 Añré nafórot goré de íte Añr Baf ore yó nafórot goré. 24 Zodi Añí ítarar hére ham uúin no goittám zín honókiye goijjé de náí, tóoile ítara gunágar no țóorito; montor yala toh ítara Añré edde Añr Baf ore deikké aar nafórot óu goijjé. 25 Lekin héndilla etollá óiyi, zeéne ítarar Córivot ot leikká asé de hotá yíán fura ó, ‘Ítara Añré hánnak nafórot goijjé.’ 26 “Zeñtté Modotgár Ubá aibó zibá re Añí Baf or torfóttu tuáñrar hére diferáiyum, yáni sóiyir Ruh zibá Baf or torfóttu aiyé íba re, héñtte íba ye Añr baabute gobá díbo. 27 Aar tuáñra yó Añr baabute gobá díba, kiyólla-hoilé tuáñra toh Añr fúañti-fúañti foóila cúru ttu lóti asó.

16 “Añí tuáñra re hotá iín etollá hoiyí, zeéne tuáñra iman ottu no zoogói. 2 Maincé tuáñra re mujilíc-hána ttu neelaidibo; ói, eén októ aiyér, zee niki tuáñra re maríféle íte țáaribo de, íte Allar hédmot gorér bóuli. 3 Ítara héndilla híin etollá goríbo, kiyólla-hoilé ítara no Baf ore sinné aar no Añré sinné. 4 Lekin híin Añí tuáñra re hoiyí de, zeéne híin or októ ailé tuáñra ttu monot uré de ki, Añí tuáñra re híin or baabute hoóí ráikki. Añí tuáñra re foóila lóti híin nó hoóí, kiyólla-hoilé Añí toh tuáñrar fúañti-fúañti accílam. 5 “Montor yala Añí Ubár hére zairgói zibá ye Añré diferáiyi, aar tuáñra honókiye Añr ttu fusár no gorór de, ‘Tuñí hořé zoórgoi dé?’ 6 Montor Añí tuáñra re iín hoiyí de hétolla, tuáñrar dil ferecaniye bórigiyoi. 7 Lekin Añí tuáñra re sóiyi hoóir, Añí

tuáñrar fáida lla zairgói deh; kiyólla-hoilé zodi Añí no zairgói, hé Modotgár tuáñrar hañse nu aibó; montor Añí zailégoi, Añí Íba re tuáñrar hañse diferáiyum. **8** Aar Íba zeñtté aibó, duniyai re gunár, forhéggarir edde bisar or baabute hosúrbon tóoraibo. **9** Gunár baabute tóoraibo de kiyólla-hoilé, manúc ókkole Añr uore iman nú ané; **10** forhéggarir baabute tóoraibo de kiyólla-hoilé, Añí Baf or hére zairgói aar tuáñra Añré ar no dekíba; **11** bisar or baabute tóoraibo de kiyólla-hoilé, duniyair sóddar or bisar óigiyoi. **12** “Añr ttu tuáñra re hoibár aró boút kessú asé, montor yala tuáñra híin bordac gorí no faribá. **13** Lekin zeñtté Ubá, yáni sóiyir Ruh aibó, Íba ye tuáñra re fura sóiyir rasta daháibo; kiyólla-hoilé Íba ye toh Nizor torfóttu kessú hoibó de no, bólke zín fúne híin beh hoibó, aar zín óibo de asé híin tuáñra re zanaidibo. **14** Íba ye Añr gún looi tuáñra re zanaidibo; héndilla gorí Íba ye Añr mohíma zahér goríbo. **15** Baf ottu zín asé híin beggún toh Añr; hétolla hoiyí de, Íba ye Añr gún looi tuáñra re zanaidibo.” **16** “Hotún baade tuáñra Añré ar no dekíba, aar abar hotún baade tuáñra Añré dekíba.” **17** Hétolla Íbar hoozzon cárite afós ot hoór de, “Íba ye añára re iín kii hoór, ‘Hotún baade tuáñra Añré ar no dekíba, aar abar hotún baade tuáñra Añré dekíba’? Aró hoór de, ‘Kiyólla-hoilé Añí Baf or hére zairgói?’” **18** Ítara hoór de, “Íba ye ziyán ‘Hotún or’ hotá hoór híyan kii? Añára no zani Íba ye kiyór hotá hoór.” **19** Isá ye zani faijjé de, ítara ttu Íba re súwal goittó monehoór, hétolla Íba ye ítara re hoór de, “Tuáñra afós ot Añr hotá yían or baabute howáhoi gorór de né, ziyán Añí hoiyí de, ‘Hotún baade tuáñra Añré ar no dekíba, aar abar hotún baade tuáñra Añré dekíba’?” **20** Añí tuáñra re sóiyi-sóiyi hoóir, tuáñra hañdibá edde bilak goríba, montor duniyai ye kúci goríbo. Tuáñra ferecan óiba, lekin tuáñrar ferecani kúcit bodolizaybói. **21** Zeñtté honó mayafua ye fua zormo deh héñtte toh duk faa, kiyólla-hoilé híbar duk faibar októ aiccé; montor zeñtté fua hálas óizagoi, duniyait eggwá fua foida óiye de kúciye hé duk ore ar monot no raké. **22** Héndilla, tuáñra yó yala ferecanit asó; montor tuáñra llói Añí abar miliyúm, héñtte tuáñrar dil kúci óibo, aar tuáñrar kúci re tuáñra ttu honókiye looi no felaibo. **23** Hé din tuáñra Añr ttu honó kessú fusár goríba de náí. Añí tuáñra re sóiyi-sóiyi hoóir, zodi tuáñra Añr name Baf ottu kessú mago, Íba ye tuáñra re diibo. **24**

Aijjó foijjonto tuáñra Añr name kessú maiggó de náí. Mago, tuáñra faiba, zeéne tuáñrar kúci fura óizagoi. **25** “Hotá iín Añí tuáñra re meésal dí beh hoiyí, lekin eén októ aiyér, Añí tuáñra re meésal dí ar no hoiyúm, bólke sáf-sáf góri tuáñra re Baf or baabute hoiyúm. **26** Hé din tuáñra Añr name magibá; aar Añí tuáñra re eén no hoóir de, Añí Baf or hañse tuáñra lla aros goijjúm. **27** Baf Nize toh tuáñra re muhábbot goré, kiyólla-hoilé tuáñra Añré muhábbot goijjó aar biccác goijjó de, Añí Allar torfóttu aiccí deh. **28** Añí Baf or héntu aái e duniyait aiccí; abar Añí e duniyai eri Baf or hére zairgói.” **29** Hétunot Íbar cárit tune hoór de, “Soó, yala Tuñí sáf-sáf góri hoór, honó meésal dí no. **30** Yala añára zani faijjí de, Tuñí hárr kessú zano, aar Tuáñr ttu honókiye súwal goríbar zorur náí; híyane añára biccác gorí de, Tuñí Allar torfóttu aiccó deh.” **31** Isá ye ítara re hoór de, “Tuáñra yala biccác goró né? **32** Soó, eén októ aiyér, becók aáigiyoi, tuáñra beggún dorbodor ói zar-zar zagat tee-tee zaibagói, aar Añré háliga eribá. Toóu Añí háliga no, kiyólla-hoilé Baf toh Añr fúañti asé. **33** “Añí tuáñra re hotá iín etollá hoiyí, zeéne tuáñra Añr bútoe cánti foo. Duniyait mazé tuáñra duk-mosibot ot tákiba; montor hímmot na háraiyo, Añí duniyai re ziti aiccí.”

17 Isá ye híin hoói baade asman or uzu saái hoór de, “Ó Baf, októ aáigiyoi. Tuáñr Fuar mohíma zahér goró, zeéne Fua ye yó Tuáñr mohíma zahér goré, **2** Kiyólla-hoilé Tuñí toh Íba re fura insán-zatir uore adíkar diiyó, zeéne Tuñí zetará re Íbar át ot diiyó, ítara beggún ore Íba ye ofúrani zindigi dee. (aiónios g166) **3** Aar ofúrani zindigi óilde yían, ítara zen Tuñí siríf sóiyi Alla re edde Tuñí diferáiyi de Isá Mosih re zane. (aiónios g166) **4** Tuñí Añré ze ham gorí bolla diiyó, híyan fúrai Añí e duniyait Tuáñr mohíma zahér goijjí. **5** Aar yala, ó Baf, Tuñí zere asó hére Añré mohímawala banaifélo, oh mohímaye ze mohíma duniyai foida goríbar age lóti Tuáñr fúañti Añr ttu accíl. **6** “Añí Tuáñr nam manúc uitarár hañse zahér goijjí zetará re Tuñí duniyai ttu Añr át ot diiyó. Ítara toh Tuáñr accíl; Tuñí ítara re Añr át ot diiyó aar ítara Tuáñr hotá amól goijjí. **7** Yala ítara zainné de, zedún Tuñí Añré diiyó, híin beggún Tuáñr torfóttu; **8** kiyólla-hoilé ze hotá Tuñí Añré hoitó hoiyó, Añí híin ítara re hoiyí, aar ítara híin kobul goijjí. Ítara fakkafakki gori zainné de,

Añí Tuáñr héntu aiccí deh, aar biccác goijjé de, Añré Tuñí beh diferáyo. **9** “Añí ítara lla beh dua gorír. Añí duniyai lla dua gorír de no, bólke zetará re Tuñí Añr át ot diiyó ítara lla, kiyólla-hoilé ítara toh Tuáñr. **10** Ziín Añr híin beggún Tuáñr, aar ziín Tuáñr híin beggún Añr. Añr mohíma híin or duara zahér óiye. **11** Añí duniyait ar no tákiyum, montor ítara toh duniyait asé, aar Añí Tuáñr hére aázairgoi. Ó pak Baf, ze nam Tuñí Añré diiyó Tuáñr hé name Tuñí ítara re héfazot rakó, zeéne ítara undilla ek óizagoi zendilla Añára ek. **12** Añí zetókkal foijjonto ítara fúañti accílam, Añí ítara re Tuáñr oh name héfazot raikkí, ziyán Tuñí Añré diiyó. Añí ítara re faára dí ráikki, aar ítara ttu honókiye borbad nó óiyo, siríf uite beh óiye zee niki borbad óibar accíl, zeéne pak-kalam fura ó. **13** “Lekin yala toh Añí Tuáñr hére aázairgoi, aar Añí duniyait tákite iín etollá hoóir, zeéne ítara ttu Añr kúci furafuri gori táke. **14** Añí ítara hañse Tuáñr kalam foñsaiyi, aar duniyai ye ítara re nafórot goijjé, kiyólla-hoilé zendilla Añí duniyair no, héndilla ítara yó toh duniyair no. **15** Añr dua endilla no de ki, Tuñí ítara re duniyai ttu loizogói, bólke Añr dua óilde, Tuñí ítara re íbilíc ottu héfazot rakó. **16** Zendilla Añí duniyair no, héndilla ítara yó toh duniyair no. **17** Ítara re sóiyi lói pak-sáf goró. Tuáñr kalam óilde hé sóiyi. **18** Zendilla Tuñí Añré duniyait diferáyo, héndilla Añí yó ítara re duniyait diferáyi. **19** Añí ítara lla Nizore háasgori rakír, zeéne ítara re yó sóiyi lói háasgori raká zah. **20** “Añí siríf ítara lla dua gorír de no, bólke uitará lla yó gorír zetará ítara hotá fúni Añr uore iman aníbo; **21** zeéne ítara beggún ek óizagoi, zendilla, ó Baf, Tuñí Añr bútoe asó, aar Añí Tuáñr bútoe así, héndilla ítara yó zen Añárar bútoe ó, zeéne duniyai ye biccác goré de, Añré Tuñí beh diferáyo. **22** Tuñí Añré ze mohíma diiyó híyan Añí ítara re yó diiyi, zeéne ítara undilla ek óizagoi zendilla Añára ek. **23** Añí ítara bútoe así aar Tuñí Añr bútoe asó, zeéne ítara furafuri ek óizagoi, zeéne duniyai ye zane de, Añré Tuñí beh diferáyo, aar Tuñí ítara re undilla muhábbot goijjó zendilla Añré muhábbot goijjó. **24** “Ó Baf, Añí sái, zetará re Tuñí Añr át ot diiyó, ítara yó zen Añí zeré táki hére Añr fúañti táke, zeéne Tuñí Añré diiyó de Añr hé mohíma ítara deké, kiyólla-hoilé Tuñí toh Añré duniyair foidayecir age lóti muhábbot goijjó. **25** “Ó insáfala Baf, duniyai ye

toh Tuáñre no siné, montor Añí Tuáñre siní; aar itará zainné de, Añré Tuñí beh diferáyo. **26** Añí ítara hañse Tuáñr nam zahér goijjé, aar híyan aró zahér gorát tákiyum, zeéne ze muhábbote Tuñí Añré muhábbot goijjó hé muhábbot itarár bútoe táke aar Añí ítara bútoe táki.”

18 Isá ye hotá híin hoóí baade, Nizor cárit tun ore looi Kídrón zúra farái okule giyyé. Hére ekkán bagan accíl, aar Íba edde Íbar cárit tun híyan ot góille. **2** Íba re dóridiye de Yohúdah ye yó hé zaga gán zainto, kiyólla-hoilé Isá egazá-egazá hére Nizor cárit tun lói militó. **3** Hétolla Yohúdah ye doóñr imam ókkol ottu edde Férocí ókkol ottu ek dol Romi fóous edde hodún faáradar ókkol ore fúañti looi fánoc, uzal, edde átiyar ókkol lói hére aiccé. **4** Isá ye Íbar uore ziín óibo híin beggún zane ísafe, baáre neeli ítara ttu fusár gorér de, “Tuáñra haré tuwoór dé?” **5** Ítara Íba re zuwab der de, “Isá Nasári re.” Isá ye ítara re hoór de, “Añí Íba.” Íba re dórider de Yohúdah yó ítara fúañti tíyai asé. **6** Zeñtté Isá ye ítara re yíán hoiyé, “Añí Íba,” hétunot ítara fissá zai merít forigiyói. **7** Íba ye ítara ttu abar fusár gorér de, “Tuáñra haré tuwoór dé?” Ítara hoór de, “Isá Nasári re.” **8** Isá ye zuwab der de, “Añí Íba de híyan toh tuáñra re hoóifelaiyi. Hétolla zodi tuáñra Añré tuwoór de óile, tooile itará zoggói.” **9** Híyan etollá óiye, zeéne Íba ye hoóil de e hotá fura ó, “Zetará re Tuñí Añr át ot diiyó, Añí ítara ttu ezzon ore úddwa nó áñzai.” **10** Sáimon Fitor ottu ekkán toluwar accíl ísafe, yóggwa ye híyan neelai boro imam or gulam or uore solai ítar den dák or han nán harífelaiye. Hé gulam mwar nam Malkus. **11** Hétolla Isá ye Fitor ore hoór de, “Toluwar daf ot gólai er. Ze fiyala Bafe Añré diiyé, Añí hé fiyala no fiítam né?” **12** Tói hé fóous suné, ítara zonnale, edde Yohúdir faáradar gúne Isá re gereftar gorí bañdifelaiye. **13** Baade Íba re age Hánan or hére loigiyé, kiyólla-hoilé ze Káiyafas hé bosór boro imam accíl, yóggwar hóour óilde Hánan. **14** Hé Káiyafas óilde ubá zee niki Yohúdi ókkol ore mocuwara dyíl de, beétor óilde fura kóum olla ekzon manúc moren. **15** Sáimon Fitor edde ar ezzon cárit Isár kure-kure zaat accíl. Hé cárit twa re boro imame sínito ísafe, yóggwa Isár fuñde-fuñde boro imam or urán ot góillegoi, **16** lekin Fitor baáre duwar ot tíyai táikkil. Hétolla ze cárit twa re boro imame sínito, yóggwa ye baáre neeli duwar sooñidar

gwá re hoói Fitor ore bútoire ainné. **17** Duwar soonidar bañdi mayafua wa ye Fitor ore hoór de, “Tuñí yó hóno e Manúc cwar cárit ottu né?” Yóggwa ye zuwab der de, “Añí no.” **18** Héñtte cítkhal de hétolla gulam ókkole edde faáradar ókkole aañra loi ooin dórai íñyot tíyai ooin fuwát accíl; aar Fitor nize yó ítarar fúañti tíyai ooin fuwát accíl. **19** Héñtte boro imame Isá ttu íbar ummot ókkol or edde íbar taalim or baabute súwal gorér. **20** Isá ye yóggwa re zuwab der de, “Añí duniyair hañse kúlamela góri hotá hoíyí. Añí hámica mujilíc-hána ókkol ot edde baitul-mukaddos ot zeré tamám Yohúdi ókkol zoma ó hére taalim diyí, aar Añí toh lukai kessú hoíyí de náí. **21** Tuñí Añr ttu kiyá fusár gorór? Fúinne de ítara ttu fusár goróna Añí ítara re kii hoíyí. Becók Añí zín hoíyí híin ítara zane.” **22** Isá ye híin hoíyí rár, hére dake tíyai accíl de faáradar ottu ezzone íba re suwar mari hoór de, “Boro imam ore héndilla góri zuwab dede niki?” **23** Isá ye ítare zuwab der de, “Zodi Añí honó gollot hoíyí de óile, gollot híyan daháide; montor zodi sóiyi hoíyí de óile, Añré marór kiyá?” **24** Baade Hánane Isá re baindá hálote, boro imam Káiyafas or hére difeáidiye. **25** Sáimon Fitor aijjó foijjonto tíyai ooin fuwát accíl. Maincé yóggwa re hoór de, “Tuñí yó hóno íbar cárit tun or bútotu né?” Yóggwa ye inkar góri hoór de, “Añí no.” **26** Boro imam or gulam ottu ezzon zee niki Fitore han harifelail de ítar egana, íte hoór de, “Añí toré íbar fúañti bagan ot nó deki niki?” **27** Fitore abar inkar goijjíl; aar éhon-éhon ratakurá bak diyé. **28** Yárbaade Yohúdir neta ókkole Isá re Káiyafas or héntu Romi razmohól ot loigiyé, héñtte bíinna sóore accíl. Ítara nize hé mohól ot nó góle, zeéne ítara nafak ói no zagói, bólke Azadir-id or hána hái fare. **29** Hétolla Filat baáre neeli ítarar hére aiccé aar hoór de, “Tuáñra e Manúc cwar ulða kii hosúri ainnó dé?” **30** Ítara yóggwa re zuwabe hoór de, “Zodi íba acámi no óito, ańára íba re tuáñr hañse gosái no ditam.” **31** Filate ítara re hoór de, “Tuáñra íba re loizai tuáñrar córiyot mozin bisar gorógoi.” Hé Yohúdi gúne yóggwa re hoór de, “Ańára ttu honókiyo re zane marifélaibar ezazot náí.” **32** Híyan etollá óiye, zeéne Isár oh hotá fura ó, ziyán íba ye íba hondilla mora moribó de híyan or icáraye hoóil. **33** Tarfore Filat abar razmohól or bútoire góille, aar Isá re matai hoór de, “Tuñí Yohúdir Baáñcca niki?” **34** Isá ye yóggwa re zuwab der

de, “Tuñí hotá yían nizor torfóttu hoór de né, náki ar honókiye tuáñre Añr baabute hoíyí dé?” **35** Filate zuwab der de, “Añí Yohúdi niki? Tuáñr nizor koume edde doóñr imam múne éna Tuáñre añr hañse gosáidiye. Tuñí kii goijjó dé?” **36** Isá ye zuwab der de, “Añr raijjo e duniyair no. Zodi Añr raijjo e duniyair óito, Añr gulam ókkole maramari goittó, zeéne Añré Yohúdi ókkol or hañse gosáidiya no zah. Montor Añr raijjo toh eríyar no.” **37** Híyan olla Filate íba re hoór de, “Tóoile Tuñí baáñcca níki?” Isá ye zuwab der de, “Tuñí sóiyi hoór, Añí baáñcca. Aní etollá zormo óiyi aar etollá duniyait aiccí, kiyólla-hoilé: sóiyir uzu gobá dí bolla. Zee niki sóiyir, yóggwa ye Añr hotá fúne.” **38** Filate Isá re hoór de, “Sóiyi kii?” Híyan hoói baade yóggwa abar baáre neeli Yohúdi gún or hére aiccé, aar ítara re hoór de, “Añí íba ttu honó hosúri no fair. **39** “Lekin tuáñra ttu toh ekkán niyom asé, ki hoilé, Azadir-id or októť añr ttu tuáñrar hañse honó ek hodi re hálas gorídiyar zorur. Hétolla tuáñra ttu ańré Yohúdir Baáñcca wa re hálas gorídiya baitó monehoór né?” **40** Hétunot ítara beggúne abar guzori hoór de, “Hé Manúc cwa re no, bólke Bárabba rel!” Hé Bárabba ézzon bagi accíl.

19 Baade Filate Isá re loizai soóñk mara baáil. **2** Aar fóous ókkole keñrar eggwá tas banai íbar matát diyaidil, aar íba re bayoinna rong or eggwá zubba fiñdáidil. **3** Tarfore ítara íbar hañse aái-aái hoór de, “Ó Yohúdir Baáñcca, márhaba!” Héen hoói-hoói ítara íba re suwar maijjé. **4** Filat abar baáre neeli aái Yohúdi gún ore hoór de, “Soó, ańí íba re baáre tuáñrar hañse anáir, zeéne tuáñra zano de, ańí íba ttu honó hosúri no fair.” **5** Tarfore keñrar tas edde bayoinna rong or zubba fiñdá hálote Isá baáre aiccé. Aar Filate ítara re hoór de, “Soó hé Manúc cwa!” **6** Zeñtté doóñr imam múne edde faáradar gúne íba re deikké, ítara guzori-guzori hoór de, “Kúruc ot difélo, íbá re kúruc ot difelo!” Filate ítara re hoór de, “Añí toh íbá ttu honó hosúri no fair, hétolla íbá re tuáñra loizai kúruc ot dógoi.” **7** Yohúdi gúne yóggwa re zuwab der de, “Ańára ttu ekkán córiyot asé, aar hé córiyot mozin íbá ttu morar zorur, kiyólla-hoilé íbá ye Nizoré Nize Allar Fua dabi goijjé.” **8** Zeñtté Filate hotá híyan fúinne, yóggwa aró dooraigiyói, **9** aar razmohól or bútoire abar góli Isá re hoór de, “Tuñí hoíyar?” Montor Isá ye yóggwa re honó

zuwab nó déh. 10 Hétolla Filate Íba re hoór de, zeéne pak-kalam or yían fura ó, “Ítarar bútoré
 “Tuñí añr llói hotá no hoibá níki? Tuñí kí no añr hoor ore borat goijjé, aar ítara añr hoor olla
 zano, añr ttu Tuáñre eridibar óu kémota asé loṭári maijjé.” Fóous súne héndilla híin hétolla
 deh, aar kúruc ot díbar óu kémota asé dé?” 11 Isá goijjé deh. 25 Isár kúruc or ḍáke íbar maa, íbar
 ye yóggwa re zuwab der de, “Zodi tuáñre uottú Maar bóin, aar Klopas or bou Moriyam edde
 kémota diiya no zayto, tooile Añr uore tuáñr Moriyam Makdálíni týai accíl. 26 Zeñtté Isá ye
 honó kémota no tákito. Hétolla zee niki Añré Nizor maa re edde Nize ador goittó de cárit twa
 tuáñr hañse gosáidiye ítar guná aro ḍoóñr.” 12 re ḍáke týaiya deikké, Íba ye maa re hoór de, “Ó
 Hé októṭ lóti Filate Isá re eridibar kucíc goijjíl, maa, soó tuáñr fua óilde ibá.” 27 Baade hé cárit
 montor Yohúdi gúne guzori-guzori howát accíl twa re hoór de, “Soó, tuáñr maa óilde ibáh.”
 de, “Tuñí zodi e Manúc cwa re erido, tooile Hénitte lóti hé cárit twa ye híba re yóggwar
 tuñí Káisar or dustó no. Zee niki nizoré nize nizor góṭ ot loigílgoi. 28 Yárbaade, Isá ye hárr
 baáñcca dabi goré, íte toh Káisar or duccon.” kessú goijjá óigiyoi de híyan hoi fari, pak-kalam
 13 Hétolla, zeñtté Filate híyan fúinne, yóggwa fura ói bolla hoór de, “Añr ttu tirác laiggé.” 29
 ye Isá re baáre ainné, baade ze zaga gán ore Hé zagat eggwá sírkar tára buágaraiya accíl;
 Fattór-or-Uṙán hoó, aar Hibré zuban ot Gabbata ítará híbat ekkán esfónj burai yore hísoṭ-gas or
 bouli hoó, híyan ot bisar or toktót boiccé. 14 eggwá déeilar matát bazáidi Isár gal ot diiyé. 30
 Hé din nwá accíl Azadir-id or toiyarir din, aar Zeñtté Isá ttu hé sírka háiya óiye, Íba ye hoór
 héñtte din or duúñijja ánik óiye. Filate Yohúdi de, “Goijjá óigiyoi.” Tarfore matá re hémmikka
 gún ore hoór de, “Soó, tuáñrar Baáñcca!” 15 gorí íbar foran difélaiye. 31 Hé din nwá zettót
 Montor ítara guzori-guzori hoór de, “Dur goró, ebaadot-or-din or toiyarir din accíl, ebaadot-
 dur goró, Ibá re kúruc ot dífelol!” Filate ítara ttu or-din kúruc ot honó lac no táke fán Yohúdi
 fusár gorér de, “Tuáñrar Baáñcca re añ kúruc ókkole Filat ore aros goijjé de, zetará kúruc ot
 ot dífelaitam?” ḍoóñr imam ókkole zuwab der asé ítarar téng gún bāñgidi ítarar lac lamaifélai
 de, “Añára ttu Káisar bade ar honó baáñcca bolla, kiyólla-hoilé ebaadot-or-din nwá háas
 náí.” 16 Tói kúruc ot dí marifélai bolla Filate accíl. 32 Tói fóous ókkol aái, Isár fúañti kúruc ot
 Isá re ítarar hañse gosáidiye. Baade ítara Isá díya gýl de ítarar téng gún bāñgidil, age ezzon
 re loigiyégoi. 17 Isá ye Nizor kúruc Nize hañd or, baade ar ezzon or. 33 Lekin zeñtté ítara Isár
 ot looi baáre Matár-Mala hoó de zaga foijjonto ínyot aái Íba morigiyói de deikké, ítara íbar
 loigiyé, ziyán ore Hibré zuban ot Golgota bouli téng nó bāñge. 34 Montor eggwá fóouse Isár
 hoó. 18 Hére ítara Íba re edde íbar fúañti ar gaar ḍák bay sél maijjé, aar éhon héntu lou
 dui zon manúc ore kúruc ot díye, ezzon ore edde faní neeliaicíl. 35 Nizor suké deikké de
 ek kultú ek kultú, aar Isá re mazé. 19 Filate yóggwa ye beh híyan gobá díye, aar yóggwar
 ekkán sáainbút óu lekí Isár kúruc ot maridíl. gobá sóiyi; yóggwa ye zane de yóggwa sóiyi gán
 Híyan ot leikkíl de: Isá Nasári, Yohúdi ókkol or hoór de, zeéne tuáñra yó ekin goró. 36 Híin
 Baáñcca. 20 Boóut Yohúdi ókkole hé sáainbút etollá óiye, zeéne pak-kalam or yían fura ó,
 tán foijjíl, kiyólla-hoilé ze zaga gán ot Isá re “Íbar ekkán áñḍdi úddwa bāñga no zaybo.” 37
 kúruc ot díyl híyan cóor or ḍáke; aar sáainbút Pak-kalam ot yían óu asé, “Ítará zibá re gañitté
 tán Hibré, Girík edde Leṭín zuban ot leikkíl. 21 Íbar híkka ítara saái tákibo.” 38 Híin baade,
 Híyan deká Yohúdir ḍoóñr imam múne Filat ore Aramátíya cóor or Yusúfe Isár lac loizaitói
 hoiyé de, “Yohúdi ókkol or Baáñcca” no lekíyo, Filat ottu ezazot maiggíl. Yusúf accíl de Isár
 bólke endilla lekó, “Íbá ye hoitó de, Añí óilam de ézzon lukaiya ummot, kiyólla-hoilé yóggwa ye
 Yohúdi ókkol or Baáñcca.” 22 Filate zuwab diyé Yohúdir neta ókkol ore ḍooraitó. Filat or ezazot
 de, “Añí leikkí de híyan añí leikkí.” 23 Fóous fai yore yóggwa aái Isár lac loigiyégoi. 39 Fúañti
 ókkole Isá re kúruc ot dí baade, ítara íbar uoror Nikódemas zee niki age raitta Isár hére gífl,
 hoor kúli looi sair bák goijjé, ek fóous olla ek yóggwa yó aiccé; yóggwa ye mur añtor edde
 bák or dóre; ítara íbar zubba wa yó loiyé. Hé alóh-gas miyái banaiya tiríc tin cér ánik kúcbor
 zubba wa honó zuradiya sára, aar uottú lóti guri ainníl. 40 Tarfore ítara Isár lac cwa loizai
 nise foijjonto ek hoor. 24 Ítará ezzon ore ezzone kúcbó gún dii fúñtar hoor lói hohón solaiyé,
 hoór de, “Añára e zubba wa no fári, bólke loṭári zendilla Yohúdi ókkol ottu dohón gorár niyom
 mari saái yibá har hére fore.” Híyan etollá óiye, asé. 41 Ze zagat Isá re kúruc ot díyl hére ekkán

bagan accíl, aar hé bagan ot eggwá noya hobor accíl, zibát honódin honókiyo re dohón goráil de náí. **42** Hé din nwá Yohúdir ebaadot-or-din or toiyarir din ísafe, hé hobor gwá zettót ðáke, ítara Isá re yíbat dohón gorífelaiye.

20 Háftar foóila din fózor októót andár tákite, Moriyam Makdálíni hobor gwat giyyé, aar deikké de, hobor or muk ottu cíl lan larífelaiya. **2** Hétunot híba duñri Sáimon Fitor edde oinno cárit zibá re Isá ye muhábbot goittó, ítara hére giyyé, zai ítara re hoór de, “Maincé Malik ore hobor ottu loigiyégoi; ítara íba re hoře ejjégoi anára no zani.” **3** Hétunot Fitor edde hé oinno cárit twa neeli hobor ot zaat doijje. **4** Ítara duní zon ekkú fúañti duñrat accíl, montor oinno cárit twa Fitor ore bárai zai hobor ot age foónicce. **5** Yóggwa ye niyúri bútermíkka saiye rár, hohón or hoor gún asé de deikké, montor yóggwa bútoe nó zah. **6** Tarfore Sáimon Fitor óu yóggwar fisé-fisé aái foónicce, aar hobor gwar bútoe goílle; yóggwa ye yó hohón or hoor gún asé de deikké, **7** aar ze hoor gán Isár matát beráidil híyan hohón or hoor or fúañti náí, bólke alok gori ekkán ot boittá. **8** Hétunot ze oinno cárit twa hobor ot age foóniccil, yóggwa yó bútoe goílle, aar deki bíccác goijjíl. **9** Kiyólla-hoilé hétun foijjonto toh ítara Isá ttu mora ttu zinda ówar zorur de pak-kalam or hé hotá nó buzé. **10** Tarfore hé cárit tun nizor gór ot waafes giyyégoi. **11** Lekin Moriyam hobor or baárkule tíyai hañdat accíl; híba hañdi-hañdi niyúri hobor gwar bútermíkka saiye, **12** aar deikké de, Isár lac ziyóñt raká gíyl híyoñt dóla hoor findá duwá fírista boói táikke, eggwá cítan ottu, ar eggwá foitán ottu. **13** Híine híba re hoór de, “Ó Mayafua, tui hañdoór kiyá?” Híba ye híin ore hoór de, “Maincé añr Malik ore loigiyégoi; ítara íba re hoře ejjégoi añr no zani.” **14** Híyan hoói baade híba ye físsá fíri deké de, Isá tíyaiya; montor íba Isá de híyan híba ye nó siné. **15** Isá ye híba re hoór de, “Ó mayafua, tui hañdoór kiyá? Tui haré tuwoór dé?” Moriyame Isá re bagan sóoñloya bouli táari íba re hoór de, “Jonáb, íba re zodi tuñf loigiyó de óile, íba re hoře ejjégoi de añré hoó, añr íba re loizayúmboi.” **16** Isá ye híba re hoór de, “Moriya!” Moriyame fíri Hibrí zubane íba re hoór de, “Rabbúni!” ziyán or maáni, Ustat. **17** Isá ye híba re hoór de, “Añré dóri no rakíc, kiyólla-hoilé Añr toh aijjó uore Baf or hére nó zaigói; bólke Añr báiyain nún

or hére zai hoógoi de, ‘Zibá Añr edde tuáñrar Baf, zibá Añr edde tuáñrar Alla, Añr uore íbar hére beh zairgói.” **18** Tói Moriyam Makdálíni aái cárit tun ore zanaíye de, híba ye Malik ore deikké, aar híba re hotá híin íba ye hoíye deh. **19** Hé din or, yáni háftar foóila din or háñzinna, zeñtté Yohúdi ókkol or ðoore cárit tun zeré zoma ói táikke hériyar duwar ókkol bañdá accíl, Isá aái ítara mazé tíyaiye, aar ítara re hoór de, “Assalamu alaikum.” **20** Híyan hoói baade, íba ye ítara re íbar duní át edde íbar gaar ðák daháíye. Cárit tune Malik ore deki bíci kúci óíye. **21** Isá ye ítara re abar hoór de, “Assalamu alaikum. Bafe zendilla Añré diferáíye, héndilla Añr yó tuáñra re diferáir.” **22** Híyan hoói, íba ye ítara uore fúu dí hoór de, “Pak-Ruh loo. **23** Tuáñra zetarár guná maf goríba, ítara guná maf óibo; aar zetarár guná maf no goríba, ítara guná maf no óibo.” **24** Montor Tómas, zibá baró zon cárit tun ottu ezzon, zibá re Zooñikka ðake, yóggwa Isá aiccíl de héñtte ítara fúañti nu accíl. **25** Hétolla oinno cárit tune yóggwa re hoór de, “Añára Malik ore deikkí.” Montor yóggwa ye ítara re hoór de, “Zetún añr íbar duní át ot zoloir dak nó deki aar zoloir zaga híyan ot añr ooñl gólai nó dí edde íbar ðák ot añr át gólai dí nó saái, hétun añr bíccác no goijjúm.” **26** Yár añcto din baade, íbar cárit tun abar gór or bútoe zoma óíye, aar Tómas óu ítara fúañti accíl. Duwar ókkol bañdá de óile yo, Isá aái ítara mazé tíyaiye, aar hoór de, “Assalamu alaikum.” **27** Baade íba ye Tómas ore hoór de, “Tor ooñl eré an, aar Añr át saá; tor át Añr ðák ot gólaide. Nabiccác no goríc, bólke bíccác gór.” **28** Tómase zuwabe íba re hoór de, “Ó añr Malik, añr Alla!” **29** Isá ye yóggwa re hoór de, “Tómas, tui toh Añré deikkós de hétolla éna iman ainnós. Mubarek uitará zetará Añré no deki ye toóu iman ané.” **30** Becók, Isá ye Nizor cárit tun or muúntu aró boóut keramat ókkol goijjíl, zíin ore e síyarat leká nó zah; **31** montor iín ore etollá leká gíyeh zeéne tuáñra iman anó de, Isá óilde Mosih, Allar Fua; aar héndilla iman aní tuáñra zen íbar name zindigi hásil goró.

21 Yárbaade, Tibiriyas Díir hañsat Isá ye abar Nizoré cárit tun or hañse daháíye. íba ye Nizoré daháíye de endilla gori: **2** Sáimon Fitor, Zooñikka ðake de Tómas, Galil or Kána farar Natanel, Zebedair fuain, edde íbar ar dui zon cárit ekkán ot accíl. **3** Sáimon Fitore ítara re

hoór de, “Añí mas saitó zair.” Ítara íba re hoór de, “Tuáñr fúañti añára yó zaiyum.” Tóí ítara neeli zai noow ot uittégoi, montor hé raitta ítara honó mas nó faa. **4** Bíinna zeñtté fózor fárer, Isá aái díir hañsat tíyai táikke, montor cárit tune íba Isá de nó siné. **5** Isá ye ítara re hoór de, “Fuain, hái bolla honó mas faiyó né?” Ítara zuwab der de, “Nó fai.” **6** Íba ye ítara re hoór de, “Noowr den dák ottu zal félo, kessú mas faiba.” Tóí ítara zal félaiye, aar bicí mas foijjé de hétolla ítara zal lan ar țani tulí no farer. **7** Hétolla, Isá ye muhábbot goittó de cárit twa ye Fitor ore hoór de, “Íbá toh Malik!” Sáimon Fitore íba Malik de híyan fúinne rár, nizor gaar uoror hoor gán berái fanít záp maijjé. Íba ye híyan ham gorí bolla kúli eijjíl deh. **8** Ítara kul ottu bicí duré nu accíl, siríf dui cót át ánik beh duré, hétolla oinno cárit tune mas furaiya zal lan țani-țani hé gura noow gán ot góri kul ot aiccé. **9** Tarfore zeñtté ítara kul or uore laimmé, deikké de, eggwá ooin or hoilar țal, yíbar uore mas edde ruți asé. **10** Isá ye ítara re hoór de, “Ehón dóijjo de héntu hooggwá mas anó.” **11** Tóí Sáimon Fitore noow ot urí zal lan țani kul or uore ainné. Zal lan ek cóo fonzaic tin nwá dñoñr mase furaiya, montor hédun de óile yo zal lan nó fáre. **12** Isá ye ítara re hoór de, “Aiyó, hána hóogai.” Cárit ítara honó ezzon ottu hímmote nó dede íba ttu fusár goittó, “Tuñí hon?” Kiyólla-hoilé ítara íba Malik de híyan zainto. **13** Baade Isá aái, ruți looi ítara re diiyé, héndilla, mas óu diiyé. **14** Isá re mora ttu zinda gorázai baade íba ye cárit tun or hañse Nizoré dahá díyl de ebar óilde tisárabar. **15** Aar zeñtté ítara ttu hána háiya óiye, Isá ye Sáimon Fitor ore hoór de, “Yohánnar fua Sáimon, tui Añré itarár túaro muhábbot gorós né?” Íba ye hoór de, “Ói, Malik; Tuñí toh zano, añí Tuáñre ador gorí.” Isá ye íba re hoór de, “Tóoile Añr bérasóol-or-sóo gún sora.” **16** Isá ye íba re dusárabar hoór de, “Yohánnar fua Sáimon, tui Añré muhábbot gorós né?” Íba ye hoór de, “Ói, Malik; Tuñí toh zano, añí Tuáñre ador gorí.” Isá ye íba re hoór de, “Tóoile Añr bérasóol lun ore saásita gór.” **17** Isá ye íba re tisárabar hoór de, “Yohánnar fua Sáimon, tui Añré ador gorós né?” Fitor ebar guccá óigiyoi, kiyólla-hoilé íba ye e tisárabar óu fusár goijjé de, “Tui Añré ador gorós né?” Fitore íba re hoór de, “Malik, Tuñí toh hárr kessú zano; Tuñí zano añí Tuáñre ador gorí deh.” Isá ye íba re hoór de, “Añr bérasóol

lun sora. **18** Añí toré sóiyi-sóiyi hoóir, zeñtté tui juwan acclí, héñtte toh tui nizor keeníl bañdí zeré monehoó hére zaiti; montor zeñtté tui burá óibi, héñtte tui tor át țani dibi, aar oinno zone tor keeníl bañdí tor ttu zeré mone no hoó hére toré loizabó.” **19** Allar mohíma zahér ói bolla Fitor hondilla moote moribó de híyan buzái bolla beh Isá ye hé hotá hoiyé. Híyan hoói baade Isá ye íba re hoór de, “Añr fuñde-fuñde ai.” **20** Fitore fissá firi deké de, Isá ye muhábbot goré de cárit twa fuñde-fuñde aiyér, yóggwa óilde ubá zee niki hána háibarcot Isár gaat élandi fusár goijjíl de, “Malik, Tuáñre dóridibo de íba hon?” **21** Yóggwa re deká Fitore Isá re hoór de, “Malik, manúc ubár hálót kii óibo?” **22** Isá ye Fitor ore hoór de, “Zodi Añr ttu monehoó, Añí waafes nú aiyí foijjonto íba basi tákouk, tóoile híyan tor loi kii bazá? Tui Añr fuñde-fuñde ai.” **23** Hétolla bóuli imandár báiyain dor búture fóligiyoi de, hé cárit twa no moribó. Lekin Isá ye yóggwa no moribó bóuli nó hoó, bólke siríf hoiyé de, “Zodi Añr ttu monehoó, Añí waafes nú aiyí foijjonto íba basi tákouk, tóoile híyan tor loi kii bazá?” **24** Hé cárit twa óilde íbá zee niki edún iín beggún or gobá der, edde iín leikké. Añára zani, yóggwar gobá sóiyi. **25** Isá ye aró boóut kessú goijjé de asé, zodi híin ore ekkán-ekkán góri leká zayto, tóoile añr kíyal mozin, odún kitab leká zayto, zíin fura duniyait úddwa nu añritó.

Hamól

1 Ó jonáb Tiyofílas, añr agor kitab ot añí uúin beggún or baabute beh leikkí, zín Isá ye cúru ttu lóti goijjíl edde taalim dýl, **2** oh din foijjonto ze din íba re asman ot tulífela gíyeh. Zaiabar age íba ye Nizor basíloiya sáhabi gún ore Pak-Ruhr duara hédaiyot ókkol dífl. **3** Íba ye duk fai baade ítarar hañse Nizoré zahér goijjíl, aar íba zinda asé de híyan biccác gorá zah de héndilla boóut sábut ókkol dífl. Íba ye ítara re salic din foijjonto dahá dídi Allar raijor baabute howát accíl. **4** Ítarar fúañti tákite, íba ye ítara re e hókum man dýl, “Tuáñra Jerúsalem sári no zaiyogói, bólke Baf or waada goijjá hádiyar entezar goró, ziyán or baabute tuáñra Añr ttu fúinno. **5** Kiyólla-hoilé Yaháya ye toh fanít éna bápťisma díye, montor jaar hooddin or bútoze tuáñra re Pak-Ruh lói bápťisma díya zaybo.” **6** Hétolla zeñtté ítara ekkán ot zoma óiye, ítara Isá ttu fusár gorér de, “Malik, Tuñí e októ Boni Isráil ore raijjo waafes loidiba niki?” **7** Íba ye ítara re zuwab der de, “Ze októ edde tarík Bafe Nizor adíkare ńk gorí raikké, híin zanon tuáñrar ham no. **8** Montor zeñtté tuáñrar uore Pak-Ruh aibó, tuáñra bol faiba; aar Jerúsalem ot, Yohúdiyar edde Samáriar agagurat, edde duniyair céc matá foijjonto tuáñra Añr gobá óiba.” **9** Híin hoói baade, ítarar suk or muúntu íba re tulífela gíyeh, aar ekkán miyúla ye íba re ítarar nozor ottu argwal gorífelaiye. **10** Íba zaargói de híyala ítara asman or uzu suk lagaidi saái táikke de októ, asimbit dui zon dóla hoor findá manúc ítarar dák ottu tíyaiye, **11** aar hoór de, “Ó Galil or manúc ókkol, tuáñra tíyai asman or uzu kiyá saái táikko? E Isá, zibá re tuáñrar hañsóttu asman ot tulífela gíyeh, íba zendilla gori asman ot zaargói de deikkó héndilla góri waafes aibó.” **12** Yárbaade, sáhabi gún Zaitun Faár hoó de yíba ttu Jerúsalem ot waafes gíiyégói. Hé faár gwá cóor ottu tokoriban adá mail duré accíl. **13** Ítara cóor ot foónsi uoror ńalar kamárat gíiyé, zeré ítara tákito. Ítara óilde: Fitor, Yohánna, Yakub, Enderiyas, Filíp, Tómas, Bartólomiyo, Moti, Alfáiyas or fua Yakub, Sáimon zibá ézzon Zélot, edde Yakub or fua Yohúdah. **14** Ítara beggúne Isár maa Moriyam, oinno hoozzon mayafuain, edde Isár báiyain dor fúañti ek mone nitti dua goittó. **15** Hé din ókkol ot zeñtté tokoriban ek-có kuri zon imandár zoma óiye, Fitor urí

ítara re hoór de, **16** “Báiboináin ókkol, Isá re gereftar-goróya ókkol or foñt daháidoya accíl de Yohúdahr baabute Pak-Ruh ye Dawud or duara hoóil de pak-kalam or hotá híin fura ówar zorur accíl. **17** Kiyólla-hoilé íte toh añárar daái or accíl, aar íte e ham goríbar híssa faáil.” **18** Manúc íte nizor kuham or dam loi ekkán zobin kinné, aar hére íte matá hémmikka góri fori ítar feť fári yore añtigíla beggún neeligiyói. **19** Híyan Jerúsalem or manúc beggúne fúinne, hétolla zaga híyan ore ítarar zuban ot Akeldama nam díyé, ziyán or maáni óilde, Lou wor Zobin. **20** Fitor hotá howá zari raikkíl, “Híyan or baabute Zobur Córif ot endilla leikká asé, ‘Ítar bíra háli óizoggoi, honókiye híyan ot no tákouk.’ Aró leikká asé, ‘Ítar zimmadari ar ezzone loifelouk.’” **21** Hétolla, añára ttu ar ezzon manúc ore gobá ísafe basílowar zorur. Íba endilla manúc ottu ówa foribó zetará hárr októ añárar fúañti-fúañti sofór gorát accíl, oñtté zeñtté Malik Isá añárar fúañti accíl. **22** Yáni zetará Yaháyar bápťisma ttu lóti cúru gorí Isá re añárar hañsóttu tulífela gíyeh de októ foijjonto accíl, ítara ttu ekzon manúc añárar fúañti gobá bona foribó, Isá mora ttu zinda óiye de híyan or gobá dí bolla.” **23** Tói ítara dui zon manúc or baabute mocuwara díyé, ezzon óilde Yusúf, zibá re Barsába ńake, íba re Yustus óu ńakitó; aar ar ezzon óilde Mattíyas. **24** Baade ítara dua gorér de, “Ó Malik, Tuñí toh hárr ekzon or dil zano. Tuñí añára re dahó, Tuñí ítará dui zon ottu haré basíloiyó, **25** zeéne yóggwa ye sáhabiham gorí fare, ze ham Yohúdah ye eri zaga waán ot gíiyégói ziyán ot íte zaiabar laayek accíl.” **26** Baade ítara tará lla lońári maijje rár, Mattíyas or name lońári foijjíl; tói yóggwa re egaro zon sáhabi gún ot cámil gorá gíyeh.

2 Zeñtté Pentikos id or din aiccé, ítara beggún ek zagat zoma accíl. **2** Aar asimbit asman ottu doónr tuwán or dóilla góri eggwá abas aiccé, aar ítara ze góe ot boírá accíl híyan hé abase bórigiyégói. **3** Ítara ooin or zilhar dóilla kessú deikké, ziyán zir or súrot. Híyan bák-bák ói ítara fottí ekzon or uore boicccé. **4** Ítara beggún Pak-Ruh lói furaiya óiye, aar hé Ruhr diiya toófuke alok-alok zubane hotá howát doijje. **5** Héñtte duniyair hárr dec or dindár Yohúdi ókkol Jerúsalem ot tákito. **6** Zeñtté hé abas swá fúna gíyeh, manúc ókkol ekkán ot zoma óigiyoi, aar tarár nizor-nizor zubane

imandár ókkole hotá hoór de fúni, tará buddí háraiya óigilgoi. 7 Tará ammúk edde taajup ói hoór de, “Soó, hotá hoór de ítara beggún Galil or manúc de nó né? 8 Tóí añára fottíkiye kiyá ítara añárar maayi zubane hotá hoór de fúnir? 9 Añára toh Partiyi, Mediyi, edde Elami ókkol, aar Mesopótomyar, Yohúdiyar, Kappadókiyar, Pontus or, edde Eciyar báciainda ókkol, 10 aró, Fergiyar, Pampúliyar, Ijíp or, edde Kurenir dákör Liñbiyar atehañsór báciinda ókkol. Aar Rom ottu yó hodún así. 11 Eré Yohúdi ókkol óu asé aar Yohúdir dórmot faráiy de Beyohúdi ókkol óu asé. Héndilla, Kereti edde Arob koum óu asé. Añára beggúne de ítara añárar nizor-nizor zubane Allar bicí ðoóñr-ðoóñr harhána ókkol or baabute hoór de fúnir!” 12 Tará beggún ammúk edde buddí háraiya ói ezzon ore ezzone hoór de, “lín kiyólla óitofare?” 13 Montor hodúne técerai hoór de, “Itará córab hái tuúl óigiyoi deh!” 14 Montor Fitore baki egaro zon sáhabi gún lói tíyai guzori-guzori manúc ókkol ore boiyan gorér de, “Ó Yohúdiyar manúc edde Jerúsalem ot táko de tamám manúc ókkol, híyan añí tuáñra re buzái díh; añr hotá gún díyan dí fúno. 15 Tuáñra țaaror de héndilla itará nicá hái tuúl óiye de no, kiyólla-hoilé aijjó toh biñnar now wa éna baijje. 16 Bólke yían óilde waán, ziyán nobi Yoél or áta howá gýl, ki hoilé 17 ‘Alla ye fórmor de, Añí ahéri zobatan endilla goijjúm: Añí Añr Ruh fottí insán or uore dálidiyum. Tuáñrar morotfuain de edde zérfuain de Añr kalam boiyan goríbo, tuáñrar juwan maincé dorcón dekiño, aar tuáñrar burá maincé cóppon dekiño. 18 Añr gulam edde bañdi ókkol or uore yó hé din ókkol ot Añr Ruh dálidiyum, aar ítara Añr kalam boiyan goríbo. 19 Aar Añí uore asman ot taajuippa harhána ókkol daháiyum, aar nise zobin ot illayi-nicán ókkol daháiyum. Yáni lou, ooin edde dúañr miyúla ókkol daháiyum. 20 Mabud or hé ðoóñr edde mohíma ola din aibár age, beil andár óizayboi, aar san lou wór ðóilla óizayboi. 21 Aar eén óibo, zee niki Mabud or nam loibo, íte nejat faibo.’ 22 “Ó Boni Isráil ókkol, hotá iín fúno: Isá Nasári, Zibár duara Alla ye tuáñrar hañse keramot, taajuippa harhána edde illayi-nicán ókkol dahái sábut goijje de, íba óilde Allar torfóttu; tuáñra nize toh híyan zano. 23 Alla, zibá ye muúmor hálót zane, íba ye age lóti fáisela goijje de, Isá re tuáñrar át ot gosáidi bolla. Aar tuáñra toh íba re bedini ókkol or áta kúruc ot dí mariféla báila. 24 Montor

Alla ye íba re moot or duk ottu azad gorí abar zinda goijje, kiyólla-hoilé moote íba re nizor kobzat rakí nó fare. 25 Íbar baabute Dawude toh endilla hoóil, ki hoilé, ‘Añí Malik ore añr muúntu hámica dekiñtam, kiyólla-hoilé íba añr den dák ottu asé, zeéne añí no hafi. 26 Hétolla añr dil kúci óiye, aar añr zire kúcir hotá hoór. Añr gaar haiya yó acáye basi tákibo, 27 kiyólla-hoilé Tuñí añr ruh re fatalfur ot félai no rakíba, aar Tuñí Tuáñr Pakzon or gaar haiya re foñsitó no diba. (Hadēs g86) 28 Tuñí añré zindigir rasta daháiyó; Tuñí añré Tuáñr házirí lói furafuri kúci goríba.’ 29 “Báiyain, añí tuáñra re bafdadada Dawud or baabute sáf-sáf góri hoói faijjum de ki, íba morigiyói, aar íba re dohón gorífela gýl; íbar hobor aijjó foiijjonto añárar fúañti eré asé. 30 Íba toh éggwa nobi accíl; íba ye zainto de, Alla ye hosóm hái íba llói waada goijjíl de ki, íbar nosól ottu ekzon ore íbar toktót buágaraibo. 31 Muúntu kii óibo de híyan deki fari íba ye Mosih zinda ówar baabute endilla hoiyé, ‘Íba re no fatalfur ot félaidiya gýeh, aar no íbar haiya foñiccé.’ (Hadēs g86) 32 Alla ye hé Isá re zinda goijje, añára beggún híyan or gobá así. 33 Hétolla íba re Allar den dák ottu boibár tokka diiya gýeh, aar íba ye Baf or torfóttu waada goijjá Pak-Ruh faail; yala tuáñra ziín dekiñ edde fúnor híin íba ye dálidiye deh. 34 Kiyólla-hoilé Dawud nize toh asman ot nó uré, montor toóu íba nize hoiyé de, ‘Mabude añr Malik ore hoór de, Añr den dák ottu boiyó, 35 zetukkún foiijjonto Añí Tuáñr ducon ókkol ore Tuáñr foor tole gorí nó felai.’ 36 “Hétolla tamám Boni Isráil ókkole yían fakkagori zanilo de ki, tuáñra kúruc ot dí marifélaila de hé Isá re Alla ye Malik edde Mosih banaiyé.” 37 Híyan fúni manúc ókkol ottu dil ot sél maijje fán laiggé; ítara Fitor ore edde oinno sáhabi gún ore hoór de, “Báiyain, añára kii goittám?” 38 Fitore ítara re zuwab der de, “Tuáñra fottíkiye touwá goró, aar gunár maf fai bolla Isá Mosihr name bápťisma loh; tói tuáñra hádiya ísafe Pak-Ruh faiba. 39 Kiyólla-hoilé hé waada toh tuáñra lla, tuáñrar fuain dor lla, edde zetará duré asé ítara lla—zetó zon ore añárar Mabud Alla ye Nizor híkka ðakibó.” 40 Fitore ítara re aró boóut hotá ókkol hoói nosíyot goijjíl, aar aros gorér de, “E zobanar báañra manúc ókkol ottu nizoré basai rakíyo.” 41 Zedúne íbar boiyan kobul goijje, ítara bápťisma loiyé; hé din ítarar dol ot tokoriban tin ázar manúc cámil gorá gýl.

42 Tará sáhabi gún ottu hámica taalim fúinto, ar ílara llói bǝng góri ruṭi háito edde dua goittó. 43 Manúc beggúne ḍooraitó, kiyólla-hoilé sáhabi gúne boóut taajuippa harhána ókkol edde illayinican ókkol daháito. 44 Tamám imandár ókkol ek zagat tákito, aar hárr kessú milizúli estemal goittó. 45 Ílara nizer malsámana edde dón-cómbotti ókkol besi yore fottí zon ore zorurot mozin baridito. 46 Aar fottí din baitul-mukaddos ot ekku fúaṇti zoma óito, aar góre-góre ruṭi báṅgi kúci sáañte edde dil or ehélase hána háito. 47 Ílara Allar taarif gorát tákito, aar manúc beggún lói boni tákito. Zará nejat faito, tará re malike fottí din ítarar dol ot cámil goittó.

3 Ek din Fitor edde Yohánna duar októ, yáni tin nwá báze, uore baitul-mukaddos ot zaar. 2 Hére ézzon zormo ttu lóti leng manúc ore maincé baitul-mukaddos or Cúndor nam or dorozat aní fottí din buágarai rakito, zeéne yóggwa ye baitul-mukaddos ot góle de ílara ttu hórat magi fare. 3 Yóggwa ye zeñtté Fitor edde Yohánna re baitul-mukaddos or bútoze góler de deikké, yóggwa ye ílara ttu hórat maiggé. 4 Fitor edde Yohánna ye yóggwar uzu díyan dóri saái hoór de, “Añárar híkka soól!” 5 Hétunot yóggwa ye ílara ttu kessú faibar acáye ítarar uzu díyan dóri saái táikkil. 6 Montor Fitore yóggwa re hoór de, “Añr ttu toh cúna-cañdi náí, montor ziyán asé híyan tuáñre diir. Nasári Isá Mosihr name urí añño!” 7 Baade íba ye yóggwar den át tan dóri yóggwa re tuillé, aar éhon or bútoze yóggwar ténge edde sulgirá ye bol faiyé. 8 Yóggwa fál mari tíyái aññat doijje, aar aññi-aññi edde fál mari-mari Allar taarif gorí-gorí ítarar fúaṇti baitul-mukaddos ot góillegoi. 9 Tamám manúc ókkole yóggwa aññer de edde Allar taarif gorér de deki, 10 zani faijjé de, yóggwa óilde ubá zibá ye baitul-mukaddos or Cúndor nam or dorozat boói hórat magitó. Yóggwar uore ziyán óiye híyan deki ílara bici taajup edde ammúk óigiyoi. 11 Yóggwa aijjó foijjonto Fitor edde Yohánnar fisá dóri accíl. Manúc beggúne taajup ói ítarar ínyot duñri giiyé, ze zaga gán ore Sóloman or baanda hoó. 12 Híyan deki Fitore manúc ókkol ore hoór de, “Ó Boni Isráil ókkol, tuáñra yían or uore taajup kiyá óiyo? Añára yoggwá re añárar taakote yáh dindáriye aññair fángori kiyá tuáñra añárar híkka suk ḍoónr gorí saái táikko?” 13 Ibrahím or,

Isahák or, edde Yakub or Alla ye, yáni añárar bafḍada ókkol or Alla ye íbar Gulam Isá re mohíma diiyé. Tuáñra de íba re marifélai bolla dóri díla, aar Filate íba re eridi bolla fáisela gorí baade yo tuáñra yóggwar muuntu íba re inkar goijjila. 14 Tuáñra hé Pak edde Insáfala wa re inkar gorí ezzon kúnire tuáñrar hañse eridi bolla aros goijjila. 15 Tuáñra zindigir Malik ore marifélaila, lekin Alla ye íba re mora ttu zinda goijjé. Añára híyan or gobá así. 16 Isár nam or uore iman ainné de hétolla e manúc cwa ye bol faiyé, zibá re tuáñra dekor aar sinó. Isár usílaye ze iman aiyé híyane yoggwá re furafuri gom goijjé, zendilla tuáñra dekor. 17 “Yala, ó báiyain, añí zani tuáñra yó tuáñrar sóddar ókkol or dóilla no buzí híyan goijjila. 18 Montor Alla ye híyan lói waán fura goijjé, ziyán íba ye tamám nobi ókkol or muké age lóti boiyan goijjil, ki hoilé, íbar Mosih ye duk faibo. 19 Hétolla touwá goró, aar Allar uzu firo, zeéne tuáñrar guná fuñsífela zah. Tói Mabud or torfóttu foṭfoiṭṭa goríbar októ aibó, 20 aar íba ye Isá re, yáni Mosih re diferaíbo, zibá re tuáñra lla age lóti basílowa gíyeh. 21 Hárr kessú noya gori banaibár októ nú aiyé foijjonto Isá ttu asman ot táka foribó, zendilla Alla ye Nizer pak nobi ókkol or muké boóut age lóti hoóil. (aiñ g165) 22 Muúsa ye hoóil de, “Tuáñrar Mabud Alla ye tuáñrar báiyain dor bútoze tuáñra lla añr dóilla ézzon nobi tulíbo; íba ye tuáñra re zín hoó híin beggún fúna foribó. 23 Aar eén óibo, zee niki hé nobir hotá no fúnibo, ítare Allar Nizer bonda ttu ekkuware dónco gorífela zaybo.” 24 “Becók, Sémuél ottu lóti cúru gorí zedún nobi ókkole kalam hoiiyé, ílara beggúne e din ókkol or baabute yó boiyan goijjil. 25 Tuáñra toh nobi ókkol or edde Alla ye añárar bafḍada ókkol lói ze razinama goijjil híyan or fuain. Alla ye Ibrahím ore hoóil de, “Tor nosól or duara duniyair tamám koum ókkole rahámot faibo.” 26 Hétolla Alla ye Nizer Gulam Isá re basí, agor ttu tuáñrar hañse diferaíye, zeéne íba ye tuáñra fottíkiyo re nizer-nizer burair rasta ttu fírai rahámot dee.”

4 Fitor edde Yohánna ye manúc ókkol ore boiyan gorér de októ, imam ókkol, baitul-mukaddos or sóddar, edde Sadukái ókkol ítarar hére aiccé. 2 Tará bici bezar óiye, kiyólla-hoilé sáhabi gúne maincóre taalim der, aar Isá mora ttu zinda óiye de híyan tobolik gorér. 3 Tói tará

ítara re gereftar gorí tarfor din foijjonto ziyól ot raikkíl, kiyólla-hoilé híyala háñz óigilgoi. 4 Montor boiyan fúinne de héntu boóut zone iman ainñíl, aar imandár ókkol bicí ói tokoriban fañs ázar óiye. 5 Tarfor din, Yohúdir neta ókkol, murubbi ókkol edde alem ókkol Jerúsalem ot zoma óiye. 6 Hére boro imam Hánan accíl, héndilla Káiyafas, Yohánna, edde Alexzendar óu accíl, aar boro imam ókkol or oinno egana-guicci ókkol óu accíl. 7 Tará ítara re mazé tiyagarai fusár gorér de, “Tuáñra ham yán kiyór taakote yáh har name goijjó dé?” 8 Hétunot Fitore Pak-Ruh lói furaiya ói ítara re zuwab der de, “Ó manúc or sóddar ókkol edde murubbi ókkol, 9 añára ek leng manúc ore bálai goijjé de hétolla zettót yóggwa keéne gom óiye hoói añára re zerá gorá zar, 10 tói tuáñra edde tamám Boni Isráil ókkole yán zanilo de ki, Isá Mosih Nasári, zibá re tuáñra kúruc ot dí marifélaila montor Alla ye mora ttu zinda goijjé, íbar name beh e manúc cwa furafuri gom ói eré tuáñrar muúntu tíyai asé. 11 Íba óilde Ubá zibár baabute pak-kalam ot endilla asé, ‘Ze fattór tuáñra mistíri ókkole inkar goijjila, yíba beggún or túaro bicí zoruri fattór óiaicce.’ 12 Nejat ar honókiyor hañse faa no zah, kiyólla-hoilé asman or nise insán ore ar honó nam diiya nó zah ziyán or uslaye añára nejat fai faittam.” 13 Zeñtté tará Fitor edde Yohánnar hímmot deikké, aar ítara be-elómdar edde torbiyot sára manúc de zani faijje, tará ammúk óigiyoi; tarfore tará ót faiyé de, ítara Isár fúañti accíl. 14 Aar ze manúc cwa re gom gorá gíyl, yóggwa re zettót tará Fitor edde Yohánnar fúañti tiyaiya dekér, tará ttu ítarar hélaf hoibár honó hotá nu accíl. 15 Montor ítara re fótuayi-mujilíc ottu baáre neeli zai bolla hókum dí yore tará ezzon loi ezzone biyasana gorát doiije, 16 hoór de, “Añára e manúc itará re lói kii goittám? Kiyólla-hoilé itará ze doóñr keramoti ham goijjé, híyan Jerúsalem or manúc beggúne zane, aar añára toh híyan inkar gorí no faijjum. 17 Montor híyan or baabute maincór bútoe ar no fóle fán, e name honókiyo re ar honó hotá no hoi bolla añára itará re horagori úñciyari díh.” 18 Baade tará ítara re matai hókum díye de, Isár name ar bikkíl kessú no hoitó edde honó taalim no dito. 19 Montor Fitor edde Yohánna ye tará re zuwabe hoór de, “Tuáñra nize fáisela goró, Allar nozor ot hon nán sóiyi, tuáñrar hotá fúna né náki Allar hotá fúna? 20 Kiyólla-hoilé añára zín deikkí edde fúinni híin or baabute howá bon gorí no faijjum.” 21 Tarfore ítara tará re aro dómki ókkol di baade eridifélaiye. Manúc olla bóuli tará ítara re sáñza díbar fáisela gorí nó fare, kiyólla-hoilé ziyán gorá gíyeh híyan or zoriya manúc beggúne Allar taarif gorát accíl. 22 Kiyólla-hoilé ze manúc cwar uore gom goré de keramot tan gorá gíyeh, yóggwa ttu salic bosór or túaro bicí boc óiye. 23 Fitor edde Yohánna re eridiyé mottor, ítara nizor sáañti ókkol or hére waafes giyyégoi, aar doóñr imam ókkole edde murubbi ókkole ítara re zín hoiyé híin beggún zanaiyé. 24 Híyan fúni ítara ektofák ói Allar hañse abas tulí dua gorér de, “Ya Malik, asman, zobin, doriya edde híin or bútoe zín asé híin beggún Tuñí éna foida goijjó. 25 Tuñí Tuáñr gulam añárar baf Dawud or muké Pak-Ruhr duara hoóila de, ‘Beyohúdi ókkol kiyá rak óiye? Manúc ókkole behar sail kiyá gorér? 26 Duniyair baáñcca ókkol toiyar óiye, aar hákim ókkol fúañti mili zoma óiye Mabud edde íbar Mosihr ulða.’ 27 Tuáñr pak Gulam Isá, zibá re Tuñí basíloila, íbar ulða Hérude edde Pontiyus Filate Beyohúdi edde Boni Isráil or fúañti e cóor ot zoma óoil, 28 uúin gorí bolla zín óibar fáisela Tuñí age lóti Nizor kudurute edde moncáye gorí raikkíla. 29 Yala, ó Mabud, ítarar dómki re soó, aar Tuáñr gulam ókkol ore endilla toóufik doo de ki, ítara zen furafuri hímmot or sáañte Tuáñr kalam hoói fare. 30 Tuáñr át baró, zeéne Tuáñr pak Gulam Isár name ítara biyaram ókkol gom gorí fare, aar illayi-nicán ókkol edde taajuiippa harhána ókkol dahái fare.” 31 Ítara ttu dua goijjía óiye rár, ítara ze zaga gán ot zoma accíl híyan hafi uitté. Ítara beggún Pak-Ruh lói furaiya óiye, aar hímmot or sáañte Allar kalam howát accíl. 32 Tamám imandár ókkol dile mone ek accíl. Ítara honókiye nizor siz ore nizor bouli dabi no goittó, bólke hárr kessú milizúli estemal goittó. 33 Aar sáhabi gúne Malik Isá mora ttu zinda óiye de híyan or baabute doóñr kudurut or sáañte gobá díyat accíl, aar Allar rahámot ítara beggún or uore ódorbaára accíl. 34 Ítarar bútoe ezzon óu muútac ot nu accíl, kiyólla-hoilé zetará zaga-zobin or yáh gór or girós accíl, ítara híin besi yore tíañ-foicá feito de híin aintó, 35 aar aní yore sáhabi gún or téng or gurat rakító, baade fottíkiyo re zorurot mozin baridiya zayto. 36 Hére Leévir háandan ottu Yusúf nam or ézzon manúc accíl, zibá Sáifrus díyat zormo óoil, zibár nam sáhabi gúne Bárnabas díye ziyán or

torjuma óilde, Josba-dooya. 37 Yóggwa ye nizor zaga ekkán besi, òiañ gún aní sáhabi gún or téng or gurat raikkégai.

5 Lekin Ananiyas nam or ezzon manúce yó nizor bou Safíra llói ekkán zaga beiccé. 2 Yóggwa ye besar dam ottu kessú òiañ nizor lla rakídiye, ziyán or baabute yóggwar bou wé yó furafuri zane, baade argún aní sáhabi gún or téng or gurat raikkégai. 3 Montor Fitore hoór de, “Ananiyas, Cóitane tuáñr dil eéngori kiyá kobza gorífelaiye, zeén níki tuáñre Pak-Ruhr hañse misá hotá howá baiyé, aar zaga besar dam ottu kessú òiañ nizor lla rakídiya baiyé? 4 Zaga híyan besibár age yó kí tuáñr nizor nu accíl né? Aar híyan besi baade yo kí òiañ gún tuáñr át ot nu accíl né? Tuñí e ham gorí bolla kiyá tuáñr dil ot niyot goijjó? Tuñí insán ore misá hotá hoiyó de no, bólke Alla re.” 5 Hotá híin fúni mottor Ananiyas dorógori fori morigiyói. Aar zetará hé hálot tan fúinne ítara beggún bicí ðoorraigiyói. 6 Tarfore juwan fuain ókkol urí aái yóggwar gaat hohón solaiyé, aar baáre loizai dohón gorífelaiye. 7 Tin gónða ánik baade yóggwar bou Safíra bútoore aiccé, montor zín óiye híin híba ye no zane. 8 Fitore híba ttu fusár gorér de, “Añré hoósai, tuñí edde tuáñr hócome zaga gán e dore beicco de né?” Híba ye zuwab der de, “Jii, hé dore beicci deh.” 9 Tói Fitore híba re hoór de, “Mabud or Ruh re entán gorí bolla kiyá tuáñra ezzon loi ezzon razi óiyo? Soó, tuáñr hócom ore dohón gorí aiccé de ítara duwar or ðáke tíyai asé, aar ítara tuáñre yó tulí baáre loizaybói.” 10 Híba éhon or bútoore Fitor or téng ot dorógori fori morigiyói. Aar juwan fuain núne bútoore aái dekér de, híba mora, tói híba re baáre loizai hócom or ðáke góri dohón gorífelaiye. 11 Hétolla fura zomát ot edde zetará híin fúinne ítara beggún or bútoore ðoor góligiyoi. 12 Sáhabi gúne manúc ókkol or bútoore boóut illayi-nicán edde taajuiippa harhána ókkol daháito, aar imandár ókkol beggún ekkú fúañti Sóloman or baandát zoma óito. 13 Maincé ítara re bicí izzot goittó, montor ítarar dol ot cámil ói bolla ar honókiye hímmot no goittó. 14 Toóu Malik or uore iman ainné de aró boóut mayafuain edde morotfuain loi ítarar dol lagatar barát accíl. 15 Sáhabi gúne gorér de ham or zoriya, manúc ókkole biyaraimma ókkol ore aní rasta-rasta gadir uore edde háit̃tar uore neṛai rakíto, zeéne Fitor hé

boli zailé íbar sába ítara kessú manúc or uore fore. 16 Jerúsalem or atehañsór cóor ókkol ottu yó maincé fúañti biyaraimma edde hóraf jine faiya manúc ókkol ore aintó, aar ítara beggún ore gom gorá zayto. 17 Baade boro imam edde yóggwar sáañti ókkol, zetará Sadukái fírkar manúc, ítara beggún ricé furaiya óigiyoi. 18 Ítara sáhabi gún ore gereftar gorí córkari ziyól ot díye. 19 Montor raitta Mabud or ek fírsta ye ziyól or doroza kúli ítara re baáre neelai aní hoór de, 20 “Zoo, baitul-mukaddos ot tíyai manúc ókkol ore e noya zindigir hotá beggún boiyan gorógoi.” 21 Híyan fúni ítara bíinna sóore baitul-mukaddos ot góli taalim diyat doiije. Boro imame edde yóggwar sáañti ókkole hére foóñsi, fótuayi-mujilíc tíya re mít̃ing gorí bolla ðaikké, yáni Boni Isráil or murubbi beggún ore. Tarfore sáhabi gún ore ziyól ottu tarár hañse aná zay bolla hócum foóñsaiye. 22 Lekin baitul-mukaddos or faáradar ókkol hére aái, sáhabi gún ore ziyól-hánat loot nó faa. Hétolla ítara waafes zai hóbor díye de, 23 “Añára ziyól-hána gán mozbut gorí ðala maiija edde doroza ókkol ot faáradar ókkol tíyai táikka loot faiyí, montor doroza kúilli rár, bútoore honókiyo re loot nó fai.” 24 Híyan fúni baitul-mukaddos or faáradar ókkol or mazí ye edde ðoóñr imam ókkole yaa kii óibo hoi buddí háraiya óigilgoi. 25 Hétunot ezzone aái tará re hoór de, “Soó, ze manúc cún ore tuáñra ziyól ot díla, ítara baitul-mukaddos ot tíyai maincóre taalim der.” 26 Tói hé mazí wa ye faáradar ókkol loizai sáhabi gún ore waafes ainné, lekin bolazuri gorí no, kiyólla-hoilé tará maincé cíl or dola maribó bóuli ðooraaíl. 27 Tará ítara re aní, fótuayi-mujilíc or muúntu tíyagaraiye. Boro imame ítara ttu fusár gorér de, 28 “Añára toh tuáñra re e name taalim no di bolla horagori úñciyari dílam, montor toóu úddwa deh tuáñrar taalim loi Jerúsalem bóraifelaiyo, aar tuáñra añára re e Manúc cwar lou wór hosúrbon ðóoraito soór.” 29 Hétunot Fitore edde oinno sáhabi gúne zuwab der de, “Añára ttu insán or hócum manar túaro Allar hócum manon fóros. 30 Añárar bafɖada ókkol or Alla ye Isá re zinda goijjé, zibá re tuáñra kúruc ot ðaki marifélaila. 31 Íba re Alla ye Sóddar edde Nejatdoya ísafe Nizor den ðák ottu boibár tokka diiyé, zeéne íba ye Isráili ókkol ore touwá goríbar edde guná maf faibar mouka dii fare. 32 Añára nize híin or gobá así aar Pak-Ruh yó asé, zibá re Alla ye uitará re diiyé zetará íbar

hókum ókkol amól goré.” 33 Híyan fúni tará ttu bicí guccá uitté, aar ítara re marifélaite monehoíil. 34 Montor Gamaliel nam or ezzon Féroci zibá Córivot or alem aar manúc beggúne izzot goittó, yóggwa ye fótuayi-mujilíc ot týai hókum díye de, sáhabi gún ore essát olla baáre neelai rakító. 35 Baade yóggwa ye tará re hoór de, “Ó Boni Isráil ókkol, tuáña e manúc itará re ziyán goittó soór híyan úniciyare goijjó. 36 Kiyólla-hoilé yaar hooddin age Teyúdas hoó de íte urí, nize eggwá sóddar hoi dabi goijjíl; aar tokoriban sair cót manúc ítar bóng ot córik óoil. Montor ítare mariféla gíyeh aar ítar llói bóng óoil de ítara beggún dorbodor óigilgoi aar kessú ói nó fare. 37 Íte baade, Galil or Yohúdah ye manúc seráng gorá zar de októtt urí bicí manúc nizor híkka gorífelail. Ítare yó mariféla gíyeh, aar ítar manúc beggún óu dorbodor óigilgoi. 38 Hétolla bóuli ehón añi tuáña re hoóir, tuáña e manúc itará ttu duré táikko; itará zoggói; kiyólla-hoilé zodi itará erada edde ham insán or torfóttu de ó, tóoile híin toh nac óizayboi. 39 Montor zodi Allar torfóttu de ó, tuáña itará re bon gorí no faribá. Zodi goró, tuáña Allar ulða larái-goróya tóoriba de baná.” 40 Tará Gamaliel or buddí dóijje, aar sáhabi gún ore bútoe matai yore soónk mara baiyé. Baade ítara re hókum díye de, Isár name honó hotá no hoitó, tarfore ítara re eridifélaie. 41 Ítara fótuayi-mujilíc ottu zaibarcót bicí kúci accíl, kiyólla-hoilé Alla ye ítara re Isár wasté beizzot óibar laayek goinné. 42 Aar ítara fóttí din baitul-mukaddos ot edde góre-góre zai-zai lagatar taalim diyat edde tobolik gorát accíl de ki, Isá óilde Mosih.

6 Hé din ókkol ot zeñtté ummot ókkol bicí ór, ítarar bútotu ze Yohúdi ókkole Girík zubane hotá hoitó ítara Hibrí zubane hotá hoitó de Yohúdi ókkol or ulða cékayot gorát doijje, kiyólla-hoilé fóttí din hána bařidibarcót ítarar rari ókkole no fáito. 2 Tói baró zon sáhabi gúne ummot ókkol beggún ore ekkán ot zoma gorí hoór de, “Allar kalam tobolik gorár ham bad di hána bařidiat lagi tákon añára lla tík no. 3 Hétolla, ó báiyain, tuáñarar bútotu háñit zon izzotdár manúc basó, zetará Pak-Ruh lói edde buddí lói furaiya. Añára ítara re e ham or zimma gán gosáidiyum, 4 aar añára dua gorát edde kalam tobolik gorát lagi tákiyum.” 5 Zomát or manúc beggún hé hotát razi óiye. Baade ítara

Estífen ore basíloiye, zibá imane edde Pak-Ruh lói furaiya, aró Filíp ore, Porokóras ore, Nikáno ore, Timon ore, Parménas ore, edde Entiyok or Nikólas ore. Hé Nikólas ézzon Beyohúdi de óile yo Yohúdir dómo mainto. 6 Ítara tará re sáhabi gún or muúntu házir goijjé, aar sáhabi gúne dua gorí tarár uore át díye. 7 Allar kalam fólat accíl. Jerúsalem ot ummot ókkol or dol bicígori barát accíl, aar imam ókkol ottu yó boóut zone hé iman kobul goijjé. 8 Estífen hoó de yóggwa Allar rahámote edde taakote furaiya aiccíl, yóggwa ye manúc ókkol or bútoe doónr-doónr taajuippa harhána ókkol edde illayi-nicán ókkol daháito. 9 Lekin ek din, Azad-Faiya-Maincór Mujilíc-hána hoó de híyan or hoozzon maincé Estífen or ulða ói yóggwa llói torkatorki diyat doijje. Ítara accíl de, Kurenir, Alexzendariyar, Kilicíyar edde Ecíya elakar Yohúdi ókkol. 10 Montor yóggwa ye Pak-Ruhr diiya giyane hoiyé de hotá re ítara ziti nó fare. 11 Hétolla honókiye no zane fán gorí ítara hodún maincóre eén hoi bolla bíraiye, ki hoilé, “Añára Estífene Allar edde Muúsar ulða kuféri hotá ókkol hoór de fúinni.” 12 Héndilla gorí ítara awam ókkol ore, murubbi ókkol ore, edde alem ókkol ore uskaidiyé, aar ítara Estífen or hañse aái yóggwa re dóri fótuayi-mujilíc or muúntu ainné. 13 Ítara zetará re misá gobá tíyagaraiye ítara hoór de, “E manúc cwa ye nitti e pak zagar edde Córivot or hélaf hotá ókkol hoó. 14 Añára yoggwá ye endilla hoór de fúinni, Isá Nasári ye e zaga yían ore dónco gorífelaibo, aar Muúsa ye añára re dífl de rosóm ókkol bodolifélaibo.” 15 Héñtte fótuayi-mujilíc ot boirá accíl de ítara beggúne yóggwar híkka díyan dóri saiyé rár dekér de, yóggwar siyára fíristar siyárar dóilla óigiyoi.

7 Hétunot boro imame Estífen ottu fusár gorér de, “Íin sóiyi ói né?” 2 Estífene zuwab der de, “Ó báiyain aar bafáin, añr hotá fúno. Añárar baf Ibrahim Háran cóor ot tákibar age Mesopotomiyat accíl de októtt mohímar Alla ye yóggwa re dahá díyl, 3 aar hoóil de, “Tor mulluk edde tor egana-guicci ókkol eri oh mulluk ot zaa ziyán Añi toré daháiyum.” 4 “Hétunot yóggwa Kasdiyo ókkol or mulluk eri Háran ot zai táikkegoi. Aar yóggwar baf morizaygói baade, Alla ye yóggwa re e mulluk yían ot lori aá baiyé, ziyán ot yala tuáña tákor. 5 Montor íba ye yóggwa re e mulluk yían or honó híssa miras nó dee, tēng rakí fare de héttor úddwa

nó dee; lekin yóggwa ttu fua nu accíl de óktót úddwa íba ye yóggwa llóí waada goijjíl de ki, e mulluk yíán yóggwar edde yóggwa zai yóggwar ze nosól ókkol tákibo ítarar kobzat gorídibo. **6** Alla ye yóggwa re endilla hoóil, ‘Tor nosól ókkol for or mulluk ot tór sára boni tákibo; hére ítara re gulamit rakíbo, aar sair cót bosór foijjonto zulúm háibo.’ **7** Alla ye aró hoóil de, ‘Montor ítara ze koun or gulami goríbo, Añí hé koun ore sáña díyum, yárbaade ítara hé mulluk ottu neeli aái e zagat Añr ebaadot goríbo.’ **8** Tarfore íba ye Nizor razinamar nicán ísafe yóggwa re ázomi gorár niyom dífl. Tói zeñté Ibrahím ottu Isahák zormo óiye, yóggwa ye íba re añcto din ot din ázomi goráíye; baade Isahák ottu Yakub zormo óoil, aar Yakub ottu baró háandan or bafdáda gún zormo óoil. **9** “Hé bafdáda gúne Yusúf ore ricé Ijíp ot besifélail, montor Alla íbar fúañti accíl, **10** aar íba re tamám mosibot ókkol ottu basaáil. Alla ye íba re Ijíp or baáñcca Féruan ottu meérbani faabáil aar buddíman banaáil, baade íte íba re Ijíp or edde ítar razmohól guñrar hákim banaáil. **11** “Yárbaade, guñra Ijíp ot edde Kánan ot eggwá raṭ óoil, zibá ye bicí duk ainné, aar añárar bafdáda gúne hái bolla háana nó faa. **12** Montor Yakube zettót Ijíp ot háana asé bóuli fuínnil, íba ye añárar bafdáda gún ore foóila bar hére diferáil. **13** Dusárabar ot hére giyyé rár, Yusúfe íbar báiyain dore nizor foriso dífl, baade Féruane Yusúf or foribar or baabute zani faijjíl. **14** Tarfore Yusúfe íbar baf Yakub ore edde íbar tamám egana-guicci ókkol ore aitó hóbor foónsaiye. Ítara kulehale hóittor fañs zon accíl. **15** Baade Yakub Ijíp ot gífl; hére íba edde añárar bafdáda gún entehal ógiyoi. **16** Aar ítarar muruda ókkol ore Cekém ot loizai hobor ot diya giyéh; hoborostán waán ot ziyán Ibrahíme Cekém cóor ot Hamor or fuain dor ttu ṭiañ dii kinilóil. **17** “Montor Alla ye Ibrahím lói goijjíl de waada fura goríbar óktó zettót dáke aiyér, Ijíp ot añárar koun barí bicí ógilgoi, **18** Yárbaade, Ijíp ot ar eggwá baáñcca uittíl, zee niki Yusúf or baabute kessú no zainto. **19** Íte añárar koun loi saláki goijjíl, aar añárar bafdáda ókkol ore eddúr zulúm goijjíl zeén níki ítara ttu nizor dud or fuain dore baáre félaidiya fore, zeéne híin morizagói. **20** “Hé óktót Muúsa zormo óoil. Íba bicí cúndor accíl, aar íba re tin mac foijjonto baf or gór ot fala gyl. **21** Baade íba re zettót baáre félaidiya gíyeh, Féruan or zfi ye íba re loizai nizor fuar dóilla góri faillíl.

22 Muúsa ye Ijípí ókkol or tamám cíkkar elóm faiyé, aar íba hotát edde ham ot taakotwala accíl. **23** “Baade Muúsa salic bosór óiye rár, nizor koun Boni Isráil or hálot saitó zaito demak ot aiccé. **24** Íba ye dekér de, ezzon Ijípí maincé eggwá Isráilir uore zulúm gorér. Tói íba zai yore Isráili wa re basai Ijíp or manúc cwa re marifélai bodola loiyé. **25** Muúsa ye baíppil de, Alla ye ítara re rehái gorí bolla íba re estemal gorér de híyan íbar kouni báiyain de buzíbo, montor ítara nó buzé. **26** Tarfor din íba ye dekér de, dui zon Isráili ye maramari der. Íba ye ítara re cántir sáañte bonaidibar kucíce hoór de, ‘Ekí, tuáñra toh báí báí, tuáñra kiyá ezzon loi ezzone maramari dor?’ **27** “Montor zee niki oinno wa re zulúm gorér, yóggwa ye Muúsa re déikka mari hoór de, ‘Toré hone añárar hákim edde bisarhar banaiyé?’ **28** ‘Tui ki añré yó marifélaibi zendilla gel de haille ezzon Ijípí re marifélaayos?’ **29** Híyan fúni Muúsa dáigiyegeoi, aar Miídiyan mulluk ot ezzon bidecóiṭta ísafe táikkil. Hére íba ttu duwá fua zormo óoil. **30** “Salic bosór guzori zaigói baade, Kuútor Faár or moidan zagat ek fírista ye eggwá zoler de ooin or záḏḏwat Muúsa re dahádiye. **31** Híyan dekí Muúsa taajup ógilgoi, aar cúndorgori sai bolla aró dáke giyyé rár, Mabude eén hoór de abas fúinne, **32** ‘Añí óilam de tor bafdáda ókkol or Alla, yáni Ibrahím or, Isahák or edde Yakub or Alla.’ Hétunot Muúsa ḏoore hafat dóijjil aar saibár hímmot nó goré. **33** “Mabude íba re hoór de, ‘Tor ṭéng or centár kúlifela, kiyólla-hoilé tui ze zagat ṭíayiyos híyan pak zaga. **34** Becók, Añí Añr bonda ókkol zetará Ijíp ot asé ítarar uore ze zulúm ókkol ór híin deikkí. Añí ítarar dukkór hañdani fúni ítara re basailoibo lla nise aiccé deh. Yala ai, Añí toré Ijíp ot diferáiyum.’ **35** “Íbá óilde oh Muúsa, zibá re ítara endilla hoói inkar gorídil, ‘Toré hone hákim edde bisarhar banaiyé?’ Ze fírista ye zoler de záḏḏwat Muúsa re dahá dífl hé fíristar duara Alla Nize íba re hákim edde rehái-goróya banai diferáíye. **36** Íba ye Boni Isráil ókkol ore Ijíp ottu neelai ainníl, aar Ijíp ot, Nil Doriyat, edde moidan zagat salic bosór fán taajuiippa harhána ókkol edde illayi-nicán ókkol daháíye. **37** “Íbá óilde oh Muúsa, zibá ye Boni Isráil ókkol ore hoóil de, ‘Alla ye tuáñrar báiyain dor bútotu tuáñra lla añr dóilla ezzon nobi tulíbo.’ **38** Íba óilde úba, zibá moidan zagat añárar koun zoma óoil de ítarar fúañti accíl; hére añárar bafdáda ókkol edde íba llói

Kuútor Faár or uore hotá hoóil de fírista wa yó accíl, aar añárar hañse foónsai bolla íba ye zinda kalam faáil. **39** “Montor añárar bafadada ókkole íbar hotá mainto nó saá, bóлке ítara íba re inkar goijjíl, aar Ijíp ot waafes zai bolla dile-dile mon gorí, **40** Aron ore hoóil de, ‘Añárar age-age zai bolla añára lla debota ókkol bano, kiyólla-hoilé añára re Ijíp dec ottu neelai ainné de Muúsar hálot kii ógiyoi añára no zani.’ **41** Tói hétunot ítara gorur-sóor dóilla eggwá mutti banai yíbar hañse kurbani peec goijjé, aar ítara nizor át or banaiya siz or uore kúci-áci goijjé. **42** Montor Alla ye ítara ttu muk fíraifelaiye, aar ítara re asman or tara ókkol fuñzitó eridifelaiye, nobi ókkol or kitab ot zendilla leikká asé, ‘Ó Boni Isráil ókkol, tuáñra moidan zagat salic bosór foijjonto Añr hañse januwar kurbani edde oinno kurbani peec goijjíla níki? **43** Tuáñra toh Molek debotar tãmbu edde tuáñrar Rifan debotar sóbi éna tulí looi fúañti-fúañti loizaitá, ziín tuáñra fuñza gorí bolla banaáila. Hétolla Añí tuáñra re Babilon or okul or zagat bondit diferáiyum.’ **44** “Moidan zagat añárar bafadada ókkol ottu Allar Házirir Tãmbu accíl; híyan ore undilla nomuna mozin bana gyíl, zendilla gori banai bolla Alla ye Muúsa re daháidi hókum goijjíl. **45** Tãmbu híyan fai baade, añárar bafadada ókkole Yehócuar sóddarir tole tákite híyan ore nizor fúañti añárar e mulluk ot ainníl. Héñtte Alla ye ítarar muúntu oinno koum ókkol ore neelai dyíl. Híyan Dawud or zobana foijjonto e mulluk ot accíl. **46** Dawude Allar rahámot fai yore Yakub or Alla táki bolla ékkan zaga banaibár ezazot maiggíl. **47** Montor íba lla gór Sólomane éna banaiyé. **48** “Háleke, Alla Tála insán or át or banaiya gór ot no táke. Nobi ye endilla hoór, **49** Mabude fórmár de, ‘Asman óilde Añr toktó, aar zobin óilde Añr foo rakíbar banggú. Tui Añr lla hon kisím or gór banaibí? Añí aram goríbar zaga horé oibo? **50** Iín beggún Añr Nizor áte banaiyí de no né?” **51** “Ó uzzoti manúc ókkol! Tuáñrar dil edde han toh bedini ókkol or híin or dóilla. Tuáñra hámica Pak-Ruh re oónli rakó, zendilla tuáñrar bafadada ókkole goittó. **52** Tuáñrar bafadada ókkole hon nobi wa re zulúm nó goré de asé? Ítara toh uitará re yó marifélail zetará Insáfwa wa aibár agun hotá hoóil. Aar yala tuáñra yó íba re dóridi marifélaiyo. **53** Tuáñra toh fírista ókkol or áta diiya Córíyot faáila, montor toóu híin amól nó goró.” **54** Híin fúni fótuayi-mujilic or membór

ókkol bicí rak ógiyoi, aar yóggwar ulda date-dat kirkirat doijje. **55** Montor yóggwa Pak-Ruh lói furaiya ói yore asman or uzu díyan dóri saiyé rár Allar mohíma deikké. Aró deikké de, Isá Allar den dák ottu týaiya asé. **56** Yóggwa ye hoór de, “Soó, añí dekír de, asman kúla aar Manúc or Fua Allar den dák ottu týaiya asé.” **57** Hétunot ítara nizor han bon gorífelaiye, aar eggwá dōóñr guzoran mari beggúne ekkú fúañti yóggwar uore záp maijje. **58** Ítara yóggwa re cóor or baáre loizai cíl or dola marat doijje; aar gobá gúne nizor hoorsuor kúlifelai Sául nam or ézzon juwan manúc or tēng or gurat raikké. **59** Ítara Estífen ore cíl or dola marat accíl de októ, yóggwa ye endilla hoói dua gorér, “Ó Malik Isá, añr ruh re kobul goró.” **60** Baade yóggwa ye añrú félai eggwá dōóñr abase guzori hoór de, “Ó Malik, itarár e guná no dóijjo.” Híyan hoói yóggwa moot or gúm ot foijjé.

8 Estífen ore marifélaiye de híyan ot Sául furafuri razi accíl. Hé din, Jerúsalem ot accíl de zomát or uore eggwá dōóñr zulúm cúru óiye, aar sáhabi gún bade argún beggún Yohúdiya edde Samária elakar agagurat dorborodó ógiyoi. **2** Hodún dindár manúce Estífen ore dohón gorífelaiye, ítara bilak gorí-gorí yóggwa lla bicí haindé. **3** Ar Sáule zomát ore dónco gorár kúci, góre-góre góli morotfuain edde mayafuain ókkol ore tani aní ziyól ot díyat doijje. **4** Ze imandár ókkol dorborodó ógiyegoi, ítara zaga-zaga zai kúchóbor tobolik gorát accíl. **5** Aar Filípe nise Samáriar ekkán cóor ot zai, maincóre Mosihr baabute tobolik gorát doijje. **6** Manúc ókkole Filíp or boiyan fúni edde íba ye daháito de illayinican ókkol dekí íbar hotá aró díyan or sáante fúinto. **7** Kiyólla-hoilé bicí manúc ottu hóraf jin ókkol dōóñr abase guzoran mari neeillíl, aar boóut zon mazur edde leng gom óoil. **8** Hétolla hé cóor ot bicí kúci accíl. **9** Yár age hé cóor ot Sáimon nam or ézzon manúc accíl, zibá ye jadu dahái Samáriar manúc ókkol ore taajup gorí rakító, aar dabi goittó de, añí yó ézzon dōóñr manúc. **10** Gorib tuangor beggúne yóggwar hotá díyan dí fúinto aar hoitó de, “E manúc cwa óilde Allar oh kudurut, ziyán ore dōóñr Kudurut bouli zana zah.” **11** Ítara yóggwar hotát etollá díyan dito, kiyólla-hoilé yóggwa ye ítara re jadu dahái bicí deri lóti taajup gorí raikkíl. **12** Montor ítara zeñtté Filípe Allar raijor edde Isá Mosihr baabute kúchóbor tobolik goijjé

de híin or uore iman ainné, ítara morotfuain mayafuain duní gúne báp̄tisma loiyé. 13 Sáimon nize yó iman aní báp̄tisma loiyé. Yóggwa Filíp or fúañti-fúañti zaito, aar íba ye daháito de illayi-nicán ókkol edde doóñr-doóñr keramot ókkol deki yóggwa taajup óizaytoi. 14 Jerúsalem ot asé de sáhabi gúne zettót Samáriar maincé Allar kalam kobul goijjé de fúinne, ítara Fitor ore edde Yohánna re tarár hañse diferáiyé. 15 Ítara duní zon foóñsi yore tará lla dua goijjé, zeéne tará Pak-Ruh faa; 16 kiyólla-hoilé tarár uore Pak-Ruh hétun foijjonto nú aiyé; tará cúdu Malik Isár name báp̄tisma lóil deh. 17 Baade Fitor edde Yohánna ye tarár uore át díye, tói tará Pak-Ruh faiyé. 18 Sáimone dekér de, sáhabi gúne át dile Pak-Ruh miler, tói yóggwa ye tará re òñi dii 19 hoór de, “Añré yó e kémota gán doo, zeéne añi zar uore át dí yóggwa ye Pak-Ruh faa.” 20 Montor Fitore yóggwa re hoór de, “Tuáñr òñi tuáñr fúañti dónco óizoggoi, kiyólla-hoilé tuñi toh Allar hádiya òñi dii kina zah bouli òñi. 21 Ham yáin ot no tuáñr honó híssa asé aar no honó borat asé, kiyólla-hoilé Allar nozor ot tuáñr dil sóiyi no. 22 Hétolla tuñi tuáñr e hórafi ttu touwá goró, aar Malik or hañse dua goró, óitofare íba ye tuáñr dil or e hóraf báfani maf goróidibo. 23 Kiyólla-hoilé añi dekér de, tuñi lalóse bóra aar gunár kobzat asó.” 24 Hétunot Sáimone zuwabe hoór de, “Añr lla Malik or hañse dua goró, zeéne tuñi hoiyó de héntu ekkán úddwa añr uore no.” 25 Tarfore Malik or kalam tobolik gorí edde Isár baabute gobá dí baade, Fitor edde Yohánna Jerúsalem or uzu rowana loiyé, aar foñt ot Samári ókkol or boóut tan farat kúchóbor tobolik goijjíl. 26 Ek din, Mabud or ek fírista ye Filíp ore hoór de, “Tuñi urí doóin míkka rasta ubát zoo, zibá Jerúsalem ottu Gaza cóor ot foijjé.” Hé rasta wa moidan zagat accíl. 27 Hétunot íba urí rowana loiyé, aar zaite-zaite foñt ot máze Itúpiya dec or Kandes ranir ek doóñr uzir loi dola óiyé, yóggwa accíl ízara, aar ranir tamám dón-doulot or zimmadar. Yóggwa Jerúsalem ot aiccíl de Allar ebaadot gorí bolla. 28 Yóggwa nizor gúra-garít boói gór ot waafes zaargói de foñt ot nobi Yesáyahr kitab telawot gorát accíl. 29 Hétunot Pak-Ruh ye Filíp ore hoór de, “Hé gúra-garí gán or dáke zai híyan or fúañti-fúañti zaat dóro.” 30 Tói Filíp duñri gúra-garít dáke giyyé rár fúner de, manúc cwa ye nobi Yesáyahr kitab telawot gorér. Íba ye yóggwa ttu fusár gorér

de, “Tuñi zín telawot gorór híin buzór né?” 31 Yóggwa ye zuwab der de, “Honókiye buzái no dilé añi keéngori buzí faijjum?” Tói yóggwa ye Filíp ore uore urí yóggwar fúañti boító aros goijjé. 32 Manúc cwa ye pak-kalam or ze híssa gán telawot gorér híyan óilde yáin, “Zoorái bolla bérasóol ore zendilla gori loiza zah, íba re héndilla góri loiza giyyé; aar nizor keñc haroyar muuntu bérasóol or sóo ye zendilla nizám ói táke, héndilla íba ye yó Nizor muk nó kúle. 33 Íba re beizzoti goijjíl de híyan or honó bisar nó faa. Hone íbar nosól or baabute hoói faribó? Kiyólla-hoilé duniyai ttu íbar zan loifélagil.” 34 Hé uzir gwá ye Filíp ottu fusár gorér de, “Meérbani góri añré hoó, nobi ye iín har baabute hoór deh, nizor né náki oinno zon or?” 35 Hétunot Filípe hotá howá saat goijjé, aar pak-kalam or hé híssa gán lói cúru gorí yóggwa re Isár baabute kúchóbor tobolik goijjé. 36 Ítara rasta báy zaite-zaite faní asé de ekkán zagat foñnicce. Uzir gwá ye hoór de, “Soó, eré faní asé, yala báp̄tisma lowa ttu añré kiyé oóñli faribó?” 37 Filípe yóggwa re hoór de, “Zodi tuñi fura dile Isár uore iman ainnó de óile, loi faribá.” Yóggwa ye hoór de, “Añi iman aní de, Isá Mosih óilde Allar Fua.” 38 Baade yóggwa ye gúra-garí tiyagaraito hókum díye, tarfore Filíp edde hé uzir, tará duní zon fanít laimmé, aar Filípe yóggwa re báp̄tisma díye. 39 Zeñtté ítara faní ttu uittégai, Malik or Ruh ye bánggori Filíp ore loigiyégoi. Hé uzir gwá ye Filíp ore ar nó deké, lekin kúci gorí-gorí nizor sofór zari raikkíl. 40 Montor Filípe nizoré Asdod cóor ot loot faiyé, íba héntu lóti Kaisáriyat foóñse foijjonto cóor beggún ot kúchóbor tobolik gorát accíl.

9 Hé hale, Sáule Malik or ummot ókkol ore dómki diyat edde zulúm gorát accíl. Íba boro imam or hañse giyyé, 2 aar Damáskas cóor or mujílíc-hána ókkol ot dii bolla ceñrí maiggé, zeéne íba ye zaré-zaré Malik or Torikat asé de lootfa, ítara beggún ore bañdí Jerúsalem ot aní fare, ítara morotfuain óuk yáh mayafuain. 3 Zaite-zaite íba zeñtté Damáskas or hañsahañsi foñnicce, atíkka asman ottu eggwá foór íbar saíró dák ottu soimké, 4 baade íba merit forigilgói, aar endilla hoór de eggwá abas fúinne, “Sául, Sául, tui Añré zulúm gorór kiyá?” 5 Sáule fusár gorér de, “Malik, Tuñi hon?” Íba ye zuwab der de, “Añi Isá, zibá re tui zulúm

gorór. 6 Yala tui urí cóor or bútoze zaa, tor ttu kii gorá foribó de híyan hére toré howá zaybo.” 7 Oinno manúc zetará Sául or fúañti zaar, ítara ammúk ói tíyai táikkil, kiyólla-hoilé ítara abas swá fúner montor honókiyo re no dekér. 8 Tarfore Sául meri ttu uitté, lekin suk kúille rár kessú no dekér. Baade ítara íba re át ot dóri Damáskas ot loigiyé. 9 Íba tin din foijjonto ańdá accíl, aar honó hána-fina ná háa. 10 Damáskas ot Ananiyas nam or ezzon ummot accíl, Malike yóggwa re ekkán dorcón ot hoór de, “Ó Ananiyas.” Yóggwa ye zuwab der de, “Jii Malik, ańi eré así.” 11 Baade Malike yóggwa re hoór de, “Uť, Uzu hoó de rasta yľbat zaa, aar Yohúdahr gór ot Sául nam or ézzon Tarsús cóor or manúc or talac gorgói. Íba ehón dua gorér. 12 Íba ye ekkán dorcón ot deikké de, ezzon Ananiyas nam or manúce aái íbar uore át díye, zeéne íba ye abar deki fare.” 13 Ananiyase hoór de, “Malik, manúc íbar baabute ańi boóut maincór ttu fúinni, íba ye Jerúsalem ot Tuáńr pak bonda ókkol ore hotó duk diyé deh, 14 aar íba eré Tuáńr ebaadot goré de ítara beggún ore gereftar gorí bolla doóńr imam ókkol ottu adíkar fai aiccé deh.” 15 Montor Malike yóggwa re hoór de, “Tui zaa, kiyólla-hoilé íba óilde Ańr basíloiya usíla, Beyohúdi ókkol or, baáńcca ókkol or, edde Boni Isráil ókkol or muńtu Ańr nam fońsai bolla. 16 Ańr nam or wasté íba ttu hodún duk faa foribó Ańi íba re daháiyum.” 17 Tói Ananiyas zai hé gór gán ot góille, aar Sául or uore át dí hoór de, “Bái Sául, Malik Isá, zibá ye tuáńre eré aibárcot rastat dahá díyl, ańre tuáńr hańse íba ye diferáiyé deh, zeéne tuńi abar deki faro aar Pak-Ruh lói furaiya ó.” 18 Baade éhon or bútoze Sául or suk ottu ońc or dóilla kessú foijjé, aar íba ye abar deki faijje. Tarfore íba urí báptisma loiyé, 19 aar hána háiyé rár abar bol faiyé. Íba ummot ókkol or fúañti Damáskas ot hooddin táikkil, 20 aar honó deri no gorí mujilic-hána ókkol ot Isár baabute tobolik gorát doijje de ki hoilé, Isá óilde Allar Fua. 21 Zetará íbar boiyan fúinto ítara beggúne taajup ói hoító de, “Manúc íbá kí ubá no, zibá ye Jerúsalem ot Isár ebaadotgár ókkol ore zulúm goittó? Íbá eré yó héndilla goré de ítara re gereftar gorí doóńr imam ókkol or hańse loizabár niyote aiccé de no né?” 22 Montor Sául dinbodin mozbut ówat accíl, aar Isá óilde Mosih de híyan or eén dolil ókkol diyat accíl, zeén níki Damáskas ot táke de Yohúdi ókkol toddó óizaytoi. 23 Boóut

din guzori zaigói baade, Yohúdi ókkole íba re marifélaí bolla ekkán sail gúraiyé, 24 montor Sáule ítara hé sail or baabute zani faijje. Ítara íba re marifélaí bolla dine raite cóor or geit ókkol ot faára díyat accíl, 25 montor íbar cárit ókkole raitta eggwá doóńr lai ot gori íba re debal or ekkán zanála báy nise lamaidiyé. 26 Baade Sául Jerúsalem ot giyyégoi. Hére íba ye ummot ókkol lói bóng óito kucic goijjíl; montor ítara beggúne íba re dooraitó, kiyólla-hoilé íba sóiyi-sóiyi ummot bonigiyói de híyan ítara biccác no goittó. 27 Montor Bárnabase íba re sáhabi gún or hańse ainné. Yóggwa ye ítara re zanaiyé de, Sáule sofór ot zaibarcót rastar uore Malik ore hondilla gori deikkíl, Malik íba llói kéngori hotá hoóil, edde íba ye Damáskas ot Isár name keén hímmot or sáañte tobolik goijjíl. 28 Tarfore Sául ítara fúañti táikkil, aar kúlamela góri Jerúsalem or agagurat zai hímmot or sáañte Malik or name tobolik gorát accíl. 29 Íba ye Yohúdi zetarár zuban Girík ítara llói hotá hoító edde barábari díto; montor ítara íba re marifélaíto kucic goittó. 30 Zeńtté imandár báiyain de híyan or baabute zainné, ítara íba re nise Kaisáriyat aní Tarsús ot duńraidiyé. 31 Héńtte fura Yohúdiyar, Galil or, edde Samáriar zomát ókkol ot cánti accíl, aar híin torki ówat accíl. Ítara Malik ore dooraitó aar Pak-Ruhr tosólliye solitó; héndilla góri ítara dol barát accíl. 32 Fitor hárr zagat sofór goitté-goitté, ek dinná íba Liídiya farat Allar ze pak bonda ókkol asé ítara hańse yó aiccé. 33 Hére íba ye Ainiyas nam or ezzon manúc loot faiyé, zibá ańtur de hétolla ańcťo bosór fán bisánat fori asé. 34 Fitore yóggwa re hoór de, “Ainiyas, Isá Mosih ye tuáńre gom goijjé; uró, tuáńr bisána boři loo.” Baade yóggwa éhon urí tíyaiye. 35 Aar yóggwa re deki Liídiyar edde Cáron elakar manúc beggún Malik or uzu fíjje. 36 Joppa cóor ot Tabita nam or eggwá mayafua ummot accíl; Girík zuban ot híbar nam Dorkas, ziyán or torjuma “Óroin.” Híba ye hámica bálaí goittó aar gorif ókkol ore modot goittó. 37 Héńtte híba biyaram ói morigíľgoi, aar manúc ókkole híba re dúwaidai baade uoror řalar ekkán kamárat raikké. 38 Liídiya fara gán Joppar dake accíl. Ummot ókkole zettót Fitor hére asé de fúinne ítara dui zon manúc diferái íba re aros gorér de, “Tuńi ańárar hére aité deri no goijjó.” 39 Hétunot Fitor urí ítara fúañti giyyé. Zeńtté íba hére foóńicce, ítara íba re uoror řalar kamára

gán ot ainné. Rari mayafuain beggún Fitor or sairó ďák ottu tíyai táikke, aar Dorkase zinda tákite zedún kuruta edde hoorsuor ókkol banaáil híin beggún íba re hañdi-hañdi dahát doiije. 40 Montor Fitore ítara beggún ore baáre neelaidi añrú félai dua goijjé. Íba ye lac cwar uzu firi hoór de, “Tabita, uť.” Tói híba ye suk kúille, aar Fitor ore deikké rár uť boiccé. 41 Baade Fitore híba re át ot dóri tuillé, aar rari mayafuain cóo imandár beggún ore matai híba re zinda gosáidiye. 42 Hé hóbor gán Joppa agagurat fóliligloi, aar boóut maincé Malik or uore iman ainné. 43 Fitor boóut din foijjonto Joppat maze Sáimon nam or ézzon samamar ham-goróyar fúañti táikkil.

10 Kaisáriya cóor ot Korneliyas nam or ezzon manúc accíl, yóggwa accíl Italiyo Teérang hoó de yíbar ek cót fóous or cáap. 2 Yóggwa edde yóggwar gór tíya dindár accíl aar Alla re đooraitó; yóggwa ye gorif ókkol ore bící hórat diito, aar Allar hañse nitti dua goittó. 3 Ekbar din or tin nwá báze yóggwa ye ekkán dorcón deikké, ziyán ot sáf-sáf góri dekér de, Allar ek fírista aái yóggwa re hoór de, “Korneliyas.” 4 Yóggwa ye đooore fíristar uzu suk đoóñr gorí saái hoór de, “Malik, hoóna?” Baade fírista ye hoór de, “Tuáñr duaye edde hórat doone Alla kúci óiye aar íba ye híin monot raikké. 5 Yala tuñí Joppat manúc diferó, aar Sáimon zibá re Fitor óu ďake, íba re matai anó. 6 Íba samamar ham-goróya Sáimon or gór ot meéman ísafe asé, zar gór gán doiijjar hañsat.” 7 Yóggwa llói hotá hoóil de fírista wa zaigói baade, yóggwa ye nizor gór or dui zon gulam ore edde yóggwa re hámica hédmot goittó de ítarar bútotu eggwá dindár fóous ore mataiyé. 8 Aar ziín-ziín óiye híin beggún ítara re buzái yore Joppat diferáiyé. 9 Tarfor din ítara zaite-zaite cóor gán or hañsáhañsi foónser de óktót, din or duúñijja Fitor gór or sád or uore dua goittó uittégoi. 10 Íba ttu búk laiggíl, aar kessú háito monehoóil, montor hána toiyar ór de óktót, íba ye ekkán dorcón deikké, 11 ziyán ot dekér de, asman kúla aar đoóñr saddor or đóilla ekkán siz ore sair kuna ttu dóri zobin ot lamaidiya zar. 12 Híyan or bútoore hárr kisím or sair téingga januwar, buke añre de zandár, edde faik ókkol asé. 13 Baade íbar hañse eggwá abas aiccé de, “Fitor, uť, iín ore marifélai háa.” 14 Montor Fitore hoór de, “No, no, Malik; ańi toh honódin kessú

nafak yáh háram háiyi de náí.” 15 Hétunot íbar hañse abar eggwá abas aiccé de, “Alla ye ziyán ore pak-sáf goijjé híyan ore nafak bouli no hoóic.” 16 Héndilla tin bar óiye, baade saddor gán atíkka asman ot waafes tulífela gíyeh. 17 Zeñtté Fitore deikkíl de dorcón or maáni kii hoói báfer, Korneliyase diferáil de manúc cún Sáimon or gór gán horé asé de talac gorí fai yore híyan or geit ot aái tíyai táikke. 18 Ítara ďak mari fusár gorér de, “Sáimon, zibá re Fitor óu ďake, íba eré asé né?” 19 Fitore dorcón híyan or baabute báfat accíl de óktót, Pak-Ruh ye íba re hoór de, “Saá, tin zon maincé tor talac gorér. 20 Hétolla uť, nise zaa, aar honó cók-cubá sára ítarar fúañti zaa, kiyólla-hoilé ítara re Ańi diferáiyi deh.” 21 Hétunot Fitor nise zai manúc cún ore hoór de, “Tuáñra zar talac gorór, íba óilam de ańi. Tuáñra kiyólla aiccé dé?” 22 Ítara zuwab der de, “Añára re cáap Korneliyase diferáiyé deh. Yóggwa ézzon forhésgar edde Alla re đooora de manúc. Tamám Yohúdi ókkole yóggwar nam goré. Yóggwa re pak fírista eggwá ye hoiyé de, tuáñre yóggwar gór ot matai bolla, zeéne yóggwa ye tuáñr ttu kalam fúni fare.” 23 Hétunot Fitore ítara re bútoore matai aní meémandari goijjé. Tarfor din Fitor ítarar fúañti rowana loiyé. Íbar fúañti Joppa ttu hoozzon imandár báiyain óu giiyé. 24 Zaité-zaite ek din baade ítara Kaisáriyat foónicce. Korneliyase nizor egana-guicci edde háas dustó ókkol zoma gorí ítarar entezar ot accíl. 25 Fitor gór ot gólibarcot Korneliyase íba re estekbal goijjíl, aar íbar téng ot uúñitoi fori sóida goijjíl. 26 Montor Fitore yóggwa re eén hoói tulíloiyé, “Uřó, ańi yó toh ézzon insán.” 27 Yóggwa llói hotá hoói-hoói Fitor bútoore goille rár dekér de, hére boóut manúc zoma óiye. 28 Íba ye ítara re hoór de, “Tuáñra toh zano, ek Yohúdi ye honó Beyohúdi llói sákbak rakón yáh ítarar hére beraitó zoon añárar córiyot or maná. Montor honókiyo re háram yáh nafak no hoi bolla Alla ye añré daháidiye. 29 Hétolla tuáñra añré mataitó diferáiyó rár, ańi honó bazá no di aicci deh. Yala ańi fusár gorí fajjum né tuáñra añré kiyólla mataitó diferáiyó dé?” 30 Korneliyase zuwab der de, “Yar sair din age, etún ot din or tin nwá báze ańi añr gór ot dua gorír de óktót, somoikka hoor findá ézzon manúc asimbit añr muuntu tíyaiye, 31 aar hoór de, ‘Korneliyas, Alla ye tuáñr dua fúinne edde tuáñr hórat diiya monot raikké. 32 Hétolla

honókiyo re Joppat difeřó, aar Sáimon zibá re Fitor óu ake,  ba re matai an ,  ba samarar ham-gor ya S imon or g r ot me man  safe as , zar g r g n doijjar ha sat.’ 33 H tolla a n  tu  re matai bolla  hon or b tore man c difeř yi deh. Gom  iye tu  n  aicc . Yala a  ara begg n eř  Allar mu ntu h zir  yi de, Malike tu  re a  ara re zi n hoi bolla h kum d ye h in begg n f ni bolla.” 34 Baade Fitore hot  how  c ru gor  ho r de, “ hon a n  s iyo-s iyo zani faij , Alla ye ektor fa no gor , 35 b lke h rr k um ottu zee-zee  ba re  ora aar s iyo ham gor , tar -tar   ba ye kobul gor . 36 Tu  ra toh oh k ch bor zano ziy n Alla ye Boni Isr il  kkol or ha se fo  saiye, ki hoil , Is  Mosih zib  begg n or Malik,  bar duara c nti faa zah. 37 Tu  ra nize zano, Yah ya ye b pt smar baabute tobolik gor  baade Galil ottu l ti c ru gor  gu  ra Yoh diyat kii  iye. 38 Tu  ra y n  u zano, Alla ye Nas rat or Is  re Pak-Ruh loi edde kudurute furaia gor  basiloil.  ba ye zaga-zaga zai b lai goitt , aar zetar  re  bil ce duk de  tara begg n ore gom goitt , kiy lla-hoil  Alla toh  bar f  nti acc l. 39 “ ba ye Yoh di  kkol or mulluk ot edde Jer salem ot zed n ham  kkol goij , a  ara h in begg n or gob  as . Man c  kkole  ba re k ruc ot  aki marif lail. 40 Montor Alla ye  ba re tin din ot din zinda goij , aar  ba re zah r  wa baiy , 41 begg n or ha se no, b lke sir f Alla ye age l ti bas  raikk  de gob   kkol or ha se, y ni a  ar ha se, zetar   ba mora ttu zinda  i baade  bar f  nti h  fiya goij lam. 42  ba ye a  ara re h kum d ye de, man c  kkol or ha se tobolik gor  bolla edde y n gob  d  bolla, ki hoil ,  ba  ilde Ub  zib  re Alla ye zinda edde mora  kkol or bisarhar banaiy . 43 Tam m nobi  kkole y   bar baabute endilla gob  d ye de ki, zee niki  bar uore iman an   te  bar name gun r maf faa.” 44 Fitore h in boiyan gor r de okt t, f ner de  tara begg n or uore Pak-Ruh lami aicc . 45 Joppa ttu ze  zomi goij  imand r  kkol Fitor or f  nti aicc   tara taajup  igilgoi, kiy lla-hoil  Beyoh di  kkol or uore y  h diya  safe Pak-Ruh   lidiya giy h. 46  tara dek r de, Beyoh di  kkole gabi zubane hot  ho r edde bic gori Allar taarif gor r. H tunot Fitore ho r de, 47 “Yala toh itar  re fan r b pt sma lowa ttu hon kiye o  si no farib , kiy lla-hoil  a  arar   illa itar  y  de Pak-Ruh faiy .” 48 T i  ba ye  tara re Is  Mosih name b pt sma d ya

zay bolla h kum d ye. Y rbaade  tara Fitor ore hooddin f  nti t kito aros goij .

11 S habi g ne edde Yoh diyar agagurat as  de imand r b iyain de f inne de, Beyoh di  kkole y  Allar kalam kobul goij . 2 H tolla Fitor ze tt  uore Jer salem ot giyy ,  zomi goij  imand r  kkole  ba re hos r d ye, 3  tara ho r de, “Tu  n  be- zomi goij  mainc r g r ot giyy , aar  tarar f  nti h na y  h iyo.” 4 T i Fitore  tara re ekk  ttu l ti begg n buz i ho r de, 5 “  n  Joppa c or ot dua gor r de okt t ekk n dorc n deikk , ziy n ot deikk lam de,  o  r saddor or   illa ekk n siz ore sair kuna ttu d ri asman ottu lamaidiya zar; h yan laimte-laimte a n  ziy  t as  h  yot fo  nicce. 6 A n  saddor g n or uzu d yan d ri sai  r r deikk  de, h yan or b tore zobin or sair   ingga januwar, jonggoli januwar, buke   re de zand r, edde faik  kkol as . 7 Baade eggw  abase a  re endilla y  ho r de f inni, ‘Fitor, ut,  in ore marif lai h a.’ 8 “Montor a n  hoiy  de, ‘No, no, Malik; a n  toh hon din kess  nafak y h h ram h na gal ot diy  de n i.’ 9 “H tunot dus rabar asman ottu eggw  abas a i ho r de, ‘Alla ye ziy n ore pak-s f goij  h yan ore nafak bouli no ho c.’ 10 H ndilla tin bar foijjonto  iye, baade h in begg n ore asman ot waafes tul fela giy h. 11 “H tukkun ot tin zon man c zetar  re a  r ha se Kais riya ttu difeř  giy h,  tara a  ara ze g r g n ot acc lam h yan ot fo  nicce. 12 Pak-Ruh ye a  re hon  c k-cub  s ra  tarar f  nti zaito hoiy . E s w zon b iyain itar  y  a  r f  nti gi l. Baade a  ara man c cwar g r ot g illigoi. 13 Y ggwa ye a  ara re hoiy  de, y ggwa ye y ggwar g r ot eggw  firista deikk , zib  ye hoiy  de, ‘Hon kiyo re Joppat difeř , aar S imon zib  re Fitor  u ake,  ba re matai an . 14  ba ye tu  re endilla hot   kkol hoib , zi ne tu  n  edde tu  r g r   ya ye nejat faiba.’ 15 “Baade a n  zett t boiyan gor  c ru goij ,  tarar uore Pak-Ruh lami aicc , zendilla fo  la c rut a  arar uore aicc l. 16 H tunot a  r ttu hot  wa n monot ui   l ziy n Malike ho il, ki hoil , ‘Yah ya ye toh fan   na b pt sma d ye, montor tu  ra re Pak-Ruh l i b pt sma d ya zaybo.’ 17 H tolla Alla ye zett t  tara re ekk    illa h diya diiy , zendilla a  ara re di  ze tt  a  ara Malik Is  Mosih uore iman ainn , t i a n  hon abar Alla re o  litam?” 18  tara h in f ni niz m  i t ikkil aar Allar taarif gor  ho r

de, “Tóoile toh Alla ye Beyohúdi ókkol ore yó touwá gorí ofúrani zindigi faibar toóufik diiyé.” **19** Estífen or uore lóti cúru óiye de zulúm or zoriya ze imandár ókkol dorborodor óigilgoi, ítara zaite-zaite Fonikcíya elakat, Sáifrus çiyat, edde Entiyok ot foyjonto foóniccegoi. Ítara Yohúdi ókkol ore bade ar honókiyor hañse kalam tobolik no goittó. **20** Montor ítara bütore Sáifrus or edde Kurenir hoozzon manúc accíl, zetará Entiyok ot zai Girík manúc ókkol ore yó Malik Isár baabute kúchóbor tobolik goijjíl. **21** Malik or át ítara uore accíl de hétolla becábici manúc ókkole iman aní Malik or uzu fíjjil. **22** Hé hóbor híyan Jerúsalem ot asé de zomát or hañse foónicce rár, ítara Bárnabas ore Entiyok ot diferaíye. **23** Yóggwa zeñtté hére foónicce, Alla ye ítara re rahámot goijjé de deki bici kúci óiye, aar ítara re nosíyot goijjé de, fura dile Malik loi laigga táki bolla. **24** Hé Bárnabas ézzon nekkar bonda accíl, zibá Pak-Ruh lói edde imane furaiya. Héñtte bici manúc ókkol ore Malik or hañse aná gíyeh. **25** Yárbaade Sálul ore tuwaitó Bárnabas Tarsús ot giyyé, **26** aar íba re tuwai fai Entiyok ot ainné. Hére ítara duní zon zomát or manúc ókkol or fúañti fura ek bosór táikkil aar bici manúc ore taalim dyíl. Entiyok óilde foóila zaga, ziyán ot ummot ókkol ore Isáyi hoói ðaka giyyé. **27** Hé októ Jerúsalem ottu hoozzon nobi hére Entiyok ot aiccé. **28** Ítara ttu ezzon or nam accíl Agabos, zibá ye tíyai yore Pak-Ruhr hédaiyote agun hotá hoiyé de ki, fura duniyait eggwá ðoóñr raç óibo. Hotá híyan baáñcca Kalediyus or hókumot or októ fura óoil. **29** Héñtte ummot ókkole zee zedún dii fare hédun dii, Yohúdiyat asé de imandár báiboináin dor hañse modot foónsaibar fáisela goijjé. **30** Ítara hé modot tun Yohúdiyar zomát or murubbi-neta ókkol or hañse Bárnabas edde Sálul or áta foónsail.

12 Hé din ókkol ot baáñcca Hérude zomát or kessú maincóre gereftar gorí-gorí zulúm gorát doijje. **2** Hé sílsila loi yóggwa ye Yohánnar báí Yakub ore toluwar loi kotól gorá baiyé. **3** Yóggwa ye zettót Yohúdi ókkol ottu híyan fosón laigge de deikké, Fitor ore yó gereftar goijjé. Hé gótana gán Cútar-sára Ruñir-id or októ óoil. **4** Yóggwa ye Fitor ore gereftar gorí ziyól ot raikkíl, aar sair zon sair zon gorí sair ðaái fóous faára díyl. Yóggwar erada accíl de, Azadir-id baade íba re awam ókkol or muúntu

peec gorí bolla. **5** Hétolla bouli Fitor ore ziyól ot raikkíl deh, montor zomát or manúc ókkole íba lla Allar hañse dilmon di lagatar dua gorát accíl. **6** Ze din Hérude Fitor ore baáre neelai aníbo, hé din raitta íba duiyán síyol lói baindá accíl aar dui zon fóous or mazé gúm ot accíl, aar faáradar ókkole ziyól or dorozat faára dí táikkil. **7** Atíkka Mabud or ek fírista dahádiye, aar hétunot kamárat eggwá foór zoli uiñté. Fírista ye Fitor ore ðák sai lari seton gorídi hoór de, “Hára uró!” Hétunot íbar duní át ottu síyol lun kúli forigiyoí. **8** Baade fírista ye íba re hoór de, “Keeñil bañdó, aar tuáñr cençár fiñdó.” Tói íba ye héndilla goijjé. Fírista ye íba re aró hoór de, “Tuáñr saddor gán gaat berái añr fisé-fisé aiyó.” **9** Fitor neeli fisé-fisé zaat doijje; montor fírista ye ziyán gorér híyan fottón ot de Fitore hoi no fare. Íba ye táaijil de dorcón deké bóuli. **10** Baade ítara foóila edde dusára faáradar ore bárai zai luwár geit or íñyot aiccé, ziyán báy cóor or bütore góli fare. Hé geit ðan ítara lla nizebaze kúligiyoi, aar ítara híyan báy neeli eggwá rasta báy zaat accíl. Zaite-zaite atíkka hé fírista wa Fitor ore eri giyyégoi. **11** Hétunot Fitor úníc ói nizoré nize hoór de, “Yala añí sóiyigori zani faijji, Malike Nizor fírista diferaí añre Hérud or át ottu edde Yohúdi ókkole ziyán or acá gorí táikkil híyan ottu basaiyé.” **12** Híyan buzí fari íba Yohánnar maa Moriyam or gór ot giyyé. Hé Yohánna re Markus hoói yó ðake. Górá híyan ot bici manúc zoma ói dua gorát accíl. **13** Fitore geit or dorozat gán baijjaiye rár, Roðá nam or eggwá bañdi mayafua ye kúlidito aiccé. **14** Híba ye zettót Fitor or abas ót faiyé, kúciye geit no kúli duñri bütore zai hoór de, “Fitor dorozat tíyai táikke!” **15** Ítara híba re hoór de, “Tor matá hóraf óigiyoi!” Montor híba ye zettót híyan sóiyi bóuli howát accíl, ítara hoór de, “Tóoile íba Fitor or fírista óibo deh.” **16** Montor Fitor warawori dorozat baijjat accíl. Aar ítara dorozat gán kúille rár, Fitor ore deki taajup óigiyoi. **17** Fitore áte icára gorí ítara re nizám óito hoiyé, aar Malike íba re ziyól ottu keéngori neelai ainné de híyan ítara re buzáye. Íba ye aró hoiyé de, “Tuáña e hóbor yáin Yakub edde oinno imandár báiboináin dore yó zanaidiyo.” Baade íba héntu neeli ar ekkán zagat giyyégoi. **18** Biñna óiye rár, Fitor horé giyyoi hoi ziyól or fóous ókkol or bütore ðoóñr úrusul óiye. **19** Hérude zettót Fitor ore tuwai loot nó faa, yóggwa ye hókum díye de, faáradar gún ore zerá

gorí mariféla zay bolla. Baade yóggwa Yohúdiya ttu nise Kaisáriyat zai yore hooddin táikkegoi. **20** Hé októtt yóggwa Tayár edde Sídon cóor or manúc ókkol lói bicí guccát accíl. Montor ítara beggún ek mon ói Balatái ore manaiyé, zibá razmohól or zimmadar accíl, zeéne íte ítara re modot goré. Baade ítara Hérud or hañse aái cánti magat doijje, kiyólla-hoilé ítara mulluk ore hé baáñccar mulluke hána lói solaitó. **21** Hétunot Hérude ítara re tarík díye, aar hé tarík mozin yóggwa ye razfucák fiñdí nizor toktót boói ítara re bácon diyat doijje. **22** Yóggwar hotá fúni awam ókkole guzori hoór de, “Íbá toh debotar abas, insán or no!” **23** Hérude Allar taarif nó goré de hétolla Mabud or ek fírista ye yóggwa re éhon agát goijjé. Baade yóggwa re logé háifelaiye aar morigiyói. **24** Montor Allar kalam fólat accíl aar imandár ókkol bicí ówat accíl. **25** Bárnabas edde Sául ottu tobolik or ham goijjá ói baade, Yohánna re fúañti looi Jerúsalem ottu waafes giyyégoi. Hé Yohánna re Markus hoói yó ñakitó.

13 Enṭiyok or zomát ot hoozzon nobi edde ustat accíl. Ítara óilde Bárnabas, Símiyon zibá re Halaiya ñake, Kureni cóor or Lukiyus, hókumot-goróya Hérud or falok báí Manain, edde Sául. **2** Ítara zeñtté ruza rakí Malik or ebaadot gorér, Pak-Ruh ye ítara re hoór de, “Bárnabas edde Sául ore oh ham olla háas gorí rakó, ze ham olla Añí ítara re ñahaiyí.” **3** Tói ítara ruza rakí edde dua gorí baade, hé duní zon or uore át dí ítara re bidai gorídiye. **4** Tói Bárnabas edde Sául ore Pak-Ruhr torfóttu diferá gíyeh. Baade ítara Selukíyat giyyé, aar héntu zaáñs ot góri Sáifrus ot giyyé. **5** Ítara Salamis cóor ot foónsi mottor Yohúdir mujilíc-hána ókkol ot Allar kalam tobolik gorát doijje. Ítarar fúañti modotgár ísafe Yohánna accíl. **6** Guñra ñiya báí zai ítara Pafós cóor foijjonto giyyé. Hére ítara eggwá Yohúdi jadugor edde misá nobi loot faáil zibár nam Bar-Isá. **7** Íte accíl hókumot-goróya Sergiyus Pául or dustó. Sergiyus ezzon buddíman manúc accíl, zibá ye Bárnabas edde Sául ore mataitó diferáil, aar ítara ttu Allar kalam fúinto saáil. **8** Montor jadugor Elumase (Yián óilde Girík zuban ot Bar-Isár dusára nam) ítarar muhálef goijjíl, aar hókumot-goróya re iman ottu larifelaito saáil. **9** Montor Sául zibá re Pául óu ñake, íba Pak-Ruh lói furaiya ói ítar uzu suk lagaidi saái hoór de, **10** “Tui íbilíc

or fua, tui hárr kisím or dúka edde férokbazi lói furaiya, aar hárr gom ham or duccon. Tui Malik or uzu rasta re behañ gorá bilkúl bon no gorfíbi níki? **11** Saá, Malik tor ulða tíyaiye. Tui ańđá ói hooddin fán beil or foór úddwa no deki. Ebbé hétunot ítar uore kúwa edde andár aái foijjé; aar ítare át ot dóri loizai fare fán íte manúc átat doijje. **12** Ziín óiye híin deki hókumot-goróya wa ye iman ainné, kiyólla-hoilé yóggwa ye Malik or baabute ze taalim faiyé híin lói taajup óigilgoi. **13** Baade Pául edde íbar saáñti ókkol, Pafós ottu zaáñs ot góri Pampúliyat asé de Perga cóor ot aiccé, montor Yohánna ye ítara re eri Jerúsalem ot waafes giyyégoi. **14** Lekín ítara Perga ttu zai Pisídiyat asé de Enṭiyok ot aiccé, aar ebaadot-or-din mujilíc-hánat zai boiccégoi. **15** Tourat edde nobi ókkol or kitab ottu telawot goijjá ói baade, mujilíc-hánar sóddar ókkole ítarar hañse hotá diferáiyé de ki, “Báiyain, zodi tuáñra ttu honó nosíyoti hotá táke, tóoile boiyan goró.” **16** Hétunot Páule tíyai, áte icára gorí hoór de, “Ó Boni Isráil ókkol, tuáñra zetará Alla re ñooro, ańr hotá fúno: **17** Boni Isráil or Alla ye añárar bafadada gún ore basíloil, aar ítara re Ijíp dec ot táite ñoónr koum banaidíl, aar íbar kudurutir áte ítara re héntu neelai ainníl. **18** Salic bosór foijjonto íba ye moidan zagat ítarar adot ókkol ore bordac gorát accíl. **19** Yárbaade íba ye Kánan mulluk or háñt twa zati re dóncó gorífelai Nizor bonda ókkol ore ítarar mulluk híyan miras diyyé. **20** Ín beggún óite tokoriban sair-có fonzaic bosór laiggé. “Yárbaade nobi Sémuel or októ foijjonto Alla ye ítara re bisarhar ókkol diyyé. **21** Baade ítara eggwá baáñcca maiggé rár, Alla ye ítara re Binyamin or háandan ottu Kic or fua Sául ore dííl, zibá ye salic bosór foijjonto hókumot goijjíl. **22** Alla ye Sául ore baáñccagiri ttu félaidi baade Dawud ore ítarar baáñcca banaáil, zibár baabute íba ye yó gobá díye de ki, ‘Añí Ańr mon or manúc ísafe Jesir fua Dawud ore faiyí, zibá ye Ańr moncá beggún fura goríbo.’ **23** “Hé manúc cwar nosól ottu Alla ye Nizor waada mozin Boni Isráil ókkol olla eggwá Nejatdoya diferáiyé, íba óilde Isá. **24** Íba aibár age Yaháya ye tamám Boni Isráil ókkol or hañse touwár bápṭismar tobolik goijjíl. **25** Yaháya ye íbar tobolik or ham furussat goijjá óibarcot hoóil de, ‘Tuáñra ańí hon bóuli táaro? Tuáñra Zibár talac gorór íba ańí no. Montor soó, ańí baade eén Ekzon aiyér zibár téng or cenṭár or fíta kúli bolla úddwa

aíni laayek no.’ 26 “Ó báiyain, Ibrahím or fuain edde Alla re ñooroya Beyohúdi ókkol, nejat or e hóbor añárar hañse foónsa gíyeh. 27 Jerúsalem or bácin da ókkole edde ítarar sóddar ókkole Isá re nó siné, aar hárr ebaadot-or-din nobi ókkol or ze boiyan ókkol telawot gorá zah, híin óu nó buzé, hétolla ílara íba re fótua dí híin fura goijjé deh. 28 Ílara íba re mariféla fore de héndilla honó hosúri no faile yo, toóu íba re marifélaito Filat ore aros goijjíl. 29 Zeñtté ílara ttu íbar baabute pak-kalam ot zín asé híin beggún fura goijjá óiye, íba re kúruc ottu lamai eggwá hobor ot raikkíl. 30 Montor Alla ye íba re mora ttu zinda goijjé. 31 Aar íba boóut din foijjonto uitarár hañse dahádiye, zetará íbar fúañti Galil ottu Jerúsalem ot aiccíl. Ílara yala añárar koum or hañse íbar gobá óiye. 32 “Añára tuáñrar hañse e kúcir hóbor gán boiyan gorír, ki hoilé, Alla ye añárar bafdáda ókkol lói ze waada goijjíl, 33 híyan íba ye Isá re mora ttu zinda gorí ítarar fuain dor hañse, yáni añárar hañse fura goijjé. Zobur Córif or dui nombór rukút endilla asé, ‘Tuñí óilade Añr Fua, aijja Añí Tuáñr Baf óiye.’ 34 Alla ye íba re mora ttu zinda goijjé, hétolla íbar haiya honódin no foñsibó. Alla ye endilla hoiyé, ‘Añí tuáñra re pak edde sóiyi niyamot diiyum, zín Añí Dawud ore waada goijjílám.’ 35 Hétolla íba ye Zobur Córif or arek zagat óu hoiyé de, ‘Tuñí Tuáñr Pakzon or gaar haiya re foñsitó no diba.’ 36 “Dawud toh íbar zobatan Allar moksót or hédmot gorí baade moot or gúm ot forigiyói. íba re nizor bafdáda ókkol or fúañti dohón gorá gíyl, aar íbar haiya foñsigílgoi. 37 Montor Alla ye Zibá re mora ttu zinda goijjé íbar haiya toh nó foñse. 38 “Hétolla, ó báiyain, añr ttu tuáñra re yán zanaidito monehoór, ki hoilé, Isár duara guná maf faibar hotá tuáñrar hañse tobolik gorá zar. 39 Tuáñra Muúsar Córivot or duara ze guná ttu azad nó foo, híin beggún ottu uite azad faa zee niki íbar uore iman ané. 40 Hétolla úñciyar táikko, zeéne nobi ókkole boiyan goijjé de híin tuáñrar uore no, ki hoilé, 41 ‘Ó tooñcábazi-goróya ókkol, soó, taajup ó aar dónco óizogoi, kiyólla-hoilé Añí tuáñrar din ot endilla ekkán ham gorír, ziyán tuáñra re honókiye buzáidile yo ekin goittá no.” 42 Pául edde Bárnabas mujilíc-hána ttu neeli zaargói de októót, manúc ókkole aros gorát doijje de, ílara re e hotá íin aibó de ebaadot-or-din aró boiyan goittó. 43 Mujilíc fúrai baade boóut zon Yohúdi edde Yohúdir dórmot faráiy

de boóut zon Beyohúdi, Pául edde Bárnabas or fisá doijje. Tará duní zone ílara llói hotábattara hoiyé, aar Allar rahámot ot lagi táki bolla ílara re tuaijjo diyé. 44 Tarfo ebaadot-or-din cóor or beecbák manúc, Malik or kalam fúni bolla zoma óiye. 45 Montor manúc or dol deki Yohúdi ókkol hásorote furaigiyói, aar ílara Páule hoór de hotár ulða hotá ókkol hoói yore íba re beizzoti goijjíl. 46 Hétunot Pául edde Bárnabase hímmot or sáañte hoór de, “Añára ttu Allar kalam ebbe age tuáñrar hañse tobolik gorár zorur accíl. Tuáñra zettót híin inkar goijjó aar nizoré ofúrani zindigir laayek no bóuli táaijjo, yala añára Beyohúdi ókkol or híkka fírir. (aiñnios g166) 47 Kiyólla-hoilé Malike añára re endilla hókum díye de ki, ‘Añí tuáñra re Beyohúdi ókkol olla nur banaiyí, zeéne duniyair manúc beggúne nejat fa.” 48 Híyan fúni Beyohúdi ókkol bicí kúci óiye aar Malik or kalam or taarif gorát doijje; aar zetará re ofúrani zindigi lla basílowa gíyl ílara beggúne iman ainné. (aiñnios g166) 49 Héndilla góri Malik or kalam hé elakar agagurat fólígiyoi. 50 Montor Yohúdi ókkole ebaadotgár mocúr mayafuain ókkol ore edde cóor or sóddar ókkol ore uskaidiyé. Héengori ílara Pául edde Bárnabas or uore zulúm cúru gorá bay duní zon ore hé elaka ttu neelaidiyé. 51 Tói tará duní zone ítarar ulða téng or tollar dúil zárifelai lkóniya cóor ot giiyégoi. 52 Hériyar ummot ókkol kúciye edde Pak-Ruh lói furaiya ówat accíl.

14 Ikóniyat Pául edde Bárnabas Yohúdi ókkol or mujilíc-hánat giiyé. Hére tará eéngori tobolik goijjé, zeén níki Yohúdi edde Beyohúdi becábicí ye iman ainné. 2 Montor ze Yohúdi ókkole iman nú ané ílara Beyohúdi ókkol ore uskaidi yore imandár báiyain dor ulða matá hóraf gorídiye. 3 Toóu Pául edde Bárnabas hére boóut din táikkil; tará hímmot or sáañte Malik or baabute taalim dito, aar Malike tarár áta illayi-nicán ókkol edde taajuippa harhána ókkol dahái íbar rahámot or hotá sóiyi dé sábut goittó. 4 Montor cóor or manúc ókkol faát-faát óigilgoi; kessú Yohúdi ókkol or híkka, aar kessú sáhabi gún or híkka. 5 Hétolla hodún Beyohúdi ye edde Yohúdi ye ítarar sóddar ókkol lói mili sólla goijjé de, Pául edde Bárnabas ore cíl or dola mari bolla edde beizzoti gorí bolla. 6 Montor tará híyan zani faijje rár, héntu Lukáyoniya elakar cóor Lusítarat edde Darbit edde híin or atehañosór

zaga ókkol ot dáigiyegoi, 7 aar hére lagatar kúchóbor tobolik gorát accíl. 8 Lusítarat ézzon leng manúc boói tákito. Íba héndilla zormo óoil, aar honódin áñri fajjé de náí. 9 Hé manúc cwa Pául or boiyan fúinat accíl. Páule yóggwar uzu díyan dóri saiyé rár dekér de, yóggwa ttu gom ói bolla iman asé, 10 hétolla íba ye eggwá qóóñr abase qak mari hoór de, “Tuáñr ténge uzu gorí tíyo.” Hétunot yóggwa fál mari tíyaye aar áñrat doijje. 11 Páule goijjé de ham mán dekí manúc ókkole guzori Lukáyoniya zubane hoór de, “Añáar hañse insán or súrote debota ókkol lami aiccé!” 12 Ítara Bárnabas or nam dyíl Zeyus, aar Pául or nam dyíl Harmis, kiyólla-hoilé íba ye kalam or hotá bicí hoitó. 13 Zeyus debotar mondir gán cóor or ekkágori baáre accíl. Híyan or imame cóor or geit ot biríc goru ókkol edde golar mala ókkol ainníl, kiyólla-hoilé ítar ttu edde manúc or dol ottu Pául edde Bárnabas or hañse kurbani peec goittó mon accíl. 14 Montor sáhabi Bárnabase edde Páule híyan fúinne rár, nizor gair or hoor fárfelaiye, aar manúc or dol lwát duñri zai guzori-guzori hoór de, 15 “Ó dustó ókkol, tuáñra iín kiyólla gorór? Añára yó de tuáñrar qóilla insán. Añára tuáñrar hañse kúchóbor tobolik gorír de ki hoilé, tuáñra e behar siz iín ottu zinda Allar uzu fíro, zibá ye asman, zobin, doriya, edde híin or bútoze zín asé híin beggún foida goijjé. 16 Agor zobanat íba ye tamám koum ókkol ore nizor-nizor mon mozin soilto dyíl. 17 Toóu íba ye tuáñrar hañse endilla siz ókkol dii raikké zíine íbar gobá déh. Íbar meérbani iíne zahér ó, ki hoilé, íba ye tuáñra re asman ottu zór dee edde moósum mozin fósol ókkol dee; íba ye tuáñra re hána dee edde tuáñrar dil kúciye furaide.” 18 Hotá híin hoói baade yo, manúc ókkol ore bicí mockil or sáañte tarár hañse kurbani peec gorá ttu bon gorá foijjé. 19 Lekin Entiyok ottu edde Ikóniya ttu hoozzon Yohúdi hére aái manúc ókkol ore nizor híkka gorifelaiye. Baade ítara Pául ore cíl or dola maijíl, aar íba morigiyói bóuli tñari señsai-señsai cóor or baáre loigiyói. 20 Montor ummot ókkol íbar sairókul ttu zoma ói baade, íba urí cóor or bútoze waafes giiyégoi. Aar tarfor din íba Bárnabas or fúañti Darbi cóor ot giiyégoi. 21 Tará Darbit kúchóbor tobolik gorí becábicí ummot ókkol banaiyé. Baade tará abar Lusítarat, Ikóniyat, edde Entiyok ot fírigiyói. 22 Hére tará ummot ókkol or dil ore mozbut goijjíl, aar iman ot lagi tákito nosíyot gorí hoiyé

de, “Allar raijjet góilte añára ttu hámaha bicí mosibot ókkol bordac gorá foribó.” 23 Páule edde Bárnabase hárr zomát ot murubbi-neta ókkol tuillé, aar ruza rakí edde dua gorí ítara re Malik or át ot gosáidiye, zibár uore ítara iman ainné. 24 Tarfore tará Pisídiya elaka báy zai Pampúliyat aiccé, 25 aar Perga cóor ot kúchóbor tobolik gorí Attaliya cóor ot giiyégoi. 26 Baade héntu zaáñs ot góri waafes Entiyok olla rowana loiyé, zeřé tará re ham uúin goittó Allar rahámot or át ot gosáidiya gíyl zín tará ttu fura goijjá óiye. 27 Tará hére foónsi baade zomát or manúc beggún ore zoma goijjé, aar Alla ye tarár áta zín-zín goijjé híin beggún ítarar hañse boiyan goijjé, aró boiyan goijjé de, Alla ye Beyohúdi ókkol olla yó iman or duwar kúille. 28 Baade tará hére ummot ókkol or fúañti boóut din táikke.

15 Yohúdiya ttu kessú manúc nise aái imandár báiyain dore endilla taalim doijje de, “Zodi Muúsar Córíyot mozin ázomi no goró, tuáñra nejat fai no faribá.” 2 Híyan ot Páule edde Bárnabase ítara llói doró torkatorki edde barábari díye. Ahérit zomáte fáisela lóiyé de, Pául, Bárnabas edde ítarar bútotu hoozzon manúc uore Jerúsalem zai sáhabi gún lói edde buzurgó ókkol lói e mosólar baabute mocuwara gorá foribó. 3 Baade zomáte tará re diferáiyé; tará Fonikcíyar edde Samáriar bútotu zaite-zaite hére imandár báiyain dore zanaiyé de, Beyohúdi ókkol kéngori Allar uzu firer; híyane ítara beggún or hañse bicí kúci ainné. 4 Tará zeñtté Jerúsalem ot foónicce, zomát or maincé, sáhabi gúne edde buzurgó ókkole tará re estekbal goijjé, baade Alla ye tarár áta zín-zín goijjé híin beggún ítarar hañse boiyan goijjé. 5 Montor Féroci fírka ttu imandár boinné de hoozzon urí hoór de, “Beyohúdi ókkol ottu ázomi gorár zorur aar ítara re Muúsar Córíyot amól gorí bolla hókum díyar zorur.” 6 Hétunot sáhabi gúne edde buzurgó ókkole hé mosóla gán or uore báfi bolla zoma óiye. 7 Hére boóut torkatorki ói baade Fitore urí ítara re hoór de, “Ó báiyain, tuáñra toh zano, boóut din age Alla ye añré tuáñrar héntu basiloíye, zeéne añr muk ottu Beyohúdi ókkole kúchóbor or hotá fúni iman ané. 8 Aar Alla, zibá ye fottí ekzon or dil zane, íba ye Beyohúdi ókkol ore yó kobul goré de híyan ítara re Pak-Ruh dii yore sábut goijjé, zendilla íba ye añára re yó dífl. 9 Íba ye añárar

edde ítarar bútoe honó forók nó goré, kiyólla-hoilé íba ye toh ítara iman anóne ítarar díl ore yó sáf goijjé. **10** Tóí yala, ze zuañl añárar bafadada ókkole boóí nó fare aar añára yó nó fari, yíba ummot ókkol or hañd ot tulídi Alla re kiyólla entán gorór? **11** Añára biccác gorí de, añára nejat faiyí de Malik Isár rahámote, zendilla ítara yó faiyé.” **12** Hétunot manúc beggún nizám mári táikkil, aar Pául edde Bárnabas or áta Alla ye Beyohúdi ókkol or hañse ze illayi-nicán ókkol edde taajuippa harhána ókkol daháil híin tará ttu fúnat accíl. **13** Tará ttu hotá hoiyá ói baade, Yakube hoór de, “Báiyain, añr hotá fúno. **14** Sáimone añára re buzáidiye, Alla ye Beyohúdi ókkol or bútotu Nizor lla eggwá koum basíloito cúrut hondilla gori ítarar uzu nozor diyé deh. **15** Hotá híyan lói nobi ókkol or hotá yó mil há; pak-kalam ot endilla asé, **16** ‘Híin baade Añi waafes aiccúm, aar Dawud or raijjo re agor dóilla banai felaiyum. Híyan or bángasúra ókkol hónggori yore abar doró goríyum, **17** zeéne ar baki insán beggúne Mabud ore tuwa, tamám Beyohúdi ókkole úddwa, zetará re Añr bonda ói bolla ñaha giyé. Mabude héndilla fórmaye, zibá ye híin **18** boóut age lóti zanaidi di aiyér.”

(aiōn g165) **19** Yakube aró hoór de, “Hétolla añr rai óilde, Beyohúdi zetará Allar uzu fírer ítara re añára tokolif no dih, **20** bólke añára ítarar hañse endilla lekí, ítara zen muttir hañse kurbani diya nafak hána na háa, zená no goré, gola sibi marifélaiya januwat or gusso na háa, edde lou na háa. **21** Kiyólla-hoilé Muúsar Córivot toh agor zobana ttu lóti fottí cóore-cóore tobolik gorá zar, aar fottí ebaadot-or-din mujilíc-hána ókkol ot telawot gorá zar.” **22** Baade sáhabi gúne edde buzurgó ókkole zomát or manúc beggún lói mili fáisela goijjé de, ítarar bútotu hoozzon manúc basíloi Pául edde Bárnabas or fúañti Enṭiyok ot diferaíbo. Ítara basíloiye de óilde, imandár báiyain dor bútoe sóddar accíl de Yohúdah re, zibá re Barsába bóuli hoó, edde Sílas ore. **23** Tarár áta ítara e ceñrí gán diferaíl: “Enṭiyok ot, Síriyat, Kilicíyat asó de Beyohúdi imandár báiyain, tuáñrar báiyain añára sáhabi gún or edde buzurgó ókkol or torfóttu tuáñra re sólám. **24** “Añára fúinni de, añárar héntu hoozzon manúc añárar honó hókum sára aái tuáñra re tarár hotá lói ferecan goijjé, aar tuáñrar díl ot duk diyé. **25** Hétolla añára beggúne razirobot ói fáisela goijjé de, hoozzon manúc basíloi tuáñrar hére añárar

adorja Bárnabas edde Pául or fúañti diferaí bolla. **26** Bárnabas edde Pául óilde endilla manúc zetará añárar Malik Isá Mosihr nam or wasté nizor zan hótarat félaiye. **27** Añára Yohúdah re edde Sílas ore tuáñrar hañse diferaír, zetará nizor muké tuáñra re añára leikkí de híin forí fúaibo. **28** Pak-Ruh ttu edde añára ttu gom laiggé de, e zoruri hotá gún baade tuáñrar uore ar honó fuñzá tulí no di bolla, **29** ki hoilé, tuáñra muttir hañse kurbani diya hána ókkol na háiyó, lou na háiyó, gola sibi marifélaiya januwat or gusso na háiyó, edde zená no goriyo. Zodi tuáñra híin gorá ttu basi táko, bála óibo. Kúda háfiz.” **30** Baade tará re diferaí giyé, aar tará nise Enṭiyok ot giyé. Hére tará zomát or manúc beggún ore zoma gorí ceñrí gán diyé. **31** Manúc ókkole ceñrí gán forí nosfoti hotá loot faiyé rár, bicí kúci óiye. **32** Yohúdah edde Sílas, zetará nize nobi, tará imandár báiyain dore boóut hotá lói nosfot goijjíl edde mozbut goijjíl. **33** Tará hére boóut din táki baade, imandár báiyain de tará re cántir dua loi bidai diyé, zeéne zetará tará re diferaíye ítarar hére tará waafes zaigói fare. **34** Lekin Sílas ottu hére táaiza gom laiggíl. **35** Pául edde Bárnabas óu Enṭiyok ot aró táikkil, aar hére tará aró bicí maincór fúañti manúc ókkol ore Malik or kalam or taalim diyat edde tobolik gorát accíl. **36** Hooddin baade Páule Bárnabas ore hoór de, “Aiyó, añára ze cóor gún ot waafes zai imandár báiyain ókkol keen asé saáigoi.” **37** Bárnabase Yohánna re fúañti loizaitó saáil. Hé Yohánna re Markus hoói yó ñake. **38** Montor Páule íba re loizon gom no óibo bouli báippil, kiyólla-hoilé yár age íba ye ítara re Pampúliyat félai zai ítarar fúañti ham ar nó goré. **39** Híyan olla ítarar bútoe eén torkatorki óiye zeén níki ítara ezzon ottu ezzon síra óigiyoi. Baade Bárnabase Markus ore fúañti looi zaáns ot góri Sáifrus olla bacá lóiyé. **40** Montor Páule Sílas ore baiccé, aar imandár báiyain de ítara re Malik or rahámot or át ot gosáidi baade ítara rowana loiyé, **41** aar zomát or manúc ókkol ore iman ot mozbut gorái-gorái Síriya edde Kilicíya báy zaat doijje.

16 Zaité-zaité Pául Darbi cóor ot foónicce, baade Lusítara cóor ot. Hére Timóti nam or ezzon ummot accíl. Yóggwar maa óilde ezzon Yohúdi zibá imandár boinné, montor yóggwar baf accíl de Girík koum. **2** Lusítarat edde Ikóniyat

asé de imandár báiyain de yóggwar nam goittó. accíl. Ahérit Pául ottu bezar laiggíl, aar fíri 3 Pául ottu yóggwa re fúañti loizaitó monehoiyé, hé jin nwá re hoór de, “Añí toré Isá Mosihr hétolla yóggwa re hériyar Yohúdi ókkol or zoriya ázomi goráil, kiyólla-hoilé yóggwar baf name hókum dí, tui ibáhr bútottu neelizagói.” Hétunot jin nwá híbar bútottu neeligiyói. 19 Girík koum de híyan ítara beggúne zainto. 4 Montor hé bañdir girós ókkole dekér de, ítara Tará cóore-cóore zai hookkán niyom uúin mani tiañ hamai faribár acá ar náí, hétunot ítara Pául bolla zanaidíl zín Jérusalem or sáhabi gúne edde búzurgó gúne zari goijjíl. 5 Héndilla góri zomát or manúc ókkol iman ot mozbut ówat accíl, aar ítara dol dinbodin barát accíl. 6 Pául edde íbar sáañti ókkol Fergiya edde Galatíyar elaka báy zaat doijje, kiyólla-hoilé Pak-Ruh ye tará re Eciyat tobolik no goittó maná goijjíl. 7 Tará Misíya elakar címat foónsi baade Bitúniya zilár bútoze zai bolla kucíc goijjíl, montor Isár Ruh ye tará re zaito nó deh. 8 Hétolla tará Misíya báy zai nise Toras cóor ot giyyégoi. 9 Hére Páule raitta ekkán dorcón ot dekér de, Makedóniyar ézzon manúce tíyai yore íba re bicí aros gorí hoór de, “Makedóniyat aái yore añára re modot gorógai.” 10 Páule dorcón nán dekí baade, añára Makedóniyat zai bolla éhon toiyar ógiyigoi, kiyólla-hoilé añára buzí faijji de, ítara hañse kúchóbor tobolik gorí bolla Alla ye añára re ñaikké. 11 Hétolla añára Toras ottu zaáñs ot góri ruúru Samotarak díyat gíllam, aar tarfor díni Niyapúlís cóor ot. 12 Baade héntu Filíppi cóor ot giyyí, ziyán Makedóniyar meén cóor aar Romi ókkol táke de zaga. Añára hére hooddin táikkilam. 13 Ebaadot-or-din añára cóor or geit or baáre hál or hañsat giyyí, ñaaijijilam de hére dua goittó ekkán zaga faiyum. Añára boói yore hodún beriyáin lói hotá hoóilam zetará hére zoma óiye. 14 Fúner de ítara bútoze Tuatíra cóor or Lídiya nam or eggwá mayafua accíl, zibá ye bayoinna rong or hoor besitó. Híba Allar ebaadotgár accíl. Pául or boiyan díyan dí fúni bolla Malike híbar díl kúlidil. 15 Zeñtté híba ye edde híbar gór tíya ye báp̄tisma loiyé, híba ye añára re eén hoói nizor gór ot dawot dí, “Zodi tuáña añré Malik or imandár bóuli táaro, tooile aái añr gór ot tákogai.” Héndilla hoói híba ye añára re mojbur goijjé. 16 Ek díni añára duar zagat zair de októ eén óiye, añára re ek bañdi ye loot faiyé zibá re eggwá gonot bonar jine faiyé. Híba ye agun hotá hoói-hoói nizor girós ókkol olla bicí ñaí-foicá hamaitó. 17 Híba ye Pául or edde añárar fisé-fisé aái guzori hoór de, “Manúc itará óilde Alla Tálar gulam, zetará tuáñrar hañse nejat or rastar hotá boiyan gorér.” 18 Híba ye héndilla boút díni fán gorát accíl. 19 Hé jin nwá re hoór de, “Añí toré Isá Mosihr name hókum dí, tui ibáhr bútottu neelizagói.” Hétunot jin nwá híbar bútottu neeligiyói. 20 Montor hé bañdir girós ókkole dekér de, ítara Tará cóore-cóore zai hookkán niyom uúin mani tiañ hamai faribár acá ar náí, hétunot ítara Pául bolla zanaidíl zín Jérusalem or sáhabi gúne edde búzurgó gúne zari goijjíl. 21 Héndilla góri zomát or manúc ókkol iman ot mozbut ówat accíl, aar ítara dol dinbodin barát accíl. 22 Pául edde íbar sáañti ókkol Fergiya edde Galatíyar elaka báy zaat doijje, kiyólla-hoilé Pak-Ruh ye tará re Eciyat tobolik no goittó maná goijjíl. 23 Tará Misíya elakar címat foónsi baade Bitúniya zilár bútoze zai bolla kucíc goijjíl, montor Isár Ruh ye tará re zaito nó deh. 24 Hétolla tará Misíya báy zai nise Toras cóor ot giyyégoi. 25 Hére Páule raitta ekkán dorcón ot dekér de, Makedóniyar ézzon manúce tíyai yore íba re bicí aros gorí hoór de, “Makedóniyat aái yore añára re modot gorógai.” 26 Páule dorcón nán dekí baade, añára Makedóniyat zai bolla éhon toiyar ógiyigoi, kiyólla-hoilé añára buzí faijji de, ítara hañse kúchóbor tobolik gorí bolla Alla ye añára re ñaikké. 27 Hétolla añára Toras ottu zaáñs ot góri ruúru Samotarak díyat gíllam, aar tarfor díni Niyapúlís cóor ot. 28 Baade héntu Filíppi cóor ot giyyí, ziyán Makedóniyar meén cóor aar Romi ókkol táke de zaga. Añára hére hooddin táikkilam. 29 Ebaadot-or-din añára cóor or geit or baáre hál or hañsat giyyí, ñaaijijilam de hére dua goittó ekkán zaga faiyum. Añára boói yore hodún beriyáin lói hotá hoóilam zetará hére zoma óiye. 30 Fúner de ítara bútoze Tuatíra cóor or Lídiya nam or eggwá mayafua accíl, zibá ye bayoinna rong or hoor besitó. Híba Allar ebaadotgár accíl. Pául or boiyan díyan dí fúni bolla Malike híbar díl kúlidil. 31 Zeñtté híba ye edde híbar gór tíya ye báp̄tisma loiyé, híba ye añára re eén hoói nizor gór ot dawot dí, “Zodi tuáña añré Malik or imandár bóuli táaro, tooile aái añr gór ot tákogai.” Héndilla hoói híba ye añára re mojbur goijjé. 32 Ek díni añára duar zagat zair de októ eén óiye, añára re ek bañdi ye loot faiyé zibá re eggwá gonot bonar jine faiyé. Híba ye agun hotá hoói-hoói nizor girós ókkol olla bicí ñaí-foicá hamaitó. 33 Híba ye Pául or edde añárar fisé-fisé aái guzori hoór de, “Manúc itará óilde Alla Tálar gulam, zetará tuáñrar hañse nejat or rastar hotá boiyan gorér.” 34 Híba ye héndilla boút díni fán gorát

Hétunot ziyól or zimmadar gwá ye Pául ore hoór de, “Tuáñra duní zon ore hálas gorídi bolla bisarhar ókkole hókum díye. Tuáñra yala zaigói faribá; cántir sáañte zoogói.” 37 Montor Páule fulic cún ore hoór de, “Añára hódun Romi manúc ói baade yo ítara añára re bisar ot no tulí beggún or muúntu bet mari ziyól ot díye, aar ehón ítara añára re nizám or sáañte hálas gorí dér de níki? Héndilla bilkúl ói no faribó; ítara nizebaze aái añára re hálas goróukgai.” 38 Baade fulic cúne hotá híin bisarhar gún ore zanaíyé, aar Pául edde Sílas Romi manúc de fúni ítara ñoorraigíyói. 39 Ítara aái tará ttu maf saiyé, aar tará re ziyól or baáre aní aros gorér de, “Meérbani góri cóor gán ottu zoogói.” 40 Tará ziyól ottu hálas ói baade Lífdiyar gór ot giiyé; hére tará imandár báiboináin ókkol lói dola óiye, aar ítara re hímmot díye. Tarfore tará héntu giiyégoi.

17 Tará Amfipolis edde Apoloníya cóor báy zai Tisólonika cóor ot aiccé, zeṛé Yohúdir ekkán mujilíc-hána accíl. 2 Páule nizor niyom mozin mujilíc-hánat giiyé, aar lagatar tin ebaadot-or-din foijjonto ítara llói pak-kalam ottu toskara ókkol goijjé. 3 Íba ye toskara gorí buzá de edde dolil der de ki, Mosih ttu duk faibar edde mora ttu zinda ówar zorur accíl. Íba ye hoiyé de, “Añí tuáñra re ze Isár baabute boiyan gorír, íba óilde hé Mosih.” 4 Ítara hoozzone iman aní Pául edde Sílas lói búng óiye, héndilla ñoñr ek dol Girík dindár manúc edde boóut zon mocúr mayafuain óu búng óiye. 5 Montor ar baki Yohúdi ókkol ottu gairot lagi bazar ottu hodún hóraf manúc lói eggwá ñaái baindé aar cóor ot úrussul foida goijjé. Ítara Jason or gór ore hámla gorí Pául edde Sílas ore tuwaiyé, zeéne tará re awam ókkol or muúntu aní fare. 6 Montor tará re zettót tuwai nó faa, ítara Jason edde kessú imandár báiyain dore ñani-ñani cóor or adikari ókkol or muúntu ainné, aar guzori hoór de, “Manúc itará fura duniyait ferecani foida gorí yala eṛé yó aiccé, 7 aar Jasone itará re nizor gór ot zaga diiyé. Itará beggúne baáñcca Káisar or hókum or ulḁa goré, aar hoó de, Káisar bade aró ekgwá baáñcca asé, zibár nam Isá.” 8 Héndilla hoói ítara awam ókkol or edde cóor or adikari ókkol or matá hóraf góridiye. 9 Montor Jason edde oinno manúc ókkol tará lla zabin óiye rá, sóddar ókkole tará re eridiyé. 10 Hé din raitta imandár báiyain de

toratori Pául edde Sílas ore Beriyat ñuñraidiyé. Héṛe foñsi yore tará Yohúdir mujilíc-hánat giiyé. 11 Héṛiyar Yohúdi híin Tisólonika cóor or Yohúdi ókkol or túaro cáda-cída accíl, kiyólla-hoilé ítara ñoñr azzuye kalam fúni kobul goijjíl. Ítara Páule zín hoitó híin fottí din pak-kalam tahákít gorí sóiyi né na sóiyi saitó. 12 Hétolla ítara ttu boóut zone iman ainné; héndilla boóut zon Girík mocúr mayafuain edde morotfuain de yó iman ainné. 13 Montor Tisólonikar Yohúdi ókkole zeñtté Páule Beriyat óu Allar kalam tobolik gorér de fúinne, ítara hére yó zai manúc ókkol ore uskaidi oulzóul foida goijjé. 14 Hétolla imandár báiyain de toratori Pául ore doiijjar hañsat ñuñraidiyé, montor Sílas edde Timóti hére táigilgoi. 15 Zetará Pául ore baráidito gífl ítara íba re Aten cóor foijjonto foñsaiidiye, aar Sílas edde Timóti zendilla fare héndilla hára Pául or hañse ai bolla hókum fai yore ítara waafes giiyégoi. 16 Páule Aten cóor ot Sílas olla edde Timóti lla entezar gorér de októ, hé cóor gán mutti loi furaiya de deki íba ttu díl ot bici ferecan laiggíl. 17 Hétolla íba ye mujilíc-hánat Yohúdi edde dindár Beyohúdi ókkol lói toskara ókkol goittó, héndilla somónit zai zetará re lootfa ítara llói yó fottí din goittó. 18 Ipíkuri edde Stoiki fírkar hoozzone úzure yó íba llói barábari díyat doiije, hoóne hoór de, “E fáltu ite kii hoitó sár dé?” Ar hoóne hoór de, “Ite toh eggwá bidecí debotar baabute taalim der fán lager.” Ítara e hotá etollá hoiyé, kiyólla-hoilé Páule Isár baabute edde mora ttu zinda ówar baabute kúchóbor tobolik gorát accíl. 19 Ítara Pául ore Ariyopagus mujilíc or hére aní fusár gorér de, “Tui ze noya taalim ekkán doór híyan kii añára zani faijjum né? 20 Kiyólla-hoilé tui toh añárar han ot endilla hotá ókkol anór, zín honódin fúna nó zah, hétolla añára ttu híin or sóiyi maáni zainto monehoór.” 21 Tamám Ateni ókkol edde bidecóiitta ókkol zetará hé cóor ot tákito, ítara siríf noya-noya hotá ókkol howát edde fúnat ñaim hañaitó. 22 Páule Ariyopagus mujilíc ot tñyai hoór de, “Ó Ateni ókkol! Aní dekir de, tuáñra hárr mikká ttu bici dindár. 23 Kiyólla-hoilé añí berai-berai tuáñra fuñza goró de jiníc ókkol díyan dóri saáir de októ, añí endilla ekkán kurbani-gáñ yó deikkí ziyán ot leikká asé de, ‘OSIN KÚDAR HAÑSE.’ Hétolla tuáñra no zani zibár fuñza gorór, añí íbar baabute boiyan gorír deh. 24 “Ze Alla ye duniyai re edde híyan ot asé de híin beggún

foida goijjé, íba zettót asman zobin or Malik, íba insán or áte banaiya mondir ókkol ot no táke. 25 Íba honó kessúr muútaç ot no fore, hétolla íba ttu insán or át or honó hédmot or zorur náí, kiyólla-hoilé íba Nize fottíkíyo re zindigi dee, niyác dee edde beggún dee. 26 Ekzon manúc ottu íba ye fura duniyait táki bolla tamám koum ókkol foida goijjé, aar ítara hoñtté hon zagat takíbo híin óu íba ye age lóti fáisela gorí raikké. 27 Alla ye héndilla etollá goijjé, zeéne ítara átai-átai tuwai faibar acáye íbar talac goré, montor háleke íba añára honókiyo ttu duré de no. 28 Kiyólla-hoilé añára toh íbar bútoze zindigi harai, solafíra gorí edde zinda así. Tuáñrar kessú cáir ókkole úddwa endilla hoiyé, ‘Añára yó íbar fuain.’ 29 “Hétolla, añára zettót Allar fuain, añára ttu endilla kíyal nu aná foribó de ki, Kúdayi hoó de híyan cúna, sañdi, yáh fattór or dóilla ekkán sóbi, ziyán or cokól insán or ańka edde báfani lói bana giyé. 30 Agor zobanat manúc ókkole Alla re no zainto de híyan íba ye dekéle yo nó deké fángori tákito, montor yala íba ye hárr zagar manúc beggún ore touwá gorí bolla hókum der. 31 Kiyólla-hoilé íba ye ekgwá din fík gorí raikké, ze din ot íba ye Nizor basíloiya Manúc cwar áta insáf lói duniyair bisar goríbo. íba ye híyan íba re mora ttu zinda gorí manúc beggún or hañse sábut goijjé.” 32 Zeñtté ítara mora ttu zinda ói urár baabute fúinne, hoozzone Pául ore téceraiye, montor ar hodúne hoór de, “Añára yían or baabute tuáñr ttu arek motto fúniyum.” 33 Baade Pául hé mujilíc ottu giyégoi. 34 Hoozzon manúc íba llói bóng díye aar iman ainné. Imandár ítarar bútoze mujilíc híyan or membór Diyónisiyus accíl, Damari nam or eggwá mayafua accíl, fúañti aró hoozzon accíl.

18 Yárbaade Pául Aten cóor ottu bacá lói Kórin cóor ot giyé. 2 Héře íba ye Ekúila nam or ézzon Yohúdi loot faiyé, zibá Pontus ot zormo óoil. Baañcca Kalediyuse Yohúdi beggún ore Rom sári zaitogói hókum díyl de hétolla, yóggwa kessú řaim age yóggwar bou Prisíla re looi Ítali ttu aágilgoi. Páule ítara re saitó giyé, 3 aar íba yó zettót ítarar dóilla řambu-řakoya, íba ítarar fúañti táki ham goijjíl. 4 íba ye fottí ebaadot-or-din mujilíc-hánat toskara ókkol gorí-gorí Yohúdi ókkol ore edde Girík ókkol ore borai aníbar kucíc goittó. 5 Zeñtté Sílas edde Timóti Makedóniya ttu aiccé, Páule kalam

tobolik gorát furafuri lagi táka cúru goijjé. íba ye Yohúdi ókkol or hañse gobá díto de, Isá óilde Mosih. 6 Montor Yohúdi ókkole zettót Pául or muhálefi edde beizzoti gorér, íba ye ítarar ulđa nizor gair or hoor zárífelai hoór de, “Tuáñrar lou wór zimma tuáñrar matár uore óuk! Ańí behosúr. Ańí ehón ottu lóti Beyohúdi ókkol or héře zaiyumbói.” 7 Yárbaade Pául mujilíc-hána sári ek manúc or góç ot giyé, zibár nam Titus Yustus. Yóggwa Allar ebaadotgár accíl, aar yóggwar góç gán mujilíc-hánar dake accíl. 8 Mujilíc-hánar sóddar Krispuse edde yóggwar góç řiya ye Malik or uore iman ainníl, héndilla Pául or boiyan fúni boóut Kórintióle yó iman ainníl aar bápřisma lolil. 9 Ek din raitta Malike Pául ore ekkán dorcón ot hoór de, “No dőoraic, bólke howát ták, nizám ói no tákic, 10 kiyólla-hoilé Ańí tor fúañti-fúañti así. Tor hóti gorí bolla toré honókiye hámla no goríbo, kiyólla-hoilé e cóor ot Ańr ttu bicí manúc asé.” 11 Tói Pául der-bosór foijjonto Kórin ot táki maincóre Allar kalam or taalim díyl. 12 Montor Galiyo zeñtté Akaya elakar hókumot-goróya accíl, Yohúdi ókkol ektofák ói Pául or hélaç řiyaiye aar íba re adalot ot ainné. 13 Ítara hoór de, “Manúc íbá ye maincóre Allar ebaadot endilla torikaye goittó uskaider, ziyán Córiyot or ulđa.” 14 Páule hotá howá cúru goitté, Galiyo ye Yohúdi ókkol ore hoór de, “Ó Yohúdi ókkol, zodi tuáñrar elzam yían honó sóiyi hosúrir yáh gollot ham or baabute óito, tóoile tuáñrar hotá fúnon añr lla hazor óito. 15 Montor yían ot zettót taalim, nam edde tuáñrar nizor córiyot or baabute súwal gólaiya asé, yían ore tuáñra nizebaze hól gorógoi; ańí endilla maamelar bisarhar óito no saír.” 16 Héen hoói yóggwa ye ítara re adalot ottu duñraidiyé. 17 Hétunot ítara beggúne mujilíc-hánar sóddar Sostin ore dóri yore adalot or muúntu mara-dóra goijjé. Montor Galiyo ye híin or híkka honó díyan nó deh. 18 Pául Kórin ot boóut din táki baade, imandár báiboináin dor ttu bidai loi zańs ot góri Síriya mulluk ot zai bolla rowana óiye; fúañti Prisíla edde Ekúila yó accíl. Kinkíriya cóor ot táite íba ye nizor sul harífelail, kiyólla-hoilé íba ekkán manoc or tole accíl. 19 Tará Ífisas cóor ot foóñsi baade Páule Prisíla edde Ekúila re héře raikké. Baade íba nize mujilíc-hánat zai yore Yohúdi ókkol lói toskara gorát doijje. 20 Yohúdi ókkole íba re aró hooddin ítarar fúañti táki bolla aros goijjíl, montor íba

razi nó. **21** Bólke zaibarcót ítara re hoór de, “Alla ye sailé añí tuáñrar hañse abar aiccúm.” Baade íba zaáñs ot góri Ífisas ottu rowana óiye, **22** aar Kaisáriyat lami baade uore Jerúsalem ot giyyé. Tarfore hériyar zomát or manúc ókkol ore sólám zanai Entiyok ot giyyégoi. **23** Hére hooddin táki baade íba Galatíya edde Fergiya elakar agagurat zai-zai ummot ókkol or iman mozbut gorát accíl. **24** Hé októt Apólos nam or ézzon Yohúdi Ífisas ot aiccíl, zibá Alexzendariya cóor ot zormo óoil. Yóggwa ye cúndorgori waáz goittó, aar pak-kalam furafuri zainto. **25** Yóggwa ye Malik or torikar baabute taalim faáil, aar bici josbar sáañte Isár baabute sóiyigori taalim dito edde cíkka díto, montor yóggwa ye zainto de siríf Yaháyar báptismar baabute. **26** Yóggwa ye hímmot or sáañte mujilíc-hánat waáz gorát doiije, montor Prisíla ye edde Ekúila ye zeñtté yóggwar hotá fúinne, ítara yóggwa re ítarar gór ot loizai Allar rastar baabute aró cúndorgori buzáiyé. **27** Apólos ottu Akaya elakat zaito monehoiyé rár, Ífisas or imandár báiboináin ókkole yóggwa re hímmot díye, aar yóggwa re estekbal gorí bolla hériyar ummot ókkol or hañse ekkán ceñrí leikké. Aar zetará Allar rahámote iman ainné ítara re yóggwa ye hére foónsi baade bici modot goijjé. **28** Kiyólla-hoilé yóggwa ye Isá óilde Mosih de híyan pak-kalam ottu dolil diyat accíl, aar héndilla gorí yóggwa ye manúc ókkol or muúntu Yohúdi ókkol ore zuresúre gollot sábut goijjíl.

19 Apólos Kórin ot tákite, Pául Ecíya elaka báy sofór gorí Ífisas ot aiccé. Hére íba ye hoozzon ummot loot faáil. **2** Íba ye ítara ttu fusár gorér de, “Tuáñra iman ainnó de októt Pak-Ruh faáila né?” Ítara zuwab der de, “Nó fai, añára toh Pak-Ruh asé bóuli úddwa nó fúni.” **3** Hétunot Páule fusár gorér de, “Tóoile tuáñra har báptisma loiyó dé?” Ítara zuwab der de, “Yaháyar báptisma.” **4** Páule hoór de, “Becók Yaháya ye touwár báptisma díye. Montor íba ye toh manúc ókkol ore endilla hoóil, ‘Añí baade aibó de íbar uore iman aníyo, yáni Isár uore.’” **5** Hotá híyan fúni ítara Malik Isár name báptisma loiyé. **6** Aar Páule ítarar uore át díye rár, ítarar uore Pak-Ruh aiccé, baade ítara gabi zubane hotá howát doiije, aar Allar kalam boiyan gorát doiije. **7** Ítara tokoriban baró zon beṛaáin accíl. **8** Yárbaade Pául mujilíc-hánat zai tin mac hímmot or sáañte tobolik goijjíl, aar Allar raijor baabute

toskara ókkol gorí ítara re boṛaibár kucíc goijjíl. **9** Montor ítara hoozzon or dil doró óigilgoi, aar ítara iman nu aní maincór muúntu Malik or Torikar baabute gifot ókkol gorát doiije. Hétolla Pául ítara ttu síra óigilgoi aar ummot ókkol ore fúañti loizai Turanus nam or ezzon manúc or morkos ot fottí din toskara goittó. **10** Héndilla dui bosór fán ówat accíl, hétolla Ecíyat tákito de Yohúdi edde Girík beggúne Malik or kalam fúni faijjíl. **11** Alla ye Pául or duara endilla taajuippa keramot ókkol goittó, **12** zeén níki íbar nummal edde gaar uoror hoor ókkol íbar gaat bazái biyaraimmar hañse loizailé, ítarar biyaram ókkol gom óizaytoi aar hóraf jin ókkol neelizaytói. **13** Hoozzon Yohúdi zetará zaga-zaga zai manúc ókkol ottu hóraf jin ókkol dáfaito, ítara Malik Isár nam estemal gorí yó héndilla goríbar kucíc goijjíl. Ítara hoiyé de, “Añára toré Isár name neeliai bolla hókum dí, Zibár baabute Páule tobolik goré.” **14** Sekiva nam or ézzon Yohúdir doóñr imam or háñt twa fua ye yó héndilla goittó. **15** Ekbar hóraf jine ítara re hoór de, “Isá re toh añí siní, aar Pául ore yó siní, montor tuáñra hon?” **16** Hétunot ze manúc cwa re hóraf jine faiyé íte ítara háñt óu zon or uore záp maiije, aar ítara beggún ore ziti eén hámla goijjé, zeén níki ítara zohóm fai gór gán ottu biyossor dáigiyegoi. **17** Tói Ífisas ot tákoya Yohúdi edde Girík beggúne zettót e hóbor yíán faiyé, ítara beggún dooraigiyói, aar Malik Isár nam or mohíma óiye. **18** Iman ainné de ítara boóut zone aái nizor-nizor hórafi ókkol cíkar gorí zahér goijjíl. **19** Aar ítarar bútotu boóut zon zetará age jadugor accíl, ítara nizor-nizor kitab ókkol aní yore ekkán ot zoma gorí beggún or muúntu furat difélaiye. Ítara hé kitab pún or dam hísaf goijjé rár dekér de, muṭmaṭ fonzaic ázar dinár óiye. **20** Héndilla góri Malik or kalam bicígori fólat accíl, aar manúc ókkol or dil zitat accíl. **21** Híin beggún ói baade, Páule Makedóniya edde Akaya elaka báy Jerúsalem ot zaito niyot goijjé. Íba ye hoiyé de, “Hére zai baade añr ttu Rom cóor ot óu zaa foribó.” **22** Tói íba ye nizor dui zon modotgár ore, yáni Timóti re edde Erastus ore íbar age Makedóniyat diferáiyé, montor íba Ecíya elakat hooddin táigilgoi. **23** Hé októt Malik or Torikar baabute doóñr hánggama uiṭṭé. **24** Kiyólla-hoilé hére Dimiteriyus nam or ezzon rufar bainna accíl, zee niki devi Artemis or gura-gura mondir ókkol banaitó, aar hé hame mistíri ókkol olla

bicí fáidai aintó. **25** Yóggwa ye ítara re edde héndilla ham or oinno mistíri ókkol ore fúañti matai hoór de, “Báiyain, tuáñra toh zano, añára e ham or zoriya bála amodonni fair. **26** Tuáñra yían óu deków edde fúnor, Páule siríf Ífisas ot no bólke fura Ecíyar bicí maincóre úddwa bíraifelaiye deh. Íba ye hoó de, át or banaiya debota ókkol kessú no. **27** Híyan or zoriya siríf añárar ham or uore bodnam aibó de no, bólke muhán devi Artemis or mondir or izzot or hání yó óibo aar híbar muhángiri yó nac óizayboi, zibá re Ecíyar edde fura duniyair maincé fuñza goré.” **28** Híyan fúni ítara ttu bicí guccá uitté, aar guzori-guzori hoór de “Íficiól or devi Artemis muhán.” **29** Éhon or bútoze guñra cóor gán oulzóul ot forigiyói. Manúc ókkole Gayus edde Aristarkus nam or ze dui zon Makedóniol Pául or fúañti sofór ot zaar ítara re dórifelai fúañti ekku duñre, mujilíc goré de zaga gán ot giyyé. **30** Montor Pául manúc or ñaái or muúntu zaito saiyé rár, íba re ummot ókkole zaito nó deh. **31** Ecíyar hoozzon elakayi zimmadar ókkol zetará Pául or dustó, ítara yó íbar hañse ekkán hóbor foónsai bicí aros goijjíl de, íba zen mujilíc goré de zaga gán ot no zaa. **32** Héře manúc ókkol guzorat accíl, hodúne yían hoói guzorer aar hodúne waán hoói guzorer. Boóut zone ítara héře kiyólla zoma óiye de úddwa hoi no fare. **33** Hodún Yohúdi ye Alexzendar ore manúc or ñaái war bútotu neelai ítarar muúntu díye; yóggwa ye manúc ókkol ore áte icára gorí nizám óito hoiyé, zeéne yóggwa ye mujilíc or muúntu sófai dí fare. **34** Montor ítara zettót yóggwa Yohúdi de híyan ót faiyé, ítara beggúne ek abase dui gónða foijjonto endilla guzorat accíl, “Íficiól or devi Artemis muhán.” **35** Baade ahérit, cóor or kerani ye manúc ókkol ore nizám márai hoór de, “Ó Íficiól, e hotá yían toh beggúne zane, Ífisas óilde muhán devi Artemis or mondir or edde sóbi waán or sóoñloya, ziyán asman ottu foijjé. **36** Hétolla, iín zettót inkar gorí no fare de héndilla hákikot ókkol, tuáñra ttu nizám ón sáa, aar bánggori kessú no gorón sáa. **37** Kiyólla-hoilé tuáñra e manúc zíin ore eře ainno, ítara no mondir ottu ñahañiti goijjé aar no añárar devir kuféi goijjé. **38** Hétolla, zodi Dimiteriyus ottu edde yóggwar sáañti mistíri ókkol ottu honókiyor ulða cékayot táke, adalot ókkol toh kúla asé, aar hákim ókkol óu asé. Héře zai ítara ezzon olla ezzone mooddima goróukgoi. **39** Montor zodi tuáñra yaar túaro kessú goittó

soó, tooile híyan kaanuni mujilíc ot fáisela gorá foribó. **40** Aijja óiye de hánggamar zoriya añárar uore elzam foribár ñoor asé. Zodi fore, añára e hánggamar honó wajá dahái no faijjum, kiyólla-hoilé yían or toh honó gom wajá náí.” **41** Híyan hoói baade yóggwa ye mujilíc hótom gorífelaiye.

20 Hánggama bon óizaygoi baade, Páule ummot ókkol ore mata baiyé, aar ítara re hímmot dí baade ítara ttu bidai loi Makedóniyat zai bolla bacá lóiyé. **2** Héře foónsi baade, héřiyar elaka ókkol ot zai-zai imandár báiyain dore becábicé hímmot dí baade Giris ot aiccé. **3** Íba héře tin mac táikkil, aar zaáñs ot góri Sííriya mulluk ot zaibar age Yohúdi ókkole íbar hélaf sail gúraiye de hétolla, íba Makedóniya báy waafes zaitogói fáisela goijjé. **4** Pául or fúañti hoozzon sáañti accíl, ítara óilde, Beriya ttu Purus or fua Sopétar, Tisólonika ttu Aristarkus edde Sékundus, Darbiya ttu Gayus, Timóti, Ecíya ttu Tukikus edde Toróffimos. **5** Ítara age neeli zai Toras ot añára lla entezar gorí táikkil. **6** Cútar-sára Ruřir-id baade añára zaáñs ot góri Filíppi ttu bacá lóiyí, aar fañs din or bútoze ítarar héře Toras ot foónnicci; héře añára háñt din táikkilam. **7** Háftar foóila din, zeñtté añára fúañti hána hái bolla zoma óiyi, Páule manúc ókkol ore waáz gorát doiije, aar tarfor din rowana óibar niyote adá rait foijjonto gorát accíl. **8** Añára uoror țalar ze kamárat fúañti zoma óiyi, héře bicí serak ókkol zolat accíl. **9** Ezzon juwan manúc zanálar ñáke góri boiřá accíl. Yóggwar nam óilde Etukus. Pául or waáz zetó lamba ór, manúc cwa héto gúm ot forat accíl. Ahérit mur gúm ot fori yóggwa tin țalar uottú meřit forigiyói, aar yóggwa re tuillé rár mora loot faiyé. **10** Pául nise zai yóggwar uore fori añza mari dóri hoór de, “No ñooraiyó, yoggwá ttu aijjó foran asé.” **11** Baade Pául abar uoror țalat zai ruři bāngi háiyé, aar fózor fáře foijjonto hotábattara hoói baade héntu giyyégoi. **12** Manúc ókkole juwan fua wa re gó ot zinda loigiyé, aar ítara añiřta nó kúci óiye deh. **13** Añára age neeli zai zaáñs ot urí Asos cóor ot zai bolla rowana óiyi, zentú Pául ore tulí loiyum hoói niyot goijjí. Íba ye héndilla entezam etollá goijjé, kiyólla-hoilé íba héře añři-āñři zaibar niyot goijjíl. **14** Zeñtté íba ye añára re Asos ot loot faiyé, añára íba re zaáñs ot tulí looi Mitulen cóor ot aiccé. **15** Aar héntu zaáñs ot góri zai tarfor din

Kiyos ñiyar muúntu foónicci, yár tarfor din Sámos ñiyat aiccí, baade yár tarfor din Miletus cóor ot foónicci. **16** Kiyólla-hoilé Páule age lóti fáisela goijjíl de, zaáns ot góri zaibarcót ífisas ot no gólíbo, zeéne íba ttu Ecíyat ñaim hara no fore, kiyólla-hoilé íba ye Jerúsalem ot foónsi bolla duadi goijjíl, farilé, Pentíkos or din. **17** Miletus ottu Páule ífisas ot hóbor diferái zomát or murubbi-neta ókkol ore mataiyé. **18** Ítara zeñtté íbar hére aiccé, íba ye ítara re hoór de, “Tuáñra nize toh zano, ańí Ecíyat aiccí de fodíla din lóti tuáñrar fúańti hárr októ keéngori haraáilam. **19** Yohúdi ókkol or sail or zoriya ańr uore ze mosibot ókkol aiccíl, híin ańí furafuri norom or sáañte edde suk or faní bácai-bácai bordac gorí Malik or hédmot goijjíl. **20** Tuáñra toh zano, ańí tuáñra lla fáida ó de héndilla honó hotá tuáñra ttu lukai nó rakí, bólke tuáñra re kúlamela góri edde góre-góre taalim diyí. **21** Ańí Yohúdi ókkol ore edde Girík ókkol ore horagori zanaidíyí de, ítara ttu touwá gorí Allar uzu fíra foribó, aar ańárar Malik Isár uore iman aná foribó. **22** “Aar ehón, Pak-Ruhr hotá mozin ańí Jerúsalem ot zair, hére ańr uore kii guzoribó ańí hoi no fari. **23** Ańí siríf yáń zani, Pak-Ruh ye ańré fottí cóor ot zanaider de ki, ziyól edde mosibot ańár lla entezar gorí asé. **24** Háir! Ańí ańr zan ore nizor lla honó muillo bouli no táari; ańr siríf niyot óilde, tobolik or ham edde ze zimmadari Malik Isá ttu ańí faiyí híyan adai gorón, yáni Allar rahámot or kúchóbor or gobá dón. **25** “Yala ańí zani, tuáñra zetarár hańse ańí Allar raijor tobolik goijjíl, tuáñra ańr muk ar no dekába. **26** Hétolla aijja ańí tuáñra re hoóir, tuáñra honókiyor lou wór zimma ańí no. **27** Kiyólla-hoilé ańí toh Allar furafuri moncá re tuáñrar hańse boiyan goitté fissá nó mari. **28** Hétolla nizoré nize únçiyar aar Pak-Ruh ye tuáñra re bérasóol or zák zibár saásita-goróya banaiyé yíba guńra re lói yó únçiyar. Allar zomát or soroya bono, ziyán íba ye Nizor Fuar lou loi kinné. **29** Ańí zani, ańí zaigói baade tuáñrar bútoe hótarnak rangkuńir ókkol aibó, aar bérasóol or zák ore hótí goríbo. **30** Ebbe tuáñrar bútotu úddwa kessú manúc urí báañra-báañra hotá ókkol hoibó, zeéne ummot ókkol ore ítarar híkka gorífelai fare. **31** Hétolla únçiyar táikko! Monot rakíyo de, tin bosóir foijjonto ańí raite dine suk or faní bácai-bácai tuáñra re nicót gorá bon nó gorí. **32** “Yala ańí tuáñra re Allar át ot edde íbar rahámoti kalam ot gosáidir.

Hé kalame tuáñrar ruúhani torki gorí faribó, aar pak gorá giyeh de ítarar bútoe cámil gorí miras dii faribó. **33** Ańí toh honókiyor cúnacandir, yáh hoorsuor or lalós nó gorí. **34** Tuáñra nize de zano, ańr e át ííne ham gorí ańr edde ańr sáañti ókkol or zorurot ókkol fura goijjíl. **35** Ańí goijjíl de hárr kessú loi tuáñra re daháiyi de ki, héndilla dorómoro meénnot gorí-gorí ańára ttu komzur ókkol ore modot gorár zorur, aar Malik Isár e hotá monot raká foribó, ziyán íba Nize hoiyé, ki hoilé, ‘Lowar túaro díiya bicí mubarek.’” **36** Híin hoiyá ói baade, Páule ańrú félai ítara beggún or fúańti dua goijjé. **37** Baade ítara beggúne Pául ore sibi dóri bicí haindé, aar íba re appá díye. **38** Háasgori íba ye ítara re íbar muk ar no dekábo hoiyé de híyane ítara bicí ferecan óiye. Tarfore ítara íba re zaáns or héddur foijjonto baráidiye.

21 Ańára ítarar héntu zaigói baade, zaáns ot góri ruúru Kos ñiyat giíyí. Tarfor din Rodes ñiyat, aar héntu Patara cóor ot. **2** Fonikcíyat zaar de ekkán zaáns loot fai, ańára híyan ot urí rowana óiye. **3** Aar Sáifrus ñiya wa deikkí rár, yíbar doóin míkka báy zai Siíriya mulluk or Tayár ot laimmi, zezé zaáns or malsámama ókkol lamaibár hotá accíl. **4** Hére ummot ókkol tuwai fai yore ańára ítarar fúańti ek háfta táikki. Pak-Ruhr hédaiyote ítara Pául ore maná goijjíl de, Jerúsalem ot no zaito. **5** Zeñtté ańára rowana óibar októ óiye, ańára héntu bacá lói ańárar sofór ot zaa cúru goijjíl. Ítara bou fuain cóo beggúne ańára re cóor or baáre foijjonto baráidiye. Hére ańára doiyyar hańsat ańrú félai dua goijjíl. **6** Baade ezzon ottu ezzone bidai loi ańára zaáns ot uittígíoi, aar ítara nizor gór ot waafes giíyégíoi. **7** Tayár ottu zaáns lói sofór gorí Patolomis cóor ot foónicci, aar hériyar imandár báiboináin dore sólam zanai ítarar fúańti ek din táikki. **8** Tarfor din ańára rowana ói Kaisáriyat foónicci, aar kúchóbor tobolik-goróya Filíp or gór ot táikki. Hé Filíp accíl Jerúsalem ot háńt zon modotgár basíloil de ítarar bútotu ekzon. **9** Yóggwa ttu sair gwá abiyáta zérífuwa accíl, zetará nobi ísafe Allar kalam hoitó. **10** Ańára hére boóut din tákar baade, Yohúdiya ttu Agabos nam or ezzon nobi aiccíl. **11** Yóggwa ańárar hańse aái Pául or duali looi nizor át téng bańdífelai hoór de, “Pak-Ruh ye fórmár de, ‘Jerúsalem ot Yohúdi ókkole e dualir girós ore endilla gori bańdíbo, aar íba re

Beyohúdi ókkol or át ot gosáidibo.” 12 Híyan fúni añára edde hériyar manúc ókkole Pául ore Jerúsalem ot no zaito fóriyat goijjí. 13 Montor Páule zuwab diyé de, “Tuáñra hañdahaři gori añr dil bángifelor kiyá? Añi toh Jerúsalem ot Malik Isár nam or wasté siríf bañdá hái bolla toiyar así de no, bólke mori bolla úddwa toiyar así.” 14 Iba re zettót añára manai no farir, añára yíán hoói nizám mári táikki, “Malik or moncá fura óuk.” 15 Hé din ókkol baade añára toiyar ói uore Jerúsalem ot zai bolla rowana loiyí. 16 Añárar fúañti Kaisáriya ttu hoozzon ummot óu gíil; ítara añára re Sáifrus ñiyar Manason nam or ezzon manúc or gór ot loigiyé, zeřé añára tákibar hotá accíl. Hé manúc cwa accíl agor ummot ókkol ottu ezzon. 17 Zeñtté añára Jerúsalem ot foónicci, imandár báiboináin de añára re kúcir sáañte estekbal goijjé. 18 Tarfor din Páule añára re fúañti looi Yakub ore saitó giyyé. Héře zomát or buzurgó beggún házir accíl. 19 Páule ítara re sólam zanai baade, íbar tobolik or ham or duara Alla ye Beyohúdi ókkol or dormiyan ot zín-zín goijjé híin ekkán-ekkán boiyan gorát doijje. 20 Híin fúni ítara Allar taarif goijjé, aar Pául ore hoiyé de, “Bái, tuñi toh dekór, hotó ázar Yohúdi ókkole iman ainné, aar ítara beggún ottu Córiyot olla jus asé. 21 Ítara re tuáñr baabute howá gyéh de ki, tuñi Beyohúdi ókkol or bútoze ze Yohúdi ókkol asé ítara beggún ore Muúsar Córiyot bad di soli bolla taalim doh. Tuñi bóle ítara re hoiyó de, ítarar fuain dore ázomi gorá no foribó, aar añárar rosóm ókkol mozin sola no foribó. 22 Tóoile kii gorá zaybo? Manúc ókkole de tuñi eřé aiccó de híyan háamaha fúnibo. 23 Hétolla añára hoóir de híyan goró. Añára ttu sair zon manúc asé, zetará manoc or tole. 24 Ítara re tuáñr fúañti loizo, aar nizoré ítarar fúañti pak-sáf gorógoi. Ítara nizor matá eñraifélai fare fán ítara re hóssa diiyo. Tói manúc beggúne zanibó de, ítarar hañse tuáñr baabute zín howá gyéh híin or bútoze honó sóiyi náí, bólke tuñi nize yó Córiyot mozin zindigi hařo. 25 Montor ze Beyohúdi ókkole iman ainné, ítarar hañse añára fáisela gorí e hotá hoói ceñrí leikkí, ki hoilé, tuáñra muttir hañse kurbani diya hána ókkol na háiyó, lou na háiyó, gola sibi marifélaiya januwar or gusso na háiyó, edde zená no goríyo.” 26 Tarfor din Páule manúc ítara re fúañti loigiyé, aar ítarar fúañti nizoré pak-sáf goijjé. Baade baitul-mukaddos ot zai

zanaidiyé de, pak-sáf ówar din hoñtté céc óibo aar ítara fottí ekzon olla hoñtté kurbani diya zaybo. 27 Háñt din fura óibar kessú ñaim age, Eciyar Yohúdi ókkole Pául ore baitul-mukaddos or bútoze deikké rár, manúc ókkol ore uskaidi íba re dórifelaiye. 28 Ítara guzoran mari hoór de, “Ó Boni Isráil ókkol, añára re modot gorógai! E manúc íbá óilde ubá zibá ye agagura fottíkiyo re añárar koum or, añárar Córiyot or, edde e zagar hélaf taalim deh. Aar híin baade yo, íbá ye Gírk ókkol ore baitul-mukaddos ot aní e pak zaga re nafak gorifelaiye.” 29 Ítara héndilla kiyólla hoiyé hoilé, yár age ítara Ífici manúc Torofimos ore íbar fúañti cóor or bútoze deikkíl, aar ñaaijil de, Páule yóggwa re baitul-mukaddos ot ainné. 30 Tarfore guñra cóor ot hánggama foida óigiyoi, aar manúc ókkole fúañti ekkú duñre aái Pául ore dórifelaiye, baade íba re baitul-mukaddos ottu ñani baäre aní, éhon geiř tún bon gorifelaiye. 31 Ítara íba re marifélaito kúcic gorér de októť, Romi řeérang or zonnal or hañse ekkán hóbor foónicce de ki, “Fura Jerúsalem ot úrussul soler.” 32 Híyan fúni mottor hé zonnale hoozzon fóous edde cáap fúañti looi duñri manúc or dol lwát giyyé. Manúc ókkole zonnal lwá re edde fóous ókkol ore deikké rár, Pául ore mara-dóra bon goijjé. 33 Tói zonnal lwá ñáke aái Pául ore gereřtar gorifelaiye, aar íba re duiyán siyol lói bañdá zay bolla hókum díye. Tarfore yóggwa ye fusár gorér de, “Manúc íbá hon? Íbá ye kii goijjé dé?” 34 Montor manúc or ñaái war bútotu hodúne yíán hoói guzorer aar hodúne waán hoói guzorer. Zonnal lwá ye zettót úrussul or zoriya hákikot zani no farer, Pául ore gáñřit loiza zay bolla hókum díye. 35 Pául círir tók foijjonto foónicce rár, fóous ókkol ottu íba re boói loiza foijjé, kiyólla-hoilé manúc or dol lwá hótara accíl. 36 Manúc ítara íbar fisé-fisé zaat accíl, aar guzori-guzori howát accíl de, “Íbá re marifélo.” 37 Pául ore gáñřit gólaibar októť, íba ye zonnal lwá ttu fusár gorér de, “Añi tuáñre kessú hoói fajjum né?” Zonnal lwá ye zuwab der de, “Tui Gírk zuban zanos níki? 38 Tóoile kí tui Íjipi uite no, zee níki yaar hooddin age bagiyai gorái sair ázar kúni re moidan zagat loigílgoi?” 39 Montor Páule zuwab der de, “Añi ézzon Yohúdi, Kilicýa elakar Tarsús or manúc, añi aamfám cóor or manúc no. Meərbani góri añré manúc cún ore hotá hoibár ezin doh.” 40 Zonnal lwár ezin fai yore, Pául círir tók ot tíyai

manúc ókkol ore áte icára goijjé. Ítara beggún nizám óiye rár, íba ye Hibrú zubane hoór de,

22 “Ó báiyain aar bafáin, ehón ańń ańń sófai díyum, fúno.” **2** Manúc ókkole íba ye Hibrú zubane hotá hoór de fúni aró nizám ói táikkil. Tói Páule hoór de, **3** “Ańń ézzon Yohúdi, ańń Kilicíyar Tarsús ot zormo óiye, montor doóńńr óiye de e cóor ot; ańń Gamaliel ottu cíkka faiyí, zibá ye ańńre añárar bafdáda ókkol or Córiyot or baabute furafuri cíkaiye. Aijkal zendilla tuáńra beggún ottu Alla lla jus asé héndilla ańń ttu yó héńtté jus accíl. **4** Hétolla ańń e Torikat soilito de ítarar uore more fán zulúm goittám, aar beraáin beriyáin duní gún ore gereftar gorí ziyól ot dítam. **5** Boro imam edde fótuayi-mujilíc or murubbi beggún híyan or gobá asé. Ańń tará ttu Damáskas ot asé de Yohúdi báiyain dor hańse loizai bolla ceńńrí fai yore hére giílám, zeéne ańń hére zai yore yó manúc ítara re Jerúsalem ot sáńza dí bolla bańdí aní fari. **6** “Montor eén óiye, ańń zaite-zaite duńńijja góri Damáskas ot fońńsir de októť, atíkka asman ottu eggwá doóńńr foór ańń sairó dák ottu soimké. **7** Ańń merit forigiýgoi, aar ańńre endilla hoór de eggwá abas fúinni, ‘Sául, Sául, tui ańńre kiyólla zulúm gorór?’ **8** “Tói ańń fusár goijjé de, ‘Malik, Tuńń hon?’ “Íba ye ańńre zuwab diyé de, ‘Ańń óilam de Isá Nasári, zibá re tui zulúm gorór.’ **9** Zetará ańń fúańti accíl ítara yó hé foór gwá deikkíl, montor ańń llói hotá hoór de íbar abas ítara nó fúne. **10** “Ańń fusár goijjé de, ‘Malik, ańń ttu kii gorá foribóť’ “Malike zuwab diyé de, ‘Uť, Damáskas ot zaa, tor lla zińń tík gorí raká gíyeh híin beggún hére toré howá zaybo.’ **11** Ańń zettót hé foór or tozollíye kessú no dekir, ańń fúańti accíl de manúc cúne ańńre át ot dóri Damáskas ot loigiyé. **12** “Hére Ananiyas nam or ezzon dindár manúc accíl, zibá ye Córiyot díyan or sáańte amól goittóť, aar heńiyar Yohúdi beggúne yóggwa re bicí izzot goittóť. **13** Yóggwa ańń hére aiccé, aar ańń dák ottu tíyai ańńre hoór de, ‘Bái Sául, tuáńńr dekirbar toóufuk fíri aiyóuk.’ Hétunot ańń yóggwa re dekir faijji. **14** “Baade Yóggwa ye hoór de, ‘Ańárar bafdáda ókkol or Alla ye tuáńńre basíloiye, íbar moncá zani bolla, aar Insáfwała wa re dekir bolla, edde íbar muk or hotá fúni bolla. **15** Kiyólla-hoilé tuńń zińń deikkó edde fúinno híin or baabute tamám manúc ókkol or hańse tuńń íbar gobá óiba. **16** Ehón aar deri kiyá gorór? Uró, bápťisma loh

aar íbar nam đaki tuáńńr guná ókkol dúifelo.’ **17** “Baade eén óiye, zeńtté ańń Jerúsalem ot waafes aái baitul-mukaddos or búťore dua gorír, ańń ekkán dorcón deikkí, **18** ziyán ot Malike ańńre hoór de, ‘Toratori gor! Ehón-ehón Jerúsalem sári zaagói, kiyólla-hoilé eríyar maincé Ańń baabute tor gobá no gosíbo.’ **19** “Hétunot ańń hoóir de, ‘Malik, manúc ítara toh zane, ańń fottí mujilíc-hánat zai-zai, Tuáńńr uore iman ané de ítara re ziyól ot dítam edde mara-dóra goittám deh. **20** Tuáńńr gobá Estífen ore mariféla zar de októť óu ańń dake tíyai accílám. Ańń ham híyan ot furafuri razi accílám, aar zetará yóggwa re marifélar ítarar hoorsuor ókkol sońńi accílám.’ **21** “Hétunot Malike ańńre hoór de, ‘Zaa, Ańń toré duré Beyohúdi ókkol or hére diferáiyum.” **22** Manúc ókkole Pául or hotá hétukkun foijjonto fúnat accíl. Baade ítara guzoran mari hoór de, “Ítaré duniyai ttu fúrafelo! Ite zinda tákibar laayek no.” **23** Ítara zettót guzori-guzori nizor hoorsuor melá márer, aar boiyar ot dúil urar, **24** zonnal lwá ye hókum díye de, Pául ore gáńťit aná zay bolla, aar hoiyé de, manúc ókkole íbar hélaf endilla gori kiyólla guzorer de híyan zani fare fán Pául ore sońńk mari zerá gorí bolla. **25** Ítara íba re sońńk mari bolla baindé de októť, Páule dake tíyai accíl de cáap pwá re hoór de, “Honó hosúri faa nó zah de héndilla ézzon Romi manúc ore sońńk maron kí tuáńra lla kaanuni ham?” **26** Cáap pwá ye híyan fúinne rár, zonnal lwár hańse zai hoór de, “Tuńńi ińń kii goittóť soór? Íbá toh Romi manúc.” **27** Hétunot zonnal lwá aái Pául ottu fusár gorér de, “Ańńre hoósai, tui Romi manúc níki?” Íba ye zuwab der de, “Jii, ói.” **28** Zonnale íba re hoór de, “Ańń ttu Rom or nagorita óite boóut tiań-foicá diiya foijjé.” Páule hoór de, “Montor ańń de zormo ttu lóti Romi.” **29** Zetará íba re zerá goittóť aiccíl ítara híyan fúinne mottor íba ttu fisságiyoi, aar íba Romi manúc de híyan zani fari zonnal lwá yó đooraiyói, kiyólla-hoilé yóggwa ye Pául ore bańdí raikkíl. **30** Yohúdi ókkole Pául ore kiyólla elzam der de híyan zonnal lwá ttu fakkagori zainto monehoór de hétolla, tarfor din yóggwa ye Pául ore kúlidiye, aar hókum díye de, doóńńr imam edde fótuayi-mujilíc or membór beggún dola óito. Baade yóggwa ye Pául ore nise aní ítarar muńtu tíyagaraiye.

23 Páule fótuayi-mujilíc or membór ókkol or uzu díyan dóri saái hoór de, “Báiyain,

añí aij foijjonto furafuri sáf hélome Allar cáikkat zindigi haraiyí.” 2 Hétunot boro imam Ananiyase manúc zetará Pául or ðáke týai accíl ítara re hókum díye de, íba re gal sái maitto. 3 Montor Páule íba re hoór de, “Héy munafékl! Alla ye toré maribó. Tui eré Córíyot mozin éna añr bisar goittó boiccós, montor añré mari bolla hókum dí tui nize toh Córíyot báñgor.” 4 Zetará Pául or ðáke týai accíl ítara hoór de, “Allar boro imam ore beizzoti gorí bolla tor kii hímmot!” 5 Páule zuwab der de, “Báiyain, íbá boro imam de añí no zani, arnóile endilla lofzó estemal no goittám. Kiyólla-hoilé pak-kalam ot toh endilla asé, ‘Nizor koum or sóddar or baabute bura no hoiyó.’” 6 Montor Páule zettót ek ðaái Sadukái de aar arek ðaái Féroci de ót faiyé, íba ye fótuayi-mujilíc ot guzori hoór de, “Ó báiyain, añí ézzon Féroci aar Férocir fua; añré bisar gorá zar de kiyólla-hoilé, añí acá gorí de, mora ókkol zinda ói uríbo.” 7 Íba ye héndilla hoiyé mottor, Féroci edde Sadukái ókkol or bútoe hoijja cúru óigiyoi, aar mujilíc bák óigiyoi. 8 Kiyólla-hoilé Sadukái ókkole hoó de, mora ókkol zinda ói no uríbo, ítara aró hoó de, fírsta yó náí, ruh yó náí; montor Féroci ókkole híin beggún asé de biccác goré. 9 Hétunot hére eggwá ðoóñr hánggama óiye. Féroci fírkar hoozzon aleme týai guccár sáañte eén hoói barábari díyat doiije, “Añára e manúc cwa ttu honó hosúri nó fai. Honó ruh ye yáh fírsta ye íbá llói hotá hoilé yo kí no fare né?” 10 Hoijja zettót bicí ðoóñr óigiyoi, ítara Pául ore ðukura-ðukura gorfelai bouli zonnal lwá ye ðooraiyé, hétolla yóggwa ye fóous ókkol ore hókum díye de, nise zai Pául ore manúc ókkol ottu bolazuri gáññit loianí bolla. 11 Tarfor din raitta Malike Pául or ðáke týai hoór de, “Hímmot gór; tui zendilla Jerúsalem ot Añr baabute gobá díyos, héndilla tor ttu Rom cóor ot óu gobá díya foribó.” 12 Tarfor din biínna hodún Yohúdi ye ekkán sail gúrai hosóm háíye de, ítara zetódin Pául ore marifélai nó fare hétodin hána-fina na háibo. 13 Sail híyan ot salic zon or túaro bicí beřaáin cámil accíl. 14 Ítara ðoóñr imam ókkol or edde murubbi ókkol or hañse zai hoór de, “Añára Pául ore marifélai nó fari foijjonto hána-fina na háiyum hoói dorómoro hosóm háiyi. 15 Hétolla yala, tuáñra edde fótuayi-mujilíce íbar mooddima aró bálagori tahákit gorá forer hoói íba re nise tuáñrar muúntu aní bolla zonnal ore hóbor dóh. Añára íba eré foóñsibar age marifélai bolla

toiyar así.” 16 Montor Pául or báaina ye ítara sail or baabute fúinne rár, gáññir bútoe góli Pául ore híin zanaiyé. 17 Hétunot Páule Romi cáap ókkol ottu ezzon ore matai hoór de, “E juwan fua wa re zonnal lwár hañse loizo, itar ttu yóggwa re kessú hoibár asé.” 18 Tói hé cáap pwá ye ítare zonnal or hére aní hoór de, “Hodi Páule añré matai e juwan fua wa re tuáñr hére aní bolla hoiyé, kiyólla-hoilé itar ttu bóle tuáñre kessú hoibár asé.” 19 Hétunot zonnale ítare át ot dóri ekkinare loizai fusár gorér de, “Tor ttu añré kii hoibár asé dé?” 20 Íte hoór de, “Hodún Yohúdi ye Pául or baabute aró bálagori tahákit gorá forer hoói hailla íba re nise fótuayi-mujilíc ot aní bolla tuáñre aros goittó ek óiye. 21 Montor tuñí ítara hotá no fúinno, kiyólla-hoilé ítara salic zon or túaro bicí manúc luki táki Pául or entezar gorér; ítara íba re zetódin marifélai nó fare hétodin hána-fina na háibo hoói hosóm háíye. Yala ítara toiyar óiye, siríf tuáñr razirobott olla entezar gorér deh.” 22 Zonnale juwan fua wa re endilla hókum dí duñraidiyé, “Tui añré ífn zanaidiyós bóuli honókiyo re no hoóic.” 23 Baade hé zonnal lwá ye cáap ókkol ottu dui zon ore matai hoór de, “Rait or now wa báze Kaisáriyat zai bolla dui cót fóous, hóittor zon gúra-soloinna fóous edde dui cót folóuwan toiyar gorí raikkó. 24 Pául olla yó gúra ókkol toiyar raikkó, zeéne íba sóiyi sólamote hákim Fílix or hére foóñsegoi.” 25 Tarfore yóggwa ye endilla ekkán ceñrí leikké: 26 “Añí Kalediya Laisíyas or torfóttu bicí izzettár hákim Fílix ore sólam. 27 E manúc cwa re Yohúdi ókkole dórifelail ar marifélaito saáil, montor añí zeñtté íbá ézzon Romi manúc de zani fajjijí, añí añr fóous ókkol lói zai íbá re basailoiyí. 28 Aar ítara íbá re kiyólla elzam der de híyan añr ttu zainto monehoiyé rár, añí íbá re ítara fótuayi-mujilíc ot loigiyí; 29 baade añí zani fajjijí de, ítara íbá re ítara Córíyot or baabute elzam lagar deh; montor íbá ttu mora fore de yáto ziyól hara fore de héndilla honó hosúri náí. 30 Zeñtté añré hóbor díya gíyeh de ki, e manúc cwa re marifélaibar sail gúraiye; añí íbá re éhon or bútoe tuáñr hañse difeřáiyi deh. Zetará íbá re elzam lagar, añí ítara re hókum díyi de, ítara ttu íbár ulða ze elzam ókkol asé híin tuáñr muúntu peec gorí bolla.” 31 Tói hókum mozin fóous ókkole hé raitta Pául ore Entipateris cóor ot loigiyé. 32 Tarfor din, ítara gúra-soloinna fóous sun ore Pául or fúañti duñraidi gáññit waafes

aáigiyoí. **33** Gúra-soloínna fóous sun Kaisáriyat foónicce rár, hákim ore ceñrí gán diiyé, aar Pául ore yó íbar át ot gosáidiye. **34** Hákime ceñrí gán forí, Pául ottu fusár gorér de, “Tui hon zagar?” Páule zuwab der de, “Kilicíyar.” **35** Hákime hoór de, “Tor elzam lagoya ókkol eré foónsile añí tor mooddimar baabute fúniyum.” Baade yóggwa ye hókum díye de, Pául ore Hérud or razmohól ot faára dí raká zay bolla.

24 Fañs din baade boro imam Ananiyase hoozzon murubbi looi edde Tartuliyas nam or ezzon ukil looi nise Kaisáriyat giyyé, baade ítara hákim or hañse Pául or ulða elzam ókkol peec goijjíl. **2** Pául ore bútoe mata bay baade, Tartuliyase hákim or hañsé elzam ókkol peec gorát doijje, hoór de, “Tuáñr hókum or tole añára boóut deri lóti bicí cántit así, aar tuáñr bála nozoriyar zoriya e koum or uore boóut dóilla torki aiccé. **3** Ó izzotdár Fílíx, añára híyan hárr dóillat, hárr zagat furafuri cúkuriyar sáañte kobul gorí. **4** Montor añr ttu tuáñr ãaim ar borbad dito mone no hoór, hétolla añí tuáñre fóriyat gorír, meérbani góri añárar hotá gún fúno. Añára hookkán hotát beggún fúrai díyum. **5** “Añára loot faiyí de, e manúc cwa óilde ekkán bifot; ibá ye fura duniyair Yohúdi beggún or bútoe hánggama foida goré. Ibá óilde Nasári nam or dol or eggwá sóddar. **6** Ibá ye baitul-mukaddos úddwa nafak goittó kucíc goijjé, añára ibá re hétolla gereftar goijjí deh. **7** Montor zonnal Laisíyas aái yore ibá re ádoma gorí añárar át ottu loigiyégoi, **8** aró íbar mooddima-goróya ókkol ore hókum díye de, tuáñr muúntu ai bolla. Tuñí nizebaze ibá re íin beggún or baabute zerá goillé zani faribá, añára ibá re kiyólla hosúr dí.” **9** Yohúdi ókkol óu elzam lagat córik ói híin beggún sóiyi bóuli hoiyé. **10** Baade hákime Pául ore hotá hoitó icára goijjé rár, Páule hoór de, “Añí zani, tuñí boóut bosór lóti e koum or joc. Hétolla añí kúcír sáañte añr sófai dí. **11** Tuñí zasai goillé sóiyigori zani faribá, añí uore Jerúsalem ot ebaadot goittó giyyí de aijjó baró din or túaro bicí nó óiyo. **12** Añr uore zetará elzam lagar ítara añré no baitul-mukaddos ot honó manúc lói barábari dí de loot faiyé, aar no mujilíc-hánat yáh cóor or honó mikká hánggama foida gorír de loot faiyé. **13** Itará añr uore ze elzam ókkol lagar, híin or tuáñre honó sábut dí no faribó. **14** Montor añí tuáñr hañse yíán cíkar

gorír, ki hoilé, ze Torika re itará gollot dol bouli hoór, hé Torika re mani añí añárar bafdada ókkol or Allar ebaadot gorí. Añí ze hotá ókkol Tourat ot edde nobi ókkol or kitab ot leikká asé híin beggún ekin gorí. **15** Añr ttu Allar uore acá asé, zendilla itará ttu yó asé, híyan óilde, forhésgar edde hóraf manúc beggún ore mora ttu zinda gorá zaybo. **16** Hétolla añí furafuri kucíc gorí de, Allar edde insán or muúntu hámica sóiyi hélome táki bolla. **17** “Yala boóut bosór baade, añí Jerúsalem ot añr koum or hañse hórat foónsai bolla edde januwar kurbani di bolla aiccí. **18** Tói Ecíyar hoozzon Yohúdi ye añré baitul-mukaddos ot pak-sáf ói añí hé ham gorír de loot faiyé. Hére añr fúañti no manúc or dol accíl aar no añí honó hánggamat cámil accílam. **19** Montor zodi ítara ttu añr ulða honó kessú hoibár táke, tóoile ítara ttu tuáñr muúntu aiyón accíl. **20** Arnóile eré asé de itará nize hoóuk, añí fótuayi-mujilíc or muúntu tíyai accílam de híyala añr ttu kii hosúri faiyé deh. **21** Itará añré siríf yíán ekkán or hosúr dí faribó, ziyán añí ítarar muúntu tíyai accílam de híyala guzori hoóilam, ki hoilé, ‘Mora ókkol zinda ói urár mosóla loi beh aijja añré bisar gorá zar.” **22** Montor Fílíx ottu hé Torikar baabute sóiyi zana asé de hétolla, yóggwa ye bisar gorá bon gorí hoór de, “Zonnal Laisíyas nise ailé, añí tor mooddimar fáisela goijjúm.” **23** Baade íba ye cáap ore hókum díye de, Pául ore gañrat ot rakí bolla, kessú azadi di bolla, aar Pául or dustó ókkole íba re hédmot goittó ailé ítara re maná no gorí bolla. **24** Hooddin baade, Fílixé nizor bou Durusila re fúañti looi aiccé, híba ézzon Yohúdi accíl. Yóggwa ye Pául ore mataitó diferáiyé, baade Pául ottu Mosih Isár uore iman or baabute boiyan fúinne. **25** Páule zettót forhésgarir, nizoré sóoñli rakár, edde aibó de kiyamot or baabute boiyan gorér, Fílíx ðooraiigiyoí, aar hoór de, “Tui ettar zaagói, one mouka faile añí toré mataitó diferáiyum.” **26** Fúañti-fúañti yóggwa ye Pául ottu gúc faibar óu acá goijjíl, hétolla yóggwa ye Pául ore egazá-egazá matai íba llói hotá hoitó. **27** Dui bosór guzori zaigói baade, Fílíx or zagat Forkiyus Fistas aiccé. Montor Fílíx ottu Yohúdi ókkol or nozor ot bála tóoitto monehoiyé de hétolla, yóggwa ye Pául ore ziyól ot rakígilgoi.

25 Fistas hé mulluk ot aái tin din baade Kaisáriya ttu uore Jerúsalem ot giyyé. **2**

Héře ðoóñr imam ókkole edde Yohúdir neta ókkole Pául or ulða elzam ókkol ainné, aar aros gorí **3** Pául or ulða ekkán meér bani saiye, zeéne íba ye Pául ore Jerúsalem ot diferáide. Kiyólla-hoilé, ítara Pául ore foñt ot máze luki táki marifélaito sólla goijjíl. **4** Montor Fistase hoór de, “Pául ore Kaisáriyat máze gañrat ot raká gýyeh, aar ańi nize hére hára zaiyum. **5** Tuáñrar hoozzon sóddar ańr fúańti aiyóuk. Zodi hé manúc cwar honó hosúri táke, tooile ítara hére íbar hosúr ókkol daháidouk.” **6** Fistas ítarar fúańti ańcto-doc din táki baade nise Kaisáriyat gýiye. Tarfor din yóggwa ye bisar or toktót boiccé, aar Pául ore aná zay bolla hókum díye. **7** Pául foóńicce rár, ze Yohúdi ókkol Jerúsalem ottu aiccíl, ítara íbar sairókul ttu tíyai íbar uore bicí hótara-hótara elzam ókkol lagat doijje, montor híin sábut gorí nó fare. **8** Hétunot Páule eén hoói nizor sófai díye, “Ańi no Yohúdir Córiyot or ulða hosúri goijjí, aar no Kaisár or ulða goijjí.” **9** Montor Fistase Yohúdi ókkol or nozor ot bála tóori bolla Pául ore hoór de, “Tui Jerúsalem ot zai e mooddimar bisar olla ańr muuntu tíyaito soós né?” **10** Páule zuwab der de, “Ańi toh yala Kaisár or adalot ot éna tíyai así; ańr bisar or fáisela eře gorá foribó. Ańi Yohúdi ókkol or ulða honó hosúri nó gorí, híyan de tuńi yó bála zano. **11** Zodi tooú ańi mora fore de héndilla honó kessú hosúrbon de óile, ańi mori bolla razi así. Montor e Yohúdi ítará ańr uore ziin elzam lagar híin zodi ekkán óu sóiyi no, tooile honókiyo ttu ańre ítarár át ot gosáidibar hók náí. Ańi Kaisár ore apíl gorír.” **12** Baade Fistase uzirnazir ókkol lói mocuwara gorí hoór de, “Tui zettót Kaisár ore apíl goijjós, hétolla tui Kaisár or hére zaibi.” **13** Hooddin guzori zaigói baade, baáńcca Ageripa ye edde Barnise Fistas ore sólam zanaitó Kaisáriyat aiccé. **14** Ítara hére boóut din harai baade, Fistase Pául or mooddimar baabute baáńcca re zanaiyé. Yóggwa ye hoór de “Fílixé manúc ézzon ore eře hodi ísafe rakígíyoi. **15** Zeńtté ańi Jerúsalem ot gíflam, Yohúdir ðoóñr imam ókkole edde murubbi ókkole íbar hosúri ókkol ańr hańse peec gorí hoiyé de, íba re sáńza dí bolla. **16** “Montor ańi ítara re hoiyí de, “Yián Romi niyom no de ki, honó manúc ore sáńza lla gosáidon, zetún foijjonto íba ye nizor mooddima-goróya ókkol lói muámuiikka dola nó óiyo edde nizor ulða ze elzam ókkol laga gíyéh híin or sófai dí

bolla íba re mouka diiya nó zah.” **17** Hétolla hé Yohúdi gún eře zoma óiye rár, ańi deri no gorí tarfor din bisar or toktót boiccí, aar manúc cwa re aná zay bolla hókum díyi. **18** Mooddima-goróya ókkol zeńtté hotá hoi bolla tíyaiye, ítara ańi táaijilam de héndilla honó gollot ham or hosúri nó deh. **19** Montor íba llói ítara ttu nizor dórmor edde mora manúc Ísar baabute kessú obonaboni accíl, Zibá zinda asé hoi Páule dabi goré. **20** Ańi hé maamela gún or baabute hondilla gorí tahákit goríyum no zani ísafe, fusár goijjí de, íba ttu Jerúsalem ot zai híin or bisar olla tíyaito monehoór né. **21** Montor Páule zettót Kaisár or fáisela lla íba re gañrat ot raká zay bolla apíl goijjé, ańi hókum díyi de, íba re Kaisár or hére nó diferái foijjonto gañrat ot raká zay bolla.” **22** Ageripa ye Fistas ore hoór de, “Ańi nizor ttu yó hé manúc cwar hotá fúinto monehoór.” Yóggwa ye hoór de, “Hailla fúni faribá.” **23** Tói tarfor din baáńcca Ageripa edde Barnis, bicí dók or sáańte ðoóñr zonnal ókkol edde cóor or ðaiðoóñr ókkol ore loi boirók-hánat góille. Fistas or hókum mozin Pául ore bútoe aná gýyeh. **24** Fistase hoór de, “Ó baáńcca Ageripa edde eře ańárar fúańti házir asó de tamám manúc ókkol, tuáńra e manúc cwa re soó, zibár baabute Yohúdi beggúne Jerúsalem ot edde eře ańre apíl gorí guzori hoóil de, e manúc cwa ar basi tákibar laayek no. **25** Montor ańi zani faijji de, íbá ye moot or laayek honó hosúri nó goré. Aar íbá ye zettót Kaisár ore apíl goijjé, ańi íbá re hére diferáibar fáisela goijjí. **26** Montor íbár baabute ańr muhán baáńccar hańse lekí bolla ańi honó sóiyi hosúri nó fai. Hétolla ańi íbá re tuáñrar muuntu ainní, háasgori tuńi baáńcca Ageripar muuntu, zeéne zerá gorí baade ańr ttu kessú lekíbar táke. **27** Kiyólla-hoilé ańr ttu lager de, hosúri ókkol dahái no dí honó hodi re hére diferái don sóiyi no.”

26 Ageripa ye Pául ore hoór de, “Toré nizor sófai díbar ezazot diya gíyéh.” Hétunot Páule át barái nizor sófai díyat doijje de: **2** “Ó baáńcca Ageripa, aijja ańi tuáñr muuntu Yohúdi ókkole ańr uore ze elzam lagar híin beggún or ulða ańr sófai dí farir de híyan ańi bággitta bóuli táarir. **3** Háasgori kiyólla-hoilé, ańi zani, tuńi Yohúdi ókkol or rosóm or edde torkatorkir súwal ókkol or baabute bicígori zano. Hétolla ańi tuáñre fóriyat gorír, sobór or sáańte ańr hotá gún fúno.” **4** Tamám Yohúdi ókkole toh

zane, añr nizor koum or dormiyan ot edde Jerúsalem ot añr zindigir solasol cúru ttu lóti hondilla accfí. **5** Ítara añré bicí deri lóti siné, zodi ítara ttu gobá díto monehoó, di faribó, ki hoilé, añí añárar dórмор ebbe hora fírka Féroci mozin zindigi haraiyí. **6** Aar yala añré etollá bisar gorá zar, kiyólla-hoilé Alla ye añárar bafdáda ókkol lói ze waada goijjíl hé waadar uore añí acá rakí. **7** Añárar baró háandan or manúce toh hé waada re faibar acáye dilmon di raite dine Allar ebaadot goittó. Ó baáñcca, añré Yohúdi ókkole hé acár zoriya elzam der deh. **8** Alla ye mora re zinda goré de híyan kiyá tuáñra ttu biccác no lager? **9** Age añí nize yó fáaittam de, zeéne fari héene añr ttu Isá Nasárir nam or ulđa gorón fóros. **10** Héndilla añí Jerúsalem ot goijjí yó. Doónr imam ókkol ottu kémota fai yore Allar pak bonda boóut zon ore ziyól ot dílam, aar ítara re zeñtté marifélaito fáisela goré héñtte añí yó búť dítam. **11** Bicí řaim ot añí ítara re sánza dí bolla fottí mujilfc-hánat zaitam, aar ítara re bolazuri kuféri gorá baitó kucíc goittám. Añí ítara llói bicí rak accílám de hétolla oinno mulluk or cóor ókkol ot úddwa zai-zai ítarar uore zulúm goittám. **12** “Héñtte ek din añí doónr imam ókkol ottu adíkar edde hókum fai yore Damáskas ot zair de októť, **13** óu baáñcca, duúñijja góri añí foñt ot máze asman ottu eggwá foór deikkí, zibá beil or túaro foór, yíba añr edde añr sáañti ókkol or sairómikka ttu somkat doijje. **14** Zeñtté añára beggún meřit forigiyígoi, añré Hibrú zubane endilla hoór de eggwá abas fúinni, ‘Sául, Sául, tui Añré kiyólla zulúm gorór? Áilla súařr ulđa latí mara tor lla aásan no.’ **15** Hétunot añí fusar goijjí de, ‘Malik, Tuñí hon?’ Malike zuwab diyé de, ‘Añí óilam de Isá, zibá re tui zulúm gorór. **16** Ehón uť, tor řenge tíya. Añí tor hañse zahér óiyi de, toré háadem edde gobá banai bolla; siríf ziín deikkós híin olla no bólke muúntu Añí toré ziín daháiyum híin olla yó. **17** Añí toré tor koum ottu basai rakíyum, aar ze Beyohúdi ókkol or hañse Añí toré diferáir, ítara ttu yó basai rakíyum. **18** Tui ítarar suk kúlidibi, zeéne ítara andár ottu foór or uzu fíri aiyé, edde Cóitan or kobza ttu Allar hañse aiyé. Tói ítara gunár maf faibo, aar zará Añr uore iman aní pak-sáf óiye tarár bútoře zaga faibo.’ **19** “Hétolla, ó baáñcca Ageripa, asman ottu dorcón or duara añré ziín howá giyeh, añí híin or nafórmani nó gorí. **20** Sáat ot zetará Damáskas ot asé ítara re,

baade Jerúsalem ot edde Yohúdiyar agagurat, aar Beyohúdi ókkol or hañse yó endilla hoói añí tobolik goijjí de ki, ítara ttu touwá gorí Allar uzu fíra foribó, aar touwár laayek ham ókkol gorá foribó. **21** Híyan olla bóuli hodún Yohúdi ye añré baitul-mukaddos ottu dórifelail aar marifélaito kucíc goijjíl. **22** Montor aij foijjonto Alla ye añré modot goijjé, hétolla añí tíyai doónr-cóñro beggún or hañse gobá ókkol dir. Nobi ókkole edde Muúsa ye ziín fura óibo bóuli hoíyé híin or baáre añí honó kessú hoíyí de náí; **23** ki hoilé, Mosih ttu duk faa foribó, aar mora ttu zinda óiye de foóla zon ói yore Yohúdi edde Beyohúdi ókkol or hañse nur or hóbor díya foribó.” **24** Páule zettót héndilla góri nizor sófai dér, Fistase gozgosai hoór de, “Héy Pául, tui fool óigiyosgoi! Bicí elóm hásil goróne toré fool banaifélar.” **25** Montor Páule hoór de, “Ó izzotdár Fistas, añí fool nó ói, añí ziín hoóir híin sóiyi aar buzón or hotá. **26** Baáñcca ye toh iín or baabute zane, hétolla añí íbar muúntu hímmot góri hotá hoói farir deh. Añí biccác gorí de, e hotá iín ekkán óu íba ye no zane de náí, kiyólla-hoilé iín toh honó ek kunat óiye de no. **27** Ó baáñcca Ageripa, tuñí nobi ókkol ore biccác goró né? Añí zani tuñí goró.” **28** Hétunot Ageripa ye Pául ore hoór de, “Tui añré ebbe hom řaim or bútoře Isáyi banai faribí bóuli řaaiijos níki?” **29** Páule hoór de, “Hom řaim ot óuk yáh lamba řaim ot, añí Allar hañse dua gorí de, siríf tuñí no bólke zetará aijja añr hotá fúner ítara beggún óu zen añr doílla ó, montor e síyol sára.” **30** Hétunot baáñcca urígiyoi aar íbar fúañti hákim, Barnis, edde zetará ítarar fúañti boirók ot accíl ítara yó urígiyoi. **31** Ítara héntu neeli zaigói baade ezzon ore ezzone hoór de, “E manúc cwa ye mora fore de sánzar laayek yáh ziyól hara fore de héndilla honó kessú nó goré.” **32** Ageripa ye Fistas ore hoór de, “E manúc cwa ye Káisar ore apíl no goittó bóuli, íbá re eridiya zayto.”

27 Zeñtté añára re zaáñs ot góri Ítalit loiza foribó bóuli fáisela óigiyoi, Pául ore edde ar hoozzon hodi re Baáñccar řeérang hoó de yíbar ek cáap or át ot diiya giyéh, zibár nam Julius. **2** Añára Aderamitiya cóor or ekkán zaáñs ot urí zaat doijji, ziyán Ecíya elakar alok-alok gáñť ókkol ot zai bolla toiyar accfí. Aar Makedóniya elakar Tisólonika cóor or Aristarkus añárar fúañti accfí. **3** Tarfor din añára Sídon ot foónicci,

aar Juliuse Pául ore meérbani gorí nizor dustó ókkol or hére zaibar ezazot diyé, zeéne íbar dustó ókkole íbar zorurot ókkol fura gorí fare. 4 Añára héntu bacá lóiyí, aar boiyar añárar ulđa baár de hétolla Sáífrus or ze boli boiyar no baár hé boli giyyí. 5 Baade Kilicíyar edde Pampúliyar doijja báy zaité-zaité añára Lusíya elakar Mira cóor ot laimmí. 6 Hére hé cáap pwá ye Alexzendariya cóor or ekkán zaáns faáil ziyán Ítali dec ot zaar. Íba ye añára re híyan ot tuillé. 7 Añárar zaáns boóut din fán asté-asté soli baade bicí dukkór sáañte Kanidas cóor ot foónicci. Boiyare zettót añára re aar muúmmikka zaito no der, añára Sálmon cóor or muúntu Keret ñiyar ze boli boiyar no baár hé boli giyyí. 8 Aar doijjar hańsa dóri dukkór sáañte soli-soli ekkán zagat foónicci ziyán or nam óilde Héfazoti Gáñt Ókkol. Híyan Lasíya toón or ðáke accíl. 9 Héndilla góri boóut din guzori zaigói baade, zaáns ot góri zaibar sofór hótara óiaicce, aar Koffarar Din óu zettót faráigiyo, Páule ítara re eén hoói únciyari díye, 10 “Manúc ókkol, añi dekír de age zai añárar e sofór hótara óibo, aar bicí hótí ókkol óibo, siríf malsámama edde zaáns no, bólke añárar zan úddwa.” 11 Montor cáape Pául or hotár túaro zaáns-soloyar edde híyan or girós or hotá fúinnil. 12 Hé zaáns gáñt ñan cítkhal haraité cúida no de hétolla, ítara bicí zone fáisela goijjé de, héntu zai honó bote Fonis gáñrot foónsi cítkhal harai bolla. Hé gáñt ñan óilde Keret ñiyar zaáns gáñt, ziyán or muu gán doónali fosím edde utorrali fosím mikka. 13 Zeñtté doónali boiyar asté-asté baát doijje, ítara báfer de ítarar niyot fura gorí faribó; hétolla ítara zaáns or nogol tulífelai Keret ñiyar sor báy giyyé. 14 Montor hotún ánik baade, hé zaga ttu eggwá ðoónr tuwáni boiyar cúru óiye, zibá re Yorakilo ðake. 15 Zaáns sán ore zettót hé boiyare faiyé aar híyan boiyar or zoriya muúmmikka zai no farer, añára kucíc gorá bon gorí boiyar zikká baár híkka zaáns sán zaito diyí. 16 Aar zaité-zaité eggwá Kawuda nam or gura ñiyar ze boli boiyar no baár hé bouli giyyí, aar bicí mockil or sáañte añára zaáns or noow gán basai faijji. 17 Manúc ókkole noow gán zaáns or uore tulí yore rosí lói zaáns or sairókul ttu berái bañdí eijjé, aar ítara zaáns sán Sartis or meñir sor ot bazíbo bóuli ðoore zaáns or cór gán lamaifélai boiyar zikká baár híkka zaáns sán zaito diyé. 18 Baade tuwán or zoriya zettót añára bicí éńska háir, ítara tarfor din zaáns or malsámama ókkol félaidiyat doijje. 19 Tisára din ítara zaáns sola de sáisamama ókkol nizor áte félaidiye. 20 Boóut din lóti zettót beil óu dahá no zar, tara ókkol óu dahá no zar, aar lagatar zuresúre tuwán óu baát accíl, tói añára basibár acá félaidiyi. 21 Zaáns or manúc ókkol boóut din foijjonto waacca de hétolla, Páule ítarar mazé tíyai hoór de, “Manúc ókkol, tuáñra ttu añr buddí gán dóri Keret ñiya ttu zaáns lói nu aiyón accíl, tói e mosibot edde hótí ttu basitá. 22 Montor yala añi tuáñra re fóriyat gorír, tuáñra hímmot goró, kiyólla-hoilé tuáñra honókiyor zan no zaybo; siríf zaáns san hótí óibo deh. 23 Añi Zibár manúc edde Zibár ebaadot gorí, hé Allar ek fírista ye gel de raitta añr ðák ottu tíyai yore 24 hoiyé de, ‘Pául, no ðooraiyó, tuáñr ttu Káisar or muúntu háamaha tíya foribó. Aar zetará tuáñr fúañti zaáns ot góri zaar, Alla ye tuáñr wasté meérbani gorí ítara beggún or zan basai raikké.’ 25 Hétolla, manúc ókkol, hímmot goró, kiyólla-hoilé añr ttu Allar uore iman asé de, añré zeén hoiyé héen óibo. 26 Lekin añára ttu honó ñiyat oozagói foribó.” 27 Tuwán or soiddó din ot din adá raitta, añára zaáns lói báai Aderiya Doijjar hére aiccí rár, zaáns or manúc cúne táaijje de, ítara kul or ðáke foónser bóuli. 28 Ítara fanír tola maippé rár ací át mur loot faáil, yár hotún baade abar maippé rár háit át mur loot faáil. 29 Ítara zaáns sán cíl ot dúc háibo bóuli ðoore zaáns or fasíl ottu sair gwá nogol maijje aar din or foór fári bolla dua gorát doijje. 30 Tarfore séraingga gúne zaáns ottu dáizai bolla kucíce, agil ottu nogol mare fán gorí zaáns or uottú noow gán doijjat lamaifélaiye. 31 Hétunot Páule cáap ore edde fóous ókkol ore hoór de, “Zodi manúc itará zaáns or uore no táke, tuáñra basi no faribá.” 32 Tói fóous ókkole noowr rosí gún haridiyé, zeéne híyan fanít forizagói. 33 Bíinna foór fáribar ekkágori age, Páule ítara beggún ore hána hái bolla eén hoói aros goijjé, “Tuáñra kessú na hái lagatar entezar ot asó de aijja soiddó din óiye. 34 Hétolla añi tuáñra re fóriyat gorír, zane basi táki bolla tuáñra kessú hána hóo, kiyólla-hoilé tuáñra honókiyor matár ekkán sul úddwa no foribó.” 35 Hotá híyan hoói baade, Páule ruñi looi ítara beggún or muúntu Alla re cúkuriya goijjé, aar baade bañgi háat doijje. 36 Hétunot ítara beggúne hímmot faiyé, aar ítara nize yó hána háie. 37 Zaáns or uore añára kulehale ðui cóo hóittor-sów zon accílám. 38 Beggúne feñ

bóri hái baade, ítara giyuñ ókkol doijjat félaidi zaáñs or uzón hom gorát doijje. **39** Biínna foór fáitte rár, ítara zaga gán siní nó fare, montor ítara doijjar eén ekkán atari deikkíl, ziyán or sor balu ola. Baade ítara fáisela goijjé de, zodi faille zaáñs sán hére uore tulídi bolla. **40** Hétolla ítara nogol lun hari doijjat félaidiye, fúañti-fúañti súwan or rosí gún óu kúlifelaiye. Ítara zaáñs or cór gán boiyar ot tulídiye, baade zaáñs sán hé sor or híkka zaat doijje. **41** Montor zaáñs sán zaite-zaite dui doriyar mudar meñr sor or uore uiñtégoi, aar zaáñs or agil eén bazígiyoi, ebbe no lorer, aar goir or zoriya fasíl ottu bángi gurigara óizat doijje. **42** Fóous sune hodi ókkol ore marifélaibar niyot goijjé, zeéne ítara honókiye háñsuri dáizaigoí no fare. **43** Montor cáap ottu Pául or zan basaitó monehoóil, hétolla íba ye fóous sun ore ítarar moncá mozin goittó nó déh. Íba ye hókum díye de, zetará háñsuri fare age ítara fanít záp mari kul or uore zai bolla, **44** aar baki gúne tottá yáh zaáñs or bángasúra ókkol dóri yore hére zaiboí lla. Tói héndilla gorí héfazot or sáañte beggún kul ot foónicci.

28 Zeñtté añára héfazot or sáañte kul or uore foónicci, añára zani faijfi de, hé ñiya war nam óilde Meliti. **2** Hé ñiyar bácinde ókkole añára re ódorbaára meérbani goijjíl. Hiyala zór dér de edde tánça accíl ísafe, ítara ooin zolai añára beggún ore estekbal goijjé. **3** Páule zettót ek tara fúana dargwá dola gorí ooin ot diyé, tói gorome eggwá bic ola háf neeli aái íbar át sái hooñri doijje. **4** Héñiyar bácinde ókkole zettót Pául or át ot háf fwa loñki táikke de deikké, ítara ezzon ore ezzone hoór de, “Becók, e manúc cwa kúni; íbá doriya ttu basilé yo Insáfí nam or debota ye íbá re basitó no dér.” **5** Lekin Páule háf fwa zári ooin ot félaidiye, aar íbar honó hótí nó. **6** Manúc cúne táaijje de, íbar gaa fúlizayboi, arnoíle atíkka fori morizaybói, montor ítara boóut hotún entezar gorí baade dekér de, íba ttu kessú no ór, hétunot ítara nizer mon bodoli hoór de, “Íba eggwá debota!” **7** Hé zagar ñáke hé ñiyar ebbe ñoóñr manúc or zobin ókkol accíl. Manúc íbar nam óilde Fubili. Íba ye añára re estekbal goijjé, aar tin ñin fán añára re becábicí meémandari goijjé. **8** Aar eén óiye, hé októt Fubilir baf gaatzore edde gaalamaniye bisánat fori accíl. Páule íba re saító bútoze giyyé, aar dua gorí baade íbar uore át dí íba re gom goijjé. **9** Yárbaade, hé

ñiyat accíl de baki biyaraimma beggún Pául or hañse aiccé, aar ítara re yó gom gorá giyeh. **10** Ítara añára re boóut ñóilla torikaye izzot goijjé; aar añára héntu bacá lói bolla toiyar óiyi de októt, añára ttu sofór olla lage de híñ beggún ítara zaáñs ot bóridiye. **11** Tin mac baade añára Alexzendariya cóor or zaáñs ot góri bacá lóiyí, ziyán fura citkhal foijjonto hé ñiyat accíl. Hé zaáñs sán ore “Zooñikka Debota,” bouli hoító. **12** Aar Sirakusa cóor ot zaáñs sán bañdí yore hére tin ñin táikki. **13** Añára héntu zaáñs ot góri bacá lói Regiyon cóor ot foónicci. Ek ñin baade doóinali boiyar baát doijje, aar tarfor ñin Puteli toón ot foónicci. **14** Hére añára hoozzon imandár báiboináin loot faiyí, zetará añára re ítarar fúañti ek háfta tákito dawot dyíl. Héengori añára Rom ot foónicci. **15** Héñiyar imandár báiboináin ókkole zettót añára aiyr de fúinne, ítara añára llói milto hodún Appiyus or Bazar hoó de híyan or héddur aiccé, ar hodún Tinboóñing hoó de híyan or héddur aiccé. Páule ítara re dekí Alla re cúkuriya goijjé, aar hímmot faiyé. **16** Añára Rom ot foónisi baade Pául ore nizer ttu monehoó de hére táki bolla ezazot ñiya giyeh. Íba re ezzon fóouse faára díto. **17** Tin ñin baade, Páule Yohúdir neta ókkol ore ekkán ot mataiyé, aar ítara zeñtté zoma óiye, Páule ítara re hoór de, “Ó báiyain, zodi añí añárar koun or edde añárar bafðada ókkol or rosóm ókkol or ulða kessú no goillé yo, toóu añré hodir ñóilla góri Jerúsalem ottu Romi ókkol or át ot gosáidiya giyeh. **18** Romi ókkol ottu añré zerá gorí baade eridito monehoóil, kiyólla-hoilé ítara añr ttu mora fore de héndilla honó hosúri nó faa. **19** Montor Yohúdi ókkole zettót híyan ot bazá díye, añí mojbúr ói Káisar ore apíl goijjí, háleke híyan or maáni añr ttu nizer koun or ulða elzam lagaibár niyot accíl de no. **20** Hétolla bóuli añí tuáñra re sai bolla edde tuáñra llói hotá hoi bolla tuáñra re mataiyí deh, kiyólla-hoilé Boni Isráil ókkole ze acá raké hé acár zoriya añré e síyol lói bañdá giyeh.” **21** Hétunot ítara íba re hoór de, “Añára tuáñr baabute Yohúdiya ttu honó ceñrí nó fai, aar héntu ze báiyain eré aiccíl ítara ttu yó honókiye tuáñr baabute no honó hóbor díye, aar no honó hóraf hoiyé. **22** Montor añára ttu tuáñr rai ókkol fúinto monehoór, kiyólla-hoilé añára zani de, fottí zagar maincé e fírkar ulða hotá ókkol hoó.” **23** Tói ítara Pául lói mili bolla eggwá ñin ñík goijjé, aar ítara edde aró bicí manúc íba táke de

zaga híyan ot aiccé. Tarfore Páule ítara re bínna ttu lóti háñzinna fojjonto Allar raijor baabute buzáil edde gobá díyl, aar Muúsar Córiyot edde nobi ókkol or kitab ottu dahái dídi ítara re Isár baabute iman aná baitó kucíc goijjíl. **24** Íbar boiyan fúni kiyé-kiyé iman ainné, montor argúne ekin nó goré. **25** Ítarar bútoze zettót obonaboni foida óiye, Pául or e hotá fúni ítara zaat doiije, ki hoilé, “Pak-Ruh ye nobi Yesáyahr áta tuáñrar bafdáda ókkol ore sóiyi hotá hoiyé, ki hoilé, **26** E manúc cún or hañse zai hoógoi de, “Tuáñra hane fúnat tákiba montor no buzíba, tuáñra suké saat tákiba montor no siníba. **27** Kiyólla-hoilé manúc ítarar dil toh doró óigiyoi, ítarar han bór óigiyoi, aar ítara nizer suk bon gorífelaiye. Arnóile ítara nizer suké dekító, hane fúnito, nizer dile buzí Añr hañse fíri aitó, aar Añí ítara re gom goittám.’ **28** “Hétolla añr ttu tuáñra re yíán zanaidito monehoór de ki, Allar e nejat or hóbor Beyohúdi ókkol or hañse foónsa gíyeh, aar ítara fúnibo.” **29** Páule hotá híin hoiyé rár, Yohúdi ókkole afós ot bicí barábari dí giiyégoi. **30** Pául fura dui bosór fojjonto nizer bára gór ot táikkil, aar zetó zon íbar hañse aitó ítara beggún ore íba ye estekbal gorí, **31** furafuri hímmot or sáañte honó bazá sára Allar raijor baabute tobolik goittó edde Malik Isá Mosihr baabute taalim dito.

Romiól

1 Añí Pául, Mosih Isár éggwa gulam, zibá re sáhabi ói bolla ñaka giyéh edde Allar kúchóbor or tobolik olla basílowa giyeh, **2** ze kúchóbor or waada Alla ye age lóti Nizor nobi ókkol or duara pak-kalam ot mazé goijjíl. **3** Hé kúchóbor óilde íbar Fuar baabute, zibá insán or hé rúwate Dawud or nosól ottu zormo óoil, **4** aar pakir Ruhr hé rúwate mora ttu zinda gorá giyeh de hétolla kudurut or sáante Allar Fua de dahá giyeh. Íba óilde Isá Mosih añárar Malik, **5** zibár duara añára rahámot edde sáhabigiri faiyí, zeéne íbar nam ói bolla tamám koum ókkol ore iman ottu foida ó de fórmadarir hére aní; **6** zetará re Isá Mosihr ói bolla ñaka giyéh, ítarar bútoze tuáñra yó asó. **7** Tuáñra zetará Rom cóor ot Allar adorbon asó, zetará re níki Alla ye Nizor pak bonda ói bolla ñaikké, tuáñra beggún or hañse lekír: Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **8** Ebbe age, añí tuáñra beggún olla Isá Mosihr duara añr Alla re cúkuriya gorír, kiyólla-hoilé tuáñrar iman or baabute toh duniyair agagura howá zar. **9** Ze Allar Fuar baabute kúchóbor tobolik gorí-gorí añí fura dile Allar hédmot gorí, íba añr gobá asé de ki, añí honó bad sára tuáñra re yaad gorí yore **10** duat hámica magí de, Alla ye sailé añí zen ebarot óile honó bote tuáñrar hañse aibár rasta fai. **11** Kiyólla-hoilé añr ttu tuáñra llóí milto kúb monehoór, zeéne añí aái tuáñra re ruúhanir kessú niyamot dii fari, ziíne tuáñra re mozbut goríbo; **12** yáni, tuáñrar hére táki, tuáñra ttu edde añr ttu asé de imane ezzon ore ezzone josba di faijjum. **13** Báiboináin ókkol, añr ttu tuáñra re zanaidito monehoór de ki, añí tuáñrar hañse ai bolla boót bar niyot goijjíl de asé, montor etókkal foijjonto aái no faillam. Añí aitó saáilam de kiyólla-hoilé zeéne añí tuáñra ttu yó kessú fólfolá fai, zendilla oinno koum ókkol ottu faiyí. **14** Añr ttu manúc beggún or uore zimmadari asé, ítara Girík manúc óuk yáh gañiya óuk, elómdar óuk yáh be-elómdar óuk. **15** Hétolla bóuli tuáñra zetará Rom ot asó, añr ttu tuáñrar hañse yó kúchóbor tobolik goittó bicí azzu asé. **16** Añí toh kúchóbor loi no córmai, kiyólla-hoilé híyan toh iman anóya fottíkiyo re nejat di bolla Allar kudurut, age Yohúdi re yárbaade Beyohúdi re. **17** Kiyólla-hoilé hé kúchóbor ot

toh Allar oh forhésgari zahér ó, ziyán manúce siríf imane hásil gorí faijíl edde faribó, zendilla pak-kalam ot asé, “Forhésgar manúc imane beh basi tákibo.” **18** Montor asman ottu Allar gozzob manúc uitarár hárr bedini edde kuham or ulða zahér ó, zetará sóiyi re kuham lói záfai raké, **19** kiyólla-hoilé Allar baabute ziín zani fara zah híin toh ítarar hañse sáf zahér, kiyólla-hoilé Alla ye híin ítarar hañse sáf zahér goijjé. **20** Duniyair foidayecir héntte lóti toh íbar deki fara no zah de sífót ókkol sáf-sáf góri dahá zar, yáni íbar ofúrani kudurut edde Kúdayi re; híin íbar banaiya mohóluk ókkol ottu ót faa zah, hétolla manúc ítara ttu honó bahána náí. (aídios g126) **21** Ítara Alla re zani baade yo toh íba re Alla ísafe izzot nó goré aar cúkuriya yó nó zana, bóлке ítarar báfani behar óigiyoi aar ítarar obuz dil andáre bórigiyoi. **22** Ítara giyani bouli dabi goillé yo, ítara bekuf óigiyoi; **23** aar ítara fána no ó de hé Allar ebaadot bad di endilla mutti ókkol or fuñza goijjé ziín fána óizagoi de insán or, faik or, sair-tingga januwar or edde buke áñre de zandár or súrote banaiya. **24** Hétolla Alla ye ítara re ítarar dil or azzur nafak ham ókkol gorí bolla eridifélaye, híyan olla bóuli ítara ezzon or jisím lói ezzone córmor ham goré. **25** Ítara misá ekkán olla Allar hánsa re bad difélaye, aar Foida-goróya re no ói mohóluk or ebaadot edde hédmot goijjé. Montor Foida-goróyar taarif abadulabad ówat tákibo! Aamin. (aión g165) **26** Alla ye hétolla toh ítara re córomi ham or azzut eridifélaye; ítarar beriyáin de úddwa ziyán milmilab or niyom asé híyan ore ulðat bodolifélaye. **27** Héndilla, beřaáin de yó beriyáin lói ziyán milmilab or niyom asé híyan bad di, oinno zon loi córmor ham goittó fool óigiyoi, yáni beřaáin de beřaáin lói córmor ham gorí bolla; hétolla ítara nizor uore ítarar hóraf ham or laayek zoribana ané. **28** Aró, ítara zettót Allar baabute zankari rakíto nó saá, Alla ye ítara re hóraf mon rakí bolla eridifélaye, zeéne ítara ham uíin goré ziín gorón tík no; **29** ítara hárr kuham, burai, lalós edde hórafe furaiya; ítara hásorot, kún, hoijja, férokbaži edde ducconir kíyale bóraiya; ítara gifot-goróya, **30** bodnam-goróya, Alla re nafórot goróya, biyadof, anari, edde fohór ola; ítara hóraf ham or rasta kúle, aar bafmaar nafórman ókkol; **31** ítara obuz, beiman, zaalem, edde berahám; **32** ítara Allar e hókum zane, ki hoilé, zetará héndilla ham híin goré ítara moot or laayek, montor toóu ítara

siríf hín gorát táke de no, bólke aar zetará hín goré itarar sáañt óu deh.

2 Hétolla, ó moniccó, tui zee niki oinno zon or hosúri dóros, tor ttu honó bahána ná; kiyólla-hoilé tui ziyán olla ar ezzon or hosúri dóros, híyan toh tui nize yó gorí nizorgá nize hosúrbon de sábut gorós. **2** Añára toh zani, zetará héndilla ham goré itara re Alla ye sóiyir uore bisar goré. **3** Lekin, ó moniccó, tui zee niki ekí ham uúin gorós zín olla ar ezzon or hosúr dóros, tui Allar sáñza ttu hári zabigoi bóuli táaros níki? **4** Aar náki tui íbar oti meérbani, bordac, edde sobór ore oggarájja gorór dé? Tui zanos de no né, Allar meérbani moksót óilde toré touwá gorár uzu loizon dé? **5** Montor tor dil toh doró, tor ttu touwá goríbar dil ná; héndilla gorí tui nizor lla gozzob zoma gorór, oh din olla ze din Allar gozzob nazil óibo edde íbar hók bisar zahér óibo. **6** Íba ye toh fottíkiyo re nizor-nizor ham mozin bodola dibo: **7** zetará sobór or sáañte gom ham gorí-gorí mohíma, izzot edde fána no ó de zindigi faibar talac goré, itara re íba ye ofúrani zindigi diibo; (aiōnios g166) **8** montor zetará siríf nizor fáida tuwa aar sóiyi gán no mane bólke kuham fisá dore, itarar uore íba ye gozzob edde laánot nazil goríbo. **9** Kuham goré de fottí insán or uore mosibot edde ocánti aibó, age Yohúdir uore yárbaade Beyohúdir uore; **10** montor gom ham goré de itara fottí ekzone mohíma, izzot, edde cánti faibo, age Yohúdi ye yárbaade Beyohúdi ye. **11** Kiyólla-hoilé Alla ye toh ektorfía no goré. **12** Zedúne Córíyot no fai guná goijjé, itara dónco óibo de yó Córíyot sára; aar zedúne Córíyot fai guná goijjé, itara re Córíyot lói beh bisar gorá zaybo; **13** kiyólla-hoilé Allar nozor ot forhésar toh Córíyot or boiyan fúne de itara no, bólke Córíyot amól goré de itara re beh forhésar bóuli kobul gorá zaybo. **14** Becók, Córíyot ná de Beyohúdi ókkole zeñté nizor fítorote ham uúin goré zín Córíyot ot asé, itara ttu Córíyot no tákile yo héñtte itara nizor lla nize córiyot. **15** Híyane itara sábut goré de, Córíyot or corót ókkol itarar dil ot leikká asé. Héndilla bóuli itarar hélome yó gobá déh, kiyólla-hoilé itarar báfani ye táitai itarar hosúr deh aar táitai itarar sófai deh. **16** Hín oh din óibo ze din Alla ye Isá Mosihr áta insán or gufoni ókkol or bisar goríbo. Hé baabute añ tobolik gorí de kúchóbor ot asé. **17** Becók tui toh nizoré nize Yohúdi hoós,

aar Córíyot or uore bóraca gorós edde Allar háas bonda bouli fohórai gorós; **18** tui Córíyot ottu taalim faiyós ísafe íbar moncá zanos, aar sóiyi gán basí zanos; **19** tui furafuri táaros de, tui óilde añdá ókkol or foñt dahóya, andár ot asé de itara lla ekkán foór, **20** fool ókkol or ézzon torbiyotdoya, aar nabalok ókkol or ézzon ustat; kiyólla-hoilé tor báfa óilde, Córíyot ot hárr kessúr zankari edde sóiyi asé. **21** Tóoile, tui zee niki ar ezzon ore cíkka dos, tui nizoré cíkka dos né? Tui zee niki suri no goijjé hoói waáz gorós, tui hóno suri gorós né? **22** Tui zee niki zená no goittó hoós, tui hóno zená gorós né? Tui zee niki mutti ókkol ore nafórot gorós, tui hóno mondir ottu suri gorós né? **23** Tui zee niki Córíyot lói borái gorós, tui hóno Córíyot báñgi Alla re beizzoti gorós né? **24** Pak-kalam ot toh endilla asé, “Tuáñrar solasol deki Beyohúdi ókkole Allar nam or kuféri gorér.” **25** Kiyólla-hoilé, becók tor ázomir kimot asé zodi tui Córíyot amól gorós, montor zodi tui Córíyot báñgoya de óile, tóoile toh tor ázomi gorá ázomi nó gorós fán óigiyo. **26** Hétolla, zodi ázomi goijjé honó manúce Córíyot or dabi-dawa ókkol amól goré, itare kí Alla ye ázomi goijjé bóuli no gonibó né? **27** Tuáñra Yohúdi ókkol ore Beyohúdi ókkole hosúr díbo, kiyólla-hoilé tuáñra ttu leikká Córíyot táki aar tuáñra ázomi goijjé manúc ói baade úddwa tuáñra Córíyot báñgo, montor itara toh jisím ot ázomi no goré de óile yo Córíyot amól goré. **28** Kiyólla-hoilé asól Yohúdi toh uite no zee niki siríf Yohúdi kúwala, aar asól ázomi toh waán no ziyán jisím harí baár ttu gorá zah. **29** Bólke asól Yohúdi óilde uite zee niki dil ottu Yohúdi; aar asól ázomi óilde waán ziyán Allar Ruhr duara dil ot gorá zah, leikká Córíyot or duara no. Héndilla manúce taarif faa de insán or torfóttu no, bólke Allar torfóttu.

3 Héen óile, Yohúdi ókkol ottu kii fáida asé? Ázomi gorár kii kimot asé? **2** Becók, hárr mikká ttu bicí fáida asé. Ebbe agor gán óilde, Alla ye itarar hañse íbar kalam nazil gorí bolla itara re bóraca goijjíl. **3** Ítara kessú ye beimani goijjé de óile yo kii óiye? Ítara beimani goijjé bóuli kí Alla ye yó beimani goríbo né? **4** Bilkúl no! Bólke fottí manúc misá tóorile yo, Alla sóiyi tóorar zorur, zendilla pak-kalam ot asé, “Tuáñr hotá ye sábut goré de, Tuñí hámica sóiyi táko, aar Tuáñre elzam laga zah de óktót

Tuñí ziti aiyó.” 5 Montor añárar kuhame zodi Allar hók bisar zahér ó, tóoile añára kii hoitám? Alla ye añára re sánza dé de híyan nainsáfi no ór ne? Becók híyan óilde insán or ekkán nozoriya. 6 Héndilla bilkúl no! Arnóile Alla ye duniyair bisar keéngori gorí faribó? 7 Hodúne endilla hoibó, “Añr misá hotáye zodi Alla hámica sóiyi táke de híyan zahér ó aar híyane Íbar mohíma ó, tóoile Íba ye añré gunágar ísafe kiyá bisar goré?” 8 Héndilla hoó de ítara endilla yó hoibó, ziyán añára hoói bóuli hoói hodúne añárar bodnam goré, ki hoilé, “Aiyó, añára burai gorígoi, kiyólla-hoilé zetó burai gorí fare héto gom.” Hé bodnam-goróya ókkole ítarar laayek sánza hámafa fai zaybo. 9 Yala añára kii hoitám? Añára Yohúdi ókkol kí Beyohúdi ókkol or túaro beétor? Bilkúl no; añára toh age yó hoóilam, tamám Yohúdi ókkol edde Beyohúdi ókkol gunár kobzat asé. 10 Zendilla pak-kalam ot asé, “Forhésgar honókiye náí, ekzon úddwa náí; 11 buz ola kiyé náí, honókiye Allar talac no goré. 12 Beggún manúc sóiyi ttu lorigiyói, beggún ekkú fúañti bigirigiyoi; gom ham goré de honókiye náí, ekzon úddwa náí.” 13 “Ítarar muk fooñsa lac or kúla hobor or dóilla; ítara nizor zire férokbaži goré,” “Ítarar uñt ot háf or bic asé.” 14 “Ítarar muk gozzobe furaiya; ítarar hotát honó mırá náí.” 15 “Kún gorí bolla ítara duñri zaa; 16 ítara zeré zaa hére dónco edde mosibot foida goré. 17 Cánti góri tákar rasta ítara no siné.” 18 “Ítarar dil ot Allar honó dōor náí.” 19 Yala añára zani de, Córíyote zín hoó híin uitará re beh hoó zetará Córíyot or tole asé; zeéne honó insán ottu hoibár kessú no táke, aar fura duniyai ttu Allar hañse ísafkitab diya fore, 20 kiyólla-hoilé Córíyot amól gorí honó insán Íbar nozor ot forhésgar no tóoribo, kiyólla-hoilé Córíyot or duara toh gunár zankari éna aiyé. 21 Montor yala toh Alla ye maincóre Córíyot sára keéngori forhésgar bóuli kobul goré de rasta híyan zahér óiye, ziyán or baabute Tourat Córif ot edde nobi ókkol or kitab ot óu zikír asé. 22 Rasta híyan óilde, zetará Isá Mosihr uore iman ané ítara beggún ore nizor-nizor imane Alla ye forhésgar bóuli kobul goré; rasta híyan ot Yohúdi edde Beyohúdi honó forók náí, 23 kiyólla-hoilé beggúne toh guná goijjé, aar Allar mohíma ttu maárum óigiyoi. 24 Montor Mosih Isár bútoe asé de azadir usílaye Alla ye beggún ore Nizor rahámot or hádiya ísafe forhésgar bóuli kobul goré. 25 Alla ye Íba re Nizor lou

báca báy endilla koffara ísafe peec goijjé ziyán or uore iman aníle gunár maf faa zah. Híyan lói Alla ye daháye de, Íba oñtté yó Insáfuala accíl zeñtté insáne goijjíl de gunár sánza no di Íba ye cóoi-cóoi accíl. 26 Héndilla gorí Íba ye e októót sábut goijjé de ki, Íba insáfuala, aar zee niki Isár uore iman ané ítare Íba ye forhésgar bóuli kobul goré. 27 Tóoile borái goríbar kii asé? Kessú náí. Hon córiyot olla bóuli náí de? Amól or né? No, bólke iman or córiyot olla bóuli. 28 Hétolla añára dóri de ki, manúc forhésgar tóore de nizor imane, Córíyot or amóle no. 29 Tóoile Alla ki siríf Yohúdi ókkol or Alla? Íba kí Beyohúdi ókkol or óu Alla no? Becók, Íba Beyohúdi ókkol or óu Alla, 30 kiyólla-hoilé Alla toh ekgwá éna asé, zibá ye Yohúdi ókkol ore forhésgar bóuli kobul goríbo de yó imane, aar Beyohúdi ókkol ore goríbo de yó imane. 31 Tóoile kí añára imane Córíyot ore baatel gorír? Bilkúl no! Bólke, añára Córíyot zari rakí deh.

4 Héen óile, jisím or híkka ttu añárar ze baf asé hé Ibrahíme híyan or baabute kii loot faáil hoitám? 2 Kiyólla-hoilé Ibrahím ore zodi amóle forhésgar bóuli kobul gorá gíyeh de óile, tóoile toh yóggwa ttu borái goríbar kessú tákito, montor Allar muúntu no. 3 Pak-kalam ot kii asé? Yíán, “Ibrahíme Allar uore iman raikkíl, hétolla yóggwa re forhésgar bóuli gona gyl.” 4 Ham goré de ítar tolof ore toh hádiya bóuli dóra no zah, bólke hók bóuli dóra zah. 5 Montor zee niki nizor amól or uore bóraca no gorí Ubár uore bóraca goré zibá ye bedini ókkol ore forhésgar bóuli kobul goré, ítare ítar hé imane beh forhésgar bóuli gona zah, 6 zendilla Dawude yó manúc ubá mubarek bouli hoiyé zibá re Alla ye amól sára forhésgar bóuli gone. Íba ye hoiyé de, 7 “Mubarek uitará zetarár hosúr ókkol maf gorídiya gíyeh, zetarár guná dur gorífela gíyeh. 8 Mubarek manúc ubá, zibár guná Mabude hísaf no rakíbo.” 9 Eré mubarek hoiyé de híyan kí siríf ázomi goijjá ókkol olla? Aar náki ázomi agoijjá ókkol olla yó? Kiyólla-hoilé pak-kalam ot toh añára endilla faiyí, “Ibrahím ore imane beh forhésgar bóuli gona gyl.” 10 Tóoile hoñtté gona gyl dé? Yóggwa ye ázomi gorí baade né náki ázomi no goríbar age? Becók ázomi gorí baade no, bólke ázomi no goríbar age. 11 Forezai yóggwa ye ázomi goijjíl; yóggwar hé ázomi óilde ekkán nicán ziyáne dahá de, yóggwa ázomi agoijjá tákite lóti yóggwa re

imane beh forhésar bůli gona gyíl. Hétolla bůli yóggwa óilde uitará beggún or baf, zetará re ázomi agoijjá óile yo iman anóne forhésar bůli gona zah. **12** Héndilla, yóggwa ázomi goijjá uitarár óu baf zetará siríf ázomi goijjé de no, bólke endilla imane yó zindigi hara ziyán añáar baf Ibrahim ottu ázomi goríbar age accíl. **13** Kiyólla-hoilé Alla ye Ibrahim ore ze waada dífl, yóggwa edde yóggwar nosóle e duniyai miras faibo hoói, híyan toh yóggwa ye Córiyot amól gorí faiyé de no, bólke imane forhésar tóori beh faiyé. **14** Kiyólla-hoilé Córiyot amól gorí zodi honókiye mirasdár ói fare, tóoile toh iman befózul óigiyoi, aar hé waadar honó kimot náí; **15** kiyólla-hoilé Córiyote toh gozzob éna ané, montor zeře córiyot náí, hére córiyot bāngar hotá yó náí. **16** Hétolla, hé miras imane beh faa zah, zeéne híyan rahámote ó aar hé waada Ibrahim or tamám nosóle faibo de híyan fakka ó; híyan siríf Córiyot amól-goróya ókkol olla no, bólke uitará lla yó zetará ttu iman asé Ibrahim or dóilla, zibá añára beggún or baf, **17** zendilla pak-kalam ot asé, “Añí toré boóut koum or baf banaiyí.” Yóggwa óilde Ubár nozor ot añáar baf zibár uore yóggwa ye iman raikkíl, yáni Allar uore, Zibá ye mora re zinda goré edde náí de jiníc ókkol Nizor hókume foida goré. **18** Ibrahimé honó acá no tákile yo acár sáañte iman tíkai raikkíl, hétolla yóggwa boóut koum or baf óiye, zendilla yóggwa re howá gyíl de ki, “Tor nosól ékkol bicí óibo.” **19** Zeñtté yóggwa tokoriban ek cót bosór óiye, buijjíl de, nizor moot or októ dāke aáigiyoi aar Sáraħ ttu yó fua zormo di faribár októ ar náí, montor toóu yóggwar iman komzur nó óiyo. **20** Allar waadar baabute yóggwar dil ot honó cók-cubá nú aiyé, bólke iman ot aró mozbut ói Allar taarif goittó, **21** aar yóggwa ttu furafuri ekin accíl de, Alla ttu Nizor waada fura goríbar óu kémota asé. **22** Yóggwa re hétolla beh forhésar bůli gona gyíl. **23** “Forhésar bůli gona gyíl” hoó de hotá híyan siríf yóggwa lla leká gíyeh de no, **24** bólke añára lla yó. Añára re yó de forhésar bůli gona zaybo, kiyólla-hoilé añára toh Ubár uore iman ainní Zibá ye Isá añáar Malik ore mora ttu zinda goijjé, **25** zibá re añáar hosúre beh moot or át ot tulódiya gyíl, aar añára forhésar tóori bolla beh mora ttu zinda gorá gíyeh.

5 Hétolla, añára re zettót imane forhésar bůli kobul gorá gíyeh, Alla lloi añára llói

añáar Malik Isá Mosihr duara cántit así. **2** Añára yala ze rahámot or tole así hére añára re íba ye beh foónsaiye, kiyólla-hoilé añára toh iman ainní; hétolla Allar mohímar bági óibar acáye añára kúci gorír. **3** Siríf híyan no, bólke añára mosibot ot mazé yó kúci gorí, kiyólla-hoilé añára zani de, mosibote bordac foida goré, **4** bordace sóiyi adot bana, aar sóiyi adote acá ané. **5** Hé acáye toh añára re córminda no goré, kiyólla-hoilé añára re diiya gíyeh de hé Pak-Ruhr duara Alla ye añáar dil ot Nizor muhábbot dālidiye. **6** Kiyólla-hoilé zeñtté añára nizoré nize basaibár kaabel nu accílám, héñtte sóiyi októ mozin añára bedini ókkol ore basai bolla Mosiħ ye zan diyé. **7** Zee tee toh honó forhésar manúc olla úddwa nizor zan dito no saá, toóu ezzon bálai-goróya lla honókiye nizor zan dito hímmot goillé goittó fare. **8** Lekin Alla ye añára re goré de Nizor muhábbot híyan eén gorí zahér goijjé, añára gunágar accílám de októ Mosiħ ye añára lla bůli zan diyé. **9** Añára re zettót Mosiħ lou wór usflaye forhésar bůli kobul gorá gíyeh, añára toh hámaha íbar duara Allar gozzob ottu basiyúm. **10** Kiyólla-hoilé añára toh age Allar ducon accílám, montor íbar Fuar moot or usflaye íba llói añáar bonot óigiyoi. Añáar bonot zettót óigiyoi, añára toh hámaha íbar zibone nejat faiyum. **11** Siríf híyan no, bólke añára Alla re lói añáar Malik Isá Mosiħ duara kúci yó gorí, zibá ye añára re Alla lloi bonot gorídiye. **12** Guná duniyait ekzon manúc or duara beh accíl, aar hé gunár zoriya moot aái fura insán-zatir uore fólígíyoi, kiyólla-hoilé beggúne guná goijjé. **13** Becók, Córiyot diibar age duniyait guná accíl, montor zeře córiyot náí hére guná bůli dóra yó náí. **14** Toóu moote Adom ottu lóti Muśa foijjonto hókumot goijjíl, uitarár uore úddwa zetarár guná Adom or nafórmanir dóilla no. Adom accíl aibár hotá accíl de íbar icára. **15** Lekin rahámot or hádiya hé hosúrír dóilla no. Kiyólla-hoilé ekzon manúc or hosúre bicí manúc moijjé de óile yo, Allar rahámot toh yár túaro boóut bicí dōónr, ziyán ar ekzon Manúc, yáni Isá Mosiħ rahámot or duara hádiya ísafe hé bicí zon or uore bicígori diiya gíyeh. **16** Héndilla, Allar hádiyar notiza yó hé gunár notizar dóilla no. Kiyólla-hoilé ek ruwate hé ekkán hosúrír notiza óilde hosúrbon bouli fáisela zari óiye, montor arek ruwate boóut hosúrír zoriya ze hádiya aiccé híyan óilde forhésar tóora. **17** Ekzon

manúc or hosúrír zoriya zettót moote hé ekzon ottu lóti hókumot gorá cúru goijjé, tói añára zetará aṭalikka rahámot faiyí aar hádiya ísafe forhésgar tóoiiji, añára toh zindigít maze Ubár zoriya, yáni Isá Mosihr zoriya hámaha hókumot goríyumu. **18** Hoóir de ki hoilé, zendilla ekkán hosúrír notiza ísafe fura insán-zati hosúrbon tóoiije, héndilla ekkán gom ham or notiza óilde fura insán-zati lla forhésgar tóora edde zindigi aiccé. **19** Kiyólla-hoilé zendilla ekzon manúc or nafórmanir zoriya boóut zon gunágar tóoiije, héndilla Ekzon or fórmadarir zoriya hé boóut zon ore forhésgar bóuli kobul gorá zaybo. **20** Córiyot etollá beh diiya giyéh, zeéne hosúri bicí ó; montor zepé guná bicí óiye, hére rahámot toh yár túaro bicí óigiyoi, **21** zeéne guná ye zendilla moot or duara hókumot goijjé, héndilla rahámote yó forhésgarir ham loi hókumot goré, Isá Mosih añárar Malik or duara ofúrani zindigi faa bay bolla. (aiñnios g166)

6 Tóoile añára kii hoitám? Añára guná gorát tákitam né zeéne rahámot bicí ó? **2** Bilkúl no! Kiyólla-hoilé añára toh guná ttu morigiyógoi, tói añára hé gunát ar kéengori zindigi haraiyúm? **3** Tuáñra kí no zano, añára zedúne Mosih Isá llói ek óibar bápṭisma loiyí, añára hé bápṭismar duara íbar fúañti morigiyógoi dé? **4** Hétolla añára bápṭismar duara íbar fúañti morigiyógoi de híyane dahá de, añára re íbar fúañti dohón gorá giyeh, zeéne Alla Bafe Nizor mohímaye Mosih re zendilla mora ttu zinda goijjé, héndilla añára yó noya zindigi harai. **5** Kiyólla-hoilé zodi añára íbar dóilla mori yore íba llói ek óigiyógoi de óile, añára toh íbar dóilla zinda gorá zah lói yó íba llói hámaha ek óiyumu, **6** kiyólla-hoilé añára toh zani, añárar furana fítorot ore íbar fúañti kúruc ot dí mariféla giyeh, zeéne guná ye hókumot goittó de añárar jisím yían nac óizagoi, aar añára gunár gulam ar no táki. **7** Kiyólla-hoilé zee niki morigiyói, íte toh guná ttu azad óigiyoi. **8** Añára zettót Mosihr fúañti moijjé, añára ttu ekin asé de ki, añára íbar fúañti zinda yó tákiyumu, **9** añára toh zani, Mosih re zettót mora ttu zinda gorá giyeh, íba ar honódin no moribó; moot ottu íbar uore ar honó kémota náí. **10** Kiyólla-hoilé zeñtté íba moijjíl, íba toh ekbar ot hámica lla gunár hókumot ottu morigiyói; montor yala íba ye ze zindigi harar, híyan Alla lla beh harar. **11** Héndilla tuáñra re tuáñra yó báfiyo de, gunár hókumot ottu

tuáñra mora, aar yala Mosih Isár bútoire Alla lla beh zinda asó. **12** Hétolla guná re tuáñrar fána ó de jisím or uore hókumot goittó no diyó, arnóile tuáñra re hé jisím or hóraf moncá mozin sola baibó. **13** Jisím or honó híssa re gunár ham gorí bolla eridi no raikkó, bólke mora ttu zinda óiya manúc ísafe nizoré Allar át ot gosáido, aar héndilla íba lla forhésgarir sámama ísafe nizor jisím or híssa ókkol óu gosáido. **14** Kiyólla-hoilé guná ye tuáñrar uore ar hókumot no goríbo, kiyólla-hoilé tuáñra toh Córiyot or tole no, bólke rahámot or tole. **15** Tóoile kii óiye? Añára Córiyot or tole no bólke rahámot or tole así bóuli guná goittám né? Bilkúl no! **16** Tuáñra kí no zano né, zeñtté tuáñra hotábattara mani bolla nizoré honókiyor hañse gulam ísafe gosáido, héñtte tuáñra zar hotábattara manor ítar gulam dé? Héndilla, tuáñra no óile gunár gulam boni moribá, arnóile Allar gulam boni forhésgari ham goríba. **17** Lekin Allar cúkur de ki, tuáñra gunár gulam accíla de óile yo, toóu tuáñra re diya giyéh de taalim ot ze sóiyi faiyó híin ore fura dile manat asó. **18** Tuáñra re toh guná ttu azad gorífela giyeh, yala tuáñra forhésgarir gulam óigiyogoi. **19** Tuáñra buzí kul no faiba de hétolla, añí insáni zindigi ttu meésal dí iín beggún hoóir. Zendilla tuáñra aró kuham gorí bolla nizor gaár híssa ókkol ore nafak edde kuham or gulam ísafe eridi raikkíla, héndilla pak ói bolla yala tuáñra nizor gaár híssa ókkol ore forhésgarir gulamit gosáido. **20** Kiyólla-hoilé zeñtté tuáñra gunár gulam accíla, héñtte toh forhésgari ttu azad accíla. **21** Tuáñra zín gorón or zoriya yala córmindat asó, híin gorí yore kii fáida faáila dé? Kiyólla-hoilé híin or notiza toh moot. **22** Lekin yala de tuáñra guná ttu azad fai Allar gulam óigiyogoi; híyan ot tuáñrar fáida óilde, tuáñra zetó éto pak ór, aar ahérit ofúrani zindigi faiba. (aiñnios g166) **23** Kiyólla-hoilé gunár muzuri toh moot, montor Mosih Isá añárar Malik or duara Allar hádiya óilde ofúrani zindigi. (aiñnios g166)

7 Báiboináin ókkol, tuáñra zetará Córiyot zano, añí tuáñra re hoóir, tuáñra kí no zano né, ze honó manúc or uore Córiyot or hókumot otódin beh táke zetódin hé manúc cwa zinda táke? **2** Meésal, córiyote bou wóre nizor hócom lói otódin baidá raké zetódin hócom zinda táke; montor zodi hócom morizagói, híba hé córiyot ottu azad óizagoi ziyáne híba re hócom lói bañdí

raikké. 3 Hétolla, hócom zinda tákite zodi h́ba ar ezzon or óizagoi, tooile h́ba re zenákur howá zaybo; montor zodi h́bar hócom morigiyói de óile, tooile h́ba hé córiyot ottu azad faiyé, yala h́ba ar ezzon or óizaille yo h́ba re zenákur howá no zaybo. 4 Héndilla, ó ańr báiboináin ókkol, tuáńra Mosihr jisím or híssa bonigiyógoi de hétolla, Córiyot ottu tuáńra yó morigiyógoi. Yala toh tuáńra ar ezzon or óigiyogoi, yáni mora ttu zinda gorá gýeh de hé Mosihr óigiyogoi, zeéne añára Alla lla gulagala dórai. 5 Kiyólla-hoilé zeńtté añára insáni fítorot mozin zindigi haraitám, héńtte Córiyot or foida goijjá gunár azzu ókkole añárar jisím or híssa ókkol ot ham goittó, zeéne añára endilla gulagala dórai zííne moot ané. 6 Lekin añára ziyán ot bondi accílám, híyan ottu mori yore yala Córiyot ottu azad faiyí. Hétolla añára ar hé leikká Córiyot or diiya furan zindigir gulam no, bólke Pak-Ruhr diiya noya zindigir gulam. 7 Tóoile añára kii hoitám? Córiyot guná de né? Bilkúl no! Bólke Córiyot sára ańi guná siní no faittam, kiyólla-hoilé Córiyote zodi endilla no hoitó, “Lalós no goríba,” tooile lalós kii de ańi no zaintam. 8 Montor guná ye hé hókum ottu fáida tulí ańr bútoře hárr dóilla lalós foida goijjé, kiyólla-hoilé Córiyot no tákile, guná toh morar dóilla ói táke. 9 Ek hale ańi Córiyot sára zinda accílám, montor hé hókum aiccé rár guná zinda óiye, aar ańi morigiyógoi. 10 Hé hókum ziyáne zindigi aníbar accíl, híyane ańr lla moot ainné. 11 Kiyólla-hoilé guná ye hé hókum ottu fáida tulí ańré daga diyé, aar hé hókum or duara ańré marifélaiye. 12 Hé ísafe, Córiyot pak, aar héře asé de hókum ókkol óu pak, insáfi edde gom. 13 Híyan or maáni kí ziyán gom híyan ańr lla moot boinné dé? Bilkúl no! Bólke guná re guná ísafe ót fai bolla bóuli guná ye ziyán gom híyan estemal gorí ańr lla moot ainné deh, zeéne hé hókum or duara dahá zah de ki, guná ebbe hóraf. 14 Añára toh zani, Córiyot gabi; montor ańi de jisími; ańré gunár gulamit besiféla gýeh. 15 Ańi kii gorí ańi nize úddwa no buzi; kiyólla-hoilé ańi ańr ttu ziyán goittó monehoó híyan gorí de no, bólke ańr ttu nafórot lage de híyan beh gorí. 16 Ańi zettót ańr ttu ziyán goittó mone no hoó híyan gorí, tooile toh Córiyot gom bouli ańi kobul gorí. 17 Hé súrote, híyan goróya ańi no, bólke ańr bútoře táke de hé guná. 18 Kiyólla-hoilé ańi zani de, ańr bútoře, yáni ańr jisím or bútoře gom kessú náí. Becók, gom mán

goríbar azzu ańr ttu asé, montor ańi híyan gorí no fari. 19 Kiyólla-hoilé ze gom ham mán ańr ttu goittó monehoó, ańi toh híyan no gorí; bólke ze bura ham mán ańr ttu goittó mone no hoó, híyan beh gorát táki. 20 Ańr ttu ziyán goittó mone no hoó híyan zettót ańi gorí, tooile toh híyan goróya ańi no, bólke ańr bútoře táke de hé guná. 21 Yala tooile ańr bútoře ekkán niyom loot fair de ki, gom mán goittó monehoilé, ańr hańse bura gán aái boói táke. 22 Kiyólla-hoilé ańi toh nizor bútotu Allar niyom ore bicí fosón gorí, 23 montor ańi dekir de, ańr jisím or híssa ókkol ot aró ekkán niyom asé, ziyáne ańr dil or hé niyom loi larái gorí ańré gunár niyom waán or bondi banai raké ziyán ańr jisím or híssa ókkol ot táke. 24 Ańi bicí fuckará! Moot ané de jisím yían ottu ańré hone basaibó? 25 Alla re cúkuriya, íba ye ańré Isá Mosih añárar Malik or duara basaiyé! Hé ísafe, ek ruwate toh ańr dil ot asé de, Allar niyom or gulami gorí bolla; montor arek ruwate ańr insáni fítorote ańré gunár niyom or gulam banai raké.

8 Zetará Mosih Isár bútoře asé, ítara re yala ar hosúrbon dóra no zah. 2 Kiyólla-hoilé tuáńra re toh zindigi dooya Pak-Ruhr niyome, Mosih Isár duara, gunár edde moot or niyom ottu azad gorífelaiye. 3 Córiyote insán or jisím or komzurir zoriya ziyán gorí nó fare, Alla ye híyan endilla gorí goijjé: gunár kurbani di bolla íba ye Nizor Fua re guná ola jisím or súrote diferáíye. Héndilla góri íba ye insán or jisím ot asé de guná re hosúrbon tóoraiye, 4 zeéne añára zetará insáni fítorot mozin no bólke Pak-Ruhr héдайot mozin soli, añára Córiyot or dabi-dawa re furafuri adai gorífelai fari. 5 Kiyólla-hoilé zetará insáni fítorot mozin sole ítara insáni fítorot or gún or híkka beh mon deh, montor zetará Pak-Ruhr héдайot mozin sole ítara Pak-Ruhr gún or híkka beh mon deh. 6 Insáni fítorot or híkka mon dilé moot beh aiyé, montor Pak-Ruhr híkka mon dilé zindigi edde cánti faa zah, 7 kiyólla-hoilé ze mon insáni fítorot or híkka, híyan Allar duccon; kiyólla-hoilé híyane Allar córiyot mainto toh razi no, aar mani yó no fare. 8 Hé ísafe, zetará insáni fítorot mozin sole ítara Alla re kúci gorí no fare. 9 Lekin Allar Ruh sóiyi-sóiyi tuáńrar bútoře táke de óile, tooile toh tuáńra insáni fítorot or mozin no bólke Pak-Ruhr mozin soloór deh. Lekin zar bútoře Mosihr Ruh náí, íte Mosihr no. 10 Zodi Mosih

tuáñrar bútoe asé de óile, becók ek ruwate tuáñrar jisím gunár zoriya mora de óile yo, arek ruwate forhéggarir zoriya Pak-Ruh óilde foran. **11** Aar zodi Zibá ye Isá re mora ttu zinda goijjé Ubár Ruh tuáñrar bútoe táke de óile, tooile toh íba zibá ye niki hé Mosih Isá re mora ttu zinda goijjé íba ye tuáñrar fána ó de jisím ore yó íbar oh Ruhr duara zinda goríbo zibá tuáñrar bútoe táke. **12** Hétolla, ó báiboináin ókkol, becók añára fóros or tole así, montor insáni fítorot mozin zindigi haraibá no. **13** Kiyólla-hoilé zodi jisím or fítorot mozin zindigi haro, tooile toh háamaha moribá; montor zodi Ruhr bole jisím or fítorot ókkol marifélo, tooile zinda tákiba. **14** Kiyólla-hoilé zedúne Allar Ruhr hédaiyote zindigi hara, ítara beggún toh Allar fuain. **15** Tuáñra toh gulamir Ruh faiyó de no, zeén niki ar ðoora foitto; bólke tuáñra Allar fuain fíora de Ruh éna faiyó, Zibár zoriya añára Alla re “Abba” yáni “Ó Baf” hoói matai fari. **16** Hé Ruh Nize añárar ruh lói mili gobá dé de ki, añára óilam de Allar fuain. **17** Añára zettót íbar fuain, añára mirasdár óu; yáni añára Alla ttu miras fooya edde Mosihr fúañti miras fooya; kiyólla-hoilé añára zettót Mosihr dóilla duk ókkol bordac gorí, añára íbar fúañti mohímat óu bági óiyum. **18** Añí zani, añárar hañse ze mohíma zahér óibar asé, híyan lói fúwan goillé añárar e zindigir duk-mosibot ókkol kessú no. **19** Héñtte dahá zaybo Allar fuain hontará; híyan deki bolla tamám mohóluk ókkol bicí azzur sáañte entezar ot asé. **20** Kiyólla-hoilé mohóluk ókkol or moksót toh behar óigiyoi; híin ottu monehoói héndilla óiye de no, bólke Alla ye Nizor moncá lói héndilla goijjé deh. Toóu híin ore e acá gán diiya giyé, **21** ki hoilé, ek din hé mohóluk ókkole yó borbadir gulami ttu azad fai yore, Allar fuain dor mohímar azadir bági óibo. **22** Añára toh zani, aij foijjonto tamám mohóluk ókkole endilla gori kiñyar, zendilla gori maa ye fua hálas óibar óktót dukké kiñya. **23** Siríf híine no, bólke añára zetará Pak-Ruh re Allar foóila hádiya ísafe faiyí, añára nize yó bútoe-bútoe kiñyai-kiñyai oh din or entezar ot así, ze din Alla ye añára re Nizor fuain banaibó, yáni añárar gaa re azad goríbo. **24** Kiyólla-hoilé añára re toh acá dii éna nejat diya giyé. Saiyá gán sai bolla toh honókiye ar acá no goré; kiyólla-hoilé ziyán saáifelaiye híyan sai bolla acá goré de hon asé? **25** Lekin adeikká kessú lla zodi añára acá gorí, añára toh híyan olla sobór or sáañte

entezar ot táki. **26** Borabor héndilla, Pak-Ruh ye yó añárar komzurit modot goré, kiyólla-hoilé añára toh kiyólla-kiyólla dua gorón sáa no zani, montor Pak-Ruh Nize endilla hañdi-hañdi añára lla cúwaric goré, zín boiyan gorí faribár raá náí. **27** Alla, zibá ye fottí dil or hotá zane, íba ye Pak-Ruhr báfani yó zane, kiyólla-hoilé Pak-Ruh ye Allar pak bonda ókkol olla Allar moncá mozin beh cúwaric goré. **28** Añára zani, zetará Alla re muhábbot goré, yáni zetará re Alla ye Nizor erada mozin ðaikké, ítara lla zín ó híin beggún íba ye ítara bálai lla beh ówaba. **29** Kiyólla-hoilé zetará re íba ye age lóti basí raikké, ítara toh íbar Fuar dóilla ói bolla yó íba ye fáisela goijjé, zeéne bicí báiboináin dor bútoe hé Fua foóila zormo wa ói fare. **30** Aar zetarár baabute íba ye age lóti fáisela gorí raikké, ítara re íba ye ðaikké yó; aar zetará re íba ye ðaikké, ítara re íba ye forhéggar bóuli kobul óu goijjé; aar zetará re íba ye forhéggar bóuli kobul goijjé, ítara re íba ye mohímawala yó goijjé. **31** Yala híin beggún saái añára kii hoitám? Alla zodi añárar híkka ó, hone añárar ulða tíyai faribó? **32** íba ye toh Nizor Fua re úddwa hárai nó raké bólke añára beggún olla moot or át ot tulí dífelaiye. íba ye zettót Nizor Fua re añára re diífelaiye, tói íba ye añára re hárr kessú yó kiyá dii no felaito? **33** Yala Allar basíloiya bonda ókkol or ulða elzam lagai faribár hon asé? Ítara re toh Alla Nize éna forhéggar bóuli kobul goijjé. **34** Ítara re hone hosúrbon fíorai faribó? Kiyólla-hoilé Mosih Isá zibá siríf moijjíl de no bólke zinda yó óiye, íba toh Allar den ðák ottu asé aar íba ye añára lla cúwaric goré. **35** Hétolla añára re Mosihr muhábbot ottu kiyé alok gorí faribó? Mosibote né? Ferecani ye né? Zulúme né? Feror búkke né? Hoorsuor or homi ye né? Afotbifote né? Duccon or toluware né? **36** Pak-kalam ot endilla asé, “Tuáñr lla bóuli añára dinbór moot or hótorat fori; maincór nozor ot añára zooráibo de bérasóol or dóilla.” **37** Montor añára toh zibá ye añára re muhábbot goijjé íbar duara híin beggún ore furafuri fóta gorífelai. **38** Añr ttu yían ekin asé de ki, moote yáh zindigiye, fírista ókkole yáh bút-ferot ókkole, yaar hale yáh aibó de hale, honó dóilla asóre, **39** asman or yáh fatalfur or honó kessú ye, yáh oinno honó mohóluka añára re Allar oh muhábbot ottu alok gorí no faribó ziyán Mosih Isá añárar Malik or usílaye faiyí.

9 Añí Mosih re gobá gorí hañsa hotá hoóir, misá hotá no, añr hélome yó Pak-Ruhr duara yíán gobá der, **2** ki hoilé, añr dil ot Boni Isráil ókkol olla bicí afsús lager edde lagatar ferecan lager. **3** Añí toh añr koum, yáni zetará añr gusso edde lou, ítara lla bóuli zodi Mosih ttu alok ói bodduar tole ówa foitto úddwa óitam. **4** Alla ye toh hé Boni Isráil ókkol ore Nizor fuain óibar hók diiyé, edde ítatar hañse Nizor mohíma zahér goijjé. Íba ye ítara llóí razinama ókkol goijjé, aar ítara re Córiyot edde sóiyi ebaadot or torika diiyé. Íba ye ítara llóí boóut dóilla waada ókkol óu goijjé. **5** Ítara óilde bafadada gún or nosól, aar Mosih yó insán ísafe ítatar háandan ottu beh aiccé. Zibá ye hárr kessúr uore hókumot goré, hé Allar taarif abadulabad ówat tákouk. Aamin. (aĩŋ g165) **6** Añr hotár maáni eén no de ki, Allar kalam baatel ógiyoi. Kiyólla-hoilé Isráili beggún toh basíloiya Isráili no; **7** Ibrahím or nosól ottu aiccé maáni hóno ítara beggún íbar asól fuain de no. Pak-kalam ot endilla asé, “Isahák ottu beh tor nosól dóra zaybo.” **8** Hoitó sailé, insán ottu foida óiye maáni Allar fuain ógiyoi de no, bólke asól nosól bóuli uitará re beh dóra zah, zetará Allar waadar fuain. **9** Hé waada óilde yíán, “Añí e októť waafes aiccúm, héntte Sáraħ ttu eggwá morot fua tákibo.” **10** Siríf híyan no, bólke Rebékar hálót óu héndilla; zeñtté híba ekzon manúc lói, yáni añárar baf Isahák lói hámil accíl; **11** héntte fuain nún zormo nó óite, aar honó bála-bura kessú nó goitté, híba ye Alla ttu ekkán hóbor faiyé, ziyáne dahá de, Alla ye manúc ókkol ore íbar zari táke de erada mozin beh basílo; híyan honó amól or zoriya no bólke íba ye age lóti ɔaikké de hétolla. **12** Híba re howá gýl de ki, “Fua ɔoóñr gwá ye cõñro war gulami goríbo.” **13** Hétolla pak-kalam ot endilla asé, “Yakub ore Añí muhábbot goijjé, montor Isów re nafórot goijjé.” **14** Tóoile añára kii hoitám? Alla ttu insáf náí de né? Bilkúl no. **15** Kiyólla-hoilé íba ye toh Muúsa re endilla hoóil, “Añr ttu zaré monehoó, tar uore rahám goijjúm; aar zaré monehoó, taré feťfurani daháiyum.” **16** Hé ísafe, híyan honókiyor moncár yáh kucíc or uore no, bólke Allar rahám or uore. **17** Alla ye toh Féruan ore endilla hoiyé de Pak-kalam ot asé, “Añí toré baáñcca tuillí de kiyólla-hoilé, zeéne tor duara Añr kudurut dahái fari, baade duniyair agagura Añr nam or howáhoi óibo.” **18** Hétolla toh íba ye zaré monehoó tar uore rahám goré, aar zaré monehoó tar dil doró gorífele. **19** Yala tuáñra honókiye añré endilla hoibá, “Toóu kiyá Alla ye añárar hosúr dóre? Íbar mon ore hone bazá dí fare?” **20** Añr zuwab óilde, ó moniccó, Allar uottú mati bolla tui hon? Banaiya kessú ye kí banoya ttu endilla fusár goríbo né, “Añré endilla kiyá banailá?” **21** Ek merir dola ttu kí monehoó de héndilla jiníc ókkol banai bolla kuáñijja ttu hók náí né—kessú jiníc háas ham ot estemal gorí bolla aar kessú jiníc cádaran ham ot estemal gorí bolla? **22** Borabor héndilla, Alla ttu Nizor gozzob nazil goittó edde Nizor kudurut zahér goittó monehoiyé de óile yo, toóu íbar gozzob faibar manúc zetará re borbadi lla toiyar gorá gíyeh, ítara re íba ye bicí sobór or sáañte cóoiye. **23** Íba ye ítara re etollá cóoiye, zeéne íbar oti mohíma uitarár hañse zahér ó, zetará íbar rahám faibar manúc, zetará re íba ye mohíma lla age lóti toiyar raikké. **24** Rahám faibar manúc ítara óilam de añára. Íba ye siríf añára Yohúdi ókkol or bútotu ɔaikké de no, bólke Beyohúdi ókkol or bútotu yó ɔaikké. **25** Alla ye endilla hoiyé de nobi Hóciyar kitab ot asé, “Zetará Añr bonda nu accíl, ítara re Añí ‘Añr bonda’ ɔakiyúm, aar ítara zetará Añr adorbon nu accíl, Añí ítara re ‘Añr adorbon’ ɔakiyúm. **26** Ze zagat ítara re endilla howá gíyeh, ‘Tuáñra Añr bonda no,’ hé zagat ítara re ‘zinda Allar fuain’ ɔaka zaybo.” **27** Nobi Yesáyah ye Isráili ókkol or baabute guzori endilla hoiyé, “Boni Isráil ókkol doijjar sor or balur hédun de óile yo, toóu ítara bicí hom maincé beh nejat faibo. **28** Kiyólla-hoilé Mabude toh íbar fórman duniyait furafurir sáañte bicí toratori fura goríbo.” **29** Zendilla nobi Yesáyah ye age lóti batalai dyíl, ki hoilé, “Alla Robbul Alamine zodi añára lla kessú nosól rakí no zayto, tóoile añárar hálót toh Sódóm cóor or edde Gomórah cóor or dóilla óizaytoi.” **30** Tóoile añára kii hoitám? Yíána, Beyohúdi ókkole forhésgarir talac no goillé yo forhésgari hásil goijjé, ze forhésgari imane beh faa zah; **31** montor Boni Isráil ókkole forhésgarir córiyot or talac goillé yo hé córiyot loot nó faa. **32** Kiyólla? Kiyólla-hoilé ítara híyan ore imane kucíc no gorí amóle faa fángori kucíc goijjíl. Ítara ujáť há de fattór ot ujáť háiyé. **33** Zendilla pak-kalam ot asé, “Soó, Añí Síyon ot eggwá endilla fattór rakír, ze fattóre maincóre ujáť hábaibo, yíba óilde oh Cíl, ze Cíle maincóre fora baibó, montor zee niki íbar uore iman ané íte bilkúl córminda no óibo.”

10 Ó báiboináin ókkol, Boni Isráil ókkol olla añr dil or azzu edde Allar hañse añr dua óilde, ítara nejat fouk. **2** Añí ítara baabute e gobá gán dir de ki, ítara ttu Alla lla jus asé, montor sóiyi zankari táki no. **3** Ítara ttu Allar forhésgarir baabute honó zankari náí, aar ítara nizor kucíce beh forhésgar óito saá; hétolla ze torika loi Allar forhésgari hásil goré hé torika ítara kobul no goré. **4** Mosih ye toh Córiyot ore hótom gorífelaiye, zeéne iman ané de ítara fottikiye forhésgari hásil goré. **5** Córiyot lói forhésgar óibar baabute Muúsa ye toh endilla leikké, “Zee niki Córiyot or hókum ókkol mane, íte híne beh basi tákibo.” **6** Montor imane ze forhésgari hásil goré híyan or baabute pak-kalam ot asé de, “Tuáñra dile-dile no hoíyó de, ‘Hone asman ot uríbo?’” Yáni Mosih re lamai aní bolla. **7** Aar endilla yó no hoíyó de, “Hone nise fatalfur ot lamibó?” Yáni Mosih re muruda ókkol ottu waafes loianí bolla. (*Abyssos g12*) **8** Montor pak-kalame endilla hoór de no né? “Kalam tuáñrar dáke asé, yáni tuáñrar muk ot edde tuáñrar dil ot.” Híin óilde iman or baabute kalam uúin zíin añára tobolik gorí de ki, **9** zodi tuñí nizor muké Isá re Malik de cíkar goró, aar Alla ye Íba re mora ttu zinda goijjé de híyan dile iman anó, tuñí nejat faiba. **10** Kiyólla-hoilé dile iman aníle forhésgar bóuli kobul gorá zah, aar muké cíkar goríle nejat fa zah. **11** Pak-kalam ot endilla asé, “Zee niki Íbar uore iman ané íte bílkú córminda no óibo.” **12** Híyan ot Yohúdi edde Beyohúdi honó forók náí, kiyólla-hoilé beggún or Kúda toh ekgwá. Íba re zetará mata, ítara beggún ore Íba ye aṭalikka rahámot dee, **13** kiyólla-hoilé, “Zee niki Mabud or nam loybo, íte nejat faibo.” **14** Montor zibár uore ítara iman nú ané, Íba re ítara keéngori mataibó? Aar zibár baabute honódin nó fúne, Íbar uore ítara keéngori iman aníbo? Tobolik-goróya no tákile ítara keéngori fúni faribó? **15** Aar ítara keéngori tobolik goríbo, zodi ítara re no diferá? Pak-kalam ot endilla asé, “Zetará gom jiníc ókkol or gom hóbor ané, ítara téng hotó mubarek!” **16** Lekin ítara beggúne hóno hé gom hóbor gán kobul nó goré; kiyólla-hoilé nobi Yesáyah ye toh endilla hoíyé, “Ó Mabud, añárar poigam hone ekin goijjé?” **17** Hé ísafe, iman aiyé de fúnile, yáni Mosihr baabute kalam fúnile. **18** Lekin añr súwal óilde, Boni Isráil ókkole hé kalam nó fúne de né? Becók fúinne. Pak-kalam ot asé de, “Ítarar abas duniyair agagura ttu

fúna gíyeh, aar ítara hotá duniyair céc matá foijjonto foóníce.” **19** Abar añr súwal óilde, Boni Isráil ókkole nó buzé de né? Híyan or zuwab Alla ye Muúsar áta age lóti difélaíye de ki, “Ek bezatir duara Añí tuáñra re guccá tulídiyum, aar ek obuz zatir duara Añí tuáñra re guccá tulídiyum.” **20** Forezai Alla ye nobi Yesáyah áta aró horagori endilla hoíyé, “Zetará Añr talac nó goré, ítara Añr loot faiyé; zetará Añr baabute honó fusár nó goré, ítara hañse Añí Nizoré zahér goijjí.” **21** Lekin Boni Isráil ókkol or mutalek Íba ye hoíyé de, “Ek nafórman edde ekguañjja koum or uzu Añí dinbór Añr duní át melí raikkí.”

11 Tóí aró añr súwal óilde, Alla ye Nizor basíloíya bonda ókkol ore inkar gorífelaiye de né? Bílkúl no! Kiyólla-hoilé añí nize yó de ézzon Isráili; añí óilam de Ibrahim or nosól, aar Binyamin or háandan or manúc. **2** Alla ye Nizor bonda zetará re age lóti basí raikkíl ítara re inkar gorí nó fele. Pak-kalam ot nobi Eliyas or baabute kii asé híyan tuáñra no zano né? Yóggwa ye toh Boni Isráili ókkol or ulḡa Allar hañse endilla bisar dyíl, **3** “Ó Mabud, ítara Tuáñr nobi ókkol ore marífelaiye aar Tuáñr kurbani-gañ ókkol báñgifelaiye. Añí ekzon beh basi así deh, yala ítara añr zan loito yó talac gorér.” **4** Montor Alla ye yóggwa re kii zuwab dyíl? Yíána, “Añí Nizor lla háñt ázar manúc rakídiyi, zetará Baal debotar hañse añrú nó fela.” **5** Borabor héndilla, ehón or októti Boni Isráil or hodún manúc tákigiyoí, zetará re Alla ye rahámote basí raikké. **6** Aar híyan zettót rahámote, tóoile híyan toh honó amóle no; zodi amóle óito, tóoile toh rahámot ar rahámot no tákito. **7** Tóoile notiza kii? Boni Isráil ókkole ziyán or talac goijjíl híyan ítara hásil nó goré, montor ítara ttu zetará re basílowa gíyeh ítara beh híyan hásil goijjé, aar badbaki gún or dil doró gorífela gíyeh. **8** Zendilla pak-kalam ot asé de, “Alla ye ítara re eén súharaiya gorífelaiye, zeén niki ítara aij foijjonto suké no deké, aar hane no fúner.” **9** Dawude hoíyé de, “Ítarar mela-cóba ókkol ítara lla cíyarir zal edde fán bonizoggoi; híin or zoriya ítarar uore mosibot aiyóuk, aar nizor hóraf ham or sáñza fouk. **10** Ítarar suk añdá óizoggoi, zeéne ítara no deké; ítara hámica lla guza óizoggoi.” **11** Abar añr súwal óilde, ítara hé uját háíye de hámica lla fori bolla né? Bílkúl no. Bólke ítarar nafórmanir

zoriya Alla ye Beyohúdi ókkol ore nejat faibar moouka diyé deh, zeéne hé Isráili ókkol ottu gairot lage. **12** Hé hálote buzá zah de, ítarar nafórmaniye zettót duniyai lla boóut fáida óiye aar ítarar lussáne Beyohúdi ókkol olla boóut fáida óiye, tói basát máze ítara beggún cámil tákile aró hotó fáida óibo fáñllar! **13** Ó Beyohúdi ókkol, ańi tuáńra re hoóir deh. Ańré zettót tuáńra Beyohúdi ókkol olla sáhabi bana giyéh, ańi ańr hé zimma re bicí izzot dih, **14** zeéne honó bote ańi ańr koum ore gairot tulídi, ítara ttu hodún ore nejat fa bay fari. **15** Kiyólla-hoilé ítara re inkar gorá giyéh de híyane zettót Alla lloi duniyair manúc or bonot óigiyo, tói ítara re kobul goríbo de híyane kii óibo fáñllar? Híyan toh mora manúc zinda ór fán óibo! **16** Ze foóila ruṭi Allar hańse peec gorá giyéh, hé ruṭi pak de óile, tóoile toh ruṭi beggún pak. Gas or cínyor pak de óile, tóoile toh déeila ókkol óu pak. **17** Dóro, ek zaitun-gas ottu kessú déeila ókkol báńgífela giyéh, aar híin or zagat maze tuáńra jonggoli zaitun-gas or kessú déeila ókkol ore zuradiya giyéh, aar asól zaitun-gas or cínyor ottu roc ṭani loor. **18** Hétolla tuáńra nizoré nize hé déeila gún or túaro barík bóuli no ṭáariyo, zodi táaro, monot rakíyo de, tuáńra cínyor ore ṭikai rakór de no, bólke tuáńra re cínyore ṭikai rakér deh. **19** Óitofare tuáńra honókiye endilla hoibá, “Hé déeila gún báńga giyéh de, ańré híin or zagat zura di bolla.” **20** Becók sóiyi. Híin ore toh iman zari no rakár zoriya éna báńgífela giyéh, montor tuńi hé zagat imane beh ṭiki asó. Híyan lói fohórai no goijjó, bólke ḍoor rakó; **21** kiyólla-hoilé Alla ye zettót asóli déeila ókkol ore basai nó raké, íba ye toh tuáńre yó basai nó rakíbo. **22** Hétolla soó, Alla keén meérban aar keén hora: zetará forigiyói ítarar hańse íba bicí hora, montor tuáńr hańse íba meérban; hé meérbani otódin tákibo zetódin tuńi íbar meérbanit lagi táko. Arnóile tuáńre yó harífela zaybo. **23** Aar hé Boni Isráil ókkole yó zodi abar iman ané, ítara re nizor gas ot abar zuradibo, kiyólla-hoilé Alla ye héndilla abar zura di fare. **24** Kiyólla-hoilé tuńi de éggwa jonggoli zaitun-gas or asóli déeila, zibá re harí looi nizor zat or ulḍa ísafe bagan or zaitun-gas ot zuradiya giyéh. Tói báfiso, ziín hé bagan gas or asóli déeila asé, híin ore nizor gas ot abar zura dite hotó aásan óibo! **25** Báiboináin ókkol, tuáńra zeddúr no héddur giyani bouli no ṭáari bolla, ańi tuáńra re e gufon sóiyi gán zanaidir,

ki hoilé, boóut Boni Isráil ókkol or dil otódin foijjonto doró tákibo zetódin baicá Beyohúdi beggúne nejat nó faa; **26** aar héengori tamám Boni Isráil ókkole nejat faibo, zendilla pak-kalam ot asé, “Síyon ottu Rehái-goróya aibó, íba ye Yakub or nosól ottu tamám bedini ham ókkol dur gorífelaibo. **27** Ítara llói híyan óibo de Ańr razinama, zeńtté Ańi ítarar guná ókkol dur goríyum.” **28** Kúchóbor or hé rúwate tuáńrar fáida lla ítara toh Allar duccon ókkol, montor Allar basár hé rúwate bafḍada gún or zoriya ítara Allar adorbon ókkol; **29** kiyólla-hoilé Alla ye ze niyamot dee edde ziyán olla ḍake, híin olla íbar mon bodoli no zagói. **30** Zendilla tuáńra yó ek hale Allar nafórman accíla, montor yala ítarar nafórmanir zoriya tuáńrar uore rahám gorá giyéh, **31** héndilla, ítara yó yala nafórman boni asé, zeéne tuáńrar uore rahám gorá giyéh de hétolla ítarar uore yó rahám gorá zah. **32** Kiyólla-hoilé Alla ye beggún ore toh nafórmanit bon gorí raikké, zeéne íba ye ítara beggún or uore rahám gorí fare. (eleēsē g1653) **33** Allar dón-doulot hotó bicí! Íbar giyan edde buddí hotó mur! Íbar fáisela re buzí fara no zah. íba ye ziín goré híin buzí faribár raá náí. **34** Pak-kalam ot toh endilla asé, “Hone Mabud or báfani re zani fare? íba re mocuwara dibar laayek hon asé?” **35** “Íba re hone kii diíl de asé, zeén níki íba ttu ítare fúnzai díya foitto?” **36** Kiyólla-hoilé hárr kessú toh íba ye éna foida goijjé, aar híin beggún ṭiki asé de íbar zoriya edde íba lla. íbar taaríf abadulabad ówat tákouk. Aamin. (aiōn g165)

12 Hétolla, ó báiboináin ókkol, Allar meérbani re yaad goráidi ańi tuáńra re aros gorír, tuáńrar gaa re zinda, pak edde kobuldár kurbani ísafe Allar hańse peec goró; híyan óilde tuáńrar sóiyi ebaadot. **2** E duniyair koffiyot no loiyó, bólke tuáńra re noya demak dii yore Alla re tuáńra re bodoilto doh. Baade tuáńra zani faribá, Allar moncá kii, gom kii, kobuldár kii, edde háṭi kii. (aiōn g165) **3** Ańré diiya giyéh de toóufike ańi tuáńra fottíkiyo re hoóir, nizoré zettór báfon sáa, yár túaro bicí no báfiyo, bólke Alla ye zaré zeddúr iman diiyé, hé mozin nizoré sóiyi-sóiyi báfo. **4** Kiyólla-hoilé zendilla ańára ttu ekkán gaat boóut híssa ókkol asé montor híin beggún or ham ek ḍoilla no, **5** héndilla, ańára bicí de óile yo, ańára toh Mosihr bútoire siríf ek gaa, aar ańára ezzon loi ezzon bazáiya así. **6** Ańára toh Allar rahámote ḍoilla-boḍoilla niyamot ókkol

faiyí. Zodi añárar niyamot Allar kalam boiyan goríbar de óile, iman or mutabek Allar kalam boiyan gorí; 7 zodi hédmot goríbar de óile, hédmot gorí. Zee niki taalim dibar niyamot faiyó, íte taalim doh; 8 zee niki josba dibar faiyó, íte josba doh; zee niki sótká goríbar faiyó, íte dílkúla góri sótká goró; zee niki sóddari goríbar faiyó, íte díyan or sáañte sóddari goró; aar zee niki rahám goríbar faiyó, íte kúcir sáañte rahám goró. 9 Munaféki sára muhábbot goijjó. Hórafí re gín goijjó; ziyán gom híyan mozbut gori dóri táikko. 10 Ezzon ore ezzone báiyali muhábbote muhábbot goijjó; ezzon ore ezzone nizor túaro izzot diyo; 11 alcí no goijjó, bólke ruúhanir josbar sáañte Malik or hédmot goijjó; 12 acáye kúci táikko, mosibot ot sobór goijjó, nitti dua gorát táikko; 13 Allar pak bonda ókkol zorurot ot foille sañda diiyo; meémandari goijjó. 14 Zetará tuáñrar uore zulúm goré, ítara lla borhot magiyó; ói, gozzob no, borhot magiyó. 15 Zetará kúci gorér, ítara fúañti kúci goríyo; aar zetará hañdahari gorér, ítara fúañti hañdahari goríyo. 16 Ezzon ore ezzone ek kíyale saiyo. Fohórai no goijjó, bólke niróc ókkol lói miyái-zuwai soliyó. Nizoré nize buddíman no táariyo. 17 Honókiyo re burair bodol burai no goijjó. Manúc beggún or nozor ot ziyán sóiyi híyan goittó díyan díyo. 18 Manúc beggún lói cántit táki bolla tuáñrar torfóttu zeddúr faro héddur kucíc goijjó. 19 Ó adorja ókkol, nizebaze bodola no loiyó, bólke Allar gozzob olla moouka raikko, kiyólla-hoilé pak-kalam ot toh Mabude endilla hoór, “Bodola lon Añr ham, Añí fúnzaiyum.” 20 Yárbodol, “Tuáñr duccon ottu búk lagilé, ítare hána doo; tirác lagilé, ítare faní doo. Kiyólla-hoilé héndilla goríle toh tuñí ítara matár uore zoler de hoilar tal tulídiyo fán óibo.” 21 Burai re tuáñra re ziti aitó no diyó, bólke bálai lói burai re ziti aiccó.

13 Hárr ekzone dec or hókumot-goróya ókkol ore mani solo, kiyólla-hoilé Allar torfóttu no de honó hókumot náí. Zedún hókumot asé, híin Allar torfóttu beh zari óiye. 2 Hétolla zee niki hókumot or muhálef goré, íte Alla ye ziyán entezam goijjé híyan or beh muhálef goré. Zetará héndilla muhálef goré, ítara nizoré bisar or laayek bana. 3 Kiyólla-hoilé gom ham goillé toh adikari ókkol ore dooraibár náí, montor kuham goillé dooraibár asé. Tuáñra ttu adikari ókkol or door sára óito monehoór né? Tóoile ziyán gom híyan goró, baade tuáñra

ítara torfóttu taarif faiba; 4 kiyólla-hoilé ítara óilde Allar háadem tuáñrar bálai lla. Lekin zodi kuham goró, ítara re dooraibár asé, kiyólla-hoilé ítara toh hánnak sáñza no déh. Ítara Allar gulam de hétolla, Allar torfóttu ói kuham-goróya ókkol ore sáñza dé deh. 5 Hétolla bóuli ítara re mani solar zorur; siríf sáñzar doore no, bólke héndilla gorón sóiyi de buzí yore yó. 6 Tuáñra hétolla toh ítara re házana yó doo, kiyólla-hoilé ítara nizor zimmadari adai gorér de híyan óilde Allar hédmot gorér deh. 7 Beggún or hók adai goijjó; zaré házana diibar asé, yóggwa re házana diiyo; zaré hásil diibar asé, yóggwa re hásil diiyo; zee niki izzot or laayek, yóggwa re izzot goijjó; zee niki taarif or laayek, yóggwar taarif goijjó. 8 Ezzon ore ezzone muhábbot goríbar bade ar honó kessúr gun or tole no táikko. Zee niki oinno zon ore muhábbot goré, íte Córiyot furafuri adai gorífelaiye. 9 Kiyólla-hoilé Córiyot ot asé de, “Zená no goríba; kún no goríba; suri no goríba; lalós no goríba,” iín edde ar badbaki hókum beggún e hókum ekkán ot gólaia asé, híyan óilde, “Atehañsór maincóre nizor díilla góri muhábbot goró.” 10 Muhábbot goillé toh honókiye honókiyor hótí no goré. Hétolla muhábbot goillé fura Córiyot adai goijjá. 11 Ehón or októ buzí híin goró. Gúm ottu uríbar októ foóniccegai, kiyólla-hoilé añára zeñtté iman ainnílam híyalar túaro yala añárar nejat or októ aró dake. 12 Rait fúron-fúron óiye, yala fózor fáribar októ órgai. Hétolla, aiyo, añára andár or ham ókkol félaidi foór or átiyar ókkol findí toiyar ói táki. 13 Aiyo, añára córabir fúrutí, nicábazi, zenákari, ayaci, hoijja-fózzat, edde alingañi bad di, din or foór ot así fángori soli. 14 Tuáñra Malik Isá Mosih re findífelo, aar jisím or bura azzu ókkol fura goríbar uzu honó díyan no dih.

14 Komzur iman ola re tuáñrar daái ot cámil goijjó, montor yóggwar rai ókkol lói torkatorki no diyó. 2 Hodún or iman óilde, hárr kessú hái fare; lekin iman komzur ola ókkole niriccá beh háa. 3 Zee niki hárr kessú hoo, íte héndilla na háa de ítare hékarot no goijjó; aar zee niki hárr kessú no hoo, íte yó héndilla háa de ítare hosúr no diyó, kiyólla-hoilé Alla ye ítare yó toh kobul goijjé. 4 Oinno zon or gulam or bisar gorí bolla tuñí hon? Íte sóiyit asé né náki gollot ot asé híyan ítara giróse éna fáisela goríbo. Becók íte toh sóiyit tákibo, kiyólla-hoilé

Malik toh ítare sóiyit rakí faribár kaabel. 5 Hodúne din eggwá re oinno din or túaro kimoti bouli táare, aar hodúne din beggún or kimot borabor bouli táare. Hárr ekzon ottu nizor dil ot furafuri ekin tákar zorur. 6 Ze maincé ze din ore háas bóuli mane, íte toh Malik ore kúci goríbar niyote éna mane. Héndilla, zee niki hárr kessú háa, íte Malik ore kúci goríbar niyote beh háa, kiyólla-hoilé íte toh híin Alla re cúkuriya gorí háa. Aar zee niki hárr kessú na háa, íte yó Malik ore kúci goríbar niyote beh na háa, aar íte yó zín háa híin olla Alla re cúkuriya goré. 7 Kiyólla-hoilé añára honókiye basi táki de yó nizor lla no, aar honókiye mori de yó nizor lla no. 8 Kiyólla-hoilé zeñtté añára basi táki, añára Malik olla beh basi táki; aar zeñtté morizaygói, añára Malik olla beh morizaygói. Hétolla añára basi táki yáh morizaygói, añára Malik or. 9 Kiyólla-hoilé Mosih toh etollá éna moijjíl edde abar zinda óiye, zeéne Íba mora zinda duní gún or Malik ó. 10 Tói tuñí keéne tuáñr báí or hosúr dóror? Nizor báí ore hékarot kiyá gorór? Añára beggún toh ek din Allar adaloti-toktór muúntu týaiyum de asé. 11 Pak-kalam ot endilla asé, “Mabude fórmarr de, Añr zindagirir hosóm hái hoóir, hárr ekzone Añr muúntu añrú félaibo, aar hárr zobane Añr Alla de cíkar goríbo.” 12 Híyane dahá de, añára fottíkiyo ttu Alla re nizor-nizor hísaf díya foribó. 13 Hétolla, aiyó, añára ezzon or hosúr ezzone ar no dóri, bólke uúin no goittó fáisela gorífelai zífne arek báí or iman or foñt ot dábba díbo, yáh yóggwa re gunát fora baibó. 14 Malik Isár ummot ísáfe añr zani edde ekin gorí de ki, honó hána nizebaze háram náí, montor zee ze hána re háram táare, híin ítar lla beh háram. 15 Zodi tuáñr hánar zoriya arek báí ye dil ot duk faa, tóoile toh tuñí muhábbot or foñt báí ar no soloór. Ze báí olla Mosih moijjíl hé báí ore tuáñr hána lói córbonac no goijjó. 16 Tuáñr suk ot ziyán gom híyan or bodnam no zuraiyó, 17 kiyólla-hoilé Allar raijjo toh hána-finarr baabute no, bólke Pak-Ruh ye dee de forhégari, cánti edde kúcir baabute. 18 Zee niki hé torikaye Mosihr hédmot goré, yóggwar uore Alla yó kúci táke aar manúc óu razi táke. 19 Hétolla, aiyó, añára ham uúin goríbar kucíc gorí zífne cánti ané edde zín lói ezzon ore ezzone banaitulí faijjum. 20 Honó hánar zoriya Allar ham borbád no goijjó. Becók, hána beggún hálal, montor ar ezzon ore gunát foraba de héndilla honó hána hóon gollot. 21

Beétor óilde, gusso no hóon, anggur or roc no hóon, yáh oinno honó kessú no gorón, zodi híine tuáñr honó báí ore gunát foraba. 22 Hé mosólar baabute tuáñr dil ot ze iman asé híyan Allar edde tuáñr dormiyan ot rakó. Mubarek manúc uite, zee niki gom bouli buzí honó kessú gorífelai baade dile-dile afsús na há. 23 Montor Alla ye uitaré hosúrbon bóuli dóre zee niki cók gorí honó kessú háífele, kiyólla-hoilé íte toh nizor iman or mozin háíye de no. Ziyán iman or mozin no híyan toh guná.

15 Hétolla, añára zetarár iman mozbut, añára ttu nizor kúci no saái komzur imandár ókkol ore ítarar fuñzá bowát modot gorár fóros. 2 Añára fottíkiyo ttu nizor atehañsór maincóre ítarar bálai lla kúci rakár zorur, ítara re banaitulí bolla. 3 Kiyólla-hoilé Mosih Nize úddwa Nizor kúci nó saá. Pak-kalam ot íbar baabute endilla asé, “Zetará Tuáñre beizzoti goijjíl ítarar hé beizzoti Añr uore aiccé.” 4 Yaar age pak-kalam ot zín-zín leká gíyl, híin beggún añára re cíkka dí bolla beh leká gíyl, zeéne hére ze sobór edde josbar baabute asé híin ottu añára acá hásil gorí. 5 Sobór edde josba dooya Alla ye Mosih Isá ttu accíl de ekí mon tuáñrarr afós ot máze táki bolla toóufik douk, 6 zeéne tuáñra ek mone edde ek abase añárrar Malik Isá Mosihr Alla Baf or mohíma goró. 7 Hétolla hoóir de, ezzon ore ezzone kobul goró, zendilla Mosih ye yó tuáñra re kobul goijjé, zeéne Allar mohíma ó. 8 Añr hoóir de ki hoilé, Allar hotá sóiyi de sábut gorí bolla Mosih aái Yohúdi ókkol or háadem boinné, zeéne bafdáda gún lói gorá gíyl de waada fura gorí fare, 9 aar Beyohúdi ókkole zen Allar rahám faiyé de híyan olla íbar taaríf goré; zendilla pak-kalam ot asé, “Hétolla añr Beyohúdi ókkol or hére Tuáñr taaríf goijjím, edde Tuáñr name seér gaiyúm.” 10 Hére yían óu asé, “Ó Beyohúdi ókkol, tuáñra Allar basíloiya bonda ókkol or fúañti kúci goró.” 11 Aró asé de ki, “Ó tamám Beyohúdi ókkol, tuáñra Mabud or taaríf goró; ó duniyair manúc ókkol, tuáñra beggúne íbar taaríf goró.” 12 Nobí Yesáyah ye yó endilla hoíyé, “Jesir Cíñyor zahér óibo, aar Íba aái Beyohúdi ókkol or uore hókumot goríbo. Ítara beggúne íbar uore acá rakíbo.” 13 Acá dooya Alla ye tuáñra re íbar uore iman rakár zoriya hárr kúci edde cánti lói bóri douk, zeéne Pak-Ruhr kudurute tuáñrarr acá baái fore. 14 Ó añr báiboináin ókkol, añr nizor ttu

yó tuáñrar baabute furafuri ekin asé de ki, tuáñrar dil bálayi lói furaiya, tuáñra ttu furafuri zankari asé, aar tuáñra ezzon ore ezzone nosiyot goríbar kaabel óu. **15** Toóu tuáñra re abar yaad goráidi bolla ańf kessú mouzúr uore tuáñrar hańse bicí hímmot or sáańte leikkí, kiyólla-hoilé Alla ye ańré diiyé de toófufik lói, **16** ańf toh Beyohúdi ókkol or hańse Mosih Isár háadem óiyi. Ańf imam or dóilla góri Allar kúchóbor or hédmot gorí, zeéne Beyohúdi ókkol Pak-Ruhr duara pak-sáf ói Allar kobuldár kurbani ói fare. **17** Hétolla toh ańf Alla lla gorí de ham ot Mosih Isár duara fohórai goríbar wájá faiyí. **18** Kiyólla-hoilé ańf siríf uúin hoi bolla beh hímmot goríyum, zín Mosih ye ańf duara gorí Beyohúdi ókkol ore Allar fórmadar banaiyé. Mosih ye ham híyan ańf hotábattara edde ham loi, **19** illayi-nicán or edde keramot or bole, aar Allar Ruhr kudurute goijjé. Hétolla toh ańf Jerúsalem ottu lóti cúru gorí Ilurikúm foijjonto agagurat Mosihr kúchóbor furafuri tobolik goijjí. **20** Ańf zindigir niyot óilde, uré kúchóbor tobolik gorón zeré Mosihr baabute honódin nó fúne, arńóile toh ańf ar ezzon or buniyadir uore gór banaitulír fán óibo. **21** Pak-kalam ot endilla asé, “Zetará re íbar baabute howá nó zah, ítara yala deki faribó; aar ítara zetará íbar baabute nó fúne, ítara yala buzí faribó.” **22** Ańf boóut bár tuáñrar hańse aító saái hé wájáye aái nó fari deh. **23** Montor yala zettót ańf ttu eríyar elaka ókkol ot ham goríbar zaga baki náí aar ańf ttu tuáñrar hére aító kúb monehoór de boóut bosór óiye, **24** ańf acá gorír de, Espéin dec ot zaibarcót tuáñra llói miliyúm, aar tuáñrar fúańti kessú ńaim kúci-áci gorí harai baade, tuáñra ańré ańf sofór ot zai bolla modot goríba. **25** Lekin ehón ańf Allar pak bonda ókkol or hańse modot foónsai bolla Jerúsalem ot zair. **26** Kiyólla-hoilé Makedóniyar edde Akayar zomát ókkole Jerúsalem ot Allar pak bonda ókkol or bútoze zetará gorif asé ítara lla kessú sańda tuillé. **27** Ítara híin bicí kúcir sáańte diiyé, eéne híyan ítarar fóros óu. Kiyólla-hoilé Beyohúdi ókkole zettót Yohúdi ókkol or ruúhanir rahámot or bág faiyé, tói ítara ttu yó Yohúdi ókkol ore duniyaibi malsáman lói modot gorár fóros. **28** Ańf hé sańda gún foónsai baade zeńtté ítara áte-áte faiyé de híyan fakkafakki gori zainnum, ańf Espéin dec ot zaibarcót tuáñrar hére góliyum. **29** Ańf zani, ańf tuáñrar hére aiccúm de híyala, Mosihr furaiya rahámot fúańti looi yore aiccúm.

30 Ó báiboináin ókkol, ańárar Malik Isá Mosihr name edde Pak-Ruhr muhábbote ańf tuáñra re aros gorír, tuáñra ańf llói bóńg ói ańf fúańti Allar hańse ańf lla dilmon di dua goró. **31** Dua goríba de, ańf Yohúdiyat Allar ze nafórman ókkol asé ítara ttu héfazot táki fán, aar ańf Jerúsalem olla ze hédmot tán gorír híyan Allar ze pak bonda ókkol hére asé ítara ttu fosón lage fán, **32** zeéne Alla ye sailé ańf tuáñrar hańse kúcir sáańte aái fari, aar tuáñrar fúańti táki foran zurai fari. **33** Cáńti dooya Alla tuáñra beggún or fúańti-fúańti tákouk. Aamin.

16 Foibi nam or ańárar ze bóin Kinkíriya cóor ot asé de zomát or háadem, híbar baabute ańf tuáñra re mocuwara dir de, **2** tuáñra híba re Malik or name endilla gori gosfloiyo zendilla Allar pak bonda ókkol ore gosfílowar zorur, aar híba ze modot olla tuáñrar muútac ó, híba re híyan diiyo, kiyólla-hoilé híba ye ańré cóo boóut maincóze modot goijjé. **3** Prisíla re edde Ekúila re ańf sólam díyi hoiyó, zetará Mosih Isár bútoze ańf fúańti ham-goróya, **4** zetará ańf lla bóuli nizor zan hótorat félaiye. Ítarar cúkur siríf ańf gorí de no bółke Beyohúdi ókkol or tamám zomát ókkole yó goré. **5** Ítarar gór ot zoma ó de zomát twa re yó sólam díyi hoiyó. Ańf adorja Ipenítus ore yó sólam díyi hoiyó, zibá Ecíya elaka ttu Mosihr foóila ummot. **6** Moriyam ore yó sólam díyi hoiyó, zibá ye tuáñra lla bicí meénnot goijjé. **7** Andrunikus edde Juúniya re yó sólam díyi hoiyó, zetará ańf koumi manúc aar ańf fúańti ziyól háĩĩĩĩ. Sáhabi gún or bútoze ítara bicí namdár; ítara Mosihr bútoze ańf age lóti asé. **8** Ampeliyatas ore yó sólam díyi hoiyó, zibá Malik or bútoze ańf adorja. **9** Mosihr bútoze ańárar sáańti ham-goróya Urban ore edde ańf adorja Istakus ore yó ańf sólam díyi hoiyó. **10** Apelis ore yó sólam díyi hoiyó, zibá re Mosihr ummot de híyan sóiyo faa giyéh. Aristobulus or gór ńíya re yó sólam díyi hoiyó. **11** Hérodion ore yó sólam díyi hoiyó, zibá ańf koumi manúc. Héndilla, Narkissus or gór ńíya re yó díyi hoiyó, zetará Malik or bútoze asé. **12** Turféna edde Turfósima re yó sólam díyi hoiyó, zetará Malik or ham-goróya. Adorja bóin Ferísa re yó sólam díyi hoiyó, zibá ye kúb meénnot or sáańte Malik or ham goijjé. **13** Malik or basfloiya manúc Rufus ore edde yóggwar maa re yó sólam díyi hoiyó. Yóggwar maa ańf óu maa. **14** Asinkiritus, Felegon, Harmis, Patorobas, Hermas edde ítarar

fúañti ar ze imandár báiboináin asé ítara re yó sólám díyi hoíyó. **15** Filologus edde Juliya re, Neriyus edde íbar bóin ore, Olimpás ore edde ítara fúañti Allar ze pak bonda ókkol asé ítara beggún ore yó sólám díyi hoíyó. **16** Tuáñra ezzon ore ezzone pak dile appá dí sólám zano. Mosihr tamám zomát ókkole tuáñra re sólám zanar. **17** Yala, báiboináin ókkol, añí tuáñra re aros gorír, tuáñra faiyó de taalim or ulða zetará faáða-faáði edde bazá ókkol foida goré, ítara uore nozor rakíyo, aar ítara ttu duré tákiyo. **18** Kiyólla-hoilé héndilla manúc ókkole toh añárar Malik Mosihr hédmot gorér de no, bólke nizor feṭ faler deh. Ítara miṙá-miṙá edde tuládiya hotá ókkol hoói cáda-cída manúc ókkol or dil ot daga deh. **19** Tuáñrar fórmadarir hóbor toh beggún or han ot foónicce, hétolla añí tuáñra re lói bicí kúci; montor añí saái de, tuáñra gom ham or buddíman ó aar kuham ottu maasum táko. **20** Cánti dooya Alla ye Cóitan ore bicí hára tuáñrar foor tole di ficífelaiibo. Añárar Malik Isár rahámot tuáñrar uore zari tákouk. **21** Añr fúañti ham-goróya Timóti ye tuáñra re sólám zanar; héndilla, añr koumi manúc Lukíyas, Yason edde Sosipatere yó zanar. **22** Añí Tertiyus, zar áta e ceñrí gán lekér, añr torfóttu yó tuáñra re Malik or name sólám. **23** Gayus, zibár gór ot añí Pául táki aar fura zomát zoma ó, íba ye yó tuáñra re sólám zanar. Héndilla, cóor or kecíyar Erastuse edde báí Kuwartuse yó tuáñra re sólám zanar. **24** Añárar Malik Isár rahámot tuáñra beggún or uore zari tákouk. **25** Alla, zibá nfki Isá Mosihr baabute añí tobolik gorí de kúchóbor mozin tuáñra re mozbut goríbar kaabel, íba ye boóut zobana lóti hé kúchóbor or gufon niyot ore lukai raikkíl, (aiōnios g166) **26** montor yala hé niyot zahér gorá gíyeh, aar agor nobi ókkole leikké de kitab or duara edde abadulabadi Allar hókume híyan tamám koum ókkol or hañse zanaidiya zar, zeéne ítara iman aní fórmadar bone. (aiōnios g166) **27** Hé lehár giyani Allar taaríf Isá Mosihr duara abadulabad ówat tákouk. Amin. (aiōn g165)

1 Kórintiól

1 Añí Pául, zibá re Allar moncá mozin Isá Mosihr éggwa sáhabi ói bolla ðaka giyéh. Añr fúañti añárar báí Sóstines óu asé. **2** Kórin cóor ot Allar ze zomát asé yíbar hañse lekír, zetará re Mosih Isár bútoze pak gorá giyeh edde Allar pak bonda ói bolla ðaka giyéh. Uitará beggún or hañse yó lekír, ze hárr zagar maincé añárar Malik Isá Mosihr nam loh, zibá ítarar óu Malik aar añárar óu Malik. **3** Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **4** Añí tuáñra lla añr Alla re hámica cúkuriya gorí, kiyólla-hoilé íba ye toh tuáñra re Mosih Isár duara rahámot goijjé, **5** ki hoilé, íbar bútoze tuáñra tamám hotábattaraye edde giyane hárr mikká ttu tuangor óigiyogoi, **6** kiyólla-hoilé Mosihr baabute añára diyí de gobá toh tuáñrar dil ot gañittá asé. **7** Hétolla zeñtté tuáñra añárar Malik Isá Mosihr zahéri lla dilmon di entezar gorí asó, tuáñra ttu honó niyamot or homi náí. **8** Íba ye tuáñra re ahéri foijjonto mozbut óu rakíbo, yáni tuáñra añárar Malik Isá Mosih aibó de din ot behosúr óiba. **9** Alla toh biccácdar, zibá ye níki tuáñra re Nizor Fua lloi taalukat rakí bolla ðaikké, yáni Isá Mosih añárar Malik loi. **10** Hétolla, ó báiboináin ókkol, añí tuáñra re añárar Malik Isá Mosihr name aros gorír, tuáñra beggún ek sólluk ó, zeéne tuáñrar bútoze honó faáta-faáti no táke, bólke tuáñrar mon edde rai zen furafuri ek ðoilla ó. **11** Kiyólla-hoilé, ó añr báiboináin ókkol, Kalowir gór or maincé añré hóbor díye de, tuáñrar bútoze bóle hoijja-fózzat soler. **12** Añí hoitám saáir de ki, tuáñrar bútotu kiyé hoó de, “Añí Pául or ummot,” kiyé hoó de, “Añí Apólos or ummot,” kiyé hoó de, “Añí Kéfas or ummot,” ar kiyé hoó de, “Añí Mosihr ummot.” **13** Mosih kí faát-faát óigiyoi? Pául ore kí tuáñra lla kúruc ot dí mariféla giyeh? Tuáñra kí Pául or name báptisma loiyó? **14** Alla re cúkuriya, añí tuáñrar bútotu Krispus edde Gayus ore bade ar honókiyo re báptisma nó díh. **15** Hétolla honókiye añr name báptisma loiyé bóuli hoi no faribó. **16** Becók, añí Eştefánas or gór or maincóre yó báptisma dílam, yárbaade ar haré báptisma díyi añr ttu monot no urér. **17** Kiyólla-hoilé Mosih ye añré diferáíye de toh báptisma díto no, bólke kúchóbor tobolik goittó, aar híyan óu saláki hotá lói goittó no, zeéne

Mosih kúruc or uore kurbani óíye de híyan honó asór sára no. **18** Kiyólla-hoilé kúruc or hóbor toh zetará dóncó óizargoi ítara lla bekuippa hóbor, montor añára zetará nejat fair, añára lla híyan óilde Allar kudurut. **19** Pak-kalam ot endilla asé, “Añí giyani ókkol or giyan ore dóncó gorífelaiyum, aar buddíman ókkol or buddí re behar gorídiyum.” **20** Tói giyani manúc hořé? Alem hořé? E jáhan or barábari-dóya hořé? Alla ye e duniyair giyan ore bekuf bouli sábut goijjé de no né? (aion g165) **21** Kiyólla-hoilé Alla ye Nizor giyane fáisela goijjé de, duniyair manúce ítarar giyane íba re siní no fare fán. Hétolla Alla ttu yían fosón laiggé, ki hoilé, tobolik gorá zah de hóbor ore bekuf táara zah de híyan or usílaye iman anóya ókkol ore nejat don. **22** Yohúdi ókkole illayi-nicán ókkol dabi goré, aar Girík ókkole giyan or talac goré, **23** montor añára Mosih re kúruc ot dí mariféla giyl de híyan or tobolik gorí, ziyán ore Yohúdi ókkole zari no fare aar Beyohúdi ókkole bekuippa hóbor bóuli táare, **24** lekin zetará re Alla ye ðaikké, ítara Yohúdi óuk yáh Girík, ítarar hañse Mosih óilde Allar kudurut edde Allar giyan. **25** Kiyólla-hoilé Allar bekufaiyi hoó de híyan toh insán or giyan or túaro giyani, aar Allar komzuri hoó de híyan toh insán or bol or túaro boluwar. **26** Báiyain, báfiso, Alla ye tuáñra re ðaikkíl de óktót tuáñra hondilla accíla. Insán or nozor ot toh tuáñra boóut zon giyani nu accíla, boóut zon taakotwala nu accíla, aar boóut zon uoror tokkar háandan or óu nu accíla, **27** montor giyani gún ore córom dí bolla Alla ye duniyai ye bekuf táare de híin ore basíloíye, aar boluwar gún ore córom dí bolla Alla ye duniyai ye komzur táare de híin ore basíloíye. **28** Alla ye duniyai ye niróc edde behar táare de híin ore, yáni ziín náí híin ore basíloíye de kiyólla-hoilé, asé de híin ore baatel gorí bolla, **29** zeéne honó moniccó ye Allar muúntu borái gorí no fare. **30** Tuáñra íbar zoriya beh Mosih Isár bútoze asó, Mosih óilde añárar hañse Allar díiya giyan; íba añárar forhésgari, paki, edde azadi. **31** Hétolla pak-kalam ot endilla asé de mozin, “Zee niki borái goré, yóggwa ye Mabud ore lói beh borái goróuk.”

2 Báiboináin ókkol, zeñtté añí tuáñrar hañse aái Allar gufon sóiyir tobolik goijjílám, añí toh cúndor-cúndor hotá yáh giyani hotá estemal nó gorí. **2** Kiyólla-hoilé añr niyot accíl de,

tuáñrar fúañti tákite añí siríf Isá Mosihr edde íba re kúruc ot dí mariféla gíyl de híyan or baabute bade ar honó kessú no zani bolla. **3** Añí tuáñrar fúañti tákite komzur accfám edde ñoore bicí hafitám. **4** Añr boiyan edde tobolik maincóre bíra de héndilla giyani hotá lói gorá gíyl de no, bólke Pak-Ruhr kudurut dahái gorá gíyl deh, **5** zeéne tuáñrar iman insán or giyane no ói Allar kudurute ñiki táke. **6** Giyani hotá toh añára uitará llói hoói zetará iman ot balok óiye, montor hé giyan e jáhan or yáh e jáhan or sóddar ókkol or no, zetará borbad ówat asé. (aĩon g165) **7** Háleke añára ziín boiyan gorí híin óilde Allar gufoni giyan or baabute, yáni Alla ye duniyai foida goríbar age lóti añárar mohíma lla ñík gorí raikkíl de hé lukaiya giyan or baabute. (aĩon g165) **8** Hé giyan ore e jáhan or honó sóddare nó buzé, kiyólla-hoilé zodi buzító toh ítara mohímar Malik ore kúruc ot dí mari no felaito. (aĩon g165) **9** Montor pak-kalam ot asé de, “Zetará Alla re muhábbot goré, ítara lla íba ye ziín toiyar gorí raikké, híin no honó suké deikké, no honó hane fúinne, aar no honó insán or dil ot aiccé.” **10** Alla ye Pak-Ruhr duara añárar hañse híin zahér goijjé, kiyólla-hoilé hé Ruh ye hárr kessú tahákit goré, hoító sailé, Allar ebbe gufoni gún úddwa. **11** Kiyólla-hoilé insán or bútoore endilla hon asé, zee níki oinno zon or báfani re zane de? Siríf nizor ruh ye éna nizor báfani re zane. Borabor héndilla, Allar báfani re yó Allar Ruh ye bade ar honókiye no zane. **12** Añára toh duniyaibi ruh faiyí de no, bólke añára faiyí de hé Ruh óilde Allar torfóttu, zeéne Alla ye añára re ze niyamot ókkol diiyé híin ore siní fari. **13** Añára hoói de óilde híin or baabute. Híin hoité añára ze lofzó ókkol estemal gorí híin insán or giyane diya cíkkar no, bólke Pak-Ruhr diya cíkkar. Añára ruúhanir hákikot ókkol buzáite ruúhanir lofzó ókkol estemal gorí. **14** Montor zar ttu Pak-Ruh náí, yóggwa ye Allar Ruhr torfóttu ziín aiyé híin kobul no goré, kiyólla-hoilé híin yóggwar nozor ot bekuippa. Yóggwa ye híin ore buzí yó no fare, kiyólla-hoilé híin ore forók gorí fare de siríf hé Ruhr duara. **15** Zar ttu Pak-Ruh asé yóggwa ye hárr kessú forók gorí saá, montor yóggwa re honókiye forók gorí no fare, **16** zendilla pak-kalam ot asé, “Mabud or demak ore hone zainné, zeén níki yóggwa ye íba re buddí dí faitto?” Montor añára ttu toh Mosihr demak asé.

3 Báiboináin ókkol, ruúhani ola maincóre zendilla gori hotá howá fore, añí tuáñra re héndilla góri hoói nó fari, bólke uitará re hoó fángori howá foyjé zetará aijjó duniyaibi, yáni zetará Mosihr bútoore aijjó dud or fuain. **2** Añí tuáñra re dud hábailam, doró hána no; kiyólla-hoilé tuáñra híin or kaabel nu accíla. Becók aijjó úddwa nó óiyo, **3** kiyólla-hoilé tuáñra toh aijjó duniyaibi. Tuáñrar bútoore zettót hásorot edde hoijja-fózzat asé, tói tuáñra duniyaibi de no né? Tuáñra aam maincór ñóilla góri soloór de no né? **4** Kiyólla-hoilé zeñté ezzone eén hoó, “Añí Pául or ummot,” ar ezzone, “Añí Apólos or ummot,” tói tuáñra duniyaibi manúc de no né? **5** Eéne, Apólos hon? Aar Pául hon? Duní zon toh háadem éna, zetarár usílaye tuáñra iman ainnó. Malike añára re zar-zar zimma taré-taré diiyé. **6** Añí bis lagaiyí, Apólose faní diiyé, montor baráiyé de óilde Alla ye. **7** Hé ísafe lagoya yó kessú no, faní-dooya yó kessú no, montor Alla zibá ye níki baráiyé íba óilde hárr kessú. **8** Lagoiyar edde faní-dooyar moksót ek ñoilla; montor fottíkiye nizor-nizor meénnot mozin boccíc faibo. **9** Kiyólla-hoilé añára óiyi de fúañti Allar ham-goróya; tuáñra óilade Allar zobin, tuáñra Allar banaiya billíng. **10** Alla ye añré diiyé de toóufik mozin, ezon giyani mistírír ñóilla añí ekkán buniyadi ñáilli, aar ar ezzone híyan or uore billíng tulér. Montor nize hondilla gori banaitulér de híyan ot fottí ekzon ottu úñciyar ówar zorur. **11** Ze buniyadi age lóti ñála gíyeh, hé buniyadi óilde Isá Mosih. Honókiye toh híyan bade arekkán buniyadi ñáli no faribó. **12** Hodúne cúna, rufa, dami fattór, gas, boijjal yáh nañrá lói hé buniyadir uore gór banaibó de tákibo, **13** montor fottí ekzon or ham sáf-sáf góri dahá zaybo de asé, kiyólla-hoilé din ailé híin zahér óizayboi; kiyólla-hoilé híin ooin loi beh zahér gorá zaybo, ooine har ham hondilla de sábut goríbo. **14** Híyan or uore zee ziyán banaiyé híyan zodi no furi ñiki táke, tóoile banoya ye boccíc faibo. **15** Montor zar gán furizaybói, yóggwa ttu gunári óibo. Becók yóggwa basizaybói, montor yóggwar hálot eén manúc or ñóilla óibo, zibá ye ooin farái aiccé. **16** Tuáñra no zano né, tuáñra Allar gór de aar Allar Ruh tuáñrar bútoore táke dé? **17** Zodi honókiye Allar gór ore borbad gorífele, Alla ye yóggwa re borbad gorífelaibo, kiyólla-hoilé Allar gór toh pak, aar hé gór óilade tuáñra. **18** Nizoré nize fáki no diyo. Tuáñra ttu zodi honókiye e jáhan

ot giyani bouli táare, yóggwa bekuf bonouk, zeéne yóggwa sóiyi giyani óizagoi. (aiōn g165) 19 Kiyólla-hoilé e duniyair giyan-buddí toh Allar nozor ot bekufaiyi. Pak-kalam ot endilla asé, “Alla ye giyani ókkol ore ítarar salákir fán ot féla.” 20 Endilla yó asé, “Mabude giyani ókkol or báfa behar de zane.” 21 Hétolla, hoitó saáir de, honókiye manúc ore lói borái no goijjó. Kiyólla-hoilé beggún toh tuáñrar: 22 Pául óuk, Apólos óuk, Kéfas óuk, duniyai óuk, zindigi óuk, moot óuk, asé de híin óuk yáh aibó de híin, beggún tuáñrar, 23 tuáñra óilade Mosihr, aar Mosih óilde Allar.

4 Maincé añára re Mosihr háadem edde Allar gufon sóiyi ókkol zanaidibar zimmadar bouli buzóuk. 2 Híyan ot zoruri óilde, zimmadar ókkol ore furafuri biccácdar lootfon. 3 Añr bisar tuáñra goró yáh duniyai adalote goré, híyan añr lla doónr hotá no; añí toh añr nizar bisar úddwa no gorí. 4 Kiyólla-hoilé añí añr ulda kessú no zani; montor híyane hómo añí behosúr bóuli sábut no goré. Añr bisar goré de óilde Malike. 5 Hétolla sóiyi októ aibár age honó kessúr bisar no goijjó; Malik nú aiyé foijjonto entezar gorí táikko. Íba ye toh ziín andár ot lukaiya asé híin foór ot aníbo, aar insán or dil or erada ókkol zahér goríbo. Héñtte Allar torfóttu zar-zar taarif tee-tee faibo. 6 Báiboináin ókkol, tuáñrar bálai lla añí añr nizar edde Apólos or meésal dí tuáñra re iín hoiyí, zeéne tuáñra añára ttu e hotár maáni cíko, ki hoilé, “Ziín leikká asé híin or baáre no zaiyo.” Baade tuáñra ezzon ore lói ar ezzon or ulda boráiyi fúli no uríba. 7 Tuáñra re ar ezzon or túaro doónr hone banaiyé? Tuáñra kii nó foo de asé? Zodi faiyó de óile, tói kessú nó foo fángori kiyólla borái goró? 8 Saité de tuáñra age lóti beggún fai yore tuangor óigiyogoi; añára sára tuáñra baáñcca óigiyogoi fán lager. Becók, tuáñra baáñcca óita bóuli gom óito, kiyólla-hoilé añára yó tuáñrar fúañti hókumot gorí faittam. 9 Añr ttu lage de, Alla ye añára sáhabi gún ore beggún or fisé manúc uitarár dóilla góri raikké zetará re marifélaibar hókum óigiyoi; kiyólla-hoilé añára toh duniyair, fírista ókkol or, edde manúc ókkol or nozor ot ekkán tooñcá bonigiyígoi. 10 Añára toh Mosihr wasté bekuf bonigiyígoi, montor tuáñra Mosihr ummot ói giyani óigiyogoi. Añára komzur, montor tuáñra boluwar. Tuáñrar boóut izzot asé, montor añárar honó izzot náí. 11

Añára aijjó úddwa búkki edde tiráci. Añára ttu hoorsuor or homi asé, añára fíra hái, añára begór, 12 añára nizar áte meénnot gorí. Maincé añára re beizzoti goillé yo añára ítara re borhot dih. Añárar uore zulúm goillé yo añára bordac gorí. 13 Zeñtté maincé añárar bodnam goré, añára ítara re norom or sáante zuwab dih. Añára toh duniyair hoñsara edde tamám fúrari ókkol or dóilla óigiyigoi, ebbe aijjó úddwa héndilla. 14 Añí iín lekír de tuáñra re córom dí bolla no, bólke añr adorja fuain ísafe tuáñra re nosíyot gorí bolla. 15 Becók, tuáñra ttu Mosihr baabute cíkkadoya ázar-ázar tákile yo, tuáñra ttu baf bicí náí, kiyólla-hoilé tuáñrar hañse kúchóbor tobolik goróne Mosih Isár bútoze siríf añí óilam de tuáñrar baf. 16 Hétolla añí tuáñra re aros gorír, tuáñra añr nomuna mozin solo. 17 Hé niyote añí tuáñrar hañse Timóti re diferáiyi, zibá Malik or bútoze añr adorja edde biccácdar fua. Mosihr bútoze añr solasol hondilla de aar hárr zagar fottí zomát ot añí hondilla taalim ókkol di de híin beggún yóggwa ye tuáñra re monot gorídibo. 18 Añí tuáñrar hañse ar nu aiccúm bóuli táari tuáñra ttu hodún manúc boráiyi fúli uitté. 19 Malike sailé, añí tuáñrar hañse hára aiccúm, baade añí boráiyi fúli uitté de ítarar hotá ókkol zaniloium de no siríf, bólke ítara ttu kii kémota asé híyan óu zaniloium. 20 Kiyólla-hoilé Allar raijjo toh hotábattarar uore no, bólke kudurut or uore. 21 Tuáñra hon nán basíba? Añí tuáñrar hañse loří lói aítám né, náki muhábbot edde tánđa mezas or sáante aítám?

5 Fúna zar de, tuáñrar bútoze zenákari soler, endilla zenákari ziín Beyohúdi ókkol or bútoze úddwa náí, hoitó sailé, ezzone nizar baf or bou loi nizar bou wór dóilla góri gúm zah. 2 Híyan olla tuáñra afsús háiba tóuk, bólke aró fohórai goró. Zee niki héndilla ham gorér ítare tuáñrar bútotu neelai don nu accíl né? 3 Añí tuáñrar hañse jisím or sáante házir no tákile yo, ruhr sáante házir así; hétolla zee niki héndilla ham gorér ítar bisar añí jisím or sáante házir así fángori age lóti gorí raikkí. 4 Ki hoilé, tuáñra zeñtté añárar Malik Isár name zoma óiba, aar añí ruhr sáante tuáñrar hañse házir óiyum, edde añárar Malik Isár kudurut óu añárar fúañti tákibo, 5 héñtte héndilla manúc ore Cóitan or át ot gosáidiyo, zeéne ítar jisím dónco óizagoi, aar ítar ruh ye zen Malik Isá aibó de hé din nejat fa. 6 Tuáñra borái gorór de híyan

gom no. Tuáñra no zano né, ekkíní góri cùtare hañi or dola guñra fúlaifele dé? 7 Furana cùtar dur gorífelo, zeéne tuáñra noya hañi óizogoi, zendilla tuáñra asóle cùtar sára. Kiyólla-hoilé Mosih añárar azadir-id or Bérasóol-or-Sóo re añára lla kurbani gorá gýeh. 8 Hétolla, aiyó, añára furana cùtar, yáni ducconir edde hórafir cùtar dur gorífelai yore cùtar sára ruṭi loi id gorí, yáni ehélase edde sóiyir sáañte. 9 Añr ceñrít añi tuáñrar hañse leikkílam de ki, tuáñra zenákur ókkol lói taalukat no raikkó; 10 añi uitará llói taalukat no rakító hoitó saiyí de no zetaré e duniyair zenákur ókkol, lalósbon ókkol, ḡahañit ókkol, yáh mutti-fuñzoya ókkol; kiyólla-hoilé héndilla óile toh tuáñra ttu e duniyair baáre zaagói foribó. 11 Bólke háleke añi tuáñrar hañse leikkílam de, tuáñra endilla honó imandár kúwala de manúc lói taalukat no raikkó zee niki zenákur, lalósbon, mutti-fuñzoya, bodnam-goróya, nicákur, yáh ṭiañmaru. Héndilla manúc or fúañti hána úddwa na háiyó. 12 Añré kiyé faiyé baárgwa maincór bisar goráye? Tuáñra kí torikar bútor or maincór bisar no goró né? 13 Montor baárgwa maincór bisar Alla ye goríbo. Pak-kalam ot endilla asé, “Hé bura manúc cwa re tuáñrar cómaz ottu neelaido.”

6 Tuáñra honókiyo ttu honó imandár báí lói hoijja tákile, hon hímmote Allar pak bonda ókkol or hañse bisar saitó no zai bedini ókkol or hañse saitó zoo? 2 Tuáñra no zano né, Allar pak bonda ókkole duniyair bisar goríbo dé? Tuáñra zettót duniyair bisar goríba, tói tuáñra cóñro-cóñro hoijja ókkol or bisar goríbar kaabel no né? 3 Tuáñra no zano né, añára fírista ókkol or bisar goijjúm dé? Héen óile e duniyair gún goitté kii? 4 Hétolla, tuáñra ttu héndilla maamela tákile, zomát or baárgwa maincóre kiyá bisarhar ṭiyagaro? 5 Añí iín tuáñra re córom dí bolla hoóir deh. Tuáñrar bútoe endilla honó giyani manúc náí níki, zee niki imandár báiyain dor maamelar bisar goríbar kaabel? 6 Montor tuáñra toh ek imandár báí or ulḡa arek imandár báí ye bisar ot zoo, aar híyan óu gairimandár ókkol or muúntu! 7 Asóle tuáñra ezzon or ulḡa ezzone mooddima goró de híyane dahá de, tuáñra ebbere hónṛi gýyogoi. Yár túaro nainsáfi kiyá bordac no goró? Nizoré beimani goittó kiyá no doh? 8 Háleke tuáñra nize yó toh nainsáfi goró, aar beimani goró, héndilla tuáñra imandár báiboináin dore úddwa goró.

9 Tuáñra no zano né, kuham-goróya ókkole Allar raijjo miras no faibo dé? Nizoré fáki no diyo; bodmac, mutti-fuñzoya, zenákur, morote-morote zená-goróya, 10 sur, lalósbon, nicákur, bodnam-goróya, ṭiañmaru, ítara honókiye Allar raijjo miras no faibo. 11 Tuáñra hodún óu héndilla accíla, montor Malik Isá Mosihr name edde añárar Allar Ruhr duara tuáñra re dúifela gýeh, pak-sáf gorá gýeh, edde forhésgar bóuli kobul gorá gýeh. 12 Honókiye endilla hoibá de tákito fare, “Añr lla hárr kessú zayes,” ṭík hotá, montor hárr kessú ye manúc ore fáida no goré. Añí yó hoóí faijjum, “Añr lla hárr kessú zayes,” montor añí honó kessú re añr uore hókumot goittó no diyum. 13 Honókiye endilla yó hoibá de tákito fare, “Hána feṭ olla, aar feṭ hána lla,” ṭík hotá, montor Alla ye toh duníyan dónco gorífelaiibo. Monot raikkó, jisím zená lla no bólke Malik olla, aar Malik óilde jisím olla. 14 Alla ye toh Nizor kudurute Malik ore zinda goijjé, íba ye Nizor hé kudurute añára re yó zinda goríbo. 15 Tuáñra no zano né, tuáñrar jisím óilde Mosihr jisím or híssa ókkol dé? Tói añí kí Mosihr jisím or híssa loifélai híin ore honó magir jisím or híssa banaiyúm? Bilkúl no. 16 Aar náki tuáñra yíán no zano, ki hoilé, zee niki honó magi lloi milmilab goré ítar jisím híba llói ek gaa óizagoi dé? Kiyólla-hoilé pak-kalam ot endilla asé, “Ítara duní zon ek jisím óizayboi.” 17 Montor zee niki Malik loi ek ó, íte íba llói ek ruh óizagoi. 18 Zenákari ttu dáizogoi. Manúce ar badbaki ze guná ókkol goré híin beggún jisím or baáre goré deh, montor zee niki zená goré íte nizor jisím or ulḡa guná goré deh. 19 Tuáñra no zano né, tuáñrar jisím Pak-Ruh tákibar gór deh, zibá tuáñrar kollóf ot asé, zibá re tuáñra Allar torfóttu faiyó? Tuáñra tuáñrar nizor no, 20 kiyólla-hoilé tuáñra re dam dii kina giyéh, hétolla nizor jisím lói Allar mohíma zahér goró.

7 Yala añi tuáñra añr hañse leikkó de híin or zuwab dir: ói, morotfuain de mayafuain loi milmilab no gorón gom. 2 Montor zenákari ttu basi táki bolla, fottí morotfuain dor ttu nizor-nizor bou tákouk, aar fottí mayafuain dor ttu nizor-nizor hócom tákouk. 3 Hócome nizor bou wór hók adai goróuk, aar héndilla, bou wé yó nizor hócom or hók adai goróuk. 4 Bou wottu nizor gaar uore honó adíkar náí, montor hócom ottu beh asé; aar héndilla, hócom ottu yó nizor

gaar uore honó adíkar náí, montor bou wóttu beh asé. **5** Ezzon ore ezzone inkar gorí no díyo, montor dua gorí bolla duní zone razirobbot ói yore kessú óktó lla faribá. Baade abar agor dóilla óizayogoi, zeéne tuáñra re tuáñrar nizoré sóoñli rakár homi loi yore Cóitane entán ot no féla. **6** Añí tuáñra re iín hókum gorír de no, bólke ezazot dir deh. **7** Añr azzu óilde, fottí morotfuain añr dóilla óuk. Montor fottí zon ottu Allar diiya niyamot asé, ezzon ottu endilla asé, aar ar ezzon ottu arek dóilla asé. **8** Montor abiyáta ókkol ore edde rari ókkol ore añí yíán hoóir, tuáñra yó añr dóilla abiyáta tákile gom óibo. **9** Montor zodi nizoré sóoñli rakí no faro, tooile biyá gorífelo, kiyólla-hoilé azzuye zolifuri zar túaro beétor óilde biyá gorífelon. **10** Montor biyáta gún ore añí hókum dir, háleke añí dir de no bólke Malike der deh, ki hoilé, bou nizor hócom ottu alok ói no zoggói. **11** Montor zodi alok óizagoi, tooile híba ttu abiyáta tákizagoi foribó, arnóile nizor hócom lói abar bonizagói foribó, aar hócom ottu yó nizor bou wóre no sára foribó. **12** Aar badbaki gún ore Malike no, bólke añí hoóir, honó imandár báí ottu zodi gairimandár bou táke, aar híba tar loi zindigi goittó razi ó, tooile tee híba re no sárouk. **13** Héndilla, honó imandár mayafua ttu zodi gairimandár hócom táke, aar tee híba llói zindigi goittó razi ó, tooile híba ye nizor hócom ore no sárouk. **14** Kiyólla-hoilé gairimandár hócom bou wór zoriya pak-sáf óizagoi, aar gairimandár bou imandár hócom or zoriya pak-sáf óizagoi; arnóile toh tuáñrar fuain nafak óito, montor yala ítara pak. **15** Montor gairimandár gwá zodi alok óizaytoi saá, tooile óizoggoi. Héndilla hálot ot honó imandár báí yáh bóin biyá-cádir ban or tole náí. Alla ye toh añára re cántir zindigi hañai bolla éna ðaikké. **16** Ó bou, tui kéngori zanos, tor hócom ore nejat fa bay no faribí de? Ó hócom, tui kéngori zanos, tor bou wóre nejat fa bay no faribí de? **17** Malike zaré ze hálot ot raikké edde zaré ziyán olla ðaikké, fottíkiye hé mozin zindigi haro. Tamám zomát ókkol or hañise añí di de hókum óilde híyan. **18** Zodi ázomi goijjá honó manúc ore ðaha giyéh de óile, íte be-ázomi goijjá óibar kucíc no goróuk. Zodi be-ázomi goijjá honó manúc ore ðaha giyéh de óile, íte ázomi no goróuk. **19** Kiyólla-hoilé ázomi gorá yó kessú no, ázomi no gorá yó kessú no, montor asól hotá óilde Allar hókum ókkol amól gorón. **20** Alla ye zaré ze hálot ot tákíte ðaikké, íte hé hálot ot táko. **21** Tuáñre gulami hálot ot tákíte ðaha giyéh de né? Ferecan no díyo. Montor zodi tuáñr ttu azad ói faribár moouka táke, tooile híyan estemal goró. **22** Kiyólla-hoilé Malike zaré gulami hálot ot tákíte ðaikké, íte Malik or azad goijjá manúc. Héndilla, zaré azadi hálot ot tákíte ðaikké, íte Mosihr gulam. **23** Tuáñra re dam dii kina giyéh, hétolla insán or gulam no boniyó. **24** Báiyain, zaré ze hálot ot tákíte ðaha giyéh, íte hé hálot ot táki Alla lloi taalukat zari rakó. **25** Yala abiyáta ókkol or baabute hoitó sailé: añí ítara lla Malik or torfóttu honó hókum nó fai, lekin Malik or rahámote añí bóracar laayek óiyi ísafe añr rai dir. **26** Yala soler de mosibot ókkol or uzu kíyal gorí sailé, añr báfa mozin, zee zendilla asé héndilla tákile gom óibo. **27** Tuáñr ttu bou asé niki? Tákiye híba ttu síra óizaytoi zuu no tuwaiyó. Tuáñr ttu bou náí niki? No tákiye bou no tuwaiyó. **28** Montor zodi biyá gorífelo, tuñí guná gorór de héen no; aar zodi honó abiyáta mayafua ye biyá gorífele, híba ye yó guná gorér de héen no. Montor añí saáir de tuáñra re mosibot ókkol ottu basai bolla, zíín héndilla manúc ottu e zindigit tákibo. **29** Báiboínain ókkol, añí hoitám saáir de ki hoilé, óktó ebbe hom; hétolla zetará ttu bou asé, ítara ttu yala lóti ééngori solar zorur zeén níki ítara ttu bou náí; **30** zetará hañdahari gorér ítara eén óuk zeén níki ítara hañdahari no gorér; zetará kúci gorér eén óuk zeén níki ítara kúci no gorér; zetará kessú kiner ítara eén óuk zeén níki ítara ttu kessú náí; **31** zetará duniyaibi jiníc ókkol estemal gorér, ítara eén óuk zeén níki ítara híín lói birana náí. Kiyólla-hoilé e duniyair súrot toh bodolizargói. **32** Añí saái de, tuáñra sintabáfani sára táko. Abiyáta manúce Malik or jiníc ókkol or baabute beh báfe, ki hoilé, nize Malik ore kéngori kúci gorí faribó. **33** Montor biyáta manúce duniyaibi jiníc ókkol or baabute beh báfe, ki hoilé, nizor bou wóre kéngori kúci gorí faribó; **34** ítar mon duiharat fore. Ze mayafua abiyáta yáh kuwári, híba ye Malik or jiníc ókkol or baabute beh báfe, zeéne híba jisím ot edde ruht pak ói fare. Montor biyáta mayafua ye duniyaibi jiníc ókkol or baabute beh báfe, ki hoilé, nizor hócom ore kéngori kúci gorí faribó. **35** Añí híín tuáñrar fáida lla hoóir deh; tuáñra re sifot rakí bolla hoóir de no, bólke tuáñra zen ziyán sóiyi híyan goró, zeéne tuáñra ek díyane Malik or hédmot

goró. **36** Montor zodi honókiye eén táare, íte ítar zuragatá goijjá mayafua re biyá gorí no feler de híyan gom no ór, aar zodi ítar ttu biyár furani bicí ói híba re biyá gorífelar zorur de báfe, tóoile íte nizor erada fura goróuk, híyan guná no; ítara biyá gorífelouk. **37** Montor zee niki nizor kuwári mayafua re ettar biyá no gorí bolla nizor dile-dile mozbut fáisela gorífelaiye aar honó mojburi náí, bólke nizor moncá re furafuri sóoñli fare, íte yó gom goré. **38** Hétolla, zee niki nizor zuragatá goijjá mayafua re biyá gorífele íte gom goré, montor zee niki biyá gorí no fele íte aró gom goré. **39** Hócom zetódin zinda asé, bou hócom lói hétodin beh baindá táke; montor zodi hócom morizagói, híba ttu zaré monehoó taré biyá goríbar azadi asé, lekin manúc cwa Malik or torikar ówa foribó. **40** Añr rai mozin, híba zodi héddur ot táizagoi, híba aró kúcit tákibo. Añí táarir de, añí híin Allar Ruhr hédaiyote hoóir.

8 Yala muttir hañse kurbani diya hána ókkol or baabute hoitó sailé: añára toh zani, ói, añára beggún ottu zankari asé. Zankariye toh fohórai baré, montor muhábbote torki ané. **2** Zee niki nizor ttu kessúr zankari asé bóuli táare, ítar ttu aijjó oddúr zankari náí zeddúr ítar ttu táka foitto. **3** Montor zee niki Alla re muhábbot goré, ítare toh íba ye siné. **4** Hétolla muttir hañse kurbani diya hána ókkol háar baabute hoitó sailé: añára zani, mutti toh duniyait mazé asóle kessú no, aar Alla ekgwá bade ar náí. **5** Kiyólla-hoilé zodi debota hoó de híin asman ot yáh duniyait tákile yo, becók debota hoó de yó bicí asé, kúda hoó de yó bicí asé; **6** montor añára ttu Alla asé de siríf ekgwá, íba óilde Baf, zibár torfóttu hárr kessú foida óiye aar zibá lla añára zindigi harair. Aar Malik asé de yó ekgwá, íba óilde Isá Mosih, zibár duara hárr kessú foida óiye aar zibár duara añára basi así. **7** Montor hárr manúc ottu hé zankari gán náí. Hodún ottu aijjó mutti fuñzar adot táigiyoi ísafe ítara muttir hañse kurbani diya hána ókkol háa, aar ítarar hélom komzuriye nafak óizagoi. **8** Hána ye añára re Allar dake no goré; añára híin na háile yo honó lussán náí, aar háile yo añárar honó fáida náí. **9** Toóu úñciyar, zeéne tuáñrar e azadi ye hélom komzur ola ókkol ore gunát no foraba. **10** Kiyólla-hoilé zodi honó hélom komzur ola manúce tuñí zankari ola manúc ore muttir mondí ot hána hóor de deké,

tóoile yóggwa ye yó kí muttir hañse kurbani diya hána ókkol háito hímmot no faibo né? **11** Tói hé komzur báí zar lla Mosih moijjíl, tuáñr zankarir zoriya yóggwa dónco ói no zaybói né? **12** Héndilla góri zeñtté tuáñra imandár báiboináin dor ulða guná gorí ítarar komzur hélom ot zohóm goró, héñtte tuáñra Mosihr ulða guná gorór deh. **13** Hétolla, zodi hána ye añr imandár báí ore gunát foraba, tóoile añí ar honódin gusso na háiyum, zeéne añr zoriya yóggwa gunát no fore. (aññ g165)

9 Añí kí azad no? Añí kí sáhabi no? Añí kí Isá añárar Malik ore nó deki? Malik or hañse añr ham or notiza tuáñra no né? **2** Añí argún or hañse sáhabi de no óile yo, becók tuáñrar hañse ói; kiyólla-hoilé tuáñra óilade Malik or hañse añr sáhabigirir moór. **3** Zetará añr sáhabigirir baabute súwal goré, ítarar hañse añr zuwab óilde: **4** añára ttu hána-fina háibar hók náí niki? **5** Añára ttu kí nizor imandár bou loi sofór ot zaibar hók náí, zendilla oinno sáhabi gún ottu, Malik or báiyain dor ttu, edde Kéfas ottu asé? **6** Aar náki siríf Bárnabas ottu edde añr ttu ham no goríbar hók náí de? **7** Nizor tiañ hóros gorí fóous ísafe ham goré de hon asé? Anggur-bariza lagai híyan ottu gula na haa de hon asé? Aar goru-sóol fali híin ottu dud na haa de hon asé? **8** Añí kí iín siríf insán or kiyase hoóir de né? Córíyote yó kí iín no hoó né? **9** Muúsar Córíyot ot toh endilla asé, “Dán úñror de goru re hoóñr no diyó.” Alla ye kí siríf goru ókkol olla sinta goré de né? **10** Íba ye híyan añára lla hoiyé de no né? Becók, híyan añára lla beh leká gíyeh, kiyólla-hoilé álcac-goróya ttu acár sáañte álcac gorár zorur, aar dán-úñroya ttu bák faibar acár sáañte dán úñrar zorur. **11** Añára zettót tuáñrar bútoe ruúhanir bis cínñtti, tói añára zodi tuáñra ttu fósol ísafe duniyaibi jiníc ókkol dán híyan kí doóñr hotá né? **12** Tuáñrar uore oinno kiyó ttu zodi híin faibar hók táke, tóoile añára ttu kí aró bicí náí né? Montor añára hé hók híyan or fáidai nó tulí; bólke hárr kessú bordac gorí, zeéne añárar zoriya Mosihr kúchóbor olla bazá foida no. **13** Tuáñra no zano né, zee niki baitul-mukaddos or hédmot goré, yóggwa ye baitul-mukaddos ottu hána faa dé? Aar zee niki kurbani-gañr hédmot goré, yóggwa ye kurbani-gaí ttu bák faa dé? **14** Borabor héndilla, Malike hókum díye de kí, zetará kúchóbor tobolik goré ítara hé kúchóbor

or uslaye nizor zorurot ókkol fouk. **15** Montor ańí hé hók híin ekkán ottu úddwa fáidai nó tulí. Aar ańí héndilla hók or dabi gorí bolla iín lekír de no, kiyólla-hoilé honókiyo re ańr e borái goríbar hók harí loifélaito díyar túaro ańí morizon nán ańr ulla beétor óibo. **16** Ańí kúchóbor tobolik gorí de óile yo, ańr ttu borái goríbar kessú náí, kiyólla-hoilé híyan toh ańr fóros. Ańr uore afsús, zodi ańí kúchóbor tobolik no gorí. **17** Zodi ańí hé ham nizor ttu monehoói goittám, tóoile toh ańr ulla boccíc tákito; montor ańí toh ańr zimmadari éna adai gorír, kiyólla-hoilé ańré híyan or zimma diiya giyéh. **18** Tóoile ańr boccíc kii? Híyan óilde, zeńtté ańí kúchóbor tobolik gorí, ańí zen honó dam sára kúchóbor tobolik gorí, aar kúchóbor tobolik-goróya ísafe ańr ze hók asé, ańí zen híyan or furafuri fáidai no tulí. **19** Ańí honókiyor gulam no de óile yo, ańí nizoré manúc beggún or hańse gulam banaiyí, zeéne ańí aró bicí maincóre řaniani fari. **20** Yohúdi ókkol or hańse ańí Yohúdir dóilla boinní, zeéne Yohúdi ílara re řaniani fari. Zetará Córiyot or tole asé, ańí Córiyot or tole no de óile yo, ítarar hańse Córiyot or tole así fángori táikki, zeéne ańí Córiyot or tole asé de ílara re řaniani fari. **21** Zetará ttu Córiyot náí, ańí ítarar hańse Córiyot sárar dóilla boinní, zeéne zetará Córiyot sára asé ílara re řaniani fari. Háleke ańí Allar diiya córiyot sára de no, ańí toh Mosihr córiyot or tole así. **22** Komzur ókkol or hańse ańí komzur boinní, zeéne ańí ílara re řaniani fari. Ańí beggún or hańse hárr kessú boinní, zeéne ańí ze honó bote hodún ore basai fari. **23** Ańí híin beggún goríde óilde kúchóbor or wasté, zeéne ańí yó híyan or rahámot or bági ói fari. **24** Tuáńra no zano né, zetará duńraduńri zibbat de ílara duńitte beggúne duńre, montor boccíc siríf ekzone faa dé? Héndilla, tuáńra yó ziti faro fángori duńro. **25** Zetará kélat cámil ó, ílara toh bicí hora niyom-kaanun mani nizoré sóonli raké. Ílara nac óizagoi de tas fai bolla beh héndilla goré, montor ańára nac no ó de tas fai bolla beh gorí. **26** Hétolla honó moksót sára ańí no duńri; boccin kéloyar dóilla ańí boiyar ot no mari. **27** Montor ańí ańr gaar uore horagori niyom-kaanun solai híyan ore nizor gulam banai rakí, zeéne oinno zon ore tobolik gorí baade ańí nize boccíc or nakaabel ói no zagói.

10 Báiboináin ókkol, ańí no saái tuáńra yían or ozana táko, ki hoilé, ańárar tamám bafdadada ókkol miyúlar saíiyar tole accíl, aar ílara beggúne doiija farái giíl. **2** Ílara Muúsar ummot ói bolla beggúne miyúlat edde doiijat bápřisma lóil; **3** beggúne ekí gabi hána háail, **4** edde beggúne ekí gabi faní háail. Kiyólla-hoilé ílara faní háito de óilde ítarar fúańti-fúańti zaito de gabi Cíl yíba ttu, hé Cíl lwá óilde Mosih. **5** Montor toóu ílara beebák lóil Alla kúci nu accíl, hétolla ítarar lac ókkol moidan zagat dorborod óigilgoi. **6** Híin ańára ulla sébok boinné, zeéne ańára ttu bura ham goittó dilmon no táke zendilla ílara ttu accíl. **7** Tuáńra mutti fuńza no goijjó, zendilla ílara hodúne goijjíl. Pak-kalam ot endilla asé, “Manúc ókkole hána-fina háito boói nasitó uiřté.” **8** Aiyó ańára zená no gorí, zendilla ílara hodúne gorí ek din ot ekkuri tin ázar manúc morigílgoi; **9** ańára Malik ore entán no gorí, zendilla ílara hodúne goijjíl, aar háf ókkol or hońran hái morigílgoi; **10** cékayot no gorí, zendilla ílara hodúne goijjíl, aar hálak-goróya fírista ye hálak gorífelail. **11** Maincé sébok hásil gorí bolla híin ítarar uore óiye deh, aar ańára ahéri zobanar maincór nosíyot olla híin leká giyéh. (aĩon g165) **12** Hétolla, zee niki mozbut gori říyaya asé bóuli řáare, íte uńciyar tók, zeéne fori no zagói. **13** Tuáńra toh endilla honó entán ot nó foro, ziín insán olla aamfám no. Alla toh biccácdar; íba ye tuáńra re bordac gorí no faro de héndilla entán ot foitto no dibo; bólke entán or fúańti-fúańti héntu neeliaibár fońt óu milaidibo, zeéne tuáńra híyan bordac gorí faro. **14** Hétolla hoóir, ó ańr adorda ókkol, mutti fuńza ttu dáizogoi. **15** Ańí tuáńra re aholbon bouli buzí hotá iín hoóir. Ańí hoóir de hotá híin tuáńra nize báfiso. **16** Zeńtté ańára rahámot or fiyala ttu Alla re cúkuriya gorí hái, ańára kí Mosihr lou wót córik ói no zaygói né? Aar zeńtté ruří bańgi hái, ańára kí Mosihr gaat córik ói no zaygói né? **17** Ruří asé de toh ekgwá, hétolla ańára bicí de óile yo ańára ek gaa, kiyólla-hoilé ańára beggúne toh hé ekgwá ruří éna hái. **18** Boni Isráil or baabute báfiso: zetará kurbani diya hána ókkol háa, ílara kí kurbani-gáńt córik ói no zagói né? **19** Híyan lóil kí ańí endilla hoitó saáir de, muttir hańse kurbani diya hána ókkol or kimot asé, yáh mutti ókkol or kimot asé? **20** No, bólke hoitó saáir de, Beyohúdi ókkole ziín kurbani de híin ílara Allar hańse kurbani dede no bólke búť ókkol

or hañse de deh. Aar añí no saái de ki, tuáñra bút ókkol lói honó taalukat rakó. **21** Tuáñra Malik or fiyala ttu edde bút ókkol or fiyala ttu ekku fúañti hái no faribá. Tuáñra Malik or mes ot edde bút ókkol or mes ot ekku fúañti córik ói no faribá. **22** Náki añára Malik ore gairot tulídir dé? Añára kí íbar túaro boluwar? **23** Honókiye endilla hoibá de tákito fare, “Añr lla hárr kessú zayes,” Tík hotá, montor hárr kessú ye manúc ore fáida no goré. Añí yó hoói faijjum, “Añr lla hárr kessú zayes,” montor hárr kessú ye toh manúc ore torki no goré. **24** Honókiye nizor fáida no tuwaiyó, bólke oinno zon or fáida tuwo. **25** Gussor bazar ot zín bese híin háiyó; hélom or wasté honó súwal no goijjó; **26** kiyólla-hoilé pak-kalam ot endilla asé, “Duniyai edde duniyait asé de híin beggún Mabud or.” **27** Zodi honó gairimandáre tuáñra re hánar dawot de aar tuáñra hé dawot kobul goijjó de óile, tuáñrar muúntu zín dee híin háifelaiyo; hélom or wasté honó súwal no goijjó. **28** Montor zodi honókiye tuáñra re eén hoó, “Gusso iín mutti re peec goijjá,” tooile zibá ye tuáñra re batalaidiyé yóggwar wasté edde hélom or wasté híin na háiyó; **29** añí tuáñrar nizor hélom or hotá hoóir de no, bólke yóggwar. Kiyólla-hoilé oinno zon or hélome kiyá añr azadir fáisela goittó? **30** Zodi añí cúkuriya gorí hái, tooile zín olla añí cúkuriya gorí híin or zoriya kiyá añr bodnam óito? **31** Hétolla hoóir, tuáñra hóo yáh fiyó, yáh oinno kessú goró, beggún Allar mohíma ói bolla goríyo. **32** Honókiye lla oñsá no boinno; Yohúdi lla óuk yáh Girík olla, aar yáh Allar zomát olla, **33** zendilla gori niki añí yó hárr torikaye fottíkiyo re kúci goríbar kucíc gorí. Añí nizor fáidai no tuwai bicí zon or fáidai tuwai, zeéne ítara nejat fa.

11 Tuáñra añr nomuna mozin solo, zendilla añí Mosihr nomuna mozin soli. **2** Añí tuáñrar hárr gorí, kiyólla-hoilé tuáñra toh añré hárr kessú yaad rakó edde ze taalim añí tuáñra re diyí híin mozbut or sáañte dóri asó. **3** Montor añí tuáñra re yíán batalaidito saáir, ki hoilé, Mosihr óilde fottí morotfuar matá, morotfua óilde mayafuar matá, aar Alla óilde Mosihr matá. **4** Ze morotfua ye nizor matá gúridi dua goré yáh Allar kalam boiyan goré, íte nizor matá re beizzoti goré. **5** Aar ze mayafua ye uidda matá dua goré yáh Allar kalam boiyan goré, híba ye nizor matá re beizzoti goré,

kiyólla-hoilé híbar matá eñraiya matá lói ek ðoilla óizagoi. **6** Ze mayafua ye nizor matá gúri no raké, híba ye nizor sul harífélouk, montor zodi nizor sul harífelaite yáh matá eñraifelaite honó mayafua ttu beizzoti lage, tooile híba ye nizor matá gúri rakóuk. **7** Honó morotfua ttu nizor matá gúri rakár zorur náí, kiyólla-hoilé íbar duara Allar súrot edde mohíma zahér ó; montor mayafuar duara zahér ó de óilde morotfuar mohíma. **8** Kiyólla-hoilé morotfua toh mayafua ttu aiccé de no, bólke mayafua éna morotfua ttu aiccé; **9** morotfua re toh mayafua lla foida gorá gíyeh de no, bólke mayafua re éna morotfua lla foida gorá gíyeh. **10** Híyan olla mayafua ttu nizor matát adíkar or marhá tákar zorur, kiyólla-hoilé fírista ókkole toh saái táikke. **11** Becók, Malik or bútoe, morotfua mayafua ttu azad no, aar mayafua morotfua ttu azad no. **12** Kiyólla-hoilé zendilla niki morotfua ttu mayafua aiccé, héndilla morotfuar zormo ó de yó mayafua ttu. Montor hárr kessú aiyé de óilde Allar torfóttu. **13** Tuáñra nize báfiso: mayafuain de Allar hañse uidda matá dua gorá kí tík? **14** Fítorote yó kí tuáñra re yíán no cika né, morotfuain de sul lamba rakón córmor hotá dé? **15** Montor mayafuain de sul lamba rakón óilde nizor lla ekkán izzoitta ham, kiyólla-hoilé gúri rakí bolla éna ítara re sul híin diiya gíyeh. **16** Zodi honókiye iín or baabute barábari dito saá, tooile añr zuwab óilde, añára ttu iín bade ar honó niyom náí, Allar zomát ókkol ottu yó náí. **17** Añí yala ze hókum diyum, híin or mutalek añr torfóttu tuáñra lla honó taarif náí, kiyólla-hoilé tuáñrar zoma ówa ye fáidar túaro lussán bicí goré. **18** Cúrrur gán hoitó sailé, añí fúnir de, zeñtté tuáñra zomát ísafe zoma ó, tuáñrar bútoe faáta-faáti táke. Añí híyan kessú bák biccác óu gorí. **19** Becók, tuáñrar bútoe faáta-faáti ón zorur, zeéne tuáñrar bútoe hontará sóiyit asé de híyan zahér óizagoi. **20** Hétolla hoóir de, zeñtté tuáñra zoma ó, tuáñra Malik or Yadgarir Hána háibolla zoma ó de no, **21** kiyólla-hoilé háibarcot tuáñra toh age zar-zar hána tee-tee looi háat dóro; hétolla, hodún búkki táizagoi ar hodún tuúl óizagoi. **22** Tuáñra ttu kí háafiya gorí bolla gór náí? Náki tuáñra Allar zomát ore hékarot gorór de aar zetará ttu kessú náí ítara re córom dór dé? Añí tuáñra re kii hoitám? Tuáñrar taarif goittám né? Híyan or mutalek añí tuáñrar taarif no goijjúm. **23** Kiyólla-hoilé añí tuáñra re ze taalim diyí, híin Malik or

torfóttu faiyí deh, ki hoilé, ze raitta Malik Isá re dóridiya gýl, hé rait ot íba ye ruṭi looi **24** Alla re cúkuriya goijjíl, aar báñgi hoiyé de, “Yián Añr gaa, ziyán tuáñra lla. Añré monot gorí bolla endilla goríyo.” **25** Héndilla, hána baade íba ye fiyala yó looi hoiyé de, “Añr lou loi óibo de noya razinamar nicán óilde e fiyala. Tuáñra zetóbar fiíba, Añré monot gorí bolla fiíyo.” **26** Kiyólla-hoilé zetóbar tuáñra e ruṭi háiba edde e fiyala ttu fiíba, hétobar tuáñra Malik or moot or elan gorór deh, zetódin níki íba nú aiyé. **27** Hétolla, zee níki nalaayek ahálake Malik or ruṭi háa yáh íbar fiyala ttu fiíye, yóggwa Malik or gaa edde lou wór hosúrbon tóoribo. **28** Montor fottíkiye hé ruṭi háibar edde fiyala ttu fiíbar age nizoré tahákit gorí soók. **29** Kiyólla-hoilé zee níki Mosihr gaa re no siní hé ruṭi háa edde fiyala ttu fiíye, yóggwa ye híin hóone edde fiíyone nizor uore sáñza aníbo. **30** Hétolla toh tuáñrar bútoe boóut zon komzur edde biyaraimma asé, aar boóut zon moot or gúm ot foijjé de yó asé. **31** Zodi añára nizor bisar nize sóiyigori goittám, tóoile añárar bisar gorá no foitto. **32** Montor Malike añára re bisar gorí torbiyot goré, zeéne añára yó duniyair fúañti hosúrbon no tóori. **33** Hétolla hoóir, ó añr báiboináin ókkol, zeñtté tuáñra híin háito zoma ó, ar ezzon olla entezar goríyo. **34** Zodi honókiyo ttu búk lage, yóggwa ye gór ottu hána hái zaiyo, zeéne tuáñra hosúrbon tóori bolla zoma óiyo fán no. Aar badbaki maamela gún or baabute añi hépe ailé hoiyúm.

12 Báiboináin ókkol, ruúhanir niyamot ókkol or baabute hoitó sailé: añi no saái tuáñra híin or baabute ozana táko. **2** Tuáñra toh zano, zeñtté tuáñra bedini accíla, héñtte tuáñra re buga muttir uzu zee zendilla loizaitó héndilla zaitagói. **3** Hétolla, añr ttu tuáñra re yíán zanaidito monehoór de ki, zee níki Allar Ruhr hédaiyote hotá hoó, íte endilla no hoó de, “Isár uore laánot óuk,” aar Pak-Ruhr hédaiyot sára honókiye endilla hoói no faribó de ki, “Isá óilde Malik.” **4** Niyamot toh ðoilla-boðoilla asé, montor híin dee de óilde ekí Ruh ye. **5** Hédmot goríbar torika yó ðoilla-boðoilla asé, montor ekí Malik ore. **6** Héndilla, ham óu ðoilla-boðoilla asé, montor ekí Alla ye beh beggún or bútoe hárr ðoilla ham goré. **7** Montor zon-zon or hañse Ruhr zahéri beggún or fáida lla beh ó. **8** Hé Ruhr duara kiyó re giyani hotá hoibár

toóufik diiya zah; hé ekí Ruhr duara ar kiyó re ahole hotá hoibár toóufik diiya zah. **9** Kiyó re hé Ruhr duara iman diiya zah, ar kiyó re hé ekí Ruhr duara biyaram gom goríbar niyamot diiya zah. **10** Kiyó re keramot goríbar, kiyó re nobi ísafe hotá hoibár, kiyó re ruh ókkol forók goríbar, kiyó re ðoilla-boðoilla gabi zubane hotá hoibár, edde kiyó re hé zuban báñgidibar toóufik ókkol diiya zah. **11** Híin beggún óilde hé ekí edde ekgwá Ruhr ham. íba ye fottíkiyo re zaré ze niyamot diito monehoó hé niyamot dee. **12** Zendilla ekkán gaar hísaa ókkol bicí asé aar hísaa híin beggún lói ekkán gaa bone, Mosih yó héndilla. **13** Kiyólla-hoilé Yohúdi óuk yáh Girík, gulam óuk yáh begulam, añára beggúne toh ek gaa ói bolla ekí Ruhr duara báptisma loiyí, aar añára beggúne ekí Ruh faiyí. **14** Gaar toh hísaa ekkán asé de no, bólke bicí. **15** Téng or fata ye zodi hoó, “Añi át no de hétolla añi gaar hísaa no,” tóoile híyan gaar hísaa no de héen no. **16** Aar zodi hane hoó, “Añi suk no de hétolla añi gaar hísaa no,” tóoile híyan gaar hísaa no de héen no. **17** Guñra gaa zodi suk óito, tóoile fúinto hontú? Aar zodi guñra gaa han óito, tóoile fúuñi faitto hontú? **18** Montor Alla ye toh hísaa híin fottí ekkán ore gaar bútoe woóñt-woóñt raikké ziyóñt-ziyóñt rakí bolla íba ttu monehoiyé. **19** Zodi híin beggún ekkán hísaa óito, tóoile gaa hoóre óito? **20** Montor yala toh hísaa ókkol bicí asé, lekin gaa asé de ekkán. **21** Hétolla suké át ore hoói no faribó de, “Añr ttu tor zorur náí,” aar matá ye téng or fata re hoói no faribó de, “Añr ttu tor zorur náí.” **22** Háleke, gaar ze hísaa gún saité komzur, híin aró bicí zoruri, **23** aar gaar ze hísaa gún ore añára hom izzoti bouli táari, híin ore añára aró bicí izzot dih. Ze hísaa gún ore añára córome lukai rakí, híin ore bicí zottone gúri rakí, **24** montor añárar alukaiya hísaa gún ore zotton goríbar zorur náí. Alla ye toh gaa re endilla gorí-gorí milai banaiyé, zeén níki ze hísaa gún hom izzoti híin ore aró bicí izzot diya fore; **25** zeéne gaar bútoe honó na-ektofáki no táke, bólke hísaa ókkole zen ekkán olla ekkáne kíyal raké. **26** Ekkán hísaa ye duk faile, híyan or fúañti hísaa beggúne duk faa. Aar ekkán hísaa ye izzot faile, híyan or fúañti hísaa beggún kúci ó. **27** Tói yala tuáñra óilade Mosihr gaa, aar fottí zon híyan or hísaa ókkol. **28** Alla ye zomat ot alok-alok manúc ókkol tuillé: ek nombór ot sáhabi ókkol, dui nombór ot nobi ókkol, tin nombór

ot ustat ókkol. Baade íba ye uitará re tuillé zetará ttu keramot goríbar, zetará ttu biyaram gom goríbar, zetará ttu modot goríbar, zetará ttu hókumot goríbar, edde zetará ttu ðoilla-boðoilla gabi zubane hotá hoibár niyamot asé. **29** Beggún kí sáhabi né? Beggún kí nobi né? Beggún kí ustat né? Beggún kí keramot goróya né? **30** Beggún ottu kí biyaram gom goríbar niyamot asé? Beggúne kí gabi zubane hotá hoó? Beggúne kí zuban báñgidi fare? **31** Montor tuáñra niyamot uúin olla bicígori azzu goró, ziín ðoóñr. Toóu ańí tuáñra re aró bicí bála ekkán rasta dahái dír.

13 Zodi ańí insán or edde fíristar zubane hotá hoói fari, montor ańr ttu muhábbot no táke, tooile ańí toh bazailé uzor ó de búng or ðoilla yáh baza de zurir ðoilla éna. **2** Zodi ańr ttu nobi ísafe hotá hoibár niyamot táke, aar ańí tamám gufoni ókkol buzí edde ańr ttu hárr kessúr zankari táke, aró zodi ańr ttu faár larifélai fare de héndilla furafuri iman táke, lekin ańr ttu muhábbot no táke, tooile toh ańí kessú no. **3** Zodi ańí ańr cómbotti beggún sótká gorífelai aar ańr gaa re furat di bolla diifélai, lekin ańr ttu muhábbot no táke, tooile toh ańr honó fáidai náí. **4** Muhábbot óilde sobór, aar meérban. Muhábbote hásorot no goré, muhábbote borái no goré aar fohórai no goré, **5** Muhábbote biyaddofi no goré; híyane nizor fáida no tuwa, zeenten guccá no goré, aar ar ezon or hórafi dil ot no raké. **6** Muhábbote hórafit kúci no goré, bólke sóiyir uore kúci goré. **7** Híyane beggún cóo, beggún ekin goré, beggún ot acá raké, edde beggún bordac goré. **8** Muhábbot honódin hótom no; montor zodi nobi ísafe hotá hoibár toóufik táke, híin bon óizayboi; zodi gabi zubane hotá hoibár toóufik táke, híin óu bon óizayboi; aar zodi elóm táke, híin fúraizayboi. **9** Kiyólla-hoilé añára toh honó kessú furafuri no zani, aar nobi ísafe yó furafuri hotá hoói no fari; **10** montor zeńtté furafuri aibó, heńtte homi gún hótom óizayboi. **11** Ańí gura accílám de októ, gurar ðoilla hotá hoitám, gurar ðoilla góri báfitam, edde gurar ðoilla góri bisar goittám; montor ańí zeńtté ðoóñr óiyi, ańí gurahal or solasol ókkol félaidiyi. **12** Ehón toh añára aainat mazé miyúnda góri dahá zah fángori éna dekir; montor heńtte muámuikka dekíyüm. Yala ańí honó kessú furafuri no zani, montor heńtte ańí eén furafuri zaniyüm zendilla furafuri gori

Alla ye ańré zane. **13** Hé ísafe, iman, acá, edde muhábbot, e tiniyan zari táke; montor híin or bútoe ebbe ðoóñr gán óilde muhábbot.

14 Muhábbot or fisá doro, aar fúańti-fúańti ruúhanir niyamot ókkol olla yó bicígori azzu goró, háasgori nobi ísafe Allar kalam boiyan goríbar niyamot olla. **2** Kiyólla-hoilé zee niki gabi zubane hotá hoó, yóggwa ye manúc or hańse hoó de no, bólke Allar hańse hoó deh. Yóggwar hotá toh honókiye no buzé, kiyólla-hoilé yóggwa ye gufon hotá hoó de óilde Ruhr bole. **3** Montor zee niki kalam boiyan goré, yóggwa ye maincór hańse beh hoó, zeéne ítara torki ó, bol faa, edde tosólí faa. **4** Zee niki gabi zubane hotá hoó, yóggwa ye nizoré beh torki goré, montor zee niki kalam boiyan goré, yóggwa ye zomát ore beh torki goré. **5** Ańí saái tuáñra zen beggúne gabi zubane hotá hoó, montor beechíssa yíán saái tuáñra zen kalam boiyan goró. Kiyólla-hoilé zee niki gabi zubane hotá hoó, zodi zomát or torki lla híin báñgi no déh, tooile toh zee niki kalam boiyan goré íba yóggwar túaro ðoóñr. **6** Báiboináin ókkol, zodi ańí tuáñrar hańse aái gabi zubane hotá hoói, montor híin or duara Allar sóiyir zahérir hotá, yáh zankarir hotá, yáh nobi ísafe Allar diiya hotá, yáh taalim or hotá ókkol tuáñra re no hoói, tooile tuáñra ańr ttu kii fáida faiba? **7** Ki bací ki bina, hé zan sára jiníc híin ottu zodi abas neeilte alok-alok abas no neeilto, tooile bacít yáh binat kii bazar de híyan keéngori siná zayto? **8** Cíań ye zodi sáf-sáf góri cíańr abas no deh, tooile larái lla hone toiyar óibo? **9** Héndilla tuáñra yó zodi oinno zone no buzé de zubane hotá hoó, tuáñra kii hoór de híin keéngori buzá zaybo? Tuáñra toh boiyar loi hotá hoór fán óibo. **10** Becók, duniyait mazé becábicí zuban ókkol asé, montor híin ekgwá yó maáni sára no. **11** Hétolla, zodi ańí ze zuban hoór hé zuban no buzí, tooile toh hoór de yóggwar hańse ańí bidecóittar ðoilla, aar yóggwa ańr hańse bidecóittar ðoilla. **12** Hotá híyan tuáñra lla yó háre. Tuáñra ttu zettót ruúhanir niyamot ókkol olla bicí azzu asé, tuáñra undilla niyamot olla furafuri kucíc goró, ziíne zomát ore torki goré. **13** Hétolla, zee niki gabi zubane hotá hoó, yóggwa ye híin báñgidi fari bolla dua goróuk. **14** Kiyólla-hoilé zodi ańí gabi zubane dua gorí, tooile toh ańr ruh ye éna gorér, montor ańr mone kessú no gorér. **15** Tooile ańr ttu kii gorár

zorur? Añí ruhr sáante yó dua goijjúm, mon or sáante yó dua goijjúm. Añí ruhr sáante yó seér gaiyúm, mon or sáante yó seér gaiyúm. **16** Arnóile, zodi tuñí siríf ruhr sáante Allar taarif goró, tooile cádaran manúce tuáñr cúkuriya gorát “Aamin” keengori hoói faribó? Kiyólla-hoilé yóggwa ye toh tuñí kii hoór de no buzér. **17** Becók tuñí cúndorgori cúkuriya gorór, montor oinno zon torki no ór. **18** Añí Allar cúkuriya gori, kiyólla-hoilé añí gabi zubane hotá tuáñra beggún or túaro bicí hoói. **19** Montor zomát ot máze gabi zubane doc ázar hotá howár túaro, oinno zon ore nosíyot gorí bolla añí buzá zah de héndilla fañs sán hotá howá basíyüm. **20** Ó báiboináin, buzát fuain no boinno. Burait gura fuain bono, montor buzát balok ó. **21** Córíyot ot endilla leikká asé, Mabude fórmár de, “Maincór osin zubane edde bidecóitta ókkol or muké Añí e manúc itarár hañse hotá hoíyüm, aar toóu úddwa itará Añr hotá no fúnibo.” **22** Híyane buzá zar de, gabi zuban ókkol óilde gairimandár ókkol olla ekkán nicán, imandár ókkol olla no. Montor Allar kalam boiyan gorá óilde imandár ókkol olla, gairimandár ókkol olla no. **23** Hétolla zodi fura zomát ek zagat zoma ói beggúne gabi zubane hotá hoó, aar hére baárgwa manúc yáh gairimandár ókkol aiyé, ítara kí tuáñra re fool no hoibó né? **24** Montor zodi beggúne Allar kalam boiyan goró, aar hére honó gairimandár yáh baárgwa manúc aiyé, yóggwa ye hotá híin beggún or duara nizoré nize gunágar de sábut faibo, aar híin beggún or duara yóggwar bisar gorá zaybo. **25** Héndilla góri yóggwar dil or gufoni ókkol zahér óizayboi; aar yóggwa ye héntte uúñtoi fori Alla re sóida goríbo aar hoibó de, “Alla sóiyi-sóiyi tuáñrar dormiyan ot asé.” **26** Báiboináin ókkol, tooile kii ówa foribó? Tuáñra zeñtté ekkán ot zoma ó, héntte toh tuáñra kiyó ttu seér táke, kiyó ttu taalim táke, kiyó ttu wahí táke, kiyó ttu gabi zuban táke, aar kiyó ttu hé zuban bāñgi díbar táke. Hárr kessú zomát or torki lla ówar zorur. **27** Zodi gabi zubane hotá hoó, dui zone yáh bicí ttu bicí tin zone hoóuk; ítara ekzon ekzon gori hoóuk, aar ar ekzone híin bāñgidouk; **28** montor zodi bāñgidoya no táke, tooile yóggwa zomát ot nizám mári tákouk; aar nizor lloi edde Alla lloi hoóuk. **29** Héndilla, zetará nobi ísafe hotá hoó ítara dui zone yáh tin zone hoóuk, aar argúne híin tadarot gorí soóuk. **30** Montor zodi hére boói táikke de ézzon or hañse honó wahí

aiyé, tooile age lóti zee niki hoór yóggwa nizám óizoggoi. **31** Kiyólla-hoilé tuáñra beggúne ekzon ekzon gori Allar kalam boiyan gori faribá, zeéne beggúne cíke aar beggúne josba hásil goré. **32** Nobí ókkol or ruh toh nobi ókkol or kobzat éna táke. **33** Kiyólla-hoilé Alla toh cúkcak or Alla no, bólke cántir, zendilla niki pak bonda ókkol or tamám zomát ókkol ot asé. **34** Mayafuain ókkol zomát ot nizám mári tákouk; kiyólla-hoilé ítara matibár ezazot náí, bólke ítara fórmadar tákouk, zendilla Córíyote yó hoó. **35** Zodi ítara ttu kessú cíkito monehoó, tooile nizor-nizor hócom ottu gór ot máze fusár goróuk, kiyólla-hoilé mayafuain zomát ot maton toh córmor hotá. **36** Allar kalam ki foóila cúrut tuáñrar bútotu neeillé dé? Aar náki híin siríf tuáñrar hére foónicce dé? **37** Zodi honókiye nizoré nobi yáh ruúhani ola manúc bóuli táare, yóggwa ttu yíán mani lowa foribó de ki, añí tuáñrar hañse zín lekír híin Malik or hókum. **38** Montor zodi honókiye mani no loh, yóggwa re yó mani lowa no zaybo. **39** Hétolla, ó añr báiboináin ókkol, nobi ísafe Allar kalam boiyan gori bolla bicígori azzu goró, aar gabi zubane hotá no hoitó maná no goijjó. **40** Montor hárr kessú sóiyigori edde niyome-niyome gorár zorur.

15 Báiboináin ókkol, añí tuáñrar hañse ze kúchóbor tobolik goijjílám híyan yala tuáñra re zanaidír, ziyán tuáñra kobul goijjó aar ziyán ot tuáñra lagi asó. **2** Zodi tuáñra añí tuáñrar hañse tobolik goijjílám de kalam mozbut gori dóri asó de óile, tuáñra toh híyan or usílaye nejat foór, arnóile tuáñrar iman aná behar óigiyoi. **3** Kiyólla-hoilé añí tuáñrar hañse foóñsaiyi de óilde uúin zín añí faiyí de héntu bicí dorhari gún, ki hoilé, Mosih pak-kalam mozin añárar guná lla bóuli moijjíl, **4** íba re dohón gorá gíyl, aar pak-kalam or hotá mozin íba re tin díin ot díin zinda gorá gíyeh, **5** baade íba ye Kéfas ore dahádiye, tarfore baró zon sáhabi gún ore. **6** Yárbaade íba ye ekbar ot fañs cót or túaro bicí báiboináin dore dahádiye, zetarár bútotu kessú moot or gúm ot forigiyói de óile yo, lekin bicí zon aijjó basi asé. **7** Tarfore íba ye Yakub ore dahádiye, baade tamám sáhabi ókkol ore; **8** aar beggún or fisé, añí ézzon beñaimma zormor hañse yó íba ye dahádiye. **9** Kiyólla-hoilé sáhabi gún or bútotu añí óilam de ebbe niróc cwa; añré sáhabi hoibár úddwa laayek no, kiyólla-hoilé añí toh Allar zomát ore zulúm

goittám. **10** Montor yala añí ziyán óiyi híyan Allar rahámote óiyi deh; añr uore íba ye ze rahámot goijjé híyan behar ói nó zagoi; añí ítara beggún or túaro bicí meénnot goijjí, háleke añí goijjí de no, bólke añr uore Allar ze rahámot óiye híyane goijjé deh. **11** Híyan añí goijjí óuk yáh ítara goijjé, añára toh waán or baabute éna tobolik gorí, ziyán or uore tuánra iman ainnó. **12** Mosih re mora ttu zinda gorá gíyeh de híyan or toh tobolik gorá zah, tói tuánra hodúne keéngori hoó de, mora ókkol or háñcor náí? **13** Montor zodi mora ókkol or háñcor no táke, tóoile toh Mosih re yó zinda gorá nó zah. **14** Aar zodi Mosih re zinda gorá nó zah de óile, añárar tobolik toh behar aar tuánrar iman óu behar. **15** Híyan baade yo, añára Allar misá gobá tóoijji; kiyólla-hoilé añára Allar baabute gobá dí de ki, íba ye Mosih re zinda goijjé. Lekin mora ókkol ore zinda gorá zah de híyan zodi sóiyi no, tóoile toh íba ye Mosih re yó zinda nó goré. **16** Kiyólla-hoilé mora ókkol ore zinda gorá no zaylé, tóoile Mosih re yó toh zinda gorá nó zah. **17** Aar zodi Mosih re zinda gorá nó zah de óile, tóoile toh tuánrar iman behar; tuánra aijjó nizer gunár tole asó. **18** Héen óile, Mosihr bútoe ói zetará moot or gúm ot foijjé, ítara yó dónco óigiyoi. **19** Zodi añára Mosihr uore acá raikkí de siríf e zindigi lla de óile, tóoile toh manúc beggún or túaro añára bodnosíf ola. **20** Montor becók, Mosih re toh mora ttu zinda gorá gíyeh. Ziyáne fakka goré de, moot or gúm ot foijjé de ítara re yó zinda gorá zaybo. **21** Kiyólla-hoilé zendilla manúc or duara moot aiccé, héndilla Manúc or duara mora ókkol or háñcor óu aiccé. **22** Zendilla Adom or fuain ísafe beggún moijjé, héndilla uitará beggún ore yó zinda gorá zaybo zetará Mosihr ummot. **23** Lekin bari-bari mozin: ebbe age Mosih re gorá gíyeh, yárbaade Mosihr ummot ókkol ore gorá zaybo zeñtté íba aibó. **24** Yárbaade ahérot aibó; héñtte íba ye hárr hókumot, hárr adíkar, edde hárr taakot ore dónco gorífelai baade Alla Baf or át ot raijjo gosái dífelaibo. **25** Kiyólla-hoilé Mosih ttu otódin foijjonto hókumot gorár zorur, zetódin Alla ye íbar tamám duccon ókkol ore íbar foor tole gorí nó fele. **26** Ahéri duccon, ziyán ore fána gorífela zaybo híyan óilde moot. **27** Kiyólla-hoilé pak-kalam ot asé de, “Íba ye hárr kessú íbar tole gorídiye.” Montor íba ye, “hárr kessú,” íbar tole gorídiya gíyeh hoó de híyane sábut ó de, zibá ye hárr kessú Mosihr

tole gorídiye íba hére cámil náí. **28** Hárr kessú zettót íbar tole gorídiya gíyeh, tói Fua Nize yó Ubár tole óizayboi zibá ye hárr kessú íbar tole gorídiye, zeéne hárr kessút Alla hárr kessú ó. **29** Arnóile, zetará mora ókkol olla báptisma loh, ítara kii goríbo? Mora ókkol ore zodi zinda gorá no zaybo de óile, tóoile kiyá maincé ítara lla báptisma loh? **30** Aar añára yó kiyá hárr októót hótórat forat táki? **31** Báiyain, Mosih Ísá añárar Malik or hañse tuánra re lói añr ttu ze borái asé, añí híyan or hosóm hái hoóir, añí fottí din morizaygóí. **32** Ífisas ot añr ttu jonggoli januwar ókkol lói ze larái gorá foijjé, híyan zodi duniyaibi niyote goijjí de óile, tóoile añr kii fáida? Zodi mora ókkol ore zinda gorá no zaybo de óile, “Tóoile aiyó, añára háafiya gorí, kiyólla-hoilé hailla toh mori zaiyumbói.” **33** Fáki na háiyó. “Hóraf sáañti ye gom adot ókkol ore bigiríféle.” **34** Sóiyi úníc ot aiyó, aar guná gorá bon goró. Tuánrar bútoe endilla hodún manúc asé zetará Alla re no siné. E hotá hoóir de añí tuánra re córom dí bolla. **35** Óitofare honókiye endilla hoibó, “Mora ókkol ore keéngori zinda gorá zaybo? Ítara ttu hondilla jisím tákibo?” **36** Ó fool! Ze bis lagos yíba no moille toh sara no fúre. **37** Lagaité toh fore bonibó de sara lagos de no, bólke siríf bis éna, óitofare yíba giyuñr yáh oinno kessúr. **38** Montor Alla ye Nizer fosón mozin yíba re ekkán gaa dee. Íba ye fottí bis ore nizer-nizer zat mozin gaa dee. **39** Hárr jisím ek dóilla no, insán or jisím ek dóilla, januwar or jisím ek dóilla, faik or jisím ek dóilla, aar mas or jisím ek dóilla. **40** Héndilla, asmani jisím óu asé, aar duniyaibi jisím óu asé, montor asmani jisím or cáan ek dóilla, aar duniyaibi jisím or cáan ek dóilla. **41** Beil or cáan ek dóilla, san or cáan ek dóilla, tara ókkol or cáan ek dóilla, hoitó sailé, ek tarar cáan arek tarar cáan lói úddwa forók. **42** Mora ókkol or háñcor óu héndilla. Haiya merít diiya zah de toh fána ó de jisím ísafe, montor tulá zaybo de fána no ó de jisím ísafe. **43** Merít diibarcót híyan or honó kodor no táke, montor híyan ore tulá zaybo de izzot ot. Merít diibarcót híyan komzur, montor híyan ore tulá zaybo de taakot ot; **44** híyan ore merít diiya zah de insáni jisím ísafe, montor tulá zaybo de ruúhanir jisím ísafe. Zendilla insáni jisím asé, héndilla ruúhanir jisím óu asé. **45** Hétolla pak-kalam ot asé de, “Foóila manúc Adom zinda zandár óiaicce.” Aar ahéri Adom zindigi-dooya ruh óiaicce. **46** Age toh jisím ruúhanir gán aiccé

de no, bólte insáni gán aiccé deh, yárbaade ruúhanir gán. **47** Foóila manúc óilde meřir, yáni meři loi banaiya; dusára Manúc óilde asmani. **48** Manúc meři gwá zendilla, duniyair ítara yó héndilla; aar Manúc asmani wa zendilla, asmani ítara yó héndilla. **49** Zendilla añára meři gwar siyára-súrot faiyí, héndilla añára asmani war siyára-súrot óu faiyum. **50** Báiboináin ókkol, hoitám saáir de ki, jisím edde lou wé Allar raijjo miras fai no fare; héndilla, fána ó de híne fána no ó de híin miras fai no fare. **51** Fúno, añí tuánra re ekkán gufoni zanaidir, ki hoilé, añára beggún moot or gúm no zaiyum, lekin beggún bodoli zaiyumbói. **52** Híyan éhon or bútoe, suk or bailfata fíraibarcot, ahéri cíañ matar fúañti-fúañti óibo. Kiyólla-hoilé cíañ matilé muruda ókkol fána no ó de hálót ot urřizayboi, aar añára bodoli zaiyumbói. **53** Kiyólla-hoilé fána ó de haiya yían ot fána no ó de héndilla kessú findár zorur, aar e moroni haiya yían ot omoroni kessú findár zorur. **54** Montor zeñtté fána ó de haiya yían ot fána no ó de héndilla kessú findá zaybo, aar moroni haiya yían ot omoroni kessú findá zaybo, tói baade pak-kalam ot asé de e hotá fura óibo, “Moot ore ziti dónco gorífela gíyeh.” **55** “Ó moot, tor fóta horé? Ó moot, tor cúm horé?” (Hadēs g86) **56** Moot or cúm óilde guná, aar gunár bol óilde Córiyot. **57** Montor Allar cúkur óuk, zibá ye níki añárar Malik Isá Mosihr duara añára re fóta dan goijjé. **58** Hétolla, ó añr adorja báiboináin ókkol, mozbut ó aar tórok dóri táko. Malik or ham hámica bicígori goró, kiyólla-hoilé tuánra toh zano, Malik or hañse tuánrar meénnot befózul no.

16 Yala Allar pak bonda ókkol olla sañda tulár baabute hoitó sailé: tuánra undilla goró zendilla añí Galatíyar zomát ókkol ore hókum dílam. **2** Fottí háftar cúrur din, fottíkiye nizor-nizor amodoni mozin kessú řiañ alok gorí zoma rakíyo, zeéne añí ailé sañda tulá no fore. **3** Añí héře ailé, tuánra zetará re basíloiba ítara at ot ceñří dii ítara re tuánrar hádiya ókkol Jerúsalem ot foónsaito difeřáiyum. **4** Aar zodi añr ttu yó zaa fore, ítara añr fúañti zaibo. **5** Añí tuánrar héře Makedóniya báy sofór gorí baade aiccún, kiyólla-hoilé añí Makedóniya báy sofór goijjúm. **6** Óitofare añí tuánrar fúañti hooddin tákiyum, yáh fura cítkhal úddwa haraiyúm, zeéne añí zeře zaiyum hé sofór ot tuánra añré rowana gorídi faro. **7** Añí ehón zaibar fořt

ot tuánra llói milto no saáir, kiyólla-hoilé añí tuánrar fúañti kessú řaim harai bolla acá gorír, zodi Malik ezazot deh. **8** Montor añí Ífisas ot Penřikos Id foijjonto tákiyum, **9** kiyólla-hoilé cár ó de ham gorí bolla añr lla ekkán bódđa doroza kúille, aar muhálef-goróya ókkol óu bicí asé. **10** Zodi Timóti aiyé, saiyo, yóggwa tuánrar fúañti honó đoor sára táki fare fán, kiyólla-hoilé añr dóilla yóggwa ye yó Malik or ham éna gorér. **11** Hétolla honókiye yóggwa re hékarot no goijjó, bólte cántir saánte sofór ot rowana gorídiyo, zeéne yóggwa añr hañse aái fare, kiyólla-hoilé yóggwa imandár báiyain dor fúañti aibó bóuli acá gorír. **12** Yala añárar báí Apólos or baabute hoitó sailé: añí yóggwa re imandár báiyain dor fúañti tuánrar héře ai bolla bicígori aros goijjé, montor yóggwa ttu ehón aibár honó mon náí; one moouka faile aibó. **13** Úñciyar ó; iman ot dorógori táko; hímmot rakó; mozbut ó. **14** Tuánra ziín goró híin beggún muhábbot or saánte goró. **15** Tuánra toh zano, Eřtefánas or gór řiya óilde Akaya elakar foóila imandár, aar ítara Allar pak bonda ókkol or hédmot ot nizoré gosáidiye. Báiboináin ókkol, añí tuánra re bicígori aros gorír, **16** tuánra yó nizoré ítarař dóilla maincór hañse gosáido; héndilla, zetó zon hé ham ot edde meénnot ot córik asé, ítarař hañse yó gosáido. **17** Añí bicí kúci óyi, Eřtefánas, Fortúnatus, edde Akayikus aiccé de hétolla, kiyólla-hoilé tuánrar torfóttu ziyán una accíl híyan ítara fura goijjé. **18** Ítara añr edde tuánrar ruh re fořfořtta goijjé. Hétolla, héndilla maincóre kodor goríyo. **19** Ecíya elakar zomát ókkole tuánra re sólám zanař. Ekúila edde Prisla ye yó tuánra re Malik or name dil ottu sólám zanař; héndilla, ítarař gór ot zoma ó de zomáte yó zanař. **20** Tamám imandár báiboináin ókkole yó tuánra re sólám zanař. Tuánra ezzon ore ezzone pak dile appá dí sólám zano. **21** E sólám mwa añí Pául nizor át or leká. **22** Zee niki Malik ore muhábbot no goré, ítara uore gozzob forouk. Ó añárar Malik, aiyó. **23** Malik Isár rahámot tuánrar uore zari tákouk. **24** Mosiř Isár bútoe añr muhábbot tuánra beggún or fúañti zari tákouk. Aamin.

2 Kórintiól

1 Añí Pául, zibá Allar moncá mozin Mosih Isár ézzon sáhabi. Añárár báí Timóti yó añr fúañti asé. Kórin cóor ot Allar ze zomát asé, yíbar hañse edde Akaya elakar agagurat asé de pak bonda beggún or hañse lekír. **2** Tuáñrar uore añárár Baf Allar edde Malik Isá Mosihr torfóttu rahámot edde cánti nazil óuk. **3** Añárár Malik Isá Mosihr Alla edde Baf or taarif óuk, zibá rahám or Baf edde hárr dóilla tosóllir Alla. **4** Íba ye añára re añárár hárr duk-mosibot ot tosólli déh, zeéne añára yó Allar torfóttu faiyí de hé tosólli lói uitará re tosólli dí fari zetará ze honó duk-mosibot ot asé. **5** Kiyólla-hoilé zendilla Mosihr duk añárár uore bicí, héndilla añárár tosólli yó toh Mosihr duara bicí. **6** Zeñtté añára duk-mosibot ot fori, añára tuáñrar tosólli edde nejat olla fori deh. Zeñtté añára tosólli fai, añára tuáñrar tosólli lla fai deh, zííne sobór or sáañte duk uúin bordac gorí bolla modot goré zíín añára yó bordac gorír. **7** Tuáñrar baabute añárár acá mozbut, kiyólla-hoilé añára zani de, zendilla tuáñra añárár duk ókkol ot córik asó, héndilla tuáñra añárár tosóllit óu asó. **8** Báiboináin ókkol, añára no saái, tuáñra Eciya elakat añárár uore óiye de duk-mosibot ókkol or baabute ozana táko. Añárár uore ettór ñoóñr sab foijjíl ziyán bordac or baáre óigilgoi, aar añára zane basi tákar acá úddwa háraifelailam. **9** Becók, añára táaijijilam de, añárár uore moot or hókum óigiyoi. Montor héndilla etollá óiye, zeéne añára nizor uore no bólke mora re zinda goré de hé Allar uore bóraca rakí. **10** Íba ye añára re héttor ñoóñr mooti docá ttu basaiyé, aar basaijó yó. Íbar uore añárár e acá raikkí de, íba ye añára re basat tákibo. **11** Tuáñra yó toh añára re dua loi modot goró, zeéne boóut zon or duar usflaye añára faiyí de niyamot olla boóut zon or duara añárár bodol Allar cúkuriya adai ó. **12** Añárár borái óilde yíán ziyán níki añárár hélome yó gobá déh, ki hoilé, añára duniyait mazé paki edde dindárir ehélase zindigi haraiyí, háasgori tuáñrar dormiyan ot. Añára héndilla goijjí de hóno duniyaibi giyane no, bólke Allar rahámote. **13** Kiyólla-hoilé tuáñra zíín forí faro edde buzí faro, yár baáre añára tuáñrar hañse kessú no lekír. Añí acá gorír, tuáñra ahéri foijjonto buzíba, **14** zodi yala añára hoóir de híin beggún no buzíle yo.

Kiyólla-hoilé beggún buzíle, añárár Malik Isá aibár din ot añára óiyum de tuáñrar borái, zendilla tuáñra añárár borái óiba. **15** Híyan or ekine añí erada goijjí de, age tuáñrar hére ai bolla, zeéne tuáñra dui gun aiborhot foo; **16** yáni, Makedóniyat zaite tuáñrar hére góli bolla aar Makedóniya ttu aité yó tuáñrar hére góli bolla, baade tuáñra añré Yohúdiyat zaibar sofór ot rowana gorídiba. **17** Héndilla erada goróne kí añí tooñcá gorír bouli sábut ó? Añí kí duniyaibi manúc or dóilla niyot goijjí fán óiye, zetará ekbar ói ói bouli hoó arekbar no no bouli hoó? **18** Montor Alla zendilla biccácdar, yíán óu héndilla de ki, tuáñrar hañse añárár hotá ekbar “ói” edde arekbar “no” lói no. **19** Kiyólla-hoilé Allar Fua Isá Mosih, zibár baabute añára, yáni añí, Sílwanus edde Timóti ye tuáñrar hañse tobolik goijjílám, íbar bútoe toh “ói” edde “no” duniyan nu accíl, bólke íbar bútoe “ói” hoilé hámica ói. **20** Allar tamám waada ókkol íbar bútoe “ói.” Hétolla íbar usflaye añára “Aamin” hoói, zeéne Allar taarif ó. **21** Zibá ye añára re edde tuáñra re Mosihr bútoe mozbut goré edde añára re basíloiyé íba óilde Alla. **22** Íba ye añárár uore Nizor moór lagaidiye, edde boona ísafe añárár dil ot Pak-Ruh diiyé. **23** Montor añí Alla re gobá gorí añr zindigir hosóm hái hoóir, añí Kórin ot abar nú aiyí de tuáñra re basai rakí bolla. **24** Añára tuáñrar iman or uore hókumot solair de no, bólke tuáñrar fúañti tuáñrar kúci lla ham gorír deh; kiyólla-hoilé tuáñra toh imane mozbut gori tíyaiya asó.

2 Hétolla añré añí fáisela goijjí de, añí tuáñrar dil ot duk di bolla tuáñrar hére ar nu aiccúm. **2** Kiyólla-hoilé zodi añí tuáñrar dil ot duk dih, tooile tuáñra zetarár dil ot añí duk diyí, tuáñra bade añré kúci goróya ar hon asé? **3** Añí tuáñrar hañse hotá híin leikkílám de kiyólla hoilé, zeéne añí ailé, zetará añré kúci goríbar hotá, ítara añré dil ot duk no deh; añr ttu tuáñra beggún or uore yíán ekin asé de, ziyán añr kúci, híyan tuáñra beggún or óu kúci. **4** Kiyólla-hoilé añí tuáñrar hañse leikkílám de ñoóñr mosibot or hálot ot edde dil or ferecaniye boóut suk or faní bácai-bácai; tuáñrar dil ot duk di bolla no, bólke tuáñra zen añr ttu tuáñra lla ze háas muhábbot asé híyan zani faro. **5** Montor zodi honókiye dil ot duk di táke, tooile toh íte siríf añr dil ot duk diyé de no, bólke—bicí horagori no hoiyúm hoilé—kessú bák tuáñra beggún ore

yó diyé. **6** Héndilla manúc ore bicí zone ze sánza díyo de híyan ítar ulla kafi. **7** Yárbodol yala tuáñra ttu ítare maf gorídiyar edde tosólí díyar zorur, zeéne íte bicí dukké hòñri no zagói. **8** Hétolla, añí tuáñra re bicí aros gorír, tuáñra ítare muhábbot goró de híyan sábut gorí dahó. **9** Añí tuáñrar hañse etollá yó leikkílam, zeéne añí tuáñra hárr kessút fórmadar asó né entán gorí saái fari. **10** Tuáñra zaré maf gorído, añí yó ítare maf gorídi. Kiyólla-hoilé becók, añí zín maf gorídiyi, zodi maf gorídiyar kessú accíl de óile, añí híin Mosihr cáikkat tuáñrar wasté maf goijjí deh; **11** zeéne Cóitane añára ttu honó fáidai tulí no fare, kiyólla-hoilé añára toh ítar sail or baabute ozana no. **12** Zeñtté añí Mosihr kúchóbor tobolik goittó Toras ot gíflam, Malike añr ulla ekkán duwar kúillil. **13** Toóu añr mon ot cánti nu accíl, kiyólla-hoilé añí añr báí Titus ore hére loot nó fai. Hétolla añí ítara ttu bidai loi Makedóniyat gíflamboi. **14** Montor Allar cúkur óuk, zibá ye añára re Mosihr usílaye zitai hámica fisé-fisé loiza, aar añárar duara Mosihr baabute zankari hárr zagat kúcho fóla fán fóla. **15** Kiyólla-hoilé Allar nozor ot añára toh nejat foya edde hálak óoya ókkol olla Mosihr kúcho. **16** Ek gún or hañse añára moot ané de kúcho, arek gún or hañse zindigi ané de kúcho. Tóoile ham híin goríbar laayek hon? **17** Boóut zon zetará Allar kalam loi códori goré, añára toh ítarar dóilla no; bólke Alla ye zettót añára re diferáiyé, añára híin Mosihr bútoe Allar cáikkat ehélase hoói.

3 Hotá híin hoói kí añára abar nizor nam gorát doijji dé? Aar náki hodún maincór dóilla añára ttu cúwaricnamar ceñrí ókkol tuáñra re diibar yáh tuáñra ttu loibar zorurot óiye dé? **2** Añárar ceñrí toh tuáñra, ziyán añárar dil ot leikká asé, ziyán ore tamám maincé zane edde foré. **3** Yían sáf zahér de ki, tuáñra óilade Mosihr ceñrí, ziyán íba ye añárar hédmot or duara leikké. Híyan ore leká gíyeh de cíyai lói no bólke zinda Allar Ruh lói, fattór or faṭ ot no bólke insán or faṭ ot, yáni dil ot. **4** Héndilla de híyan añára ttu Mosihr usílaye Allar uore ekin asé. **5** Añárar bútoe endilla honó toóufik asé de héen no, ziyán lói añára nizebaze kessú goijjí hoói dabi gorí faijjum; añárar toóufik óilde Allar torfóttu, **6** zibá ye añára re noya razinamar háadem óibar toóufik diiyé, ziyán lekár no bólke Ruhr. Kiyólla-hoilé leká ye ané de moot,

montor Ruh ye dee de zibon. **7** Moot ainné de razinama ziyán or hórof ókkol fattór ot kúndi yore leká gíyl, híyan or hédmotdari zettót eén tozollir sáañte aiccé zeén níki Boni Isráil ókkole Muúsar siyárar uzu lagatar saái táki nó fare, kiyólla-hoilé íbar siyárat tozollí accíl, ziyán asté-asté homi zat accíl, **8** tói Ruhr hédmotdari aró hotó tozollir sáañte óibo fánillar! **9** Kiyólla-hoilé hosúrbon tóora de razinamar hédmotdarit tozollí tákile, Allar nozor ot forhésgar tóora de razinamar hédmotdarit toh tozollí aró boóut bicí tákibo. **10** Becók hé súrote toh ziyán tozollí ola accíl híyan ot doónr tozollir zoriya tozollí náí fán óigiyoi. **11** Kiyólla-hoilé ziyán hótom óizagoi híyan tozollí ola de óile, ziyán ṭiki táke híyan toh aró boóut bicí tozollí ola óibo. **12** Añára ttu héndilla acá asé de hétolla, añára boiyan goitté hímmot or sáañte gorí. **13** Añára Muúsar dóilla no, zibá ye nizor siyárat ekkán foroda dito de zeéne ziyán hótom óizargoi híyan or fúranti re Boni Isráil ókkole dekí no fare. **14** Lekin ítarar dil doró accíl. Ítara furana razinama re telawot goróne aij foijjonto ítarar dil ot hé foroda táigiyoi, kiyólla-hoilé híyan toh Mosihr ummot óile éna dur gorífela zah. **15** Aij foijjonto zeñtté-zeñtté ítara Muúsar Córiyot telawot goré, ítarar dil ore foroda ekkáne gúri raké. **16** Lekin zeñtté honókiye Malik or uzu fíre, héñtte hé foroda dur gorífela zah. **17** Hé Malik óilde Ruh; zeré Malik or Ruh asé, hére azadi asé. **18** Montor añára zetará beggúne beforoda siyára lói Malik or tozollí re ainat dekir fángori dekir, añára hé Malik zibá Ruh íbar usílaye zetó éto tozollíwala boni íbar súrot ot bodolizairgoi.

4 Hétolla, añárar uore zettót eén rahám óiye zeén níki e hédmotdari faiyí, añára hímmot na hárai. **2** Bólke córmor ham zín lukaiya accíl híin añára inkar gorídiyi; añára no férokbaizi gorí soli aar no Allar kalam bigirífelai, bólke sóiyi re kúlamelar sáañte zahér gorí Allar cáikkat fottí maincór hélom ot añára cúnam zurai. **3** Aar zodi añárar kúchóbor foroda diya de óile yo, híyan foroda diya de uitarár hañse zetará dóncó óizargoi. **4** Hé gairimandár ítarar zehén ore e jáhan or kúda ye añá banaifélaiye, zeéne ítara Mosihr mohímar kúchóbor or nur dekí no fare, ze Mosih óilde Allar súrot. (aiñ g165)

5 Kiyólla-hoilé añára toh nizor baabute no bólke Mosih Isár baabute éna tobolik gorí; ki hoilé, íba óilde Malik, aar Isár wasté añára óilam de

tuáñnar gulam. **6** Kiyólla-hoilé ze Alla ye hoiyé de, “Andár ottu foór zolouk,” íba óilde Ubá zibá níki añárar dil ot soimké, añára re Allar oh tozollir zankari di bolla ze tozolli Isá Mosihr siyárat somke. **7** Montor añára ttu hé dón híyan meit̃ta fatilat asé fán asé, zeéne hé ðoóñr kudurut añárar nizor torfóttu no bólke Allar torfóttu de híyan dahá zah. **8** Añárar uore hárr mikká ttu sab fore, montor hōñri no zaygó; añára buddí háraiya ói, montor acá hárai no ói; **9** añára zulúm hái, montor Alla hámica fúañti asé; añára re meñit aansáre, montor dónco ói no zaygó. **10** Añára nitti añárar jisím ot góri Isár moot boói loizai, zeéne añárar jisím or bútoze Isár zindigi yó zahér ó. **11** Kiyólla-hoilé añára zetará basi así, añára re toh Isár wasté moot or át ot hámica tulídiya zar, zeéne añárar fána ó de jisím or bútoze Isár zindigi yó zahér ó. **12** Hé súrot or uore, añárar bútoze ham gorér de óilde moote, montor tuáñnar bútoze zindigi ye. **13** Pak-kalam ot endilla asé, “Añí iman ainní de hétolla hoiyí déh.” Añára ttu zettót iman or hé ekí ruh asé, añára yó iman ainní de hétolla hoói deh. **14** Kiyólla-hoilé añára zani, zibá ye Malik Isá re zinda goijjé íba ye añára re yó Isár fúañti zinda goríbo, aar añára re tuáñnar fúañti íbar muúntu házir goríbo. **15** Kiyólla-hoilé híin beggún toh tuáñnar wasté éna ór, zeéne ze rahámot bicí-bicí maincór hañse fóler híyan or zoriya Allar becábici cúkuriya adai ó, zeéne íbar mohíma ó. **16** Hétolla, añára hímmot na hárai. Añárar baár or haiya nac óizargoi de óile yo, añárar ruúhani dinbodin noya ówat asé. **17** Kiyólla-hoilé añárar e hooddinna cóñro mosibote añára lla ettór ðoóñr ofúrani tozolli toiyar gorér, ziyán ore honó kessú lói mafa no zah. (aiōnios g166) **18** Hétolla, añára deki fara zah de híin or uzu no, bólke deki fara no zah de híin or uzu beh nozor di; kiyólla-hoilé deki fara zah de híin toh tooitta, montor deki fara no zah de híin ofúrani. (aiōnios g166)

5 Kiyólla-hoilé añára toh zani, zodi añára táki de e duniyaibi ɓambu, yáni haiya dónco óizargoi, añára ttu asman ot endilla ekkán billíng gór asé ziyán Allar torfóttu, híyan át or banaiya no bólke abadulabadi. (aiōnios g166) **2** Becók, e ɓambut táki añára ðoóñr niyác félai-félai asmani gór híyan ore hoor fiindé fángori fiindí bolla bicí azzu gorír, **3** kiyólla-hoilé zeñtté añára híyan ore fiindífelaiyum, añára re biyossor faa no zaybo. **4**

Becók, añára zetará e ɓambut así, añára fuñzár bóre ðoóñr-ðoóñr niyác félair, kiyólla-hoilé añára ttu afindá no bólke findá óito monehoór, zeéne fána ó de híyan ore zindigi ye giliféle. **5** Añára re hé moksót olla toiyar Alla ye goijjé deh, zibá ye añára re boona ísafe Ruh diiyé. **6** Hétolla añára hámica hímmot rakí aar zani de, zetókkal añára e insáni haiya loi así, añára Malik or hére házir ná; **7** kiyólla-hoilé añára toh solafíra iman or sáañte gorí deh, suké deki no. **8** Ói, añára ttu hímmot asé, aar añára e haiya ttu alok ói Malik or fúañti gór ot ówa aró fosón gorí. **9** Hétolla añára e haiyar gór ot así yáh ná, añárar monzil-moksót óilde íba re kúci gorón. **10** Kiyólla-hoilé añára beggún ottu toh Mosihr adaloti toktór muúntu háamaha házir ówa foríbo, zeéne haiya loi tákite zee zendilla ham goijjé hé mozin fottíkiye bodola fai, ham híin gom óuk yáh hóraf. **11** Hétolla, Malik or ɗoor kii de híyan zani añára manúc ókkol ore boñai aníbar kucí gorí. Alla ye toh añára re siné; añí acá gorí, tuáñnar hélome yó añára re siné. **12** Añára tuáñnar hañse abar añárar nam gorír de no, bólke añára re lói borái gorí bolla tuáñra re ekkán moouka diir deh, zeéne tuáñra ttu uitará lla zuwab táke zetará dil or gún lói no bólke deki fara zah de híin lói borái goré. **13** Kiyólla-hoilé zodi añára bekuf de óile, híyan toh Allar wasté éna; aar zodi añárar demak ɓík de óile, híyan toh tuáñnar wasté éna. **14** Hotá óilde, añára re Mosihr muhábbote mojbur goré, kiyólla-hoilé añára buijjé de, ekzon beggún olla moijjé rá beggún morigiyói. **15** Íba beggún olla etollá moijjíl, zeéne zetará basi asé itara ar nizor lla basi no táke, bólke Ubá lla táke zibá ítarar bodol moijjíl aar abar zinda óiye. **16** Hétolla, ehón ottu lóti añára honókiyo re insáni buzá lói no buijjúm. Añára Mosih re insáni buzá lói buzítam de óile yo, yala añára íba re ar héndilla góri no buzí. **17** Hé ísafe, zee niki Mosihr bútoze asé, íte ézzon noya mohóluk óigiyoi; furana gún zaigói hárr kessú noya óiaice. **18** Híin beggún Allar torfóttu beh ó, zibá ye Mosihr duara añára re Nizor loi bonot gorífelaiye, aar añára re hé bonot or hédmotdari diiyé. **19** Hoitó sailé, Alla Mosihr bútoze ói duniyair maincóre Nizor loi bonot gorífelaiye; íba ye ítarar guná-háta ítarar ulɗa nó dóre. Aar íba ye hé bonot or hóbor zanaibár zimmadari añára re gosáidiye. **20** Hétolla añára óilam de Mosihr nomainda ókkol, zeén níki Alla ye añárar duara manúc

ókkol ore becábíci aros gorér. Añára Mosihr torfóttu ói yore tuáñra re fóriyat gorí de, “Alla lloi bonizogói.” 21 Kiyólla-hoilé Alla ye toh añárar bodol Ubá re gunár zagat tíyagaraiye Zibá beguná accíl, zeéne añára Íbar bútoire ói Allar forhéggarir bági óizaygoi.

6 Añára Allar sáañti ham-goróya ísafe tuáñra re aros gorír, tuáñra Allar ze rahámot faiyó, híyan ore befózul óito no diyó. 2 Kiyólla-hoilé Íba ye fórmár de, “Kobul gorá zah de októ Añí tor hotá fúinni, aar nejat or din ot Añí toré modot goijjí.” Fúno, yala óilde kobul gorá zah de októ, aijja óilde nejat or din. 3 Añára honókiyo re ʔokkor na hábai, zeéne añárar hédmotdarir bodnam no. 4 Bólke añára Allar háadem de híyan hárr kessút zahér gorí, hoitó sailé, bicí sobór ot, duk-mosibot ot, mockil ot, ferecanit, 5 fíra hát, ziyól harat, hánggamat, meénnot ot, urgúmat, waáccat, 6 pak-sáf ot, giyan ot, bordac ot, meérbanit, Pak-Ruht, háʔi muhábbot ot, 7 sóiyi kalam loi, Allar kudurut loi, den át ot edde ban át ot forhéggarir átiyar ókkol lói, 8 izzot edde beizzot ówa lói, aar bodnam edde taarif faa loi. Añára sóiyi de óile yo maincé añára re dúkabaz ʔáare; 9 añára re beggúne sínile yo no siné fán goré; añára morigiýigoi fán de óile yo, háleke añára zinda. Maincé añára re sáñza déh, montor aijjó zane mari nó fele. 10 Añára ferecanit así fán de óile yo añára hámica kúci así; añára re saité gorif, háleke añára boóut zon ore tuangor banair; añára ttu kessú náí fán, montor añára ttu hárr kessú asé. 11 Ó Kórintiól, añára tuáñrar hañse kúlamela góri hotá hoiyí, aar tuáñra lla añárar dil ebbe kúlahala. 12 Añára tuáñra lla añárar dil bon gorí raikkí de no, tuáñra éna tuáñrar dil añára ttu bon gorí raikkó. 13 Ehón ań tuáñra re ańr fuain ísafe hoóir, bodolat mazé tuáñra yó añára lla tuáñrar dil kúlido. 14 Gairimandár ókkol or fúańti ek zuań ot no óiyó. Kiyólla-hoilé forhéggarí lói bedini loi kii bazá asé? Andár lói foór lói kii hátíl asé? 15 Mosih ttu Belial loi kii bonot asé? Imandár ottu gairimandár lói kii bazá asé? 16 Allar gór ot máze muttir kii zaga asé? Kiyólla-hoilé zinda Allar gór toh añára éna; zendilla Alla ye fórmaye, ki hoilé, “Ańí ítarar bútoire tákiyum edde ítarar bútoire solafíra goríyum. Ańí ítarar Alla óiyum, aar ítara Ańr bonda óibo.” 17 Hétolla bouli Mabude fórmár de, “Tuáñra ítarar bútotu neeliaiyó,

ítara ttu aladá óizogoi. Honó nafak jiníc no dóijjo, tói Ańí tuáñra re kobul goijjúm. 18 Ańí tuáñrar Baf óiyum, aar tuáñra Ańr futziýain óiba, hoóir hárr Kudurutwala Kúda ye.”

7 Ó adorja ókkol, añára llói zettót hé waada ókkol gorá gýieh, hétolla aiyó, añára jisím or edde ruhr hárr nafaki ttu nizoré pak-sáf gorí, aar héndilla góri Allar ʔoor rakí furafuri pak boni. 2 Añára re tuáñrar dil ot zaga doo. Añára toh no honókiyo re nainsáfí goijjí, no honókiyo re bigirífélaíyi, aar no honókiyo ttu fáida tuillí. 3 Ańí tuáñra re hosúr dí bolla iín hoóir de no. Ańí toh tuáñra re age lóti hoiyí, ki hoilé, tuáñra lla añárar dil ot eén zaga asé, moille beggún fúańti moijjum, basilé beggún fúańti basí táikkum. 4 Ańr ttu tuáñrar uore ʔoóńr ekin asé; tuáñra re lói ańí bicí borái gorí fari. Ańí tosólliye furaiya óiyi; añárar tamám mosibot ot ańr ttu bicí hoilé bicí kúci táke. 5 Añára toh Makedóniyat aái úddwa añárar gaa ye honó cúk nó faa, bólke añára hárr mikká ttu mosibot ot accílam: baáre accíl hoijja-fózzat, bútoire accíl ʔoor. 6 Montor Alla, zibá ye mon cóńro goré de ítara re tosólli déh, íba ye Titus or aá lói añára re tosólli díye; 7 sirif yóggwar aá lói no, bólke yóggwa re tuáñra ze tosólli díyo híin lói yó. Yóggwa ye añára re zanaiyé de, tuáñra ańré saitó bicí azzu gorór, aar ańr lla hańdahari edde sintabáfani gorór; híine ańí aró bicí kúci óiyi. 8 Ańí ańr ceńrí lói tuáñra re dil ot duk diyí de óile yo, ańí afsús na hái zodi yaar age afsús háilam de óile yo. Kiyólla-hoilé ańí dekir de, ceńrí híyane tuáñra re duk dilé yo sirif essát olla diyé deh. 9 Yala ańí kúci de tuáñra re duk diyí de hétolla no, bólke etollá kiyólla-hoilé tuáñrar hé duke tuáñra re touwár uzu loigiyé. Kiyólla-hoilé tuáñra re duk diya giyéh de toh Allar moncá mozin éna, zeéne añárar zoriya tuáñrar honó hótí no. 10 Allar moncá mozin aiyé de duk-ferecani ye endilla touwá foida goré ziyáne nejat or uzu loiza, aar híyan ot afsús háibar kessú náí; montor duniyaibi duk-ferecani ye moot foida goré deh. 11 Tuáñra nize soó, Allar díiya hé duk-ferecani ye tuáñrar bútoire kii-kii foida goijjé: hotó azzu, nizor sófai díbar hotó josba, gollot hórkot ókkol or uore hotó guccá, hotó ʔoor, hotó tomonna, hotó jus, edde gollot ham ókkol or sáñza dí bolla hotó toiyar. Tuáñra hárr mikká ttu sábut gorí daháyo de, hé mutalek tuáñra behosúr. 12 Ańí ceńrí híyan

tuáñrar hañse lekíle yo, híyan no zibá ye gollot goijjé yóggwar wasté aar no zibár uore gollot óiye yóggwar wasté, bólke etollá, zeéne tuáñra ttu añára lla ze ñan asé híyan Allar muúntu tuáñrar hañse zahér óizagoi. **13** Añára tosólíi hétolla faiyí deh. Añára tosólíi faiyí de híyan baade yo, Titus or kúciye añára aró bicí kúci óiyi, kiyólla-hoilé tuáñra beggún or torfóttu yóggwar ruh fotfoíttá óigiyoi. **14** Yóggwar hañse añi tuáñrar baabute borái goijjílám, aar híyan ot añr ttu córminda ówa nó fore. Bólke zendilla tuáñrar hañse añára hárr kessú sóiyi-sóiyi boiyan goijjí, héndilla Titus or muúntu añára ze borái goijjí híyan óu sóiyi sábut óiye. **15** Tuáñra beggúne yóggwa re keéngori ðoore edde hafi-hafi estekbal gorí yore yóggwar hotá mainnía, híyan zeñtté yóggwa ttu monot uré, heñtte yóggwa ttu tuáñra lla ador aró bicí barízagoi. **16** Añi bicí kúci, kiyólla-hoilé hárr kessút añi tuáñra re bóraca gorí fari.

8 Ó báiboináin ókkol, añára yala tuáñra re Allar oh rahámot or baabute zanair ziyán Makedóniyat asé de zomát ókkol or uore gorá gíyeh, **2** ki hoilé, ítara re duk-mosibot or duara ðoóñr entán gorá zar de októtt, ítara eén bicí kúci accíí, zeén níki ítara bicí gorí de úddwa dílkúla góri sótká ókkol goijjíl. **3** Añi yíán gobá dí faijyum de ki, ítara zedún faijje hédun dííí, hoitó sailé, fare de yár túaro bicí dííí, monehoói yore. **4** Ítara añára re bicí hoilé bicí aros goijjé de, Allar pak bonda ókkol ore modot gorár rahámot ot ítara re yó cámil rakí bolla. **5** Ítara siríf añára acá goijjí de yár túaro bici diiyé de no, bólke age ítara nizoré Malik or hañse gosáidiye, baade Allar moncá mozin nizoré añárar hañse yó gosáidiye. **6** Hétolla añára Titus ore bicí aros goijjí de ki, zendilla yóggwa ye tuáñrar bútoore sótká tulár ham cúru goijjé, héndilla híyan hótom óu gorí bolla. **7** Zendilla tuáñra hárr kessút máze, yáni iman ot, hotá battarat, zankarít, fura josbat, edde tuáñra ttu añára lla asé de muhábbot ot uttom óyo, héndilla tuáñra e sótká diiyar ham ot óu uttom ói bolla saiyo. **8** Añi yíán tuáñra re hókum gorír de no, bólke oinno kiyór josba loi tuáñrar muhábbot or ehélasi re entán gorír deh. **9** Kiyólla-hoilé tuáñra toh zano, añárar Malik Isá Mosih ye tuáñrar uore hotó rahámot goijjé, ki hoilé, íba tuangor de óile yo tuáñrar wasté gorí boinné, zeéne íbar gorífiye tuáñra tuangor

óizogoi. **10** Hé mosólar uore añr rai dir ziyáne tuáñra re fáida goríbo. Gelde bosór tuáñra siríf sótká diiyat foóila gún accíla de no bólke diito monehowát óu. **11** Yala hé ham hótom gorífele, zeéne zendilla tuáñra hé ham gorí bolla kúcir sáañte niyot goijjíla, héndilla tuáñrar toóufík mozin híyan zen hótom óu óizagoi. **12** Zodi diibar mon táke, Alla ye manúc íbar sótká re íba ttu asé de hé mozin kobul goré, náí de hé mozin no. **13** Añr kíyal eén no de ki, oinno kiyé cúk fouk aar tuáñra duk foo, bólke beggún or hálót zen borabor ó. **14** Yala zettót tuáñra ttu bicí asé, híin lói ítara zorurot ókkol fura óizayboi; aar fore ítara ttu bicí tákile, híin lói tuáñrar zorurot ókkol óu fura óizayboi. Héndilla góri beggún or hálót borabor óizayboi. **15** Zendilla pak-kalam ot asé, “Zee níki bicí zoma goijjíl ítara ttu bicí ói nó zagoi, aar zee níki hom zoma goijjíl íte yó honó homit nó fore.” **16** Allar cúkur óuk, zibá ye Titus or díí ot oh kíyal foida goijjé ziyán añr ttu tuáñra lla asé. **17** Kiyólla-hoilé yóggwa ye siríf añárar aros ore kobul goijjé de no, bólke nizebaze fáisela gorí bicí jus or sáañte tuáñrar hére aiyér. **18** Añára yóggwar fúañti báí ubá re yó díferáir, zibá re kúchóbor or ham olla bouli tamám zomát ókkole taaríf goré. **19** Siríf híyan no, bólke íba re zomát ókkole añára e sótká gún loizair de hére fúañti zai bolla basíloiye, ziyán or entezam añára etollá goijjí, zeéne Malik Nizor mohíma ó, aar añára modot goittó toiyar de híyan zahér ó. **20** Añára ham híyan héndilla góri solai loizair de kiyólla-hoilé, zeéne hé bicí sótká gún or mutalek honókiyo ttu añára re hosúr díbar no táke, **21** kiyólla-hoilé añárar niyot toh uúin gorón zín siríf Malik or nozor ot no, bólke maincór nozor ot óu sóiyi. **22** Ítarar fúañti añárar báí ubá re yó díferáir zibá re añára boóut bar boóut kessút dáf asé de loot faiyí. Yala íbar dáf aró bicí barígíyoi, kiyólla-hoilé íba ttu tuáñrar uore ðoóñr bóraca asé. **23** Titus or baabute hoitó sailé, yóggwa óilde añr sáañti aar añr fúañti tuáñra lla ham-goróya. Aar báiyain nún or baabute hoitó sailé, ítara óilde zomát ókkol or nomainda ókkol, zetarár usflaye Mosihr mohíma ó. **24** Hétolla hoóir, tuáñrar muhábbot or sábut edde tuáñrar baabute añára kiyólla borái gorí de híyan ítara re zomát ókkol or muúntu kúlamela góri daháyo.

9 Allar pak bonda ókkol olla soler de hé hédmotdarir baabute toh añr ttu tuáñrar

hañse lekíbar zorur náí. **2** Kiyólla-hoilé ańı zani, tuáńıra ttu modot goríbar mon asé, ziyán ore lói ańı tuáńrar baabute Makedóniol or hañse eén hoói borái gorí de ki, Akayar manúc ókkole dii bolla gel de bosór lóti toiyar ói táikke, aar tuáńrar josbaye ítara bicí zon ore josba diyé. **3** Lekin ańı hé báiyain nún ore etollá difeřáir, zeéne híyan or mutalek ańára tuáńıra re lói gorí de borái misá no tóore, bólke ańı hoiyí de héndilla tuáńıra toiyar ói táko. **4** Arnóile ańr fúańti Makedóniyar honó manúc aái zodi tuáńıra re toiyar loot no faa, héńtte tuáńrar hotá ero, tuáńrar uore héddur bóraca goróne ańára úddwa córom faiyum. **5** Hétolla ańı báippi de, hé báiyain nún ore age tuáńrar héře zaito aros gorár zorur, zeéne yaar age tuáńıra ze aiborhoti hádiya diibar waada goijjıla, híin ítara age lóti entezam gorí raké. Tói híyane daháibo de tuáńıra híin bolazuri no bólke monehoói diiyó deh. **6** Hotá óilde, zee niki hom laga, íte hom daibo; aar zee niki bicí laga, íte bicí daibo. **7** Fottíkiye nizor dile-dile fáisela goijjó de mozin diiyo, mon bórgori yáh bolazuri no; kiyólla-hoilé Alla ye toh kúcir sáańte dooya re éna muhábbot goré. **8** Alla tuáńıra re ařalikka rahámot gorí faríbar kaabel, zeéne tuáńıra ttu hámica hárr kessú kafí táki yore, hárr dóilla gom ham olla yó ódorbaára táke. **9** Zendilla pak-kalam ot asé, “Íba ye dilkúla góri gorif ókkol ore dan goijjé, íbar forhésgari abadulabad zari tákibo.” (aiǵon g165) **10** Zibá ye cacá ókkol ore bis milaide aar hái bolla ruřı dee, íba ye tuáńıra re lagai bolla bis milaidibo edde híin borhot goríbo, aar tuáńrar forhésgarir fósol ókkol bicígori díbo. **11** Tói tuáńıra hárr mikká ttu tuangor óiba, zeéne hámica dilkúla góri sótká gorí faro, zıín or zoriya ańárar duara Allar cúkuriya adai ór. **12** Kiyólla-hoilé hé hédmotdarir hame toh siríf Allar pak bonda ókkol or zorurot ókkol furafuri fura ór de no, bólke boóut zon or duara Allar ódorbaára cúkuriya yó adai ór. **13** Kiyólla-hoilé hé hédmotdari lói ziyán sábut óiye híyan or zoriya ítara Allar taarif goríbo, kiyólla-hoilé tuáńıra toh Mosihr kúchóbor ore cíkar gorí híyan or fórmadar óiyo, aar ítara re edde oinno beggún ore dilkúla góri sótká goijjó. **14** Alla ye tuáńıra re ódorbaára rahámot goijjé de hétolla ítara furanir sáańte tuáńıra lla dua goré. **15** Allar cúkur óuk, íbar boiyan gorí fara no zah de hádiya lla.

10 Ańı Pául zibár baabute howá zah de, tuáńıra llói muámuikka óile fuńda montor gairházir óile ařok, ańı nize tuáńıra re Mosihr cídayi edde noromi loi aros gorír. **2** Ańı aros gorír de ki, ańr ttu zen tuáńrar héře ailé oddúr ařok ówa no fore zeddúr ańr ttu kessú manúc lói ówa foribó bouli táarir, zetará níki ańára duniyaibi niyome zindigi hařair bouli báfe. **3** Kiyólla-hoilé ańára duniyait zindigi hařailé yo toh ańára gorí de larái duniyaibi niyome no. **4** Kiyólla-hoilé ańárar laráir átiyar toh duniyaibi gún no, montor uúin zıín ot killa ókkol ore bángifelai bolla illayi kudurut asé. **5** Ańára demaikka buzá re edde hárr uńsol jiníc zıíne Alla re sinát ońsá ísafe tíya híin ore bángifelai, aar hárr kíyal ore kobza gorífelai Mosihr fórmadar banai. **6** Aar ańára, zeńtte tuáńıra furafuri fórmadar óizaybagoi, héńtte hárr nafórmanir sáńza dí bolla toiyar así. **7** Tuáńıra toh baár or súrot éna soór. Zodi honókiyo ttu nizor uore endilla bóraca asé de ki yóggwa óilde Mosihr, tóoile yóggwa ye nizor dile-dile abar báfisouk de ki, yóggwa zendilla Mosihr, héndilla ańára yó toh Mosihr. **8** Zodi ańı ańárar adíkarir baabute aro kessú borái gorí yo, toóu ańı córminda no óiyum—ze adíkar Malike diiyé de óilde tuáńıra re banaitulí bolla, nac gorífelai bolla no. **9** Híyan ańı etollá hoóir, zeéne ańı ceńřı lói tuáńıra re đoor lagair fán no. **10** Kiyólla-hoilé hodúne hoó de, “Íbar ceńřı ókkol bicí ařok edde bicí hora, montor íba zeńtte nize házir táke, héńtte íba komzur aar íbar hotá ókkol gáiyot no góle.” **11** Héndilla manúce yán buzı louk de ki, gairházirit ceńřı ókkol or sáańte ańárar hotá zendilla, borabor héndilla házirıt óu goijjúm. **12** Ańára toh uitará llói barık kúwalaito yáh nizoré ítara llói fúwan goittó no saái zetará nizor nam nize goré. Ítara nize nizoré mafe de edde nize nizor lloi fúwan goré de híyane dahá de ítara keén obuz. **13** Ańára niyom or baáre borái no goijjúm, bólke oh címar héddur goijjúm ziyán Alla ye ańára lla buwáiyé, hé címar bútoe tuáńıra yó gólaiya asó. **14** Ańára toh niyom or baáre borái gorír de no, zendilla ańára tuáńrar héře nu aítám bóuli óito, kiyólla-hoilé Mosihr kúchóbor loi tuáńrar héře foijjonto age ańára éna aiccı. **15** Ańára oinno zon or meénnot lói yó borái no gorí, héndilla goillé toh címar baáre óizayboi. Lekin ańára acá gorír de, zendilla tuáńrar iman barér, héndilla tuáńrar bútoe ańárar ham or zaga yó đoóńr óizayboi; **16** zeéne tuáńıra baade

asé de elaka ókkol ot óu kúchóbor tobolik gorí fari, kiyólla-hoilé añára ttu oinno zon or címar bútoze goijjá ham loi borái goittó mon náí. 17 Montor, “Zee niki borái goré, yóggwa ye Mabud ore lói beh borái goróuk.” 18 Kiyólla-hoilé nizor nam nize goillé toh sóiyi bóuli sábut óizagoi de no, bólke Mabude nam goillé éna ó.

11 Añí acá gorír tuáñra añr kessú bekufai re bordac goríba; becók tuáñra bordac gorór óu. 2 Añr ttu tuáñra lla Allar dóilla gairot asé; kiyólla-hoilé añí toh tuáñra re ekgwá hócom lói zuragatá gorífelayí, yáni Mosih llói, zeéne añí tuáñra re íbar át ot pak hoinna ísafe tulídi fari. 3 Lekin añí doorair de ki, zendilla háfe nizor saláki lói Háwa re gunát félayiye, héndilla tuáñrar demak ore yó honókiye tuáñra ttu Mosih llói ze imandari edde pak taalukat asé híyan ottu gollot ot loizaybói. 4 Kiyólla-hoilé zodi honókiye aái ar eggwá Isár tobolik goré, zibár baabute añára tobolik nó gorí, yáto zodi tuáñra endilla honó ruh foo zibá tuáñra faiyó de íba llói alok, yáh endilla honó kúchóbor foo ziyán tuáñra kobul goijjé de híyan lói alok, híin toh tuáñra kúcir sáañte bordac goró. 5 Añí toh nizoré hé “barík sáhabi” howá zah de ítarar túaro honó hom no táari. 6 Zodi añí cúndorgori boiyan di no zanilé yo, elóm or híkka ttu toh añí héndilla no. Híyan toh añára hárr kessút máze furafurir sáañte tuáñra re daháiyi. 7 Tuáñrar tokka barí bolla añí niróc ói tuáñrar hañse Allar kúchóbor maana tobolik goijjé de híyan kí añí guná goijjé de né? 8 Tuáñrar hédmot gorí bolla bóuli añí oinno zomát ókkol ottu dam goicci, hoitó sailé ítara re luṭ goijjé. 9 Aar zeñtté añí tuáñrar fúañti tákite muútac ot foijjílám, héñtte añí honókiyo lla zulap nó ói, kiyólla-hoilé Makedóniya ttu aiccí de báiyain núne añr zorurot ókkol furafuri fura goijjíl. Añí hárr kessút nizoré tuáñra lla zulap no ói fán goijjílám, aar héndilla gorát tákiyum óu. 10 Mosihr ze sóiyi añr bútoze asé, añí híyan or hosóm háí hoóir, Akayar elaka ókkol ot añré e borái gorá ttu honókiye bon gorí no faribó. 11 Híyan kiyólla hoóir? Añí tuáñra re muhábbot no gorí de né? Alla ye zane, añí tuáñra re muhábbot gorí. 12 Montor añí ziyán gorír híyan gorát táikkum, zeéne añí uitará re moouka faito no dih, zetará añára goijjé de héndilla ham ókkol goijjé hoóí borái gorí añára llói borabor óibar moouka tuwar. 13 Kiyólla-hoilé héndilla

manúc ítara toh misá sáhabi, edde fókkorai gorí ham-goróya ókkol, zetará nizoré Mosihr sáhabi ísafe dahái bolla bét dóre. 14 Taajup óibar kessú náí, kiyólla-hoilé Cóitan nize yó toh nurani fírista ísafe bét dóre. 15 Hétolla ítar gulam ókkole yó forhéggarir háadem ísafe bét dóre de híyan doóñr hotá no. Ítarar notiza ítarar ham mozin beh faibo. 16 Añí abar hoóir, añré honókiye bekuf bouli no báippo; montor zodi báfo, tooile añré ezzon bekuf ísafe óile gosó, zeéne añí yó ekkaná borái gorí fari. 17 Asóle yala añí héndilla boráir ekine zín hoóir, híin Malik or mozin no bólke ezzon bekuf or dóilla góri hoóir deh. 18 Boóut zone zettót duniyaibi mozin borái gorér, añí yó borái goijjím. 19 Kiyólla-hoilé tuáñra toh giyani ói bekuf ókkol ore kúcir sáañte bordac goró. 20 Siríf híyan no, zodi honókiye tuáñra re gulam banailé, tuáñra re dónco gorífelaile, tuáñra ttu fáida tulíle, nizoré nize barík kúwalaile, yáh tuáñra re gal sái suwar maille, tuáñra híin óu toh bordac goró. 21 Añí córmindar sáañte yíán kobul háir de ki, añára híin gorá ttu bicí komzur accílám. Montor oinno kiyór ttu ze baabute borái goríbar hímmot asé—ezzon bekuf or dóilla góri hoiyúm hoilé—añr ttu yó hé baabute borái goríbar hímmot asé. 22 Ítara Hibrani de né? Añí yó toh héndilla. Ítara Isráili de né? Añí yó toh héndilla. Ítara Ibrahím or nosól de né? Añí yó toh héndilla. 23 Ítara Mosihr háadem de né?—Ezzon fool or dóilla góri hoiyúm hoilé—añí toh aró bicí: bicí meénnot gorát óu, ziyól harat óu, háñdai fíra hát óu, aar barbár moot loi mukabela ówat óu. 24 Yohúdi ókkol ottu añí ek hom salic cwar dóre fañs bar dura háiyi. 25 Tin bar añí ḡaṇḡa loi fíra háiyi, ekbar fattór mara háiyi; tin bar foijjonto añí zair de zaáñs báñgi ḡuffilgoi, aar añr ttu doijjat mazé ek rait ek din hara foijjé de asé. 26 Añr egazá sofór ot añí boóut dóilla hótara ókkol ot foijjílám: hál or hótarat, ḡahañit or hótarat, nizor koumi maincór hótarat, Beyohúdi ókkol or hótarat, cóor or hótarat, moidan elakar hótarat, doijjar hótarat, edde misá báiyain dor hótarat. 27 Añí bicí meénnot edde duk ókkol goijjé, aar boóut rait urgúma haraiyí de asé. Añí búk tiráce duk faiyí, aar egazá-egazá waacca táikki de asé. Añí cíte edde hoorsuore yó duk faiyí. 28 Argún or hotá ero, tamám zomát ókkol olla asé de sintabáfani ye añré fottí din dabat táke. 29 Hone komzur óile añí komzur no ói de asé? Haré

gunát félaile añr bútoṛe no fure de asé? **30** Zodi borái goríbar zorur ó, añí uúin lói borái goṛíyum zín añr komzuri loi bazá asé. **31** Malik Isár Alla edde Baf, zibár taarif abadulabad ówat tákibo, íba ye zane añí misá hotá hoóir de no. (aĩṛṇ g165) **32** Damáskas ot máze, añré gereftar goṛí bolla bóuli baáñcca Aritas or hákime Damáskas cóor ore faára dí raikkíl. **33** Montor añré eggwá lai ot goṛí ḡeḡal or ekkán zanála báy nise lamaidiya gýl, tói añí yóggwar át ottu basigiýgoi.

12 Añr ttu borái goṛár zorur, fáida no tákile yo. Montor yala añí Malik or diiya doṛcón edde zahéri ókkol or baabute hoiyúm. **2** Añí Mosihr bútoṛe ezzon manúc ore siní de asé, zibá re yaar soiddó bosór age tisára asman ot tulá gýl. Híyan jisím or sáañte óiye ne yáh jisím sára óiye añí no zani, Alla ye beh zane. **3** Añí zani de, hé manúc íba re—híyan jisím or sáañte óiye né yáh jisím sára óiye añí no zani, montor Alla ye zane— **4** jonnotul-férodus ot tulá gýl, aar íba ye boiyan goṛí fara no zah de héndilla hotá ókkol fúinnil, zín honó maincóṛ ttu boiyan goittó ezazot náí. **5** Héndilla manúc ore lói añí borái goijjúm, montor nizoré lói no. Añí borái goijjúm de óilde añr komzuri ókkol or baabute. **6** Zodi añr ttu borái goittó monehoó yo añí bekuf no óiyum, kiyólla-hoilé añí sóiyi gán beh hoiyúm. Montor toóu añí híyan no goijjúm, zeéne honókiye añré añr ttu zín deikké yáh fúinne yár túaro bicí bóuli no táare. **7** Hé zahéri híin or oti ḡoóñgiri lói añí barík no kúwalai fán añr gaat eggwá keñṛa gólai díya gýeh; yíba óilde añré duk di bolla Cóitan or eggwá usíla, zeéne añré añí barík no kúwalai. **8** Híyan or baabute añí Malik or hañse tin bar fóriyat goijjílam, zeéne hé keñṛa wa añr ttu dur óizagoi. **9** Montor íba ye añré hoiyé de, “Añr rahámot tor lla kafí, kiyólla-hoilé Añr kudurut or moksót komzurit mazé furafuri fura óizagoi.” Híyan olla añí bicí kúcir sáañte añr komzuri ókkol or baabute beh borái goijjúm, zeéne Mosihr kudurut añr bútoṛe zari táke. **10** Hétolla toh añí Mosihr wasté komzurit, beizzotit, ferecanit, zulúm ot, edde mockil ókkol ot máze kúci. Kiyólla-hoilé zeñtté añí komzur ói, héñtte añí mozbud óizaygoi. **11** Añí bekuf óigiyígoi de ói, montor tuáñra éna añré mojbud goijjó. Asóle tuáñrar torfóttu añr ttu nam foon accíl, kiyólla-hoilé añí kessú no de óile yo toh “barík sáhabi” howá zah de ítarar túaro honó

mikká ttu hom no. **12** Becók, tuáñrar hañse toh furafuri sobór or sáañte illayi-nicán, taajuippa harhána, edde keramot ókkol or duara sóiyi sáhabir foriso díya gýéh. **13** Añí tuáñra lla fuñzá nó ói de híyan bade tuáñra ar hon mikká ttu oinno zomát ókkol or túaro hom óiyo dé? Añr hé gollot tán maf goṛó! **14** Añí e tisárabar óu tuáñrar héṛe ai bolla toiyar así, aar añí tuáñra lla fuñzá no óiyum; kiyólla-hoilé añí tuáñrar honó kessú saáir de no bóke tuáñra re saáir deh. Kiyólla-hoilé bafmaa lla zoma goṛíbar zimma fuain dor ttu náí, montor bafmaa ttu fuain dor lla asé. **15** Añí bicí kúcir sáañte tuáñra lla añr hárr kessú hóros goṛífelaiyum, bóke nizoré úddwa. Añí toh tuáñra re bicí muhábbot goṛí, tuáñra kiyá añré hom muhábbot goṛó? **16** Zeén óibo óuk, añí toh tuáñra lla fuñza nó ói. Montor toóu hodúne hoó de, añí bóle saláki goṛí tuáñra re fán ot félaiyi. **17** Añí kí tuáñrar héṛe diferáiyi de ítara honókiyor duara tuáñra ttu fáida tuillí de né? **18** Añí Titus ore tuáñrar héṛe zai bolla aros goijjílam, aar yóggwar fúañti báí wa re yó diferáilam. Tituse kí tuáñra ttu fáida tuillí de né? Añára duní zon kí ekí ruhye edde ekí rastat no soli né? **19** Tuáñra aijjó foijjonto añára tuáñrar hañse gom kúwalair bóuli táaror níki? Añára zín hoóir híin Mosihr ummot ísafe Alla re muuntu goṛí hoóir deh. Ó adórja ókkol, híin beggún óilde tuáñra re banaitulí bolla. **20** Kiyólla-hoilé añí ḡoorair de, añí ailé tuáñra re zendilla saító saáir héndilla loot no faiyum bóuli, aar tuáñra yó añré zendilla saító soór héndilla loot no faiba. Añí héṛe iín loot faiyum bouli ḡoorair: hoijja-fózzat, alingañi, rakaraki, siríf nizor fáida tuwa, bodnami, gifot, tukabbori, edde gulmal ókkol. **21** Añí aró ḡoorair de kí, añí abar ailé añr Alla ye añré tuáñrar muuntu córminda ówa baibó, aar añr ttu boóut zon uitará lla afsús goṛá foribó zetará yaar age guná goijjíl aar nize goittó de nafaki, zenákari, edde bodmaci ttu touwá goṛí nó fela.

13 Añí tuáñrar héṛe aiyír de ebar óilde tisárabar. Pak-kalam ot zendilla asé, “Ze honó maamela dui zon yáh tin zon gobár zobane sóiyi bouli sábut óibo.” **2** Dusárabar añí tuáñrar fúañti tákite age zendilla hoóilam, héndilla yár age guná goijjíl de ítara re edde baki beggún ore yala gairházirít óu añí age lóti hoóí rakír, añí abar ailé, honókiyo re bad no diyum; **3** kiyólla-hoilé tuáñra toh Mosih ye añr duara hotá hoó

de híyan or dolil soór. Íba tuáñrar híkka komzur de no, bólke tuáñrar búture íba taakotwala. **4** Kiyólla-hoilé íba re komzur hálote kúruc ot dí mariféla gíyeh de óile yo, íba toh Allar kudurute zinda asé. Becók, añára yó íbar búture komzur, montor toóu tuáñrar wasté Allar ze kudurut asé híyan or zoriya añára íbar fúañti zinda tákiyum. **5** Tuáñra iman ot asó né nái nizoré entán gorí soó; nizoré tahákit goró. Isá Mosih tuáñrar búture asé de híyan kí tuáñra no zano? Arnóile toh tuáñra nakaabel tóorigiyogoi. **6** Aar añí acá gorír de añára nakaabel nó tóori de híyan tuáñra zanibá. **7** Añára Allar hañse dua gorí de, tuáñra zen honó hóraf ham no goró; híyan etollá no de ki zeéne añára kaabel ísafe dahá zay, bólke zodi añára nakaabel ísafe dahá zaylé yo tuáñra zen sóiyi gán goró. **8** Kiyólla-hoilé añára ttu toh sóiyir ulða kessú gorí faribár nái, montor sóiyir cúlða óile asé. **9** Zeñtté añára komzur óile yo tuáñra mozbut ó, héñtte añára kúci. Añára yían óu dua gorí de ki, tuáñra zen balok óizogoi. **10** Hétolla bóuli toh añí gairházirit tákite edún iín lekír, zeéne házir táki de októt añr ttu adíkar estemal gorí aþok ówa no fore, ziyán Malike añré diiyé de óilde banaitulí bolla, báñgifelai bolla no. **11** Ahérit hoóir, ó báiboináin ókkol, kúci goró, tuáñrar foñt tík goró, josba doh, ek mon ó, cántit táko. Muhábbot or edde cántir Alla tuáñrar fúañti tákibo. **12** Ezzon ore ezzone pak dile appá dí sólám zano. **13** Tamám pak bonda ókkole tuáñra re sólám zanar. **14** Malik Isá Mosihr rahámot, Allar muhábbot, edde Pak-Ruhr taalukat tuáñra beggún or fúañti zari tákouk.

Galatiól

1 Añi Pául, eggwá sáhabi. Añi e sáhabigiri honó ðaáir torfóttu yáh honó ezzon or torfóttu faiyí de no, bólke Isá Mosihr torfóttu edde Baf Alla, zibá ye íba re mora ttu zinda goijjé íbar torfóttu faiyí deh. **2** Añi edde añr fúañti asé de imandár báiboináin beggúne, Mosihr ze zomát ókkol Galatíyat asé híin or hañse lekír. **3** Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **4** Añára re toh e hóraf zobana ttu basai bolla hé Mosih ye añárar Baf Allar moncá mozin añárar guná lla Nizor zan diyé. (aiñ g165) **5** Abadulabad Allar taarif ówat tákouk. Aamin. (aiñ g165) **6** Añi bicí taajup óiyi, kiyólla-hoilé Zibá ye tuáñra re Mosihr rahámote ðaikké íba re tuáñra bicí hára sári, arek ðoilla kúchóbor or híkka zoórgoi. **7** Asóle kúchóbor arek ðoilla náí. Toóu endilla hodún manúc asé zetará tuáñra re oulzóul ot félaider, aar Mosihr kúchóbor bodoli félaito sár. **8** Montor ze kúchóbor añára tuáñrar hañse tobolik goijjé, hé kúchóbor or ulða zodi honókiye tuáñrar hañse arek ðoilla kúchóbor tobolik goré, híyan añára nize gorí yáh asman or honó firista ye goré, yóggwar uore gozzob forouk. **9** Añára age zendilla hoóilam héndilla ehón óu hoóir, zodi honókiye tuáñra kobul goijjó de hé kúchóbor or ulða arek ðoilla kúchóbor tuáñrar hañse tobolik goré, yóggwar uore gozzob forouk. **10** Híyan hoói añi har taarif feito saáir deh, insán or né náki Allar? Aar náki añi maincóre kúci gorí bolla saáir de? Zodi añi aijjó foijjonto maincóre kúci goittó saitám, añi Mosihr gulam no óitam. **11** Báiboináin ókkol, añi tuáñra re yían zanaidír, ze kúchóbor añi tobolik goijjé híyan insán or banaouti no, **12** kiyólla-hoilé añi toh híyan no honó insán or torfóttu faiyí, aar no honókiye añré cfkaiye, bólke Isá Mosih Nize híyan añr hañse zahér goijjé deh. **13** Tuáñra de fúinno, ek hale añi Yohúdir dórmot táite añár solasol hondilla accíl, Allar zomát ore añi hotó zulúm goijjílám edde híyan ore dónco gorífelaito saáilam, **14** aar Yohúdi dórho manat añi añr bocca Yohúdi ókkol or túaro uore accílám, aar añr dada-bafdadar rosóm ókkol olla añár ttu ódorbaára jus accíl. **15** Lekin Alla ye añré añr maar ferot tákite lóti háas gorí raikkíl edde Nizor rahámote ðaikkíl. Zeñtté íba ttu fosón laiggé **16** íbar Fua re añr hañse

zahér gorí bolla, zeéne añi Beyohúdi ókkol or hañse hé Fua re kúchóbor ísafe tobolik gorí, hénnte añi honó insán ottu mocuwara nó lói, **17** aar zetará añr age lóti sáhabi asé, ítara llói milto Jerúsalem ot óu nó zai, bólke Arob dec ot giílamboi, yárbaade abar Damáskas cóor ot waafes aiccílám. **18** Tarfore tin bosór baade, Kéfas lói milto añi Jerúsalem ot giílám, aar íbar fúañti hére fundóro din táikkilam; **19** montor sáhabi gún ottu ar honó sáhabi lói mili nó fari. Hére añi Malik or báí Yakub loi yó millílám. **20** Añi Alla re muúntu gorí hoóir, añi tuáñrar hañse zíin lekír híin misá no. **21** Baade añi Siíriyar edde Kilicíya elaka ókkol ot giílám. **22** Hénnte Yohúdiya elakat ze zomát ókkol Mosihr bútoze asé híine añré muk siná no sintó. **23** Ítara siríf fúinto de, “Age ze manúc cwa ye añára re zulúm goittó, íba ye yala iman waán or tobolik gorér ziyán ore íba ye foóila dónco gorífelaito saáil.” **24** Baade ítara añr zoriya Allar taarif goittó.

2 Soiddó bosór baade, Bárnabas ore looi añi abar Jerúsalem ot giílám. Titus ore yó fúañti looi giílám. **2** Añr ttu hére zaa foribó bóuli añr hañse zahér goijjé de hétolla añi giílám. Beyohúdi ókkol or hañse añi ze kúchóbor tobolik gorí híyan or baabute añi hériyar ðaídoóñr ókkol ore eggwá síra boirók ot buzáilam, kiyólla-hoilé añi nó saái de, añi gorír de meénnot yáh goijjílám de meénnot befózul óuk. **3** Lekin añr fúañti accíl de Titus ezzon Beyohúdi de óile yo, íba re ázomi gorí bolla bolazuri gorá nó zah. **4** Hé mosóla gán uittíl de kiyólla-hoilé, kessú báiyain de imandár kúwalai añára ttu Mosih Isár bútoze ze azadi asé híyan or zankari hásil gorí bolla gurinda ísafe añárar bútoze goíllil, zeéne ítara añára re gulam banai fare. **5** Montor añára ítarar hotá essát olla úddwa mani nó lói, zeéne kúchóbor or sóiyi tuáñra lla tiki táke. **6** Lekin zetará re ðaídoóñr bóuli mana zah, ítara úddwa añi tobolik gorí de kúchóbor or baabute honó noya mocuwara di nó fare. Asóle ítara zíin accíl óibo óuk, añr ttu honó forók náí. Alla ye toh ektorfia no goré. **7** Bólke ítara deikké de, Alla ye añré Beyohúdi ókkol or hañse kúchóbor tobolik goríbar zimma diiyé, zendilla Fitor ore Yohúdi ókkol or hañse goríbar diiyé. **8** Kiyólla-hoilé ze Alla ye Fitor ore ázomi goijjá ókkol or hañse sáhabi banai ham goijjé, hé Alla ye beh añré yó Beyohúdi ókkol or hañse

sáhabi banai ham goijjé deh. **9** Yakub, Kéfas, edde Yohánna re toh zomát or òtúni bouli mana zah. Zettót ítara añré diiya giyéh de rahámot or baabute zainné, añr lói edde Bárnabas lói bóng bañdi bolla át milaiyé. Ítara razi óiye de, añára Beyohúdi ókkol or hañse zai tobolik goijjím, aar ítara ázomi goijjá gún or hañse zai goríbo. **10** Ítara añára re siríf hoóil de, goríf ókkol ore modot goittó to foóraitó, ziyán gorí bolla añr ttu yó age lóti bicí mon accíl. **11** Montor Kéfas zeñtté Enñiyok ot aiccé, añí fbar cáikkacíkkit fbar ulða týyaiyi, kiyólla-hoilé fba hosúrbon tóojje, **12** ki hoilé, Yakub or héntu hoozon manúc aibár age, fba ye Beyohúdi ókkol or fúañti hána háito; montor ítara aiccé rár, fba ye Beyohúdi ókkol ottu síra ói alok gorí táikkil, kiyólla-hoilé fba ye ázomi goijja dol ore dooraiyé. **13** Baki imandár Yohúdi ókkol óu fbar hé munafékit bóng óiye, zeén níki Bárnabas úddwa ítarar munafékit forigílgoi. **14** Montor zehón añí ítara kúchóbor or sóiyit no soler de deikkí, añí beggún or muúntu Kéfas ore hoiyi de, “Tuñí toh Yohúdi, lekin tuñí de Yohúdir dóilla no ói Beyohúdir dóilla solafíra gorór. Tói tuñí keéngori Beyohúdi ókkol ore Yohúdir dóilla solafíra gorí bolla bolazuri gorór?” **15** Añára de zormo ttu lóti Yohúdi; añára toh gunágar howá zah de Beyohúdi ókkol or ferot ttu óiyi de no. **16** Montor añára zani de, Mosih Isár uore iman aníle manúc forhésgar tóore, Córíyot amól goillé no. Hétolla toh añára nize yó Mosih Isár uore iman ainní, zeéne Córíyot amól gorí no bólke Mosihr uore iman aní añára forhésgar tóori fari, kiyólla-hoilé córiyot or amóle honó manúc forhésgar no tóoribo. **17** Lekin Mosihr duara forhésgar tóoribar kucíc goitté-goitté zodi añára nize yó gunágar sábut óizaygoi, híyan or maáni kí Mosih gunár háadem? Bilkúl no! **18** Kiyólla-hoilé ziyán añí nize bāngifelaiyi híyan zodi abar banai, tóoile toh añí nizoré nize hosúrbon tóorair deh. **19** Añí Córíyot or duara Córíyot ottu morigiýgoi, zeéne añí Alla lla basi táki fari. **20** Añré Mosihr fúañti kúruc ot òti mariféla giyéh; yala añí ar zinda náí, añr bútoze Mosih zinda asé deh. Añí ehón e jisím lói ze zindigi harair híyan Allar Fuar uore iman rakí beh harair, zibá ye añré muhábbot gorí añr lla bóuli Nizor zan diyé. **21** Añí Allar rahámot ore inkar no gorí, kiyólla-hoilé Córíyot or duara manúc forhésgar tóori fare de óile, Mosih toh hánnak moijjíl.

3 Ó obuz Galatióll! Tuáñra re hone jadu goijjé? Isá Mosih re kúruc ot dí mariféla giyéh de híyan toh nizor suké deikkó fángori tuáñra re sáf-sáf góri buzá giyéh. **2** Añí tuáñra ttu siríf yán zainto saáir: tuáñra Pak-Ruh faiyó de Córíyot amól gorí né, náki fúinno de hé kúchóbor or uore iman aní? **3** Tuáñra endilla obuz kiyá? Tuáñra ziyán Ruhr usílaye cúru goijjó, híyan ehón jisíme furussat goittó soór de níki? **4** Tuáñra kí edún duk hánnak faiyó de? Hánnak no de no né? **5** Tói añr súwal óilde, Alla zibá ye tuáñra re Pak-Ruh diiyé edde tuáñrar bútoze keramoti ókkol goré, fba ye híin tuáñra Córíyot amól goróne goré de né, náki kúchóbor fúni iman ainnó de hétolla goré de? **6** Ibrahim or baabute báfiso, “Yóggwa ye Allar uore iman raikkíl, hétolla yóggwa re forhésgar bóuli gona gyíl.” **7** Hétolla yán zani rakó de ki, zetará ttu iman asé, siríf ítara óilde Ibrahim or asól nosól. **8** Pak-kalam ot toh age lóti endilla asé, iman or zoriya Alla ye Beyohúdi ókkol ore forhésgar bóuli kobul goríbo. Hétolla Alla ye Ibrahim ore e kúchóbor yán age lóti zanaidíl, ki hoilé, “Tuáñr duara tamám kóum ókkole rahámot faibo.” **9** Hé ísafe, zetará ttu iman asé ítara yó iman ola Ibrahimé faiyé de hé rahámot faibo. **10** Zetará Córíyot amól gorár uore bóraca goré, ítara beggún gozzob or tole asé, kiyólla-hoilé pak-kalam ot endilla asé, “Uitará hárr ekzon gozzob or tole asé zetará Córíyot or Kitab ot leikká asé de corót beggún amól gorát no táke.” **11** E hotá sáf zahér de ki, Córíyot lói honó manúc Allar nozor ot forhésgar no tóore, kiyólla-hoilé pak-kalam ot endilla asé, “Forhésgar manúc imane beh basi tákibo.” **12** Zeén óibo óuk, iman loi Córíyot or honó bazá náí bólke pak-kalam ot asé de, “Zee niki Córíyot or hókum ókkol mane, íte híine basi tákibo.” **13** Córíyot amól no gorár zoriya añárar uore ze gozzob accíl, hé gozzob ore Mosih ye nizor uore looi añára re azad goijjé. Pak-kalam ot endilla asé, “Zaré-zaré gas or uore òaka zah, ítara beggún gozzob or tole.” **14** fba ye añára re etollá azad goijjé, zeéne ze rahámot Ibrahim ore diiya giyéh híyan Mosih Isár duara Beyohúdi ókkole yó faa, tói baade añára zen waada goijjá Pak-Ruh re imane hásil gorí. **15** Báiboináin ókkol, añí tuáñra re insáni zindigi ttu ekkán meésal dí buzái: zeñtté dui zon manúce honó kessút razi ói razinama gorífela, híyan ore honókiye baatel gorí no fare, aar híyan ot kessú barái yó no fare. **16** Borabor

héndilla, Alla ye Ibrahim ore edde yóggwar Nosól ore hé waada diíl. Pak-kalam ot endilla náí de ki, “Nosól ókkol lói,” ziyán or maáni bici manúc, bókke “Tuáñr Nosól lói,” maáni ekzon loi, íba óilde Mosih. 17 Añí hoitám saáir de, Alla ye Ibrahim lói ekkán razinama gorí waada goijjíl de ki, híyan ore tíkai rakíbo. Ze Córíyot sair có tiríc bosór baade diiya giyéh híyane hé razinama re báñgi Allar waada re baatel gorifelai no faribó. 18 Kiyólla-hoilé Córíyote zodi miras faa zah, tóoile toh híyan waadaye faa zah de no, montor Alla ye toh Ibrahim ore híyan waadar zoriya éna diíl. 19 Tóoile Córíyot kiyólla diíló? Córíyot diíl de nafórmanir zoriya, zeéne híyan Nosól ubá nú aiyé foijjonto tiki táke zibár waada gorá gýl. Alla ye hé Córíyot fírísta ókkol or duara ekzon usílar hañse diíl. 20 Lekin ekzon olla óile toh usíla no lage; aar Alla asé de ek. 21 Héen óile Córíyot kí Allar waada ókkol or ulða? Bilkúl no! Kiyólla-hoilé zodi endilla ekkán córíyot diiya zayto ziyáne zibon dii fare, tóoile híyan or duara forhésagar tóori faitto. 22 Montor Pak-kalame fura duniyai re gunár kobzat gólai raikké, zeéne ziyán or waada gorá gýl híyan zetará Isá Mosihr uore iman ané ítara hé imane hásil goré. 23 Montor iman aibár age, añára re Córíyot or tole bon raká gýl. Hére añára re otódin foijjonto bon gorí raká gýl zetódin iman waán zahér nó ziyán zahér óibar accíl. 24 Hétolla Mosih nú aiyé foijjonto Córíyot añárar zimmadar accíl, zeéne añára imane forhésagar tóori. 25 Montor yala de hé iman aiccé, añára ar zimmadar or tole no. 26 Mosih Isár uore iman anóne tuáñra beggún toh Allar fuain ógiyogoi. 27 Kiyólla-hoilé tuáñra beggún zetará báptísmar duara Mosih llói ek óiyo, tuáñra Mosihr dóilla ógiyogoi. 28 Hétolla bóuli Yohúdi edde Beyohúdir maze, gulam edde begulam or maze, morotfuain edde mayafuain dor maze honó forók náí, kiyólla-hoilé Mosih Isár uore iman anóne tuáñra beggún toh ek ógiyogoi. 29 Tuáñra Mosihr ógiyogoi de óile, tuáñra toh Ibrahim or asól nosól, aar Alla ye íba re zín or waada goijjé híin or mirasdár.

4 Añí hoitám saáir de, miras faibo de fua zetódin nabalok táke, íte baf or jiníc beggún or malik de óile yo ítar lói gulam loi honó forók no táke, 2 bókke bafe tík gorí raikké de boc nó óiyo foijjonto ítar ttu sóonloyar edde zimmadar or tole táka fore. 3 Héndilla añára

yó, zeñtté añára ruúhanit nabalok accílám, añára duniyai hókumot goré de bít-ferot ókkol or gulamit accílám. 4 Lekin zeñtté sóiyi októ furafuri aáigiyoí, Alla ye Nizor Fua re diferáíye, Zibá ekgwá mayafua ttu zormo óoil aar Córíyot or tole zindigi haraáil, 5 zeéne zetará Córíyot or tole asé ítara re íba ye azad gorí fare, aar añára Allar fuain óizaygoi. 6 Tuáñra Allar fuain de hétolla, Alla ye Nizor Fuar Ruh añárar dí ot diferáíye, zibá ye níki Alla re, “Abba” yáni “Baf” hoi ñahaba. 7 Hétolla yala tuáñra ar gulam no bókke fuain. Tuáñra zettót fuain, Alla ttu Nizor fuain dore zín diibar asé híin beggún tuáñra re diibo. 8 Yaar age zeñtté tuáñra Alla re no síníta, tuáñra uúin or gulam accíla zín asóle sóiyi Kúda no. 9 Montor yala toh tuáñra Alla re sinó, yáto Alla ye tuáñra re siné. Tói tuáñra kiyólla hé komzur edde behazor bít-ferot ókkol or uzu fíri zaito soór? Tuáñra ttu hóno abar ítarar gulamit óito monehoór né? 10 Tuáñra toh háas-háas din ókkol, mac ókkol, moósum ókkol, edde bosór ókkol falon goró. 11 Añí ñoorair de ki, añí tuáñra lla ze meénnot goijjé híin hóno cár no óibo ne. 12 Ó báiboínáin ókkol, añí tuáñra re becábici aros gorí hoóir, tuáñra añr dóilla ó, kiyólla-hoilé añí yó tuáñrar dóilla óiyo. Tuáñra añr honó hótí nó goró. 13 Tuáñra toh zano, añr ttu gaat ocúk óiye de hétolla bóuli añí tuáñrar hañse foóila bar kúchóbor tobolik goríbar mouka faáilam. 14 Añr gaar ocúk or zoriya tuáñra bici duk faáila, montor toóu tuáñra añré hékarot yáh inkar nó goró, bókke añré endilla gori kobul goijjíla zeén níki añí éggwa Allar fírísta yáh Mosih Isá Nize. 15 Héñtte de tuáñra bici kúci accíla, montor yala hé kúci horé giyiyoí? Añí nize gobá dí fajjium de ki, héñtte tuáñra faitta bouli nizor suk kún úddwa neelai añré diifélaita. 16 Montor añí tuáñrar duccon ógiyigoi de tuáñra re sóiyi gán hoiyí de hétolla né? 17 Hé manúc ókkole tuáñra llói dustí gorí bolla bici saár, montor bála niyote no. Ítara ttu monehoór de, tuáñra re añr ttu alok goittó, zeéne tuáñra ítarar híkka óizogoi. 18 Dustí gorí bolla soón bála zodi bála niyot táke, montor siríf añí tuáñrar fúañti táki de októ no bókke hé niyot hámica tákon sáa. 19 Añr adorja fuain ókkol, fua hálas óibarcot maa ye zendilla duk faa, héndilla duk añí abar tuáñra lla bouli fair, híin añí otódin foijjonto faat tákiyum zetódin tuáñrar bútoore Mosihr fítorot boni nó zagoi. 20 Añr ttu monehoór de, tuáñra llói cáikkacákkít tándá mezase hotá

hoi bolla, kiyólla-hoilé tuáñrar baabute añi kessú buzí no farir. **21** Tuáñra zetará ttu Córíyot or tole tákito monehoór, Córíyote kii hoó de híyan tuáñra zano né? Añré hoósai. **22** Hére toh endilla leikká asé, Ibrahím ottu duwá fua accí; ekgwá óiye de bañdi ttu, ar ekgwá óiye de bañdi no de híba ttu. **23** Fua zibá bañdi ttu zormo óiye íba jisím or niyom mozin óiye deh; montor zibá bañdi no de mayafua ttu zormo óiye, íba Allar waada mozin beh óiye. **24** Hé hotá híin ot bútorgwa maáni asé: hé duni mayafua óilde Allar duiyán razinama. Kuútor Faár or uore gorá giyl de hé razinama óilde Házara, híba ttu zetará zormo ó, ítara beggún gulamit zormo ó. **25** E Házara óilde Arob dec ot asé de Kuútor Faár; híba yalar Jerúsalem cóor lói ek ñoilla, kiyólla-hoilé hé cóor edde hé cóor or manúc ókkol beggún gulamit asé. **26** Montor bañdi no de mayafua loi asmani Jerúsalem cóor gán lói ek ñoilla, aar hé cóor toh añárar maa. **27** Pak-kalam ot endilla asé, “Kúci gór, ó báz mayafua, tui zibá ttu honó fuain nó óiyo. Guzori-guzori kúci zahér gór, tui zibá ye fuain hálas ówar duk nó fos; kiyólla-hoilé fiññífélayi mayafua ttu hócom ola mayafuar túaro bicí fuain óibo.” **28** Ó báiboináin ókkol, Isahák or ñoilla tuáñra yó Allar waada mozin zormo óiyo de fuain. **29** Montor hé októ fua zibá jisím or niyom mozin zormo óiye, íba ye fua zibá Allar Ruhr waada mozin zormo óiye íba re zalaitó. Héndilla yala yó ór. **30** Montor Pak-kalam ot hondilla asé? Hére asé de, “Bañdi wa re edde híbar fua wa re neelaido, kiyólla-hoilé bañdir fua honódin bañdi no de híbar fuar fúañti miras or bági ói no faribó.” **31** Hétolla, ó báiboináin ókkol, añára bañdir fuain no bólke bañdi no de híbar fuain.

5 Mosih ye toh añára re azad táki fari bolla éna azad goijjé. Hétolla mozbut táko aar nizor hañd ot abar gulamir zuañl diito no diyo. **2** Fúno! Añi Páule tuáñra re hoóir, zodi tuáñra nizoré ázomi gorábo, tuáñra lla Mosih honó kimot no. **3** Honó manúc zee niki nizoré ázomi gorá báye ítara hañse añi yáan abar hoóir, ítara ttu tamám Córíyot amól gorár fóros. **4** Tuáñra zetará Córíyot amól gorí forhégar tóoitto soór, tuáñra Mosih ttu alok óigiyogoi aar rahámot faa ttu duré óigiyogoi. **5** Montor añára toh Ruhr duara imane acá waán or kúb entezar ot así, ziyán óilde, añára re forhégar bóuli kobul gorá zaybo. **6** Kiyólla-hoilé Mosih Isár ummot ókkol

olla ázomi gorón or no gorón or honó kimot náí, montor iman tákon beh bicí zoruri, ziyáne muhábbot or duara ham goré. **7** Tuáñra toh bálagori solat accíla; tói sóiyi gán amól gorá ttu tuáñra re hone oñnicce? **8** Becók, tuáñra re ziyán hoóí bíraifelaiye, híyan Ubár torfóttu aiccé de no Zibá ye tuáñra re ñake. **9** “Ekiní góri cútare toh fura hañi or dola fúlaiife.” **10** Montor tuáñrar baabute añr ttu Malik or uore ekin asé de ki, tuáñra arek ñoilla cíkka kobul no goríba. Tuáñra re zee niki alabúlat félaider, íte zee óibo óuk, íte sáñza fai zaybo. **11** Ó báiboináin ókkol, añr baabute hoitó sailé, zodi añi aijjó endilla tobolik gorí, ázomi gorár zorur; tóoile añi aijjó kiyá zulúm fair? Héen óile toh kúruc or bazá dur óigiyoi. **12** Zetará tuáñra re ferecan gorér, ítara nizoré háñci goráifelaïto bouli ebbere gom óito. **13** Ó báiboináin ókkol, tuáñra re toh azad ói bolla éna ñaha giyé; tuáñrar hé azadi re tuáñrar jisím olla mouka ísafe estemal no goijjó, yárbodol muhábbote ezzon ore ezzone hédmot goró. **14** Kiyólla-hoilé tamám Córíyot e ekkán hókum ot gólaiya asé, “Atehañsór maincóre nizor ñoilla muhábbot goríba.” **15** Lekin zodi tuáñra hoñrahoñri di ezzon ore ezzone hótí goró, úñciyar! Arnóile tuáñra ezzon ore ezzone fúraifelaiba. **16** Añi hoóir de ki hoilé, Pak-Ruhr hédaiyote solo, tói tuáñra jisími moncá ókkol fura no goríba. **17** Kiyólla-hoilé jisími moncá ókkol toh Ruhr moncár ulða, aar Ruhr moncá ókkol jisími moncár ulða. Híin ekgún or ulða ekgún, hétolla bóuli tuáñra nizor ttu ziyán goittó monehoó híyan no goijjó. **18** Montor zodi tuáñra Ruhr hédaiyote solo, tuáñra Córíyot or tole no. **19** Jisími ham ókkol sáf zahér, híin óilde, zenákari, nafaki, bodmaci, **20** mutti fuñza, jadugari, ducconi, hoijja, ric, guccá, baná nizor fáida tuwa, obonaboni, faáta-faáti, **21** hásorot, nicábazi, nicá hái fúrutí gorá, héndilla aró boóut asé. Híin or baabute añi tuáñra re yaar age úñciyari dílam, aar héndilla abar óu dir de ki, zetará híin goré ítara Allar raijjo miras no faibo. **22** Montor ze gulagala Pak-Ruh ye dóraba híin óilde, muhábbot, kúci, cánti, sobór, meérbani, bálai, imandari, **23** noromi, edde nizoré sóoñlon. Ín or hélaf honó niyom-kaanun náí. **24** Zetará Mosih Isár ummot, ítara nizor jisím ore híyan or gizgizi edde moncá ókkol or fúañti kúruc ot dí marifélaye. **25** Añára zettót Ruhr zoriya zinda así, aiyó, añára Ruhr hédaiyote soli, **26** borái no

gorí, ezzon or túaro ezzone barík no kúwalai, ókkol, añárar Malik Isá Mosihr rahámot tuáñrar
edde ezzon ore ezzone hásorot no gorí. ruhr uore zari tákouk. Aamin.

6 Ó báiboináin ókkol, zodi honó manúc guná
gorát dóraha, tuáñra zetará Ruhr hédaiyote
zindigi haroór, tuáñra yóggwa re bicí norom
or sáañte sóiyit ainté; nize yó úñciyar táikko,
zeéne nize yó gunát fori no zogói. **2** Ezzon or
bór ezzone cóo, kiyólla-hoilé héndilla gorí beh
tuáñra Mosihr niyom fura gorí faribá. **3** Zodi
honókiye nize zeén no héen kúwala, íte nizoré
nize fáki dér deh. **4** Fottí ekzone nizor-nizor
ham ore tahákit gorí soóuk, baade ítara nizoré
oinno zon loi fúainna no gorí nizor ham or
zoriya nizoré lói borái gorí faribó. **5** Kiyólla-
hoilé zar-zar fuñzá tar ttu tar ttu bowá fore. **6**
Zee niki honó ustat ottu kalam or cíkka hásil
goré, íte hé ustat ore fottí ekkán bála jiníc or
bág douk. **7** Nizoré nize fáki no díyo, Alla lloi
toh tooñcábazi no háre. Zee ziín cíñre híin beh
daa. **8** Zee niki nizor jisím ot máze bis cíñre,
íte jisím ottu fósol ísafe dónco daibo; montor
zee niki Ruht máze bis cíñre, íte Ruh ttu fósol
ísafe ofúrani zindigi daibo. (aiōnios g166) **9** Aiyó,
añára bálai goitté-goitté óran no ói, kiyólla-
hoilé sóiyi októ ailé añára híyan or fósol daiyum
zodi añára hímmot no hárai. **10** Hétolla añára
ttu mouka táite manúc beggún ore bálai goríloi,
háasgori uitará re zetará Allar foribar or manúc.
11 Soó, añí hottór ðoóñr-ðoóñr hórof ókkol
lói tuáñrar hañise nizor áte lekír. **12** Zedúne
maincór muúntu barík kúwalaito sáa, tuáñra re
ázomi gorái bolla ítara beh bolazuri gorér deh.
Ítara héndilla goré de, zeéne ítara ttu Mosihr
kúruc olla bouli zulúm faa no fore. **13** Zetará
ázomi goijjá ítara nize úddwa Córíyot amól no
goré, montor toóu ítara saá de, tuáñra ázomi
goró, zeéne tuáñra jisím ot ázomi goráiyó de
híyan lói ítara borái gorí fare. **14** Lekín añr ttu
añárar Malik Isá Mosihr kúruc or baabute bade
ar honó kessúr borái goríbar dil no tákouk,
kiyólla-hoilé hé kúruc or duara duniyai toh añr
lla mora, aar añí duniyai lla mora. **15** Ázomi
gorár no gorár honó kimot náí, bólke Mosihr
duara noya mohóluk ówar beh kimot asé. **16**
Zetará hé niyom mozin sole ítara beggún or
uore, edde Allar asól Isráili ókkol or uore cánti
edde rahám óuk. **17** Yala lóti honókiye añré ar
duk no douk, kiyólla-hoilé añí añr gaat mazé
Malik Isár zohóm ókkol lói berair. **18** Báiboináin

Íficiól

1 Añí Pául, Allar moncá mozin Mosih Isár éggwa sáhabi. Ífisas cóor ot Allar ze pak bonda ókkol asé ítarar hañse lekír, zetará Mosih Isár bútoze imandár. **2** Tuáñrar uore Alla añárar Baf or edde Malik Isá Mosihr torfóttu rahámot edde cánti nazil óuk. **3** Añárar Malik Isá Mosihr Alla edde Baf or taarif óuk, zibá ye níki hárr dóilla ruúhani borhot ókkol asmani zagat añára re Mosihr usílaye diiyé, **4** zendilla íba ye íbar usílaye añára re duniyair foidayecir age lóti basí raikké, zeéne añára íbar nozor ot pak edde behosúr óizaygoi. Muhábbote **5** íba ye Nizor kúci edde moncá mozin age lóti añárar fáisela gorí raikké de, Isá Mosihr duara añára re íbar fuain banaitó; **6** hétolla yala íbar rahámot or mohímar taarif óibo, ziyán íba ye añára re íbar Adorja war usílaye goijjé. **7** Híyan óilde, añára hé Mosihr lou wór usílaye azad óiyi, yáni añárar guná-háta ókkol maf faiyí. Allar hé rahámot hotó doóñr, **8** ziyán íba ye añárar uore ódorbaára nazil goijjé. Nizor furafuri giyane edde buzá lói **9** íba ye kúcir sáañte Nizor gufon moncá re añárar hañse zahér goijjé, ziyán íba ye Mosihr duara fura goríbar fáisela goijjíl. **10** Híyan óilde, sóiyi októ furafuri ailé, asman zobin ot ziín asé híin beggún ore Mosihr bútoze ektófak ot anón. **11** Zibá ye hárr kessú Nizor moncár erada mozin goré, íba ye Nizor moksót mozin age lóti añárar ze fáisela gorí raikké, híyan olla bóuli añára Mosihr zoriya ekkán miras or bági yó óiyi, **12** zeéne añára zetará Mosihr uore agor ttu acá raikkí, añárar duara íbar mohímar taarif ó. **13** Tuáñra yó toh sóiyi kalam, yáni tuáñrar nejat or kúchóbor fúni hé Mosihr uore iman ainnó. Zeñtté tuáñra iman ainnó, íbar zoriya tuáñrar uore yó waada goijjá Pak-Ruh moór lagaidiya giyéh, **14** zibá óilde añárar miras or boona, otódin foijjonto lla zetódin Allar kinna bonda ókkol ore furafuri hálas gorífela nó zah, zeéne íbar mohímar taarif ó. **15** Hétolla toh tuáñra ttu Malik Isár uore ze iman asé edde Allar tamám pak bonda ókkol olla ze muhábbot asé, híin añí fúinni lóti, **16** tuáñra lla cúkuriya gorá bon gorí nó felai, bólke añr duat tuáñra re yaad rakí. **17** Añí magi de, añárar Malik Isá Mosihr Alla, zibá mohímar Baf, íba ye tuáñra re giyan or edde Alla re zahér goré de Ruh dee fán, zeéne tuáñra íba

re beétor sinó. **18** Añí aró dua gorí de, tuáñrar díil or suk kún kúlouk, zeéne tuáñra zano de, íba ye tuáñra re ze acá dii ðaikké híyan kii, íba ye Nizor pak bonda ókkol olla ze taajuippa miras raikké híyan hotó doóñr, **19** aar íbar ze kudurut añára imandár ókkol or hañse ham gorér híyan keén címa sára doóñr. Híyan óilde doóñr kudurut waán, **20** ziyán estemal gorí íba ye Mosih re mora ttu zinda goijjé aar asmani zagat íba re Nizor den ðák ottu buágaraiye, **21** hárr dóilla hókumot or uore, adíkar or uore, taakot or uore, sóddarir uore edde zetó dóilla nam túwa gíyeh híin beggún or uore, siríf e jáhan ot no bólke aibó de jáhan ot óu. (aión g165) **22** Alla ye hárr kessú íbar foor tole gorídiye, aar íba re hárr kessúr matá banai zomát ore diifélaiye; **23** zibá óilde íbar gaa; íba zibá ye níki beggúlla beggún furaiféle, íba hé zomát lói beh furafuri ó.

2 Tuáñra toh tuáñrar hosúrit edde gunát mora accíla, **2** héñtte tuáñra e duniyair toutorika mozin edde boiyar or uore hókumot goré de sóddar or mozin beh solitá, zibá óilde ruh ubá zibá ye níki yala nafórmán ókkol or bútoze ham gorát asé. (aión g165) **3** Becók añára beggúne yó toh yaar age ítarar dóilla jisím or ayaci mozin solitám; héñtte añára jisím or edde mon or azzu ókkol fura goittám, aar oinno maincór dóilla fítorote añára yó gozzob or laayek accílám. **4** Montor Alla, zibá rahám or tuangor, íba ye añára re goijjé de hé doóñr muhábbote, **5** añára re zeñtté añára añárar nafórmanit mora accílám héntu úddwa Mosihr fúañti zinda goijjé. Tuáñra rahámote beh nejat faiyó. **6** Añára Mosih Isár bútoze de hétolla íba ye añára re Mosihr fúañti zinda gorí tulí íbar fúañti asmani zagat buágaraiye, **7** zeéne Mosih Isár bútoze añárar uore ze meérbani óiye híyan or duara íba ye aiyér de zobana ókkol ot Nizor rahámot or ocímana tuangori dahái fare. (aión g165) **8** Kiyólla-hoilé tuáñra iman or zoriya rahámote beh nejat faiyó; híyan tuáñra nizor torfóttu no, híyan óilde Allar hádiya; **9** híyan honó ham or dam óu no, zeén níki honókiye borái gorí faitto. **10** Kiyólla-hoilé añára de íbar át or mohóluk, añára re Mosih Isár bútoze foida gorá gíyeh de toh gom ham uúin gorí solitó, ziín añára gorí bolla Alla ye age lóti toiyar raikké. **11** Hétolla yaad raikkó de, tuáñra zetará zormo ttu lóti Beyohúdi, tuáñra re yaar age uitará “be-ázomi

goijjá” ðakitó zetará nizoré nize “ázomi goijjá” dabi goré, ze ázomi insán or áte jisím ot gorá zah. **12** Aró yaad raikkó de, héntte tuáñra Mosih ttu aladá accíla, Boni Isráil ottu maárum accíla, aar Allar waadar razinama ókkol or bági nu accíla; tuáñra ttu honó acá nu accíl aar duniyait tuáñra Alla sára accíla. **13** Montor yala toh tuáñra zetará ek hale duré accíla, Mosih Isár bútoe tuáñra re Mosihr lou wór usílaye ðáke anífela gíyeh. **14** Kiyólla-hoilé íba beh añárar cánti, zibá ye níki hé duní gún ore ek goijjé, aar alok goré de mazór ðebal ziyán accíl híyan báñgífelaiye. **15** Íba ye híyan Nizor gaa kurbandi di ducconi re, yáni hókum edde niyom asé de Córíyot ore baatel gorífelai goijjé; zeéne íba ye Nizor bútoe hé duní gún ore milai ekgwá noya insán banai cánti aní fare, **16** aar íba ye hé duní gún ore ek gaa gorí kúruc or usílaye Alla lloi bonot gorídi fare, ziyán lói hé ducconi re hótom gorífelaiye. **17** Íba ye toh aái, tuáñra zetará duré accíla, tuáñrar hañse yó cántir tobolik goijjíl, aar zetará ðáke accíl ítarar hañse yó cántir tobolik goijjíl, **18** kiyólla-hoilé añára duní gúne íbar zoriya beh ekí Ruhr usílaye Baf or cáikkat zai fari. **19** Hétolla, tuáñra ar for edde bidecóitta no, bólke Allar oinno pak bonda ókkol ottu ze nagorita asé híyan tuáñra ttu yó asé, aar tuáñra yó Allar foribar or manúc, **20** zetará re níki sáhabi gún or edde nobi ókkol or buniyadir uore banaitulá gíyeh, ziyán or ebbe zoruri kunar-fattór gwá óilde Mosih Isá Nize. **21** Íba llói guñra gór or híssa ókkol beggún zura loi Kúda lla ekkán pak gór bone. **22** Íba llói tuáñra re yó oinno maincór fúañti milai endilla ekkán zaga boni bolla banaitulá zár, zeéré Ruh ísafe Alla táke.

3 Añí Pául zee níki tuáñra Beyohúdi ókkol or wasté Mosih Isár hédmotdari goróne bondit así, añí hétolla toh Allar hañse dua gorí. **2** Becók Allar rahámot or entezam or baabute tuáñra fúinno, ziyán tuáñrar hañse foónsaibar zimmadari añré diiya gíyeh, **3** yáni, gufoni waán ziyán íba ye wahí dí añré zanaiyé, ziyán yaar age barír sáañte lekífelaiyi. **4** Híyan foríle tuáñra zani faribá, Mosihr gufonir baabute añí hoddúr buzí, **5** ziyán oinno zobana ókkol ot insán-zatir hañse zahér gorá nó zah, zendilla yala íbar pak sáhabi edde nobi ókkol or hañse Pak-Ruhr duara zahér gorá gíyeh. **6** Hé gufoni óilde yían, kúchóbor or usílaye Beyohúdi ókkol óu Yohúdir

fúañti mirasdár óiye, ekí gaar híssa óiye, edde waada waán or bági óiye ziyán Mosih Isár duara gorá gíyeh. **7** Allar rahámot or hádiyaye añí hé kúchóbor or háadem boinní, ziyán íbar kudurut or bole añré diiya gíyeh. **8** Allar tamám pak bonda ókkol or bútoe añí ebbe niróc cwa de óile yo, añr uore e rahámot tán óiye, Beyohúdi ókkol or hañse Mosihr ocímána dón or tobolik goríbar, **9** edde gufoni waán or entezam tamám manúc ókkol ore daháibar, ziyán guzorigiyói de zobana ókkol foijjonto Allar hañse lukaiya accíl, zibá ye níki hárr kessú foida goijjé, (aíñ **g165**) **10** zeéne yala zomát or duara Allar ðoilla-boðoilla gíyan or baabute, asmani zagat asé de hókumot-goróya edde adikari ókkol ore zanaiiya zah. **11** Íba ye híyan Nizor abadulabadi moksót mozin beh goijjíl, ziyán ore íba ye Mosih Isá añárar Malik or duara fura goijjé, (aíñ **g165**) **12** zibár zoriya edde zibár uore iman anóne añára kúlamela góri edde hímmot or sáañte Allar cáikkat zai fari. **13** Hétolla, añí tuáñra re aros gorír, añí tuáñrar zoriya ze duk-mosibot fair híine hímmot no háraiyo, kiyólla-hoilé híin tuáñrar izzot olla beh ór. **14** Añí hétolla oh Baf or muúntu añrú félai, **15** zibár héntu asman zobin or hárr zandár ókkol foida óiye. **16** Añí dua gorí de, íba ye Nizor mohímar tuangori mozin íbar Ruhr duara tuáñrar dil ot bol di tuáñra re mozbut goré fán, **17** zeéne iman or usílaye Mosih tuáñrar dil ot táke. Añí aró dua gorí de, muhábbot ot cínyor gasái edde hé buniyadit ðiki táki tuáñra zen **18** tamám pak bonda ókkol or fúañti buzí faro de, Mosihr hé muhábbot hotó coça, hotó lamba, hotó uñsol, edde hotó mur, **19** aar hé muhábbot ziyán zani faribár baáre, tuáñra zen híyan zani faro, zeéne tuáñra Allar tamám furayir héddur furaiya óizogoi. **20** Zibá ye añárar bútoe ham goré de kudurut mozin, añára magi de edde sinta gorí de híin beggún or túaro boút becábici gorí fare, **21** íbar mohíma zomát or duara edde Mosih Isár duara, hárr zobana edde abadulabad foijjonto hámica ówat tákouk. Amin. (aíñ **g165**)

4 Hétolla añí zee níki Malik or wasté bon así, añí tuáñra re aros gorír, tuáñra re ðahaité ziyán olla ðaha gíyeh híyan or laayek zindigi haço; **2** furafuri cídaye edde norome, sobóre, ezzon ore ezzone muhábbote bordac gorí, **3** cántir ban or bútoe Ruhr sólluk ðikai rakí bolla hárr ðoilla kucíc gorí. **4** Jisím asé de ekkán,

aar Pak-Ruh asé de ekzon, zendilla tuáñra re ðahaité ekkán acá lla beh ðaha gíyéh; **5** Malik asé de ekzon, iman asé de ekkán, báp̄tisma asé de ekgwá, **6** beggún or Alla edde Baf asé de yó ekzon, zibá beggún or uore beggún or duara ham goré edde beggún or bútoe asé. **7** Montor añára fottíkiyor uore Mosihr baṛidiya mozin rahámot óiye. **8** Hétolla pak-kalame fórm̄ar de, “Íba zeñtté asman ot uittéḡoi, héñtte bondi ókkol fúañti looi gýl, aar Íba ye maincóre hádiya ókkol dífl.” **9** “Íba uittéḡoi” or maáni kii? Híyan or maáni óilde, Íba nise duniyair zagat óu laimmíl de asé. **10** Zibá laimmíl Íba óilde ubá zibá asman beggún or uore uittéḡoi, zeéne Íba ye hárr kessú re bóraifelai fare. **11** Íba Nizebaze hodún ore sáhabi óibar, hodún ore nobi óibar, hodún ore tobolik-goróya óibar, hodún ore zomát or soroya óibar, edde hodún ore ustat óibar niyamot diiyé, **12** pak bonda ókkol ore Allar hédmot goittó toiyar gorí bolla; zeéne héndilla góri Mosihr gaa barí uré, **13** otókkal foijjonto zetókkal añára beggún iman ot ek sólluk nó ói edde Allar Fua re zanifélai nó fari, aar oddúr balok nó ói zeddúr óile Mosihr furayir héddur foón̄se. **14** Tarfore añára ar fuain no tákiyum, maincé saláki edde dúkabazi gorí oinno kiyó re gollot ot loizai bolla ze taalim deh, hé taalim ot boyare tuillá goir or dóilla añára ikká uikká d́ulat no tákiyum, **15** bólke muhábbote hók hotá hoói yore fottí mikká ttu barí urí Ubár balok gaa boniyum zibá óilde matá, yáni Mosih, **16** zibár zoriya guñra gaa gán hárr girár modote zura loh edde dóijja táke, aar zeñtté fottí híssa ye zeddúr ham gorá fore héddur goré, tói hé gaa gán baré aar híyane nizoré muhábbot or sáañte banaitulé. **17** Hétolla, Malik or name añi tuáñra re hoóidir, Beyohúdi ókkole zendilla nizor behar kíyale sole, tuáñra ar héndilla góri zindigi no haraiyó, **18** kiyólla-hoilé ítarar buz andár ot fori asé, aar ítarar díl dorór zoriya ítara ttu Allar baabute zankari no tóne ítara Alla ye dee de zindigi ttu maárum ói asé; **19** ítara ttu honó córomhaya ná; ítara nizor ttu hárr dóilla nafak ham goríbar ze azzu asé híin gorí bolla nizoré ayacit gosáidiye. **20** Montor tuáñra toh Mosihr baabute héndilla taalim faiyó de no, **21** bólke tuáñra oh sóiyi mozin Íbar baabute fúinno aar Íbar torfóttu taalim faiyó, ze sóiyi hé Isár hañse asé, **22** ki hoilé, tuáñrar agor ze solasol asé, hé furana manúc ore fúañti kúli félaido, zibá dúkabazir

azzu loi bigirizargói; **23** edde Alla re tuáñrar demak or kíyal ore noya goittó doh; **24** aar tuáñra noya manúc ore findífelo, zibá re Allar súrote sóiyi forhéḡgarir edde pakir sáañte foida gorá gíyeh. **25** Hé ísafe, tuáñra fottíkiye misá hotá howá félaido aar ezzon loi ezzone hók hotá hoó, kiyólla-hoilé añára beggún toh ek gaar híssa ókkol. **26** “Guccá ur̄le ur̄ouk, montor guná no goijj́ó.” Tuáñrar guccá re beil gólibar age faní gorífelaiyo; **27** lbilc ore mouka no diyo. **28** Sur ókkole ar suri no goijj́ó, bólke gom fecá banai nizor áte meénnot goró; zeéne muútac ókkol ore dii bolla nizor ttu kessú táke. **29** Tuáñrar muk ottu honó bura hotá no neelaiyó, bólke zín oinno zon ore ítarar zorurot mozin banaitulí bolla gom híin beh neelaiyó, zeéne fúnoya ókkole híin ottu fáida faa. **30** Aar Allar Pak-Ruh re naras no goijj́ó, zibá re tuáñrar uore otókkal foijjonto lla moór lagaidiya gíyéh, zetókkal foijjonto hálas goríbar din nú aiyé. **31** Hárr dóilla monhalahali, rak, guccá, uzor di hoijja diya, bodnam gorá, edde hárr dóilla duconni tuáñra ttu dur gorífelo. **32** Ezzon ore ezzone meér̄bani goró edde fet̄furani dahó, aar ezzon ore ezzone endilla maf goró, zendilla Alla ye yó tuáñra re Mosihr bútoe maf gorídiye.

5 Hétolla hoóir, tuáñra Allar adorda fuain ísafe, Íbar kofiyot loh; **2** aar endilla gori muhábbot ot solo zendilla Mosih ye yó añára re muhábbot gorí añára lla bóuli Nizor zan ore kúc̄bod̄ar kurbani ísafe Allar hañse kurbani dífélaiye. **3** Montor tuáñrar bútoe zenákarir, edde honó dóilla nafakir yáh lalsír hotá úddwa no tákouk, kiyólla-hoilé híin Allar pak bonda ókkol olla t́ík no. **4** Héndilla, honó bereijja hotá, behar hotá, yáh b̄railla mockari yó no tákouk, zín óu t́ík no; yárbodol Allar cúkur goró. **5** Kiyólla-hoilé tuáñra toh fakkagori zano, honó zenákur, nafak manúc yáh lalósbon ottu Mosihr edde Allar raij̄jot honó miras náí deh. Lalós gorá mutti fuñza loi borabor. **6** Saiyó, honókiye tuáñra re galuwai gorí dúka no de fán, kiyólla-hoilé híin or zoriya éna nafórman ókkol or uore Allar gozzob aiyé. **7** Hétolla, tuáñra ítara llói honó bazá no raikkó. **8** Kiyólla-hoilé tuáñra toh ek hale andár accíla, montor Malik or ummot ísafe yala tuáñra nur; hétolla nur or fuain dor dóilla góri solo, **9** kiyólla-hoilé nur or gulagala óilde toh hárr dóilla bálai, forhéḡgari, edde hãñsa; **10** aar Malik zín lói kúci ó, zasaí gorí híin goró. **11**

Andár or befáida ham ot córik no óiyo, bólke hífn or asóliyot zahér goró; **12** kiyólla-hoilé manúc ítara aiddone zín goré hífn or baabute hoón úddwa córmor hotá. **13** Montor nure zahér goillé toh hárr kessú zahér óizagoi, kiyólla-hoilé zín zahér óizagoi hífn óilde nur. **14** Hétolla toh endilla asé, “Ó gúm or manúc ókkol, seton óizagoi, mora ttu zinda ó, tói Mosih tuáñrar uore zolibó.” **15** Hé ísafe, saiyo tuáñra hondilla soloór; bekuf or dóilla no bólke buddíman or dóilla góri solo; **16** honó mouka na háraiyo, kiyólla-hoilé e zobana hóraf. **17** Hétolla hoóir, bekuf no óiyo, bólke Malik or moncá kii de buzó. **18** Córab hái tuúil no óiyo, kiyólla-hoilé híyane tuáñra re ayaci gorá baibó. Yárbodol Pak-Ruh lói furaiya ó, **19** aar Zobur Córif or kawali, seér, edde ruúhanir gozól ókkol or duara ezzon loi ezzone hotá hoó; héndilla gorí tuáñrar dil ottu Malik or name seér goó edde bazana bazo, **20** aar hámica hárr kessú lla añárar Malik Isá Mosihr name Alla Baf or cúkur goró. **21** Mosihr door rakí tuáñra nizoré ezzon ore ezzone gosáido. **22** Bouwáin ókkol, tuáñra nizoré nizor-nizor hócom or hañse gosáido, zendilla Malik or hañse gosáidiyo. **23** Kiyólla-hoilé hócom óilde toh bou wór matá, zendilla Mosih yó zomát or matá; aar íba óilde gaar Nejatdoya. **24** Hétolla hoóir, zomáte zendilla nizoré Mosihr hañse gosáidiye, héndilla bouwáin ókkol ottu yó hárr kessút nizoré nizor-nizor hócom or hañse gosáidiyar zorur. **25** Hócom ókkol, tuáñra nizor-nizor bou wóre muhábbot goró, zendilla Mosih ye yó zomát ore muhábbot goijjé aar híyan olla Nizor zan difélaiye, **26** zeéne íba ye kalam or duara hé zomát ore faní lói dúifelai pak-sáf gorí fare, **27** zeéne íba ye hé zomát ore eén nurani banai Nizor hañse házir gorái fare, zibát honó dak, kuñraiya yáh héndilla honó kessú náí, bólke híba pak edde behosúr. **28** Hétolla, hócom ókkol ottu nizor-nizor bou wóre nizor gaar dóilla muhábbot gorár fóros. Zee niki nizor bou wóre muhábbot goré, íte nizoré muhábbot goré deh; **29** honókiye toh nizor gaa re honódin nafórot goijjé de náí, bólke híyan ore fali yore zotton beh goré, zendilla Mosih ye yó zomát ore goré; **30** kiyólla-hoilé añára de íbar gaar híssa ókkol. **31** “Híyan olla toh morotfua ye nizor bafmaa ttu zuda ói nizor bou wór fúañti tákibo, aar ítara duní zon ek jisím óizayboi.” **32** Híyan ekkán doóñr gufoni, lekin añí Mosih edde zomát or mutalek hoóir deh. **33** Zeén óibo óuk, tuáñra

fottíkiyo ttu yó nizor-nizor bou wóre nizor dóilla muhábbot gorár zorur, aar bouwáin ókkol ottu yó nizor-nizor hócom ore izzot gorár uzu kíyal rakár zorur.

6 Fuain ókkol, tuáñra Malik or ísafe, tuáñrar bafmaa hotábattara mano; kiyólla-hoilé híyan toh tík. **2** “Bafmaa re izzot goríba” óilde waadar sáañte foóila hókum, ki hoilé, **3** “Zeéne tuáñr bálai ó, aar tuñí e duniyait lamba hóiyat foo.” **4** Bafáin, tuáñrar fuain dore guccá tulí no diyo, bólke Malik or torbiyote edde nosiyote ítara re doóñr goró. **5** Gulam ókkol, dil or ehélasir sáañte izzote edde doore tuáñrar duniyaibi girós ókkol or hotábattara mano, zendilla tuáñra Mosihr hotá óito mainta; **6** maincóre kúci goróya ókkol or dóilla daháibar niyote no, bólke Mosihr gulam ísafe dil ottu Allar moncá ókkol fura gorí bolla héndilla goró. **7** Tuáñra endilla juse hédmot goró, zeén níki Malik ore beh gorór, insán ore no; **8** kiyólla-hoilé tuáñra toh zano, zee ze gom ham goré íte híyan or boccíc Malik or torfóttu faibo, íte gulam óuk yáh begulam. **9** Girós ókkol, tuáñra yó ítara re héndilla beh sólluk goró, aar ítara re dómki díya félaido; tuáñra toh zano, asman ot asé de íba óilde ítara edde tuáñrar Girós, aar íbar hañse honó ektorfía náí. **10** Ahéri hotá óilde, tuáñra Malik loi laigga táki íbar kudurut or bole mozbut óizogoi. **11** Larái lla Allar díiya tamám átiyar findífelo, zeéne tuáñra íbilíc or sail ókkol or ulda mozbut gori tíyai faro. **12** Kiyólla-hoilé añárar larái toh honó insán lói no, bólke hókumot-goróya ókkol lói, kémota ola ókkol lói, edde e andár duniyair hákim ókkol lói; yáni asmani zagat asé de íbilíc or bútferot ókkol lói éna. (aíon g165) **13** Hétolla, tuáñra Allar díiya hárr átiyar findífelo, zeéne ze díin tuáñra re íbilíce hámla goríbo héñtte mukabela gorí faro, aar hárr kessú hótom gorífelai mozbut gori tíyai táki faro. **14** Hétolla hoóir, sóiyi lói guṭ di, forhésgarir zama findí, **15** edde cántir kúchóbor tobolik gorí bolla nal tákito centár findí, mozbut gori tíyai táko. **16** Híin beggún or fúañti iman or dál loirakó, ziyán lói tuáñra íbilíc or tamám ooini tir ókkol nifáifelai faribá. **17** Nejat ore tuñir dóilla góri matát doh, aar Pak-Ruhr toluwar loirakó, ziyán óilde Allar kalam. **18** Pak-Ruhr bole hámica hárr dóilla dua edde fóriyat ókkol gorát táko; aar hé niyote furafuri sobór or sáañte seton táko edde Allar

tamám pak bonda ókkol olla dua gorát táko. **19** Añr lla yó dua goijjó, zeéne zeñtté aní boiyan gorí héñtte añré endilla lofzó ókkol diiya zah zín lói añí hímmot góri kúchóbor or gufoni zahér gorí faijjum, **20** ziyán olla añí bon así de hálót ot óu ezzon nomainda ísafe ham gorír. Dua goríba de, añí híyan boiyan goitté eén hímmot or sáañte gorí fari fán, zeddúr góri añr ttu goríbar zorur. **21** Añr hálót keén asé aar añí kii gorír híin tuáñra zano fán, Malik or bútoe asé de adórja báí edde biccácdar háadem Tukikuse tuáñra re hárr kessú zanaidibo, **22** zibá re añí tuáñrar hañse etollá diferáir, zeéne tuáñra añárar baabute zano, aar yóggwa ye zeéne tuáñrar dil ot tosólíi déh. **23** Tuáñra báiboináin dor uore Alla Baf or edde Malik Isá Mosihr torfóttu cánti, iman, edde muhábbot nazil óuk. **24** Zetará añárar Malik Isá Mosih re ofúrani muhábbote muhábbot goré, ítara beggún or uore rahámot zari tákouk.

Filíppaiól

1 Añi Pául, añr fúañti Timóti yó asé. Añára óilam de Mosih Isár gulam. Filíppi cóor ot Mosihr bútoe Allar ze pak bonda ókkol asé ítara beggún or hañse lekír; hére zomát or neta ókkol edde háadem ókkol óu gólaiya asé. **2** Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **3** Añi tuáñra re zetóbar yaad gorí, hétobar añr Allar cúkur gorí, **4** aar tuáñra beggún olla gorí de hárr dua hámica kúcir sáañte gorí, **5** kiyólla-hoilé tuáñra toh foóila din ottu lóti kúchóbor fólar ham ot aij foijjonto córik asó. **6** Añr ttu yíán ekin asé de ki, zibá ye tuáñrar bútoe ze ekkán gom ham cúru goijjé íba ye híyan ore Mosih Isá aibó de din foijjonto solai loizai furussat goríbo. **7** Tuáñra beggún or baabute héndilla kíyal rakón añr lla tík, kiyólla-hoilé tuáñra toh añr dil ot asó, aar añi bon táki yáh kúchóbor or sófai dí híyan or sóiyi re sábut gorí, tuáñra beggún toh añr fúañti Allar rahámot or bági. **8** Alla añár gobá asé, Mosih Isár adore añr ttu tuáñra beggún olla hoddúr furer. **9** Añi dua gorí de, tuáñrar muhábbot sóiyi giyan edde hárr dóilla buddír sáañte zetó éto bicí barát táke fán; **10** zeéne tuáñra zín uttom híin forók gorí zano, aar Mosih aibó de din foijjonto pak edde behosúr táko, **11** Isá Mosihr duara forhésgarir gulagala ókkol aiyé de híin lói bóraiya ói yore; zeéne Allar mohíma edde taaríf ó. **12** Ó báiboináin ókkol, añr ttu tuáñra re yíán zanaidito monehoór de ki, añr uore zín-zín guzoijjé, híine kúchóbor zetó éto fólat modot goijjé, **13** zeén níki añi Mosihr wasté bon así de híyan razmohól or tamám faáradar ókkole edde baki manúc beggúne zani faijjé. **14** Aar añr bon or zoriya bicí zon imandár báiboináin dor ttu Malik or uore bóracá eddúr barígiyoi zeén níki ítara no ðoorai kalam tobolik gorí bolla aró bicí hímmot faiyé. **15** Becók, hodúne ricé edde zibbat or niyote Mosihr tobolik goré, montor hodúne bála niyote goré de yó asé. **16** Fisór gúne híyan muhábbote beh goré, kiyólla-hoilé kúchóbor or sófai dí bolla añré basílowa gíyeh de híyan ítara zane. **17** Montor agor gúne Mosihr tobolik goré de ehélasir sáañte no bólke nizor fáidar niyote; kiyólla-hoilé ítara fáare de, añi bon así de hére ítara añr lla mosibot foida gorí faribó. **18** Tói kii óiyé? Asól hotá óilde, bét

dóri óuk yáh sóiyi niyote óuk, fottí mikká ttu de Mosihr tobolik éna ór; hétolla añi kúci. Ói, aar kúci ówat tákiyum óu, **19** kiyólla-hoilé añi zani de, añr uore zín-zín guzorer híin or notiza ísafe añi hálas óiyum. Híyan tuáñrar duaye edde Isá Mosihr Ruhr modote beh óibo. **20** Añr ttu furafuri ekin edde acá asé de ki, añr ttu honó kessút córminda ówa no foribó, bólke eén furafuri hímmot tákibo zeén níki hámicar dóilla yala yó añr gaar duara Mosihr mohíma zahér óibo, añi zinda táki yáh mori. **21** Kiyólla-hoilé añr lla Mosih óilde zindigi, aar moot óilde laf. **22** Zodi añi haiyaye zinda táki, añi kimoti ham or meénnot ókkol gorí faijjum. Hétolla hon nán basítam añi hoi no fari. **23** Añi duiharat foijjé: monehoór de, duniyai ttu zaigói Mosihr fúañti tákito, kiyólla-hoilé híyan boóut beétor óibo; **24** montor tuáñrar wasté añi haiyaye basi táka toh aró zorur. **25** Híyan or ekine añi zani de, añi basi táikkum aar tuáñra beggún or fúañti tákiyum, zeéne tuáñra iman ot baró aar híyan ot kúci táko. **26** Añi tuáñrar hére abar ailé, tuáñra ttu Mosih Isár bútoe asé de borái añr zoriya bicí hoilé bicí barízayboi. **27** Siríf endilla goró, ki hoilé, tuáñrar solasol ore Mosihr kúchóbor or laayek bano, zeéne añi aái yore tuáñra re saái yáh gairházir táki, añi zen tuáñrar baabute fúni de, tuáñra ek ruht máze mozbut gorí tíyaiya asó aar kúchóbor ottu foida ó de iman olla ek mone milizúli bicí meénnot gorór. **28** Tuáñrar muhálef ókkol ore honó hálate no ðooraiyó, ziyán óilde ítara lla hálak óibar ekkán nicán, lekin tuáñra lla nejat faibar, ze nejat óilde Allar torfóttu. **29** Kiyólla-hoilé tuáñra re toh Mosihr wasté toóufik diiya gíyeh de siríf íbar uore iman aníbar no, bólke íbar wasté duk fai bolla yó. **30** Hétolla toh tuáñra yó duk uúin foór zín añi faáilam de deikkíla aar yala yó fair de fúnor.

2 Hétolla, Mosihr ummot ísafe tuáñra ttu honó josba tákile, muhábbot or honó tosólíi tákile, Pak-Ruhr honó taalukat tákile, aar honó ador edde rahám tákile, **2** endilla gorí añr kúci fura goró: ek mon ói yore, ekí dóilla muhábbot rakí yore, zane ek ói yore, edde ekí kíyal rakí yore. **3** Nizor fáidar niyote yáh barík kúwalai bolla kessú no goijjé, bólke niróc ói oinno zon ore nizor túaro uttom báfiyo. **4** Siríf nizor fáida no saiyó, oinno zon or fáida yó saiyó. **5** Tuáñrar bútoe e kíyal rakó ziyán Mosih Isá ttu yó accíl: **6** íba toh Allar súrote accíl de óile yo, Allar

fúainnagiri re sibi dóri rakídito nó saá, 7 bólke íba ye Nizoré háli gorífelail, gulam boni, insán ísafe zonom loi yore. 8 Íba ye insáni cokóle táki, moot foijjonto, hoitó sailé, kúruc or uore more foijjonto fórmadar ói yore Nizoré niróc goijjíl. 9 Hétolla bóuli toh Alla ye yó íba re bicí uñsol tokkat tuillé, aar íba re nam waán diiyé ziyán hárr nam or túaro doónr, 10 zeéne Isá nam ot hárr kiyé añrú féla, híin asman ot tók yáh zobin ot, yáh zobin or nise; 11 aar hárr zobane zen Baf Allar mohíma ói bolla cíkar goré de, Isá Mosih óilde Malik. 12 Hétolla, ó añr adorja ókkol, zendilla tuáñra siríf añr cáikkat no, bólke añr gairházirit hámica aró fórmadar accíla, héndilla tuáñra yala doore edde hafanir sáañte nizor nejat or ham gorízo, 13 kiyólla-hoilé tuáñrar bútoe toh Alla ye éna ham gorér, tuáñra re íba ye kúci ó de erada fura goríbar mon edde amól dí bolla. 14 Hárr kessú cékayot sára edde torkatorki sára goijjó, 15 zeéne tuáñra behosúr edde maasum boni, e zobanar țerá edde báañra maincór dormiyan ot Allar dak sára fuain țóoro, zetarár mazé tuáñra duniyait serak or dóilla zoloór, 16 kiyólla-hoilé tuáñra toh zindigir kalam ore mozbut or sáañte dóri asó; hétolla Mosihr waafesir din añí borái gorí faijjum de, añí no behar duñijí aar no behar meénnot goijjí. 17 Fúno, zodi añr ttu tuáñrar iman or hédmot or edde kurbanir uore nizoré úddwa roc kurbanir dóilla dálidiya fore, toóu añí kúci aar tuáñra beggún or fúañti kúci goijjúm. 18 Tuáñra yó héndilla kúci ó, aar añr fúañti kúci goró. 19 Añí acá gorír, Malik Isá ye sailé añí Timóti re tuáñrar hére hára diferáiyum, zeéne tuáñrar hóbor fúni añí yó tosólí fai. 20 Kiyólla-hoilé añr ttu yóggwar dóilla ar kiyó náí, zee niki tuáñra lla ehélasir sáañte sintabáfana goré. 21 Beggúne nizor gún ot beh lagi asé, Mosih Isár gún ot no. 22 Lekin Timótir kimot sábut óiye de híyan toh tuáñra zano, ki hoilé, fua ye zendilla baf or fúañti meénnot goré, héndilla yóggwa ye añr fúañti kúchóbor fóla lla meénnot goijjí. 23 Hétolla añí acá gorír, añr hálót kii óibo híyan zani faille mottor añí yóggwa re tuáñrar hére diferáiyum. 24 Aar añr ttu Malik or uore bóraca asé de ki, añí nize yó tuáñrar hére bicí hára aiccúm. 25 Lekin añr imandár báí Epaforoditus ore tuáñrar hére waafes diferáidon zoruri bouli báfir, zibá añr sáañti ham-goróya edde sáañti fóous, aar tuáñrar hóborgwa yó, zibá re añr zorurot ókkol fura gorí bolla diferáila. 26 Kiyólla-

hoilé yóggwa ttu tuáñra beggún ore saitó kúb monehoór, aar yóggwa ocúk ot foijjé de híyan tuáñra fúinno de hétolla yóggwa ferecanit asé. 27 Bécok, yóggwa ocúke moron-moron óoil, montor Alla ye yóggwar uore rahám goijjí; siríf yóggwar uore no, bólke añr uore yó, zeéne añr ttu ferecanir uore ferecani no táke. 28 Hétolla yóggwa re diferái bolla añr ttu aró bicí kíyal óiye, zeéne tuáñra yóggwa re abar deki kúci ó, aar añr sinta yó home. 29 Hétolla yóggwa re Malik or ummot ísafe furafuri kúcir sáañte kobul goijjó, aar héndilla maincóre izzot goijjó; 30 kiyólla-hoilé yóggwa ye Mosihr ham or wasté moot or foñt ot óoil, aar tuáñrar torfóttu añr lla ze hédmot homi accíl híin adai gorí bolla nizor zan foijjonto hótarat félail.

3 Ahérit hoóir, ó añr báiboináin ókkol, Malik or ummot de hétolla kúci goró. Añr ttu ekí hotá lekíte duk no lage, kiyólla-hoilé héndilla goillé tuáñra héfazot tákiba. 2 Kuñir ókkol ottu uñciyar táikko, yáni hóraf ham-goróya uitará ttu zetará jisím harí-síri ázomi goré. 3 Kiyólla-hoilé añára éna asól ázomi goijjá manúc, zetará Allar Ruhr hédaiyote ebaadot gorí, Mosih Isá re lói borái gorí, aar jisím or uore honó bóraca no gorí, 4 zodi añí nizor ttu yó jisím or uore bóraca goríbar waja asé de óile yo. Honókiye ítar ttu jisím or uore bóraca goríbar waja asé bóuli táare de óile, añr ttu toh aró bicí asé: 5 añré añçto din ot din ázomi gorá gíyl; añí Boni Isráili, Binyamin or háandan ottu, añí Hibraniól or ézzon Hibrani. Córivot amól gorár baabute hoilé, añí ézzon Férocí accílam; 6 jus tákar baabute hoilé, añí Mosihr zomát ore zulúm goittám; aar Córivot forhésgar ówar baabute hoilé, añré nidak faa zayto. 7 Lekin zín añr lla nofá accíl, yala híin ore Mosihr zoriya lussán bouli goni. 8 Aró hoitó sailé, añí hárr kessú re lussán bouli goni de kiyólla-hoilé Mosih Isá añr Malik ore zanat ódorbaára kimot asé, zibár zoriya niki añí hárr kessúr lussán cóoiyi aar híin ore fúrari bouli goni, zeéne añí Mosih re fai, 9 aar añré íbar bútoe faa zah, Córivot amól goillé faa zah de héndilla nizor kucí or forhésgarir zoriya no, bólke Mosihr uore iman aníle faa zah de forhésgarir zoriya, ze forhésgari Allar torfóttu iman or zoriya beh aiyé. 10 Añr ttu hé Mosih re, yáni íbar zinda ówar kudurut ore edde íbar dukkót híssa ówa re zainto monehoór, íbar moot or nomunaye mori-mori; 11 zeéne

honó bote ańń mora ttu zinda ówar héddur foijjonto yó fońńsi. **12** Endilla no de ki, ańń híyan furafuri faifélaiyi yáh ańń furafuri sóiyi ógiyigoi, montor ańń waán dórifelai bolla beh duńrat ası zıyán or niyote Mosih Isá ye ańré dórifelaiye. **13** Báiboináin ókkol, ańń nizoré nize híyan aijjó dórifelaiyi bouli no ńári, lekin ańń ekkán gorı de híyan óilde: fisé zıń asé híin ore foóraifelai muńtu zıń asé híin or heře fońsibar kucı. **14** Ańń monzil-moksót or uzu duńrat ası de, Mosih Isár duara asman or uzu Allar ze ńak asé, boccıc ísafe yıba hásıl gorı bolla. **15** Hétolla, ańára zetará balok ası, ańára beggún ottu hé kıyal rakár zorur. Aar zodi honó kessút tuáńra ttu oinno ńoilla kıyal táke, Alla ye tuáńra re híyan óu zahér gorıbo. **16** Zeén óibo óuk, ańára zeddúr ot fońńiccigoi héddur or mutafek zindigi harai. **17** Báiboináin ókkol, tuáńra beggúne ańr ńoilla góri solat táko, aar uitarár hıkka díyan diyo zetará ańára ttu tuáńra deikkó de hé nomuna mozin sole. **18** Kıyólla-hoilé ańı toh tuáńra re yıán boóut bar hoóılam, aar yala hańdi-hańdi yó hoóır, endilla boóut zon asé zetará Mosihr kúruc or ducon or ńoilla góri sole; **19** ítarar tokdíř ot borbadi asé, ítarar Kúda óilde nizor feť, ítara nizor ttu córom laga foitto de híin lói fohórai goré, ítara duniyaibi gún or hıkka beh mon deh. **20** Montor ańárar nagorita óilde asman ot, zentú ańára éggwa Nejatdoya yáni Malik Isá Mosih aıbár bicı azzur sáante entezar ot ası, **21** zıbá ye níki ańárar nıróc haiya re íbar mohıma ola gaar ńoilla ói bolla bodolifélaibo; híyan oh taakot estemal gorı gorıbo zıyán lói íba ye hárr kessú re úddwa Nizor kobzat gorıfelai fare.

4 Hétolla hoóır, ó ańr adorda báiboináin ókkol, tuáńra zetará re ańr ttu saitó kúb monehoór, zetará ańr kúci edde matár tas, tuáńra héndilla soli Malik or búture mozbut táko, ó adorda ókkol. **2** Ańı Yuwádiya re yó aros gorır aar Suntoki re yó aros gorır, Malik or búture tuáńrar mon ek ńoilla goró. **3** Aar, ó ańr asól sáanti, ańı tuáńre yó aros gorır, hé mayafuain nún ore híyan ot modot goró, kıyólla-hoilé ítara toh kúchóbor fólı bolla Kelemen edde ańr oinno sáanti ham-goróya ókkol lói cóo ańr fúańti bicı meénnot ókkol goijjé, zetará beggún or nam zindigir-kitab ot asé. **4** Malik or búture hámica kúci táko; ańı abar hoóır, kúci táko. **5** Tuáńrar cídayı tamám manúc ókkol or hańse zahér

goró. Malik hára aiyér. **6** Honó kessúr sinta no goijjó, bólke hárr hálót ot dua edde fóriyat or duara cúkuriyar sáante tuáńrar aros ókkol Alla re zanaıyó. **7** Baade Allar cántı, zıyán buzi farar furafuri baáre, híyane tuáńrar dil edde kıyal ore Mosih Isár usılaye héfazot rakıbo. **8** Ahérit hoóır, ó báiboináin ókkol, zıń hána, zıń ızzotdár, zıń sóiyi, zıń pak, zıń cúndor, zıń namdár, yáni zıń uttom aar taarif or laayek asé, tuáńrar kıyal híin or hıkka beh rakó. **9** Tuáńra ańr ttu zıń cíkko, hásıl goijjó, fúinno, edde deikkó, híin ore amól goró, tói cántı dooya Alla tuáńrar fúańti-fúańti tákıbo. **10** Ańı Malik or búture bicı kúci, kıyólla-hoilé yala boóut din baade tuáńra ttu ańr lla sintabáfani abar zari óiye; becók tuáńra ttu age yó accıl, montor daháıbar mouka nu accıl deh. **11** Ańı híyan muıtac ot forı hoóır de no, kıyólla-hoilé ańı toh ze honó hálót ot kúci táka cíkki. **12** Ańı hom táka keén de yó zani, aar beec táka keén de yó zani. Ańı hárr mikká edde hárr hálót ot kúci tákar gufoni cíkki, bóra ferot óuk yáh háli ferot, beec tákat óuk yáh muıtac ot. **13** Ańı hárr kessú Ubár duara gorı fari zıbá ye níki ańré bol dee. **14** Toóu gom óiye, tuáńra ańr mosibot ot córik óiyo. **15** Ó Filıppaiól, tuáńra nize de zano, foóılabar tuáńrar hańse kúchóbor tobolik gorı zeńtté ańı Makedóniya ttu gıılamboi, héńtte sirif tuáńra bade ar honó zomáte ańr llói lenden gorát cámil nó. **16** Tuáńra de Tisólónikat úddwa ańr zorurot ókkol fura gorı bolla hoek bar modot fońsaila. **17** Ańı hádiya saáır de héen no, bólke nófa saáır deh, zıń tuáńrar hísaf ot barızargoi. **18** Becók ańı hárr kessú furafuri faifélaiyi, yala ańr ttu ódorbaára asé. Epaforoditus or áta tuáńra zıń diferáıla híin fai yore ańr ttu bicı hoilé bicı ógiyoi; híin toh kúcbodar edde kobuldár kurbani, zıń lói Alla kúci ó. **19** Ańr Alla ye íbar mohımar dón ottu Mosih Isár usılaye tuáńrar hárr zorurot fura gorıbo. **20** Ańárar Alla Baf or taarif abadulabad foijjonto hámica ówat tákouk. Aamin. (aıōn g165) **21** Mosih Isár búture Allar ze pak bonda ókkol asé, ítara fottkıyo re ańr sólam díyo. Ańr fúańti asé de báiboináin ítara yó tuáńra re sólam zanar. **22** Allar pak bonda ókkol beggúne tuáńra re sólam zanar, háasgori baáńcca Káisar or gór or maincé. **23** Malik Isá Mosihr rahámot tuáńrar ruhr uore zari tákouk.

Kolóciól

1 Añí Pául, Allar moncá mozin Mosih Isár éggwa sáhabi. Añr fúañti añárar báí Timóti yó asé. **2** Kolóciya cóor ot Mosihr bútoe Allar ze pak bonda ókkol asé, hé imandár báiboináin ítarar hañse lekír: Tuáñrar uore añárar Baf Allar torfóttu rahámot edde cánti nazil óuk. **3** Añára hámica tuáñra lla dua goríbarcot, añárar Malik Isá Mosihr Baf Alla re cúkuriya gorí, **4** kiyólla-hoilé añára fúinni de, tuáñra ttu Mosih Isár uore iman asé aar tuáñra Allar pak bonda beggún ore muhábbot goró, **5** waán or acáye ziyán tuáñra lla asman ot héfazot raká gíyeh. Híyan or baabute tuáñra yaar age sóiyi kalam ot fúinnila, yáni oh kúchóbor ot **6** ziyán tuáñrar hañse foónicce. Hé kúchóbore fura duniyait gulagala ókkol dórar edde zetó éto fólat asé, zendilla tuáñrar hañse yó oh din lóti dórar ze din tuáñra híyan fúinno aar Allar rahámot ore sóiyigori buzí faijjo. **7** Hé kúchóbor ore tuáñra añárar adorja sáañti gulam Epafaras ottu cíkkila, zibá Mosihr ézzon biccácdar háadem ísafe añárar bodol tuáñrar hédmot gorér. **8** Yóggwa ye añára re tuáñrar muhábbot or baabute zanaiyé, ziyán Pak-Ruh ye tuáñrar dil ot foida goijjé. **9** Hétolla bouli añára híin fúinni lóti tuáñra lla dua gorá bon gorí nó felai. Añára magi de, tuáñra ruúhanir tamám giyane edde buddíye Allar moncár zankari loi furaiya óizogoi fán, **10** zeéne tuáñra Malik or laayek soli íba re hárr mikká ttu kúci goró, yáni tuáñra zen fottí gom ham ot fóí ó, Alla re zetó éto sinó, **11** furafuri sobór edde bordac táki bolla íbar mohíma ola kudurutir fura bole mozbut ó, edde kúcir sáañte **12** Baf or cúkur goró, Zibá ye añára re nur ot asé de pak bonda ókkol or miras or bági óibar kaabel banaiyé. **13** Íba ye toh añára re andár or hókumot ottu rehái gorí Nizor adorja Fuar raijjet fargaráifelaiye, **14** ze Fuar duara añára rehái faiyí, yáni gunár maf faiyí. **15** Hé Fua óilde noirahar Allar súrot; íba ebbe age lóti asé aar íbar tokka tamám mohóluk ókkol or uore. **16** Kiyólla-hoilé asman ot edde zobin ot ziín dahá zah de asé aar ziín dahá no zah de asé, beggún íbar duara beh foida óiye, híin raastri óuk yáh kémta, hókumot óuk yáh adíkar; hárr kessú íbar duara íba lla beh foida gorá gíyeh. **17** Íba hárr kessúr age lóti asé, aar hárr kessú íba ye beh țikái raké. **18** Íba óilde gaar matá, yáni

zomát or; íba óilde cúru aar mora ttu zinda gorá gíyeh de foóila zon, zeéne hárr kessút íbar tokka uore ó. **19** Kiyólla-hoilé Baf ottu fosón laiggé de, Nizor fura kúdayi íbar bútoe táka, **20** aar íba ye kúruc or uore bácaiye de lou wór usílaye cánti aní yore íbar duara hárr kessú re Nizor lloi bonaifélai bolla; híin zobin or gún óuk yáh asman or gún. **21** Tuáñra toh ek hale Alla ttu duré accíla aar nizor bura ham edde báfanir zoriya íbar ducon accíla, **22** montor yala íba ye Nizor Fuar insáni haiyar moot or usílaye tuáñra re Nizor lloi bonaifélaiye, tuáñra re Nizor muúntu pak, behosúr, edde honó dak sára házir gorí bolla— **23** zodi tuáñra iman ot mozbut buniyadir sáañte dorógori lagi táko, aar acá waán ottu lori no zogói ziyán fúinno de kúchóbor ottu faiyó. Hé kúchóbor toh asman or nisor tamám mohóluk ókkol or hañse tobolik gorá gíyeh; añí Pául híyan or háadem óiyi. **24** Añí tuáñrar wasté duk ókkol fair de híyan ot kúci, aar Mosihr ze duk-mosibot ókkol íbar gaa lla, yáni zomát olla baki asé híin añr gaat loi fura gorír. **25** Allar diiya zimmadari mozin añí tuáñrar fáida lla hé zomát or háadem óiyi, tuáñrar hañse Allar kalam furafurir sáañte tobolik gorí bolla, **26** yáni gufoni waán ore, ziyán guzorigiyói de tamám zobana edde nosól ókkol ottu lukai raká gíyl, montor yala íbar pak bonda ókkol or hañse zahér gorá gíyeh. (aïon g165) **27** Alla ttu ítara re zanaidito monehoiyé de, Beyohúdi ókkol or hañse hé gufoni híyan or mohíma hotó doóñr. Hé gufoni óilde, Mosih tuáñrar bútoe asé, ziyán óilde mohímar bági óibar acá. **28** Añára fottíkiyo re fura giyane úñciyari dí edde taalim di yore tobolik goríde óilde íbar baabute, zeéne fottíkiyo re añára Mosihr bútoe furafuri balok hálote Allar muúntu házir gorí fari. **29** Hé niyote añí zan-foran di meénnot gorír, Mosihr oh kudurut or bole ze kudurut añr bútoe zuresúre ham gorér.

2 Añr ttu tuáñra re yían zanaidito monehoór de ki, añí tuáñra lla, Laudíkiyat asé de ítara lla, edde zetará añré muk dehá nó deké ítara beggún olla hotó bicí meénnot gorír, **2** zeéne ítara muhábbote ek óizai nizor dil ot josba faa, aar furafuri buzár ttu ze furafuri fakkayi foida ó híyan or tamám dón hásil goré. Tói ítara Allar gufoni zanibó, yáni Mosih re siníbo, **3** Zibár bútoe níki giyan edde buddír tamám dón ókkol lukaiya asé. **4** Añí híyan etollá hoóir, zeéne

tuáñra re honókiye miřá-miřá hotá ókkol hoói dúka dí no fare. **5** Kiyólla-hoilé ańı tuáñrar hańse jisım or sáańte házir náı de óile yo, ruhr sáańte así. Tuáñrar ńık solasol edde Mosihr uore tuáñrar iman or mozbuti dekı ańr ttu bicı kúci lager. **6** Hétolla, tuáñra zehón Mosih Isá re Malik de kobul goijjó, tói İba llói lagi táki solo, **7** İbar búture mozbut cíńyor gasái edde İbar uore boni urı yore, aar tuáñra re cıka gıyeh de héndilla góri iman ot mozbut táki yore edde hámica cúkuriya gorı yore. **8** Ŭńciyar, honókiye tuáñra re insán or banaiya taalime edde behar dúkabazi lói cıkar gorıfelai no fare fán, zıń aiyé de óilde insán or rosóm ókkol ottu edde duniyai hókumot goré de búť-ferot ókkol ottu; Mosihr torfóttu no. **9** Kiyólla-hoilé fura illayi İbar haiyar búture táke, **10** aar İbar búture tuáñra re furussat gorá gıyeh. İba óilde hárr hókumot-goróya edde adikari ókkol or matá. **11** İbar búture tuáñra re ázomi yó gorá gıyeh; hé ázomi híyan honó áte gorá gıyeh de no, bółke Mosih Nize beh goijjé, ziyán óilde jisım or uore guná ola fıtorot or ze hókumot accıl, hé hókumot ottu tuáñra re azad goijjé. **12** Kiyólla-hoilé bápťisma lone tuáñra re Mosihr fúańti dohón gorıfela gıyeh, aar Zibá ye İba re mora ttu zinda goijjé hé Allar kudurut or uore iman anóne tuáñra re híyan or duara İbar fúańti zinda gorá yó gıyeh. **13** Zeńtté tuáñra nizor gunáye edde jisım or be-ázomi hálote mora accıla, Alla ye toh tuáñra re Mosihr fúańti zinda goijjé, ańárar tamám guná-háta ókkol maf gorıdı yore, **14** edde ańárar ulđa ze dolil ókkol accıl híın or dabi-dawa ókkol beggún baatel gorıfelai yore. İba ye hé dolil ore kúruc ot zoloi mari dur gorıfelaiye. **15** İba ye hókumot-goróya ókkol ore edde adikari ókkol ore kémota sára gorıfelaiye, aar itara ttu ziti yore beggún or muńtu itara re córminda goijjé. **16** Hétolla honókiye tuáñra re hána-finar, honó id or, onıccár, yáh ebaadot-or-dın or baabute hosúri no douk. **17** Kiyólla-hoilé híın toh sirıf muńtu aibó de híın or sába éna, montor asóliyot toh Mosihr hańse éna asé. **18** Saiyó, zetará misá niróc kúwala re edde fırista ókkol or ebaadot gorá re fosón goré, itara honókiye tuáñra re boccíc ottu maárum gorıfelai no fare fán. Héndilla manúc itara duniyaibi demake hánnak fúlizai, deikké de híın or doóńr-doóńr gof mare. **19** İtara matá re mozbut or sáańte dóri nó raké, zibá ttu modot looi gaa guńıra girá edde rogťana loi

zurazuıjja táki Allar baráıye baré. **20** Tuáñra de duniyai hókumot goré de búť-ferot ókkol ottu Mosihr fúańti morigiyógoi, tói tuáñra aıjjó kiyá duniyaibir dóilla góri híyan or niyom-kaanune soloór, hoitó sailé, **21** “Yıán no dóriyol Waán na háıyo! Yıán no súńıyol!” **22** Hıın asé de óilde siz uıın beggún olla zıń estemal goıtté-goıtté borbád óızaybar asé; híın óilde sirıf insán or hókum edde taalim ókkol. **23** Becók niyom híıne zettót itarar banaiya ebaadot or torika, misá niróc kúwala, edde nizor gaa re dab ot raká cıka, híın saıté giyane bóra, montor jisım or azzu ókkol bon gorı bolla híıne honó fáida no deh.

3 Hétolla, tuáñra re zettót Mosihr fúańti zinda gorá gıyeh, tuáñra uıın or talac ot táko zıń asman ot asé, zeře Mosih Allar den dák ottu boıřá asé. **2** Tuáñrar kıyal asmani gún or uzu rakó, duniyaibi gún or uzu no. **3** Kiyólla-hoilé tuáñra toh morigiyógoi, aar tuáñrar zındigi Mosihr fúańti Allar hańse lukaiya asé. **4** Zeńtté Mosih, Zibá óilde ańárar zındigi, zahér óıbo, héńtte tuáñra yó İbar fúańti mohımar sáańte zahér óıba. **5** Hétolla, tuáñra nizor duniyaibi fıtorot ókkol ore marifélo, zendilla niki, zenákari, nafaki, kukıyal, bura moncá, edde lalsı ziyán óilde mutti fuńza loi borabor. **6** Kiyólla-hoilé nafórman ókkol or uore Allar gozzob toh híın or zoriya éna aiyér, **7** zıń ot tuáñra yó ek hale soıllıla, zeńtté níki tuáñra híın mozin zındigi hařaáıla. **8** Lekin yala tuáñra ttu iın beggún óu dur gorıfelo: guccá, rak, ducconi, bodnami, edde muk ottu bereıjja hotá ókkol. **9** Ezzon ore ezzone misá hotá no hoiyó, kiyólla-hoilé tuáñra toh nizor furana fıtorot ore híyan or hórkot cóo kúli félaidiyo, **10** aar noya fıtorot ore fıńdıfelaiyo, ziyán ore híyan or Banir súrot mozin noya gorá zát asé, zeéne tuáñra İba re furafurir sáańte zano. **11** Hıyan ot Beyohúdi edde Yohúdir búture, ázomi goijjá edde be-ázomi goijjár búture, bidecóıtta, gańıya, gulam, edde begulam or búture honó forók náı, montor Mosih beh hárr kessú, aar İba beggún or búture asé. **12** Hétolla, tuáñra zettót Allar baıccá, pak edde adorbon ókkol, tuáñra feťfurani, meérbani, niróci, cídayi, edde sobór lói nizor dil ore háńzo. **13** Ezzon or bór ezzone cóo, aar honókiyo ttu honókiyor ulđa cékayot tákile maf gorıdı; Malike zendilla tuáñra re maf gorıdiye héndilla tuáñra ttu yó maf gorıdiyar

zorur. **14** Híin beggún or fúañti-fúañti muhábbot lói yó hánzo, ziyán óilde furafuri ektofákir ban. **15** Mosihr cánti re tuáñrar dil ot hókumot goittó dóh, kiyólla-hoilé tuáñra re hé cántit ek gaa ói bolla éna ñaha giyé; aar cúkuriya gorát táko. **16** Tuáñrar dil ot Mosihr kalam ore furafurir sáañte tákito dóh, tamám giyane ezzon ore ezzone taalim di yore edde nosíyot gorí yore, aar nizor dil ot cúkuriyar niyot rakí Allar hañse Zobur Córif or kawali, seér, edde ruúhanir gozól ókkol gaái yore. **17** Tuáñra ziín hoibá hoó aar ziín goríba goró, hárr kessú Malik Isár name beh goijjó, aar héñtte Íbar usílaye Baf Allar cúkur óu goijjó. **18** Bouwáin ókkol, tuáñra nizoré nizor-nizor hócom or hañse gosáido, kiyólla-hoilé Malik or bútoze híyan tík ham. **19** Hócom ókkol, tuáñra nizor-nizor bou wóre muhábbot goró; ítara lla tita no óiyo. **20** Fuain ókkol, hárr kessút tuáñrar bafmaar hotábattara mano, kiyólla-hoilé híyane Malik kúci ó. **21** Bafáin, nizor fuain dore no zalaíyó, zeéne ítarar dil no bânge. **22** Gulam ókkol, hárr kessút tuáñrar duniyaibi girós ókkol or hotábattara mano, maincóre kúci goróya ókkol or dóilla dahái bolla no, bólke Malik or ñoor rakí dil or ehélasir sáañte héndilla goró. **23** Tuáñra ziín goró híin endilla fura dilmon di goró, zeén níki Malik olla beh gorór, insán olla no. **24** Tuáñra toh zano, tuáñra Malik or torfóttu miras boccíc faiba. Kiyólla-hoilé tuáñra toh Malik Mosihr éna hédmot gorór. **25** Kiyólla-hoilé zee niki bura ham goré íte nize goijjé de hé bura ham or notiza faibo, hére honó ektorfia náí.

4 Girós ókkol, tuáñrar gulam ókkol ore insáf edde hók adai goijjó; tuáñra toh zano, asman ot tuáñrar óu eggwá Girós asé. **2** Tuáñra úñciyare edde cúkuriyar sáañte dua gorát lagi táko, **3** aar fúañti-fúañti añára lla yó dua goríba de, Alla ye añára lla kalam boiyan goríbar duwar kúle fán, zeéne añára Mosihr gufonir baabute tobolik gorí fari, ziyán olla bouli añí bon así; **4** aró goríba de, añí híyan endilla sáf-sáf góri boiyan gorí fari fán zendilla añr ttu gorár zorur. **5** Honó eggwá mouka no hárai, torikar baárgwa manúc lói demak hárai soliyó. **6** Há mica tuáñrar hotábattarat nun diiyé fán moza tákar zorur, zeéne tuáñra haré hondilla gori zuwab diya foribó de zano. **7** Añr baabute hoitó sailé, añárar adorja báí Tukikus, zibá ézzon biccácdar háadem aar añárar fúañti

Malik or ham-goróya, yóggwa ye añr hóbor beggún tuáñra re zanaibó. **8** Añí yóggwa re tuáñrar hañse etollá beh diferáir, zeéne tuáñra añárar hálót ókkol zano aar yóggwa ye tuáñrar dil ot josba deh. **9** Yóggwar fúañti imandár edde adorja báí Onesímos ore yó diferáir, zibá tuáñrar bútotu ekzon. Ítara tuáñra re efé kii-kii ór beggún zanaidibo. **10** Añr fúañti ziyól ot asé de Aristarkuse tuáñra re sólám zanar, aar Bárnabas or sañsato báí Markuse yó zanar, zibár baabute tuáñra endilla hókum faiyó de ki, yóggwa tuáñrar hére ailé, estekbal goijjó. **11** Héndilla, Isá zibá re Yustus ñake, yóggwa ye tuáñra re sólám zanar. Yohúdi ókkol or bútotu añr fúañti Allar raijjo lla ham-goróya óilde siríf ítara; ítara óilde añr tosólli. **12** Mosih Isár gulam Epafaras, zibá tuáñrar bútotu ekzon, yóggwa ye tuáñra re sólám zanar; yóggwa ye tuáñra lla há mica dilmon di dua goré, zeéne tuáñra balok ói edde furafuri fakkar sáañte Allar fura moncár uore mozbut gori tíyai táko. **13** Yóggwar baabute añí hoói faijyum de ki, yóggwa ttu tuáñra lla, aar Laudíkiyat edde Hiyerapolis ot asé de ítara lla kúb sintabáfana asé. **14** Adorja ñaktór Lukáse tuáñra re sólám zanar, héndilla Démase yó zanar. **15** Laudíkiyat asé de imandár báiboináin dore, aar Numfa re edde híbar gór ot zoma ó de zomát ore añr sólám díyo. **16** Ceñrí yíán tuáñrar hañse telawot goijjá óile, Laudíkiól or zomát or hañse yó telawot gorá báyo, aar Laudíkiya ttu añr ze ceñrí gán aibó, tuáñra híyan óu telawot goríyo. **17** Arkipus ore hoibá de, “Malik or hédmot gorí bolla tuáñre ze zimma diiya giyé, híyan furafuri adai gorí bolla saiyo.” **18** Añí Páule nizor áte e sólám lekír. Añí bon así de híyan no foóraiyo. Tuáñrar uore rahámot zari tákouk.

1 Tisólóniól

1 Añí Pául, añr fúañti Sílwanus edde Timóti yó asé. **2** Añára tuáñra re añárar duat mazé yaad rakí tuáñra beggún olla Alla re hámica cúkuriya gorí. **3** Tuáñra imane goijjó de ham ore, muhábbote goijjó de meénnot ore, edde añárar Malik Isá Mosihr uore acá rakí asé de sobór ore Baf Allar muuntu dua goríbarcot añára nitti monot rakí; **4** kiyólla-hoilé, ó báiboináin ókkol, Allar adorbon ókkol, añára zani, íba ye tuáñra re basíloie. **5** Kiyólla-hoilé añára toh tuáñrar hañse kúchóbor tobolik goijjí de siríf hotáye no, bólke kudurute, Pak-Ruhr bole, edde furafuri ekin or sáañte yó. Tuáñra toh zano, añára tuáñrar fúañti tákite tuáñrar wasté hondilla gori zindigi haraáilam. **6** Tuáñra ñoññ mosibot ot úddwa, Pak-Ruhr diiya kúciye añárar boiyan kobul gorí añárar edde Malik or nomuna mozin zindigi haraáila. **7** Híyan lói tuáñra Makedóniya edde Akaya elakar tamám imandár ókkol olla nomuna bonigiyógoi. **8** Tuáñrar héntu Malik or kalam siríf Makedóniyat edde Akayat fólīgiyoi de no, bólke tuáñra ttu Allar uore asé de iman or hóbor hárr zagat eén fólīgiyoi, añára ttu híyan or baabute honó kessú howá no fore. **9** Kiyólla-hoilé añára tuáñrar hére aiccílām de híyala tuáñra añára re hondilla gori kobul goijjíla de, aar tuáñra keéngori mutti fuñza bad di Allar uzu fíri aái zinda edde sóiyi Allar hédmot gorát asó de, híin manúc ókkole nize añára re hoó, **10** ítara yíán óu hoó de ki, tuáñra Allar Fua asman ottu aibár entezar ot asó, zibá re íba ye mora ttu zinda goijjé, yáni Isá re, zibá ye añára re aibó de gozzob ottu basaibó.

2 Báiboináin ókkol, tuáñra toh zano, añára tuáñrar hére aiccílām de híyan behar nó óiyo. **2** Tuáñra yíán óu zano de ki, yaar age añára Filippi cóor ot duk faáilām edde beizzoti óilām. Montor bicí bazá ókkol tákile yo, Allar torfóttu hímmot fai yore añára tuáñrar hañse Allar kúchóbor boiyan goijjí. **3** Kiyólla-hoilé añára gorí de nosíyot toh honó gollot taalim ottu no, honó nafak yáh férokbazir niyote yó no. **4** Bólke Alla ye zendilla añára re laayek báfi kúchóbor or zimma diiyé, añára siríf hé mozin beh boiyan gorí. Insán ore kúci goríbar niyote no, bólke añárar dil zasai goré de hé Alla re kúci goríbar niyote. **5** Tuáñra toh zano, añára honódin honókiyor hañse tuládiya hotá hoiyí de

nái, aar lalós or niyote honó bahána diyí de yó nái. Alla gobá asé. **6** Añára honó insán ottu izzot faito yó saiyí de nái, tuáñra ttu yó nó saái aar oinno kiyó ttu yó nó saái. Háleke Mosihr sáhabi ísafe añára saitám bóuli tuáñra ttu dabi gorí faittam. **7** Montor tuáñrar dormiyan ot añára endilla cída ói táikkilām, zendilla gori maa ye nizor fuain dore fale. **8** Añára tuáñra re bicí ador gorí de hétolla añára tuáñrar hañse cúdu Allar kúchóbor tobolik goittó kúci accílām de no, bólke nizor zan dito yó kúci accílām, kiyólla-hoilé tuáñra toh añárar kúb adorja ógiyogoi. **9** Báiboináin ókkol, tuáñra ttu toh añárar duk edde meénnot ókkol yaad asé, ki hoilé, tuáñra re Allar kúchóbor tobolik goríbar fúañti-fúañti añára dine raite ham óu goijjí, zeéne tuáñra honókiyor hañse añára zulap ói no zaygói. **10** Tuáñra yó gobá asó aar Alla yó gobá asé de ki, tuáñra imandár ókkol lói añárar solasol hotó pak, sóiyi, edde behosúr accíl. **11** Tuáñra toh zano, bafe nizor fuain dore goré de héndilla góri tuáñra fottíkiyo re añára nosíyot goijjílām, tosólí dílām edde buz dílām de ki, **12** tuáñra Alla kúci ó de héndilla góri solo, zibá ye tuáñra re Nizor raijor edde mohímar bági ói bolla ñaker. **13** Añára etollá yó lagatar Allar cúkur gorí, kiyólla-hoilé zeñtté tuáñra añárar boiyan fúni Allar kalam kobul goijjó, héñtte tuáñra híin insán or no bólke asóle zendilla héndilla ísafe kobul goijjó, yáni Allar kalam ísafe. Híine tuáñra imandár ókkol or búture ham gorát asé. **14** Báiboináin ókkol, tuáñrar hálot toh Allar zomát uúin or dóilla zín Yohúdiya elakat Mosih Isár búture asé. Kiyólla-hoilé tuáñra yó de nizor kóum ottu undilla zulúm faiyó zendilla ítara nizor kóum Yohúdi ókkol ottu faáil, **15** zetará Malik Isá re yó marifélail, nobi ókkol ore yó marifélail, aar añárar uore yó zulúm goijjé. Hétolla ítara re Alla ye fosón no goré; ítara manúc beggún ore ducconi goré. **16** Beyohúdi ókkole nejat faibo bouli ítara añára re tarár hañse tobolik no goittó maná goré. Héndilla góri ítara hámica nizor guná lói gunár címa foijjonto foññsegai. Ítarar uore gozzob furafuri aáigiyoi. **17** Montor, ó báiboináin ókkol, añára re zehón tuáñrar hañsóttu kessú ñaim olla alok gorífela gíyeh, háleke jisím duré óile yo añárar dil tuáñrar fúañti asé, añára tuáñrar muk deki bolla ñoññ azzur sáañte bicí kucíc goijjí. **18** Kiyólla-hoilé añára ttu tuáñrar hañse aitó monehoiyé. Háasgori añí Páule barbár

kucíc goijjílám, montor Cóitane añára re bazá díye. **19** Añárar Malik Isá zeñtté aibó héñtte ñbar muúntu añárar acá, kúci edde fohórar tas hontará? Híin tuáñra no né? **20** Becók, tuáñra óilade añárar fohórai, aar tuáñra óilade añárar kúci.

3 Baade añára zettót ar bordac gorí no farir, añára Aten cóor ot ekéla táaiza gom óibo de báfi **2** añárar báí Timóti re diferáiyi, zibá añárar fúañti Mosihr kúchóbor tobolik gorí Allar ham goré. Añára yóggwa re diferáiyi de tuáñra re mozbut gorí bolla, aar tuáñrar iman or baabute tuáñra re josba di bolla, **3** zeéne e mosibot iín or zoriya honókiye fissá no zoogói. Tuáñra nize toh zano, añára re híin olla beh ñík gorá gíyeh. **4** Kiyólla-hoilé añára tuáñrar fúañti tákite tuáñra re age lóti howát accílám de ki, añárar uore zulúm óibo. Aar tuáñra zano, borabor héndilla óiye yó. **5** Hétolla bóuli añi zettót ar bordac gorí no farir, añi tuáñrar iman or hálót saitó diferáiyi deh; kiyólla-hoilé añr ttu ñoor accíl de, óitofare íbilíce tuáñra re dúka díye aar añárar meénnot befózul óigiyoi. **6** Montor ehón Timóti tuáñrar héntu añárar hañsé waafes aiccé, aar aái tuáñrar iman or edde muhábbot or bála hóbor zanaiyé. Yóggwa ye hoiyé de, tuáñra añára re hámica bála báfo, aar tuáñra ttu añára re dekíto eddúr azzu lager zeddúr añára ttu yó tuáñra re dekíto azzu lager. **7** Hétolla, ó báiboináin ókkol, añárar tamám ferecanit edde mosibot ot mazé yó tuáñrar imane añára tosólí faiyí. **8** Yala añára noya zindigi faiyí fán lager, kiyólla-hoilé tuáñra Malik or hañse mozbut asó. **9** Tuáñrar zoriya Allar muúntu añára ttu ze ñoóñr kúci asé, híyan olla Alla re keéngori cúkuriya goittám añára no zani. **10** Añára raite dine fura dilmon di dua gorí de, añára tuáñrar muk dekí fari fán, aar tuáñrar iman or homi ókkol fura gorí fari fán. **11** Añárar Alla Baf Nize edde añárar Malik Isá ye añára tuáñrar hére aibár rasta gorídouk. **12** Malike goróuk, zendilla añárar muhábbot tuáñra lla baái fore, héndilla tuáñrar muhábbot óu zen ezzon ottu ezzon olla edde tamám manúc ókkol olla bicí ói baái fore, **13** zeéne íba ye tuáñrar dil ore mozbut goríde, zeéne añárar Malik Isá Nizor pak bonda beggún ore fúañti looi aibó de híyala tuáñra añárar Baf Allar muúntu behosúr edde pak ñóoro.

4 Ó báiboináin ókkol, ahéri hotá óilde, tuáñra de añára ttu cíkko, Alla re kúci goitté hondilla solar zorur deh, aar becók tuáñra héndilla soloór óu. Toóu tuáñra re añára Malik Isár name becábicí aros gorír, tuáñra héndilla góri aro solat táko. **2** Kiyólla-hoilé tuáñra toh zano, Malik Isár diiya adíkare añára tuáñra re kii-kii hókum ókkol diyí. **3** Alla ye saá de, tuáñra pak ó; yáni hárr ñóilla zená ttu duré táko; **4** aar fottíkiye nizor-nizor gaa re pak edde izzot or sáañte sóoñli rakí zano, **5** jisím or azzu mozin soli no, zendilla Alla re no síné de Beyohúdi ókkole goré. **6** Aro saá de ki, hé mosóla lói honókiye honó imandár báí or hótí no goróuk aar yóggwa ttu fáida no tulóuk, kiyólla-hoilé Malike híin goré de ítara re sáñza díbo. Añára híin tuáñra re yaar age lóti hoóidiyi aar horagori úñciyari díyi. **7** Kiyólla-hoilé Alla ye toh añára re nafak solasol olla ñaikké de no, bókke pak solasol olla. **8** Hétolla, zee níki hé cíkka re inkar goré íte insán ore inkar goijjé de no, bókke Alla re goijjé deh, zibá ye tuáñra re Nizor Pak-Ruh diiyé. **9** Báiyali muhábbot or baabute tuáñrar hañse lekíbar honó zorur náí, kiyólla-hoilé Alla ye toh tuáñra re ezzon ore ezzone muhábbot goittó cíkaiye. **10** Aar becók, tuáñra toh fura Makedóniyat asé de imandár báiboináin beggún or hañse híyan adai gorór. Toóu, ó báiboináin ókkol, añára tuáñra re aros gorír, tuáñra ítara re aro bicí muhábbot goró. **11** Añára tuáñra re hoóilam de héndilla, tuáñra cántir zindigi harai bolla, ar ezzon or gúm ot nak góloi no di bolla, edde nizor áte meénnot gorí bolla niyot bano. **12** Tói tuáñra baárgwa maincór ttu kodor faiba aar tuáñra honó muútac ot no foribá. **13** Ó báiboináin ókkol, añára no saái tuáñra moot or gúm ot foijjé de ítarar baabute azanaiya táko, zeéne tuáñrar dil uitarár ñóilla ferecanit no zetará ttu acá náí. **14** Añára zettót Isá moijjíl aar abar zinda óiye de biccác gorí, tói añára yían óu biccác gorí de ki, ñbar fúañti Alla ye uitará re yó loizaybói zetará hé Isár uore iman aní moot or gúm ot foijjé. **15** Malik or kalam mozin añára tuáñra re hoóir, añára zetará Malik nú aiyé foijjonto zinda basi tákiyum, añára moot or gúm ot foijjé de ítarar agor ttu zaigói no faijjum. **16** Kiyólla-hoilé Malik Nize toh ñoóñr abase hókum díbar fúañti-fúañti asman ottu lami aibó; héñtte boro fíristar abas fúna zaybo aar Allar cíañ mata zaybo. Hé októ, age uitará zinda óibo zetará Mosihr ummot boni

morigílgoi. 17 Yárbaade, añára zetará zinda basi táikkum, añára re yó ítarar fúañti asman ot Malik loi mili bolla miyúlar uore tulífela zaybo. Tói añára hámica Malik or fúañti óiyum. 18 Hétolla, hotá iín hoóí ezzon ore ezzone tosólí díyo.

5 Ó báiboináin ókkol, híin hon zobanat óibo aar hon októt óibo, híin tuáñrar hañse lekíbar zorur náí. 2 Kiyólla-hoilé tuáñra nize toh bálagori zano, ki hoilé, Malik aibár din yíba raitta sur aiyé fángori aibó. 3 Zeñtté manúc ókkole hoibó de, “Beggún cánti ógiyoi, ðoorabár kessú náí,” héñtte ítarar uore endilla asimbit ðoóñr docá aázayboi, zendilla hámil mayafuar uore hooñri dórani aázagoi. Ítara bilkúl hári no faribó. 4 Lekin, ó báiboináin ókkol, tuáñra toh andár ot no, zeén níki hé din tuáñrar uore sur aiyé fángori aitó; 5 kiyólla-hoilé tuáñra beggún toh nur or edde din or foór or fuain. Añára rait or óu no aar andár or óu no. 6 Hétolla, aiyó, añára oinno manúc or ðóilla gúm no zai, bólke seton táki aar úñic ot táki. 7 Kiyólla-hoilé zetará gúm zah ítara raitta éna gúm zah, aar zetará nicá háa ítara raitta éna nicá hái ðuúl ó. 8 Montor añára zettót din or foór or, hétolla aiyó, añára úñic ot táki. Buk or héfazot olla iman edde muhábbot ore laráir zama ísafe fiñdí, aar matár héfazot olla nejat or acá re ðufi ísafe fiñdí. 9 Kiyólla-hoilé Alla ye toh añára re gozzob olla tík gorí raikké de no, bólke añárar Malik Isá Mosihr usílaye nejat fai bolla. 10 Íba añárar wasté moiijíl de kiyólla-hoilé, añára seton táki yáh moot or gúm ot fori, añára zeéne íbar fúañti basi táki. 11 Hétolla, hámica ezzon ore ezzone tosólí dóh; aar ezzon ore ezzone torki goró, zendilla tuáñra yala yó gorór. 12 Báiboináin ókkol, añára tuáñra re aros gorír, zetará tuáñra lla meénnot goré, zetará Malik or ummot ísafe tuáñrar uore sóddari goré, edde zetará tuáñra re nosíyot goré, ítara re kodor goijjó. 13 Ítarar ham or wasté ítara re muhábbot or sáañte bicí izzot diyo. Ezzon loi ezzone cántit táikko. 14 Ó báiboináin ókkol, añára tuáñra re nosíyot gorír, ocót ókkol ore torbiyot goijjó, hímmot sára re hímmot díyo, komzur ore modot goijjó, sobór or sáañte fottíkiyo re bordac goijjó. 15 Saiyó, honókiye burair bodol burai no goijjó, bólke hámica ezzon ore ezzone edde manúc beggún ore bálai goittó kucíc goijjó. 16 Hámica kúci

táikko, 17 nitti dua goijjó, 18 hárr hálót ot Alla re cúkuriya goijjó, kiyólla-hoilé Mosih Isár bútoe tuáñra lla Allar moncá óilde híyan. 19 Pak-Ruh re nifái no félaiyo. 20 Aar nobi ísafe Allar kalam boiyan goré de híin hékarot no goijjó, 21 bólke hárr kessú tahákit goijjó; ziyán gom híyan dóri táikko; 22 aar hárr ðóilla burai ttu duré táikko. 23 Cánti dooya Alla Nize tuáñra re furafuri pak-sáf goróuk, aar tuáñrar gaa re, ruh re, edde zan ore otódin foijjonto furafuri behosúr rakóuk, zetódin añárar Malik Isá Mosih nú aiyé. 24 Zibá ye tuáñra re ðaikké, íba toh biccácdar; íba ye héndilla hámaha goríbo. 25 Báiboináin ókkol, añára lla dua goijjó. 26 Tamám imandár báiyain dore pak dile appá dí sólam zanaíyó. 27 Malik or name añí tuáñra re hókum gorír, e ceñrí gán báiboináin beggún or muúntu foríyo. 28 Añárar Malik Isá Mosihr rahámot tuáñrar uore zari tákouk.

2 Tisólóniól

1 Añí Pául, añr fúañti Sílwanus edde Timóti yó asé. **2** Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **3** Báiboináin ókkol, añára ttu tuáñra lla Allar hañse hámica cúkuriya gorár zorur. Héndilla gorón etollá sóiyi, kiyólla-hoilé tuáñrar iman bicí barér aar tuáñra fottíkiyor muhábbot afós ot zetó éto bicí ór. **4** Hétolla bóuli Allar zomát ókkol or hañse añára tuáñra re lói borái gorí fari, ki hoilé, tuáñra foór de tamám zulúm edde mosibot ot úddwa nizer sobór edde iman ore ñikai raikkó. **5** Híin beggúne sábut goré de, Alla ye hók bisar goré, hétolla tuáñra re Allar rajjor laayek bouli gona zaybo, ziyán olla tuáñra duk foór. **6** Allar hók bisar óilde, zetará tuáñra re duk deh, íba ye ítara re duk dibo, **7** aar tuáñra zetará duk foór, íba ye añárar fúañti tuáñra re yó aram dibo, oñtté zeñtté Malik Isá Nizer taakotwala fírsta ókkol ore fúañti looi zoler de ooin ot gori asman ottu zahér óibo, **8** uitará re sáñza dí bolla zetará Alla re no siné aar zetará añárar Malik Isár kúchóbor ore amól no goré. **9** Manúc ítara Malik or cáikka ttu edde íbar mohímar taakot ottu dur ói sáñza ísafe abadulabadi dóncó faibo, (aiōnios g166) **10** oñtté zeñtté íba ye Nizer pak bonda ókkol or hañse nizer mohíma zahér gorá zay bolla edde íbar uore iman ainné de ítara beggún or hañse taajuippa ói bolla aibó. Ítarar bútoze tuáñra yó asó, kiyólla-hoilé tuáñra de añárar gobá fúni iman ainnó. **11** Híin monot rakí añára hámica tuáñra lla dua gorí de, Alla ye tuáñra re íbar ñak or laayek bouli gonouk, aar tuáñra ttu asé de bálai goríbar hárr azzu edde iman or amól ókkol ore Nizer kudurute fura goróuk, **12** zeéne añárar Allar edde Malik Isá Mosihr rahámote tuáñrar duara añárar Malik Isár nam or taaríf ó, aar íbar duara tuáñrar taaríf ó.

2 Báiboináin ókkol, añárar Malik Isá Mosih aibár edde añára re íbar hañse zoma gorá zaybar baabute hoitó sailé: añára tuáñra re yían aros gorír, **2** maincé Malik aibár din aáigiyoí hoilé bánggori buddí háraiya yáh ferecan ói no zayogóí. Ítara honó dorcón deikké, yáh wahí nazil óiye, yáh añárar torfóttu ceñrí faiyé hoilé úddwa biccác no goijjó. **3** Honókiye tuáñra re honó mikká ttu dúka no douk. Kiyólla-hoilé din yíba toh otódin nu aibó zetódin beebák manúc

Allar ulða ói nó zagoi, aar Nafórmainna uite, yáni borbadi fua zahér nó. **4** Íte maincé zín ore kúda bóuli hoó edde zín ore fuñza goré, híin beggún or ulða goríbo edde nizoré nize híin or ñoóñr kúwalaibo. Íte endilla úddwa goríbo, Allar góor or bútoze góli boóí yore Alla bouli dabi goríbo. **5** Tuáñra ttu yaad náí né, añí tuáñrar fúañti tákite híin beggún tuáñra re hoóilam dé? **6** Tuáñra toh zano, yala ítare kiyé oóñli raikké, zeéne íte nizor októ ailé zahér ó. **7** Kiyólla-hoilé bedinir gufon ham toh aijjó solat asé. Montor Zibá ye aijjó oóñlat asé íba ye otódin foijjonto héndilla gorát tákibo zetódin íba re lariféla nó zah. **8** Yárbaade hé Nafórmainna zahér óibo, zaré Malike Nizer gal or niyáze marifélaibo aar Nizer aar tozollí loi hótom gorífelaibo. **9** Hé Nafórmainna íte Cóitan or kémotaye aái hárr kisím or misá keramoti ókkol, edde taajuippa ham ókkol gorí daháibo, **10** aar borbadi ókkol ore hárr dóilla beimani loi dúka díbo. Manúc ítara etollá borbadi óibo, kiyólla-hoilé nejat fai bolla ítara sóiyir muhábbot ore kobul nó goré. **11** Hétolla bóuli Alla ye ítarar hañse gumrár asór difeñáibo, zeéne ítara misá gún ore sóiyi bóuli biccác goré. **12** Aar notiza óibo de, ítara zínne sóiyir uore iman nu aní burait ayaci goijjé, ítara beggúne Allar torfóttu sáñza faibo. **13** Lekin, ó báiboináin ókkol, tuáñra Malik or adorbon ókkol olla añára ttu Alla re hámica cúkuriya gorár zorur, kiyólla-hoilé Alla ye toh tuáñra re foóila cúrut lóti etollá basíloíye, zeéne tuáñra Pak-Ruhr duara pak-sáf ói edde sóiyir uore iman aní nejat fo. **14** Íba ye tuáñra re añára tobolik goijjé de kúchóbor or duara etollá ñaikké, zeéne tuáñra añárar Malik Isá Mosihr mohímat córik ói faro. **15** Hétolla hoóir, ó báiboináin ókkol, añára tuáñrar hañse muké yáh ceñrír sáañte ze taalim diyí híin ot mozbut gori tíyai táko, aar híin ore dóri rakó. **16** Añárar Malik Isá Mosih nize, edde añára re muhábbot gorí rahámote ofúrani tosólí edde bála acá diiyé de añárar Baf Alla ye, (aiōnios g166) **17** tuáñra re dil ot tosólí douk, aar zín gom híin amól gorí bolla edde hoi bolla tuáñra re mozbut goróuk.

3 Ó báiboináin ókkol, ahéri hotá óilde, tuáñra añára lla dua goríba de, Malik or kalam endilla hára fólizagói fán edde izzot faa fán, zendilla gori tuáñrar dormiyan ot óiye. **2** Aró goríba de, añára hóraf edde nafórman ókkol or át ottu basi táki fán, kiyólla-hoilé manúc

beggún toh imandár no. **3** Montor Malik toh biccácdar; íba ye tuáñra re mozbut goríbo, aar íbilíc or át ottu héfazot rakíbo. **4** Añára ttu tuáñrar baabute Malik or uore bóraca asé de ki, tuáñra uúin gorór aar goríba zíin añára hókum díh. **5** Malike tuáñrar díl ore Allar muhábbot or uzu edde Mosihr bordac or uzu loizat tákouk. **6** Báiboináin ókkol, añárar Malik Isá Mosihr name añára tuáñra re hókum dír, tuáñra uitará ttu duré tákiyo, zetará isarbisar sára zindigi hara aar añárar torfóttu tuáñra faiyó de taalim mozin no sole. **7** Tuáñra nize toh zano, tuáñra ttu añárar nomuna mozin solar keén zorur, kiyólla-hoilé añára toh tuáñrar hére tákite isarbisar sára góri nó soli, **8** aar honókiyo ttu maana hána yó ná hái, bólke añára raite dine duk-meénnot goijjí, zeéne tuáñra honókiyor hañse añára zulap ói no zaygói. **9** Añára héndilla goittám de añára ttu modot faibar hók nu accíl de no, bólke kiyólla-hoilé, zeéne añára tuáñra lla bála nomuna boni aar tuáñra añárar hé nomuna mozin solo fán. **10** Añára tuáñrar hére tákite yó tuáñra re e hókum dílam de ki, “Zar ttu ham goittó mone no hoó, íte hána no hóuk.” **11** Añára fúnir de, tuáñra ttu kessú maincé isarbisar sára góri zindigi harar. Ítara honó ham no goré, bólke hámica oinno maincór ham ot nak gólaide. **12** Héndilla maincóre añára Malik Isá Mosihr name hókum dír edde nosíyot gorír, tuáñra nizám or sáante hamai nizor hána nize zuu goró. **13** Montor tuáñra, ó báiboináin ókkol, bálai goitté-goitté óran no óiyo. **14** Zee niki añára e ceñrít leikkí de hotá amól no goré, ítare ót gorí ítar lói sákbak no raikkó, zeéne íte córom faa. **15** Toóu ítare duccon bouli no țaiijjo, bólke imandár báí ísafe nosíyot goijjó. **16** Cánti dooya Malik Nize tuáñra re hárr hálót ot cánti diiyat tákouk. Malik tuáñra beggún or fúañti tákouk. **17** Añí Páule nizor áte e sólam lekír. Yíán óilde añr fottí ceñrír nicán; añí héndilla góri beh lekí. **18** Añárar Malik Isá Mosihr rahámot tuáñra beggún or uore zari tákouk.

1 Timóti

1 Añí Pául, añárar Nejatdoya Allar edde añárar acá Mosih Isár hókum mozin Mosih Isár éggwa sáhabi. **2** Timóti hañse lekír, zibá iman or hé rúwate añr sóiyi fua. Tor uore Baf Allar edde añárar Malik Mosih Isár torfóttu rahámot, meérbani, edde cánti nazil óuk. **3** Añí Makedóniya elakat zaibarcót toré zendilla aros goijjílám héndilla ífisas cóor ot ták, zeéne hére hodún manúc zetará gollot taalim ókkol deh ítara re maná gorí faros. **4** Ítara re hoibí de, banaouti kissá ókkol or uzu edde lamba-lamba háandan or lectír uzu díyan no di bolla, zífne ñoilla-boñoilla barábari beh foida goré. Híin lói Allar niyot buzí fara no zah, buzí fara zah de siríf imane. **5** Añr e hókum or moksót óilde, cáda dil ottu, bála hélom ottu, edde háti iman ottu muhábbot foida gorón. **6** Montor hodún manúce híin bad di behazor gof ókkol ot lagi táikke. **7** Ítara ttu monehoór de, Córiyot or alem óito; montor ítara zín hoó yáh zín ekin or sáañte dabi goré híin nize úddwa no buzé. **8** Añára zani, Córiyot gom, zodi sóiyi torika loi estemal goré. **9** Añára yían óu zani de ki, Córiyot forhésar ókkol olla diiya gýl de no bókke Allar niyom bángoya ókkol olla, Allar nafórman ókkol olla, bedini ókkol olla, gunágar ókkol olla, nafak ókkol olla, forhésar no de ítara lla, baf ore yáh maa re kotól-goróya lla, kúni ókkol olla, **10** zenákur ókkol olla, morote-morote edde maya ye maya ye zená-goróya ókkol olla, gulam códor ókkol olla, misákur ókkol olla, misá gobá ókkol olla, edde ar badbaki zedúne sóiyi taalim or muhálef goré ítara lla, **11** ze taalim óilde taarífdár Allar torfóttu ñoñr kúchóbor, ziyán tobolik goríbar zimma añré diiya gíyéh. **12** Añárar Malik Mosih Isá zibá ye añré toóufik diiyé, añí íbar cúkur gorír, kiyólla-hoilé íba ye añré biccácdar báfi íbar ham ot lagaiyé. **13** Zodi añí ek hale kuféri-goróya, zulúmkur, edde zaalem accílám de óile yo, toóu añr uore rahám gorá gíyéh, kiyólla-hoilé híin toh añí imandár nó óite no buzí goijjílám deh. **14** Añárar Malike añr uore ódorbaára rahámot goijjé, aar Mosih Isár hañsóttu foida ó de iman edde muhábbot óu furafuri diiyé. **15** E hotá yían sóiyi aar furafuri kobul or laayek de ki, Mosih Isá duniyait aicíl de gunágar ókkol ore basaitó, zetarár bútoe ebbe ñoñr gunágar gwá añí.

16 Lekín Alla ye añr uore etollá rahám goijjé, zeéne añí zibá ebbe ñoñr gunágar, añr bútoe Mosih Isá ye Nizor ocímána sobór ore zahér gorí fare, aar híyan zen uitará lla ekkán nomuna bone, zetará íbar uore iman aní ofúrani zindigi faibo. (aĩñios g166) **17** Becók, Zibá abadulabadi Baáñcca, Zibá fána no, Zibá noirahar, hé siríf Allar izzot edde mohíma abadulabad foijjonto ówat tákouk. Aamin. (aĩñ g165) **18** Ó añr fua Timóti, yaar age tor baabute ze agun hotá howá gýl, hé mozin añí toré e hókum man dir, zeéne tui hé agun hotá monot rakí bála laráit dile-zane larái gorí faros, **19** aar tor iman edde bála hélom zen zari táke; kiyólla-hoilé hodún maincé nizor hélom or hédaiyot nó mane de hétolla, nizor iman zaáñs bángé fán bángigiyoi. **20** Ítarar bútoe Huminayus edde Alexzendar óu cámil asé, zetará re añí Cóitan or át ot gosáidiyi, zeéne ítara kuféri no gorá cíke.

2 Añr ebbe agor aros óiye de, tuáñra tamám manúc ókkol olla Allar hañse aros, dua, cúwaric, edde cúkuriya goró. **2** Héndilla, baáñcca ókkol olla edde tamám adikari ókkol olla yó goró, zeéne añára dindári edde izzoitta solasol loi nirol or sáañte cántir zindigi harái fari. **3** Héndilla gorón nán añárar Nejatdoya Allar nozor ot bála; híyane íba kúci ó. **4** Íba ye saá de, insán beggúne nejat fouk aar sóiyi re buzí farouk, **5** ki hoilé, Alla asé de ekgwá, aar Allar edde insán or mazé usíla asé de yó ekgwá, íba óilde manúc Mosih Isá, **6** zibá ye níki insán beggún or zan or bodol Nizor zan diyé, ziyán óilde borabor októti híyan or gobá díye deh. **7** Hétolla beh Alla ye añré tobolik-goróya edde sáhabi banaiyé, zeéne añí Beyohúdi ókkol or hañse iman or edde sóiyir ustat ói fari. Añí háñsa hotá hoír deh, misá hotá no. **8** Hétolla, añí saái de, hárr zagat morotfuain de honó guccá sára edde torkatorki sára, nizor pak át ókkol tulí dua goróuk. **9** Héndilla añí yían óu saái de ki, mayafuain de nizoré izzot-córome edde forhés or sáañte izzoitta gori hoorsuor loi háñzouk, sul or binis, cúna, mukta, yáh dami hoorsuor loi no, **10** bókke ítara endilla gori zindigi harouk, zendilla dindár mayafuain dor ttu gom ham ókkol gorí zindigi harar zorur. **11** Maiya fuain de nizáme edde furafuri fórmadarir sáañte cíkka hásil goróuk. **12** Taalim di bolla yáto morotfuar uore hókumot solai bolla añí honó mayafua re ezazot no dih. Ítara ttu nizám

ói tákon zorur. **13** Kiyólla-hoilé age toh Adom ore éna bana gyíl, yárbaade Háwa re. **14** Dúkat toh Adom foijjíl de no, bólke Háwa ye éna fori Allar hókum báinggil. **15** Toóu híba ye fuain biyar zoriya nejat faibo, zodi ítara nizoré forhés rakí imane edde muhábbote pak zindigi hara.

3 Yíán hók hotá de ki, ze manúce zomát or neta óito saá, íba ye ekkán gom zimmarar azzu gorér deh. **2** Zomát or neta behosúr ówa foribó, siríf ek bou wór hócom ówa foribó, forhés góri soloya ówa foribó, nizoré sóoñloya ówa foribó, izzotdár ówa foribó, meémandari-goróya ówa foribó, edde taalim dibar kaabel ówa foribó. **3** Íba nicákur no ówa foribó, maramari-doya no bólke cída ówa foribó, hoijja-fózzat goróya no ówa foribó, òiañ-foicár lalósbón no ówa foribó. **4** Íba ttu nizor gór ore bálagori sóoñli fara foribó, aar nizor fuain dore izzot or sáañte dab ot rakí fara foribó. **5** Kiyólla-hoilé ze manúce nizor foribar ore sóoñli no zane, íba ye Allar zomát ore keéngori sóoñlibo? **6** Íba noya imandár no ówa foribó, arnóile íba fohórai ye fúli urí lbiíl or dóilla sáñzar laayek óibo. **7** Aró, baárgwa maincór hañse íbar cúnam táka foribó, arnóile íba bodnam zurai lbiíl or fán ot forizaybói. **8** Héndilla, zomát or háadem ókkol ottu yó izzotdár ówa foribó, ehélas ówa foribó, córabkur no ówa foribó, aar òiañ-foicár lalósbón no ówa foribó. **9** Ítara ttu iman or gufoni háñsa re sáf dile dóri raká foribó. **10** Ítara re age zasai gorí sár zorur, baade zodi behosúr tóore, tói háademi ham gorí faribó. **11** Héndilla, ítara bou wáin ókkol ottu yó izzotdár ówa foribó, ar ezzon or gifót-goróya no bólke forhés góri soloya ówa foribó, aar hárr kessút imandari táka foribó. **12** Háadem ottu yó siríf ek bou wór hócom ówa foribó, aar nizor fuain dore edde gór or badbaki manúc ókkol ore bálagori sóoñli fara foribó. **13** Ze háadem ókkole bálagori háademi goré ítara izzot zuraibó, aar Mosih Isár uore ítara ttu asé de iman or baabute bicí hímmote boiyan gorí faribó. **14** Añí tor hépe bicí hára ai bolla acá goillé yo, añí tor hañse iín etollá lekír, zeéne **15** zodi añí aité deri óile yo, tui yíán zani faros de ki, manúc ottu Allar foribar ot, yáni zinda Allar zomát ot hondilla solasol tákar zorur, ze zomát óilde sóiyi taalim or tñni edde buniyadi. **16** Honó cók náí, añárar iman or gufoni bicí dloónr, ki hoilé, íba zahér óoil insán or súrote; aar behosúr bóuli sábut goijjíl Pak-Ruh ye; íba

re deikkíl firista ókkole. Íbar baabute tobolik gorá gyíl Beyohúdi ókkol or hañse; maincé íbar uore iman ainníl duniyait mazé; íba re uore tulífela giyeh mohímar sáañte.

4 Pak-Ruh ye hárasira góri hoó de ki, ahéri zobatan kessú manúc iman ottu lorizaybói, aar dúkabaz ruh ókkol or uzu edde bút or taalim ókkol or uzu mon dibo. **2** Héndilla taalim ókkol aiyé de misákur ókkol or munaféki ttu, zetarár hélom ore gorom bóoñr lói marhá maridiya giyéh. **3** Ítara biyá-cádi no goittó edde hodún-hodún hána baz rakíto maná goré, ze hána gún ore Alla ye foida goijjé de kiyólla hoilé, imandár ókkole edde sóiyi re zanoya ókkole zen híin cúkuriya gorí háa. **4** Allar foida goijjá hárr kessú gom, ekkán ore yó háram tñaribar náí zodi Alla re cúkuriya gorí háa, **5** kiyólla-hoilé híin toh Allar kalame edde duaye pak-sáf óizagoi. **6** Tui zodi e hotá gún imandár báiboináin dore buzái dós, tóoile tui Mosih Isár éggwa nekkar háadem óibi, tui toh iman or hotá ókkol or baabute edde nize mani soloór de bála taalim or baabute torbiyot faat asós. **7** Duniyaibi kíssá ókkol ottu duré tákic, zíin ore burá mayafuain dor banaouti kaháni hoilé yo fare. Yárbodol nizor dil ore dindári zindigi harai bolla bana. **8** Kiyólla-hoilé gaa re banailé siríf kessú fáida asé deh, lekin dil ore dindári lla banailé hárr mikká ttu fáida asé, kiyólla-hoilé dindárit e zindigir edde ahérot or zindigir waada asé. **9** Híyan toh hók hotá aar furafuri kobul or laayek. **10** Hétolla éna añára meénnot edde duk gorír, kiyólla-hoilé añárar acá zinda Allar uore raikkí, zibá manúc beggún or Nejatdoya, háasgori uitarár zetará níki íbar uore iman ané. **11** Tui ítara re iín or hókum edde taalim dic. **12** Tui juwan bouli honókiye hékarot no goróuk, bólke tui hotábatтарыe, solasole, muhábbote, imane, edde pak tákaye imandár ókkol olla nomuna bon. **13** Añí nú aiyí foijjonto pak-kalam telawot gorát, nosíyot gorát, edde taalim diyat birana ták. **14** Tor bútoze ze niyamot asé híyan ore éckara no goríc, ziyán zomát or buzurgó ókkole tor uore át díye ráar agun hotár duara faiyós. **15** Hoijí de híin or uzu furafuri díyan déh; híin lói fori ták, zeéne tor ruúhanir torki beggúne déké. **16** Nizor uzu edde taalim diyar uzu díyan rak. Híin ot lagi ták, kiyólla-hoilé héndilla goillé tui nizoré yó edde tor boiyan fúne de ítara re yó nejat fa bay faribó.

5 Honó morot murubbi re no jéjjeṛaic, bólke yóggwa re nizer baf ore buzá fángori buzáic; juwan morotfuain dore buzáite nizer báí ore buzá fángori buzáic; **2** maya murubbi ókkol ore buzáite nizer maa re buzá fángori buzáic; aar juwan mayafuain dore buzáite nizer bóin ore buzá fángori furafuri sáf dile buzáic. **3** Ze rari ókkol or saásita-goróya náí, ítarar saásita goríc. **4** Montor honó rari ttu zodi fuain yáh natiyáin táke, ítara ebbe age nizer gór or saásita gorí dindári zindigi haṛa cíkuk. Héngori ítara nizer dada-bafdadar gun fúnzi faribó, kiyólla-hoilé híyan Allar fosóndar. **5** Ze sóiyi rarir honó saásita-goróya náí híba ye nizer bóraca Allar uore rakí, raite dine fóriyat or sáañte dua gorát fori táke. **6** Montor ze rari ye ayaci gorí zindigi haṛa, híba toh zinda tákile yo mora. **7** Híin óu nosíyot goríc, zeéne ítarar uore honó elzam lagaibár no táke. **8** Zodi honókiye nizer egana-guicci re saásita no goré, háasgori nizer foribar ore, híyane dahá de íte nizer iman ore inkar goijjé. Manúc íte gairimandár ottu túaro hóraf. **9** Honó rari re rarir seráng ot tulíte híbar boc háit bosór or nise no ówa foribó; híba ye siríf nizer hócom lói milmilab goijjíl de ówa foribó, **10** gom ham or nam táka foribó, nizer fuain dore doónr goijjíl de ówa foribó, for ore meémandari goijjíl de ówa foribó, Allar pak bonda ókkol or tég dúwai díyl de ówa foribó, dukkíta ókkol ore modot goijjíl de ówa foribó, edde hárr dóilla gom ham gorát fori táikil de ówa foribó. **11** Montor juwan rari ókkol ore seráng ot no tulíc; kiyólla-hoilé zeñtté ítara ttu biyá goríbar mon aiyé, ítara ttu Mosihr door homi zay abar biyá goittó monehoó. **12** Aar héndilla góri ítara agor waada báñgi nizeró hosúrbon tóora. **13** Aró, ítara góre-góre zai yore boirá tákar adot bana; siríf híyan no, bólke ítara for or gifot goré, aar oinno zon or maamelat tég gólaidi endilla hotá ókkol hoó zín ítara ttu no hoón sáa. **14** Hétolla añí saái, juwan rari ókkole biyá gorók, fuain biyouk, nizer gór sóonlouk, zeéne duccone bodnam goríbar moouka no faa. **15** Kiyólla-hoilé hodún rari ókkole toh sóiyi rasta ttu lorizai cóitan or fisáli doijje. **16** Zodi honó imandár mayafua ttu nizer foribar or bútoze rari ókkol táke, híba ye zomát or uore fuñzá tulí no dí nize ítarar saásita gorók, zeéne zomáte rari uitarár saásita gorí fare zetará saásita-goróya náí. **17** Ze murubbi-neta ókkole zomát ore bálagori sola, ítara dui

gun izzot faibar laayek, háasgori uitará zetará meénnot or sáañte tobolik goré edde taalim deh. **18** Kiyólla-hoilé pak-kalam ot toh endilla asé, “Dán úñror de goru re hoónr no diyó.” Yíán óu asé, ki hoilé, “Muzure nizer muzuri faibar laayek.” **19** Dui zon yáh tin zon gobá no tákile murubbi-netar ulda honó elzam no gosíc. **20** Montor ze murubbi-neta ókkole guná gorát táke, ítara re manúc beggún or muuntu hosúri dahái dic, zeéne argúne uñciyari hásil goré. **21** Alla re, Mosih Isá re, edde basíloiya fírista ókkol ore muuntu gorí añí toré horagori nicót gorír, honókiyo lla buk no tani híin amól goríc, ektorfiaye honó kessú no goríc. **22** Zimma dii bolla honókiyor uore toratori át no dic, aar oinno zon or gunát cámil no óic. Nizeró pak-sáf rak. **23** Baná faní háí-hái no tákic; tor feṛor wasté edde tor ttu egazá ze biyaram ór híyan or wasté ekka-ekka anggur or roc óu háic. **24** Hodún manúc or guná sáf zahér, hétolla ítarar bisar age ó; ar hodún or guná fore beh zahér ó. **25** Borabor héndilla, gom ham sáf zahér, aar zín sáf zahér no híin óu lukaia táki no fare.

6 Zedún gulam ókkol gulamir zuañl or tole asé, ítara beggún ottu nizer-nizer girós ore furafuri izzot or laayek bouli báfar zorur, zeéne Allar nam or edde añárar taalim or bodnam no. **2** Ze gulam ókkol ottu imandár girós asé, ítara imandár bóuli gulam ókkole ítara re izzot no gorí no tákouk, bólke aró bicígori ítarar hédmot gorók, kiyólla-hoilé ítarar ham ottu zetará fáida faar ítara toh adorda imandár ókkol. Tui iín taalim deh edde nosíyot gór. **3** Zee niki arek doilla taalim deh zín sóiyi hotá lói, yáni añárar Malik Isá Mosihr hotá lói edde dindárir taalim loi mil no há, **4** íte fohór ola aar kessú no buzé. Lofzó ókkol or baabute barábari don edde torkatorki don ítar ékkan biyaram, zín or notiza ric, hoijja-fózzat, galagali, gollot cók-cubá, **5** edde bigíri-zaiya demak ola edde Allar sóiyi náí de maincór dormiyan ot hámica keranghal. Ítara tãare de, dindári zindigi haṛailé nofá asé. **6** Háleke zín asé híin lói kúci táki dindári zindigi haṛailé beh doónr nofá asé. **7** Kiyólla-hoilé añára duniyait aité de kessú nú aní, aar duniyai ttu zaibarcót óu fúañti kessú loizai no faijjum. **8** Hétolla zodi añára ttu háibar hána edde fiñdíbar hoor táke, híin lói kúci tákon sáa. **9** Lekin zetará tuangor óito saá, ítara doilla-boḍoilla entán ot edde fán ot fore, aar

ítarar dil ot behazor edde lussáni azzu ókkol foida ó, zífne manúc ore borbadiť edde dóncot đufáifele. **10** Kiyólla-hoilé ťaň-foicár muhábbot óilde hárr kisím or hórafir ékkan guijja. Kessú manúce ťaň-foicár lalóse iman ottu lorizai nizor uore đoňr ferecani ainné. **11** Montor tui, ó Allar bonda, híin beggún ottu dáizagoi, aar forhésgarir, dindárir, iman or, muhábbot or, sobór or edde noromir fisé lagi ták. **12** Iman or laráit bálagori larái gorí zah; ofúrani zindigi re dóri rak, ziyán olla toré đaha giyéh, ziyán or baabute tui bicí maincór cáikkat cíkar goijjılı.

(aiōnios g166) **13** Alla, zibá ye hárr kessú re foran dee, íba re cáikkat gorí edde Mosih Isá, zibá ye Pontiyus Filat or muúntu Nizor baabute sóiyi gobá díyl, íba re cáikkat gorí ańí toré tuaijjo dir, **14** tui nidak edde behosúr táki ańr hókum amól gór, zetódin ańárar Malik Isá Mosih zahér nó. **15** Kiyólla-hoilé Alla ye toh íba re borabor ťaim ot zahér goríbo. Hé Alla óilde taarifdár, siríf íba óilde Hókumot-goróya, íba baáńcca ókkol or Baáńcca aar malik ókkol or Malik. **16** Siríf íba óilde Zibá fána no ó. íba honó insán zai no fare de héndilla nur ot táke. íba re no honókiye deikké aar no honókiye deki fare. íbar izzot edde ofúrani raastri zari tákouk. Aamin. **(aiōnios g166)** **17** Zetaré e duniyait tuangor asé ítara re hókum díbi de, fohór ola no óito, edde ítara acá honó biccác náí de dón-cómbottir uore no rakí Allar uore rakító, Zibá ye níki ańára re ańárar kúci lla hárr kessú aťalikka gori diíféle. **(aiōn g165)** **18** Ítara re hoibí de, oinno zon or bálai goittó, gom ham or tuangor óito, dilkúla góri sóťka goittó, edde oinno zon ore nizor dón-cómbottir bák diito toiyar tákito. **19** Héndilla goríle ítara nizor lla dón zoma óibo, yáni ítarar muúm or lla endilla ekkán mozbut buniyadi bonibó ziyán or uore týai ore ítara sóiyi zindigi re dóri rakí faribó. **20** Ó Timóti, toré zín or zimma diiya giyéh híin ore héfazot rak. Duniyaibi behazor hotábattara ttu edde mil no há de ze barábari re maincé goltir sáańte “giyan” hoó, híin ottu basi ták. **21** Kiyólla-hoilé hodúne hé giyan or dabi gorí iman or rasta háraifelaiye de asé. Allar rahámot tuáńra beggún or uore zari tákouk.

2 Timóti

1 Añí Pául, Allar moncá mozin edde Mosih Isár hañse asé de zindigir waada mozin Mosih Isár éggwa sáhabi. **2** Añr adorja fua Timótir hañse lekír. Tor uore Baf Allar edde Mosih Isá añárar Malik or torfóttu rahámot, meérbani edde cánti nazil óuk. **3** Ze Allar ebaadot añí añr dada-bafdáda ókkol or dõilla sáf dil ottu gorí, añí toré añr duat hámica yaad gorí hé Allar cúkur gorí. **4** Tor hañdani monot urí añr ttu toré saitó kúb monehoór, zeéne añí kúciye bóri zaygoi. **5** Tor háti iman or baabute añr ttu monot asé, ziyán age tor nani Lowis ottu edde tor maa Eunik ottu yó accíl. Añr ttu furafuri ekin asé de ki, héndilla iman tor ttu yó asé. **6** Hétolla añí toré yaad goráidir, tor uore añr át díyaye Allar torfóttu tui ze niyamot faiyós, híyan ore aró zolai tul. **7** Kiyólla-hoilé Alla ye toh añára re dõor or ruh diiyé de no bólke taakot, muhábbot, edde nizoré sóoñlibar ruh diiyé deh. **8** Hétolla añárar Malik or gobá díte no cóрмаic, aar añí zee niki íbar wasté bon así, añré lói yó no cóрмаic, bólke Allar diiya taakote kúchóbor tobolik gorí bolla añr fúañti duk faa. **9** Kiyólla-hoilé Alla ye toh añára re nejat diyé aar pak zindigi harai bolla ñaikké; héndilla goijjé de añárar honó ham or zoriya no, bólke íbar erada edde rahámot mozin, ze rahámot añárar uore duniyair foidayecir age lóti Mosih Isár usflaye óiye, (aiōnios g166) **10** aar yala híyan añárar Nejatdoya Mosih Isá aiyóne añárar hañse zahér óiye. Hé Mosih ye moot ore dónco gorífelaiye, aar zindigi edde omoroni re kúchóbor or duara zahér gorídiye, **11** ze kúchóbor tobolik gorí bolla añré tobolik-goróya, sáhabi edde ustát ísafe basíloiye. **12** Hétolla bóuli añí e duk iín beggún fair; toóu añí córminda no, kiyólla-hoilé añí zani añí har uore iman ainín deh, aar furafuri ekin asé de ki, añí íbar át ot ziyán gosáidiyi híyan ore íba ye íbar waafesir din foijjonto héfazot rakí faribó. **13** Tui añr torfóttu zín or taalim faiyós híin ore sóiyi taalim ísafe dóri rak, aar Mosih Isár uore asé de imane edde muhábbote zindigi hara. **14** Ze amanot toré diiya giyéh híyan ore, añárar bútoze táke de Pak-Ruhr bole héfazot rak. **15** Tui toh zanos, Eciya elakar manúc beggún añr ttu alok óigiyoi, ítarar bútoze Fugilas edde Hirmuginas óu asé. **16** Unisífaras or gór ñiya re

Malike rahám goróuk, kiyólla-hoilé yóggwa ye añr mon ore boóut bar fofoitña goijjé, aar añí bon así bouli íba córminda nó, **17** bólke Rom cóor ot aái yóggwa ye añré bicígori tuwai añr lói dola óiye. **18** Malike goróuk, yóggwa ye zen Malik or waafesir din íba ttu rahám faa. Tui to bálagori zanos, yóggwa ye añré ífisas cóor ot hotó modot goijjíl.

2 Hétolla, ó añr fua, Mosih Isár hañse asé de rahámote mozbut óizagoi. **2** Aar bicí gobá ókkol or cáikkat añr muk ottu ze taalim tui fúinnili, hé taalim ore eén biccácdar manúc or át ot dee zetará ttu oinno zon ore yó taalim dibar kaabeliyoti asé. **3** Mosih Isár ek bála fóous or dõilla añr fúañti duk faa. **4** Honó fóouse toh larái goittó zailé awam ókkol or maamelat bazí no táke, zeéne íte ítar zonnal ore kúci gorí fare. **5** Héndilla, kélat lami zee niki kélar niyom mozin no kéla, íte zitar boccíc no faa. **6** Ze cacá ye meénnot goré, niyom mozin fósol or bák ebbe age íte éna faa. **7** Añí zín hoóir híin báfi saá, Malike toré hárr kessú buzíbar toóufik diibo. **8** Dawud or nosól or Isá Mosih re mora ttu zinda gorá giyeh de híyan yaad rakíc. Híyan óilde añí tobolik gorí de kúchóbor, **9** ziyán olla añí acámir dõilla duk fair, zeén níki añí bon así; lekin Allar kalam toh bon no. **10** Hétolla Allar basíloiya bonda ókkol or wasté añí hárr kessú bordac gorí, zeéne ítara yó Mosih Isár hañse asé de nejat hásil goré, aar ofúrani mohíma miras faa. (aiōnios g166) **11** Yán hók hotá de ki, “Añára zettót íbar fúañti moijjí, añára íbar fúañti basi tákiyum óu. **12** Zodi añára duk bordac gorí, añára íbar fúañti hókumot goríyum óu. Zodi añára íba re inkar gorí, íba ye yó añára re inkar goríbo. **13** Añára beiman óizaile yo, íba bilkúl beiman ó de náí, kiyólla-hoilé íba ye toh Nizoré misá tóorai no fare.” **14** Allar pak bonda ókkol ore tui hotá híin monot goráide, aar Alla re cáikkat gorí ítara re nosíyot goríbi de, ítara zen lofzó ókkol lói torkatorki no deh. Híine toh honó fáidai no goré, bólke fúnoya ókkol ore borbad goré deh. **15** Tui nizoré Allar muúntu endilla ham-goróya ísafe házir gorí bolla furafuri kucíc gór zibá re lói Alla kúci, yáni zibá ttu córminda óibar náí edde zibá ye sóiyi torika mozin sóiyi kalam or taalim deh. **16** Lekin duniyaibi behazor hotábattara ttu duré tákic, kiyólla-hoilé híine manúc ore zetó éto bedini banaifélaibo, **17** aar híin óilde endilla taalim

ziín kensar or dõilla fólizayboi. Héndilla taalim-doyar bútoe Huminayus edde Filetus óu cámil asé, **18** zetará sóiyir rasta eridifélaiye; ítara hoó de, háñcor bitigiyói; héndilla hoói ítara hodún or iman nac gorífelar. **19** Montor toóu Allar buwáiya mozbut buniyadi toh tiki táke, aar híyan ot e hotá moór maijja asé de ki, “Malike zane hontará íbar,” aar, “Zetará Malik or nam loh ítara kuham ottu duré tákouk.” **20** Bor góor ot toh baná cúnar edde sañdir sónhoddá ókkol táke de no, bólke gas or edde meñir óu táke; hodún háas ham olla, aar hodún eénte ham olla. **21** Hétolla zee niki e bura ham iín ottu pak-sáf táke, íte háas ham or sónhoddá óibo. Ítare pak raká zaybo. Íte Malik or ham ot aibó, aar ze honó gom ham olla toiyar óibo. **22** Juwan hal or hóraf mon ottu dáizagoi, aar zetará pak dile Malik ore mata ítarar fúañti forhéggarir, iman or, muhábbot or, edde cántir fisé lagi ták. **23** Lekin behazor edde bekuippa torkatorki ókkol bad dic; tui toh zanos, híne siríf hoijja-fózzat beh foida goré. **24** Malik or gulam ottu hoijja-fózzat goróya no ówa foribó, bólke beggún or hañse meérban ówa foribó, taalim dibar laayek ówa foribó, aar bordac-goróya ówa foribó, **25** aar muhálef ókkol ore cída góri nosíyot-goróya ówa foribó, kiyólla-hoilé óitofare Alla ye ítara re touwá goríbar toófufik diibo, zeéne ítara Allar sóiyi re zani fare, **26** aar buzón ot aái íbilíc or fán ottu basizagói, ze íbilíce ítara re ítar mon mozin soli bolla bondi banai raikké.

3 E hotá monot rak de ki, ahéri zobanat dõóñr mosibot or din aibó. **2** Kiyólla-hoilé manúc ókkol siríf nizoré muhábbot-goróya óizayboi, tiañ-foicár lalósbon óizayboi, borái ola óizayboi, fohór ola óizayboi, bodnam-goróya óizayboi, bafmaar nafórman óizayboi, nacúkur óizayboi, nafak óizayboi. **3** Ítara ttu ador-muhábbot no tákibo; ítara berahám óizayboi, gifot-goróya óizayboi, nizoré sóoñli no faribó, zaalem óizayboi, bálai re nafórot-goróya óizayboi, **4** beiman óizayboi, senfól óizayboi, edde tukabbor óizayboi; ítara Alla re muhábbot no gorí ayaci gorá re muhábbot goríbo; **5** ítara re saité dindár lagibó, montor hákikot ot ítara dindárir asór ore inkar goríbo. Héndilla manúc ókkol ottu duré tákic. **6** Ítarar bútoe endilla hodún manúc asé zetará góre-góre zai bekuf mayafuain dore fán ot féla, ze mayafuain dor uore gunár fuñzá asé. Hé mayafuain dore dõilla-

boðoilla hóraf mone sola; **7** ítara hámica taalim fúne, montor Allar sóiyi re zani farar héddur honódin foóñsi no fare. **8** Zendilla Jannise edde Jambrise Muúsar muhálef goijjíl, héndilla hé manúc híne yó sóiyir muhálef goré. Ítarar demak borbad óigiyoi, aar ítarar iman behar de sábut óigiyoi. **9** Montor ítara ar no baríbo, kiyólla-hoilé ítarar bekufai beggún or hañse sáf-sáf góri zahér óizayboi, zendilla Jannis edde Jambris or óu óoil. **10** Lekin tui toh aña taalim, solasol, erada, iman, sobór, muhábbot, edde bordac or baabute zanos, **11** tui aró zanos de, aña hodún zulúm edde duk ókkol faiyí, yáni Enñiyok, Ikóniya, edde Lusítara cóor ot aña uore kii-kii guzoijjé; hére aña hotó zulúm bordac goijjíl! Montor híin beggún ottu Malike aña basaiyé. **12** Becók, zetará Mosih Isár bútoe dindári zindigi haraitó saá ítarar uore zulúm óibo. **13** Montor bura edde dúkabaz manúc ókkol dinbodin aró hóraf óizayboi. Ítara nizoré yó gollot ot loizaybói, aar oinno zon ore yó gollot ot loizaybói. **14** Montor tui uúin ot lagi ták, ziín cíkkos edde furafuri ekin goijjós, kiyólla-hoilé tui toh zanos híin hontará ttu cíkkos, **15** aar gurahale lóti tui pak-kalam zainti, ziín óttu toré endilla giyan diibar taakot asé ze giyane Mosih Isár uore iman anár zoriya nejat hásil goríbar rasta daháide. **16** Pak-kalam or hárr hotá Allar torfóttu beh aiccé, híin taalim di bolla, hosúri daháidi bolla, sóiyi gorí bolla, edde forhéggarir torbiyot di bolla ham ot aiyé, **17** zeéne Allar bonda ókkol furafuri kaabel bone, aar hárr gom ham olla toiyar óizagoi.

4 Alla re cáikkat gorí, edde Mosih Isá zibá baañcca ísafe hókumot goittó aibó de októtt zinda edde mora ókkol or bisar goríbo íba re cáikkat gorí aña toré horagori nicót gorír, **2** Allar kalam tobolik gor; ñaime beñaime toiyar ták; kúb sobór or sáañte taalim di manúc ore buz deh, uñciyari deh, edde nosíyot gór. **3** Kiyólla-hoilé eén októ aibó, zeñtté manúce sóiyi taalim no fúnibo, bólke nizor mon or azzu mozin ítara nizor lla endilla ustát ókkol dola goríbo, zetará ítara ttu ziín fúnito han uñtar híin fúnaibo. **4** Ítara sóiyi ttu nizor han fíraifelai banaouti kissá ókkol or uzu han dibo. **5** Montor tui hárr hálót ot nizoré sóoñli rak, duk bordac gor, kúchóbor tobolik gor, edde Alla ye toré ze zimma diiyé híin adai gor. **6** Aña hotá hoitó sailé, aña ehón roc kurbanir dõilla dálidiya zar. Aña duniyai ttu

zaibar októ aáigiyoi. 7 Añí bála laráit larái goijjí, zibbat ore hótom goijjí, aar iman ore ʔikai raikkí. 8 Yala añr lla forhésarir tas zoma goijjá asé, zibá insáfuala Bisarhar Malike Íbar waafesir din ot añré diibo; siríf añré no, bólke uitará beggún ore yó diibo zetará muhábbot or sáañte Íbar aár entezar ot asé. 9 Añr hañse toratori ai bolla kucíc gór. 10 Kiyólla-hoilé Démase e duniyai re muhábbot gorí añré eridiyé. Yóggwa Tisólonika cóor ot giyyégoi. Kresken toh Galatíyat giyyégoi, aar Titus Dalmatíyat giyyégoi. (aiōn g165) 11 Añr fúañti asé de siríf Lukás, hétolla Markus ore tor fúañti loianíc, kiyólla-hoilé yóggwa re añr ham ot lager. 12 Añí Tukikus ore Ífisas ot diferáidiyi. 13 Toras ot Karpus or hére añí ze cál lan eri aiccí híyan tui aité loianíc, aar kitab pún óu loianíc, háasgori samara ola gún. 14 Tamar ham-goróya Alexzendare añr boóut lussán goijjé. Malike ítare ítar ham mozin bodola diibo. 15 Tui nize yó ítar ttu úñciyar tákic, kiyólla-hoilé íte añárar tobolik or bicí muhálef goijjé. 16 Zeñtté añré foóilabar añr sófai dí bolla bisar ot tulá gíyl, héñtte honókiye añr sáañt nó deh, bólke beggúne añré félai giílgoi. Alla ye ítarar hé ham or ísafkitab no rakóuk. 17 Montor Malik añr fúañti accíl aar Íba ye añré taakot dífl, zeéne añr duara kúchóbor furafuri tobolik goijjá óizagoi aar tamám Beyohúdi ókkole zen híin fúne. Híyan Alla ye añré cínggor muk ottu basaiyé deh. 18 Malike añré hárr bura ham ottu basaibó, aar sóiyi-sólamote Íbar asmani raijjot loizaybói. Íbar taarif abadulabad foijjonto hámica ówat tákouk. Aamin. (aiōn g165) 19 Prisíla re edde Ekúila re, edde Unisífaras or gór ʔíya re añí sólam díyi bóuli hoóic. 20 Erastus Kórin cóor ot táigiyoi, aar Toroffimos ore añí Miletus cóor ot eri aiccí, kiyólla-hoilé yóggwa ttu ocúk óiye. 21 Cítkhal or age ai bolla furafuri kucíc gór. Yubulus, Pudens, Linos, Kaludiya, edde tamám báiboináin dé toré sólam zanar. 22 Malik tor ruhr fúañti-fúañti tákouk. Tuáñrar uore rahámot zari tákouk.

Titus

1 Añí Pául, Allar gulam edde Isá Mosihr éggwa sáhabi. Añr zimmadari óilde, Allar basíloiya bonda ókkol ore iman or foñt ot anón edde dindári zindigi haraibár ze sóiyi asé hé sóiyi ílara re zanaidon. **2** Hé sóiyiye ílara re ofúrani zindigir acá diibo; ze Alla ye bilkúl misá hotá no hoó íba ye hé zindigi diibar waada duniyai foida goríbar age lóti goijjíl, (aiōnios g166) **3** aar borabor októt Nizor hé kalam ore tobolik or duara zahér goijjé, ze tobolik or zimma añí añárar Nejatdoya Allar hókume faiyí. **4** Titus or hañse lekír, zibá Mosihr uore añárar dóilla iman ainné de hé rúwate añr sóiyi fua. Tor uore Baf Allar edde Mosih Isá añárar Nejatdoyar torfóttu rahámot edde cánti nazil óuk. **5** Añí toré Keret ñiyat etollá eri aiccí, zeéne ziín goríbar baki táigiye goi hín tui ñík gorífelai faros edde añí toré zendilla hókum ñiyi hé mozin hárr cóor or zomát ot murubbi-neta ókkol tulí faros. **6** Monot rakíc, ze manúc ore tulíbi íba behosúr ówa foribó, ek bou wór hócom ówa foribó, íbar fuain imandár ówa foribó zetarár ayacir edde nafórmanir honó elzam náí. **7** Kiyólla-hoilé zomát or neta re Allar torfóttu zimma diiya giyéh ísafe, íba behosúr ówa foribó, ekguañjja no ówa foribó, bánggori guccá-goróya no ówa foribó, nicákur no ówa foribó, maramari-doya no ówa foribó, nazayes nofár lalósbon no ówa foribó, **8** bólke íba meémadari-goróya ówa foribó, gom ham ore fosón-goróya ówa foribó, akkól góri soloya ówa foribó, forhésgar ówa foribó, pak ówa foribó, aar nizoré sóoñli-faroya ówa foribó. **9** Íba ttu kalam uúin ot lagi táka foribó ziín biccácdar aar añára di de taalim or mozin, zeéne íba ye sóiyi taalim or duara nosíyot ókkol gorí fare aar zetará hé taalim or muhálef goré ítarar gollot sábut gorí fare. **10** Kiyólla-hoilé ámana-goróya, galu edde dagabaz ókkol toh boóut zon asé, háasgori ázomi goijjá gún or bútoe. **11** Ítarar muk bon gorár zorur, kiyólla-hoilé ílara nazayes nofá hásil gorí bolla fura gór-gór endilla taalime borbad diféler ziín ílara ttu no don accíl. **12** Ítarar nizor ek nobi ye hoóil de ki, “Kereti ókkole hámica misá hotá hoó; ílara faári januwar or dóilla alcí edde ñain.” **13** Hotá híyan bilkúl sóiyi. Hétolla tui horar sáañte ítarar golti daháide, zeéne ítarar iman furafuri sóiyi óizagoi, **14** aar ílara zen Yohúdi

ókkol or banaouti kissá ókkol or uzu edde ze manúc ókkol sóiyi ttu lorigiyói ítarar hókum or uzu han no deh. **15** Zetará pak, ílara lla toh hárr kessú pak; montor zetará nafak edde iman sára, ílara lla honó kessú pak náí, kiyólla-hoilé ítarar zehén, hélom, duníyan nafak óigiyoí. **16** Ílara Alla re zani hoói dabi goré, montor nizor hamhorose íba re inkar goré. Ílara nafórot or laayek, nafórman, aar honó gom ham or kaabel no.

2 Montor tor ttu uúin boiyan gorár zorur, ziín sóiyi taalim loi mil há. **2** Morot murubbi ókkol ore hoibí de, hámica forhés góri soilto, izzotdár óito, nizoré sóoñlito; aar ítarar iman, muhábbot edde sobór ore sóiyi rakító. **3** Héndilla, maya murubbi ókkol ore yó hoibí de, izzoitta solasol rakító, gifot-goróya no óito, córab or gulam no óito, bólke ziyán gom híyan oinno zon ore cíkaito, **4** zeéne ílara juwan mayafuain dore iín or torbiyot di fare, ki hoilé, nizor hócom ore muhábbot goittó, nizor fuain dore muhábbot goittó, **5** akkól góri soilto, pak tákito, gór or hammwa óito, meérban óito, aar nizor hócom or hókumot ore izzot goittó, zeéne Allar kalam or bodnam no. **6** Héndilla, juwan morotfuain dore yó akkól góri soilto buz dic. **7** Tui nize hárr kessút ítarar hañse gom ham or nomuna bon. Taalim dite sóiyi niyote edde izzot or sáañte dic. **8** Aar héñtte endilla sóiyi lofzó ókkol estemal goríc, ziín ore honó elzam di faribár náí, zeéne tor muhálef ókkol ottu añárar baabute honó hóraf hoibár no táki córmindat fore. **9** Gulam ókkol ore hoibí de, hárr kessút mazé ítarar girós or adíkar ore izzot goittó, ílara re kúci rakító, ítarar hotár uottú no matitó, **10** suri no goittó, bólke furafuri imandari daháito, zeéne ílara añárar Nejatdoya Allar taalim ore hárr mikká ttu cúndorgori háñzai fare. **11** Kiyólla-hoilé Allar oh rahámot toh zahér óiye, ziyán or usílaye insán beggúne nejat fa. **12** Híyane añára re cíka de, bedini edde duniyaibi mon ókkol ore inkar gorí, e jáhan ot máze akkól, forhésgari edde dindárir sáañte zindigi haraitó, (aiōn g165) **13** zeñtté añára kúci furaiya acá fura óibar entezar ot así, yáni zeñtté añárar Alla Tála edde Nejatdoya Isá Mosihr mohíma zahér óibar entezar ot así; **14** Zibá ye añára lla Nizor zan dyíl de, añára re hárr dóilla bedini ham ottu súrai bolla, edde añára re íba Nizor lla Nizor endilla éggwá háas koum banaitó pak-sáf

gorí bolla zetará ttu gom ham goittó jus táke. 15 Hín taalim deh, aar furafuri adíkar or sáañte maincóre josba gólai déh, edde ítarar golti daháide. Honókiye toré hékarot no goróuk.

3 Ítara re yaad goráide de ki, dec or hókumot-goróyar edde adikari ókkol or niyom or bútoze tákito, ítarar hotá manitó, fottí gom ham gorí bolla toiyar tákito, **2** honókiyor bodnam no goittó, hoijja-fózzat no goittó, edde cídár sáañte manúc beggún or hañse noromdari daháito. **3** Kiyólla-hoilé ek hale añára yó toh obuz, nafórman, edde gollot ot accílam, aar ñoilla-boñoilla mon or edde ayacir gulamit accílam. Añára ducconi edde hásorote beh zindigi hařaitám; héñtte añára re yó nafórot gorá zayto aar añára yó nafórot goittám. **4** Montor zeñtté añáar Nejatdoya Allar meérbani edde muhábbot insán-zati lla zahér óiye, **5** héñtte Íba ye añára re basaifélaie. Híyan añára nize goijjí de honó forhésgarir zoriya no, bólke Íbar meérbani mozin beh añára re Pak-Ruhr duara basaiyé deh, ze Ruh ye añára re dúifelai noya zormo diyé edde noya zindigi diiyé, **6** zibá re níki añáar Nejatdoya Isá Mosihr duara Alla ye añáar uore furafuri ñálidiye, **7** zeéne añára Íbar rahámote forhésgar ñóori yore ofúrani zindigir mirasdár boni fari, ziyán or añára ttu acá asé. (aiōnios g166) **8** Hín hók hotá. Añí saái de ki, tui hotá hín hímmot or sáañte boiyan gor, zeéne zetará Allar uore iman ainné ítara gom ham ot lagi tákibar uzu díyan deh. Héndilla gom ham gorón toh manúc beggún olla bála aar fáidar ham. **9** Montor behar torkatorki, háandan or baabute matamati, aar Córiyot or baabute barábari edde hoijja-fózzat diya ttu duré tákic, kiyólla-hoilé hín ot honó fáida náí, hín behar. **10** Faářa-faáři foida goré de ítare ekbar duibar úñciyari dic, yárbaade goillé ítar llói ar taalukat no rakíc, **11** kiyólla-hoilé tui toh zanos, héndilla manúc ókkol sóiyi ttu lorigiyói, aar guná gorí-gorí nizoré hosúrbon ñóra. **12** Zeñtté añí tor hére Artimas ore arnóile Tukikus ore difeřáiyum, héñtte añr hére Nikópolis cóor ot zeéne faros héene ai bolla kucíc goríc, kiyólla-hoilé añí cítkhal hére hařaibár fáisela goijjí. **13** Ukil Zenás ore edde Apólos ore ítarar sofór ot zai bolla zeddúr faros héddur modot goríc, zeéne ítara ttu honó homi no táke. **14** Añáar maincór ttu gom ham gorát lagi táka cíkon zorur, háasgori zeřé goríbar bicí zorur óiye,

arnóile ítarar zindigi cár nó óibo. 15 Añr fúañti asé de ítara beggúne toré sólam zanar. Imandár ókkol ore añáar sólam dic, zetará añára re muhábbot goré. Allar rahámot tuáñra beggún or uore zari tákouk.

Filimon

1 Añí Pául, Mosih Isár wasté eggwá hodi, añár fúañti añárar báí Timóti yó asé. Añárar adorja dustó edde sáañti ham-goróya Filimon or hañse, **2** añárar bóin Afiyar hañse, añárar sáañti iman or fóous Arkipus or hañse, edde Filimon or gór ot zoma ó de zomát or hañse lekír. **3** Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **4** Añí dua gorí de októ, tuáñre yaad gorí añr Alla re hámica cúkuriya gorí, **5** kiyólla-hoilé tuáñr ttu Allar tamám pak bonda ókkol olla ze muhábbot asé híyan or edde Malik Isár uore ze iman asé híyan or baabute añí fúnat así. **6** Añí dua gorí de, Mosihr duara añára ze bála-bála niyamot ókkol faiyí híin or baabute zankari hásil gorí yore imandár ókkol lói tuáñr taalukat zen aró baré. **7** Ó báí, tuáñr muhábbot dekí añí bicí kúci óiyi aar tosólí faiyí, kiyólla-hoilé tuñí de Allar pak bonda ókkol or dil ore foţfoiţta goijjó. **8** Hétolla, sóiyi gán goittó tuáñre hókum goríbar añár ttu Mosihr bútoe furafuri hók asé de óile yo, **9** toóu añí tuáñre muhábbot or sáañte aros gorá fosón goijjúm. Añí óilam de Pául, burá manúc, añí yala yó Mosih Isár wasté hodi boni así. **10** Añí tuáñre añr fua Onesímos olla aros gorír, zibá re eřé ziyól ot imandár banai añí ítar ruúhanir baf óigiyigoi. **11** Year age íte tuáñr lla behazor accí, montor yala duní zon olla, yáni tuáñr lla edde añr lla hazor óiye. **12** Añí ítare, yáni añr holizar tukuřa re tuáñr hañse waafes diferáir. **13** Añí ítare añr fúañti rakí bolla saáilam, zeéne kúchóbor or wasté añí zetókkal ziyól ot bon táki, íte tuáñr zagat ói añr hédmot gorí fare. **14** Lekin tuáñr ezin sára añí honó kessú goríbar mon nó gorí, zeéne tuñí añré ze bálaí goríba híin mojburiye no bólke kúcir sáañte goró. **15** Óitofare íte kessú októ lla tuáñr ttu etollá bóuli alok óigiyoi, zeéne tuñí ítare hámica lla waafes foo. (aiōnios g166) **16** Tuñí ítare ebarot siríf gulam ísafe faiba de no, bólke gulam or túaro bicí, yáni adorja báí ísafe faiba. Íte añr háas adorja, montor íte gulam edde Malik or bútoe báí ísafe tuáñr aró hotó adorja óibo fáñllar! **17** Hétolla tuñí zodi añré tuáñr sáañti bóuli buzó, tooile añí óitam bóuli zendilla gori añré kobul goittá héndilla góri ítare kobul goró. **18** Aar zodi íte tuáñr honó lussán goijjíl de óile, yáh tuñí ítar ttu honó kessú foór de óile,

híin añr name lekí rakíyo. **19** Añí Páule nizor áte lekí hoóir de, añí híin fúñzifelaiyum. Añr ttu de tuáñre hoibár zorurot náí de ki, tuáñr zan añr gun or tole asé. **20** Ó báí, Malik or wasté tuñí añré ekkán meérbani goró de ki, Mosihr ummot ísafe tuñí añr dil ore foţfoiţta goró. **21** Añí tuáñr fórmadari re ekin gorí tuáñr hañse iín lekír deh; añí zani, añí tuáñre ziín hoóir tuñí híin or túaro bicí goríba. **22** Aró ekkán hotá, añr lla ekkán musáfer-hána yó bondubos goríyo, kiyólla-hoilé añr ttu acá asé de ki, tuáñrar duaye añré tuáñrar hañse waafes diiféla zaybo. **23** Añr fúañti Mosih Isár wasté ziyól ot asé de Epafarase tuáñre sólam zanar, **24** héndilla añr fúañti ham-goróya Markus, Aristarkus, Démas, edde Lukáse yó tuáñre sólam zanar. **25** Malik Isá Mosihr rahámot tuáñrar ruhr uore zari tákouk.

Hibraniól

1 Agor zobatan Alla ye dada-bafdada ókkol or hañse nobi ókkol or duara boóut kessú boóut torikaye hoóil de asé, **2** montor e ahéri zobatan Íba ye añára llói Íbar Fuar duara beh hotá hoiyé, Zibá re Íba ye hárr kessúr mirasdár banaiyé edde Zibár usílaye Íba ye duniyai yó foida goijjé. (aiōn g165) **3** Aar Íba óilde Allar tozollir nur edde Íbar fura sóbi; Íba ye hárr kessú Nizor taakoti kalame sóoñli raké. Íba ye añárar guná ókkol dúifelai baade asman ot Alla Tálar den dák ottu boói táiкке. **4** Hé ísafe, hé Fua fírsta ókkol or túaro boóut bicí ðoóñr óigiyoi, zendilla Íba ye miras ot híin or túaro boóut ðoóñr nam faiyé. **5** Kiyólla-hoilé Alla ye Íbar honó fírsta re honóðin eén hoiyé de asé né, “Tuñí óilade Añr Fua, aijja Añí Tuáñr Baf óiyi”? Yáh eén hoiyé de, “Añí Íbar Baf óiyum, aar Íba Añr Fua óibo”? **6** Bólke zeñtté Íba ye Nizor foóila Fua re duniyait diferár, Íba ye hoór de, “Allar tamám fírsta ókkole Íba re sóida goró.” **7** Fírsta ókkol or baabute Íba ye hoór de, “Íba ye Nizor fírsta ókkol ore boiyar bana, aar Nizor háadem ókkol ore ooin or zilha bana.” **8** Montor Fua re Íba ye hoór de, “Ó Alla, Tuáñr toktó abadulabad foijjonto hámica zari táiкibo, aar insáfír larí óilde Tuáñr rajjor larí. (aiōn g165) **9** Tuñí forhégari re muhábbot goró aar bedini re nafórot goró; hétolla, Alla, Tuáñr Alla ye Tuáñr uore kúcir tel di basíloi yore Tuáñre Tuáñr sáañti ókkol or túaro uore goijjé.” **10** Íba ye aro hoór de, “Ó Malik, foóila cúrut duniyair buniyadi dáillo de Tuñí, aar asman ókkol óilde Tuáñr át or toiyari. **11** Híin toh nac óizayboi, montor Tuñí tiki táiкiba; híin beggún hoor or dóilla furan óizayboi. **12** Tuñí híin ore saddor or dóilla borífelaiba, aar híin ore bodoliféla zaybo. Montor Tuñí hámica ek dóilla táiкiba, aar Tuáñr hóiyat honóðin no fúraibo.” **13** Montor Íba ye honó fírsta re honóðin eén hoiyé de asé né, “Añr den dák ottu boiyó, zetukkún foijjonto Añí Tuáñr duccon ókkol ore Tuáñr foor tole gorí nó felai”? **14** Fírsta ókkol beggún kí hédmot goré de ruh no, zín ore uitarár hédmot goittó diferá gíyeh zetará nejat miras faibo?

2 Hétolla añára zín fúinni, híin or uzu aro bicígori díyan diyar zorur, zeéne añára híin ottu dur ói no zaygói. **2** Kiyólla-hoilé zodi fírsta ókkol or duara hoóil de hotá híin kaayem asé de

óile, aar hárr hosúrur edde nafórmanir laayek sáñza faáil de óile, **3** tóoile añára héntu keéngori hári fariyúm zodi añára eén ðoóñr nejat ore éckara gorí? Hé nejat or baabute toh age Malike elan goijjé, baade zetará fúinne ítara híyan sóiyi de sábut díye. **4** Fúañti-fúañti Alla ye yó Nizor moncá mozin illayi-nicán, taajuippa harhána, dóilla-boðoilla keramot, edde Pak-Ruhr niyamot ókkol lói híyan or gobá díyat accíl. **5** Íba ye añára ze aibár duniyair baabute hoóir, híyan ore toh fírsta ókkol or kobzat nó deh. **6** Bólke pak-kalam ot ek zagat honókiye endilla hoiyé de asé, “Insán kii deh, Tuñí híin olla kíyal rakó de? Yáh adomzat kii deh, Tuñí híin ore saásita goró de? **7** Tuñí híin ore kessú taim olla éna fírsta ókkol or túaro niso banaiyó; Tuñí híin ore tas ísafe diiyó de óilde mohíma edde izzot; **8** Tuñí hárr kessú híin or foor tole gorídiyo.” Hé ísafe, Alla ye hárr kessú híin or kobzat gorídile toh Íba ye híin or kobzat no di honó kessú bad raikké de náí. Montor aijjó añára hárr kessú híin or kobzat no dekir. **9** Lekin añára toh Isá re dekir, Zibá re kessú taim olla fírsta ókkol or túaro niso gorá gíyeh, zeéne Allar rahámote Íba ye fottí manúc olla moot mukabela gorí fare. Íbar dukkór moot or zoriya Íba re tas ísafe mohíma edde izzot diya gíyéh. **10** Kiyólla-hoilé Alla, zibá lla hárr kessú asé, edde zibár usílaye hárr kessú asé, boóut fuain dore mohímat aní bolla Íba ttu tík laiggé de, ítarar nejat or bani re duk faa bay furafuri nal gorí bolla. **11** Kiyólla-hoilé zibá ye pak-sáf goré Íbar edde zetará re pak-sáf gorá gíyeh, ítara beggún or Baf toh ek. Hétolla Isá ye ítara re báiboináin hoité no córma; **12** Íba ye hoiyé de, “Añí Tuáñr nam Añr báiboináin dor hañse boiyar goijjúm, maáfil ot máze Añí Tuáñr taarif or seér gaiyúm.” **13** Aro hoiyé de, “Añí Íbar uore bóraca rakíyum.” Yíán óu hoiyé, “Ótiya, Añí edde Alla ye Añré diiyé de fuain híin.” **14** Fuain híin zettót gusso edde lou ola, hétolla Isá Nize yó ekí dóilla boinné, zeéne moot or duara Íba ye uitaré dónco gorífelai fare zar ttu moot or uore taakot asé, yáni Íbilic ore, **15** edde uitará re azad gorí fare zetará moot or ðoore zindigibór gulamit asé. **16** Kiyólla-hoilé asóle Íba ye fírsta ókkol ore modot goré de no, bólke Ibrahím or nosól ore beh modot goré. **17** Hétolla Íba ttu hárr ruwate Nizor báiyain lói ek dóilla ówa foijjé, zeéne Allar hédmot ot Íba ezzon raháman edde biccácdar boro imam boni insán or gunár koffara di fare. **18** Kiyólla-hoilé

Íba Nize zettót entán or hálot ot duk bordac goijjé de asé, hétolla Íba ye zetará entán ot fore ítara re modot gorí fare.

3 Hétolla, ó pak báiboináin ókkol, zetará asmani ðak ot córik asó, Isár uzu soó, zibá Allar Rosúl edde Boro Imam bouli añára cíkar gorí. **2** Íba toh Ubár hañse biccácdar accíl zibá ye Íba re zimma dífl, zendilla Muúsa yó Allar foribar guñrat biccácdar accíl. **3** Íba re toh Muúsar túaro bicí izzot or laayek gona giyéh, zendilla gór banoya ttu gór or túaro bicí izzot asé. **4** Ze honó gór toh ezzon nó ezzone banaiyé de asé, montor hárr kessúr banoya óilde Alla. **5** Becók, Muúsa Allar foribar guñrat biccácdar accíl de óilde gulam ísafe, zeéne fore boiyan óibo de híin or gobá déh; **6** montor Mosih toh Allar foribar or uore biccácdar accíl de óilde Fua ísafe. Zodi añára añárar hímmot edde acár borái mozbut gori dóri rakí, tóoile toh Íbar hé foribar añára éna. **7** Hétolla, Pak-Ruh ye zendilla hoiyé, “Aijja zodi tuáñra Íbar abas fúno, **8** tuáñrar dil doró no goijjó, zendilla Añré guccá tulí díyl de óktót moidan zagat entán goijjíl de hé din goijjíl. **9** Hére tuáñrar bafðada ókkole Añré entán goijjíl edde zasai goijjíl, aar salic bosór foijjonto ítara Añr ham deikkíl. **10** Hétolla Añí hé nosól lói guccá óilam, aar hoóilam de, ‘Ítarar dil hámica gollot ot zaat táke, ítara Añr rasta nó siné.’ **11** Tói Añí Añr guccáye hosóm háiyi de, ‘Ítara Añr aram or zagat bilkúl góli no faribó.’” **12** Ó báiboináin ókkol, hóboroddar, tuáñra honókiyo ttu zen endilla bura edde nabiccác ola dil no táke, ziyán zinda Alla ttu duré óizagoi. **13** Bólke ezzon ore ezzone fottí din nosíyot goró zetódin “aijja” bouli howá zah, zeéne tuáñra honókiyor dil gunár dúkaye doró ói no zagói. **14** Kiyólla-hoilé ze bóraca añára ttu cúrut accíl, híyan ore zodi ahéri foijjonto mozbut gori dóri táki, tóoile toh añára Mosihr bútoe córik óigiyigoi. **15** Howá gíyeh de héndilla, “Aijja zodi tuáñra Íbar abas fúno, tuáñrar dil doró no goijjó, zendilla Añré guccá tulí díyl de óktót goijjíl.” **16** Abas fúni Íba re guccá tulí díyl de híin hontará? Hín kí uitará beggún no zetará re Muúsa ye Íjíp ottu neelai ainníl? **17** Aar salic bosór foijjonto Íba hontará llói guccá accíl dé? Uitará llói no né zetará guná goijjíl, zetarár lac moidan zagat fori accíl? **18** Íba ye hontará lla e hosóm háiyi de, “Ítara Añr aram or zagat bilkúl góli no faribó” zodi nafórmani goijjíl de ítara lla no óile? **19** Hé

súrote añára deki de, ítara nabiccác or zoriya beh góli nó fare.

4 Hétolla, Íbar aram or zagat gólibar waada zettót baki asé, añára ttu ðoorar zorur, zeéne tuáñra honókiyo re híyan ottu maárum óiya lootfa no zah. **2** Kiyólla-hoilé kúchóbor or tobolik añárar hañse yó gorá gíyl, ítarar hañse yó gorá gíyl; montor ítara fúinne de hé kalame ítarar fáida nó goré, kiyólla-hoilé ítara toh híin fúni imane kobul nó goré. **3** Añára zetará iman ainní añára toh hé aram or zagat góli fari, zendilla Íba ye hoiyé, “Tói Añí Añr guccát hosóm háiyi de, ‘Ítara Añr aram or zagat bilkúl góli no faribó.’” Íbar ham duniyair foidayecir héntte lóti hótom óiye de óile yo. **4** Kiyólla-hoilé Íba ye pak-kalam or ek zagat hánt nombór or din or baabute hoiyé de, “Alla ye Nizor ham beggún hótom gorí hánt nombór or din aram goijjé.” **5** Aró hoiyé de, “Ítara Añr aram or zagat bilkúl góli no faribó.” **6** Hétolla, zettót hodún hé aram or zagat gólibar baki asé, aar zetarár hañse age kúchóbor tobolik gorá gíyl ítara nafórmanir zoriya hére góli nó fare, **7** Íba ye abar ekgwá din tík goijjé, zibá re boóut khál baade Dawud or duara “aijja,” bouli hoiyé. Zendilla age hoiyí, “Aijja zodi tuáñra Íbar abas fúno, tuáñrar dil doró no goijjó.” **8** Zodi Yehócuá ye ítara re hé aram or zagat gólaie de óito, tóoile toh Alla ye yárbaade ar ekgwá din or hotá no hoitó. **9** Hé ísafe, Allar bonda ókkol olla aram or din baki asé. **10** Hoitó saáir de, Alla ye zendilla Nizor ham hótom gorí aram goijjé, héndilla zee niki Íbar aram or zagat góle, yóggwa ye yó nizor ham ottu aram faa. **11** Hétolla, aiyó, añára hé aram or zagat góli bolla hárr dóilla kucic gorí, zeéne honókiye uitarár nafórmanir nomunaye soli maárum ói no zagói. **12** Kiyólla-hoilé Allar kalam toh zinda, salu, edde ze honó dui dárja toluwar or túaro bicí dár. Hé kalame fúri zai foran edde ruh re edde girá edde fánic ore úddwa alok gorífele, aar dil or kíyal edde erada re zasai goré. **13** Allar nozor ottu honó mohóluk lukaiya asé de náí, bólke Íba zibár hañse niki añára ttu ísaf díya foribó Íbar suk or muúntu hárr kessú kúla edde uidda. **14** Añára ttu zettót endilla ezzon ðoóñr boro imam asé zibá asman ókkol farái giyyé, yáni Allar Fua Isá, hétolla aiyó, añára cíkar goijjé de iman ore mozbut gori dóri táki. **15** Kiyólla-hoilé añára ttu toh endilla boro imam asé de no zee niki añárar komzuri re

buzi no fare, bólke íba re toh añárar dóilla hárr kisím or entán gorá gýeh, toóu guná goijjé de náí. **16** Hétolla, aiyó, añára rahámot or toktór hañse hímmot gorí zai, zeéne añára meérbani hásil gorí edde zorurot ot fori de októť añára re modot gorí bolla rahámot fai.

5 Manúc ottu basílowa zah de fottí boro imam ore toh manúc olla Allar hédmot goittó éna tíyagara zah, guná lla nozorana edde kurbani ókkol peec gorí bolla. **2** Íba ye no zanoya edde gollot ot zah de ítara llói norom or sáañte sákbak gorí fare, kiyólla-hoilé íba nize yó komzurir gereftarit asé. **3** Hétolla toh íba ttu maincór guná lla diya fore de héndilla nizor guná lla yó kurbani diya fore. **4** Honókiye héndilla imam óibar izzot nizorgá nize looi no fare, bólke Alla ye ðake de íba ye beh híyan faa, zendilla Arone faáil. **5** Héndilla, Mosih ye yó boro imam ói bolla Nizoré Nize ðoóñr goijjé de no, bólke Ubá ye beh goijjé zibá ye íba re endilla hoiyé, “Tuñí óilade Añr Fua, aijja Añí Tuáñr Baf óiyi.” **6** Íba ye arek zagat óu hoiyé de, “Malkízadek or nomunaye Tuñí abadulabad foijjonto imam.” (aiōn g165) **7** Íba duniyait accíl de héñtte, ðoóñr-ðoóñr góri guzori hañdi edde suk or faní bácai, Ubár hañse dua edde fóriyat goijjíl zibá ye íba re moot ottu basai faitto, aar íba ttu dindári solasol accíl de hétolla íba ye zuwab faáil. **8** Íba hé Allar Fua de óile yo, íba ye zín duk faáil híin ottu fórmadari cíkke, **9** aar furafuri kaabel ói íba uitará beggún olla ofúrani nejat or guijja boinné zetará íbar hotá amól goré, (aiōnios g166) **10** aar íba re Alla ye Malkízadek or nomunaye Boro Imam óibar tokka diiyé. **11** Híyan or baabute añára ttu boóut kessú hoibár asé, montor híin buzáite mockil, kiyólla-hoilé tuáñra toh ar buzító no soór. **12** Asóle e októť tuáñra ttu ustat óizongoi accíl, montor yala toh tuáñra re Allar sóiyi re ebbe cúru ttu lóti abar cíkaito ar ezzon lager, aar doró hánar bodol tuáñra ttu dud háibar zorurot óiye. **13** Zee niki siríf dud háa, ítar ttu forhésgarir baabute honó zankari no táke, kiyólla-hoilé íte toh dud or fua. **14** Montor doró hána óilde boc óiye de manúc olla, zetará ttu akkól góri solité-solité gom hóraf forók goríbar tojurba óigiyoí.

6 Hétolla, aiyó, Mosihr baabute ebbe cúrur ze taalim asé híin bad di balok óibar híkka hañi mari. Añára ttu toh mora ham ottu touwá

goríbar edde Allar uore iman aníbar abar buniyadi ðálar zorurot náí, **2** aró, báptisma lowar, honókiyor uore át díyar, muruda ókkol or háñcor or, edde ofúrani azab or taalim faibar óu zorurot náí. (aiōnios g166) **3** Allar hókum óile, añára híyan beh goríyum. **4** Kiyólla-hoilé yían bilkúl ói no fare de ki, zetará re ekbar foór ot aná gýeh, asmani niyamot or moza faifélaiye, Pak-Ruh faat córik óiye, **5** Allar kalam or bálai edde aibó de jáhan or kudurut or moza faifélaiye, (aiōn g165) **6** aar yárbaade iman ottu forigiyói, ítara re noya gori abar touwá gorábon; kiyólla-hoilé híyan toh ítara nize Allar Fua re abar kúruc ot dí mariféler deh edde íba re beggún or muúntu beizzoti gorér deh. **7** Ze zobine barbár aiyé de zór or faní hózom goré aar kėti-goróya ókkol olla endilla totorhari dóra zííne ítarar fáida goré, híyane toh Allar torfóttu borhot faa, **8** montor ziyáne keñrar záli edde keñrabon fúra, híyan toh behar edde laánot faite deri náí; ahérit híyan furat diféla zah. **9** Montor ó adorja ókkol, zodi añára endilla hotá hoilé yo, añára ttu tuáñrar baabute yár túaro beétor edde nejate ané de jiníc ókkol or ekin asé. **10** Kiyólla-hoilé Alla toh nainsáf-wala no zeén níki tuáñrar ham edde muhábbot ore foóraifelaito, zín tuáñra pak bonda ókkol or hédmot gorí yore edde aijjó gorí-gorí íbar hañse zahér goijjó. **11** Añárar azzu óilde, tuáñra fottí zone ekí dóilla kucíc ahéri foijjonto dahát táko, zeéne zani fero de, tuáñrar acá hámaha fura óibo, **12** aró, tuáñra alcíya no óiyo, bólke uitarár nomunaye solo zetará imane edde sobóre Allar waada goijjá jiníc or mirasdár óiye. **13** Zeñtté Alla ye Ibrahim lói waada goijjé, íba ttu hosóm hái bolla Nizor túaro ðoóñr honókiye náí ísafe íba ye Nizor loi beh hosóm háíye. **14** Íba ye hoiyé de, “Añí toré hámaha bicí borhot diiyum, aar tor háandan boóut bicí goijjúm.” **15** Hétolla, yóggwa ye sobór or sáañte entezar goijjé rár, waada goijjíl de híyan hásil goijjíl. **16** Manúce toh nizor túaro ðoóñr lói éna hosóm há, aar hosóm hái sábut goillé ítarar hárr hoijja-fózzat fúraizagoi. **17** Héndilla, Alla ttu yó zeñtte monehoiyé, íbar erada honódin bodoli no fare de híyan waadar mirasdár ókkol ore aró sáf zahér gorí bolla, híyan íba ye hosóm hái sábut goijjé, **18** zeéne no bodole de duiyán jiníc zín or baabute Alla ye misá hotá hoói no fare, añára zetará faná loiyí de así añára ttu híin or zoriya ðoóñr hímmot táke, añárar muúntu raká gýeh de hé acá re mozbut or

sáaríte dóri rakí bolla. **19** Hé acá híyan óilde toh añárar foran or endilla nogol ziyán mozbut edde kaayem táke; híyan forodar bútoe úddwa foórise, **20** zeřé Isá añára lla añárar age góille, Malkízadek or nomunaye abadulabad foijjonto Boro Imam ói yore. (aiōn g165)

7 Hé Malkízadek accíl de Salem cóor or baáñcca edde Alla Tálar imam. İba ye zeñtté İbrahıme baáñcca ókkol ore hárai waafes aiyér, héñtte yóggwa llói millíl edde yóggwa re borhot dífl, **2** aar İbrahıme İba re luř goijjá hárr kessúr doc bák or ek bák diifélail. Agor ttu hoitó sailé, Malkízadek nam or maáni óilde “forhésgarir baáñcca,” aar Salem or baáñccar maáni óilde “cántir baáñcca.” **3** İba baf sára, maa sára, edde honó fissán sára, İbar hóiyat or cúru yó náı fúrantı yó náı, bólke İba Allar Fuar dóilla ísafe, abadulabad foijjonto imam táigiyoi. **4** Yala báfıso manúc İba hotó dıoñır accíl, zıbá re añárar kում or baf İbrahıme zıın luř goijjıl híın ottu barık kún doc bák or ek bák diifélail. **5** Leévir nosól or manúc zetará imami ham faa, ítara ttu toh maincóor ttu doc bák or ek bák looi bolla Córıyot or hókum asé, yáni nizor kում ottu, zodi ítara yó İbrahım ottu aiccé de óile yo. **6** Montor Malkízadek toh Leévir nosól ottu aiccé de no, toóu İba ye hé İbrahım zıbá llói Alla ye waada goijjıl, yóggwa ttu doc bák or ek bák looil edde yóggwa re borhot dífl. **7** Cónıro ye dıoñır ottu beh borhot faa, hotá híyan ot de honó cóok náı. **8** Ek mikká ttu sailé, more de manúce éna doc bák or ek bák loo, montor arek mikká ttu sailé, uúın toh ubá ye éna loiyé zıbá hámica zinda asé bóuli gobá díya zah. **9** Hé ísafe hoilé, ze Leévi ye doc bák or ek bák loo, yóggwa ye úddwa İbrahım or duara doc bák or ek bák dífl de asé, **10** kiyólla-hoilé zeñtté Malkízadeke İbrahım lói millé, héñtte toh Leévi yóggwar bafđada İbrahım or jisım ot accíl. **11** Hétolla, zodi Leéviól or imami ham or duara manúc furafuri sóiyi tóori faitto—kiyólla-hoilé hé bóracaye éna manúc ore Córıyot diiya giyéh—tóoile arek dıoilla eggwá imam foida óibar kii zorurot accíl, zıbá Aron or nomuna no bólke Malkízadek or nomuna? **12** Imami ham or kisım bodolizaylé toh córiyot óu bodolizar zorur. **13** Kiyólla-hoilé zıbár baabute iın howá zar, İba toh arek háandan or, aar hé háandan ottu honókiye kurbani-gáñt hédmot goijjé de náı. **14** Hıyane sáf zahér goré de ki, añárar

Malik aiccé de óilde Yohúdahr nosól ottu, ze háandan ore hétap gorı Muúsa ye imami ham or mutalek honó kessú nó hoó. **15** Hıyan toh aró sáf zahér óigiyoi, zettót Malkízadek or dóilla ar eggwá imam foida óiye, **16** zıbá imam óiye de jisımi dabidawar niyome no, bólke fána no ó de zındigir taakote. **17** Kiyólla-hoilé İbar baabute toh endilla gobá díya asé, “Malkízadek or nomunaye Tuńı abadulabad foijjonto imam.” (aiōn g165) **18** Ek ruwate sailé, agor furana niyom ore baatel gorífela giyéh de, híyan komzur edde behar accíl de hétolla, **19** kiyólla-hoilé Córıyote toh honó kessú re furafuri sóiyigori faijjé de náı. Ar ek ruwate sailé, híyan or zagat ekkán beétor acá diiya giyéh deh, ziyán or usılaye añára Allar dıake zai fari. **20** Hé acár baabute hosóm há giyéh de asé, **21** uitará toh honó hosóm sára éna imam boinnıl, montor Isá héndilla boinné de Ubár hosóme zıbá ye İba re endilla hoiyé, “Mabude hosóm háiyi, Aar İba ye mon no bodolibo, “Tuńı abadulabad foijjonto imam.”” (aiōn g165) **22** Hıyan or zoriya toh Isá ekkán beétor razınamar zabin tóoijje. **23** Imam toh boóut zon tákito, kiyólla-hoilé ítara morizaylé imami ham ar gorı no faitto. **24** Montor Isá zettót abadulabad foijjonto zinda asé, İbar imami ham honódin no fúraibo. (aiōn g165) **25** Hétolla, zetará İbar duara Allar hañse aiyé ítara re İba ye furafuri nejat di fare, kiyólla-hoilé ítara cúwaric olla İba toh hámica zinda asé. **26** Endilla eggwá boro imam táka añára lla ódode óiye, zıbá pak, behosúr, dak sára, gunágar ókkol ottu alok, edde zıbá re asman ókkol or túaro uısol ot tulá giyéh. **27** İba ttu fottı din kurbani peec gorá no fore, zendilla oinno boro imam ókkol ottu age nizor guná lla baade manúc or guná lla gorá fore, kiyólla-hoilé İba ye toh hé ham ekbar ot hámica lla oñtté adai gorífelaiye zeñtté İba ye Nizoré kurbani diyé. **28** Kiyólla-hoilé Córıyote maincóre éna boro imam tıyagara zetará komzur ola, montor ze hosóm Córıyot baade há giyéh, híyane toh Fua re éna hé ham ot tıyagaraiye, zıbá re abadulabad olla furafuri háti gorífela giyéh. (aiōn g165)

8 Zıın howá giyéh híın or mul hotá óilde, añára ttu eggwá endilla boro imam asé, zıbá asman ot mazé Alla Tálar toktór den đak ottu boırá asé, **2** zıbá pak zagat hédmot goré, yáni asól řambu waán ot, ziyán Mabude beh řaikké, insáne no. **3** Hárr eggwá boro imam ore tulá zah de toh nozorana edde kurbani ókkol peec

gorí bolla éna, hétolla añárar gwá ttu yó peec gorí bolla kessú tákar zorur. **4** Íba zodi duniyáit tákito, íba bilkúl imam ói no faitto, kiyólla-hoilé Córíyot mozin nozorana peec gorí bolla de age lóti imam asé, **5** zetará asmani siz ókkol or nomunar edde sábar hédmot goré. Hétolla toh Muúsa ye řambu řakibárcot Alla ye íba re endilla úñciyari díyl, “Saáic, faár or uore toré ze nomuna dahá gíyeh, fottí ekkán hé mutafek banaic.” **6** Montor yala toh Isá ye ítarar túaro uttom hédmotdari faíyé, eddúr zeén níki íba beétor razinama waán or usíla yó, ziyán beétor waada ókkol or buniyadir uore gorá gíyeh. **7** Foóilar razinama gán zodi nikút óito, tooile toh dusára razinamar honó zorurot no óito. **8** Montor Alla ye Nizor bonda ókkol or hosúri daháidi bolla hoíyé de, “Mabude fórmair, soó, din uúin aiyér, zeñtté Añí ekkán noya razinama goijjúm Isráil or manúc lói edde Yohúdahr manúc lói. **9** Híyan razinama waán or dóilla no óibo, ziyán Añí ítarar bafdadá ókkol lói oñtté goijjílám zeñtté Añí ítara re át ot dóri lójp dec ottu neelai ainnílam. Kiyólla-hoilé ítara Añr hé razinamat zari nó táke, hétolla Añí yó ítarar uzu díyan nó díh, Mabude fórmair. **10** Mabude aró fórmair, din híin baade Añí Isráil or manúc lói ze razinama goríyúm híyan óilde yíána: Añí Añr córiyot ókkol ítarar zehén ot dālidiyum, edde híin ítarar díl ot lekídiyum. Añí ítarar Alla óiyúm, aar ítara Añr bonda óibo. **11** Yárbaade lóti ítara ttu nizor atehañsór maincóre yáh nizor báí ore endilla taalim díya no foribó de ki, ‘Mabud ore sinó,’ kiyólla-hoilé ítara dōóñr cóñño beggúne Añré siníbo. **12** Kiyólla-hoilé Añí ítarar hosúri ókkol maf gorídiyum, aar ítarar guná ar monot no raikkúm.” **13** Íba ye zeñtté “ekkán noya razinama” hoíyé, íba ye toh agor gán ore baáldai félaiye. Aar ziyán baáldai zagoi edde furan óizagoi, híyan toh hára gaib óizayboi.

9 Hé ísafe, foóilar razinama gán ot ebaadot or niyom-kaanun accíl, aar héndilla ekkán duniyaibi ebaadot-hánar baabute yó accíl. **2** Kiyólla-hoilé ekkán řambu řaka gyíl, ziyán or foóila kamárat serak-or-boiřóni, mes edde pak ruří accíl; hé kamára wa re Pak Zaga hoitó. **3** Dusára foroda gán baade accíl de óilde kamára ubá zibá re Ebbe Pak Zaga hoitó, **4** zibát cúnar agórbattir-gán edde sairó dák ottu cúna lói lippa razinamar sónduk accíl. Hé sónduk ot

máze manná ola eggwá cúnar fatila, Aron or fúlfiutřa lorí edde razinama leikká fattór or řat tún accíl. **5** Sónduk kwar uore Allar tozollir karubi fřista gún accíl, ziíne nizor faké koffara-gáñr uore sába dito. Híin or baabute ehón tofsil or sáañte hoibár řaim no. **6** Zeñtté híin beggún héndilla góri toiyar goijjá óizaytoi, imam ókkole hámica foóila kamárat góli ebaadot or ham adai goittó. **7** Montor dusára kamárat siríf boro imam beh gólito, bosóre ekbar. Íba ye lou sára no gólito, ziín íba ye nizor lla edde maincé no zani goijjé de guná lla peec goittó. **8** Híyan lói Pak-Ruh ye dahár de, Ebbe Pak Zagat gólibar fořit otókkal zahér nó óiyo, zetókkal foóila kamára estemal ot accíl. **9** Kamára híyan óilde ehón or zobana re dahá de ekkán meésal, ziyán or maáni óilde, nozorana edde kurbani peec goráye ebaadotgár or hélom ore furafuri sáf gorífelai no fare; **10** kiyólla-hoilé híin toh siríf hána, fína, edde dōilla-bođoilla uzu banar baabute éna; jisími niyom híin ore otókkal olla beh zari goijjíl, zetókkal híin ore bodolifélaibar októ nú aiyé. **11** Montor zeñtté Mosih gom siz uúin or Boro Imam óiaicce ziín age lóti aáigiyo, héñtte íba aró dōóñr edde aró háři řambu waán ot beh góille, ziyán át or banaiya no, yáni e duniyaibi no. **12** Íba ye góille de sóol or edde gorur-sóor lou loi no, bólke Nizor lou loi beh íba ye hé Ebbe Pak Zagat ekbar ot hámica lla góille, aar héndilla gorí añára re abadulabad olla hálas gorífelaiye. (aĩñnios g166) **13** Kiyólla-hoilé zodi sóol or edde biríc gorur lou, edde harúl gorur sái nafak manúc or uore cínři dile, ítarar jisím pak-sáf óizagoi de óile, **14** tooile zibá ye ofúrani Ruhr duara Nizoré Allar hañse honó dak sára kurbani ísafe peec goijjé, hé Mosihr lou wé añárar hélom ore behar ham ókkol ottu aró hotó bicí pak-sáf goríbo fánřlar, añára zinda Allar hédmot gorí fán? (aĩñnios g166) **15** Íba toh etollá éna ekkán noya razinamar usíla, zeéne zetará re řaka gíyéh ítara waada goijjá ofúrani miras faa, kiyólla-hoilé ítara foóila razinamar tole táki ze guná-háta ókkol goijjé híin ottu ítara re azad gorí bolla íba ye toh foran di dam diífelaiye. (aĩñnios g166) **16** Kiyólla-hoilé wosíyot-nama tákile toh wosíyot-goróyar moot óiye de híyan sábut gorár óu zorur, **17** kiyólla-hoilé manúc or moot baade éna wosíyot-nama ham ot aiyé, wosíyot-goróya basi tákile híyan bilkúl ham ot aiyé de náí. **18** Hétolla toh foóilar razinama yó lou sára ham ot laga nó zah. **19** Zeñtté Muúsa ye tamám

manúc ókkol ore Córíyot or hárr ekkán hókum boiyan gorífelaiye, íba ye gorur-sóor edde sóol or lou wóre faní lói miyái yore bérasóol or kirmis roingga fúñta edde hísop-gas estemal gorí Córíyot or hé kitab pwár uore edde tamám manúc cún or uore cířka díyl, **20** endilla hoói, “Ín óilde razinama waán or lou, ziyán amól gorí bolla Alla ye tuáñra re hókum díye.” **21** Héndilla góri íba ye řambu gán or edde ebaadot or tamám sámána gún or uore yó lou wór cířka díye. **22** Córíyot mozin tokoriban hárr kessú lou loi beh pak-sáf gorífela zah, aar lou no bácaile gunár maf faa no zah. **23** Hétolla, asmani jiníc or nokoli gún ore híin lói pak-sáf gorár zorur accíl, montor asmani asóli jiníc ore pak-sáf gorí bolla híin or túaro beétor kurbanir zorur. **24** Kiyólla-hoilé Mosih toh insán or át or banaiya pak zagat góille de no, ziyán siríf asóli gán or ekkán nokoli, bółke asman ot beh góille, yala Allar nozor ot añára lla házir ói bolla. **25** Íba ye Nizoré barbár kurbaní dito góille de yó no, zendilla boro imame ze lou nizor no híin lói bosóre-bosóre Ebbe Pak Zagat góle. **26** Arnóile toh íba ttu duniyair foidayecir héñitte lóti barbár duk faa foitto, montor yala ahéri zobatan íba ekbar beh zahér óiye, Nizoré kurbaní difélai guná dur gorí bolla. (aiōn g165) **27** Zendilla, insán ottu ekbar mora foribó de aar yárbaade bisar óibo de híyan řík gorá gíyeh, **28** héndilla, Mosih ye yó boót maincór gunár fuñzá boi bolla ekbar beh kurbaní óiye. Íba dusárabar zahér óibo, gunár fuñza boi bolla no, bółke uitará re nejat di bolla zetará azzur sáante íbar entezar ot asé.

10 Córíyot zettót aibó de gom jiníc ókkol or siríf sába, aar híin or asóli súrot no, hétolla Córíyote ze ekí dóilla kurbaní bosóre-bosóre bad sára peec gorá zah híin lói, dáke aiyé de ítara re bilkúl furafuri sóiyi gorí no fare. **2** Arnóile híin peec gorá bon ói no zaytoi né? Kiyólla-hoilé ebaadotgár toh ekbar ot pak-sáf óizaytoi, aar nizoré nize gunágar bóuli ar no řáarito. **3** Bółke hé kurbaní ye fottí bosór guná beh monot goríde. **4** Kiyólla-hoilé biríc gorur edde sóol or lou wé toh guná bilkúl dur gorífelai no fare. **5** Hétolla Mosih duniyait aibárcot Alla re hoíyé de, “Kurbani edde nozorana toh Tuñí fosón nó goró, montor Tuñí Añr lla ekkán jisím toiyar goijjó. **6** Furat dede kurbaníye edde gunár kurbaníye Tuñí kúci no óita. **7** Hétunot Añí hoíyí de, ‘Soó, ó Alla, Añí aiccí Tuáñr moncá

fura goittó, zendilla Añr baabute pak-kitab or sábbat leikká asé.” **8** Foóila íba ye hoíyé de, “Kurbani edde nozorana, furat dede kurbaní edde gunár kurbaní Tuñí fosón nó goró, aar híin lói Tuñí kúci yó nó óiyo.” Háleke híin Córíyot mozin éna peec gorá zayto. **9** Íba ye tarfore hoíyé de, “Soó, Añí aiccí Tuáñr moncá fura goittó.” Hé ísafe, dusára gán ore kaayem gorí bolla íba ye foóilar gán ore baatel gorífelaiye. **10** Hé moncá mozin beh añára re Isá Mosihr jisím or kurbanir usílave ekbar ot hámica lla pak-sáf gorífela gíyeh. **11** Hárr imame toh fottí din tíyai yore hédmot goré edde barbár ekí dóilla kurbaní peec goré, zííne guná bilkúl dur gorífelai no fare. **12** Montor Mosih ye toh guná lla ek kurbaní hámica lla peec gorí, Allar den dák ottu boói táikke, **13** aar hé októť lóti íba ye entezar gorér de, íbar duccon ókkol ore íbar foor tole gorídiyar. **14** Kiyólla-hoilé íba ye toh hé ek kurbaníye uitará re hámica lla furafuri sóiyi gorífelaiye, zetará re pak-sáf gorá zar. **15** Híyan or baabute Pak-Ruh ye yó añárar hañse gobá der. Foóila íba ye hoíyé de, **16** “Mabude hoóir, yíán óilde razinama waán ziyán Añí hé din híin baade ítara llói goríyur: Añí Añr córíyot ókkol ítatar dil ot dálidiyum, aar híin ítatar zehén ot lekídiyum.” **17** Íba ye tarfore hoíyé de, “Ítarar guná edde bedini ham ókkol Añí ar honódin yaad no raikkúm.” **18** Híin maf óigiyoi de óile toh, guná lla kurbaní ar zoruroť náí. **19** Hétolla, ó báiboináin ókkol, añára ttu zettóť Isár lou wór usílave Ebbe Pak Zagat góli bolla hímmot asé, **20** noya edde zinda rasta waán or bóli ziyán íba ye añára lla foroda, yáni íbar jisím báy kúille, **21** aar añára ttu zettóť eén eggwá boro imam asé, zibá Allar foribar or zimmadar, **22** hétolla, aiyó, añára ehélasir dile edde iman or fura ekin or sáante Allar hañse zai, kiyólla-hoilé añárar dil ore toh cířka dí bura hélom ottu sáf gorífela gíyeh, aar añárar gaa re sáf faní lói dúífela gíyeh. **23** Aiyó, añára cíkar gorí de hé acá re mozbut gori dóri rakí, kiyólla-hoilé zibá ye waada goijjó íba toh biccácdar, **24** aar añára ezzon ore ezzone muhábbot or edde gom ham or tuaijjo dibar kíyal rakí, **25** aar fúañti zoma ówa re bad di no felai zendilla hodún ottu bad di adot asé, bółke ezzon ore ezzone tuaijjo dih, etó bicgóri diyat táki zetó hára din ubá dáke aázargoi de dekór. **26** Kiyólla-hoilé sóiyir zankari fai baade zodi añára buzísinti guná gorát táki, guná lla ar honó kurbaní baki

nái, 27 bólke ðoorfúk bisar or entezar edde Allar muhálef ókkol ore furifélaibo de gozzob beh baki asé. 28 Muúsar Córíyot no manoya re toh dui zon yáh tin zon or gobáye honó rahám sára mariféla zah. 29 Yala báfiso sai, uite hotó hótara sáñzar laayek óibo zee niki Allar Fua re úñran maijjé edde razinamar lou ziín lói ítare pak-sáf gorá gíyl híin ore nafak bouli báippe, aar rahámot or Ruh re beizzoti goijjé? 30 Añára toh Ubá re síní zibá ye hoiyé de, “Bodola lon Añr ham, Añi beh fúnzaiyum.” Aro hoiyé de, “Mabude goríyum Nizor bondar bisar.” 31 Zinda Allar át ot foron bicí ðoor or hotá. 32 Agor din uúin ore monot goró, tuáñra re foór gorídi baade ziín ot duk-mosibote bicí duk faáila. 33 Táitai tuáñra re maincór muúntu beizzoti edde zulúm gorí tooñcá gorá zayto; aar táitai tuáñra héndilla bodsólluk ór de ítara hère córik óita. 34 Tuáñra hodi ókkol olla feṭfurani daháila, aar tuáñrar malsámama ókkol luṭ gorífela re kúcir sáañte mani loilá, kiyólla-hoilé tuáñra zano de, tuáñra ttu nizor lla beétor edde hámica ṭike de dón asé. 35 Hétolla, tuáñrar hé hímmot no háraiyo, kiyólla-hoilé híyan or boccíc bicí ðoóñr. 36 Tuáñra ttu sobór tákar zorur, zeéne tuáñra ttu Allar moncá fura goijjá óile, waada goijjíl de híyan hásil goró. 37 Alla ye toh hoiyé, “Taim bicí hom asé, tói aibár asé de íba aázayboi, deri no goríbo. 38 Montor Añr forhésgar bonda imane beh basi tákibo, montor zodi íte fissázagoi, Añr dil ítar lói kúci no tákibo.” 39 Montor añára toh uitarár bútotu no, zetará fisságiyoi aar dónco óigiyoi; bólke uitarár bútotu éna zetará ruh re basai rakí bolla iman raké.

11 Iman anón óilde acá goré de siz or ekin, híyan andeikká siz or ekkán sábut. 2 Imane éna agor zobanar maincé taaríf faáil. 3 Imane añára buz fai de, duniyai foida óiye de óilde Allar kalame; hé ísafe, ziín dahá zar híin dahá zah de siz ottu bana giyéh de no. (aion g165) 4 Imane beh Abele Allar hañse Keéin or túaro beétor kurbani peec goijjíl, ziyán or zoriya yóggwa re forhésgar bóuli gobá díya gíyeh, oñtté zeñtté Alla ye yóggwar hé kurbanir gobá díyl. Aar yóggwa morigiyoí de óile yo, imane beh yóggwa aijjó foijjonto hotá hoó. 5 Imane beh Idiris nó more, bólke yóggwa re zinda tulífela gíyl. Alla ye yóggwa re tulífelaiye de hétolla, yóggwa re tuwai faa nó zah. Yóggwa re tulífelaiabar age endilla gobá díya asé de ki,

yóggwa ye Alla re kúci goijjíl. 6 Iman sára toh Alla re kúci gorí fara no zah, kiyólla-hoilé zee niki íbar hañse aiyé yóggwa ttu endilla ekin gorá fore de ki, íba asé, aar íba óilde uitará re boccíc-dooya zetará íbar talac goré. 7 Imane beh Nuh ye hétun foijjonto nó deké de jiníc or baabute úñciyari fai Allar ðoore ekkán kicṭi banaáil, nizor foribar ore basai bolla. Yóggwa ye híyane beh duniyai re hosúrbon ṭóorail, aar imane faa zah de hé forhésgarir mirasdár óiye. 8 Imane beh Ibrahimé Allar hotá mainníl, zeñtté yóggwa re matai oh zagat zaito howá gíyl ziyán yóggwa ye miras ísafe faibo. Yóggwa hoṛé zaar no zani rowana óil. 9 Imane beh yóggwa waada goijjá zagat forbáci ísafe táikkil; yóggwa ṭambu ókkol ot beh táki-táki accíl, zendilla Isahák edde Yakub tará yó táikkil, zetará yó yóggwar dóilla hé ekí waadar mirasdár accíl. 10 Kiyólla-hoilé yóggwa buniyadi ola cóor waán or entezar ot accíl deh, ziyán or ḍizáin-goróya edde banoya óilde Alla. 11 Imane beh Sáraḥ nize yó hámil óibar toóufik faáil, oñtté zeñtté niki boc faráigilgoi, kiyólla-hoilé híba ye waada goijjé de íba re biccácdar báippil. 12 Hétolla toh more fán óigiyoi de héndilla eggwá manúc ottu edún manúc foida óiye zetará asman or tarar hédun, zetará re doijjar sor or balur dóilla goni kul gorí no fare. 13 Ítara beggún iman or sáañte beh moijjé, Allar waada goijjá siz fai no bólke dur ottu híin ore deki yore edde kúci ói yore, aar ítara duniyait gorba edde forbáci de cíkar gorí yore. 14 Zetará héndilla hotá hoó ítara yáin zahér goré de ki, ítara nizor lla ekkán wotón or talac ot asé. 15 Becók zodi ítara dec waán or baabute báfito ziyán ottu ítara neeliaiccé, tóoile toh ítara ttu waafes zaibar moouka tákito. 16 Bólke ítara ekkán beétor, yáni asmani dec olla beh azzu gorí accíl. Hétolla toh Alla ye Nizoré ítara Alla hoité no córma, kiyólla-hoilé íba ye ítara lla beh ekkán cóor toiyar goijjé. 17 Imane beh Ibrahimé entán gorá gíyl de héñtte Isahák ore kurbani ísafe peec goijjíl. Yóggwa zibá ye niki Allar waada faáil, yóggwa ye nizor biyaya fua re kurbani goittó toiyar goijjíl, 18 ze fuar baabute yáin howá gíyl, “Isahák ottu beh tor nosól dóra zaybo.” 19 Ibrahim or buzá accíl de, Alla ye mora re úddwa zinda gorí fare. Buzíto sailé, yóggwa ye Isahák ore moot ottu beh fírai faiyé. 20 Imane beh Isaháke aibó de jiníc or mutalek Yakub edde Isów re dua díyl. 21 Imane beh Yakube moribárcot, Yusúf or fua duní wa

re dua dyíl, aar nizor larír uore bór dí Allar ebaadot goijjíl. **22** Imane beh Yusúfe moribárcot, Boni Isráil or hízorot or baabute hoógiye, aar nizor áñđđi gún ore kii gorá foribó de cikaidiye. **23** Imane beh Muúsa re bafmaa ye tin mac fán lukai raikkíl zeñtté yóggwa zormo óoil, kiyólla-hoilé ítara fua wa cúndor de deikkíl, aar ítara baáñccar hókum ore nó đooro. **24** Imane beh Muúsa ye balok óiye de októť Féruan or zír fua howá zah re inkar goijjíl. **25** Yóggwa ye gunár hoodinna ayaci-kúci gorár túaro, Allar manúc ókkol or fúañti duk bordac gorá basíloil, **26** aar báippil de, Mosihr lla beizzoti ówa óilde lǵíp dec or dón-cómbottir túaro bicí kimoti; kiyólla-hoilé yóggwa ye bocćíc or híkka beh nozor di accíl. **27** Imane beh yóggwa ye baáñccar guccá re no đoorai lǵíp ottu neeligílgoi; kiyólla-hoilé yóggwa ye Noirahar gwá re deikké fángori sobór goijjíl. **28** Imane beh yóggwa ye azadirid ore edde lou cǵťka díyar niyom ore amól goijjíl, zeéne foóila-fua re hálak-goróya ye ítara re no súwe. **29** Imane beh ítara Nil Doriya endilla gori farái gííl, zeén níki fúana meri ttu zaar; montor lǵípi ókkole híyan kucíc goijjé rár, ítara đuffígilgoi. **30** Imane beh Boni Isráil ókkole Jerikó cóor or đeбал ore sairókul ttu háñť din fán gúijje rár, híin forigílgoi. **31** Imane beh magi mayafua Rahába nafórmán ókkol or fúañti hálak nó, kiyólla-hoilé híba ye gurinda gún ore cántir sáañte estekbal goijjíl. **32** Aró hodún hoitám? Añr ttu ǵaim náí, Gíđiyon, Barak, Samson, Jeptah, Dawud, Sémuél edde nobi ókkol or baabute boiyan gorí bolla, **33** zetará imane beh raijjo ókkol zittíl, forhégari ham ókkol goijjíl, Allar waada goijjá jiníc ókkol hásil goijjíl, cǵnggo ókkol or muk bon goijjíl, **34** ooin or tez homaáil, toluwar or dár ottu baiccíl, komzuri ttu bol ola óoil, laráit boluwar óoil, bidec or fóous ókkol ore dáfail. **35** Mayafuain ókkole ítara mora ókkol ore waafes zinda faáil de asé. Ar hodúne hálás ówa re inkar gorí zulúm bordac goijjíl, zeéne ítara hánćor or hal beétor ó. **36** Aró hodúne ǵátǵaibazi edde bet mara bordac goijjíl, aró hoitó sailé, bañdá há edde ziyól hara úddwa bordac goijjíl. **37** Ítara hodún ore dola mari mariféla gýl, hodún ore horot loi dui bák gorífela gýl, hodún ore toluwar loi kotól gorífela gýl. Ítara muúťace, duk-mosibote, edde bodsólluk or hálote bérasóol or edde sóol or sam berái beh ikká uikká zaito, **38** duniyai ítara laayek nu accíl. Ítara zooñl ot, faár ot, kúñdat,

edde zobin or gañrát beh gúraffira goittó. **39** Ítara beggúne imane beh gom nam zuraiyé, toóu ziyán or waada gorá gýl híyan nó faa, **40** kiyólla-hoilé Alla ye añára lla beétor kessú ǵík gorí raikké, zeéne añára re bad di ítara re háťi gorífela no zah.

12 Hétolla, añára ttu zettót ekkán đoññr miyúlar đóilla añárar sairókul ttu gobá ókkol asé, aiyó, añára yó hárr fuñzá re edde aásan or sáañte fán ot féla de guná re dur gorífelai yore, ze zibbat añárar muúmikka ǵík gorá gýyeh yǵbat sobóre duñrat táki, **2** nozor Isár híkka rakí yore, zibá óilde iman or bani edde háťi-goróya, zibá ye Nizor muúmikka ǵík gorá gýl de kúci lla, córmor híkka no saái kúruc or duk bordac goijjíl, aar yala Allar toktór den đáke boói táikke. **3** Íba zibá ye níki gunágar ókkol ottu héndilla duconni cóoiye, íbar hálót báfiso, zeéne tuáñrar dil komzur no aar hímmot na háro. **4** Guná lói larái gorí tuáñra ttu toh aijjó nizor lou báca de héddur mukabela gorá nó fore; **5** aar tuáñra oh nosíyot ore foóraifelaiyo, ziyán tuáñra re fuain dore goré fán gorá gýyeh, ki hoilé, “Ó Añr fua, Mabud or torbiyot ore éckara no goríc, **6** kiyólla-hoilé Mabude zaré muhábbot goré ítare beh torbiyot goré, Aar zaré íba ye fua ísafe kobul goré ítare beh uzu goré.” **7** Tuáñra ze duk bordac goró híin tuáñrar torbiyot olla; Alla ye tuáñra re fuain ísafe beh sólluk gorér. Endilla honó fua asé né zaré bafe torbiyot no goré dé? **8** Zodi tuáñra torbiyot no foo, ziyán ot beggún córik asé, tóoile toh tuáñra zoura fuain, sóiyi fuain no. **9** Aró hoitó sailé, añára ttu añára re torbiyot goittó de insáni baf accíl, aar añára ítara re izzot goittám. Tói añára ttu ruúhanir Baf or torbiyot ot nizoré gosáidon aró bicí zoruri no né, zeéne añára zindigi fai? **10** Kiyólla-hoilé ítara nizor buzá mozin añára re kessú din olla éna torbiyot goittó, montor Alla ye añára re añárar bálai lla beh torbiyot goré, zeéne añára íbar pakir bági óizaygoi. **11** Honó torbiyot ore goré de héñtte kúci lage de náí, bóлке duk beh lage; montor zetará híin mani-mani kuwac óizagoi, ítara lla híine fore forhégari cánti ola fósol dóra. **12** Hétolla tuáñrar luta át ore edde komzur añrú re mozbut goró, **13** aar tuáñrar ǵéng olla uzu rasta bano, zeéne leng ǵéng mazur no ó, bóлке gom óizagoi. **14** Manúc beggún lói cántit

tákibar, aar pak óibar kucíc goijjó, pak no óile toh honókiye Malik ore no dekábo. **15** Saijó, honókiye zen Allar rahámot ottu maárum no ó; honó zohór-tita gas zen barí urí duk no de aar híyane boóut zon ore nafak gorí no fele; **16** honókiye zen zenákur yáh Isówr dóilla bedini no ó, zee niki ek októh hána lla nizor ttu foóila-fuar hók accíl de híyan besifélail. **17** Tuáñra toh zano, yárbaade zeñtté yóggwa ttu dua faito monehoiyé, yóggwa re inkar gorífela gíyeh, kiyólla-hoilé yóggwa ye hañdi-hañdi hé duar talac goillé yo, yóggwa ye mon fíraifelaibar mouka nó faa. **18** Tuáñra oh faár or hére aiccó de no, zibá re dóri fajijíl aar zibá ooin loi zoillíl, zibát gutguitta andár, tuwán, **19** cíañr abas, edde hotár endilla abas accíl, zeén níki zetará híñ fúinníl ítara fóriyat goijijíl de, ítara re ar honó hotá howá no zay bolla, **20** kiyólla-hoilé ítara e hókum yán cóoi nó fare de ki, “Zodi honó januware úddwa faár gwá re súile, yíba re fattór mari mariféla zaybo.” **21** Aar ítara ziyán deikkíl híyan eén door or accíl, zeén níki Muúsa ye hoóil; “Añí dooro hafir.” **22** Bólke tuáñra Síyon faár or hére beh aiccó, yáni zinda Allar cóor asmani Jerúsalem or hére. Tuáñra aiccó de óilde lak-lak fíristar **23** edde foóila-fuain uitarár dol ot, yáni zomát ot, zetarár seráng asman ot asé, aar zibá beggún or bisarhar hé Allar hére edde háti gorá gíyeh de forhésgar ítarar ruh ókkol or hére, **24** aar noya razinamar usíla Isár hére edde cínra gíyeh de lou uúin or hére, zííne Abel or lou wór túaro beétor hotá hoó. **25** Saijó, hotá hoór de íba re inkar no goijjó, kiyólla-hoilé uitará zettót duniyait héдайот goittó de yóggwa re inkar gorí basi nó fare, tói añára zodi asman ottu héдайот goré de íba ttu muu fíraifelai, añára toh basi faribár náí. **26** Héñtte íbar abase toh duniyai-dari tóttorail, montor yala íba ye endilla waada goijjé, “Aró ekbar Añí siríf duniyai re tóttoraiyum de no bólke asman ore yó.” **27** “Aró ekbar” lofzó yíba ye zahér goré de, ze siz ókkol tóttora, yáni zíin ore foida gorá gíyeh, híñ ore dur gorífela zaybo, zeéne zíin ore tóttorai no fare híñ ñiki táke. **28** Hétolla, añára zettót tóttorai no fare de raijjo fair, aiyó, añára cúkuriya zanai, ziyáne añára izzote edde dooro Allar kobuldár ebaadot gorí fajijum. **29** Kiyólla-hoilé añárar Alla toh furiféle de ooin or dóilla.

13 Báiyali muhábbot gorát táko. **2** Musáfer ókkol ore meémandari goittó no foóraiyo, kiyólla-hoilé héndilla gorí hodúne ót no fai fírista ókkol ore meémandari goijjé de yó asé. **3** Ziyól or hodi ókkol ore nize ziyól ot asó fángori yaad raikkó, aar bodsólluk gorá zar de ítara re nizoré gorá zar fángori yaad raikkó. **4** Biyácádi re beggúne izzot goijjó, aar zamai bou wór bútoe milmilab or imandari raikkó; kiyólla-hoilé Alla ye toh hárr dóilla zenákur or bisar gorí zaybo. **5** Nizor adot ore ñiañ-foicár lalós ottu duré raikkó, nizor ttu zíin asé híñ lói kúci táikko; kiyólla-hoilé Alla ye Nizebaze hoiyé de, “Añí toré bilkúl félai no zaiyum, aar bilkúl fit no diyum.” **6** Hétolla añára hímmot or sáañte hoói fari de ki, “Mabud añr modotgár; añí no dooraiyúm. Insáne añré kii gorí faribó dé?” **7** Tuáñrar sóddar ókkol ore yaad raikkó, zetará tuáñrar hañse Allar kalam boiyan goijjé; aar ítarar zindigir solasol or notizar uzu kíyal gorí ítarar dóilla iman ola óizogoi. **8** Isá Mosih gel de hailla, aijja, edde abadulabad ek dóilla. (aiōn g165) **9** Dóilla bođoilla edde osin taalime ikká uikká ói no zayogói; kiyólla-hoilé bála óilde, dil hánaye no bólke rahámote beh mozbut tákon; hána lói birana óiya ókkole toh kessú fáida faiyé de náí. **10** Añára ttu ekkán endilla kurbani-gáñ asé, ziyán ottu ñambur hédmot-goróya ókkole kessú háibar hók náí. **11** Kiyólla-hoilé ze januwar ókkol or lou boro imame Ebbe Pak Zagat gunár kurbani di bolla loiza, híñ or jisím ore kemfór baäre beh furat diféla zayto. **12** Hétolla toh Isá ye yó cóor or geit or baäre duk-zulúm faáil, manúc ókkol ore Nizor lou wé pak-sáf gorí bolla. **13** Hétolla, aiyó, íbar beizzoti re nizor uore loi yore añára kemfór baäre íbar hére zai. **14** Kiyólla-hoilé eřé toh añára ttu ñiki táke de cóor náí, bólke añára aibár asé de cóor or talac ot beh así. **15** Hétolla, aiyó, añára Isár duara Allar hañse lagatar taarif or kurbani peec gorí, yáni añárar dui uñté íbar nam or kúlasa taarif goré de gulagala dórai. **16** Aar bálai goittó edde dan-sótká diito no foóraiyo, kiyólla-hoilé héndilla kurbani ókkol lói Alla kúci ó. **17** Tuáñrar sóddar ókkol or hotá maniyó, edde nizoré ítarar hañse gosáidiyo, kiyólla-hoilé ítara toh tuáñrar zan ore uitarár dóilla faára dí rake zetará ttu ísaf díya foribó. Héndilla etollá goijjó, zeéne ítara ham híyan kúcir sáañte goré, dukké no; kiyólla-hoilé dukké goillé toh tuáñrar honó fáida no óibo. **18** Añára lla dua goijjó, kiyólla-

hoilé añára ttu ekin asé de, añárar dil sáf, añára hárr kessút hók foñté solitó sái. **19** Añí tuáñra re háasgori fóriyat gorír, tuáñra dua goríba de, añí zen hára tuáñrar hañse abar aái fari. **20** Yala, cánti dooya Alla zibá ye abadulabadi razinamar lou wór usílaye añárar Malik Isá re mora ttu zinda gojjé, yáni bérasóol Soroya doóñr gwá re, (aiōnios g166) **21** Íba ye tuáñra re hárr gom ham ot háti banouk, tuáñra íbar moncá mozin gorí bolla; aar ziyán lói íba kúci ó híyan añárar bútoe Isá Mosihr duara goróuk, zibár taarif abadulabad foijjonto hámica ówat táke. Amin. (aiōn g165) **22** Ó báiboináin, ańí tuáñra re becábici aros gorír, sobór or sáañte e nosíyoti hotá gún fúno, kiyólla-hoilé ańí tuáñrar hañse baiṭṭát lekífelayi. **23** Tuáñra re zanaidir, añárar báí Timóti ziyól ottu hálas óigiyoi; yóggwa hára foónsile, ańí yóggwa re fúańti looi tuáñra re saitó aiccúm. **24** Tuáñrar tamám sóddar ókkol ore edde pak manúc ókkol ore sólám díyi hoiyó. Iṭalir gúne tuáñra re sólám zanar. **25** Tuáñra beggún or uore rahámot zari tákouk.

Yakub

1 Añi Yakub, Allar edde Malik Isá Mosihr éggwa gulam. Ze baró háandan or manúc duniyair agagura dorbodor ógiyoi, ítara re sólam. **2** Ó añr báiboináin ókkol, zeñtté tuáñra ñoilla-boñoilla entán ot foro, nizoré nize bággitta bóuli ñaariyo, **3** kiyólla-hoilé tuáñra toh zano, tuáñrar iman or entáne sobór foida goré. **4** Aar sobór ore híyan or ham furafuri goittó díyo, zeéne tuáñra ttu háti edde balok óibar kessú homi no táke. **5** Lekin tuáñra honókiyo ttu zodi giyan or homi táke, yóggwa ye Alla ttu magouk, íba ye yóggwa re diibo, kiyólla-hoilé íba ye bezar no ói yore dilkúla góri beggún ore dee. **6** Montor cók no gorí imane maga foribó, kiyólla-hoilé zee niki cók goré yóggwa toh doijjar goir or dóilla, ziín ore boiyare ikká-uikká loizagói. **7** Héndilla manúe Malik or torfóttu honó kessú faibar acá no gorók, **8** kiyólla-hoilé yóggwar mon toh dui mikká; yóggwa ye ziín goré híin ot ñiki no táke. **9** Gorib imandár ókkole Alla ye ítara re uoror tokkat tuillé de hétolla kúci óuk; **10** aar tuangor imandár ókkole Alla ye ítara re niróc goijjé de hétolla kúci óuk, kiyólla-hoilé tuangori hoó de híin de bil or fúl or dóilla nac óizayboi. **11** Beil toh bicí gorom or sáañte urí gas ókkol fúaiifele, baade híin or fúl ókkol zórizai ar cúndor no táke. Héndilla, tuangor ókkol óu nizor ham loi birana tákite-tákite fána óizayboi. **12** Mubarek manúc ubá, zibá ye entán or októ sobór raké, kiyólla-hoilé yóggwa ye ziti baade tas ísafe zindigi faibo, zibá Malike uitará re diibar waada diyé zetará íba re muhábbot goré. **13** Zeñtté honókiyo ttu guná goríbar mon aiyé, yóggwa ye “Guná goríbar mon híyan Allar torfóttu aiccé,” bóuli no hoók, kiyólla-hoilé honó hórafí ye Alla re gunár uzu ñani no fare, aar íba Nize yó honókiyo re gunár uzu no ñane. **14** Bólke guná goríbar mon nizor-nizor hóraf moncá ttu beh aiyé, ziíne nizoré ñani fán ot féla. **15** Baade hóraf moncá híin hámil ói guná zormo deh, aar guná furafuri ñoñr ói moot foida goré. **16** Añr adorja báiboináin ókkol, fáki na háiyó. **17** Fottí gom niyamot edde fottí háti niyamot asman ottu beh nise aiyé; híin aiyé de Baf or torfóttu, zibá ye níki asman or nurani jiníc ókkol foida goijjé. íba honódin no bodole aar íba lorizagói de sábar ñoilla no. **18** íba ye Nizor moncá lói sóiyi kalam or duara añára re noya zibon diiyé, zeéne íbar

mohóluk ókkol or bútoe añára ebbe kimot ola gún ói fari. **19** Añr adorja báiboináin ókkol, yián monot rakiyo de ki: fottíkiyo ttu fúnat salu ówa foribó, hotábattara hoité báfisinti howá foribó, edde bánggori guccá no urá foribó; **20** kiyólla-hoilé Alla ye saá de héndilla forhésgari zindigi guccá lói harai no fare. **21** Hétolla tamám bura adot edde hóraf solasol ókkol dur gorífelo, aar tuáñrar dil ot ruwa giyé de kalam ore norom or sáañte gosílo, ziíne tuáñra re nejat dí fare. **22** Kalam amól-goróya bono, siríf fúnoya no, arnóile nizoré fáki dór fán óibo. **23** Kiyólla-hoilé zee niki kalam fúnoya montor amól-goróya no, yóggwa ézzon endilla manúc or dóilla, zee niki nizor siyára aainat mazé saá; **24** yóggwa ye toh nizoré cúndorgori saái zai baade nizoré saité hondilla laiggíl de híyan éhon foóraifele. **25** Lekin azadi dede hé sóiyi niyom or uzu zee niki gomgorí nozor diyat táke, yóggwa ye ziín goré híin ot rahámot faibo, kiyólla-hoilé yóggwa ye fúni foórai no fele, bólke amól goré. **26** Zodi honókiye nizoré nize dindár bóuli ñaare, montor nizor zoban no sóoñle, yóggwa ye nizoré nize fáki dér, aar yóggwar dindári behar. **27** Alla Baf or nozor ot pak edde sóiyi dindári óilde, etim edde rari ókkol ore ítarar dukkór októ saásita gorón, aar duniyair tamám hórafí ttu nizoré pak-sáf rakón.

2 Añr báiboináin ókkol, tuáñra zettót añáar mohíma ola Malik Isá Mosihr uore iman ainnó, tuáñra manúc beggún ore ek nozore saiyó. **2** Dóro, ezzon tuangor manúc tuáñrar mujilíc ot cúnar oóñri dí edde barík hoorsuor fiñdí aiccé, aar hére ézzon gorif manúc óu aiccé, zar gair or hoor niróc. **3** Zodi tuáñra ze tuangor manúc cwa ye barík hoor fiñdí aiccé yóggwar uzu háas díyan dí endilla hoó, “Tuñí e gom zaga gán ot boiyó,” aar gorif manúc cwa re endilla hoó, “Tui uré tíyai ták, arnóile nise añr téng or ñáke góri boi,” **4** tóoile tuáñra tuáñrar bútoe forók nó goró né aar bura niyote bisar nó goró né? **5** Ó añr adorja báiboináin, fúno, Alla ye e duniyair gorif ókkol ore iman ot tuangor ói bolla edde raijjo waán or mirasdár ói bolla basíloiyé de no né, ziyán íba ye uitará re diibar waada goijjé zetará íba re muhábbot goré? **6** Lekin tuáñra de gorif manúc cwa re beizzoti goijjó. Tuáñra re tuangor ókkole no né zala deh edde ñani-ñani bisar ot tulé dé? **7** Ítara no né Ubár izzoitta nam or kuféri goré

deh Zibá ye tuáñra re ñaikké? **8** Pak-kalam ot endilla asé, “Nizor atehañsór maincóre nizor ñóilla muhábbot goríba.” Zodi tuáñra Allar raijior hé córiyot amól goró, tooile tuáñra gom ham gorór. **9** Lekin zodi ektorffá goró, tuáñra guná gorór aar tuáñra córiyot báñgoya de híyan Córiyote sábut goré. **10** Kiyólla-hoilé zee niki fura Córiyot amól goré, montor ekkán báñge, yóggwa re toh híin beggún báingge bóuli dóra zaybo. **11** Zibá ye endilla hoiyé, “Zená no goríba,” íba ye toh endilla yó hoiyé, “Kún no goríba.” Hétolla, zodi tuáñra zená no goró, montor kún goró, tooú tuáñra Córiyot báñgoya óigiyogoi. **12** Honó hotá hoité edde honó kessú goitté monot rakíyo de, tuáñrar bisar azadi dede córiyot lói gorá zaybo. **13** Kiyólla-hoilé zee niki oinno zon or uore rahám no goré, bisar or októy yóggwar uore yó Alla ye rahám no goríbo. Rahám dil ola ókkol ore toh rahám or sáante bisar gorá zah. **14** Ó añr báiboináin ókkol, zodi honókiye endilla hoó, “Añr ttu iman asé,” montor yóggwa ttu amól náí, tooile híyan ot kii fáida asé? Héndilla imane ki yóggwa re basai faribó? **15** Dóro, eggwá báí óttu yáh bóin óttu fiñdító hoorsuor náí, aar háito hána náí. **16** Hé hálót ot zodi tuáñra honókiye yóggwa re endilla hoó, “Cántir sáante zoogói, um táikko aar háafiya goijjói,” montor yóggwar zorurot ókkol fura no goró, tooile yóggwar kii fáida asé? **17** Borabor héndilla, ze iman or fúañti amól náí, hé iman mora. **18** Óitofare honókiye endilla hoibó, “Kiyó ttu iman asé, aar kiyó ttu amól asé.” Tík asé, tooile amól sára tuáñr iman añré dahái faribá né? Añí toh añr amól or duara añr iman tuáñre dahái faijjum. **19** Tuñí endilla biccác goró de ki, Alla asé de ekgwá. Híyan bála! Montor bútt ókkole yó de héndilla biccác goré, aar ñoore hafe. **20** Ó bekuf, ze iman or amól náí hé iman or dam náí de híyan or tuñí sábut soó né? **21** Añárar baf Ibrahim toh e amóle forhésgar tóoijjil, ki hoilé, yóggwa ye nizor fua Isahák ore kurbani di bolla kurbani-gáñr uore peec goijjil. **22** Tuñí toh dekor, yóggwar iman edde amól ekkú fúañti ham goijjil, aar yóggwar iman oñtté furafuri sóiyi óiye zeñtté yóggwa ye amól goijjé. **23** Héndilla góri pak-kalam ot asé de e hotá fura óiye, ki hoilé, “Ibrahíme Allar uore iman raikkil, hétolla Alla ye yóggwa re forhésgar bóuli goinníl.” Hétolla Alla ye yóggwa re “dustó” ñaikké. **24** Yala tuáñra de deikkó, manúc sirif iman tákile forhésgar no tóore,

tóorite amól óu lage. **25** Rahába nam or magi mayafua war hálót óu héndilla. Híba e amóle forhésgar tóoijjil, ki hoilé, híba ye gurinda gún ore lukai rakí baade arek bouli duñraidíl. **26** Hé ísafe, zendilla, ruh sára gaa mora, héndilla, amól sára iman óu mora.

3 Añr báiyain, tuáñra bicí zon ustat no boinno. Tuáñra toh zano, añára zetará ustat así añárar bisar oinno kiyór túaro bicí hora óibo. **2** Kiyólla-hoilé añára beggúne ñoilla-boñoilla golti ókkol gorí. Montor furafuri balok manúc óilde úba zibá ye zín hoó híin ot honó guná no goré edde nizor gaa guñra re sóoñli rakí fare. **3** Añára toh gúra re sóoñli rakí bolla gúrar gal ot lehan lagai, baade añára híin or guñra gaa re zikká monehoó híkka loizai fari. **4** Zaáñs ókkol or baabute yó báfiso: híin zettór ñoóñr óibo óuk aar zeén tez boiyare solibó solouk, montor híin ore séraingga ye ekkán bicí cóñro súwan lói yore zikká monehoó híkka loiza. **5** Añárar zir óu héndilla; híyan gaar ekkán cóñro híssa de óile yo, híyane ñoóñr-ñoóñr fohórai ókkol goré. Tuáñra yían óu báfo, ekkínissara ooin loi hotó ñoóñr-ñoóñr zooníl ókkol furat di fare. **6** Zir hoó de híyan ooin or ñóilla yó; añárar gaar ze híssa ókkol asé híin or bútoore zir ore kuham or ekkán duniyai hoilé fare. Híyane añárar gaa agagura nafak gorífelai añárar zindigi guñrat ooin dórai deh, kiyólla-hoilé híyan ot zuzuk or ooin asé. **(Geenna g1067)** **7** Insáne toh hárr kisím or januwar, faik, buke áñre de zandár, edde fanír zandár ókkol ore sóoñille edde yala yó sóoñle. **8** Montor honó maincé zir ore sóoñli fare de náí; zir óilde ekkán hóraf jiníc ziyán ore sóoñli fara no zah; híyan háf or bic or ñóilla bicí hótara. **9** Hé zir ziyán lói añára añárar Malik edde Baf or taarif gorí, híyan lói añára Allar súrote banaiya insán ore gozzob óu dih. **10** Añárar ze muk óttu taarif aiyé hé muk óttu gozzob óu aiyé. Añr báiboináin ókkol, héndilla no ón sáa. **11** Ze nolkwa ttu mutúra faní uré, hé nolkwa ttu kí nuna faní yó uré né? **12** Añr báiboináin, ñuñir-gas ot kí zolfai dóre né? Aar anggur-gas ot kí ñuñir gula dóre né? Borabor héndilla, nuna fanír nolkwa ttu mutúra faní no uré. **13** Tuáñrar bútoore giyani edde buzón or manúc hon asé? Tákile, yóggwa ye nizor bála solasol loi sábut goróuk de ki, giyan tákile ze noromdari táke hé noromdarir sáante yóggwa ye nizor ham ókkol goré. **14** Lekin zodi tuáñrar

dil ot bicí ric edde siríf nizor fáida tuwar niyot táke, guman no boinno aar hánsa re misá no banaiyó. **15** Héndilla giyan aiyé de Allar torfóttu no, bólke duniyai ttu, hóraf moncá ttu, edde bútferot óttu. **16** Kiyólla-hoilé zeřé ric edde siríf nizor fáida tuwar niyot táke, hére hoijja-fózzat edde hárr dóilla bura ham óu táke. **17** Montor ze giyan Allar torfóttu aiyé, híyan ebbe age pak, baade cántiye bóra; híyan ot cídayi edde buz asé; híyan raháme edde gom notizaye furaiya; híyan ot honó forókai yáh munaféki náí. **18** Cánti aníbar meénnót-goróya ókkole forhésgari daibar bis cántir sáante cíře.

4 Tuáñrar bútoze maramari edde hoijja-fózzat hontú aiyé? Híin tuáñrar bútoze ayaci goríbar ze azzu asé híin óttu no né aiyé deh, zíine tuáñrar gaar híssa ókkol ot larái goré? **2** Tuáñra toh azzu goró, montor no faile kún goró. Tuáñra ttu lalós lage, montor no faile hoijja-fózzat goró edde maramari doh. Toóu tuáñra azzu goró de híin tuáñra ttu no táke, kiyólla-hoilé tuáñra de Alla ttu no mago. **3** Tuáñra magilé yo no foo, kiyólla-hoilé tuáñra hóraf niyote éna mago, zeéne híin lói ayaci gorí faro. **4** Ó beiman ókkol, tuáñra no zano né, duniyai lloi dustí gorón maáni Alla lloi duccon ón dé? Hétolla, zee niki duniyai lloi dustí goittó saá, yóggwa ye nizoré Allar duccon bana. **5** Aar náki tuáñra pak-kalam ot yán hánnak asé bóuli řáaro, ki hoilé, “Alla ye añárar bútoze ze ruh diiyé, hé ruh lla řba ttu gairot lage?” **6** Montor Allar rahámot aró bicí. Hétolla toh pak-kalam ot endilla asé, “Alla fohór ola ókkol or ulřa tíya, montor niróc ókkol ore rahámot goré.” **7** Hétolla, nizoré Allar hañse gosáido. Ibilíc or mukabela goró, tói íte tuáñra ttu dáizayboi. **8** Allar řáke aiyó, tói řba tuáñrar řáke aibó. Ó gunágar ókkol, nizoré pak-sáf goró, tuáñra dui mikká mon ola ókkole nizor díł sáf goró. **9** Afsús hái hañdaharı goró edde bilak goró; áncar bodol hañdo, aar kúćir bodol ferecan ó. **10** Nizoré nize Malik or nozor ot niróc ó, tói řba ye tuáñra re uoror tokkat tulřbo. **11** Ó báiboináin ókkol, ezzon or bodnam ezzone no goijjó. Zee niki arek báí or bodnam goré yáh bisar goré, yóggwa ye córiyot or bodnam goijjé fán edde bisar goijjé fán. Zodi tuńí córiyot or bisar goró, tooile toh tuńí córiyot amól-goróya no, bólke híyan or bisarhar. **12** Córiyot-dooya edde Bisarhar Ekzon beh asé, zibá ye basai yó fare dónco yó gorí fare. Montor tuńí

hon abar tuáñr atehańsór maincór bisar goittá? **13** Fúno, tuáñra zetará endilla hoó, “Aijja no óile hailla añára fólana cóor gán ot zaiyum, aar hére ek bosór táki baade códori gorí bicí-bicí řiań hamaiyúm.” **14** Tuáñra toh tuáñrar zindigit hailla kii óibo de híyan úddwa no zano. Tuáñrar zindigi toh báf or dóilla, zíin essát ánik dahá zay baade gaib óizagoi. **15** Híyan or bodol tuáñra ttu endilla hoón saá, “Malike sailé, añára basi tákiyum aar waán-yián goríyum.” **16** Montor tuáñra de gumane borái goró; héndilla borái beggún hóraf. **17** Hétolla zee niki gom mán gorí zane montor no goré, yóggwa ttu guná óibo.

5 Ó tuangor ókkol, yala tuáñra fúno, ki hoilé, tuáñrar uore ze řoóńr duk-mosibot aiyér híin olla hañdaharı edde bilak goró. **2** Tuáñrar tuangori borbad óigiyoi, aar tuáñrar hoorsuor uui ye háifelaiye. **3** Tuáñrar cúna-cańdit zoońre doijje, aar hé zoońre tuáñrar hélaf gobá díbo edde ooin or dóilla góri tuáñrar gaa furifélaibo. Kiyólla-hoilé tuáñra e ahéri din ot éna dón zoma gorífelaiyo. **4** Soó, tuáñrar fósol-dooiya ókkol ottu tuáñra ze muzuri beimani gorí rakídiyo, híine tuáñrar hélaf guzorer, aar tuáñrar hé dooiya ókkol or hańdani Alla Robbul Alamin or han ot foóńicce. **5** Tuáñra duniyait fúrutu edde ayaci gorí beh din haraiyó. Zooráibar din olla bola fángori tuáñra nizoré bolaiyó. **6** Tuáñra behosúr maincóre hosúr díyo aar kún goijjó, montor řtara tuáñrar mukabela nó goré. **7** Hétolla, ó báiboináin, Malik nú aiyé foijjonto sobór goró. Tuáñra saái faribá, cacá ókkole zobin or kimoti fósol fai bolla hotó sobór goré. řtara toh zeř mac ottu cúru gorí oón mac foijjonto sobór or sáańte entezar goré. **8** Héndilla, tuáñra yó sobór goró. Nizor díł ore mozbut rakó, kiyólla-hoilé Malik aibár októ řáke. **9** Ó báiboináin, ezzon or cékayot ezzone no goijjó, zeéne Alla ye tuáñrar hosúr no dóre. Fúno, Bisarhar duwar or gurat foóńiccegai. **10** Ó ańr báiboináin, ze nobi ókkole Malik or name boiyan ókkol goijjé, řtara ttu duk faar edde sobór gorár meésal lóh. **11** Becók řtara zetará duk bordac goijjé, añára řtara re mubarek bouli hoói. Tuáñra toh Aiyube duk bordac goijjíl de híyan zano; tuáñra yián óu zano, ki hoilé, forezai Mabude yóggwa re rahámot goijjíl. Mabud óilde feřfuraniye edde meérbaniye furaiya. **12** Ańr báiboináin, ańr ebbe asól hotá óilde, tuáñra asman or, zobin or yáh oinno honó kessúr name

bilkúl hosóm na háiyó. Montor tuáñra baná eddúr hoiyó, óile ói, aar no óile no, arnóile tuáñra hosúrbon ɔ́ooriba. **13** Tuáñrar bútoore honókiye dukkót asé né? Tákile, yóggwa ye dua goróuk. Honókiye cúkkot asé né? Tákile, yóggwa ye taarif or seér goóuk. **14** Tuáñrar bútoore honó ocúikka asé né? Tákile, yóggwa ye zomát or ɔ́aiɔ́oóñr ókkol ore matouk, aar ítara aái Malik or name yóggwar matát tel di yore yóggwa lla dua goróuk. **15** Zodi hé dua iman or sáañte goijjé de óile ocúikka wa gom óizayboi, yóggwa re gom goríbo de óilde Malike. Hé manúc cwa ye zodi guná gorí táke, híin maf gorídiya zaybo. **16** Hétolla ezzon or guná ezzon ore cíkar goró, aar ezzon olla ezzone dua goró, zeéne ocúk ottu gom ói faro. Ezzon forhéggar bondar duat bicí bol táke aar hé duar zoriya ɔ́oóñr-ɔ́oóñr ham ókkol ói fare. **17** Nobi Eliyas añárar ɔ́óilla ézzon insán accíl. Yóggwa ye zettót zór no di bolla dilmon di dua goijjíl, ítara mulluk ot cáro tin bosór fán zór nó deh. **18** Abar yóggwa ye zettót zór olla dua goijjíl, asman ottu zór fori zobin ot fósol ókkol dóra cúru goijjíl. **19** Añr báiboináin ókkol, zodi tuáñrar bútottu honókiye sóiyi ttu duré zaagói, aar ar ezzone ítare fírai ané, **20** yóggwa ye yíán zani louk de ki, zee niki honó gunágar ore gollot rasta ttu fírai ané, yóggwa ye hé gunágar or zan basaiyé, aar tar bicí guná ókkol or maf faa baiyé.

1 Fitor

1 Añí Fitor, Isá Mosihr ézzon sáhabi. Allar basíloiya uitarár hañse lekír zetará dorbodor ói Pontus, Galatíya, Kappadókiya, Ecíya, edde Bitúniya elaka ókkol ot forbáci ísafe táker, **2** zetará re Alla Baf or agori niyot mozin edde Pak-Ruhr pak bana loi basflowa gíyeh de, Isá Mosihr fórmadar ói bolla edde Íbar lou wór cít kaye pak-sáf gorífela zay bolla. Tuáñrar uore rahámot edde cánti bicígori nazil óuk. **3** Añárar Malik Isá Mosihr Alla edde Baf or taarif óuk, kiyólla-hoilé Íba ye toh Isá Mosih re mora ttu zinda gorí yore Nizor ðoónr meérbaniye añára re noya zormo diyé. Híyane añára ekkán zinda acá faiyí, **4** endilla miras faibar ziyán fána no, dak no fore, edde ofát no. Hé miras asman ot tuáñra lla raká gíyeh, **5** zetará iman or usílaye Allar kudurute oh nejat olla héfazot asó ziyán céc hale zahér ói bolla toiyar asé. **6** Hétolla toh tuáñra bicí kúci, yala tuáñra ttu kessú ðaim olla ðoilla-boðoilla entáne duk bordac gorá forer de óile yo. **7** Híin aiyé de etollá, zeéne tuáñrar iman, ziyán ooin loi zálai gorí baade yo borbad zagói de cúnar túaro kimoti, híyan or sábut óiya asóliye zen Isá Mosih zahér óibo de októtt taarif, mohíma, edde izzot ané. **8** Tuáñra toh Íba re nó deké, toóu Íba re muhábbot goró; aar ehón no deké de óile yo Íbar uore iman raikkó, edde boiyan gorí faribár raá náí de héndilla edde gabi kúciye tuáñra bicí kúci, **9** kiyólla-hoilé tuáñra toh nizor iman or notiza foór, yáni tuáñrar ruhr nejat. **10** Hé nejat or baabute oh nobi ókkole díyane talac edde tahákit goijjíl, zetará tuáñra re tuáñrar uore óibar rahámot or baabute agun zanaáil. **11** Ílara tahákit goijjíl de ki, ítarar bútoze Mosihr ze Ruh accíl Íba ye zeñtté Mosihr duk faar edde yárbaade mohíma faar baabute zanaider, héñtte Íba ye hoñttíyaror edde hon hálót or baabute icára gorér deh. **12** Ítarar hañse yíán zahér gorá gíyeh de ki, ílara nizor hédmot gorér de no bólke tuáñrar; uúin hoói zíín yala tuáñrar hañse uitará boiyan goijjé zetará asman ottu diferá gíyeh de Pak-Ruhr hédaiyote tuáñrar hañse kúchóbor tobolik goijjíl; fírista ókkole úddwa hé siz híin or baabute zani bolla azzu goré. **13** Hétolla, tuáñrar demak ore nal gorí aar úñic ot táki, tuáñrar acá furafuri oh rahámot or uore rakó, ziyán Isá Mosih zahér óibo de októtt tuáñrar uore óibo. **14** Fórmadar fuain bono, Alla

re nó síníte age tuáñra ttu ze bura azzu ókkol accíl, híin mozin no soliyó, **15** bólke tuáñra re ðaikké de Íba zendilla pak, tuáñra yó nizor hárr solasol ot pak bono; **16** kiyólla-hoilé pak-kalam ot toh endilla asé, “Pak ó, kiyólla-hoilé Añí pak.” **17** Tuáñra toh zibá ye honó ektorffía sára nizor-nizor ham mozin bisar goré Íbar hañse dua goitté Baf ðako, hétolla tuáñrar e forbácir októtt Íbar ðoor rakí solasol goró; **18** tuáñra toh zano, tuáñra nizor bafðada ókkol ottu ze behar solasol miras faálla héntu tuáñra re azad gorá gíyeh de, nac óizagoi de siz yáni cúna-rufa lói no, **19** bólke níkút edde nidak bérasóol-or-sóor, yáni Mosihr kimoti lou loi. **20** Becók, Íba re duniyair foidayecir age lóti basíraka gíyl, montor e ahéri zobanat tuáñrar wasté zahér gorá gíyeh. **21** Tuáñra Íbar duara éna Allar uore iman ainnó, Zibá ye Íba re mora ttu zinda gorí mohíma diiyé, zeéne tuáñrar iman edde acá Allar uore beh ó. **22** Tuáñra sóiyi re mani nizoré pak-sáf gorífelaiyo ísafe tuáñra ttu imandár báiboináin ókkol olla háti muhábbot foida óiye, ezzon ore ezzone josbar sáañte dil ottu muhábbot goríyo. **23** Kiyólla-hoilé tuáñra toh noya gori zormo óiyo de, nac ó de bis ottu no bólke nac no ó de bis ottu, yáni Allar zinda edde hámica zari táke de kalam ottu. (aíōn g165) **24** Pak-kalam ot asé de, “Hárr moniccó kór or ðóilla, aar ítarar tamám rub kérgwa fúl or ðóilla. Kér fúaizagoi, aar fúl zórizagoi, **25** montor Mabud or kalam abadulabab zari táke.” Hé kalam óilde oh kúchóbor, ziyán tuáñrar hañse tobolik gorá gíyeh. (aíōn g165)

2 Hétolla, hárr ducconi, hárr dúkabazi, munaféki, ricárici, edde gifot tuáñrar hañsóttu dur gorífelo, **2** aar noya-noya zormo óiya fuain dor ðóilla tuáñra ruúhanir háti dud hái bolla azzu goró, zeéne híin or zoriya tuáñra nejat olla barát táko, **3** kiyólla-hoilé tuáñra toh Malik or meérbanir moza faifelaiyo. **4** Íbar hañse, yáni hé zinda fattór zibá re maincé inkar gorífelaiye montor Allar basíloiya edde kimot ola, Íbar hañse aiyóne, **5** tuáñra re yó zinda fattór ókkol ísafe ekkán ruúhanir gór bana zar, zeéne pak imam boni tuáñra ruúhanir endilla kurbani ókkol peec goró, zíín Isá Mosihr duara Alla ye kobul goré. **6** Hétolla toh pak-kalam ot endilla asé, “Soó, Añí Síyon ot eggwá fattór rakír, basíloiya edde kimot ola kunar-fattór. Zee niki Íbar uore iman aníbo, yóggwa bílkúl

córminda no óibo.” 7 Hétolla, tuáñra zetará iman ainnó tuáñra lla hé fattór kimot ola, montor zetará iman nú ané ítara lla yían háit̃te: “Ze fattór mistíri ókkole inkar gorífelaiye, yíba fattór beggún or túaro bicí zoruri wa óigiyoi,” 8 yían óu: “Yíba eggwá uját há de fattór, edde foraba de eggwá cíl.” Ítara uját há de kiyólla-hoilé, ítara kalam amól no goré, aar ítara re híyan olla beh t̃ík gorá gíyeh. 9 Montor tuáñra toh eggwá basíloiya nosól, baáñccar imam, pak koum, edde Allar Nizor háas bonda, zeéne zibá ye tuáñra re andár ottu Nizor taajuippa foór ot ðahai ainné Íbar kuduruti ham or boiyan goró. 10 Ek hale toh tuáñra Allar manúc nu accíla, montor yala tuáñra Íbar manúc; age tuáñra rahám nó foo, montor yala tuáñra rahám faiyó. 11 Ó adorja ókkol, añí tuáñra re fóriyat gorír, tuáñra nizoré bidecí edde forbáci buzí jisími azzu ókkol ottu basi táko, zííne ruh lói larái goré. 12 Beyohúdi ókkol or dormiyan ot tuáñrar solasol t̃ík raikko, zeéne ítara tuáñra re burai-goróya hoi elzam lagailé yo, tuáñrar bála ham ókkol deki híin or zoriya, Alla aibár din Íbar taarif goré. 13 Malik or wasté nizoré hárr insáni hókumot ot gosáido: íba baáñcca óuk zibá uoror tokkat, 14 yáh hákim ókkol, zetará re baáñccar torfóttu difeṛá zah de, burai goróya ókkol ore sáñza dí bolla aar bála ham goróya ókkol ore taarif gorí bolla. 15 Kiyólla-hoilé Allar moncá óilde híyan, tuáñra zen bála ham gorí bekuf ókkol or afáṛaingga hotá ókkol nizám gorífelái fāro. 16 Azad faiyar d́óilla góri zindigi haṛo, montor nizor azadi re burair gúroni ísafe estemal no goijj́ó, bólke Allar gulam ísafe goijj́ó. 17 Beggún ore izzot goijj́ó; imandár báiyain dore muhábbot goijj́ó; Allar ḍoor raikko; baáñcca re izzot goijj́ó. 18 Gulam ókkol, furafuri izzot or sáañte nizoré nizor girós or hañse gosáido, siríf gom edde cída gún or hañse no, bólke gáañr gún or hañse yó. 19 Kiyólla-hoilé yían toh rahámot or laayek, zodi honókiye nizor kíyal ot Alla re rakí nainsáfí duk or tokolif bordac goré. 20 Kiyólla-hoilé zodi tuáñra hosúri goróne fīṛa h́oo de híin sobór or sáañte bordac goró, híyan ot kii súwab asé? Montor zodi sóiyi gán gorí duk foo de híin sobór or sáañte bordac goró, híyan toh Allar hañse rahámot or laayek. 21 Tuáñra re etollá éna ḍaka gíyéh, kiyólla-hoilé Mosih ye toh tuáñra lla duk fai ekkán meésal rakí gíyeh, zeéne tuáñra Íbar hañiye-hañiye solo. 22 Íba ye no honó guná goijj́é, aar no Íbar

muk ot honó férokbaži faa gíyéh. 23 Zeñtté Íba ye gail háiye, Íba ye uzan gail nó deh; aar zeñtté duk faiyé, Íba ye dómki nó deh, bólke insáf bisar goré de Íbar hañse Nizoré gosáidiye. 24 Aar Nize añárar guná re Íbar gaat gori looi kúruc ot loigiyé, zeéne añára guná ttu mori forhégari lla basi táki. Tuáñra Íbar zohóme beh gom óiyo. 25 Kiyólla-hoilé bérasóol or d́óilla tuáñra toh gollot rastat zaat accíl; montor yala tuáñra nizor Soroya edde ruhr Saásita-goróyar hañse fīri aigiyogói.

3 Bouwáin ókkol, héndilla tuáñra yó nizoré nizor-nizor hócom or hañse gosáido, zeéne zodi ítara baaz kiyé kalam no manilé yo, Ítarar bouwáin de zen honó hotá sára nizor solasole ítara re boṛai aní fare, 2 kiyólla-hoilé ítara saibó de óilde, tuáñrar pak edde izzoitta solasol. 3 Tuáñra nizoré baár ttu hánzar zorur náí, sul or binis báñgi, cúna lói yáh barík hoorsuor findí; 4 bólke ziyán zorur híyan óilde nizor dil ore hánzon, ruhr fána no ó de norom edde cída lói, kiyólla-hoilé Allar nozor ot híyan beh bicí kimoti. 5 Agor zobanat Allar uore bóraca rakíto de pak mayafuain ókkole yó nizoré héndilla hánzaito de, nizoré nizor-nizor hócom or hañse gosáidi. 6 Zendilla niki Sárach, híba ye Ibrahim ore malik ḍaki yóggwar hókum or tole tákito; zodi tuáñra sóiyi gán goró aar honó ḍoor ore faṭṭa no doh, t́ooile tuáñra toh híbar zíyain óiyo. 7 Hócom ókkol, héndilla tuáñra yó bouwáin dor f́uáñti buddír sáañte zindigi haṛo, ítara re komzur sáañti de zani edde tuáñrar d́óilla rahámoti zindigir mirasdár de buzí ítara re izzot diyo, zeéne tuáñrar duat bazá foida no. 8 Hoiṭó sair de, beggún ek mon ola ó, fetfurani rakó, báí or d́óilla muhábbot goró, rahám ola ó, norom ó; 9 burair bodol burai no goijj́ó, aar gail or bodol gail no diyó; yárbodol ítara lla borhot maiggo, kiyólla-hoilé tuáñra re hé moksóte éna ḍaha gíyéh, zeéne tuáñra borhot miras foo. 10 Pak-kalam ot toh endilla asé, “Zar ttu zindigi re muhábbot lage, edde monehoó bála din ókkol dekíte, yóggwar ttu nizor zir ore hórafi ttu aar nizor uñt̃ ore misá hotá howá ttu sóoñlar zorur. 11 Yóggwa ttu burai ttu fīri aái gom mún gorár zorur; yóggwa ttu cántir kucíc edde fisá d́órar zorur. 12 Kiyólla-hoilé Mabud or suk toh forhégar ókkol or uore, aar Íbar hane Ítarar dua f́úne; montor Mabud burai-goróya ókkol or hélaf.” 13 Zodi tuáñra ttu gom mún

goittó josba táke, tuáñra re hótí-goróya hon? 14 Montor zodi forhéggarir wasté tuáñra ttu duk faa fore yó, tuáñra mubarek. Ítarar dómki re no dooraiyó, aar sinta no goijjé, 15 bólke tuáñrar dil ot Mosih re Malik ísafe pak maniyo. Zee niki tuáñra ttu asé de acár waja tadarot goré, yóggwa re zuwab di bolla hámica toiyar táikko, montor dite norom or sáañte edde izzote diyo, 16 aar dil óu sáf raikko, zeéne ze maincé tuáñrar bodnam goré edde tuáñra ttu Mosihr ummot ísafe asé de bála solasol ore gál deh, ítara córminda ó. 17 Kiyólla-hoilé hóraf ham gorí duk faar túaro, zodi Allar moncá óile gom ham gorí duk faa toh beétor. 18 Kiyólla-hoilé Mosih yó de guná lla ekbar duk faail de asé, yáni forhéggar gwá ye hóraf manúc ókkol olla, zeéne íba ye añára re Allar hañse loizai fare. Íba re jisíme mariféla gyéh, montor ruhr hálót ot zinda gorá gyéh, 19 aar hé hálote íba zai bondit asé de ruh ókkol or hañse tobolik goijjé, 20 zetará boót age Nuhr zobatan zeñtté kicí toiyar ór aar Alla ye sobór or sáañte entezar gorí táikkil, héñtte nafórman accíl. Hé kicí gán ot bicí hom, yáni añcto zon manúc beh faní ttu baiccíl. 21 Hé faní óilde bápñismar ekkán nicán, ziyáne yala tuáñra re nejat faba. Bápñisma lon gaar hoñsara dur gorón no, bólke híyan óilde sáf dil olla Allar hañse ekkán aros. Híyane nejat faba de Isá Mosih mora ttu zinda ówar duara, 22 Zibá asman ot zaigói Allar den dák ottu asé, aar fírsta ókkole, kémota ola ókkole, edde kuduruti jiníc ókkole íbar hókumot mane.

4 Hétolla, zettót Mosih ye jisím ot duk faiyé, tuáñra nizoré yó ekí niyote mozbut goró; kiyólla-hoilé zee niki jisím ot duk faiyé yóggwa ye gunár adot félaidiye, 2 tói yóggwa ye baki zindigi insáni hóraf moncáye ar no hara, bólke Allar moncáye beh hara. 3 Giyyói de októtt tuáñra uúin gorát kafí ðaim haraifelaiyo zín Beyohúdi ókkole goitté fosón goré; tuáñra iín ot beh zindigi haraáila: bodmaci, kukíyal, nicábazi, aqðabazi, nicár mela-cóba, edde gínayi mutti fuñza. 4 Yala tuáñra ítarar fúañti hé bicí ayacikúci cámil náí de deki ítara taajup óigiyoi, aar ítara tuáñrar baabute bura-ára hoó. 5 Montor ítara ttu Ubár hañse ísaf díya foribó zibá zindar edde morar bisar gorí bolla toiyar. 6 Kiyólla-hoilé mora ókkol or hañse úddwa kúchóbor tobolik etollá éna gorá gyéh, zeéne jisími hálote ítarar bisar insán or dóilla gorá zah, montor

ruhr hálote ítara Allar dóilla zinda táke. 7 Tamám jiníc ókkol or hótom dake aáigiyoi; hétolla, dua gorí bolla úñciyar táko edde úñic ot táko. 8 Ebbe zoruri óilde, ezzon ore ezzone josbar sáañte muhábbot goró, kiyólla-hoilé muhábbote boót guná ókkol záfai raké. 9 No monmonai ezzon ore ezzone meémandari goró. 10 Zee zendilla niyamot faiyó, Allar dóilla-boðoilla rahámot or bála mazí ísafe híin ezzon ore ezzone hédmot gorí bolla estemal goró. 11 Zee kiyé tobolik goré, yóggwa ye Allar kalam beh tobolik gorók; zee kiyé hédmot goré, yóggwa ye Alla ye dee de toóufike beh hédmot gorók, zeéne hárr kessút Isá Mosihr duara Allar taarif ó. Taarif edde raastri abadulabad hámica íbar. Aamin. (aíñ g165) 12 Adorja ókkol, tuáñrar hañse ze ooini duk ókkol asé zín aiyé de óilde tuáñra re entán gorí bolla, híin tuáñrar hañse osin kessú ór fángori taajup no óiyo, 13 bólke zetó tuáñra Mosihr duk ókkol ot bági ór héto kúci ó, zeéne íbar mohíma zahér óibo de októtt óu tuáñra kúcir uore kúci ó. 14 Zodi Mosihr nam olla tuáñrar beizzoti ó, tuáñra mubarek, kiyólla-hoilé mohíma ola Ruh, yáni Allar Ruh tuáñrar uore asé. 15 Duk faile yo, saiyo tuáñra honókiye zen kúni, suri, burai-goróya ísafe yáh oinno zon or maamelat nak gólaidi duk no faa, 16 lekin zodi honókiye Isáyi de hétolla duk faa, yóggwa ye no córmouk, bólke hé forisor zoriya Allar taarif gorók. 17 Kiyólla-hoilé bisar or októ toh aáigiyoi, aar hé bisar Allar foribar ottu lóti beh cúru ór. Añára ttu lóti cúru ór de óile, uitarár hálót keén óibo fánllar zetará Allar kúchóbor ore amól no goré? 18 Aar, “forhéggar ottu úddwa nejat faite mockil de óile, bedinir edde gunágar or hálót keén óibo fánllar?” 19 Hétolla, zetará Allar moncá mozin duk faar de asé, ítara gom ham gorí-gorí nizor zan ore biccácdar Foidagoróyar hañse gosáidouk.

5 Tuáñrar bútoe asé de buzurgó ókkol ore, Añí nize yó zettót buzurgó aar añí Mosihr duk-mosibot or ezzon gobá edde zahér óibo de mohímat óu córik óiyum ísafe, ítara re nosíyot gorí: 2 Allar ze bérásóol or zák tuáñrar bútoe asé yíba re soro, yíbar saásita goríba de mojburiye no bólke Allar moncá mozin monehoói yore; nazayes nofár acáye no bólke azzuye; 3 aar zetará re tuáñrar át ot diiya giyéh ítarar uore hókumot no solaiyó, bólke

hé sóol or zák or hañse nomuna boinno. **4** Tói zeñtté Doónr Soroya wa zahér óibo, tuáñra mohíma tas faiba, zibá honódin nac no óibo. **5** Ó juwan ókkol, héndilla tuáñra yó nizoré tuáñrar buzurgó ókkol or hañse gosáido. Beggúne ezzon ore ezzone hédmot gorí bolla cídayi re fiñdó, kiyólla-hoilé, “Alla fohór ola ókkol or ulða tíya, montor niróc ókkol ore rahámot goré.” **6** Hétolla nizoré Kudurutwala Allar muúntu niróc goró, zeéne íba ye sóiyi októť tuáñra re uñsol ot tulé. **7** Tuáñrar hárr sintabáfani íbar uore dálido, kiyólla-hoilé íba ye toh tuáñrar díyan raké. **8** Úñic ot táko, edde úñciyar táko; tuáñrar duccon Ibilíc, guzore de cinggor dóilla gúrafira gorát asé, haré háifelai faribó de talace. **9** Hétolla iman ot mozbut táki ítar mukabela goró, kiyólla-hoilé tuáñra toh zano, duniyait asé de tuáñrar imandár báiyain ókkole yó ekí dóilla duk ókkol faar. **10** Tuáñra kessú ʔaim duk fai baade, hárr rahámot or Alla, zibá ye tuáñra re Mosihr usílaye Nizor ofúrani mohímat ɗaikké, íba Nize tuáñra re fakka goríbo, mozbut goríbo, bol diibo, edde týagaraibo. (aiōnios g166) **11** Íbar raastri abadulabad hámica zari tákouk. Amin. (aiōn g165) **12** Añí e baří ceñrí gán tuáñrar hañse, biccácdar báí bouli goni de Sílwanus or áta leikkí deh. Yíán lói añí tuáñra re josba edde gobá díř de ki, híyan óilde Allar sóiyi rahámot. Híyan ot mozbut táko. **13** Babilon ot asé de ze zomát ore Alla ye tuáñrar fúañti basíloiye, yíba ye tuáñra re sólam zanar; aar héndilla añr fua Markuse yó zanar. **14** Ezzon ore ezzone muhábbot or sáañte pak dile appá dí sólam zano. Mosihr bútoře asó de tuáñra beggún or uore cánti nazil óuk.

2 Fitor

1 Añí Sáimon Fitor, Isá Mosihr éggwa gulam edde sáhabi. Uitarár hañse lekír zetará añárar Alla edde Nejatdoya Isá Mosihr forhéggarir usílaye añárar gán or dóilla ekkán kimoti iman faiyé: **2** Alla re edde Isá añárar Malik ore sinóne tuánrar uore rahámot edde cánti bicígori nazil óuk. **3** Ubár illayi kudurute toh añára re zindigi edde dindári lói taalukat goré de híin beggún dan goijjé, zibá ye añára re Nizor mohímaye edde bálaie ñaikké Íbar re sinár zoriya. **4** Híin or duara Íba ye añára re Nizor kimoti edde ñoóñr waada ókkol diyé de asé, zeéne híin or usílaye tuánra illayi fitorot or bági óizogoi, ontú hári ze borbadi niki duniyait hóraf azzu ókkole foida goijjé. **5** Hétolla tuánra furafuri kucíce, nizor iman ot bálai, bálaít giyan, **6** giyan ot forhés, forhés ot sobór, sobór ot dindári, **7** dindárit báiyali meérbani, edde báiyali meérbani muhábbot baró. **8** Zodi tuánra ttu híin táke edde barér de óile, híine tuánra re añárar Malik Isá Mosih re sinát behar edde befózul óito no dibo. **9** Montor zar ttu híin náí yóggwa ye duré no deké, hoitó sailé añdá, aar nizoré nizor agor guná ókkol ottu pak-sáf gorífela giyeh de híyan foórafelaiye. **10** Hétolla, ó báiboináin, Alla ye tuánra re ñaikké de edde basíloie de híyan fakkagori bolla aró becábici kucíc goró. Kiyólla-hoilé zetókkal tuánra híin gorát táko, tuánra bikkúl uját no háyba, **11** bólke héndilla óile toh tuánra re añárar Malik edde Nejatdoya Isá Mosihr ofúrani raijjet becábici izzote góla zaybo. (aiōnios g166) **12** Hétolla añí tuánra re híin hámica yaad goráidiat tákiyum, tuánra híin zainna de edde nize faiyó de sóiyit máze tiki asó de óile yo. **13** Añí yíán tík bóuli báfi de ki, zetókkal añí e ñambur dóilla haiyaye así, tuánra re híin yaad goráidi foñfoiñta gorón, **14** kiyólla-hoilé añí zani, hára añr ttu añár e ñambu eri zaagói foribó, zendilla añré añárar Malik Isá Mosih ye yó sáf-sáf góri zanaidiyé. **15** Añí furafuri kucíc goríyum de ki, tuánra zen añr entehal or baade yó híin hámica yaad rakí faro. **16** Kiyólla-hoilé añára toh tuánra re añárar Malik Isá Mosihr taakot or edde Íba aibár baabute zanaidiyé de híin saláki gori banaiya kaháni no, bólke añára óilam de Íbar cáan or sukdahá gobá. **17** Íba ye Alla Baf ottu oñtté izzot edde mohíma faiyé zeñtté Íbar hañse hé

Ñoóñr Mohíma-wala ttu e abas swá aiccé, “Íbá óilde Añr adorja Fua, zibá re lói Añí bicí kúci.”

18 Asman ottu aiccíl de hé abas yíba añára nizebaze fúinni, híyala añára Íbar fúañti pak faár or uore. **19** Aar añárar hañse nobi ókkole hoói giye de hotá yó asé zíine aró fakka goré. Andár zagat suk zendilla serak or foór or uzu táke, borabor héndilla zetún fózor nó fáre aar tuánrar dil ot sút-tara nó ulé, tuánra híin or uzu kíyal dilé tuánra bála goríba. **20** Montor age yíán zanilo de ki, pak-kalam or honó poigam insán or buzá ttu aiccé de no. **21** Kiyólla-hoilé honó poigam insán or moncá ttu aiccé de náí, bólke insáne Pak-Ruh ye solaiyé de mozin Allar torfóttu hoiyé deh.

2 Montor zendilla Isráil koum or bútoe misá nobi ókkol óu accíl, héndilla tuánrar bútoe yó misá ustat ókkol tákibo. Ítara suppe-suppe endilla na sóiyi taalim ókkol dibo zíine dónco ané, aar nizoré kinifélaie de Malik ore úddwa inkar goríbo, héndilla gorí Ítara nizor uore hótat dónco añíbo. **2** Boóut zone Ítarar bereijja solasol or fisá doribo, aar Ítarar zoriya sóiyi torikar bodnam óibo. **3** Ítara lalóse banaouti hotá ókkol hoói tuánra ttu fáida tulíbo; Ítarar uore boóut age lóti hókum óigiyoi de sánza aité deri náí, aar Ítarar borbadi gúm ot no. **4** Alla ye toh guná goijjé de fírista ókkol ore bad nó deh, bólke híin ore zuzuk ot félaidi andár gañt ot bañdí raikké, bisar or ñin foijjonto bon táki bolla. (Tartaroō g5020) **5** Íba ye furana duniyai re bad nó deh, bólke bedini ókkol or hé duniyait tuwán ainñíl, montor forhéggarir tobolik goijjíl de Nuh re edde oinno hañt zon ore héntu basaail. **6** Íba ye Sódóm edde Gomórah cóor ore furi sái gorífelai borbadiir hosúrbon tóoraiye; héndilla gorí Íba ye híin ore bedini ókkol or hálót kii óibo de híyan or meésal banaiyé; **7** montor Íba ye forhéggar Luút ore basaifélail, zibá bedini ókkol or nafak solasol or zalanit accíl. **8** Kiyólla-hoilé hé forhéggar manúc cwa ye Ítarar bútoe táki Ítarar becorá ham zín de kító edde fúnito híine ñinbodín nizor forhéggar ruht toziya faito. **9** Hé ísafe Mabude toh dindár ókkol ore entán ottu basailoi zane aar hóraf manúc ókkol ore sánza lla bisar or ñin foijjonto rakí zane, **10** háasgori uitará re zetará nizor jisími nafak moncá mozin sole edde hókumot ore hékarot goré. Ítara toh goddar edde ekguañja, Ítara kuduruti zandár ókkol ore

bura-ára hoité no ðoora. **11** Montor fírista ókkol ítarar túaro boluwar edde taakotwala de óile yo, hííne Mabud or muúntu ítarar bisar dite bura-ára no hoó. **12** Lekin manúc ítara zín no zane híín ore beh bura-ára hoó. Ítara óilde akkól sára januwar or dóilla, zín nizar zate foida óiye de dóra hái mori bolla; ítara jonggoli januwar or dóilla dóncó óizayboi, **13** aar oinno zon ore goijjé de burair bodol burai faibo. Ítarar kúci óilde, din ot kúlamela góri ayaci gorón. Ítara tuáñrar fúañti hána háite dúkabazir sáañte ayaci gorí, tuáñrar uore bodnam edde córom ané. **14** Ítarar suk zenár kíyale furaiya; ítara guná gorá honó októt bon no goré; ítara komzur maincóre fán ot féla; ítara ttu lalóse kuwac goijjá dil asé; ítara toh laánoti! **15** Ítara sóiyi rasta eridi gollot rastat giyyói; ítara Biyor or fua Balam or foñt doijje deh, zee niki hárami hamanir acík accíl, **16** montor yóggwa ye nizar hosúri lla bóťborán háail: eggwá buga gadá ye insán or abase hotá hoói nobi íbar foolait bazá díyl. **17** Manúc ítara óilde fúana kuwa edde tuwáne urai loizagói de miyúlar dóilla; ítara lla ebbe gutguitta añdár raká gíyeh. **18** Kiyólla-hoilé ítara no de hotár ðoóñr-ðoóñr gof mari, manúc uitará re jisím or azzu mozin bodmaci goittó uskaidi fán ot féla, zetará gollot ot sole de ítara ttu neeliaiyér de asé. **19** Ítara tará re azadir waada deh, montor ítara nize borbadir gulam boni asé. Kiyólla-hoilé zaré ziyáne ziti aiyé, íte toh híyan or gulam óizagoi. **20** Ítara zettót añárar Malik edde Nejatdoya Isá Mosih re siní duniyair nafaki ttu basi aái baade abar híín or fán ot foijjé aar ítara re hííne ziti aiccé, ítarar fisór hálót agor hálót or túaro hóraf óiye. **21** Forhésgarir rasta siní, oh pak hókum ziyán ítara re diiya giyéh híyan ottu fissá zaar túaro, hé rasta no siná ítara lla aró beétor accíl. **22** Ítarar hálote e boson sóiyi de dahá, “Kuñire zín oolifélaye híín or hañse waafes zaa” aar, “Dúifelaiya cúwor waafes fúñrot ðeráf foitto zaa.”

3 Ó adorja ókkol, tuáñrar hañse lekír de yíán óilde añár dusára ceñrí. Yaad gorídiyar mikká ttu añí duní ceñríť tuáñrar sáf dil ore laridiyí, **2** zeéne tuáñra pak nobi ókkole ze hotá ókkol age lóti hoóigiye aar Malik edde Nejatdoyar ze hókum tuáñrar sáhabir duara aiccé híín yaad rakó. **3** Ebbe age yíán zanilo de ki, ahéri zobatan táťtaibazi-goróya ókkol táťtaibazi gorí-

gorí aibó, aar nizar hóraf azzuye solibó. **4** Ítara hoibó de, “Íba aibár waada horé giyyói? Hárr kessú toh añárar dada-bafdana ókkol moot or gúm ot fori baade yo aijjó undilla solat asé zendilla híín duniyair foidayecir héñtte lóti accíl.” **5** Montor ítara buzísinti foóraifele de ki, boóut age Allar kalame asman foida óiye, aar zobin ore faní ttu banai fanít kaayem goijjé, **6** ze fanír duara hé zobanar duniyai re tuwán aní dóncó gorífela gíyl. **7** Hé ekí kalame beh yalar asman edde zobin ore ooin loi zolai difélai bolla raká gíyeh. Híín ore héfazot raká zaybo de, bedini ókkol or bisar edde borbadir din foijjonto. **8** Montor adorja ókkol, tuáñra e hotá foórai no felaiyo de ki, Malik or nozor ot ek din ek ázar bosór or fúwan aar ek ázar bosór ek din or fúwan. **9** Malike íbar waada fura goitté deri goré de no, zendilla kiyé-kiyé deri goré bouli báfe; bółke íba ye tuáñra re sobór gorí táikke deh, kiyólla-hoilé honó ezzon dóncó óizagoi de híyan íba ye no saá, bółke saá de, beggúne zen touwá gorífele. **10** Lekin Malik or din sur aiyé fángori beh aibó. Hé din asman eggwá ðoóñr uzore ofát óizayboi, aar san, beil, edde tara ókkol tez ooine milai zayboi; duniyai edde híyan or ham ókkol zolizaybói. **11** Híín beggún zettót héndilla góri nac óizayboi, tuáñra ttu hondilla manúc ón sáa? Tuáñra ttu pak edde dindári góri soli, **12** Allar din aibár entezar ot edde yíba hára anaíbar kucíc ot ón sáa. Hé din toh asman furi dóncó óizayboi, aar san, beil, edde tara ókkol tez ooine milai zayboi. **13** Lekin íbar waada mozin añára noya asman edde noya zobin or entezar ot así, zeéré forhésgari táke. **14** Hétolla, adorja ókkol, zettót tuáñra híín or entezar ot asó, kucíc goró de ki, Alla ye zeéne tuáñra re cántir hálót ot dak sára edde behosúr lootfa. **15** Táariba de, añárar Malik or sobór óilde nejat or mouka; ze hotá añárar adorja báí Páule yó Allar diiya giyan mozin tuáñrar hañse leikké. **16** Yóggwa ye nizar ceñrí beggún ot óu iín ókkol leikké, zín ot endilla hodún hotá asé zín buzíte mockil. Taalim sára edde komzur ókkole ítara baki pak-kalam bodole de héndilla híín ore yó bodolifélai, nizar lla borbadi foida goré. **17** Hétolla hoóir, ó adorja ókkol, tuáñra híyan age lóti zano ísafe, uñciyar táko, zeéne hé bedini ókkol or gollote tuáñra re gollot rastat no loizagói, aar nizar mozbut zaga ttu lori no zogói; **18** bółke añárar Malik edde Nejatdoya Isá Mosih rahámot ot edde íba re sinát zetó éto

baró. Yala edde abadulabad foijjonto íbar taarif
ówat tákouk. Amin. (aiðn g165)

1 Yohánna

1 Añára tuáñrar hañse Ubár baabute lekír, zibá foóila cúru ttu lóti asé, zibár muk zohan añára fúinni, zibá re nizor suké deikkí, zibá re kíyal góri saái yore nizor áte dóijji, yáni zindigidooya Kalam or baabute. **2** Hé zindigi zahér óiye; añára híyan deikkí aar híyan or baabute gobá díh. Añára tuáñrar hañse ofúrani zindigir baabute boiyan gorír deh, ziyán Baf or fúañti accíl aar añárar hañse zahér óiye. (aiōnios g166) **3** Añára zín deikkí edde zín fúinni, tuáñrar hañse híin beh boiyan gorír, zeéne tuáñra ttu yó añára llói taalukat táke. Becók añárar taalukat toh Baf loi edde Íbar Fua Isá Mosih llói éna. **4** Añára tuáñrar hañse iín etollá lekír, zeéne añárar kúci fura ó. **5** E hotá añára íba ttu fúinni aar tuáñrar hañse boiyan gorír, ki hoilé, Alla óilde Nur, íbar bútoore honó andár náí. **6** Añára andár ot zindigi harai zodi endilla hoói, añára ttu íba llói taalukat asé, tooile toh añára misá hotá hoóir, aar sóiyi gán no gorír. **7** Montor zodi añára Nur ot zindigi harai, zendilla íba Nize yó Nur ot asé, tooile toh añára ezzon ottu ezzon loi taalukat asé aar íbar Fua Isár lou wé añára re hárr guná ttu pak-sáf goré. **8** Añára zodi hoói, añára ttu honó guná náí; tooile toh añára nizoré fáki dír deh, aar dahá zah de, añárar bútoore sóiyi náí. **9** Montor zodi añára añárar guná Allar hañse cíkar gorí, tooile íba ye añárar guná maf gorídibo, aar añára re hárr kuham ottu pak-sáf goríbo, kiyólla-hoilé íba biccácdar; íba ye honódin nainsáfi no goré. **10** Añára zodi hoói, añára honó guná nó gorí; tooile toh añára íba re misákur banair, aar añárar dil ot íbar kalam náí.

2 Ó adorja fuain, ańí tuáñrar hañse iín etollá lekír, zeéne tuáñra guná no goró. Montor zodi honókiye guná gorífele, añára ttu de Baf or hañse ezzon Cúwaricgar asé, íba óilde forhésgar Isá Mosih. **2** Íba Nize óilde añárar gunár koffara; siríf añárar no, bólke fura duniyair maincór gunár óu. **3** Añára zodi íbar hókum ókkol amól gorí, tooile zani fajjium de ki, añára íba re siní fajjíf. **4** Zee niki endilla hoó, “Ańí íba re siní fajjíf,” lekin íbar hókum ókkol amól no goré, íte misákur, ítar bútoore sóiyi náí. **5** Montor zee niki íbar kalam amól goré, becók ítar bútoore Allar muhábbot furafuri asé. Híyane añára zani fari de, añára íbar bútoore así. **6** Zee niki íbar bútoore

así hoói dabi goré, ítar ttu íbar dóilla góri solar fóros. **7** Ó adorja ókkol, ańí tuáñrar hañse honó noya hókum lekír de no, bólke ekkán furana hókum, ziyán tuáñrar hañse foóila cúrut lóti asé. Furana hókum híyan óilde tuáñra fúinno de hé kalam. **8** Arek ruwate, ańí tuáñrar hañse ekkán noya hókum lekír hoilé fare, ziyán or sóiyi íbar bútoore edde tuáñrar bútoore dahá zah, kiyólla-hoilé andár fúraizargoi aar asól nur zola cúru óigiyoi. **9** Zee niki nur ot así hoó montor nizor báí ore nafórot goré, íte aijjó andár ot asé. **10** Aar zee niki nizor báí ore muhábbot goré íte nur ot táke, aar ítar ttu uját háibar kessú náí. **11** Montor zee niki nizor báí ore nafórot goré, íte andár ot asé aar andár ot solafíra goré; íte horé zaar de híyan íte no zane, kiyólla-hoilé andáre ítar suk ańdá gorífelaiye. **12** Ó gura fuain ókkol, ańí tuáñrar hañse etollá lekír, kiyólla-hoilé Mosih name toh tuáñrar guná ókkol maf gorídiya giyeh. **13** Ó baf ókkol, ańí tuáñrar hañse etollá lekír, kiyólla-hoilé tuáñra toh Ubá re sinó zibá foóila cúrut lóti asé. Ó juwan ókkol, ańí tuáñrar hañse etollá lekír, kiyólla-hoilé tuáñra toh íbilíc ore ziti aiccó. Ó fuain ókkol, ańí tuáñrar hañse etollá leikkí, kiyólla-hoilé tuáñra toh Baf ore sinó. **14** Ó baf ókkol, ańí tuáñrar hañse etollá leikkí, kiyólla-hoilé tuáñra toh Ubá re sinó zibá foóila cúrut lóti asé. Ó juwan ókkol, ańí tuáñrar hañse etollá leikkí, kiyólla-hoilé tuáñra mozbut; tuáñrar bútoore Allar kalam táke, aar tuáñra íbilíc ore ziti aiccó. **15** Duniyai re yáh duniyair asé de honó kessú re muhábbot no goijjó. Zee niki duniyai re muhábbot goré, ítar bútoore Baf or muhábbot náí. **16** Kiyólla-hoilé duniyair asé de híin toh, jisím or azzu, suk or lalós edde zindigir borái; híin Baf or torfóttu no, bólke duniyair torfóttu. **17** Duniyai edde duniyair azzu ókkol fúraizargoi, montor zee niki Allar moncá mozin goré, íte abadulabad tákibo. (aiōn g165) **18** Ó fuain ókkol, yala óilde ahéri októ; tuáñra de fúinno, Doijjal aiyé, ehón úddwa boóut doijjal aáigiyoi. Híyane añára zani de, yala óilde ahéri októ. **19** Becók ítara añárar héntu neeligiyói, háleke ítara añárar manúc nu accíl; kiyólla-hoilé ítara zodi añárar manúc óito, tooile ítara añárar fúañti táizaitoi; montor ítara neeligiyói de híyane sáf zahér de, ítara ezzon óu añárar manúc nu accíl. **20** Montor tuáñrar uore toh Pakzone zimmadari diiyé, aar tuáñra beggúne sóiyi re zano. **21** Tuáñra sóiyi re no zano bóuli ṭaari ańí tuáñrar hañse lekír

de no, bólke etollá kiyólla-hoilé tuáñra sóiyi re zano, aró zano de ki, sóiyi ttu honó misá nu aiyé. **22** Zee niki Isá re Mosih de inkar goré, íte misákur no ói ar kii? Zee niki Baf edde Fua re inkar goré, íte toh doijjal. **23** Zee niki Fua re inkar goré, ítar bútoe Baf náí; aar zee niki Fua re cíkar goré, ítar bútoe Baf óu asé. **24** Hétolla saiyo, tuáñra foóila cúru ttu lóti zín fúni-fúni aiyór híin tuáñrar dil ot táke fán. Tuáñra foóila cúru ttu lóti zín fúni-fúni aiyór híin zodi tuáñrar dil ot táke, tóoile tuáñra yó Fua edde Baf or bútoe tákiba. **25** Mosih ye añára re ziyán diibar waada goijjé híyan óilde ofúrani zindigi. **(aiōnios g166)** **26** Añí tuáñrar hañse iín uitarár baabute leikkí zetará tuáñra re gollot rastat loizaitó kucíc gorér. **27** Lekin tuáñrar uore íba ye ze zimmadari diiyé híyan toh tuáñrar dil ot táke. Hétolla tuáñra ttu ar honókiyor taalim or zorurot náí, kiyólla-hoilé íbar Ruh ye toh tuáñra re hárr kessúr taalim deh, aar híin misá no bólke sóiyi. Hétolla Ruh ye tuáñra re zendilla taalim diyé, héndilla tuáñra íbar bútoe zari táko. **28** Ói, ó adorja fuain ókkol, íbar bútoe zari táko, zeéne íba zeñtté zahér óibo, héñtte añára ttu hímmot táke, aar íba aibó de din ot íbar muúntu córminda ówa no fore. **29** Tuáñra zehón íba forhésgar de zano, tuáñra yían óu zanibá de ki, zetará forhésgari zindigi haṛa, ítarar zormo Alla ttu óiye.

3 Soó, Bafe añára re hotó ḑoóñr muhábbot goijjé, zeén niki añára re Allar fuain howá zah; eéne toh híyan sóiyi. Duniyair maincé añára re etollá no siné, kiyólla-hoilé ítara íba re no siné. **2** Ó adorja ókkol, yala toh añára Allar fuain, montor muúntu zay añára kii óiyum de híyan aijjó zahér nó óiyo. Añára eddúr zani de ki, Mosih zeñtté zahér óibo héñtte añára íbar ḑóilla óiyum, kiyólla-hoilé íba asóle zendilla añára íba re héndilla dekiyum. **3** Zetó zone Mosihr uore hé acá raikké, ítara nizoré pak-sáf raké, zendilla íba pak-sáf. **4** Zee niki guná goré íte córiyot báñge, kiyólla-hoilé guná gorón óilde córiyot báñgon. **5** Tuáñra toh zano, añárar guná ókkol dur gorí bolla Mosih zahér óoil; íba ttu honó guná náí. **6** Hétolla zee niki íbar bútoe táke íte gunát fori no táke; aar zee niki gunát fori táke íte íba re no deikké aar no siné. **7** Ó adorja fuain ókkol, saiyo, tuáñra re honókiye gollot ot no loiza fán. Zee niki forhésgari zindigi haṛa íte óilde forhésgar, zendilla íba forhésgar.

8 Aar zee niki gunát fori táke íte óilde íbilíc or, kiyólla-hoilé íbilíce toh foóila cúru ttu lóti guná gorát asé. Allar Fua etollá zahér óoil, zeéne íba ye íbilíc or ham ókkol ore dónco gorífela. **9** Zee niki Alla ttu zormo óigiyoi íte gunát fori no táke, kiyólla-hoilé ítar bútoe Allar bis asé; aar íte Alla ttu zormo óigiyoi de hétolla íte gunát fori táki no fare. **10** Allar fuain honará aar íbilíc or fuain honará híyan endilla gori siná zah: zee niki forhésgari zindigi no haṛa íte Allar no, héndilla uite yó Allar no zee niki nizor báí ore muhábbot no goré. **11** Kiyólla-hoilé tuáñra foóila cúru ttu lóti ziyán fúni-fúni aiyór híyan óilde, añára ttu ezzon ore ezzone muhábbot gorár zorur. **12** Keéin or ḑóilla no óiyo, zee niki íbilíc or accíl aar nizor báí ore kún goijjíl. Íte nizor báí ore kiyá kún gorífelail? Kiyólla-hoilé ítar ham ókkol bura accíl, montor báí or ham ókkol gom accíl. **13** Ó báiboináin ókkol, duniyair maincé tuáñra re nafórot goillé taajup no óiyo. **14** Añára toh zani, añára moot ottu zindigit faráyigai; kiyólla-hoilé añára de báiyain dore muhábbot gorí. Zee niki muhábbot no goré íte aijjó moot or hókumot or tole asé. **15** Zee niki nizor báí ore nafórot goré íte kúni, aar tuáñra toh zano, honó kúnir bútoe ofúrani zindigi náí. **(aiōnios g166)** **16** Añára toh Mosih ye añára lla Nizor zan dyíl de híyan ottu muhábbot kiyó re hoó de zani faijji. Hétolla, añára ttu yó nizor báiboináin ókkol olla nizor zan diyar fóros. **17** Duniyaibi cómbotti asé de manúce zodi nizor báí zorurot ot foijjé de deki baade yo nizor suk bon gorí raké, ítar bútoe Allar muhábbot keéngori zari tákibo? **18** Ó adorja fuain ókkol, aiyó, añára siríf hotáye edde zobane no, bólke hame edde sóiyiye muhábbot gorí. **19** Tói añára zani faijjum de ki, añára sóiyir, aar Allar muúntu añárar dile tosólli faibo. **20** Kiyólla-hoilé añárar dile zodi añára re hosúrbon ṭóora, añára toh zani, Alla añárar dil or túaro ḑoóñr, íba ye hárr kessú zane. **21** Hétolla, ó adorja ókkol, añárar dile zodi añára re hosúrbon no ṭóora, tóoile toh añára ttu Allar muúntu hímmot tákibo, **22** aar añára íba ttu zín magi híin faiyum, kiyólla-hoilé añára de íbar hókum ókkol amól gorí, aar íbar nozor ot zín fosóndar híin gorí. **23** Íbar hókum óilde, añára íbar Fua Isá Mosihr uore iman anón aar ezzon ore ezzone muhábbot gorón, zendilla Mosih ye añára re hókum díye. **24** Zee niki Allar hókum ókkol amól goré íte Allar bútoe zari asé, aar Alla ítar bútoe zari

asé. Íba ye añára re Pak-Ruh diiyé de híyane añára zani de ki, íba añárar bútoze zari asé.

4 Ó adorja ókkol, hárr ruh re biccác no goijjó, bólke híin Allar torfóttu ói ne no tahákit gorí saiyó; kiyólla-hoilé duniyait boóut misá nobi ókkol neeillé. **2** Allar Ruh re tuáñra endilla gorí siní faribá: ze ruh ye Isá Mosih insán boni aiccíl de híyan cíkar goré, hé ruh óilde Allar torfóttu; **3** montor ze ruh ye Isár baabute héndilla cíkar no goré, hé ruh Allar torfóttu no; hé ruh óilde Doijjal or, ze ruh aibár hotá tuáñra fúinno, aar yala úddwa duniyait asé. **4** Ó adorja fuain ókkol, tuáñra toh Allar torfóttu aar tuáñra ítara re ziti aáigiyogoi, kiyólla-hoilé tuáñrar bútoze zibá asé íba toh duniyait zee asé ítar túaro ñoóñr. **5** Ítara duniyair torfóttu, hétolla ítara duniyaibi hotá hoó deh, aar duniyair maincé ítarar hotá fúne. **6** Montor añára de Allar torfóttu. Zetará Alla re siné, ítara añárar hotá fúne; montor zetará Allar torfóttu no, ítara añárar hotá no fúne. Héndilla góri añára sóiyir ruh re edde dúkabazir ruh re siní fari. **7** Ó adorja ókkol, aiyó, añára ezzon ore ezzone muhábbot gorí, kiyólla-hoilé muhábbot toh Allar torfóttu. Zee niki muhábbot goré íte Alla ttu zormo óigiyoi aar íte Alla re siné. **8** Aar zee niki muhábbot no goré íte Alla re no siné, kiyólla-hoilé Alla óilde toh muhábbot. **9** Añárar hañse Allar muhábbot yíáne zahér óiye, ki hoilé, íba ye Nizor lehár ek Fua re duniyait difeáiyé, zeéne añára íbar duara basi táki fari. **10** Añára Alla re muhábbot goijjí de hétolla no, bólke íba ye añára re muhábbot gorí añárar gunár koffara ói bolla Nizor Fua re difeáiyé deh. Híyan ore hoó de muhábbot. **11** Ó adorja ókkol, Alla ye zettót añára re etó muhábbot goijjé, añára ttu yó ezzon ore ezzone muhábbot gorár fóros. **12** Alla re toh honókiye honódin deikké de náí. Añára zodi ezzon ore ezzone muhábbot gorí, tooile toh Alla añárar bútoze zari asé aar íbar muhábbot añárar bútoze furafuri asé. **13** Íba ye añára re Nizor Ruh ttu diiyé de hétolla añára zani fari de, añára íbar bútoze zari así aar íba añárar bútoze zari asé. **14** Añára deikkí edde gobá dí de ki, Bafe Fua re duniyair Nejatdoya ói bolla difeáil. **15** Zee niki Isá re Allar Fua de cíkar goré, Alla ítar bútoze zari táke, aar íte Allar bútoze zari táke. **16** Alla ttu añára lla ze muhábbot asé híyan añára zani edde biccác gorí. Alla óilde muhábbot; zee niki muhábbot or bútoze zari táke íte Allar bútoze

zari táke, aar Alla ítar bútoze zari táke. **17** Héndilla góri muhábbot añárar bútoze furafuri asé, zeéne añára ttu kiyamot or din hímmot táke, kiyólla-hoilé e duniyait añára yó de Isár ñóilla. **18** Muhábbot ot honó ñoor náí; furafuri muhábbote ñoor ore dur gorífele, kiyólla-hoilé ñoor or fisé sáñzar sinta táke. Zee niki ñoora ítar bútoze muhábbot furafuri náí. **19** Añára etollá muhábbot gorí, kiyólla-hoilé age íba ye añára re muhábbot goijjé. **20** Zodi honókiye endilla hoó, “Añí Alla re muhábbot gorí,” montor nizor báí ore nafórot goré, íte misákur; kiyólla-hoilé zee niki deikká báí ore muhábbot no goré, íte andeikká Alla re keéngori muhábbot gorí faribó? **21** Añára íbar torfóttu e hókum faiyí de ki, zee niki Alla re muhábbot goré ítar ttu nizor báí ore yó muhábbot gorá foribó.

5 Zee niki Isá re Mosih de biccác goré, íte Alla ttu zormo óigiyoi; aar zee niki Baf ore muhábbot goré, íte íbar fua re yó muhábbot goré. **2** Añára Alla re muhábbot gorí de edde íbar hókum ókkol amól gorí de híyane zani de ki, añára Allar fuain ókkol ore muhábbot gorí. **3** Allar hókum ókkol amól gorá óilde Alla re muhábbot gorá. Íbar hókum ókkol zulap no. **4** Kiyólla-hoilé zee niki Alla ttu zormo óigiyoi íte toh duniyai re ziti aiyé. Duniyai re ziyáne ziti aiccé híyan óilde añárar iman. **5** Zee niki Isá re Allar Fua de biccác goré, siríf íte no ói duniyai re ziti aiyé de ar hone? **6** Isá Mosih óilde Ubá zibá faní edde lou wór duara aiccé; siríf fanír duara no, bólke faní edde lou wór duara. Héndilla bóuli Pak-Ruh ye gobá déh, kiyólla-hoilé hé Ruh toh Nize sóiyi. **7** Gobádoya asé de tin, híin óilde: **8** Pak-Ruh, faní, edde lou; hé tiní gobá ye ekí ñóilla gobá déh. **9** Becók añára insán or gobá re biccác gorí, montor Allar gobá toh aró ñoóñr. Allar gobá óilde waán ziyán íba ye Nizor Fuar baabute diyé. **10** Zee niki Allar Fuar uore iman ané ítar dile hé gobá kobul goré; aar zee niki Alla re biccác no goré íte íba re misá banaiyé, kiyólla-hoilé Alla ye Nizor Fuar baabute ze gobá díye híyan de íte biccác nó goré. **11** Hé gobá óilde, Alla ye añára re ofúrani zindigi diiyé, aar hé zindigi íbar Fuar hañse asé. (aiōnios g166) **12** Zee niki hé Fua re faiyé íte hé zindigi faiyé, montor zee niki Allar hé Fua re nó faa íte hé zindigi nó faa. **13** Tuáñra zetará Allar Fuar uore iman ainnó, iín añí tuáñrar hañse kiyólla lekír hoilé, zeéne tuáñra nizor ttu ofúrani zindigi asé

de zano. (aiōnios g166) **14** Allar muúntu añárar ze hímmot asé híyan óilde, zodi añára íbar moncá mozin honó kessú magi, híyan íba ye fúne. **15** Añára zehón yían zani, añára ziyán magi híyan íba ye fúne; añára yían óu zani de ki, añára íba ttu zín maiggí hín faiyí. **16** Zodi honókiye nizor báí ye endilla guná gorér de deké ze guná ye moot nu ané, tooile íte dua goillé Alla ye hé báí ore zindigi diibo. Añí guná waán or hotá hoóir de ze guná ye moot nu ané. Moot ané de guná yó asé, añí héndilla guná lla dua goittó hoóir de no. **17** Hárr dóilla kuham guná, montor moot nu ané de guná yó asé. **18** Añára zani, zee niki Alla ttu zormo óigiyoi íte gunát fori no táke, kiyólla-hoilé Allar Fua ye ítare héfazot raké, aar íbilíce ítare súi no fare. **19** Añára yían óu zani de ki, añára Allar, aar fura duniyai íbilíc or kobzat asé. **20** Añára aró zani de ki, Allar Fua aái añára re buzíbar toóufik diiyé, zeéne añára Zibá sóiyi íba re zani fari. Becók añára Zibá sóiyi íbar bútoe así, yáni íbar Fua Isá Mosihr bútoe. íba óilde sóiyi Alla aar ofúrani zindigi. (aiōnios g166) **21** Ó adorja fuain ókkol, nizoré mutti fuñza ttu basai rakó.

2 Yohánna

1 Añí buzurgó ye, Allar basfloiya mayafuar hañse edde híbar fuain dor hañse lekír, zetará re añí sóiyi muhábbot gorí. Siríf añí no bólke zetará sóiyi re zane ítara beggúne yó muhábbot goré, **2** kiyólla-hoilé sóiyi toh añárar bútoze zari táke aar abadulabad añárar fúañti tákibo. (**aiñ g165**) **3** Alla Baf or torfóttu, edde hé Baf or Fua Isá Mosihr torfóttu rahámot, meérbani, edde cánti añárar fúañti sóiyi edde muhábbote zari tákibo. **4** Tuáñr kessú fuain sóiyit soler de deki añí bicí kúci óiyi, zendilla soli bolla añára Baf or torfóttu hókum faiyí. **5** Ó izzotdár bóin, añí tuáñre aros gorír, aiyó, añára ezzon ore ezzone muhábbot gorí. Híyan añí tuáñr hañse honó noya hókum leikkí de no, bólke waán ziyán añára re foóila cúru ttu diiya giyé. **6** Añára Allar hókum mozin solon óilde muhábbot. Íbar hókum óilde yían ziyán tuáñra cúrut lóti fúni-fúni aiyór, ki hoilé, tuáñra muhábbot or foñt báy solo. **7** Kiyólla-hoilé duniyait toh boóut dúkabaz ókkol neeillé, zetará Isá Mosih insán boni aiccé de cíkar no goré. Héndilla manúc óilde dúkabaz edde doijjal. **8** Úñciyar táikko, zeéne añára zín olla meénnot goijjí híin hárai no félo, bólke híin or boccíc furafuri faizo. **9** Zee niki Mosihr taalim or címar baáre zaagói aar híin or bútoze zari no táke, ítar bútoze Alla náí. Montor zee niki hé taalim or bútoze zari táke, ítar bútoze Baf óu asé, Fua yó asé. **10** Honókiye zodi tuáñrar hañse aái héndilla taalim no deh, ítare gór ot zaga no diiyó aar sólám óu no zanaiyó. **11** Kiyólla-hoilé zee niki héndilla manúc ore sólám zana, íte hé manúc or bura ham ot córik óiye. **12** Añr ttu tuáñrar hañse lekíbar boóut kessú asé, montor añí híin habos edde cíyai lói lekíto no saáir. Añr acá asé de, añí tuáñra llói milto aiccúm, aar tuáñra llói muámuikka ói hotá hoiyúm, zeéne añárar kúci fura ó. **13** Tuáñr bóin zibá re Alla ye basfloiyé, híbar fuain de tuáñre sólám zanar.

3 Yohánna

1 Añí buzurgó ye, adorja Gayus or hañse lekír, zibá re añí sóiyi muhábbot gorí. **2** Ó adorja, añí dua gorí de, zendilla tuáñr ruúhani torki ór héndilla tuñí zen hárr kessút torki óizogoi aar tuáñr sehét bála táke. **3** Añí bicí kúci óiyi, zeñtté hodún imandár báiyain aái yore añré tuáñr hákikot or gobá díye, ki hoilé, tuñí bóle sóiyi foñt báy solat asó. **4** Añr fuain ókkol sóiyi foñt báy soler de híyan fúnar túaro ñoóñr kúci añr ttu ar náí. **5** Ó adorja dustó, tuñí toh imandár báiboináin ókkol olla zín gorór híin imandarir sáañte gorór, háleke ítara tuáñr sinforiso manúc no. **6** Ítara zomát or muúntu tuáñr muhábbot or baabute gobá díye. Tuñí ítara re ítarar sofór ot rowana goríдите Alla kúci ó de héndilla góri dilé bicí gom óibo. **7** Kiyólla-hoilé ítara sofór ot neeillé de Mosihr nam or wasté; ítara gairimandár ókkol ottu honó modot nó loo. **8** Hétolla, héndilla maincóre modot gorón añára ttu fóros, zeéne añára yó sóiyir ham-goróya ói fari. **9** Añí zomát or hañse kessú leikkílam; montor Diyutrifes, zee ítarar bútoe sóddari goittó saá, íte añárar hotá kobul no goré. **10** Hétolla, añí hére ailé, íte goré de ham ókkol tulídoriyum. Íte añára re ínca gorí añárar bodnam ókkol gorér. Ítar ttu híyan lói kafí nó óiyo, íte imandár báiyain dore yó kobul no goré, aar zetará kobul goittó saá ítara re maná goré aar zomát ottu neelaide. **11** Ó adorja dustó, burair fisáli no bólke gom or fisáli dóri solo. Zee niki gom ham goré íte óilde Allar, montor zee niki bura ham goré, íte Alla re nó deké. **12** Demetriyuse beggún or hañsóttu gom nam faiyé, sóiyir hañsóttu úddwa. Añára yó yóggwar nam gorí. Tuñí toh zano, añára di de gobá sóiyi deh. **13** Añr ttu tuáñr hañse lekíbar boóut kessú asé, montor añí híin holom edde cíyai lói lekíto no saáir. **14** Añr ttu acá asé de, añí tuáñre bicí hára dekéyú, aar añára muámuikka ói hotá hoiyúm. Tuáñr uore cánti óuk. Eříyar dustó ókkole tuáñre sólam zanar. Tuñí héříyar dustó ókkol ore zon-zon gori añr sólam diyo.

Yohúdah

1 Añi Yohúdah, Isá Mosihr éggwa gulam aar Yakub or báí. Uitarár hañse lekír, zetará re Alla ye ñaikké, zetará óilde Alla Baf or adorbon aar Isá Mosihr duara héfazot or tole asé. **2** Tuáñrar uore meérbani, cánti edde muhábbot bicígori nazil óuk. **3** Ó adorja ókkol, zeñtté añi tuáñrar hañse nejat waán or baabute lekí bolla furafuri kucíc gorír ziyán ot añára beggún córik así, añi e aros sán lekón zorur bouli báippi, ki hoilé, tuáñra zan-foan di oh iman or wasté larái goró ziyán Allar pak bonda ókkol ore ekbar ot hámica lla diíféla gíyeh. **4** Kiyólla-hoilé ót no faifán góri hoozzon manúc suppe-suppe añárar bútoe góilllegai de asé, zetarár sáñzar zikír yaar boóut age lóti asé. Ítara bedini ókkol, zetará Allar rahámot ore bura ham or ezazot-nama banaiféle, aar añárar lehár Girós edde Malik Isá Mosih re inkar goré. **5** Tuáñra iín beggún zano de óile yo, toóu añi ttu tuáñra re yaad goráidito monehoór de ki, Malike Boni Isráil ókkol ore Ijíf mulluk ottu basai aní baade, ítarar bútotu uitará re dóncó gorífelail zetará iman nú ané. **6** Aar ze fírista ókkole nizor hókumot or tokka zari nó raké bóлке nize tákito de sóiyi zaga eridifélaye, Alla ye híin ore ñoóñr kiyamot or din olla abadulabadi síyol lói andár ot bañdí raikké; (aiónios g126) **7** zendilla Sódóm edde Gomórah re edde cóor híin or atehańsór cóor ókkol ore raikké, kiyólla-hoilé híin óu fírista híin or dóilla zenákarit forigígoi edde niyom or ulða zenár fisá doijjil. Ítarar hálót óilde uitarár ekkán meésal zetará ofúrani ooin ot sáñza faibo. (aiónios g166) **8** Borabor héndilla, hé bedini ókkole yó ítarar cóppon or bazá dídi jisím ore nafak goré, honó hókumot ore no mane, aar kudurutdár ókkol or bodnam goré. **9** Montor uńsol tokkar fírista Maikele úddwa zeñtté Ibilíc lói Muúsar lac or baabute torkatorki diyé, yóggwa ye beizzotir sáañte ítare hosúr dí bolla hímmot nó goré, bóлке hoóil de, “Malike toré sáñza douk!” **10** Montor hé manúc ítara ziín no buzé híin or baabute bodnam goré, aar akkól sára januwar or dóilla ítara ziín buzé híine ítara re dóncó gorífele. **11** Ítarar uore afsús! Kiyólla-hoilé ítara Keéin or foñt doijje, aar nofá hásil gorí bolla bouli ítara Balame goijjíl de goltit nizoré gosáidiye; ítara Kórar dóilla ámana gorí dóncó óigiyoi. **12** Zeñtté ítara honó ñoor-córom

sára tuáñrar muhábbot or mela-cóbat córik ó, héñtte ítara óilde ót no faiya gúiñtar dóilla, aar siríf nizoré beh fale deh. Ítara boiyare urai loizagói de zór sára miyúlar dóilla, aar endilla gas ókkol or dóilla ziín ore gulagalar moósum ot úddwa gulagala no dóre de hétolla murí ttu háñrifela zah, híin dui mikká ttu mora. **13** Ítara doijjar tuwáni goir or dóilla, kiyólla-hoilé fénar dóilla ítarar córomi ham ókkol báci uré. Ítara gúrafíra goré de tara ókkol or dóilla, zetará lla ebbe guñguíñta andár hámica lla raká gíyeh. (aión g165) **14** Ítarar baabute Adom zai háñt nombór or nosól or manúc Idirise endilla agun hotá hoiyé, ki hoilé, “Soó, Malik Nizor ázar-ázar pak fírista ókkol lói aiyér, **15** beggún or bisar goittó. Íba ye tamám bedini ókkol ore ítara bedinir sáañte zedún bedini ham ókkol goijjé híin or edde hé bedini gunágar ókkole íbar ulða zedún doró-doró hotá ókkol hoiyé híin beggún or hosúrbon elan goríbo.” **16** Manúc ítara hámica monmona edde ñék feñra, aar nizor bura azzu mozin sole. Ítara nizor baabute borái goré, aar nofá hásil gorí bolla maincóre tulá déh. **17** Lekin, ó adorja ókkol, Malik Isá Mosihr sáhabi gúne ziín hoói gíyeh híin yaad raikkó, **18** ítara tuáñra re hoóil de, “Ahéri zobatan tooñcábazi-goróya ókkol aibó, zetará nizor bedini azzu mozin solibó.” **19** Ítara óilde uitará zetará faáta-faáti foida goré; ítara duniyaibi kíyale beh sole, aar ítara ttu Pak-Ruh náí. **20** Montor, ó adorja ókkol, tuáñra ttu asé de hé ebbe pak iman or uore nizoré banaituló, Pak-Ruhr hédaiyote dua goró, **21** nizoré Allar muhábbot ot zari rakó, ofúrani zindigi fai bolla añárar Malik Isá Mosihr meérbaniir entezar ot táko. (aiónios g166) **22** Zetará ttu cók-cubá asé ítarar uore rahám goijjó; **23** oinno zon ore ooin ottu ñani basaifélayo; aar zetarár zindigi hońsara óigiyoi, ítarar nafak hoor ore úddwa nafórot gorí uńciyarir sáañte ítarar uore rahám goijjó. **24** Zibá ye tuáñra re uját há ttu basai fare aar Nizor mohímar cáikkat honó dak sára ñoóñr kúciir sáañte tíyagarai fare, **25** hé lehár Alla añárar Basailoyar mohíma, ñoóñrgiri, raastri edde kémota Isá Mosih añárar Malik or duara hárr zobanar age yó accíl, ehón óu asé, aar abadulabad óu zari tákouk. Aamin. (aión g165)

Zahéri

1 Ín óilde Isá Mosih ye goijjé de zahéri ókkol, zín Alla ye íba re etollá zanaíyé, zeéne zín bicí hára hámaha fura óibar asé híin íba ye Nizor gulam ókkol ore dahá. Hétolla Isá ye Nizor fírista diferái Nizor gulam Yohánnar hañse iín zahér goijjé. **2** Yohánna ye Allar kalam or edde Isá Mosihr gobár baabute zín-zín deikkíl híin beggún or baabute gobá díye. **3** Mubarek ubá zee niki e poigam iín telawot goré, aar uitará yó mubarek zetará iín fúne edde eře zín leikká asé híin amól goré, kiyólla-hoilé iín fura óibar októ toh dake. **4** E ceñrí gán ań Yohánnar torfóttu, Ecíya elakat ze hánt twa zomát asé híin or hañse lekír: Tuáñrar uore rahámot edde cánti nazil óuk, Ubár torfóttu zibá asé, zibá accíl, edde zibá aibár asé; hánt ruh uúin or torfóttu yó, zín íbar toktór muuntu asé; **5** héndilla, Isá Mosihr torfóttu yó, zibá óilde biccácdar gobá, zibá mora ókkol ottu zinda óiye de foóila zon, zibá duniyair baáñcca ókkol or hókumot-goróya. Íba zibá ye niki ańára re muhábbot goré, zibá ye Nizor lou wé ańára re ańárar guná ttu azad goijjé, **6** zibá ye ańára re lói ekkán raijjo banaíyé aar ańára re íbar Alla edde Baf or ham olla imam banaíyé, íbar mohíma edde raastri abadulabad hámica zari tákouk. Aamin. (aĩon g165) **7** Soó, íba miyúlar bútoře góri aiyér; hárr suké íba re dekibo, uitará úddwa zetará íba re gañittíl. Duniyair tamám koum ókkole íba re dekí ferecani zahér goríbo. Héndilla óuk. Aamin. **8** Mabud Alla ye endilla fórmár, “Ańí óilam de Alfa edde Omíga, Ubá zibá asé, zibá accíl, edde zibá aibár asé, yáni hárr Kudurutwala wa.” **9** Ańí óilam de Yohánna, zibá tuáñrar báí, aar Isár ummot ísafe mosibot ot, raijot, edde sobór ot tuáñrar sáañti, zibá re Allar kalam tobolik gorár zoriya edde Isár baabute gobá diyar zoriya Pátmos hoó de díyat raká gýl. **10** Malik or díin ek rooibare ańí Pak-Ruhr kobzat accílám, aar ańr fisór ttu cíañr abas or dóilla éggwa doóñr abas fúinni, **11** eén hoór de, “Tui zín dekór híin eggwá kitab ot lek, baade yíba re háñto wa zomát ot diferá, yáni ífisas ot, Semúrnat, Pírgamun ot, Tuatírat, Sárdís ot, Filadífiyat, edde Laudíkíyat.” **12** Hétunot, zibá ye ańr lói hotá hoór íba re sai bolla ańí muu fíraiye. Aar fíjji rár cúnar hánt tan serak-or-boiřóni deikkí; **13** hé boiřóni gún or mazéhale moniccór dóilla

honnwággwa asé, zibár téng or gurat foijjonto lamba zubba findá aar sínat máze cúnar ekkán faţti baindá. **14** Íbar matár sul lun bérasóol or keñc or dóilla dóla, yáni boróf or dóilla fúut dóla; aar íbar suk kún ooin or zilhar dóilla. **15** Íbar téng or fata gún guţguítta ooin or foin ot furat di sáf goijjá sosoikka fitol or dóilla, aar íbar abas bicí fanír holholanir abas or dóilla. **16** Íba ye Nizor den áte hánt twa tara dóri táikke, aar íbar gal ottu ekkán dui-dárja dár toluwar neeliaiccé. Íbar siyára fura teze zoler de beil or dóilla. **17** Íba re dekí ańí mora manúc or dóilla íbar foot forigiyígoi. Hétunot íba ye íbar den át ańr uore di hoór de, “No doorac; Ańí Awal edde Akér. **18** Ańí óilam de Zindawa; Ańí morigílamboi, yala saá, Ańí abadulabad foijjonto zinda así. Moot or edde fatalfur or zagar sabí Ańr át ot asé. (aĩon g165, Hadēs g86) **19** Hétolla zín deikkós, zín yala ór, edde zín iín baade óibo de asé, híin beggún lekífela. **20** Tui ze hánt twa tara Ańr den át ot deikkós híin or edde cúnar hánt tan serak-or-boiřóni gún or gufoni óilde endilla: hánt twa tara óilde hánt twa zomát or fírista gún, aar hánt tan serak-or-boiřóni óilde hánt twa zomát tun.

2 “Ífisas cóor or zomát or fíristar hañse endilla lek: Zibá ye Nizor den áte hánt twa tara dóri táke, zibá ye cúnar hánt tan serak-or-boiřóni gún or mazéhale solafíra goré, íba ye iín hoór: **2** Ańí tor ham, tor meénnot edde tor sobór or baabute zani. Ańí yían óu zani de ki, tui hóraf manúc ókkol ore bordac gorí no faros aar zetará nizoré nize sáhabi bouli dabi goré, háleke ítara sáhabi no, tui ítara re tahákit goijjós aar ítara misá de loot faiyós; **3** tor ttu sobór asé, aar tui Ańr nam or wasté duk bordac gorát óran nó ós. **4** Montor Ańr ttu tor ulđa yían hoibár asé de ki, tui tor foóila muhábbot ore bad difélaiyos. **5** Hétolla, báfi saa tui hoddúr ottu forigiyósgoi. Touwá gor, aar ham uúin gor zín age goijjili; arnóile zodi tui touwá no gorós, Ańí aái yore tor serak-or-boiřóni gán híyan or zaga ttu larifelaiyum. **6** Montor tor ttu yían asé: tui Nikolatiól or ham ókkol ore nafórot gorós, zín Ańí yó nafórot gorí. **7** Zar ttu fúnibar han asé íte fúno, Pak-Ruh ye zomát ókkol ore kii hoór deh. Zee niki ziti aiyé, Ańí ítare zindigi gas or gula háito díyum, zibá Allar jonnotul-férodus ot asé. **8** “Semúrna cóor or zomát or fíristar hañse endilla lek: Zibá Awal edde Akér, zibá morigílgoi

aar zinda óiye, Íba ye iín hoór: **9** Añí tor mosibot ókól ore edde tor gorifi hálot ore zani, montor becók tui ruúhanir tuangor. Añí uitarár kuféri re yó zani zetará nizoré nize Yohúdi hoói dabi goré, háleke ítara Yohúdi no, bólke Cóitan or éggwa dol. **10** Tui ze duk ókól faibar asé híin ore no ðooraic. Fún, Íbilíce toré entán gorí bolla tor kessú maincóre ziyól ot díbo de asé, aar tui doc din fán duk faibi. Moot foijjonto imandari tákic, tói Añí toré tas ísafe zindigi diiyum. **11** Zar ttu fúnibar han asé íte fúno, Pak-Ruh ye zomát ókól ore kii hoór deh. Zee niki ziti aibó, ítare dusárabar or moote hótí no goríbo. **12** “Pirgamun cóor or zomát or fíristar hañse endilla lek: Zibá ttu dui-dárja dár toluwar asé, Íba ye iín hoór: **13** Añí zani tui hoře tákos, tui uré tákos zeré Cóitan or toktó asé; montor toóu tui Añr nam ore dorógori dóri táikkos, aar ze din ókól ot Añr biccácdar gobá Entipas ore Cóitan táke de zagat tuáñrar muúntu kotól gorá gíyeh, hé din ókól ot úddwa tui Añr uore iman raká eri nó dos. **14** Lekin Añr ttu tor ulða hookkán asé: Tor hére endilla kessú manúc asé zetará Balam or taalime sole, zibá ye Balak ore cíkai díyl de, Boni Isráil ókól ore gunát forabai bolla, yáni muttir hañse kurbani diya hána ókól hábai bolla edde zená gorá bay bolla. **15** Borabor héndilla, tor hére endilla yó kessú manúc asé zetará Nikolatiól or taalime sole. **16** Hétolla touwá gor; arnoíle Añí toratori tor hére aiccúm, aar Añr gal or toluwar loi ítara llói larái goijjúm. **17** Zar ttu fúnibar han asé íte fúno, Pak-Ruh ye zomát ókól ore kii hoór deh. Zee niki ziti aiyé, Añí ítare lukai raikká kessú manná diiyum. Añí ítare eggwá dóla fattór óu diiyum, ze fattór gwar uore noya ekkán nam leikká asé, ziyán zee niki yíba faiyé íte bade ar honókiye no zane. **18** “Tuatíra cóor or zomát or fíristar hañse endilla lek: Allar Fua, zibá ttu ooin or zilhar dóilla suk asé, zibár téng or fata sosoikka fitol or dóilla, Íba ye iín hoór: **19** Añí tor ham, tor muhábbot, iman, hédmot edde tor sobór or baabute zani. Añí aró zani de ki, tor yalar ham age goittí de híin or túaro bicí. **20** Montor Añr ttu tor ulða yíán asé: Tui mayafua Jezabel ore ham goittó dos, zibá ye nizoré nize eggwá ambiya hoó, hétolla híba ye nizor taalim loi Añr gulam ókól ore sóiyi ttu duré gorífeler, zeéne ítara zená góre edde muttir hañse kurbani diya hána ókól háa. **21** Añí híba re híbar zenákari ttu touwá goríbar mouka díflam, montor híba

ye touwá goittó nó saá. **22** Saá, Añí híba re biyaram or bisánat félaiyum, aar zetará híba llói zená goré ítara re ðoóñr mosibot ot félaiyum, zodi ítara híbar hé ham ottu touwá no goré. **23** Añí híbar fuain dore zane marifélaiyum, baade tamám zomát ókkole zanibó de, Añí óilam de Ubá zibá ye díl edde mon ókól ore zasai gorí saá. Añí tuáñra fottíkiyo re nizor-nizor ham mozin bodola diiyum. **24** Montor Tuatíra cóor or baki manúc tuáñra zetará híbar taalime no solo, zetará ttu Cóitan or mur taalim or zana náí, Añí tuáñra re hoóir, Añí tuáñrar uore oinno honó fuñzá no diiyum. **25** Montor tuáñra ttu zíin asé, híin Añí nú aiyí foijjonto mozbut gori dóri rakó. **26** Zee niki ziti aiyé aar Añr ham ókól ahéri foijjonto goré, Añí ítare koum ókól or uore adíkar diiyum; **27** aar íte luwár loří lói ítatar uore hókumot goríbo, aar kuáñijjar meitça fatila ókól or dóilla ítara re ańsár mári gurigara gorífelaibo, zendilla goríbar adíkar Añí yó Añr Baf or torfóttu faiyí; **28** Añí ítare bínnar sút-tara yó diiyum. **29** Zar ttu fúnibar han asé íte fúno, Pak-Ruh ye zomát ókól ore kii hoór deh.

3 “Sárdis cóor or zomát or fíristar hañse endilla lek: Zibá ttu Allar háñt twa ruh edde háñt twa tara uúin asé, Íba ye iín hoór: Añí tor ham ókól zani, tui zinda asós bóuli nam asé montor tui toh mora. **2** Úñciyar ták, aar badbaki zíin asé aar moron-moron óiye híin ore mozbut gor, kiyólla-hoilé Añí tor ham ókól ore Añr Allar muúntu ofura loot faiyí. **3** Hétolla tui ze taalim faiyós edde fúinnos híin ore monot gor; híin ore mozbut gori dór aar touwá gorífela. Montor zodi tui úñciyar no ós, Añí sur aiyé fángori aiccúm, aar hon októ Añí tor hére aiccúm híyan tui no zanibí. **4** Montor Sárdis cóor ot máze tor hoozzon endilla manúc asé zetará nizor hoor ore hońsara nó goré. Ítara dóla fucák fińdí Añr fúańti solafíra goríbo, kiyólla-hoilé ítara híyan or laayek. **5** Zee niki ziti aiyé ítare yó héndilla góri dóla fucák fińdá zaybo; aar Añí ítar nam ore zindigir-kitab ottu no búzaiyum, bólke Añr Baf or muúntu edde Íbar fírista ókól or muúntu ítar hé nam cíkar goijjúm. **6** Zar ttu fúnibar han asé íte fúno, Pak-Ruh ye zomát ókól ore kii hoór deh. **7** “Filadílfíya cóor or zomát or fíristar hañse endilla lek: Zibá pak edde sóiyi, zibá ttu Dawud or sabí asé, zibá ye kúlile honókiye bon gorí no fare, aar bon

goillé honókiye kúli no fare, íba ye iín hoór: **8** Añí tor ham ókkol zani. Saá, Añí tor muúntu ekkán kúla dorozza raikkí ziyán ore honókiye bon gorí no fare. Añí zani tor ttu bicí hom taakot asé, toóu tui Añr hotá amól goijjós edde Añr nam ore inkar nó gorós. **9** Saá, Cóitan or dol or manúc zetará nizoré nize Yohúdi hoóí dabi goré, háleke ítara Yohúdi no bólke misákur ókkol, Añí ítara re tor hére aábai tor foot sóida fora baiyúm, aar ítara re zanaidiyum de, Añí toré muhábbot gorí. **10** Kiyólla-hoilé tui zettót Añr sobór or hókum amól goijjós, Añí yó toré mosibot or októót héfazot raikkúm, ze októ duniyair bácinnda ókkol ore entán gorí bolla fura duniyait aibár asé. **11** Añí hára aiyír; tor ttu zíín asé híin ore mozbut gori dóri rak, zeéne tor tas honókiye looi no fele. **12** Zee niki ziti aiyé, Añí ítare Añr Allar gór or éggwa túni banaiyúm, aar íte héntu ar honódin baáre no zaibo. Añí ítár uore lekíyum Añr Allar nam, Añr Allar cóor or nam, yáni noya Jerúsalem waán or nam ziyán Añr Allar héntu asman ottu nise aibár asé; ítár uore Añr noya nam óu lekíyum. **13** Zar ttu fúnibar han asé íte fúno, Pak-Ruh ye zomát ókkol ore kii hoór deh. **14** “Laudíkiya cóor or zomát or fíristar hañse endilla lek: Zibá Aamin, zibá biccácdar edde sóiyi-sóiyi Gobádoya, zibá Allar foidayecir Guijja, Íba ye iín hoór, **15** Añí tor ham ókkol zani, ki hoilé, tui no tándá aar no gorom. Tui noóile tándá óiti arnoóile gorom óiti gom óito. **16** Tui zettót mazéhale, yáni no gorom aar no tándá, Añí toré Añr gal ottu ooli diyum. **17** Tui hoós de, “Añí tuangor, aar dóni óigiyigoi, añí honó kessúr muútac no.” Montor tui no zanos de ki, tui bodnosíf ola, dukkíta, gorif, ańdá edde biyossor. **18** Hétolla, Añí toré mocuwara dir, tui Añr ttu ooin ot zálai goijjá háti cúna kin, zeéne tui tuangor ói faros; fińdí bolla dóla fucák kin, zeéne tor biyossor córom ore gúri rakí faros; suk ot lagai bolla cúrma kin, zeéne tui deki faros. **19** Añí zetará re muhábbot gorí, ítárar golti dahái dí torbiyot gorí. Hétolla jusola ó edde touwá gor. **20** Saá, Añí dorozat tíyai dorozza baijjair, zodi honókiye Añr abas fúni dorozza kúlíde, Añí bútoe ítár hére aiccúm edde ítár fúańti hána háiyum, aar íte Añr fúańti hána háibo. **21** Zee niki ziti aiyé, ítare Añí Añr fúańti Añr toktót boibár hók diyum, zendilla Añí yó ziti aái Añr Baf or fúańti Íbar toktót boicci. **22** “Zar ttu fúnibar han asé íte fúno, Pak-Ruh ye zomát ókkol ore kii hoór deh.”

4 Híin baade añí saái deikkí de, asman ot ekkán dorozza kúla; aar age añí cíańr abas or dóilla góri ańré hoór de zibár abas fúinnilam Íba ye hoór de, “Ere uore ai, Añí toré daháiyum iín baade kii óibar zorur.” **2** Éhon or bútoe añí Pak-Ruhr kobzat óigiyigoi, aar deikkí de, asman ot ekkán toktó asé, aar hé toktór uore honnwággwa boirá. **3** Zibá hére boirá asé Íbar súrot jaspár johár edde sardiyaş johár or dóilla sosoikka; hére toktó gán or sairókul ttu ekkán dónu asé, ziyán emerald johár or dóilla sosoikka. **4** Hé toktór sairókul ttu ekkuri sair gán toktó asé. Añí deikkí de, hé toktó gún or uore dóla fucák findá ekkuri sair zon murubbi-neta boirá asé, aar ítárar matát cúnar tas asé. **5** Toktó gán ottu bijilir córok, dóor lage de abas, edde táral foribár mat ókkol aicce. Aar hé toktór muúntu ooin or háńt tan serak zolat asé, zíín óilde Allar háńt ruh. **6** Aró, toktó gán or muúntu aainar doişşar dóilla kessú asé, ziyán fórik or dóilla sáf. Toktó gán or mazéhale edde sairókul ttu sair gwá zandár asé, híin or muúm edde fis suké bóraiya. **7** Foóila zandár gwá cinggor dóilla, dusára zandár gwá gorur-sóor dóilla, tisára zandár gwá ttu insán or dóilla siyára asé, aar sair nombór or zandár gwá ure de sil or dóilla. **8** Hé sairó wa zandár fottí ekgwá ttu sów wan or dóre fak asé, aar híin or sairókul ttu edde bútoe suké bóraiya; ítara dine raite no zirai howát táke de, **9** Zeńtté-zeńtté hé zandár gúne zibá toktór uore boirá asé, zibá abadulabad hámica zinda asé, Íbar mohíma, izzot edde cúkur goré, (aĩŋ g165) **10** héńtte ekkuri sair zon murubbi-neta gúne zibá toktór uore boirá asé Íbar muúntu sóida fore, aar héndilla góri ítara zibá abadulabad hámica zinda asé Íbar ebaadot goré; ítara nizor tas ókkol toktó gán or muúntu rakí hoó de, (aĩŋ g165) **11** “Ó añárar Malik añárar Alla, Tuńi mohíma, izzot edde kudurut or laayek, kiyólla-hoilé hárr kessú toh Tuńi foida goijjó deh, aar híin Tuńi moncáye beh tiki asé edde foida óoil.”

5 Zibá toktó gán or uore boirá asé Íbar den át ot añí éggwa kitab deikkí, zibár bútoe-baáre kessú leikká asé, zibá háńt twa moór lói moór lagaiya. **2** Baade añí éggwa taakotwala fírista deikkí zibá ye doóńr abase elan gorér de, “Hé moór gún kúlifelai kitab pwá kúlibar laayek honókiye asó né?” **3** Montor asman ot yáh zobin ot yáh fatalfur ot endilla honókiyo re faa nó

zah, zee niki kitab pwá kúlibar yáh yíbar búture saibár kaabel. 4 Hétunot ańı bıcı hańdat doijji, kiyólla-hoilé hé kitab pwá kúlibar yáh yíbar búture saibár laayek honókiyo re faa nó zah. 5 Montor murubbi-neta gún ottu ekzone ańre hoór de, “No hańdiyó; soó, Yohúdahr háandan or ze Cínggo asé, zibá Dawud or Cíńyor, íba zitigiyói; íba kitab pwá kúlibar edde yíbar hánt twa moór gún bāńgífelaibár kaabel.” 6 Baade ańı deikkı de, toktó gán or sairó wa zandár or edde murubbi-neta gún or mazéhale eggwá Bérásóol-or-Sóo tíyayi, zibá re saité zooráifela gíyeh fán. íba ttu hánt tan cıng edde hánt twa suk asé; suk híın óilde Allar hánt twa ruh uúın zıín ore fura duniyait difeřá gíyeh. 7 íba aái yore, zibá toktór uore boırá asé íbar den át ottu kitab pwá loiyé. 8 íba ye kitab pwá looi baade, sairó wa zandáre edde ekkuri sair zon murubbi-neta gúne hé Bérásóol-or-Sóor war muúntu sóida foijjé; ítara fottıkiyor át ot ekgwá-ekgwá bina edde agórbatti lói bóraiya cúnar fiyala asé, zıín óilde Allar pak bonda ókkol or dua. 9 ítara eggwá noya seér gaiyé, hondilla hoilé, “Tuńı kitab pwá loibar edde yíbar moór gún kúlifelaibar laayek; kiyólla-hoilé Tuńıre toh zooráifela gıyl, aar Tuńı Nizor lou loi hárr háandan ottu, hárr zuban ottu, hárr koum ottu edde hárr dec ottu Alla lla manúc ókkol kinnó. 10 Tuńı ítara re lói ekkán raijjo banaiyó, aar ańárar Allar ham olla ítara re imam banaiyó; ítara duniyait hókumot gorıbo.” 11 Tarfore ańı abar saiyı rúr, hé toktó gán ore, zandár gún ore edde murubbi-neta gún ore gırıdoijja boóut fırista ókkol or abas fúınni, zıín or gona lak-lak, edde kuťı-kuťı; 12 híıne eggwá doóńr abase howát asé de, “Ze Bérásóol-or-Sóo wa re zooráifela gıyl, íba kémota, dón-doulot, giyan, taakot, izzot, mohıma, edde taarif or laayek.” 13 Tarfore ańı fúınni de, asman ot, zobin ot, fatalfur ot, edde doriyat zedún mohóluk ókkol asé, yáni híın or búture zıín asé híın beggúne eén hoór, “Zibá hé toktór uore boırá asé íbar edde Bérásóol-or-Sóo war taarif, izzot, mohıma edde raastri abadulabad hámica zari tákouk.” (aión g165) 14 Tói sairó wa zandáre “aamin” hoiyé, aar murubbi-neta gúne uúıńtoi fori sóida goijjé.

6 Baade ańı deikkı de, Bérásóol-or-Sóo wa ye hánt twa moór ottu ekgwá moór kúille, hétunot sairó zandár ottu ekgwá ye țáral or mat or dóilla góri eén hoór de fúınni, “Ai.”

2 Ańı saái deikkı de, eggwá dóla gúra, yíbar uore zibá boırá asé íba ttu eggwa tir-hánda asé; íba re eggwa tas diiya gíyéh, aar íba fóta gorı-gorı aró fóta goittó rowana loiyé. 3 Bérásóol-or-Sóo wa ye zeńtté dusára moór gwá kúille, hétunot dusára zandár gwá ye eén hoór de fúınni, “Ai.” 4 Ebarot ar eggwá gúra neeillé, zibá ooin or dóilla lal. Yíbar uore zee boırá asé ítare duniyai ttu cánti loifélaibar kémota diiya gíyéh, zeéne manúc ókkole ezzon ore ezzone mariféla. ítare ekkán doóńr toluwar óu diiya gíyéh. 5 Bérásóol-or-Sóo wa ye zeńtté tisára moór gwá kúille, hétunot tisára zandár gwá ye eén hoór de fúınni, “Ai.” Tói ańı saái deikkı de, eggwá hala gúra, yíbar uore zibá boırá asé íbar át ot ekkán falda asé. 6 Baade ańı sairó zandár or mazór ttu endilla mikká eggwa abas fúınni, “Ek cér giyuńr dam ek dinár, aar tin cér barlır dam ek dinár; montor tel lun edde anggur or roc cún lussán no goijjó.” 7 Bérásóol-or-Sóo wa ye zeńtté sair nombór or moór gwá kúille, hétunot sair nombór or zandár gwá ye eén hoór de fúınni, “Ai.” 8 Tói ańı saái deikkı de, eggwá dúucca roingga gúra, yíbar uore zibá boırá asé íbar nam óilde Moot; fatalfur íbar kure-kure zaat accıl. ítara re duniyair sair bák or ek bák or uore adıkar diiya gíyéh, manúc ókkol ore toluwar, rať, afot edde duniyair jonggoli januwar ókkol lói zane marifélaı bolla. (Hadēs g86) 9 Bérásóol-or-Sóo wa ye zeńtté fańs nombór or moór gwá kúille, hétunot ańı kurbani-gáńr nise uıtarár ruh deikkı zetará re Allar kalam or zoriya edde ze gobá ítara zari raikkıl híyan or zoriya mariféla gıyl; 10 ítara doóńr abase guzori hoór de, “Ó pak edde sóiyi Mabud, Tuńı hotódin foijjonto duniyair bácında ókkol ottu bisar gorı ańárar lou wór bodola no loiba?” 11 Hétunot ítara fottıkiyo re ekgwá-ekgwá dóla zubba diiya gíyéh; aar ítara re howá gíyeh de, aró hotókkal dommari bolla, zetún foijjonto ítarař sáańti gulam edde imandár báiboináın zedún ore ítarař dóilla marifélaibar asé, ítara re mariféla nó zah. 12 Ańı deikkı de, Bérásóol-or-Sóo wa ye zeńtté sów nombór or moór gwá kúille, hétunot eggwá doóńr búsal óiye, aar beil lan keńc loi banaiya sálarcoť or dóilla hala óigiyoi, aar guńra san lou wór dóilla óigiyoi; 13 asman or tara ókkol zobin ot forigiyói, zendilla tez boiyar bailé duńır-gas ottu keeńsa duńır gula ókkol zórizagoi. 14 Asman bák ói boıťta habos or dóilla góri bořigiyói; aar hárr faár

edde ñiya nizer-nizer zaga ttu lorigiyói. **15** Aar duniyair bañicca, ñoñir manúc, zonnal, ñóni, boluwar, hárr gulam edde begulam ókkol faár or gañte-gañte edde cíl ókkol or argwale-argwale luki táikke; **16** aar ítara faár gún ore edde cíl lun ore hoór de, “Añárar uore foro, zibá toktór uore boirá asé Íbar nozor ottu edde Bérásóol-or-Sóo war gozzob ottu añára re lukaifélo, **17** kiyólla-hoilé Ítarar gozzob nazil goríbar ñoñir ñin aáigiyoí, yala ar ñiki táki faribár hon asé?”

7 Yárbaade añi deikkí de, duniyair sair kunat sair gwá fírista tíyayi, zíine sairó kunar boiyar ore támai raikké, zeéne zobin ot, ñojjat yáh honó gas ot boiyar no baá. **2** Hétunot añi ar eggwá fírista deikkí, zibá fuk mikká ttu uormikká urí aiyér, zibár hañse zinda Allar moór maroni asé. Ze sair gwá fírista re zobin edde ñojja re hótí goríbar kémota díiya gíyéh, híin ore íba ye ñoñir abase guzori-guzori **3** hoór de, “Zobin, ñojja yáh gasgusála ókkol ore otókkal hótí no gojjó, zetókkal añára añárar Allar gulam ókkol ore Ítarar kuwal ot moór nó mari.” **4** Baade añi fúinni de, zetará re moór mara gíyéh ítara muñmañ ek lak salic sair ázar zon, zetará óilde Boni Ísráil or fottí háandan ottu: **5** Yohúdahr háandan ottu moór mara gíyéh de baró ázar ore, héndilla Ruben or háandan ottu baró ázar ore, Gad or háandan ottu baró ázar ore. **6** Acer or háandan ottu baró ázar ore, Naftalir háandan ottu baró ázar ore, Manasér háandan ottu baró ázar ore. **7** Símiyon or háandan ottu baró ázar ore, Leévir háandan ottu baró ázar ore, Yissákar or háandan ottu baró ázar ore. **8** Zebulun or háandan ottu baró ázar ore, Yusúf or háandan ottu baró ázar ore, Binyamin or háandan ottu baró ázar ore, moór mara gíyéh. **9** Híin baade añi saái deikkí de, ñoñir ek dol manúc, zibá re honókiye goni kul gorí no fare; yíbat hárr dec or, hárr háandan or, hárr koum or edde hárr zuban or manúc asé, zetará dóla zubba findí edde át ot házu ñaggwa ókkol looi toktó gán or muúntu edde Bérásóol-or-Sóo war muúntu tíyai táikke; **10** aar ítara ñoñir abase guzori-guzori hoór de, “Nejat asé de óilde toktór uore boirá asé de añárar hé Allar hañse edde Bérásóol-or-Sóo war hañse.” **11** Tamám fírista ókkol toktó gán ore, murubbi-neta gún ore, edde sairó zandár ore gíri tíyai asé; aar híine toktó gán or muúntu uúññtoi fori Alla re sóida gojjé, **12** endilla hoói, “Aamin. Taarif,

mohíma, giyan, cúkurana, izzot, kémota edde taakot abadulabad hámica añárar Allar ówat tákouk. Aamin.” (aíñ g165) **13** Baade murubbi-neta gún ottu ekzone añiré hoór de, “Dóla zubba findá manúc iín hontará? Ítará hontú aiccé dé?” **14** Añi yóggwa re hoiyí de, “Jonab, híyan toh tuñi éna zano.” Hétunot yóggwa ye añiré hoiyé de, “Ítará óilde uitará zetará ñoñir mosibot ottu neeliaicché; ítará nizer zubba re Bérásóol-or-Sóo war lou loi dúifelai dóla gojjé. **15** Hétolla toh ítará Allar toktór muúntu asé; ítará ñine raite Íbar ebaadot-hánat Íbar hédmot goré. Zibá toktó gán or uore boirá asé, íba ye ítará re Nizer házirí lói sáhara díbo. **16** Tói ítará ttu ar búk no lagibó, ar tirác no lagibó; ítarár gaat no beil or tez foribó, aar no ítará re honó gorome faibo, **17** kiyólla-hoilé toktó gán or mazéhale asé de Bérásóol-or-Sóo wa ítarár soroya óibo, aar ítará re zindigi ñee de fanír zónnar híkka loizaybó. Aar Alla ye ítarár suk ottu hárr suk or faní fuñsidíbo.”

8 Bérásóol-or-Sóo wa ye zeñtté háñt nombór or moór gwá kúille, hétunot asman ot tokoriban adá gónña ánik nízám accíl. **2** Aar añi ze háñt twa fírista Allar muúntu tíyai táke híin deikkí; híin ore háñt twa cíañ díiya gíyéh. **3** Yárbaade ar eggwá fírista aái kurbaní-gañr hañse tíyaye, zibá ttu cúnar agórbattir-ñani asé; íba re bicí agórbatti ókkol díiya gíyéh, zeéne íba ye Allar tamám pak bonda ókkol or ñuar fúañti híin ore toktó gán or muúntu asé de cúnar kurbaní-gañr uore peec gorí fare. **4** Aar hé agórbattir dúañ gún fírista war át ottu Allar pak bonda ókkol or ñuar fúañti Allar muúntu foónicce. **5** Tarfore fírista wa ye agórbattir-ñani gán looi yore kurbaní-gañr ooin loi furaiyé, baade zobin ot félaidiye; tói hére țáral or mat edde ñoor lage de abas ókkol fúna gíyeh, aar bijilir córok ókkol edde búsal óiye. **6** Ze háñt twa fírista ttu háñt twa cíañ asé, ítara híin matai bolla toiyar óigiyoí. **7** Foóila fírista wa ye cíañ mataiyé rár, lou miyáilla cíl-boróf edde ooin ókkol foida óiye, aar híin ore duniyait félaidiya gíyeh; tói duniyai yó tin bák or ek bák zoligiyoí, gasgusála ókkol óu tin bák or ek bák zoligiyoí, aar áil kérkuñra ókkol óu beggún zoligiyoí. **8** Dusára fírista wa ye cíañ mataiyé rár, ooin zoler de eggwá ñoñir faár or ñóilla kessú re ñojjat félaidiya gíyeh; tói ñojja tin bák or ek bák lou bonigiyoí, **9** ñojjar tin bák or ek bák zandár morigiyoí, aar tin bák

or ek bák zaáns nac óigiyoi. **10** Tisára fírista wa ye cíañ mataiyé rár, uzal or dóilla zolat accíl de eggwá dōóñr tara asman ottu zóri tin bák or ek bák hál ókkol ot edde fanír zónna ókkol ot forigiyói. **11** Hé tara war nam óilde, “Zohór Tita.” Yíba fori tin bák or ek bák faní zohór tita óigiyoi, aar hé fanír titaye boóut manúc morigiyói. **12** Sair nombór or fírista wa ye cíañ mataiyé rár, beil or tin bák or ek báke, san or tin bák or ek báke, tara ókkol or tin bák or ek báke eén zohóm faiyé, zeén níki híin or tin bák or ek bák andár óigiyoi. Din or tin bák or ek bák foór sára accíl, héndilla rait or tin bák or ek bák óu. **13** Saité-saité, ańí éggwa sile uore asman ot uri-uri dōóñr-dōóñr guzori eén hoór de fúinni, “Ze tin nwá fíristar cíañ matibár baki táigiyoi híin olla duniyair bácinde ókkol or uore afsús, afsús, afsús.”

9 Fańs nombór or fírista wa ye cíañ mataiyé rár, ańí asman ottu duniyait forigiyói de eggwá tara deikkí; oťái gańt or sabí wa hé tara wa re diiya gíyéh. (*Abyssos g12*) **2** Íba ye zeńtté oťái gańt twa kúille, tói hé gańt ottu uore dúañ ókkol eén aiccé, zeén bor foin ottu dúañ ókkol aiyé; aar hé gańt or dúañye beil edde asman andár óigiyoi. (*Abyssos g12*) **3** Hé dúañ ttu fíring ókkol neeli duniyait aiccé, aar híin ore eén taakot diiya gíyéh ze taakot duniyair bissú ókkol ottu asé. **4** Híin ore howá gíyeh de, zobin or kérkuńra, honó sara yáh honó gas ore lussán no gorí bolla, bólke siríf manúc uitará re gorí bolla zetarár kuwal ot Allar moór náí. **5** Honókiyo re marifélaí bolla híin ore ezin diya nó zah, siríf fańs mac fán toziya di bolla beh diya gíyéh; híin or toziya endilla zendilla bissú ye cúm gólai dilé maincé duk faa. **6** Hé din ókkol ot maincé moot or talac goríbo montor no faibo; ítara ttu moitto bicí monehoibó montor moot ítara ttu dáizayboi. **7** Fíring híin or súrot endilla gúrar dóilla zín ore larái lla toiyar goijjá; híin or matát cúnar tas or dóilla kessú findá asé, aar híin or siyára insán or siyárar dóilla. **8** Híin ottu mayafuain dor dóilla sul asé, aar híin or dat tun cinggor dat or dóilla. **9** Híin ottu luwár zamar dóilla zama ókkol asé, aar híin or fak or abas ókkol laráit duńri zaa de bicí gúra ókkol or gúra-garír abas or dóilla. **10** Híin ottu bissúr dóilla les edde cúm asé, aar manúc ókkol ore fańs mac fán duk dibar taakot híin or les ot asé. **11** Híin or baáńcca óilde oťái gańt or fírista wa,

zibár nam Hibrú zuban ot Abaddon, aar Girík zuban ot Apoliyon. (*Abyssos g12*) **12** Foóila afsús or hálot toh óigiyoi; montor soó, híin baade aró duiyán afsús or hálot aibár asé. **13** Tarfore sów nombór or fírista wa ye cíañ mataiyé rár, ańí Allar muuntu asé de cúnar kurbani-gáńr sairó cing ottu ekgwá abas fúinni. **14** Abas swá ye cíañ ola sów nombór or fírista wa re hoór de, “Sairó fírista uúin ore hálás goride, zín bor hál Efurat ot bon asé.” **15** Tói hé sairó fírista zín ore e októ, e din, e mac edde e bosór olla toiyar gorí raká gýl, híin ore hálás gorídiya gíyeh, zeéne híine tin bák or ek bák insán mariféle. **16** Gúra-soloinna fóous ókkol or gona óilde kuri kuť; ańí híin or gona hodún de fúinni. **17** Ańr dorcón ot máze ańí gúra gún ore edde híin or uore soróinna ókkol ore endilla deikkí: soróinna gún or zama ooin or dóilla lal, nńla edde barus bana de gónđok or dóilla óloidda. Gúra gún or matá gún cinggor matár dóilla, aar híin or gal ottu ooin, dúañ edde gónđok neeliaiccé. **18** Híin or gal ottu ze ooin, dúañ, edde gónđok neeliaiccé, hé tiní afote tin bák or ek bák insán morigiyói. **19** Kiyólla-hoilé gúra gún or taakot óilde híin or gal ot edde les ot; kiyólla-hoilé híin or les sún matá ola háf or dóilla, zín lói híine hótí ókkol goré. **20** Badbaki manúc zetará re hé afote mariféla nó zah, ítara nizor át or banaiya jiníc ottu touwá gorí nó fele; ítara bút ókkol ore, edde cúnar, rufar, fitol or, fattór or, edde gas or banaiya mutti ókkol ore fuńza bon nó goré—mutti zínne no deki fare, no fúni fare, aar no ańri fare. **21** Héndilla, ítara kotólakotóli ttu, jadugari ttu, zenákari ttu, edde suri gorá ttu yó touwá gorí nó fele.

10 Tarfore ańí deikkí de, ar eggwá taakotwala fírista asman ottu lami aiyér, íba miyúla findá. Íbar matár uore dónu asé; íbar siyára beil or dóilla, aar íbar téng gún ooini túnir dóil. **2** Íbar át ot eggwá gura kitab asé zibá kúilla. Íba ye íbar den téng gán dorriyat raikké, aar ban téng gán zobin ot raikké; **3** baade íba ye endilla eggwá dōóñr guzoran maijé zendilla cinggo ye mare. Íba ye guzoran maijé rár, háńt twa țáral or mat fúna gíyeh. **4** Zeńtté háńt twa țáral or mat fúna gíyeh, ańí lekí bolla toiyar óiyi, montor asman ottu eggwá abas fúinni, eén hoór de, “Háńto wa țárale zín hoiyé híin ore gufon rak, híin ore no lekíc.” **5** Ze fírista re ańí doijjat edde zobin or uore tíyaiya deikkí, íba ye

nizor den át tan asman or uzu tuillé, **6** aar zibá abadulabad hámica zinda asé, zibá ye asman edde hére bútoze zín asé híin ore, zobin edde hére bútoze zín asé híin ore, doijja edde hére bútoze zín asé híin ore foida goijjé, Íbar hosóm hái hoór de, “Yala ar deri no óibo, (aíñ **g165**) **7** montor hánt nombór or fírista wa ye cíañ mataibó de din ókkol ot máze, Allar gufon niyot furafuri fura óizayboi, zendilla íba ye Nizor gulam nobi ókkol ore zanaáil.” **8** Tarfore, asman ottu ań zibá abas fúinnilam, íba ye abar ańré hoór de, “Zoo, zai oh kitab pwá loogói, zibá doijjat edde zobin or uore tíyaiya fírista war át ot kúilla asé.” **9** Hétunot ań fírista war hańse zai gura kitab pwá ańré dii bolla hoiyí. Íba ye ańré hoór de, “Yibá looi háifelo; yibá ye tuáńr feť ore tita gorífelaibo, montor tuáńr gal ot yibá re modúr dóilla miřa lagibó.” **10** Tói ań gura kitab pwá fíristar át ottu looi háifelaiyi; aar yíba re ań gal ot modúr dóilla miřa laiggé, montor gillí rár, ań feť tita óigiyoi. **11** Tarfore ańré howá gíyeh de, “Tuáńr ttu abar boóut koun, decóitta, zuban ola edde baáńcca ókkol or baabute kalam boiyan gorá foribó.”

11 Baade ańré súańr dóilla eggwá mafonir lorí diiya gíyeh, aar howá gíyeh de, “Zoo, Allar baitul-mukaddos ore edde kurbani-gań gán ore mafogói, aar hére ebaadot goré de ítara re gonogói. **2** Baitul-mukaddos or baáre ze urań asé híyan ore bad diyo; híyan ore no mafiyo, kiyólla-hoilé híyan oinno koun ókkol ore diífela gíyeh. Aar ítara pak cóor gán ore salic-dui mac fán únribo. **3** Ań ań dui zon gobá re eén kémota diyum, ítara sálarcoť fińdí yore baró cóo háitř din fán nobi ísafe Allar kalam boiyan goríbo.” **4** Ítara óilde oh duwá zaitun-gas edde oh duiyán serak-or-boiřóni, zín duniyair Malik or muńtu tíyaiya asé. **5** Honókiye ítara re hótí goríbar kucíc goillé, ítara muk ottu ooin neeli aái ítara hé ducon ókkol ore hálak gorífele. Zee niki ítara re hótí goríbar kucíc goré, ítar ttu héndilla góri mora fore. **6** Ítara ttu asman bon gorífelaibar kémota asé, zeéne ítara nobi ísafe Allar kalam boiyan goríbar din ókkol ot zór no déh; ítara ttu faní re lou banai felaibar, edde zobin ore zetóbar monehoó hétobar hárr dóilla afot di hótí goríbar óu kémota asé. **7** Zeńtté ítara ttu gobá díya fúraibo, héńtte oťái gańtt ottu neeliaibó de háyowane ítara llói larái goríbo, aar ítara re hárai marifélaibo. (Abyssos

g12) **8** Ítarar lac đoóńr cóor gán or rastat fori tákibo, ziyán or kítabi nam óilde Sódóm edde Ijíp, zeré ítara Malik ore yó kúruc ot dí mariféla gíyl. **9** Hárr koun or, háandan or, zuban or edde dec or manúc ókkole cáro tin din fán ítara lac saái tákibo, aar ítara lac hobor ot dito no dibo. **10** Duniyair bácinđa ókkole ítara moot or uore kúci goríbo, mela-cóba goríbo, ezzon or hańse ezzone hádiya ókkol foónsaibo, kiyólla-hoilé hé duní nobi ye duniyair bácinđa ítara re zalaáil. **11** Montor cáro tin din baade, ítara bútoze Allar torfóttu zan or niyác góille, aar ítara nizor tńenge tíyaiye. Zará ítara re saái táikke tará bicí đooraiyói. **12** Baade ítara duní zone asman ottu eggwá đoóńr abas fúinne, ítara re eén hoór de, “Eře uore aiyó.” Hétunot ítara miyúlar bútoze góri uore asman ot urígiyoi, héńtte ítara ducon ókkole ítara re saái accíl. **13** Hé októt hére eggwá đoóńr búsal óiye, aar hé cóor gán doc bák or ek bák forigiyói. Hé búsale háńt ázar manúc morigiyói, aar badbaki gúne đoorai asman or Allar mohíma gorát doijje. **14** Dusára afsús or hálót toh óigiyoi; montor soó, yala tisára afsús or hálót hára aiyér. **15** Baade zeńtté háńt nombór or fírista wa ye cíañ mataiyé, asman ot đoóńr-đoóńr abas ókkol aiccé, eén hoór de, “Yala toh duniyair raijjo ańárar Mabud or edde Íbar Mosihr raijjo óigiyoi; íba ye abadulabad hámica hókumot goríbo.” (aíñ **g165**) **16** Hétunot ekkuri sair zon murubbi-neta zetará Allar muńtu nizor-nizor toktór uore boiřá asé, ítara uúńtoi fori Alla re sóida goijjé, **17** eén hoói, “Ó Malik, hárr Kudurutwala Kúda, zibá asó edde zibá accíla, ańára Tuáńre cúkuriya gorír, kiyólla-hoilé Tuńí Tuáńr đoóńr taakot át ot looi hókumot gorá cúru goijjó. **18** Koum ókkol guccá óiye, aar Tuáńr gozzob nazil óiye. Októ aiccé mora ókkol or bisar goríbar, aar Tuáńr gulam nobi ókkol ore edde Tuáńr pak bonda đoóńr-cóńro zetará Tuáńr nam ore đooro, ítara re boccíc diibar, aar zetará duniyai re dónco goré ítara re dónco goríbar.” **19** Baade Allar ebaadot-hána ziyán asman ot asé híyan kúlagiye, aar Íbar razinamar sónduk Íbar ebaadot-hánat dahá gíyeh. Hétunot bijilir córok, đoor lage de abas, edde řáral or mat foida óiye, aar búsal óiye edde đoóńr-đoóńr cíl-boróf forar tuwán óiye.

12 Baade asman ot ekkán đoóńr nicán dahá gíyeh: eggwá mayafua beil findá, híbar

téng or tole san asé, aar matár uore baró wa tara ola eggwá tas asé. **2** Híba hámil, aar fua zormo dibar októ dukké guzorat accíl. **3** Tarfore asman ot arekkán nicán dahá gíyeh: eggwá ðoóñr lal nagá, yíba ttu háñt twa matá edde doc cán cing asé, aar yíbar matá gún ot háñt twa tas asé. **4** Yíbar lese asman or tin bák or ek bák tara ðani aní yore duniyait félaidiye. Hé nagá wa ze mayafua wa fua zormo doom-doom óiye híbar muúntu tíyai táikke, zeéne híba ye zormo dilé mottor híbar Fua wa re háifelai fare. **5** Mayafua wa ye eggwá morot Fua zormo diyé, zibá ye luwár lorí lói tamám koum ókkol or uore hókumot goríbo. Híbar hé Fua wa re súlan mari Allar edde Íbar toktór hañse aná gíyeh. **6** Tarfore mayafua wa moidan zagat dáigiye goi, zeré Alla ye híba lla ekkán zaga toiyar gorí raikké, zeéne hére híba re baró có háñt din fán fala zah. **7** Baade asman ot larái óiye: Maikele edde yóggwar fírista ókkole nagá llói larái goijjé; aar nagá edde yíbar fírista ókkole yó híin lói larái goijjé, **8** montor híine nó zite, aar híin ore asman ot ar zaga diiya nó zah. **9** Hé ðoóñr nagá re félaidiya gíyeh, yáni furana háf zibá re Íbilíc edde Cóitan howá zah, zibá ye fura duniyair maincóre gollot ot loiza yíba re. Yíba re duniyait félaidiya gíyeh, aar yíbar fúañti yíbar fírista gún ore yó félaidiya gíyeh. **10** Tarfore añi asman ot eggwá ðoóñr abas fúinni, eén hoór de, “Yala añáar Allar nejat, taakot, raijjo edde Íbar Mosihr adíkar házir óiye, kiyólla-hoilé añáar imandár báiboináin dor uore elzam-lagoya zee niki añáar Allar muúntu dine raite ítarar uore elzam lagaitó, ítare toh nise félaidiya gíyeh. **11** Ítara Bérásóol-or-Sóor lou wór edde nize dyíl de gobár hotár zoriya ítare ziti aiccé; ítara moot or muk ot úddwa nizor zan ore ador nó goré. **12** Hétolla, ó asman ókkol edde zetará hére táko, kúci goró. Montor, ó zobin edde doijja, tuáñrar uore afsús, kiyólla-hoilé Íbilíc toh tuáñrar hére lami aiccé. Íte rake furaiya óiye, kiyólla-hoilé íte ítar ðaim barí de zane.” **13** Zeñtté nagá wa ye nizoré duniyait félaidiya gíyeh de deikké, hétunot yíba ze mayafua wa ye morot Fua zormo diyé híbar fisá doijje. **14** Montor hé mayafua wa re ðoóñr sil or duiyán fak diiya gíyeh, zeéne híba ye moidan zagat nizor zaga waán ot uri zai fare, ziyán ot híba re cáro tin bosór foiijonto hé háf or muúntu no fore fángori fala zaybo. **15** Baade hé háf fwa ye nizor gal ottu faní neelai mayafua war fisé hál

or ðóilla gorídiye, zeéne hé faníbane híba re bácai loizagói. **16** Montor zobine mayafua wa re modot goijjé; zobine nizor gal kúli hál lan or faní gún háifelaiye, zín nagá ye nizor gal ottu neeláil. **17** Hétolla hé nagá wa mayafua wa lloi bicí rak óiye, aar híbar badbaki nosól uitará lloi larái goittó giiyói zetará Allar hókum ókkol amól goré edde Isár diya gobá re dóri táikke.

13 Hé nagá wa doijjar balur sor ot tíyai táikke. Tarfore añi deikkí de, doijja ttu eggwá háyowan neeliaiyér; yíba ttu doc cán cing edde háñt twa matá asé; yíbar cing gún or uore doc cwa tas asé, aar yíbar matá gún or uore kuférir nam leikká asé. **2** Añi ze háyowan nwá deikkí yíba lamba-bag or ðóilla, montor yíbar téng gún bálluk or téng or ðóilla, aar gal lan cinggor gal or ðóilla. Nagá wa ye hé háyowan ore nizor taakot, nizor toktó edde ðoóñr kémota diifélaiye. **3** Háyowan or matá gún ottu eggwá re saité mooti zohóm asé fán, montor hé mooti zohóm gom óigiyo. Hétolla duniyair tamám manúc ókkol taajup ói hé háyowan or fisá doijje; **4** nagá wa ye hé háyowan ore nizor kémota diifélaiye de hétolla ítara nagá wa re sóida goijjé. Ítara háyowan ore yó sóida goijjé, endilla hoói, “Háyowan or ðóilla hon asé? Yíba llói hone larái dí faribó?” **5** Hé háyowan ore ðoóñr-ðoóñr gal mari bolla edde kuféri goríbar muk diiya gíyeh; yíba ye salic dui mac fán ham solaibár kémota faiyé. **6** Tói yíba ye Allar kuféri gorí bolla nizor muk kúille, yáni Íbar nam or, Íbar éstan or, edde asman or bácinde ókkol or ulða kuféri gorí bolla. **7** Yíba re aró kémota diiya gíyeh de, Allar pak bonda ókkol lói larái goríbar edde ítara re háraibar. Yíba re hárr háandan, hárr koum, hárr zuban ola, edde hárr decóittar uore yó kémota diiya gíyeh. **8** Duniyair tamám bácinde ókkole yíba re sóida goríbo, yáni uitará beggúne zetarár nam duniyair foidayecir héñtte lóti zooráifela gíyl de Bérásóol-or-Sóo war zindigir-kitab ot leká nó zah. **9** Zar ttu fúniyar han asé, íte fúno. **10** Zee niki bondit zaibar hotá, íte bondit zaibo. Zaré toluware kotól goríbar hotá, ítare toluware kotól gorá zaybo. Híyane dahá de, Allar pak bonda ókkol ottu sobór edde iman rakár zorur. **11** Baade añi deikkí de, ar eggwá háyowan zobin ottu neeliaiyér; yíba ttu duiyán cing asé zín bérásóol-or-sóor cing or ðóilla, montor yíba ye matitó de nagár ðóilla. **12** Yíba ye foóila háyowan or fura kémota yíbar cáikkat

estemal goittó, aar duniyai re edde híyan or bácinđa ókkol ore hé foóila háyowan or sóida gorá baitó, zibár mooti zohóm gom óigiyoí. **13** Yíba ye ðoóñr-ðoóñr keramot ókkol daháito, ebbe hoitó sailé, maincór cáikkat asman ottu zobin ot ooin nazil goittó. **14** Yíba ye duniyair bácinđa ókkol ore gollot ot loizaitó, keramot uúin or duara zín foóila háyowan or cáikkat gorí bolla yíba re kémota diiya gíyéh. Yíba ye duniyair bácinđa ókkol ore hókum goittó de, ze háyowan nwá toluwar or zohóm fai baade yo ziañta óiye, yíbar mutti banaitó. **15** Yíba re hé háyowan or mutti wa re foran dibar kémota yó diiya gíyéh, zeéne hé háyowan or mutti wa ye mati fare aar zetará hé mutti re sóida no goré ítara beggún ore kotól gorífelai fare. **16** Yíba ye ðoóñr cóñro, tuangor gorif, begulam gulam, beggún ore den át ot yáh kuwal ot ekkán or dóre nicán kobul goittó bolazuri goijjé, **17** zeéne zar uore nicán asé, yáni háyowan or nam yáh yíbar nam or nombór lagaiya asé, yóggwa ye bade ar honókiye besa kina gorí no fare. **18** Yíán buzíte giyan or zorurot. Zar ttu buddí asé yóggwa ye háyowan or nombór gwá re ísaf goró, kiyólla-hoilé yíba óilde eggwá manúc or nombór; aar íbar hé nombór óilde 666.

14 Baade añí saái deikkí de, Bérásóol-or-Sóo wa Síyon Faár or uore tíyai asé, íbar fúañti ek lak salic sair ázar manúc óu asé, zetará kuwal ot íbar edde íbar Baf or nam leikká asé. **2** Tarfore añí asman ottu endilla eggwá abas fúinni zibá bicí fanír holholanir edde ðoóñr góri mate de țaral or abas or dóilla. Añí ze abas swá fúinni yíba fúinte bina-bazoya ókkole bina baár de abas or dóilla laiggé. **3** Hé manúc cúne toktó gán or, sairó zandár gún or edde murubbi-neta gún or muuntu eggwá noya seér gaiyé. Hé seér gwá re honókiye cíki nó fare, siríf hé ek lak salic sair ázar manúc zetará re duniyai ttu kiniféla gíyéh ítara beh faijjé. **4** Ítara óilde uitará zetará mayafuain loi milmilab goijjé de náí, ítara nizoré nafak nó goré bólke pak raikké. Ítara óilde uitará zetará Bérásóol-or-Sóo wa zere-zere zaa hére-hére íbar fisé-fisé zaa. Ítara re insán-zatir bútotu foóila fósol or dóilla Alla lla edde Bérásóol-or-Sóo wa lla kiniféla gíyéh. **5** Ítara honódin misá hotá hoiyé de náí; ítara behosúr. **6** Tarfore añí ar eggwá fírista deikkí, zibá uore asman ot urer, zibá ttu duniyair bácinđa ókkol or hañse tobolik goríbar ofúrani

kúchóbor asé, yáni hárr decóitta, háandan, zuban ola edde koum or hañse. (aĩonios g166) **7** Íba ye eggwá ðoóñr abase hoór de, “Alla re ðooro, aar íbar mohíma goró, kiyólla-hoilé íba ye bisar goríbar októ aáigiyoí. Íbar ebaadot goró zibá ye asman, zobin, doiija, edde fanír zónna ókkol foida goijjé.” **8** Tarfore fírista foóila wa baade ar eggwá fírista aái hoór de, “Forigiyoí, ðoóñr cóor Babilon forigiyoí, ziyáne nizor zenákarir azzur córab tamám koum ókkol ore háa baiyé.” **9** Hé duní wa baade tisára eggwá fírista aái ðoóñr abase hoór de, “Honókiye zodi hé háyowan ore edde yíbar mutti re fuñza goré, aar nizor kuwal ot yáh át ot yíbar nicán kobul goré, **10** íte yó Allar guccár córab háibo, zín ore íbar gozzob or fíyalat mazé honó miyál sára dálidiya gíyéh. Ítare pak fírista ókkol or muuntu edde Bérásóol-or-Sóo war muuntu ooin edde gónðok lói azab diya zaybo. **11** Aar ítarar hé azab or dúañ uormikká abadulabad hámica urát tákibo. Zetará háyowan nwá re edde yíbar mutti wa re fuñza goré, edde zetará yíbar nam or nicán kobul goré, ítara dine raite honó aram no faibo.” (aĩon g165) **12** Híyane dahá de, Allar pak bonda zetará Allar hókum ókkol amól goré edde Isár uore iman raké, ítara ttu sobór tákar zorur. **13** Yárbaade añí asman ottu endilla hoór de eggwá abas fúinni, “Yíán lek: yala lóti zetará Malik or ummot ísafe more ítara mubarek!” Pak-Ruh ye hoór de, “Ói, ítara nizor meénnot ottu aram faibo, kiyólla-hoilé ítarar amól ókkol ítarar fisé-fisé zaibo.” **14** Baade añí saái deikkí de, ekkán dóla miyúla, hé miyúlar uore moniccór dóilla honnwággwa boirá asé. Íbar matát cúnar eggwá tas asé, aar íbar át ot ékkan dár hañsi asé. **15** Tarfore ar eggwá fírista ebaadot-hána ttu neeliaiccé, zibá miyúlar uore boirá asé íba re ðoóñr abase ðak mari-mari endilla hoói-hoói, “Tuáñr hañsi át ot looi daifélo, kiyólla-hoilé daibar ainda aáigiyoí; duniyai toh fagigiyoí.” **16** Tói zibá miyúlar uore boirá asé íba ye duniyait íbar hañsi solaiyé, aar duniyai daiya óigiyoí. **17** Yárbaade asman ot asé de ebaadot-hána ttu ar eggwá fírista neeliaiccé, aar íba ttu yó ekkán dár hañsi asé. **18** Baade aró éggwa fírista kurbani-gáñ ttu neeliaiccé, zibá ttu ooin or uore kémota asé. Íba ye ze fírista wa ttu dár hañsi asé íba re ðoóñr abase ðak mari hoór de, “Tuáñr dár hañsi estemal gorí duniyair anggur-gas swá ttu sóra gún harí zoma gorífelo, kiyólla-hoilé yíbar anggur fagigiyoí.” **19** Tói hé

fírista wa ye nizor hañsi gán duniyait solaiyé, aar duniyair anggur-gas swá ttu sóra gún hari zoma gorífelaiye. Baade híin ore anggur or roc neela de doónr gañrát féलाईये, zibá óilde Allar gozzob or gañrá. 20 Híin ore cóor or baáre hé gañrá wat úñra gýl, aar hé gañrá ttu edún lou neeillíl, zeén níki híin uormikká gúra ókkol or lehan or héddur uiṭṭé, aar duré dui cót mail foijjonto giyyé.

15 Tarfore añi asman ot arekkán nicán deikkí ziyán doónr edde ammuúikka: hánt twa fírista, ítarar át ot hánt tan afot asé zín óilde ahéri gún, kiyólla-hoilé afot híine beh Allar guccá fúra. 2 Yárbaade añi ooin miyáilla aainar doijjar dóilla kessú deikkí; hé aainar doijjar farot Allar diiya bina dóri uitará tíyaiya asé zetará háyowan ore, yíbar mutti re, edde yíbar nam or nombór ore ziti aiccé. 3 Ítara Allar gulam Muúsar seér edde Bérasóol-or-Sóor war seér gaiyé, endilla, “Ó Mabud, hárr Kudurutwala Kúda, Tuáñr ham hotó doónr aar taajuippa! Ó koum ókkol or Baáñcca, hotó insáfi aar sóiyi Tuáñr rasta! 4 Ó Mabud, hon asé Tuáñre no dooraibó dé? Hon asé Tuáñr nam or mohíma no goríbo dé? Kiyólla-hoilé siríf Tuñí beh pak. Tamám koum ókkole aái Tuáñr muúntu sóida foribó, kiyólla-hoilé Tuáñr insáfi ham ókkol toh zahér óiye.” 5 Híin baade añi saái deikké de, asman ot ebaadot-hána gán, yáni Allar Házirir Tambu gán kúlagiye, 6 aar hé ebaadot-hána ttu hánt twa fírista uúin neeliaiccé zín ottu hánt tan afot asé; ítara sáf edde sosoikka hoor findá aar ítarar sínat cúnar faṭṭi beráiya. 7 Sairó zandár gún ottu eggwá ye hánt twa fírista híin ore cúnar hánt twa fiyala diiyé; híin Allar guccá lói furaiya, zibá abadulabad hámica zinda asé. (aiṭh g165) 8 Ebaadot-hána gán Allar mohíma ttu edde kudurut ottu aiyér de dúañ lói bórigiyegoi; aar hé ebaadot-hánat otúkkun foijjonto honókiye góli nó fare zetukkún hánto wa fíristar hánt tan afot tun nó fúra.

16 Baade hé ebaadot-hána ttu añi éggwa doónr abas fúinni, hánto wa fírista re eén hoór de, “Zoo, Allar gozzob or fiyala hánto wa duniyait dálidogoi.” 2 Tói foóila fírista wa zai íbar fiyala wa duniyait dálidiye; baade manúc uitarár gaat bicí hótara edde bic ola ek zat or gáa foida óiye zetará uore háyowan or nicán asé edde zetará yíbar mutti re sóida goijjé. 3 Dusára fírista wa ye íbar fiyala wa

doijjat dálidiye; baade híyan mora manúc or lou zendilla héndilla lou bonigiyói, aar doijjar fottí zandár morigiyói. 4 Tisára fírista wa ye íbar fiyala wa hál ókkol ot edde fanír zónna ókkol ot dálidiye; baade híin lou bonigiyói. 5 Tarfore añi fúinni de, fanír zimmadar fírista ye eén hoór, “Ó Pakzon, zibá asó edde zibá accíla, Tuñí insáf-wala, kiyólla-hoilé Tuñí toh iín or insáf goijjé; 6 kiyólla-hoilé manúc ítara toh Allar pak bonda ókkol or edde nobi ókkol or lou bácaiye, hétolla Tuñí ítara re lou haa baiyó; kiyólla-hoilé ítara híyan or laayek.” 7 Baade añi fúinni de, kurbaní-gán ye endilla hoór, “Ói, ó Mabud, hárr Kudurutwala Kúda, Tuáñr bisar sóiyi aar insáfi.” 8 Sair nombór or fírista wa ye íbar fiyala wa beil ot dálidiye, aar híyan ore manúc ókkol ore ooin loi furadi bolla kémota diiya giyé. 9 Manúc ókkol gorom or teze zoligiyói; aar ítara Allar nam or kuféri gorát doijje, zibá ttu hé afot tun or uore kémota asé. Ítara touwá yó nó goré, aar Allar mohíma yó nó goré. 10 Tarfore fañs nombór or fírista wa ye íbar fiyala wa háyowan or toktó gán or uore dálidiye, baade yíbar raijjo andár ógiyoi; aar manúc ókkole tokolife zir hooñri doijje. 11 Ítara nizor tokolife edde gáa ókkol or zoriya asman or Allar kuféri gorát doijje, aar ítara ítarar ham ottu touwá gorí nó fele. 12 Sów nombór or fírista wa ye íbar fiyala wa bor hál Efurat ot dálidiye; baade híyan or faní gún fúaiyigoi, zeéne fuk kul or baáñcca ókkol olla rasta toiyar ó. 13 Tarfore añi deikkí de, beng or dóilla tin nwá nafak ruh neeliaiyér, ekgwá nagár gal ottu, ar ekgwá háyowan or gal ottu, ar ekgwá misá nobir gal ottu. 14 Híin óilde bútt ókkol or ruh zíine keramot ókkol dahá. Híin neeli fura duniyair baáñcca ókkol or hére giyyé, ítara re hárr Kudurutwala Kúdar doónr din or larái lla zoma gorí bolla. 15 “Soó, Añi sur aiyé fángori aiyír. Mubarek ubá zibá seton táke edde nizor hoor findí táke, zeéne íba ttu biyossor hálote bera no fore aar maincé íbar córom no deké.” 16 Baade híine baáñcca ókkol ore zaga waán ot zoma goijjé ziyán ore Hibrú zuban ottu Harmagidon bouli hoó. 17 Tarfore hánt nombór or fírista wa ye íbar fiyala wa boiyar ot dálidiye, aar ebaadot-hána gán or toktó ttu eggwá doónr abas neeliaiccé, eén hoór de, “Ógiyoi.” 18 Hétunot bijilir córok óiye, door lage de abas óiye, edde tálal forat doijje; hére endilla eggwá doónr búsal óiye, zendilla duniyait insán-zati foida óiye lóti honó

októt nó óiyo, yíba héttor ðoóñr búsal edde bicí taakotwala. **19** Ðoóñr cóor gán tin bák óigiyoi, aar koum ókkol or cóor ókkol forigiyói. Alla ye ðoóñr cóor Babilon ore yaad gorí híyan ore íbar guccár gozzob or córab lói furaiya fiyala háa baiyé. **20** Hárr ðiya gaib óigiyoi, aar faár ókkol hoře giyyói. **21** Asman ottu mon-mon uzón ola ðoóñr-ðoóñr cíl-boróf ókkol manúc ókkol or uore forat doiije, aar manúc ítara hé cíl-boróf or afot olla bóuli Allar kuféri gorát doiije, kiyólla-hoilé hé afot tán bicí hótarnak.

17 Ze háñt twa fírista ttu háñt twa fiyala asé, híin ottu ekgwá ye aái añré hoór de, “Aiyó, ańi tuáñre bicí fanír uore boirá asé de hé ðoóñr maginir sánza kii de daháiyum, **2** zibá llói duniyair baáñcca ókkole zená goijjíl, zibár zenákarir córabe duniyair bácinða ókkol ðuúl óigilgoi.” **3** Tarfore hé fírista wa ye añré Ruhr bútoře góri ekkán moidan zagat loigiyé. Héře ańi éggwa mayafua deikkí, zibá kirmis roingga endilla eggwá háyowan or uore boirá, zibár agagura kuféir nam loi furaiya, zibá ttu háñt twa matá edde doc cán cing asé. **4** Hé mayafua wa bayoinna rong or edde kirmis rong or hoor findá, aar cúna, kimoti johár edde mukta loi háñzaiya. Híbar át ot cúnar eggwá fiyala asé, zibá gínayi jiníc ókkol lói edde híbar zenákarir nafaki loi furaiya. **5** Híbar kuwal ot mazé gufon maáni ola nam yían leikká asé, “Ðoóñr Babilon, magi ókkol or edde duniyair gínayi jiníc ókkol or maa.” **6** Ańi deikkí de, hé mayafua wa Allar pak bonda ókkol or lou edde Isár gobá ókkol or lou hái ðuúl ói asé. Híba re deki ańi ebbe taajup óigiyigoi. **7** Fírista wa ye añré hoór de, “Tuńi taajup kiyá óiyo? Ańi tuáñre hé mayafuar edde híba re boói loiza de háyowan or gufon maáni buzáidiyum, ze háyowan ottu háñt twa matá edde doc cán cing asé. **8** Tuńi ze háyowan deikkó yíba age accíl déh, yala ná; yíba oťái gańt ottu neeli dóncot zaibar asé. Duniyair bácinða ókkol zetarár nam duniyair foidayecir héńtte lóti zindigir-kitab ot leikká ná, ítara hé háyowan nwá re deki taajup óibo, kiyólla-hoilé yíba age accíl, yala ná, montor aibó. (Abyssos g12) **9** “Íin buzíte giyan ola demak or zorurot: háñt twa matá gún óilde háñt twa faár ziín or uore mayafua wa boiyé. **10** Háñt twa matá híin háñt zon baáñcca yó. Héntu fańs zon forigiyói, ezzon asé, ar ezzon aijjó nú aiyé; montor íba zeńtte aibó héńtte íba ttu hotókkal ánik táka

foribó. **11** Ze háyowan nwá age accíl, yala ná, yíba óilde añçto nombór or baáñcca. Yíba óilde háńto wa baáñccar bútotu ekzon, aar yíba dóncor uzu zaar. **12** “Tuńi ze doc cán cing deikkó, híin óilde doc zon baáñcca zetará aijjó raijjo nó faa, montor ítara kessú ðaim baáñcca ói bolla háyowan nwar fúańti adíkar faibo. **13** Ítarar moksót ek ðoilla, aar ítara nizor kémota edde adíkar háyowan nwá re diifélaibo. **14** Ítara Bérasóol-or-Sóo wa llói larái díbo, montor Bérasóol-or-Sóo wa ye ítara re háraibo, kiyólla-hoilé íba óilde kúda ókkol or Kúda aar baáñcca ókkol or Baáñcca. Zetará íbar fúańti asé ítara óilde uitará zetará re ðaha giyéh, basílowa giyeh, edde biccácdar.” **15** Tarfore fírista wa ye añré hoór de, “Tuńi ze faní deikkó, ziín or uore magini boirá asé, híin óilde koum ókkol, manúc or dol ókkol, decóitta ókkol edde zuban ola ókkol. **16** Tuńi ze doc cán cing háyowan ottu deikkó, ítara hé magini re nafórot goríbo, edde hárr kessú loifélai biyossor gorífelaibo, aar híbar gusso háifelai híba re ooin loi furat dífélaibo. **17** Kiyólla-hoilé Alla ye ítarar dil ot gólaidiye de ki hoilé, íbar moksót fura gorí bolla, ek niyote edde ítarar raijjo háyowan ore otókkal olla gosáidi yore zetókkal foijjonto Allar kalam fura nó. **18** Tuńi ze mayafua deikkó híba óilde ðoóñr cóor waán ziyáne duniyair baáñcca ókkol or uore hókumot goré.”

18 Híin baade ańi ar eggwá fírista deikkí zibá asman ottu lami aiyér; íba ttu ðoóñr kémota asé, aar duniyai íbar tozzoliye foór óigiyoi. **2** Íba ye zure guzori hoór de, “Forigiyói, ðoóñr Babilon forigiyói! Híba bútt ókkol tákibar zaga, fottí hóraf jin or ađða-hána, edde hárr ðoilla nafak edde gínayi faik or ađða-hána bonigiyói. **3** Kiyólla-hoilé tamám koum ókkol toh híbar zenákarir azzur córab hái ðuúl óigiyoi; duniyair baáñcca ókkole híba llói zená goijjé, aar duniyair códor ókkol híbar ayacir aťalikka dón-doulote tuangor óigiyoi.” **4** Tarfore ańi asman ottu ar ekgwá abas fúinni, eén hoór de, “Ó ańr bonda ókkol, tuáńra híba ttu neeli aázogoi, zeéne tuáńra híbar gunát córik no, aar híbar honó afot tuáńrar uore nu aiyé; **5** kiyólla-hoilé híbar guná toh asman or héddur foijjonto uńsol ot foóńicce, aar Alla ye híbar nafórmanni ókkol monot goijjé. **6** Híba ye zendilla goijjé héndilla tuáńra yó híba re goró; híba re híbar ham mozin dui gun bicí bodola doh. Ze fiyalat híba ye oinno

zon olla nicá miyáldiye, hé fíyalat mazé híba lla aró dui gun bicí nicá miyál dóh. 7 Híba re eddúr azab edde duk doh, zeddúr híba ye nizoré nize doónr kúwalaiye edde ayaciye zindigi haraiyé, kiyólla-hoilé híba ye nizor dile-dile hoó de, ‘Añí rani ísafe boirá así; añí hóno rari no, añr ttu honódin ferecan óibar náí.’ 8 Hétolla toh ek din or bútoe híbar afot híbar uore aázayboi, yáni moot, ferecani, edde raṭ. Aar híba re ooin di furiféla zaybo, kiyólla-hoilé híba re bisar-goróya Malik Alla toh taakotwala.” 9 Duniyair baáncca ókkol zetará híba llói zená goijjé aar ayací goijjé, ítara híba zoler de dúañ deká híba lla hañdahari goríbo edde bicí ferecani zahér goríbo. 10 Ítara híbar azab deká ḡoore dur óttu tíyai hoibó de, “Ó ḡoónr cóor Babilon, ó mozbut cóor, afsús, tor uore afsús! Hom ṭaim or bútoe toh tor sánza aáigiyoí.” 11 Duniyair códor ókkole híba lla hañdahari goríbo edde ferecani zahér goríbo, kiyólla-hoilé ítara malsámana ókkol ar honókiye no kiner. 12 Hé malsámana óilde: cúna, rufa, kimoti fattór edde mukta; barík faṭor-hoor, bayoinna rong or hoor, recóm hoor edde kirmis rong or hoor; hárr kisím or kúcho gas, áñtir dat ottu banaiya ḡoilla-boḡoilla jiníc ókkol, edde dami gas ottu, fitol ottu, luwá ttu edde marból ottu banaiya ḡoilla-boḡoilla jiníc ókkol; 13 gas or sál, mosólla, agórbatti, añtor, luban, anggur or córab, tel, moida, giyuñ, goru, bérasóol, gúra, gúra-garí, edde gulam ókkol. 14 Hé códor ókkole hoibó de, “Tui ze fólfofa faito azzu goijjílí híin tor hañsóttu dur óigiyoí, aar tor tuangorir edde cúndor or jiníc beggún tor héntu gaib óigiyoí, maincé híin ore ar loot no faibo.” 15 Hé jiníc or códor ókkol zetará híbar zoriya tuangor óigiyoí, ítara híbar azab deká ḡoore duré tíyai tákibo. Ítara hañdahari edde bilak goríbo, 16 eén hoói-hoói, “Ó ḡoónr cóor, afsús, tor uore afsús, zibá barík faṭor-hoor, bayoinna rong or hoor edde kirmis rong or hoor findá, aar cúna, kimoti fattór, edde mukta loi hañzaia; 17 kiyólla-hoilé hom ṭaim or bútoe edún dón-doulot toh dónco óigiyoí!” Zañs or hárr mazí, hárr facíndar edde séraingga, aar zedúne doijjat ham gorí sole, ítara beggún duré tíyai tákibo. 18 Híba zoler de dúañ deká ítara guzori hoibó de, “E ḡoónr cóor yán or ḡoilla ar honó cóor accíl níki?” 19 Ítara nizor matát dúil maribó, aar hañdi-hañdi edde bilak gorí-gorí guzori hoibó de, “Afsús, hé ḡoónr cóor or uore afsús, zibár dón-doulote doijjar tamám zañs

ola ókkol tuangor óiye, kiyólla-hoilé híba re toh hom ṭaim or bútoe dónco gorífela giyeh!” 20 Ó asman, Allar pak bonda ókkol, rosúl ókkol, edde nobi ókkol, híbar uore ziyán óiye híyan olla kúci goró; kiyólla-hoilé Alla ye insáf gorí híba ttu tuáñrar bodola loifélaiye. 21 Tarfore eggwá taakotwala fírista ye ḡoónr sakkir ḡoilla eggwa fattór tulí looi doijjat melámari hoór de, “Endilla zure ḡoónr cóor Babilon ore félaidiya zaybo. Híba re ar honódin faa no zaybo. 22 Bina-bazoyar, tal-bazoyar, bací-bazoyar edde cíañ-matoyar abas ar honódin tor bútoe fúna no zaybo; tor bútoe ar honódin honó ḡoilla mistírir códori faa no zaybo; tor bútoe honó sakkir abas ar honódin fúna no zaybo. 23 Tor bútoe serak or foóre ar honódin foór no dibo; dulá edde dulír abas tor bútoe ar honódin fúna no zaybo; kiyólla-hoilé tor códor ókkol toh duniyair ḡoónr manúc accíl, aar tor jadugari loi tamám koum ókkol gollot ot giyiói. 24 Híbar bútoe nobi ókkol or, Allar pak bonda ókkol or, edde uitará beggún or lou faa giyéh zetará re duniyait kún gorá giyéh.”

19 Híin baade añ asman ot manúc or ḡoónr dol or uzor or ḡoilla eggwá ḡoónr abas fúinni, eén hoór de, “Háleluyah! Nejat, mohíma aar kémota toh añárar Allar, 2 kiyólla-hoilé íbar bisar sóiyi edde insáfí. Íba ye toh ḡoónr maginir bisar goijjé, zibá ye nizor zenákari lói duniyai borbad difélaiye, aar íba ye híba ttu Nizor gulam ókkol or lou wór bodola loiyé.” 3 Ítara aró ekbar hoór de, “Háleluyah! Híba zoler de dúañ abadulabad hámica urát tákouk.” (aion g165) 4 Ekkuri-sair zon murubbi-neta gúne edde sairó zandár gúne fori Alla re sóida goijjé, zibá toktór uore boirá asé, eén hoói, “Aamin. Háleluyah!” 5 Hétunot toktó gán ottu eggwá abas aiccé de, “Añárar Allar taarif goró, ó íbar tamám gulam ókkol, tuáñra zetará íba re ḡooro, tuáñra ḡoónr cóñro beggúne.” 6 Tarfore añ manúc or ḡoónr dol or uzor or ḡoilla, bicí fanír holholanir ḡoilla, edde ṭáral or ḡoónr mat or ḡoilla eggwa abas fúinni, eén hoór de, “Háleluyah! Añárar Malik hárr Kudurutwala Kúda ye toh hókumot gorér. 7 Aiyó, añara kúci ói aar kúci-áci gorí íbar mohíma gorí, kiyólla-hoilé Bérasóol-or-Só war biyár októ toh aáigiyoí, aar íbar dulí ye nizoré toiyar gorífelaiye.” 8 Híba re sosoikka edde sáf barík faṭor-hoor findí bolla diiya giyéh, 9 Tarfore fírista wa ye añré hoór de, “Yián

lekó: mubarek uitará zetará re Bérásóol-or-
 Sôo war boirat or melat dawot diya giyéh.”
 Baade íba ye añré hoiyé de, “Ín Allar sóiyi
 hotá ókkol.” **10** Hétunot íba re sóida gorí bolla
 añí íbar foot forigiýigoi. Montor íba ye añré
 hoór de, “No goijjó; añí yó toh tuáñr dóilla
 edde tuáñr imandár báiboináin uitarár dóilla
 éggwa gulam, zetará Isár diya gobá re dóri
 táke. Alla re beh sóida goró. Isár diya gobá
 ókkol óilde toh nobi ókkol or mul hotá.” **11**
 Baade añí asman kúla deikkí, hêre deikkí de,
 eggwá dóla gúra. Yíbar uore zibá boirá asé íba
 re Biccácdar edde Sóiyi bóuli howá zah. Íba ye
 insáf or sáañte bisar edde larái goré. **12** Íbar
 suk ooin or zilhar dóilla, aar íbar matát bicí
 tas asé. Íbar gaat endilla ekkán nam leikká asé
 ziyán íba Nize bade ar honókiye no zane. **13**
 Íba lou wót buraiya fucák findá, aar íbar nam
 óilde Allar Kalam. **14** Asman or fóous ókkol dóla
 edde sáf barík faṛor-hoor findí, dóla gúra ókkol
 ot góri íbar fisé-fisé zaat accíl. **15** Íbar gal ottu
 ekkán dár toluwar neeliaiccé, zeéne híyan lói
 íba ye koum ókkol ore hárai fare. Íba ye ítarar
 uore luwár lorí lói hókumot goríbo. Anggur or
 roc neela de gañrá re íba Nizebaze úñribo, ze
 gañrát hárr Kudurutwala Allar guccár gozzob
 asé. **16** Íbar fucák ot edde ran ot nam yán leikká
 asé, “baañcca ókkol or Baañcca, kúda ókkol or
 Kúda.” **17** Tarfore añí deikkí de, eggwá fírista
 beil or bútoire tíyaiya, íba ye uore asman ot ure
 de tamám faik ókkol ore ḍoóñr abase guzori-
 guzori hoór de, “Aiyó, Allar ḍoóñr mela háito
 zoma óizogoi, **18** zeéne tuáñra baañcca ókkol or
 gusso, zonnal ókkol or gusso, boluwar manúc
 ókkol or gusso, gúra ókkol or edde híin or uore
 soré de ítarar gusso, edde tamám manúc ókkol
 or gusso hái faro, ítara begulam óuk yáh gulam,
 cóñro óuk yáh ḍoóñr.” **19** Tarfore añí deikkí
 de, háyowan nwá edde duniyair baañcca ókkol
 ítarar fóous ókkol lói ekkán ot zoma óiye, zibá
 gúrar uore boirá asé íba llói edde íbar fóous
 ókkol lói larái gorí bolla. **20** Montor háyowan
 nwá re gereftar gorífela gíyeh, aar yíbar fúañti
 misá nobi ubá re yó gorífela gíyeh zibá ye hé
 háyowan or muúntu endilla keramot ókkol
 goittó, zín or zoriya íba ye uitará re gollot
 ot loigiyói zetará hé háyowan or nicán kobul
 goijjé edde zetará yíbar mutti re sóida goijjé.
 Hé duní wa re ooin or ḍíit zinda félaidiya gíyeh,
 ziyán gónḍoke zole. (Limnē Pyr g3041 g4442) **21** Aar
 badbaki gún ore toluwar waáne mariféla gíyeh

ziyán zibá gúrar uore boirá asé íbar gal ottu
 neeillé; aar tamám faik ókkole ítarar gusso hái
 feṭ bóraifelaiye.

20 Tarfore añí éggwa fírista deikkí zibá asman
 ottu lami aiyér; íbar át ot oṭái gañt or sabí
 wa edde ekkán ḍoóñr síyol asé. (Abyssos g12) **2** Íba
 ye nagá wa re dórifelaiye, yáni furana háf zibá
 re íbilíc yáh Cóitan howá zah ítare; baade ek
 ázar bosór olla bañdífelaiye. **3** Tarfore íba ye
 ítare oṭái gañt ot félaidi yíba bon gorífelaiye,
 aar yíbat moór lagaidiyé, zeéne ek ázar bosór
 fura nó óiyo foijjonto íte koum ókkol ore gollot
 ot ar loizai no fare; becók yárbaade ítare essát
 olla eridiya zaybar asé. (Abyssos g12) **4** Baade añí
 toktó ókkol deikkí, híin or uore zetará boirá asé
 ítara re bisar goríbar kémota diiya giyéh. Añí
 uitarár ruh ókkol ore yó deikkí zetarár holla
 ókkol Isár baabute gobá dóne edde Allar kalam
 or zoriya harífela gíyeh, zetará háyowan nwá
 re yáh yíbar mutti re sóida nó goré edde nizor
 kuwal ot yáh át ot yíbar nicán kobul nó goré.
 Ítara zinda ói Mosihr fúañti ek ázar bosór fán
 hókumot gorát doijje. **5** Oinno muruda ókkol
 ek ázar bosór fura nó óiyo foijjonto zinda nó.
 Híyan óilde mora ttu zinda ówar foóilabar. **6**
 Mubarek edde pak manúc óilde ubá zee niki
 hé foóilabar mora ttu zinda ówat cámil táke;
 ítarar uore dusára moot or honó taakot náí,
 bólke ítara Allar edde Mosihr imam óibo, aar
 íbar fúañti ek ázar bosór fán hókumot goríbo. **7**
 Ek ázar bosór guzori zaigói baade, Cóitan ore
 ítar ziyól ottu hálas gorídiya zaybo, **8** baade
 íte duniyair sairó kunat asé de koum ókkol ore
 gollot ot loizai bolla neelibó, yáni Yajúj edde
 Majúj ore, aar ítara re larái lla zoma goríbo.
 Ítarar gona doijjar sor or balur hédun óibo. **9**
 Ítara zobin or agagura fólizai, Allar pak bonda
 ókkol táke de zaga gán ore gérgwal gorífelaiye,
 yáni íbar adórja cóor gán ore; montor asman
 ottu ooin nazil ói ítara re hálak gorífelaiye. **10**
 Aar ítara re gollot ot loigiyé de hé íbilíc ore
 gónḍoke zole de ooin or ḍíit félaidiya gíyeh,
 zeré háyowan nwá edde misá nobi wa yó asé.
 Hêre ítara dine raite abadulabad hámica azab
 faibo. (aiṭon g165, Limnē Pyr g3041 g4442) **11** Baade añí
 ekkán ḍoóñr dóla toktó edde híyan or uore
 boirá asé de íba re deikkí, zibár muúntu zobin
 edde asman dáigiyegoi, aar híine honó zaga
 nó faa. **12** Tarfore añí ḍoóñr-cóñro tamám
 mora ókkol ore toktó gán or muúntu tíyaiya

deikkí, aar kitab ókkol kúlagiye. Aró ekgwá kitab kúlagiye, zibá óilde zindigir-kitab; baade hé mora ókkol ore nizor-nizor ham mozin bisar gorá gíyeh, ze ham ókkol hé kitab pún ot leká gíyl. **13** Ze mora ókkol doijjat accíl, ítara re doijja ye tulídiye, aar moote edde fatalfure yó híin ot ze mora ókkol accíl ítara re tulídiye; aar ítara fottíkiyo re nizor-nizor ham mozin bisar gorá gíyeh. (Hadēs g86) **14** Baade moot ore edde fatalfur ore ooin or díft félaidiya gíyeh. Ooin or díft óilde dusára moot. (Hadēs g86, Limnē Pyr g3041 g4442) **15** Zar-zar nam hé zindigir-kitab ot leká gíyeh de faa nó zah, ítare-ítare yó hé ooin or díft félaidiya gíyeh. (Limnē Pyr g3041 g4442)


21 Baade añí ekkán noya asman edde ekkán noya zobin deikkí; kiyólla-hoilé foóilar asman edde foóilar zobin toh céc ógiyoi, honó doijja yó ar náí. **2** Tarfore añí deikkí de, pak cóor gán, yáni noya Jerúsalem mán asman ottu Allar hañsóttu lami aiyér; híyan ore dulí re dulá lla hánza fángori hánza gíyeh. **3** Baade añí toktó gán ottu eggwá doóñr abas fúinni, eén hoór de, “Soó, Alla tákibar zaga yala insán or bútoe. Íba ítarar fúañti tákibo, aar ítara íbar bonda óibo. Alla Nize ítarar fúañti óibo edde ítarar Alla óibo. **4** Íba ye ítarar suk ottu hárr suk or faní fuñsídibo; honó moot ar no tákibo; honó ferecani, hañdani, yáh duk óu ar no tákibo; kiyólla-hoilé agor gún toh fúraigiyoi.” **5** Toktó gán ot boirá asé de íba ye hoór de, “Saá, Añí hárr kessú noya gorifelair.” Íba ye aró hoór de, “Ín lek, kiyólla-hoilé hotá iín biccácdar edde sóiyi.” **6** Baade Íba ye añré hoór de, “Yala fúraiyé. Añí óilam de Alfa edde Omíga, yáni Awal edde Akér. Zetará tiráci asé ítara re Añí zindigi dee de fanír zónna ttu faní diiyum, ebbe maana. **7** Zee niki ziti aiyé íte híin beggún miras faibo; Añí ítar Alla óiyum aar íte Añr fua óibo. **8** Montor sélfadúrar, gairimandár, gínayi ham-goróyar, kúnir, zenákur or, jadugor or, mutti-fuñzoyar, edde tamám misákur ókkol or bák óibo de ooin edde gónðoke zole de hábiya zuzuk; híyan óilde dusára moot.” (Limnē Pyr g3041 g4442) **9** Tarfore ze háñt twa fírista ttu ahérir háñt tan afot furaiya háñt twa fiyala accíl, híin ottu ekgwá ye aái añré hoór de, “Eré aiyó, añí tuáñre dulí, yáni Bérásóol-or-Sóo war bou daháiyum.” **10** Íba ye añré Pak-Ruhr bútoe góri eggwá doóñr edde uñsol faár ot loigiyé, aar añré pak cóor Jerúsalem mán daháiyé, ziyán asman ottu Allar

hañsóttu lami aiyér, **11** ziyán ot Allar tozolli asé. Híyan or sossohani bicí kimoti johár or dóilla, yáni fórikr or dóilla sáf jaspar johár or dóil. **12** Híyan ot baró wan geit ola ekkán doóñr edde uñsol ðeбал asé, aar hé geit tun ot baró wa fírista asé. Geit híin ot nam ókkol leikká asé, zín óilde Boni Isráil or baró háandan or nam. **13** Tin nán geit fuk mikká ttu, tin nán geit uttor mikká ttu, tin nán geit doóin mikká ttu, aar tin nán geit fosím mikká ttu. **14** Cóor or ðeбал lan baró wa bunyadiir fattór or uore bana gíyéh, aar híin ot Bérásóol-or-Sóo war baró zon sáhabi gún or nam asé. **15** Zibá ye añr lói hotá hoiyé, íba ttu eggwá mafonir lorí asé zibá cúnar; cóor gán ore, híyan or geit ókkol ore, edde híyan or ðeбал ore mafi bolla. **16** Cóor gán sair kuinna; híyan or lamba zeddúr fatári yó héddur. Íba ye cóor gán lorí wa lói maippé rár baró ázar kuni de zani fajijé; híyan or lamba, fatári edde uormikká borabor. **17** Baade íba ye híyan or ðeбал lan ore insáni mafe maippé rár, ek cóo salic-sair át óiye, zendilla gori fírista ye yó mafe. **18** ðeбал lan jaspar johár lói banaiya; aar cóor gán sáf aainar dóilla háti cúnar. **19** Hé cóor or ðeбал or bunyadiir fattór gún hárr kisím or kimoti johár lói hánzaiya. Foóila bunyadiir fattór gwá jaspar or dóilla sosoikka, dusára wa safayar dóilla cúrma roingga, tisára wa kalsédanir dóilla asmani roingga, sair nombór or gwá emerald or dóilla áil, **20** fañs nombór or gwá sarðonix or dóilla dóla edde miřa roingga, sów nombór or gwá sardiya or dóilla córboti roingga, háñt nombór or gwá krisolait or dóilla óloidda, añçto nombór or gwá beral or dóilla faní roingga, now nombór or gwá ðopaz or dóilla cúna roingga, doc nombór or gwá krisopreis or dóilla hora áil, egaro nombór or gwá jasend or dóilla lal roingga, baró nombór or gwá ametist or dóilla bayoinna roingga. **21** Baró wan geit tun baró wa mukta; ekkán geit ekgwár dóre mukta. Cóor or rasta gán sáf aainar dóilla háti cúnar. **22** Cóor gán or bútoe añí honó ebaadot-hána nó deki, kiyólla-hoilé Mabud hárr Kudurutwala Alla edde Bérásóol-or-Sóo wa óilde híyan or ebaadot-hána. **23** Cóor gán ot foór ói bolla beil edde san or honó zorurot náí, kiyólla-hoilé Allar mohímaye híyan ore foór goré, aar Bérásóol-or-Sóo wa óilde híyan or serak. **24** Koum ókkol híyan or foóre solafíra goríbo, aar duniyair baáñcca ókkole ítarar dón-doulot ókkol híyan or bútoe aníbo. **25** Din ot híyan or geit ókkol

honódin bon no tákibo, kiyólla-hoilé hére toh rait no óibo. **26** Aar koum ókkol or dón-doulot edde izzot híyan or bútoe aná zaybo. **27** Montor honó nafak jiníc, gínayi ham goré de yáh misá hotá hoó de honó manúc híyan ot bilkúl góli no faribó, montor siríf uitará faribó zetarár nam Bérasóol-or-Sóo war zindigir-kitab ot leikká asé.

22 Yárbaade fírista wa ye añré zindigir fanír ekkán hál daháye; híyan fòrik or dóilla foón, aar híyan Allar edde Bérasóol-or-Sóo war toktó ttu neeli 2 cóor gán or doóñr goldir mazór ttu zaat accíl. Híyan or ek hañsat zindigi gas asé, zibát baró kisím or gulagala dóre, fottí macé-macé. Hé gas or fataye koum ókkol or biyaram gom ó. **3** Hére honó laánót ar no tákibo; Allar edde Bérasóol-or-Sóo war toktó hé cóor ot tákibo, aar Íbar gulam ókkole Íbar ebaadot goríbo; **4** Ítara Íbar siyára dekkíbo, aar Íbar nam Ítarar kuwal ot leikká tákibo. **5** Hére honó rait no óibo; Ítara ttu serak or foór yáh beil or foór no lagibó, kiyólla-hoilé Malik Alla ye Ítara re foór díbo, aar Ítara abadulabad hámica hókumot goríbo. (aiñ g165) **6** Fírista wa ye añré hoór de, “Hotá iín beggún biccácdar edde sóiyi. Malik Alla, zibá ye nobi ókkol or hañse nazil goré, Íba ye Nizor fírista diferáye, Íbar gulam ókkol ore uúin dahái bolla zín bicí hára hámaha óibar asé.” **7** Isá ye hoór de, “Soó, Añí hára aiyír. Mubarek ubá zee niki e kitab or poigam ókkol amól goré.” **8** Añí Yohánna ye edún iín fúinni edde deikkí. Zeñtté añí iín fúinni edde deikkí, añí sóida gorí bolla fírista war foot forigiyígoi, zibá ye añré iín daháye. **9** Hétunot Íba ye añré hoíyé de, “No goijjó; añí yó toh tuáñr dóilla, tuáñr báiyain nobi ókkol or dóilla, edde zetará e kitab or hotá ókkol amól goré Ítarar dóilla éggwa gulam. Alla re beh sóida goró!” **10** Baade Íba ye añré hoór de, “E kitab or poigam ókkol ore moór lagai no raikkó, kiyólla-hoilé októ toh dáké. **11** Zee niki burai goré, íte burai gorát tákouk; zee niki nafaikka, íte nafaikka tákouk; zee niki forhésgar, íte forhés góri solat tákouk; aar zee niki pak, íte pak tákouk.” **12** Isá ye hoór de, “Soó, Añí hára aiyír, fottíkiyo re nizor-nizor ham mozin dii bolla boccíc Añr fúañti asé. **13** Añí óilam de Alfa edde Omíga, Awal edde Akér, Cúru edde Céc.” **14** Mubarek uitará zetará nizor zubba dúifele, kiyólla-hoilé Ítara zindigi gas or hók faibo, aar geit tún báy cóor

gán ot góli faribó. **15** Híyan or baáre óibo de óilde, kuttar dóilla manúc ókkol, jadugor ókkol, zenákur ókkol, kúni ókkol, mutti-fuñzoya ókkol, edde uitará beggún zetará níki misá re fosón goré edde misáye sole. **16** “Añí Isá ye Añr fírista diferáyi, zomát ókkol olla tuáñrar hañse iín gobá díto. Añí óilam de Dawud or Cínyor edde Nosól, Fózor or sosoikka Sút-tara.” **17** Pak-Ruh ye edde dulí ye hoór de, “Aiyó.” Zee niki fúner íte yó hoó, “Aiyó.” Zar ttu tirác laiggé íte aiyó; monehoór de íte zindigir faní maana loogái. **18** Zee niki e kitab or poigam ókkol fúne, yóggwar hañse añí e gobá gán dir de, zodi honókiye iín ot kessú bará, Alla ye yóggwar zindigit mazé e kitab ot leikká asé de afot ókkol diibo; **19** aar zodi honókiye e kitab or poigam ókkol ottu honó hotá neelaiféle, Alla ye Ítar ttu e kitab ot leikká asé de hé zindigi gas or edde pak cóor or hók loifélaibo. **20** Zibá ye edún iín hoói der Íba ye hoór de, “Becók, Añí hára aiyír.” Amin. Ó Malik Isá, aiyó. **21** Malik Isár rahámot pak bonda ókkol or uore zari tákouk. Amin.



Tarfore ańi deikkí de, pak cóor gán, yáni noya Jerúsalem mán asman ottu Allar hańsóttu lami aiyér; híyan ore dulí re dulá lla háńza fángori háńza gýeh. Baade ańi toktó gán ottu eggwá ɔoóńr abas fúinni, eén hoór de, “Soó, Alla tákibar zaga yala insán or bútoe. Íba ítarar fúańti tákibo, aar ítara íbar bonda óibo. Alla Nize ítarar fúańti óibo edde ítarar Alla óibo.

Revelation 21:2-3

Reader's Guide

Ruáingga at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Ruáingga at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aídios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Rohingya---Kitabul-Mukaddos-Bible/Noted

Aionian Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words but may wrongly imply *eternal* or *Hell*. Note placement is skipped or adjusted for verses with non-standard numbering.

Abyssos

Lukás 8:31
Romiól 10:7
Zahéri 9:1
Zahéri 9:2
Zahéri 9:11
Zahéri 11:7
Zahéri 17:8
Zahéri 20:1
Zahéri 20:3

Hamól 3:21
Hamól 15:18
Romiól 1:25
Romiól 9:5
Romiól 11:36
Romiól 12:2
Romiól 16:27
1 Kórintiól 1:20
1 Kórintiól 2:6
1 Kórintiól 2:7
1 Kórintiól 2:8
1 Kórintiól 3:18
1 Kórintiól 8:13
1 Kórintiól 10:11
2 Kórintiól 4:4
2 Kórintiól 9:9
2 Kórintiól 11:31
Galatiól 1:4
Galatiól 1:5
Íficiól 1:21
Íficiól 2:2
Íficiól 2:7
Íficiól 3:9
Íficiól 3:11
Íficiól 3:21
Íficiól 6:12
Filíppaiól 4:20
Kolóciól 1:26
1 Timóti 1:17
1 Timóti 6:17
2 Timóti 4:10
2 Timóti 4:18
Titus 2:12
Hibraniól 1:2
Hibraniól 1:8
Hibraniól 5:6
Hibraniól 6:5
Hibraniól 6:20
Hibraniól 7:17
Hibraniól 7:21
Hibraniól 7:24
Hibraniól 7:28
Hibraniól 9:26
Hibraniól 11:3
Hibraniól 13:8
Hibraniól 13:21
1 Fitor 1:23

1 Fitor 1:25
1 Fitor 4:11
1 Fitor 5:11
2 Fitor 3:18
1 Yohánna 2:17
2 Yohánna 1:2
Yohúdah 1:13
Yohúdah 1:25
Zahéri 1:6
Zahéri 1:18
Zahéri 4:9
Zahéri 4:10
Zahéri 5:13
Zahéri 7:12
Zahéri 10:6
Zahéri 11:15
Zahéri 14:11
Zahéri 15:7
Zahéri 19:3
Zahéri 20:10
Zahéri 22:5

aidios

Romiól 1:20
Yohúdah 1:6

aiōn

Moti 12:32
Moti 13:22
Moti 13:39
Moti 13:40
Moti 13:49
Moti 21:19
Moti 24:3
Moti 28:20
Markus 3:29
Markus 4:19
Markus 10:30
Markus 11:14
Lukás 1:33
Lukás 1:55
Lukás 1:70
Lukás 16:8
Lukás 18:30
Lukás 20:34
Lukás 20:35
Yohánna 4:14
Yohánna 6:51
Yohánna 6:58
Yohánna 8:35
Yohánna 8:51
Yohánna 8:52
Yohánna 9:32
Yohánna 10:28
Yohánna 11:26
Yohánna 12:34
Yohánna 13:8
Yohánna 14:16

aiōnios

Moti 18:8
Moti 19:16
Moti 19:29
Moti 25:41
Moti 25:46
Markus 3:29
Markus 10:17
Markus 10:30
Lukás 10:25
Lukás 16:9
Lukás 18:18
Lukás 18:30
Yohánna 3:15
Yohánna 3:16
Yohánna 3:36
Yohánna 4:14
Yohánna 4:36
Yohánna 5:24
Yohánna 5:39
Yohánna 6:27
Yohánna 6:40
Yohánna 6:47
Yohánna 6:54
Yohánna 6:68

Yohánna 10:28
Yohánna 12:25
Yohánna 12:50
Yohánna 17:2
Yohánna 17:3
Hamól 13:46
Hamól 13:48
Romiól 2:7
Romiól 5:21
Romiól 6:22
Romiól 6:23
Romiól 16:25
Romiól 16:26
2 Kórintiól 4:17
2 Kórintiól 4:18
2 Kórintiól 5:1
Galatiól 6:8
2 Tisólioniól 1:9
2 Tisólioniól 2:16
1 Timóti 1:16
1 Timóti 6:12
1 Timóti 6:16
2 Timóti 1:9
2 Timóti 2:10
Titus 1:2
Titus 3:7
Filimon 1:15
Hibraniól 5:9
Hibraniól 6:2
Hibraniól 9:12
Hibraniól 9:14
Hibraniól 9:15
Hibraniól 13:20
1 Fitor 5:10
2 Fitor 1:11
1 Yohánna 1:2
1 Yohánna 2:25
1 Yohánna 3:15
1 Yohánna 5:11
1 Yohánna 5:13
1 Yohánna 5:20
Yohúdah 1:7
Yohúdah 1:21
Zahéri 14:6

eleēsē

Romiól 11:32

Geenna

Moti 5:22
Moti 5:29
Moti 5:30
Moti 10:28
Moti 18:9
Moti 23:15
Moti 23:33
Markus 9:43

Markus 9:45
Markus 9:47
Lukás 12:5
Yakub 3:6

Hadēs

Moti 11:23
Moti 16:18
Lukás 10:15
Lukás 16:23
Hamól 2:27
Hamól 2:31
1 Kórintiól 15:55
Zahéri 1:18
Zahéri 6:8
Zahéri 20:13
Zahéri 20:14

Limnē Pyr

Zahéri 19:20
Zahéri 20:10
Zahéri 20:14
Zahéri 20:15
Zahéri 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6
Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō


2 Fitor 2:4

Questioned


None yet noted




Imane beh Ibrahîme Allar hotá mainnîl, zeñtté yóggwa re matai oh zagat zaito howá gíyl ziyán yóggwa ye miras ísafe faibo. Yóggwa hojé zaar no zani rowana ól.
- Hebrews 11:8



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



Kiyólla-hoilé Manúc or Fua yó toh hédmot faito aiccé de no, bókke aiccé de hédmot goittó, edde boút zon or bodol Nizor zan dito. - Mark 10:45



Añl Pául, Mosilh Isár éggwa gulam, zibá re sáthabi ói bolta ðaka giyéð edde Allar kúchóbor or tobolik olla basílowa giýeh. - Romans 1.1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.



New Heavens and Earth



- Christ returns for his people**
- 1956** Jim Elliot martyrd in Ecuador
 - 1830** John Williams reaches Polynesia
 - 1731** Zinzendorf leads Moravian mission
 - 1614** Japanese kill 40,000 Christians
 - 1572** Jesuits reach Mexico
 - 1517** Martin Luther leads Reformation
 - 1455** Gutenberg prints first Bible
 - 1323** Franciscans reach Sumatra
 - 1276** Ramon Llull trains missionaries
 - 1100** Crusades tarnish the church
 - 1054** The Great Schism
 - 997** Adalbert martyrd in Prussia
 - 864** Bulgarian Prince Boris converts
 - 716** Boniface reaches Germany
 - 635** Alopen reaches China
 - 569** Longinus reaches Alodia / Sudan
 - 432** Saint Patrick reaches Ireland
 - 397** Carthage ratifies Bible Canon
 - 341** Ulfilas reaches Goth / Romania
 - 325** Niceae proclaims God is Trinity
 - 250** Denis reaches Paris, France
 - 197** Tertullian writes Christian literature
 - 70** Titus destroys the Jewish Temple
 - 61** Paul imprisoned in Rome, Italy
 - 52** Thomas reaches Malabar, India
 - 39** Peter reaches Gentile Cornelius
 - 33** Holy Spirit empowers the Church

(Wikipedia, Timeline of Christian missions)

Resurrected 33 A.D.

What are we?			▶		Genesis 1:26 - 2:3	
How are we sinful?			▶		Romans 5:12-19	
Where are we?			▶			
					Innocence	
			Eternity Past		Creation 4004 B.C.	
▶ Who are we?	God	Father		John 10:30	Genesis 1:31 God's perfect fellowship with Adam in The Garden of Eden	
		Son				
		Holy Spirit				
	Mankind	Living		Genesis 1:1		
		Deceased believing				
		Deceased unbelieving				
	Angels	Holy		No Creation No people	Genesis 1:31 No Fall No unholy Angels	
		Imprisoned				
		Fugitive				
		First Beast				
		False Prophet				
		Satan				
Why are we?			▶		Romans 11:25-36, Ephesian 2:7	

Mankind is created in God’s image, male and female He created us

Sin entered the world through Adam and then death through sin

When are we?				
Fallen				Glory
Fall to sin No Law	Moses' Law 1500 B.C.	Christ 33 A.D.	Church Age Kingdom Age	New Heavens and Earth
1 Timothy 6:16 Living in unapproachable light				Acts 3:21 Philippians 2:11 Revelation 20:3 God's perfectly restored fellowship with all Mankind praising Christ as Lord in the Holy City
John 8:58 Pre-incarnate		John 1:14 Incarnate	Luke 23:43 Paradise	
Psalm 139:7 Everywhere		John 14:17 Living in believers		
Ephesians 2:1-5 Serving the Savior or Satan on Earth				
Luke 16:22 Blessed in Paradise				
Luke 16:23, Revelation 20:5,13 Punished in Hades until the final judgment				
Hebrews 1:14 Serving mankind at God's command				
2 Peter 2:4, Jude 6 Imprisoned in Tartarus				Matthew 25:41 Revelation 20:10 Lake of Fire prepared for the Devil and his Angels
			Revelation 20:13 Thalaasa	
1 Peter 5:8, Revelation 12:10 Rebelling against Christ Accusing mankind			Revelation 19:20 Lake of Fire	
			Revelation 20:2 Abyss	

For God has bound all over to disobedience in order to show mercy to all

Destiny

Ruáingga at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, *"the gates of Hades will not prevail,"* Matthew 16:18. Paul asks, *"Hades where is your victory?"* 1 Corinthians 15:55. John wrote, *"Hades gives up,"* Revelation 20:13.

Jesus comforts us saying, *"Do not be afraid,"* because he holds the keys to *unlock* death and Hades, Revelation 1:18. Yet too often our *Good News* sounds like a warning to *"be afraid"* because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, *"out of the frying pan, into the fire?"* Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, *"Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. *"If the first fruit is holy, so is the whole,"* Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



Hétolla zoo, tamám koum ókkol ore Añr ummot banogoi; Itara re Baf'or, Fuar edde Pak-Ruhr name báptisma dño. - Matthew 28:19

